

Урусатдин илмарин Академия
Чалар ахтармиш апIру Институт

Цийи Йикърар

Цийи Йикъар

Библия илтИкIру Институт

Москва 2010

Цийи Йикъар

Фикрар-хиялариз:
ibt_inform@ibt.org.ru

ISBN 978-5-93943-149-1

© Институт перевода Библии, Москва, 2010

Сифте гаф

Гъюрматлу дустар!

Учвухъ хъайи му «Цийи Йикърар» күруу Китаб Аллагъдин гирами китабдин кьюбпи пай ву.

Сабпи пай, Кюгъне Йикърар, мегъел жугъуд чалнаан ихъ чалназ илтібкінадар. Дидин күүлин мяна-метлеб, сар касди, Адамди, учв халкъ гъаптую Аллагъди күүруб дараңди, фици гъадгъулантина гъабхъи вари инсаният гунагъвализ ахънуш ва гъадму гунгъиккан адмийир уърхбан бадали гъаптнуу ккундуш, улупуб ву. Яни Дугъу Чаз Чан хусуси халкъди жугъдар ктагъуру, дурарихъди Йикърар йитінүү, Къанун дебккру, хъа дурарихъан думу Йикърар, Къанундиз улупнайиси, күүлиз адагъуз гъабхъундар. Дурари, чпин терефнаан, Йикърар тамам апїури гъахъундар күүри, Аллагъра, дурализ дилигнүү, Чав күүруб тамам апїбахъан гъудучыундар. Жугъарихъди йитінайи Йикърарилантина вари инсаниятдиз дубхъну ккуни уж'вал Аллагъди тамам апїури имии. Гъамус Дугъу жугъарихъди ваъ, хъа вари инсанарихъди Цийи Йикърар йитінүү ккундийи. Цийи Йикърар чпин ихтиярнаш учыган, сабпи Йикърар йирсивализ, яни кюгъневализ илтікінийи.

Аммаки, гъадму Кюгъне Йикърарна Къанун инсанариз, чпин удуудукърувал ва чиб-чпинди чпин гунгъариан удуучындуулупуз күүри, Цийи Йикърарихъ хъаптрайи рякътлан дайи. Ари гъадму Кюгъне Йикърарип жугъуд халкъдихъди улхури гъахъи Аллагъ гъаму Цийи Йикърарип, инсанарин арайиз дуфну, Учв адмиси адмийирихъди улхури гъахъну ва гъамус, гъиямат йигъаз хъана гъюрза дупну гаф тувну, айршариз душна.



Думу адмийиригъна гъаз гъафну? Кюгъне Йикъариъ Къанундиинди гъарсар касди чан гунгъихъанди мал гъурбан дапIну ккундийи, гъякъди апIуруш, гунағъ гъапIур аյжализ тувну ккундийи, хъа Аллагъдиз гъарсар кас масанди ву: Дугъу, инсан чИ-види гъитну, гъадгъан гунгъарихъанди маларин ифи удубзуз гъитру, эгер гунағъ гъапIу гъар касдин ифи удубзуиши, дюн'яйин гъич сар каскъан гъузидайи, гъаддиз инсандинхъанди инсандин гунгъин жаза малариин алабхъуру.

Аллагъдиз инсанар гъадмукаан ккун гъахъуншра, дураг гунгъарихъан хътакундар. Фукъанна фукъан ва фукъандизкъан гъич саб тахсир ктру маларин ифи удубзури хъидихъя! Аллагъдиз инсан гъадмукаан масанди вуйиган, Дугъу дурагихъан гъиямат ийгъан Чан улихъ гъич саб тахсир ктарди дугъужвуз шлуси, саб ужу шлу рякъ ктабгъну ккундийи. Сар балайикк ккахънайиган, думу ккунири гъапIну ккунду? Дюз вучва, жувван жан гъайиф дапIну ккундар; ари Чав халкъ гъапIу инсан масан гъапIу Аллагъдира, гунгъарий кIулихъди арснайи инсан марцц апIбан бадали, Чан жан гъайиф дарапIди, варидарихъанди сар Учв гъурбан гъахъну. Дугъу гъапIу ужувлаз дилигну, гъар шли Думура гъаци ккун гъапIиш, дицир Дугъахъди гъаммишандиз жен-нетдиль ахъди. Жараси женнетагъли хъуз шлуб дар.

Ари Аллагъдин гъадму ужувлакан ктибурайи Гирами китабдин кьюбпи пайназ Щийи Йикъарар кIуру. Душваъ Аллагъдин гъадму ужувлакан ва Дугъан веледар хъпан бадали, инсанари гъапIну ккундуш, ктибура. Аллагъди, Чав гъапIу ужувлакан вари инсаниятдиз хабар дебккай, гъапну, ари гъадму Хабар – Щийи Йикъарар, учу, табасаран чАлназ илтIибкIу Рашид Ази-зовди, гъалатIар ктагъу Шарафудин Дащдемировди, Шамиль Казиевди, Сабрина Шихалиевайи, Михаил Алексеевди ва Гирами китабар илтIикIру институтдин, бицIирилан ккебгъну, вари гъулугъчири табасаран халкъдиз дебккрача.

Щийи Йикъарнаъ улупнайи гъядисийр хъуз хьюгъхъанмина, яни думу Уж'вал инсаниятдиз дебккхъанмина кьюд агъзур йис-Тан зина гъубшну. Щийи Йикъарин пай гъадму гъядисийр чпин улариз гъяркъю шагыдари грек чАлниинди дибикIнайи Гирами китаб ву. Дидин хъана уччуви гъавриъ ахъруси, Китабдин ахирий, алахъру читин гафарин мяна ачухъ апIурайи



СИФТЕ ГАФ

словарь ва гъядисийр наан шули гъахьнуш гъаврий тIаърайи шиклар, схемийир ва картийир туврача.

Цийи Йикъар 27 Китабдикан ибарат дубхънайи саб гъварч ву, ва, урхрудариз сацIиб гъаврий ахъуз кюмек ибшри дупну, гъар Гирами китабдин улихь дидкан жикъидиси мялуматра туврача.

Библия илтIибкIру институтди думу табасаран чIалназ илтIибкIдари, дидин редакторариз ва думу адабгъуз кюмек гъапI-дари – варидализ чухсагъул кIура. Табасаранализ чпин багъри чIалниинди Аллагъдин Гаф урхуз мумкинвал хъувалиин учу шад вуча.

Библия илтIибкIру институт



МАТТАЙИ КТИБТУ УЖУВЛАН ХАБАР

Аллагъди гъапIу гъадму гъядисийрин вахтари Рим гъюкумадиз налогар уч апIури гъахьи гъуллугъчи Маттайи чайн улубкъуб Гирали Рюгънан хиликкди гъаму Китабдич ктибтура. Китаб 60-пи – 65-пи йисари гъбикиIуб вуди гъисаб апIура. Саб разжари, чан гъарганси, налогар уч апIури чан ишиш'ин дебнайи Матта Исайиз рякъюру. Гъаму вахтнахъанмина Маттайин уймур асуулагъ дигиши шулу. Думу сарун Исайихъан, шагърар гъулар вуйибси лицури, зат хътакури гъахъундар. Матта чав дикIурайи Ужувлан хабарнаң улуннайи гъядисийрин шагъид гъахъну. Дугъу Иса, гаф тувну, гъаму дюн'я уьбхюз дуфнайи Уърхрур вуйивал тастикъ апIури, Кюгъне Йикъариан гизаф ишишвар улупура. Хъа Кюгъне Йикъариц, Уърхрур гъиди кIури, улихъимиidi дунну айи. Му Ужувлан хабарнаң Иса гъаму дюн'яйиб мясляйт дебккүз Аллагъди гъаънайи Месиъ вуди улутура. Аършарин Адашиби гъаънайи Исайи Чаз тувнайи гъюкум Аллагъдиси ишлетмииш апIуйи. Мушваъ Исайин улхбар иирхъуб пайназ жара апIуз шулу:

1. Дагъдин туву аьгъювалар (5-6-пи кIулар);
2. Исайи Чан терефкрагиз туву табшуругъ (10-пи кIул);
3. Аършарин гъюкмикан тахалус (13-пи кIул);
4. Чан терефкрагиз лазим насигъятар (18-пи кIул);
5. Фарисеярин иблисвал ва дюн'яйин улукъру гъядисийр (23-25-пи кIулар).



Месигъ Исайин ата-бабийр

1 ¹Магъя Ибрагымдин наслиан вуйи, Давудрин тухмиан вуйи
Месигъ Исайин ата-бабийр:

² Ибрагымдиз Исакъ кIуру бай гъахъну, Исакъдиз Якъуб,
Якъубдиз Ягъудана дугъан чвийр гъахъну;

³ Ягъудайиз Тамар кIуру хпирикан Перецна Зерагъ гъахъну,
Перецдиз Гъецрон, Гъецрондиз Арам гъахъну; ⁴Арамдиз Амми-

надаб, Амминадабдиз Нецрон, Нецрондиз Салман гъахъну;

⁵Салмандиз Рагъабдикан Воаз, Воаздиз Рутдикан Обед, Обеддиз
Ессе гъахъну; ⁶Ессеиз Ягъудия уълкейин паччагъ гъахъи Давуд

гъахъну. Давудриз сифте Урияихъ хъади гъаши хпирикан Су-
лейман гъахъну; ⁷Сулеймандиз Ригъаб, Ригъабдиз Абия, Абия-

йиз Аса гъахъну; ⁸Асайиз Юсафат, Юсафатдиз Юрар, Юрардиз
Уззия гъахъну; ⁹Уззияйиз Ятам, Ятамдиз Агъаз, Агъаздиз Гъиз-

кия гъахъну; ¹⁰Гъизкияйиз Манассей, Манассейиз Амон, Амон-

диз Яния гъахъну; ¹¹Янияйиз (жуғдар Вавилондиз адау девирь)
Ехония гъахъну; ¹²Ехонияйиз (Вавилондиз адаъхъан) Шалтиэл,

Шалтиэлиз Зеруббабел гъахъну; ¹³Зеруббабелиз Абиуд, Абиуд-

диз Элияким, Элиякимдиз Азор гъахъну; ¹⁴Азориз Садок, Са-
докдиз Агъим, Агъимдиз Элиуд гъахъну; ¹⁵Элиуддиз Элизар,

Элизариз Маттан, Маттандиз Якъуб гъахъну; ¹⁶Якъубдиз, Ме-
сигъ Иса гъапIу Мар'ямдин жилир Юсуф гъахъну. ¹⁷Гъаму са-

ягъниинди, Ибрагымдилан гъадабгъну Давудриина гъайиз йи-

циIиюкъуб наисил, Давудрилан гъадабгъну Вавилондиз адаайиз
йициIиюкъуб наисил ва Вавилондиз адаъхъан Исайина гъайиз-

ра йициIиюкъуб наисил шула.

Месигъ бабкан хъуб

¹⁸ Месигъ Иса гъамци бабкан гъахъну: Дугъан дада Мар'ям
Юсуфдиз хъирснайи. Мар'ямдик шувуз гъягъайиз Гирами
Рюгъналан бицIир кади шулу. ¹⁹Хъасин дугъан жилир гъахъи
Юсуфдиз, учв гъялал кас вуди хъпаз лигну, Мар'ямдикан чIуру
аваза ипуз даккунди, чан дирчу лишнар жиниди къяляхъ апIуз
ккун шулу. ²⁰Дугъу гъамциб хиял гъапIиган, нивкIукди дугъахъ-
на Агъайин малайик дуфну, гъамци гъапну: «Давудгъярин бай
Юсуф! Мар'ям хпириди гъадагъуз гучI мапIан, фицики Дугъак



кайи БицИир Гирами Рюгъналан ву. ²¹Мар'ямди Бай апИиди ва Дугъ'ин Иса кIуру ччвур иливидива, фицики Дугъу Чан халкъ гунгъарихъан уърхиди». ²²Хъа вари гъаму ляхнар Агъайи Пайгъамбрин мелзналан гъапи исихъайи гафар кIулиз удучIвуз тамам духнайидар ву: ²³«Магъа, шурак БицИир киршди, Бай апИиди ва Дугъ'ин Эммануил, яна „Ухъухъди Аллагъ хъа“, кIуру ччвур иливиди».

²⁴НивкI'ан хъиргиган, Юсуфди Агъайин малайикди гъаписи апIуру, дугъу Мар'ям хпирди гъадагъуру.

²⁵Амма Мар'ямди чан сарпи Бай апIайизкъян, Юсуф дугъахъ гъучIври гъахъундар; хъа Бай гъашиган, Дугъ'ин Иса кIуру ччвур иливуро.

Исайихъна гъафи аъяндрар

2 ¹Иса Гыирод паччагъдин деврий Ягъудия уълкейиль аий Вифлеем кIуру шагърий бабкан гъахънийи. Магъа, Ерусалимдиз ригъгуудубчIвру терефнахъан аъяндрар гъюру. ²Дураги гъерхру: «Ягъудияйин паччагъ хъуз пну бабкан гъашири нашди? Дугъкан хабар туврайи хяд ригъгуудубчIвру терефнаш кабхъну гъябкъончуз, ва Дугъаз икрам апIуз гъафунча».

³Му гафар гъеерхъган, Гыирод паччагъдик ва Ерусалимдин агъалийирик гъалабулугъ кабхъру. ⁴Думуган Гыиродди, жугъдарин вари аъхюну маллийир ва къанунчийр уч дапIну, дурагихъан, Месигъ наан бабкан духъну ккунир вуйи, – пну, гъерхру.

⁵ – Ягъудияйин Вифлеем шагърий, – жаваб тувру дураги, – фицики Пайгъамбрин Китабдий дикикIна:

⁶ «Увура, Вифлеем, Ягъудия юрднан шагъарин арайиль сабдиндира бицИиб дарва, фицики ув'ан удучIвиди Йиз Израилин халкъ уърхру Аъхюр».

⁷ Думуган Гыиродди, дуфнайи аъяндарииз жиниди дих дапIну, дурагихъан хяд гъудубчIвру вахт гъерхну, дюзди аъгъю апIуру. ⁸Ва, дураг Вифлеемдиз рякъюш тIаъри, гъамци кIуру: «Душну БицИирин гъякънаан вари уччвуди аъгъю апIинай. Хъа учвуз Думу гъидихъган, узузра хабар дебккай, узхъанна, душну, Дугъаз икрам апIуз шлуганси». ⁹Паччагъдихъ хъебехъну, дураг рякъюш учIвру. Ва магъа завун



ригъгуудубчIвру терефнаь чпиз гъябкью хяд, тап БицIир айи йиш'ина дубшну дийибгъайизкъан, дуарин улихъди гъябгъору. ¹⁰ Аяндрап, хяд гъябкъган, къадар адрубкъан шад гъахъний. ¹¹ Ва хуаль учIвган, дуариз БицIирна Дугъан дада Мар'ям рякъору ва жил'ина ис духьну, Дугъаз икрам апIуру. Хъасин, чпин пешкешар адагъну, БицIириз тувру: гъизил, ладан кIуру ици ниь хъайи ягъ ва смирана кIуру багъалу дармансиб шей. ¹² Ва Гыроддихна къяляхъ махъадаканай кIури нивкIукди дябкъну, аяндрап жара рякъюьди чпин юрдариz гъягъору.

Египетдиз гъергну гъягъюб

¹³ Дуарар гъушхъан, магъя Юсуфдиз нивкIукди малайикди дуф-ну кIуру: «Гъедужв, БицIирна Дугъан дада увухъди гъадагъну, Египетдиз гъергну гъарах ва узу увуз хабар апIайизкъан душваь гъуз; фицики Гыироддиз, БицIир пуч апIбан бадали, Думу агуз ккунди а». ¹⁴ Юсуфра дишла, гъадму йишван гъедужвну, Ислана Мар'ям гъадагъну, Египетдиз гъягъору ¹⁵ ва, Гыирод кечмиш хъайизкъан, душваь гъузру. Гъамци, Агъайи пайгъамбрин мелз-налан: «Египетдian Узу Йиз Бализ дих гъапIунза», гъапи гафар кIулиз удучIвуз кIури, гъабхъиb вуйи.

БицIидар терг апIбан Гыироддин буйргъ

¹⁶ Ва думуган Гыирод, аяндрапи чаз кучIлар гъапIуб аygю дубхъну, хъолу ацIиний ва дугъу Вифлеемдиъна дидин айтрафарий айикъан къюд йисазкъан вуйи вари жили веледар пуч апIуз чан эскрап гъарьу. Швнуд йисасъ аидар дийихну ккун-дущ, Гыиродди аяндрапи гъапибиан аygю гъапIиний. ¹⁷ Гъам-ци Еремия пайгъамбрин мелзналан дупнайи гъаму гафар кIулиз удучIвний:

¹⁸ «Рама шагърий гъал абхъна ишбан, ишларин зур-ба фигъан; Рахил ишура чан веледарихъ, дугъаз ккебехъуз ккунди адар, гъаз гъапиш дуарар сарун имдар».



Египетдиан хъадакну гъюб

¹⁹ Хъя Гыиород кечмиш гъашихъан, Египетдиъ аий Юсуфдихъна нивкIукди Аллагъдин малайик гъюру ²⁰ ва гъамци кIуру: «Гъудужв, БицIирна Дугъан дада гъадагъну, дураппа хъади Израилин ругариина гъарах, фицики БицIирин айжал ккунидар гъийихну». ²¹ Юсуф гъудужву ва, БицIирна Мар'ям гъадагъну, Израилин ругариина хъадаку.

²² Ягъудияйиъ чан адаш Гыиороддин ерина дугъан бай Архелаиी паччагъвал апIурайиваликан гъеебхъган, Юсуфдиз дина гъягъюз гучI гъабхънийи. Амма хъасин чаз нивкIукди хабар дебкк-ган, думу Галилейин ругариина гъягъюру. ²³ Ва душваз дуфну, Назарет кIуру шагърий бин ккебгъну. Гъамци: «Месигъдиз Назарей ччвур тувди», – кIуру пайгъамбрарин гафарра кIулиз удучIвнийи.

*Штуан апIру Ягъ'яйи
аьгъювалар улупуб*

З ¹Думу йигъари штуан апIру Ягъ'я дуфну, Ягъудияйин чюллериъ аьгъювалар улупуз хьюгъру: ² «Ичв гунгъар гардандиъ дидисну, уьмур дигиши апIинай, – кIуйи дугъу, – фицики Аллагъдин Паччагълугъ багахъ шула». ³ Гъадму Ягъ'яйикан вуйиш-Тан Ишая пайгъамбри гъамци дупнайиб: «ИчIи чюлиъ дих атIабгурга: Агъайиз рякъ ккабалгай. Дугъаз рякъяр-жилгъийир дишдар апIинай!» ⁴ Ягъ'яйинин девейин хъайин палат алии, юкъвнаан гъидкын яркы чIул идибIнайи. Дугъан ипIру хураг елгнагарна чIурдин йичв вуйи. ⁵ Гъадмуган дугъахъна Ерусалимдиан, вари Ягъудияйиан ва Ярдан нириин альтрафарихъан гизаф халкъ гъойи. ⁶ Чпин гунгъарииин швумал духьну, дурари чпин гунгъар гардандиъ дисуйи, ва Ягъ'яйи дураг Ярдан нирий штуан апIуйи. ⁷Хъя чахъна хайлин фарисийирна саддуккийир штуан апIуз гъюри дяркъну, Ягъ'яйи дурагиз кIуру: «БитIракан гъахъидар! Гъоз ккайи Аллагъдин хъюлхъан гъергүз шли улупунчвуз?! ⁸Учву, ичв гунгъар гардандиъ дидисну, уьмур дигиши апIуз шлуси, ичв ляхнариинди улупай. ⁹ Ва: „Ич аба Ибрагим вуйич“ кIуру гафар учвуз чIяаън ву пну, миж микиванай, гъаз гъапиш учвуз кIуразаки, Аллагъдихъан гъаму гъванариканра



Ибрагымдиз веледар ктауз шулу. ¹⁰ Гъарин къаблихъ магъа екІв гъязурди хъя: гъяни йимиш туври адру гъарсаб гъар алдабтIиди ва цIигъна гатIабхьиди.

¹¹ Учву гунгъарихъан марцц хъпан лишан вуди, узу учву анжагъ штуан апIураза, амма йиз къяляхъди Гъюрайир узутIанна Къудратлур ву, узу Дугъан шаламар гъахузкъан лайикъ дарза. Дугъу учву Гирами Рюгънахъдина цIихъди цIийи алаидичву. ¹² Дугъан хилий йирф хъиби, Дугъу дяхинна нахъв жара апIиди: дяхин Чан танхарий абхъди, хъя нахъвар гъаммишан убгру цIигъ гъяхъну ургиди».

Иса штуан апIуб

¹³ Гъадму вахтна Ягъ'яйихъна штуан апIбан бадали Ярдан нирихъна Галилей уылкейиан Иса гъюру. ¹⁴ Ягъ'яйиз сифте му ляхникк кIул ккивуз даккунди гъабхънийи: «Уву узу штуан апIуб лазим ву, хъя Уву узухъна гъюрава!»

¹⁵ Амма Исаий дугъаз жаваб вуди гъапи: «Гъит му ражну гъамци ибшри, фицики Аллагъди улупнайиб ухъу вари кIули гъабхуб лазим ву». Ва гъадмуган Ягъ'я Иса штуан апIуз рази гъахъи.

¹⁶ Штуан гъапIубси, Иса ниркан кудучIвuru, магъа сабпну Дугъаз завар ачмиш гъаши, Дугъаз луфси ис шулайи Гирами Рюгъ Чайна гъюри гъябкью. ¹⁷ Ва зав'ан дих шулу: «Му Йиз масан Бай вуйиз, Узу Дугъ'ин гизаф рази вуз!»

Иса ахтармиш апIуб

4 ¹ Мидин къяляхъ Гирами Рюгъну, Иса рякъ'ан адауз иблис чалишмиш хъуз кIури, Иса ичи чиолиз гъухнийи. ² Душваъ Думу ягъчIвур йигъянна ягъчIвур йишвандин арайиъ уъл дирипI-ри гъузну, ахирки Исаиз гаш гъабхънийи. ³ Думуган иблисди, Дугъахъна дуфну, Дугъаз гъамци кIуру: «Эгер Уву Аллагъдин Бай вуш, гъаму гъванарикан уълер хъуз гыйт».

⁴ Жаваб вуди Исаий гъапи: «Гирами китабарий дикиIнаки: „Инсан ялгъуз уъл'инди варь, хъя Аллагъдин ушвиан удубчIвурай гъарсаб гафниинди яшамиш хъиди“».

⁵ Думуган иблисди Иса гирами вуйи Ерусалим шагъриз хъади гъягъюру, Аллагъдин хулан вартIан ягълишв'ин дерккру ⁶ ва Дугъаз кIуру: «Эгер Уву Аллагъдин Бай вуш, гъамлин исина урс,



фицики дибикIна: „Аллагъди Чан малайикариз Яв гъайгъушнаъ хъуз амур апIиди ва, Яв ликкъан гъвандихъ йивуз гъидритугранси, Уву чпин хилариина гъадагъиди“».

⁷ Исаий кIуру дугъаз: «Гирами китабарин жара иишваъ гъамцира дибикIна: „Яв Агъа Аллагъ ахтармиш мапIан“». ⁸ Думуган иблисди Иса хъанара саб лап ягъал дагъдиона гъахуру, дилин Дугъаз дюн'яйин вари паччагълугъар, дуарин ад улупуру ⁹ ва Дугъаз кIуру: «Эгер Уву, ис алахъну, узуз икрам гъапIиш, гъамрар вари Увуз тувдизавуз».

¹⁰ Думуган Исаий кIуру дугъаз: «Фана йибхъ Узхъан, иблис! Гирами китабарий дибикIна: „Яв Агъа Аллагъдиз икрам апIин ва сар ДугъазIан гъуллугъ мапIан!“»

¹¹ Думуган иблис Исаийхъан гъудубчIвну гъябгъюру ва магъа малайикар, дуфну, Исаин гъайгъушнаъ дийигъуру.

Иса Кафернагъумдиз

¹² Хъа Ягъ'я дустагъ дапIайиваликан гъеебхъиган, Иса Галилей улкейиз гъягъюру. ¹³ Думу, Назаретдиан удучIвну, Забулун ва Нафталим кIуру юрдарин аутрафарий айи Галилей гъюлин гъирагъдихъ хъайи Кафернагъумдиз дергру. ¹⁴ Мици гъаддиз гъабхъниики, Ишая пайгъамбрин мелзналан гъамци дупнайиб улубкъну ккундийи: ¹⁵ «Ярдан нирин гъюлихъинди терефнаъ айи Забулун юрд ва Нафталим юрд! Галилей улкке, аллагъсузарин макан! ¹⁶ Мушватъ мучIувалий айи халкъдиз зурба акувал гъябкъну ва ажжалин сирникк ккайдариз нур удубчIвну!»

¹⁷ Думу вахтналанмина Исаий, аygъовалар улупури, гъамци кIуз хъюгъру: «Ичв гунгъар гардандиз дидисну, уьмур дигиш апIинай, фицики Аллагъдин Паччагълугъ багахъ дубхъна».

¹⁸ Иса Галилей гъюлхъантине гъягъюрайиган, Дугъаз чвийир вуйи кьюр кас гъяркънийи: Петри лакIам хъайи Симон ва дугъан чве Андрей. Дуарар балугъчийир вуйи, ва думу вахтна дураги гъюликк чул ккипрайи. ¹⁹ «Узухъди гъачай, – кIуру Дугъу дурагиз, – Узу учвкан инсанарин юкIвар дисру балугъчийир ктатуруза». ²⁰ Дуарар гъадмусяльт, чпин чулар дирчну, Гъадгъахъди гъягъюру.

²¹ Гъадлин тинаси гъушган, Исаиз хъанара жара кьюр чве рякъюру: Зеведейин бай Якъубна дугъан чве Югъан. Дураги чпин



адаш Зеведейихъди люткейиъ чулар рас апIурайи. Исаи дурализра дих гъапIу²² ва дурарра гъадмусяайт, люткена чпин адаш гъитну, Исаихъди гъягъюру.

Иса халкъдин гъуллугънаң

²³ Исаи, вари Галилей уылке вуйиси лицури, жугъдарин мистариъ аygъювалар улупури, Аллагъдин Паччагълугъдикан хабар туври, гъарсаб уъзрихъан халкъ сагъ апIури гъахъну.

²⁴ Дугъан ад вари Сирия вилаят вуйиси абхънийи, Исаихъна гъар жюреин уъзрар кайдар хуз хъюгъру: жинар кайдар, гъарза шлудар, паралич кайдар, – ва Дугъу дурар сагъ апIуи.

²⁵ Галилей уылкейиан, ЙицIубшагъриан, Ерусалимдиан, Ягъудияйиан ва Ярдандин автрафарихъан гъюри, гизаф халкъ Дугъан къяляхъди лицури гъахъну.

Исаи дагъдин аygъювалар улупуб

5 ¹Уч духнайи халкъ дябкъну, Иса дагъдина удучIвуру; ва, деъган, Дугъахъна Дугъан ученикар гъюру. ²Дугъу дурализ гъамци аygъювалар улупуз хъюгъру:

³ – Бахтаврап ву Аллагъдин улихъ касиб вуйидар, фицики Аyr-шарин Паччагълугъ гъадринуб ву.

⁴ Бахтаврап ву дерд зигрудар, фицики дураг Аллагъди ккарциди.

⁵ Фурс ктрудар бахтаврап ву, фицики дурализ ирс вуди жил рубкъиди.

⁶ Агъайн гъякъвалихъ дахаргнайидар бахтаврап ву, фицики Аллагъди дураг тухъ апIиди.

⁷ Бахтаврап ву рягъимлудар, фицики дурагилан хил алдабгъиди.

⁸ Бахтаврап ву юкIв марццидар, фицики дурализ Аллагъ рякъиди.

⁹ Ислягъвал гъабхрудар бахтаврап ву, фицики дурализ Аллагъдин веледар пиidi.

¹⁰ Бахтаврап ву Аллагъдин гаф тамам апIурайиган утIуккураидар, фицики Аyrшарин Паччагълугъ гъадринуб ву.

¹¹ Бахтаврап вучва учву, гъаз гъапиш, Йиз ученикар хъпаз лигну, учву беябур апIура, учвухъ хъергра ва учвлан футнийир апIура.



¹² Гъаци беябур апIури гъахьну учву хъайиз гъахьи пайгъамб-
рарра. Рazi йихъай ва шадвал ачмиш апIинай, фицики айрша-
рий учвуз аий пешкеш зурбаб ву.

Жилин кыил

¹³ Учву жилин кыил вучва. Амма кылан кылзишин гъудуб-
гиш, думу фти кылзи апIиди? Думу сарун фтизкIа ярамиш
шулдар: думу сарун, инсанарин ликариккан апIруси, гатIаб-
хъиди. ¹⁴ Учву дюн'яйин акв вучва. Дагъдиин али шагъур дя-
рябкъди гъубзидар. ¹⁵ Ва чирагъ кабхъиган, думу гъабран кIанакк
ккидрикур, хъа, диди хулаъ вардариz акв туврганси, чан йишв'-
ин дивур.

¹⁶ Гъит гъаци ичв аквну инсанарин арайиъ акв туври, ичв ужу-
дар ляхнар дурализ рякърганси ва дурари Айршарин ичв Адаш
адлу апIбан бадали.

¹⁷ Хиял мапIанайки, Узу Къанун вая пайгъамбрап батIул апIуз
Дуфнайир ву кIури. БатIул апIуз ваъ, хъа дурари кIурайиb кIу-
лиз адабгъуз Дуфнайир вуза. ¹⁸ Фицики дюзди кIуразачвуз, гъе-
лелиг заварна жилар имиди, дибиkIайиb вари тамам дархыкъан
гагъди, Къанундиан гъич саб гъярфкъан, ясана саб цАркъан дуб-
гидар. ¹⁹ Гъаци вуйиган, му гафарикан фукIа тамам дараpIур ва
гъаци жара адмийирихъириа апIуз гъитрур Айршарин Паччагъ-
лугъдиъ вартIан бицIир буди гъисаб апIиди. Хъа шли думу гафар
тамам гъапIиш ва жара касарихъра гъаци апIуз гъитиш, думу Айр-
шарин Паччагълугъдиъ вартIан зурба кас хъиди. ²⁰ КIуразачвузки,
эгер учву Аллагъдин табшуругъар къанунчирина фарисийириtIан
ужуди тамам дараpIди гъашиш, учву Айршарин Паччагълугъдиъ
учIвидарчва.

Ажугълуваликан

²¹ Учвуз аygъячвузки, ихъ ата-бабийириз фу дупнаш: «Адми йив-
ну миликIан; хъа шли гъакIиш, дугъу суддин улихъ жаваб тув-
ди». ²² Хъа Узу учвуз кIуразаки, шли чан багахълу хъюлакк гъиди-
сиш, думу чан суд апIбакк ккуркъди, ва шли чан гъардшиz «усал
каc» гъапиш, думу Заан диванханайиъ чан суд апIбакк ккуркъ-
ди, хъа шли жаариз «ахмакъ» гъапиш, думу жегъеннемдин цИгъ
гъитбакк ккуркъди.



²³ Гъаци вуйиган, эгер уву Аллагъдин яв багъиш Аллагъдин Хулаз хури айиган, яв гъардлизувкан гиран кайивал кІваин гъабхьиш, ²⁴ гъурбан апІру йишвахъ яв багъиш гъибтну, душну, сифте яв гъардшихъди мясяльтар апІн, хъасин, дуфну, яв багъиш гъурбан апІн.

²⁵ Эгер шлиз увухъди суд апІуз ккунди аш, шлукъан ухди, суддиз рякъюъ имиди, мясяльтар апІн. Даршиш дугъу уву судья-ийхъна, хъа судьяйи гъаравлихъна тувди ва дустагъдиль итдиву.

²⁶ Гъякъди кІуразавуз: ахиримжи кепкиина гъайиз яв вари буржктипайизкъан, душв'ан удучІвидарва.

Къяппаваликан

²⁷ Учвуз гъеебхънийчвузки: «Къяппавал мапІан», – кІури. ²⁸ Хъа Узу учвуз кІуразаки: фуж жара дишагълийхъинди тямгынинди лигураш, дугъу сарун чан кІваль дугъахъди къяппавал гъапІну.

²⁹ Эгерки яв арччулну ули уву гунгъихъна гъахураш, думу адабгъва гатІабхъ тина, фицики бедендин саб гъендермидихъан шуб ужу вувуз, яв вари беден жегъеннемдиль ипайиз. ³⁰ Ва эгер яв арччул хили уву гунгъихъна гъахураш, хъадабтI думу ва гатІабхъ тина, фицики бедендин саб гъендермидихъан шуб ужу вувуз, яв вари беден жегъеннемдиль ипайиз.

Xипр гъидитбакан

³¹ Дупна гъацира: «Эгер фуж чан хпирихъан жара шулаш, дугъу хпирихъна жара хъпан кагъаз туври». ³² Хъа Узу кІуразачвузки: шли, чан хипр, дугъу къяппавал дарараІди, гъидитиши, дугъу думу хипр къяппавалихъ хъаъра; ва шли гъидитнайир чаз дитиши, дугъура къяппавал апІура.

Xу апІбакан

³³ Хъана, аygъячвузки, ичв абийир-бабариз фу дупнаш: «Уву гъапІу ху чур дарараІди, Агъайн улихъ тамам апІн». ³⁴ Хъа Узу кІуразачвузки: затра ху мапІанай: я аyrшиинди, гъаз гъапиш аyrшар Аллагъдин тахт ву; ³⁵ я жилариинди, гъаз гъапиш жилар Аллагъдин ликарикк йишв ву; я Ерусалимдинди, гъаз гъапиш думу Къудратлу Паччагъдин шагъур ву; ³⁶ ясана жувван кІул'ин-дира ху мапІанай, гъаз гъапиш гъич саб Чаркъан я кІару, я лизи



апIуз хыбдарчвухъан. ³⁷ Эгер увуз «ав» пуз ккунди аш, гьаци «ав» йип; «ваъ» пуз ккунди аш, гьаци «ваъ» йип. Хъа митIлан артухъ вуйиб иблисдихъан ву.

³⁸ Учвуз гьеебхъунчвуз, дупна: «Уву шлинкIа ул идипиш, яв улра идипну ккун, ва уву шлинкIа силиб идипиш, яв силиб-ра идипну ккун». ³⁹ Хъа Узу кIуразачвузки: писвализ писвал мапIан. Яв арччул гарцIиккан бачI ккадатуриз тмунубра ккив. ⁴⁰ Ва фуж, увухъди суддиз удучIвну, яв кIанккан ккабхъ-ру ккуртт ккидибтуз ккаш, дугъаз яв зълан алабхъру палатра тув. ⁴¹ Ва шли уву чахъди саб манзил гъягъюз мажбур апIу-руш, дугъахъди кьюб манзилра гъарах. ⁴² Увкан тIалаб апIура-ириз тув, ва увкан буржназ ккун апIурайирихъан маш магъ-дабгъян.

Душмнарихъна вуйи ккунивал

⁴³ Учвуз гьеебхъунчвуз, дупна: «Багахъ хайир ккун апIин, хъа душман – даккун». ⁴⁴ Хъа Узу кIуразачвузки: ичв душмнар ккун апIинай, ва ичв къяляхъ хъаънайидарихъанди ккарагай. ⁴⁵ Мид’-инди учву Айршин ичв Адашдин баяр хъидичва, гъаз гъапиш Дугъу гъам пис касар, гъамсана гъянидар Чан ригъдихъди тямин апIура ва мархъра гъам гъякълудариина, гъамсана нягъякъ вуйи-дариина гъапIра. ⁴⁶ Фицики анжагъ учву ккунидартIан ккун апI-дарш, учвуз фтин бадали пешкеш хъибди? Налук гъадабгъурайи-дарира гьаци апIурадаринхъя? ⁴⁷ Хъа нагагъ учву анжагъ ичв гъардшартIан тебрик апIури шулдаш, имбудари апIурайибтIан артухъ учву фу апIурачвахъя? Гьаци апIури шулдаринхъя аллагъ-сузарира? ⁴⁸ Гьаци вуйиган, ичв Айршин Адашси, тамамлудар иихъай.

Касибарииз кюмел туувуб

6 ¹Лигай-гъа, учву апIуру уж’вал варидаrin улихъ рябкърганси мапIанай: даршиш Айршин ичв Адашдин терефнаан учвуз пешкеш хъибдар.

² Гъаддиз, гъар фила-вшра учву касибарииз уж’вал апIрган, кьюб маш гъяйидари чпин тярифар апIри дупну, мистариъна кючирий апIрганси, гъарийр мапIанай. Гъякъди кIуразачвуз, дурагирихъна сарун чпин рубкъру пай вари дурубкъна. ³ Уву уж’вал



апIруган, яв арчул хили гъапIраш, гагул хилиз аygю дарибшири.⁴ Яв уж'вал жиниди ибшри. Жиниди апIурайибра рябкъру Яв Адашди думуган увуз пешкеш тувди.

Адашдиз ккарагуб

⁵Хъа учву ккарагруган, варидализ рякъри кIури, мистариъна кючайриъ ккарагуз ккуни кьюб маш гъайидарси маxъанай. Гъякъди кIуразачвуз, дурарихъна чпин рубкъруб гъурубкъну. ⁶Уву ккарагруган, яв хулаъ учIв ва, раккин хъябкъну, душваъ шлизкIа дярякъру яв Адашдиз ккараг. Ва жиниди апIурайибра рябкъру яв Адашди увуз пешкеш тувди. ⁷Ккарагруган, аллагьсу-зариси, артухъ гафар мапIанай. Дурари фикир апIураки, чпи ги-заф гафар апIури гъахъиш, дурап ерхъиди. ⁸Гъаци дурализ ухшар маxъанай, фикики ичв Адашдиз учву ккарагайиз улихъна учвуз фу ккундущра аygъя. ⁹Гъаддиз гъамци ккарагай:

«Я а yrshariъ аий ич Адаш!

Яв ччвур гирами ибшри.

¹⁰ Яв Паччагълугъ улубкъри.

Яв гаф а yrshariъси жилиинра тамам ибшри.

¹¹ Учуз лазим вуйи уъл гъийиз ча.

¹² Учук кайи бурж учуз гъялал апIин,
ва учура жарадарик кайи ич буржар
дурализ гъялал апIурча.

¹³ Учу тямгъариъ мaaан, писвалихъан уърх».

¹⁴ Эгер учву инсанарилан хил алдабгъиш, Аyrшарин ичв Адаш-дира учвлан хил алдабгъиди.

¹⁵ Хъа эгер учву инсанарилан хил алдадабгъиш, думуган ичв Адашдира ичв гунгъарилан хил алдабгъидар.

Ушв бисбакан

¹⁶ Учву ушв бисруган, кьюб маш гъайидар фици пашманвалиъ кIул ипну лицураш, гъаци учвура машар пашман дапIину ми-лицанай. Фикики дурари, чпи ушв бисурайиб улупуз кIури, чпин машар язухъ гъюру гъялнаъ дерккра. Гъякъди кIуразачвуз, дурарихъна рубкъруб дурубкъна.

¹⁷ Хъа уву кIуруш, ушв бисруган, кушар журх, машар жикI,
¹⁸ ушу бисурайиб инсанариз ваъ, хъа дярякъди увухъ хъайи



яв Адашдиз аygъю шлуганси apIин. Гъадмуган жиниди apIура-йиb вари рябкьюрайи яв Адашди пешкеш тувдивуз.

¹⁹ Жилиин девлет уч mapIанай, мушвавь думу сурарина мюр-кью ipIуру ва угърийири, хулаь учIвну, гъитIибкIуру.

²⁰ Аyrшириин девлет уч apIинай, душвавь думу сурарина мюр-кью ipIидар ва, угърийири, архыну, гъитIибкIидар, ²¹ Гъаз гъа-пиш яв девлет наан аш, яв юкIвра гъадушваь хыбди.

²² Бедендин чирагъ ул ву. Гъаддиз, эгер яв ул марцциди вуш, яв вари беденра акуди хыбди.

²³ Хъа эгер яв улар чIур духьнаш, уву вари мучIушнаь хьидива. Гъаци вуйиган, эгер увуь аий акв мучIушин вуш, думуган мучIу-шин фициб шул!

²⁴ Сарихъанра кьюр агъайиз сабси гъуллугъ apIуз шулдар, фи-цики дугъаз санур даккун, хъа тмунур ккун хьиди; вая сариз ужуди гъуллугъ apIиди, хъа тмунуриз – чIуруди. Аллагъдизра, девлетназра сатIиди гъуллугъ apIуз хьибдарчвухъан.

²⁵ Гъаци вуйиган, kIуразачвуз: ичв гъян бадали фу ipIуруш, фу убхъуруш, ва ичв жан бадали фу алабхъуруш, гъаддин гъайгъуш-наь махъанай. Фицики уьмур – ipIрутIан, хъа беден палаттIан заан ву.

²⁶ Завуь аий жакъвариз лигай: дураги я убзури, я ккадабцIу-ри шулдар, я амбарханириз тахил уч apIдар. Хъа Аyrшин ичв Адашди дураги тухъ apIура. Хъа учву дураптIан хайлин ар-тухъ дарнучвахъя?

²⁷ Хъа учвкан фуж фукъан хьюгъишра, шилхъан чан уьмур саб сяльтназкъан ярхи apIуз шул?

²⁸ Палатдин гъякъанаанра гъаз гъайгъу качвузхъя? Чюлий аий лизи кюкайр фици аыхю шулаш, лигай: дураги я зегъмет зигура-дар, я парча убхурадар. ²⁹ KIуразачвузки, Сулейман паччагъди чан лап ад аий вахтнара дурагихъ гъарсабдихъ хъайисдар палтар алахъури гъахъундар. ³⁰ Хъа гъи ади, закур цIигъ убгурайи чюлини укI Аллагъди гъаци уччвуди балгурайиган, Дугъу учв'ин дицитIан уччвуди палат алабхъидаринхъя, цIибтIан хътругърудар! ³¹ Гъад-диз, «учу фу ipIуйкIан», «фу убхъуйкIан» вая «фу алабхъуй-кIан» kIури, гъайгъушнаь махъанай. ³² Гъаз гъапиш гъамрар вари аллагъсузари агрудар ву, хъа учвуз гъамрар вари лазим вуйиб Аyrшин ичв Адашдиз аygъя. ³³ Сифтена-сифте учву Аллагъдин



Паччагылугъдихъ хъергай ва Дугъу кIурайиб вари тамам апIахъ ийхъай. Гъаци гъапIиш, имбуб вари Дугъу тувдичвуз.³⁴ Гъаци вуйиган, закурин йигъан гъайгъушнаш махъанай, закурин йигъаз чан гъайгъушнар а. Гъарсаб йигъаз чан гъайгъушнар ЧIяян ву.

Жарадарин суд мапIанай

7 ¹Жарадарин суд мапIанай, ичвра апIидар, ²фицики учву жарадарин фициб суд гъапIиш, ичвра гъациб суд апIиди. Жарадарин тахсрар учву фициб ульчмейиинди ерцураш, ичв тахсрара гъациб ульчмейиинди ерциди.

³Увуз яв улий аий хамхар гъидрибгъди, яв гъардшин улий аий ЧIорх фици рябкъюравуз? ⁴Ваяки яв гъардшиз: «Яв улий аий ЧIорх адабгъуза» – фици пидива, хъя яв улий хамхар ади?

⁵Эй кьюб маш гъайир! Сифте яв улий аий хамхар адабгъ, ва гъадмуган, яв гъардшин ул’ан чIорх фици адабгъуруш, рябкъидивуз.

⁶ФукIа гирамиб хуйириз миккипан, даршиш дураг, илдицну ув’ин алархъиди. Яв гавагырар силарин улихъинди магатIахъан, даршиш силари дураг ликариккан апIиди.

Ча йипай, тувдичвуз

⁷Ча йипай – тувдичвуз; абгай – бихъидичвуз; раккник кучай – абщидичвуз. ⁸Фицики гъарсар ча кIурайириз тувди; абгурайириз бихъиди; кучрайириз абщиди. ⁹Ичв арайиль, уъл ча гъапиган, чан бализ гъван туврур айинхъя? ¹⁰Вая балугъ ча гъапиган, битI туврур айинхъя?

¹¹Гъаци вуйиган, учву пис адмийир вушра, учвхъан ичв веледариз ужуб тувуз удукуруган, аьршариин или Адашдихъан хъанара ужуди Чахъан ча кIурудариз багъишар тувуз хъибди.

¹²Инсанар учвухъди фици духъну учвуз ккундущ, учвура дурагхъди гъаци йиҳхъай. Фицики Къанундин ва Пайгъамбарин Китабарин мяна гъамдиль а.

Ккуру урнар

¹³Завариз арщнайи ккуру урнарианди учIвай. Фицики яркъу урнарна дабкIнайи рякъ аьжалихъна гъахрудар ву, ва гизафдар гъадлинтина гъягъюра.



¹⁴ Гъаз гъапиш ккудудубкIру уымриз гъахру урнар ккурудар ву, дина гъябгъорайи жилгъара читинуб ву. Ва цИдализтIан думу бихъурадар.

Гъар йимишдиз лигну аьгъю шулу

¹⁵ Кьюб маш гъяйи пайгъамбрихъан ихтият йихъай. Учвухъна ду-пар марччлин гъидикъ алди гъюра, айтIан кIуруш дураг вягъши жанавраг ву. ¹⁶ Дураг чпи туврайи бегъерниинди аьгъю хъидичвуз. Зазарилан тIумутI вая пялкъярилан инжир уч апIуз шулин? ¹⁷ Гъар-саб гъяни гъари гъяни йимиш, хъя чIуру гъари чIуру йимиш хуру. ¹⁸ Гъяни гъархъан чIуру йимишар, я чIуру гъархъан гъяни йими-шар тувуз шулдар. ¹⁹ Гъяни бегъер дархру гъарсаб гъар алдабIину, цIигъ гъипри шулу. ²⁰ Дураг йимишариз лигну аьгъю хъидичвуз.

Аллагъдин Паччагълугъдиз фуж учIеди?

²¹ Узуз «я Агъа, я Агъа» кIурур, фуж вушра, Аyrшинин Паччагъ-лугъдиз учIедар, хъя зinin или Аyrшинин Йиз Адашди гъапиб тамам апIуро учIеди.

²² Узуз думу йигъан гизафдари пиidi: «Я Агъа! Я Агъа! Яв ччвур-нахъан учу аяяндарвалар улупури гъахъундайин? Яв ччвурниин-ди учу инсанарикан жинар ктаури гъахъундайин? Яв ччвурнахъди учу гизаф аыламатнан ляхнар гъапIундаринхъя?»

²³ Ва думуган дурагиз жаваб тувдиза: «Узуз учву саб вахтнара аьгъюдар дарзуз. Узхъан дург йихъай учву, писвал апIурайидар!»

Кьюб шибритI

²⁴ Гъамци, Узухъ хъебехъну, Йиз гафар тамам апIру гъарсар кас чан хулар гъвандин шибритIиин диврайи фагъумлу касдиз ухшар ву. ²⁵ Мархъра гъубгъну, селлерра гъафну, микIарра хъив-ну ва гъамрар вари гъадму хулариина диш гъахъну, амма хулар гъадаргъундар, фицики дураг гъвандин дивнайидар ву.

²⁶ Хъя Йиз гъаму гафар ерхъури, дураг тамам дарапIрайи гъар-сар кас чан хулар гъумриин диву фагъумсуз касдиз ухшар ву.

²⁷ Мархъ гъубгъну, селлер гъафну, микIар хъивну, вари гъамрар гъадму хулариина диш гъахъну, ва хулар гъадаргъну, хъя дурагин даргъувалра зурба хъухърумар хъайиб гъабхъну.



²⁸ Исаи, вари гъаму гафар дупну, ккудубкІган, мушвахъ хъайкъан халкъ Дугъан улупбариин мюгътал гъахъну, ²⁹ фицики Исаи дурагиз, къанунчийриси ваъ, хъа гъокум хлиъ айириси аъгъовалар улупури гъахъну.

Жузам кайир сагъ апIуб

8 ¹Иса дагъдилан улдучІвиган, Дугъан къяляхъди аъхючІвеъ халкъ гъори гъахъну. ²Магъа хамран аъзар кайи сари, дуфну, Исаиз икрам дапIну, гъапи: «Я Агъа! Увуз ккун гъабшиш, йиз хам марцц апIуз шулувхъан».

³ Исаи, хил гъачІабккну, дугъак кубкІну:

— Ккундузуз, марцц йихъ, — кIуру, ва дугъан хам дишлади марцц шулу. ⁴Хъа Исаи дугъаз кIуру:

— Лиг гъа, мидкан саризра макІан, хъа маллайихъна душну, жуву улуп, халкъдиз уву марцц хъпан шагъидвал вуди, Муса пайгъамбри дупнайиганси, гъурбан апIуз ужуб гъайибх.

Исаи юзбашийин гъуллугъчи сагъ апIуб

⁵ Иса Кафернагъумдиль учІвиган, Дугъахъна римлуйирин юзбashi дуфну, гъамци тIалаб апIуру:

⁶ — Я Агъа! Йиз гъуллугъчи, паралич уъзри хулаъ ахниъ итну, гизаф аъзабнакк кка.

⁷ Исаи дугъаз кIуру:

— Узу дуфну думу сагъ апIидиза.

⁸ Юзбашийи жаваб вуди гъапи:

— Я Агъа! Уву йиз хулаъ учІвбаз узу лайикъ дарза, анжагъ Уву саб гаф йип, ва йиз гъуллугъчи сагъ хъиди. ⁹Фицики узура жарарин хлиkk ккайир вуза, ва узуз мютIюгъ вуйи эскрарра ауз. Дурагикан сариз узу «гъараҳ» кIурза — думу гъягъюру, тмунуриз «гъач» кIурза — гъюру, йиз гъуллугъчийиз «гъамци апIин» кIурза, дугъу тамам апIуру.

¹⁰ Му гафар гъеерхъиган, Иса мюгътал шулу, Дугъу Чан къяляхъди гъюрайидариз кIуру:

— Гъякъди кIуразачвузки, Израилиъра Аллагъдихъ гъамкъан хъугърайи кас гъяркъюндарзуз. ¹¹КIуразачвузки, гизафдар, ригъ-гъудубчІвруна алабхъру терефарихъан дуфну, Аършарин Пачагъалугъдиль ихъ ата-байир вуйи Ибрагъимдин, Исакъдин ва



Якъубдин гъвалахъ гъюн йивну дахъди. ¹²Хъя Паччагълугъдиз улупнайидар чIатинди мучIушназ утIурккиди: душваъ зурба ишубна суза хъибди.

¹³Хъя Исаий юзбашийиз гъапи:

— Гъараҳ, яв хъугънайивалиинди увуз хъибди.

Дугъан гъуллугъчи гъадмусяльт сагъ гъахънийи.

Исаий гизафдар сагъ апIуб

¹⁴Иса Петрин хулаз гъафиган, Дугъаз цIа алди дахънайи ду-гъан сижарбаб рякъюру. ¹⁵Иса дугъан хилик куркIу, дугъ'ин или цIа улдубчIву, ва сижарбаб, гъудужвну, Дугъан гъайгъушнаъ учIву.

¹⁶Хябяхъ гъабшиган, Исаихъна жинар кучIvnайи хайлар ад-мийир хъади гъафнийи. Дугъу Чан гафниинди дурарикан жинар ктаьнийи ва варии иццрудар сагъ гъапIнийи. ¹⁷Му ляхнар Ишай пайгъамбрин мелзналан дупнайи: «Дугъу ихъ уъзрар Чайнан гъа-дагъну ва ухъу сагъ гъапIну», — кIуру гафар кIулиз удучIвбаз гъашидар вуйи.

Исаихъди хъуб читин ву

¹⁸Чан гъваларихъ гизаф халкъ уч духънади дябкъну, Исаий ученикариз люткейиъди гъюлин тмуну гъирагъдихъна гъягъюз амур гъапIнийи. ¹⁹Гъадмуган сар къанунчийи, дугъан багахъна дуфну, гъапннийи:

— Мялим! Уву наана гъушишра, узу Увухъди гъидиза.

²⁰Исаий дугъаз кIуру:

— Сулариз мугъарьир, завунничхариз мукъар а, хъя Инсанитедин Бализ кIул дивну дахъру иишв адар.

²¹Ученикарикан сари Исаийз гъапи:

— Я Агъя! Узухъди сифте, душну, дукIнайи йиз адаш кивуз гъит.

²²Хъя Исаий дугъаз кIуру:

— Узухъди гъач, хъя дийихнайидари чпин гъийихдар киври.

Исаий тIурфан яваши апIуб

²³Иса люткейиъ эъган, Дугъан къяляхъди ученикарра эънийи.

²⁴Саб дупну гъюл'ин гъациб тIурфан гъитIбиккнийики, лепири ду-рарин лютке ккапIуз саб цIибтIан имдайи. Хъя Иса даахнади гъахъ-нийи. ²⁵Думуган ученикари, дуфну, Иса хъиргну, Дугъаз кIуру:



— Я Агъа! Ухъуз саб чара апIин, ихь аյжал багахъ дубхъна.

²⁶ Исаи дурализ гъапи:

— Фицдар гучIбяхъар дарнучва, хътругърудар!

Хъасин, гъудужвну, Дугъу микIазна лепийириз яваш хъуз амур апIуру. Дураг лал шулу. Зурба архаинвал абхъру. ²⁷Дугъахъди хъайидари, мид'ин мюгътал духъну, кIуйи:

— Му мицир фуж вуйкIан — микIарра, гъюлра Чаз мютЮгъ шлур?

Исаи жинар кайи кьюр кас сагъ апIуб

²⁸ Иса гъюлин тмуну гъирагъдихъ хъайи Гадарин кIуру юрдназ гъафиган, Дугъан улихъна накъварин хъарап-дюрхъяриан кьюр жинар кайидар утIурччуру. Дураг гъадмукъан вягъшидар вуйики, гъадму рякъюди сарихъянра гъягъюз шули гъабхъундайи.

²⁹ Ва сабпну дурари Чигъар апIуз хъюгъю:

— Яв учухъди фу вуяв, Аллагъдин Бай?! Вахт хъайизра учуз жаза тувуз дуфнана?

³⁰ Дурарихъан ярхладиси чIурдиин силарин ахъю лиж дарабгънайи. ³¹ Ва жинари Исаикан тIалаб апIуру:

— Учу утIуккурайхъамина гъатму силарий учIувзъан гъит.

³² — Гъарахай, — гъапи Исаи.

Дурага, адмийириан удучIвну, силарий учIвру. Гъадмусяльт варি силар гъарзлансина гъюлизди урсру, ва варি штукк ккахъну йихуру. ³³ Хъа силарин габнар жаргъну душну, шагърий гъаму чипиз гъябкьюбдикан: фици жинар кайидар сагъ гъапIнуш — варидикан ктибтуру.

³⁴ Гъадмуган шагърин варя агъалийир Исаин улихъна удучIвру ва, Думу гъяркъган, чпин юрдариан удучIвну гъарах кIури, миннатар апIуру.

Исаи паралич кайир сагъ апIуб

9 ¹ Гъаддихъан Иса, люткейиль эъну, тмуну гъирагъдихъ хъайи Чан шагъриз гъюру.

² Ва магъа Дугъахъна, паралич дубхъну, сар ахниь ахънайир хъади гъафи. Исаи, дурагин зурба хъугъвал дябкъну, паралич кайириз гъапи:

— ЮкIв ижми апIин, Йиз бай! Яв гунгъарилан хил алдабгъураза.



³ Мушв'ин сакьюдар къанунчири чиб-чпикди гъапи: «Мугъу Аллагъдиз къаршу гафар кIура».

⁴ Дуарин фикрар аьгъяди, Исаий гъапи:

— Гъаз усал фикрар ичв юкIвариь тIърачва? ⁵ Фу рягъят ву:

«Яв гунгъарилан хил алдабгъураза» пуб, вая «гъудужвну лиш» пуб?

⁶ Инсаниятдин Бализ жилиин гунгъарилан хил алдабгъуз гъюкум айиб учвуз аьгъю хъпан бадали, магъя лигай.

Хъа Дугъу паралич кайириз: «Гъудужв кIуразавуз, гъадабгъну яв ахин, яв хулаз гъарах», — кIуру.

⁷ Ва думу, гъудужвну, чан хулаз гъягъюру.

⁸ Му гъябкъю халкъ мюгътал гъахъи, ва дураги адмийириз мициб гъюкум туви Аллагъдин тярифар апIуз хъюгъю.

Исаий Матта ктагъуб

⁹ Ва гъадлинтина гъягъюрайиган, Исаийз налукар уч апIрудшвахъ деънайи Матта кIуру сар кас рякъюру ва дугъаз кIуру:

— Узухъди гъач.

Маттара, гъудужвну, Дугъахъди гъягъюру.

¹⁰ Хъасин, Иса Дугъан хулаь суфрайихъ гутайиз гъюн йивну дахънайиган, хайлин налукар уч апIрударна гунагъкрап дуфну, Дугъахъди ва Дугъан ученикарихъди деъру. ¹¹ Му аьгъвалат дябкъну, фарисийири Исаийин ученикариз кIуру:

— Ичв Мялимди налукар уч апIурайидарихъдина гунагъкрапихъди гъаз ипIура?

¹² Му гъеебхъган, Исаий гъапи:

— Духтири сагъидариз ваъ, хъа аьзарлуириз лазим ву. ¹³ Учву сабан «Гъурбан апIуб ваъ, хъа рягъим апIуб ккун апIураза», — кIуру гафарин мяна аннамиш апIинай. Узу марцци касар ваъ, хъа гунагъкрап дюз рякъ'ина хуз Дуфнайир вуза.

¹⁴ Хъасин, Исаихъна дуфну, Ягъ'яйин ученикари гъерхру:

— Учуна фарисийири кми-кмиди ушвар дисури шулча, хъа Яв ученикари гъаз ушвар дисурадар?

¹⁵ Исаий дурагиз кIуру:

— Швшув хурайир чпиҳхъди хъимбуқъан гагъди, сумчрин хялар гыч пашман даршлуб аьгъданчвузхъя! Хъа дурагихъан швшув хурайир гужназ гъадагъру вахт гъибди, ари гъадмуган дураги ушвар дисиди.



¹⁶ Гыич сарира йирси палатдик цИийи цИил ктривур, фицики, цИйиди киву цИил кубчІвган, хъана аыхю урхъ адабхъди.

¹⁷ Таза чяхирра йирси иржарій убзри шулдар. Дици гъапІиш, иржарикан урхъар ктахьиди: чаяхирра удубзиди, иржарра пуч хъиди. Хъа таза чаяхир цИийи иржарій убзру айдат ву, думуган чаяхирра, иржарра сагъди гъузди.

*Rиш чIиви апIуб
ва кетIерцинайир сагъ апIуб*

¹⁸ Исаи гъамци кIурайи вахтна, Дугъахъна магъа сар гъяким дуфну, Дугъаз икрам дапIну, кIуру:

— Гъамусяайт йиз риш йикIру гъялналь айиз. Уву дуфну, дугъ'ин Яв хил иливиш, думу чIивиди гъузди.

¹⁹ Иса, гъудужвну, дугъахъди гъягъору. Дураихъди ученикарра гъягъору.

²⁰ Му вахтна йицIикьюод йисандин арайиъ ифи хъибтри шлу узур кайи сар дишагълии, къялхъянди дуфну, Исаин ккурттдин канчIлик хил кучру. ²¹ Фицики дугъу чав-чакди гъамци фикир гъапІнийи: «Эгер узу Дугъан палатдик анжагъ хил кубкIиш, узу сагъ хъидиза».

²² Иса къяляхъ илтIикIуру ва, думу дяркъну, кIуру:

— Яв юкIв ижми апIин, Йиз риш! Яв хъугъували уву сагъ гъапIунву.

Ва дишагъли сабпну сагъ гъахънийи.

²³ Хъасин Иса тъякимдин хулаз гъушу. Душваш учIвган, саламдин мукъмар йивурайидар ва ишларин гъугъ ипнайдар дяркъну, Исаи гъапIи:

²⁴ — Гъамлин удучIвай; риш дукIнадар, хъа даахна.

Дурап Дугъ'ин айлхъюз хъюгъю.

²⁵ Халкъ удучIвган, Дугъу, риш айи хулаъ учIвну, дугъан хил гъибису, ва риш гъудужву.

²⁶ Ва мидкан вари юрд вуйиси аваза гъарабгъу.

Къюр кур кас сагъ апIуб

²⁷ Иса гъадушв'ан гъягъорайиган, «Ич язухъ апIина, я Давуд-гъярин Бай!» — кIури, Дугъан къяляхъди къюр кур кас гъюз хъюгъю. ²⁸ Хъа думу хулаъ учIвган, кур вуйидар Дугъан багахъна гъафи.



Исайи дурагиз кIуру: «Узхъан учву сагъ апIуз шулу пну, хъугъранчва?» Дураги: «Ав, я Агъа!» – гъапи. ²⁹ Гъадмуган Исайи, дурагин уларик хил кучнун, гъапи:

– Ичв хъугънайивализ гъилигси ибшричвуз.

³⁰ Ва дурагиз рябкъюз хъюгъю. Хъа Исайи дурагиз ижмишнаан гъадагъя дебккру:

– Лигай гъа, мидкан саризра аыгъю дарибши.

³¹ Хъа дураги, кIуруш, Чатинди удучIвган, думу вари юрд ву-йибси, Дугъан аваза рабгъуру.

Исайи чIал дибиснайир сагъ апIуб

³² Уларихъ акв гъибшдар удучIвубси, магъа Дутъахъна жинар кучIвнайивалиан чIал дибиснайир хъади гъафи.

³³ Жинар ктаубси, чIал дибиснайир улхуз хъюгъю. Ва: «Израиль мициб ляхин саб вахтнара гъабхъиб дар!» – кIури, халкъ мюгътал гъахъи.

³⁴ Хъа фарисири кIуйи:

– Исайи жинар дурагин аыхюрихъан вуйи къувватниинди ктаура.

Исайиз халкъдин язухъ хъуб

³⁵ Иса, жугъдарин мистариъ аыгъювалар улупури, Аллагъдин Паччагълугъдикан Ужувлан хабар рабгъури ва гъар жюрейин уъз-парна иццурушнар кайдар сагъ апIури, шагъарна гъулар вуйиси лицури гъахъну. ³⁶ Халкъарин дестийир гъяркъган, Исайиз дурагин язухъ шулу, гъаз гъапиш дураг марччлихъан хътру марччарси, улдугнун, кюмексузди айи. ³⁷ Гъадмуган Чан ученикариз кIуру:

– Иган гизаф а, хъа убгрудар цIиб. ³⁸ Гъаддиз игнин Агъайиз, Чан игниз убгрудар гъаъ, кIури, ккарагай.

Исайин иицIикьюр вакил

10 ¹ Мидин къяляхъ саб ражари, Чан иицIикьюр ученикдиз Чахъна дих дапIну, инсанарикан жинар ктауз ва гъарсаб уъзур ва гъарсаб иццуушин сагъ апIуз кIури, Исайи дурагиз жинарин зиин гъюкум тувру. ² Магъа иицIикьюр ученикдин ччвурар: сарпир Петр кIури шлу Симон ва дугъан чве Андрей, Зеве-дайин бай Якъубна дугъан чве Югъан, ³ Филип ва Варфоломей,



Фома ва налукар уч апІру Матта, Алфейин бай Якыуб ва Фадей, ⁴Шимон Кананит ва къандиси Иса масу туву Искариот лакІам хъайи Ягъуда.

ЙицІикьюр ученикдиз табшуругъ

⁵Гъаму йицІикьюр кас Исаи, гъамциб насигъят тувну, гъарьу:

– Жутъдар дарудар яшамиш шулайи йишвариз мягъяниай ва Самарияйин саб шагърикъян муучІванай; ⁶хъа улдугну чарвийрси айи Израил халкъдихъна гъараҳай, ⁷ва варишвариъ лицури, аygъовалар улупури, Аyrшарин Паччагъулугъ улубкъура кIури, хабар тувай. ⁸Ищурайидар сагъ апІнай, гъийихдар чIиви апІнай, жузам кайдар марцц апІнай, жинар кучІвнайидарикан кадаай; Чанади гъадабгъуб, Чанади тувай. ⁹⁻¹⁰Къял'ан идибІру чIулий ивну, жвувахъди гъизилин, арсан, ясана йифрин пул, я тавра, я кьюб жар палат, я ликариин алахърудар, ясана чумакъ рякъюз магъадабгъанай. Фицики лиххур ипІрубдиз лайикълу ву. ¹¹Учву фуну шагърий вая гъулаъ учІвишра, душваъ лайикълу вуйи касдихъ дергай ва, дилин удучІвну гъягъайиз, гъадгъан хулаъ гъузай. ¹²Хъа хулаъ учІвргуан, хулан эйсийиз гъамци салам тувай: «Яв хулаъ мясляльт ибшрияв». ¹³Эгер думу хал лайикълу вуш, душваъ мясляльт убчІвди. Эгерки думу хал лайикълу даршиш, ичв мясляльт учвухъна къяляхъ хътабкиди. ¹⁴Хъа эгер шли учву къабул дараپІиш ва учвухъ хъпебехъиш, дугъан хул'ан вая гъадму шагъриан удучІврайиган, ичв ликарик кайи биширугра кими-ди кадабхъай. ¹⁵Гъякъди кIуразачвуз: гъиямат йигъян, Содомна Гоморра шагъриаз гъадму шагъризІан ужу хъибди.

Улукъуз ккимбу хъергбар

¹⁶Магъа Узу учву жанавраихъна гъаърайи марччарси гъаъраза: битІарси фагъумлудар ва луфарси аымал кадрудар йихъай. ¹⁷Адми-ирихъан ихтият апІнай, фицики дураги учву судариз гъахиди ва чин мистариъ урччиши. ¹⁸Ва, учву Йиз ученикар ву кIури, гъя-кимдрихъна ва паччгъарихъна гъахиди, дурагинна аллагъузарин улихъ Узкан шагъидвал апІбан бадали. ¹⁹Учву гъидисган, учву фу ва фици кIуруш, дидин гъайгъушнаъ маҳъанай, фицики гъадму арайиъ, учву фу дупну ккундуш, учвуз дишлиди ачмиш апІди, ²⁰фицики думу учву вая, хъа учвуль айи ичв Адашдин Рюгъну пиidi.



²¹ Чвуччуу чве йикIуз масу тувди, хъа адашди – бай. Веледари, абийр-бабариз къаршу удучIвну, дураги йихиди.

²² Йиз ученикар хъпаз лигну, учву варидализ даккун хъиди. Хъа шли аыхиризкъан аыгъ гъапIиш, думу дюрхну хъиди.

²³ Саб шагъриан учву утIуккргулан, жара шагъриз жаргъай. Фицики дюзди кIуразачвуз: учву Израилин вари шагърар-гъуларилан илдицну ккудубкIайиз, Инсаниятдин Бай гъиди.

²⁴ Ученик чан мялимтIан заан дар, ва гъич сар гъуллугъчира чан агъатIан заан дар. ²⁵ Ученик – чан мялимсир, хъа гъуллугъчи чан агъасир гъахьиш, рази духьну ккун.

Шилхъан гучI дапIну ккуунду

²⁶ Гъаци вуйиган, адмийихъан гучI мапIанай: учв ачухъ даршу гъич саб гъитIибкIуб адар ва ашкар даршу гъич саб жиниб адар. ²⁷ Узу учвуз мучIушнаң кIурайиб аквнахъ йипай, ва Узу ичв ибахъ гъапиб гъваълан атIабгну йипай. ²⁸ Беден йибкIрударихъан гучI мапIанай, фицики дурагихъан рюгъ йикIуз шулдар; хъа ичв беденра дубкIину, жегъеннемдій ичв рюгъра пучапIуз Удукурурихъан гучI апIанай.

²⁹ Саб кепкихъ кьюб гъуланжакъв масу тувдаринхъя? Ичв Адашдиз даккунди дурагикан гъич сабра жил’ина абхъидар.

³⁰ Ичв кIул’ин али чIарарра кмиди Дугъу гъисаб дапIна.

³¹ Гъаддиз гучI мапIанай: гизаф гъуланжакъвартIан учву заан вучва.

Месигъдин аыгъювалар

³² Гъаддиз Узу адмийирин улихъ къабул гъапIу гъарсар кас Узура Йиз Адашдин улихъ къабул апIидиза. ³³ Хъа шли Узу адмийирин улихъ къабул дарарапIиш, думу Узура Йиз Адашдин улихъ къабул апIидарза.

Узу лайшкылу вуйип

³⁴ Учву фикир мапIанайки, Узу жилиина мясляйт хуз Дуфна-йир ву кIури; Узу мясляйт хъади ваъ, хъа дяви хъади Дуфнайир вуза. ³⁵ Фицики Узу адашдихъан – бай, дадайихъан – рищ, си-жарихъан – швушв жара апIуз дуфназа. ³⁶ Ичв хизандиъ айидар учвуз вартIан пис душмнар хъиди.



³⁷ Узутлан чан адаш вая дада артухъ ккун гъапIур Узуз лайикъ-лу вуйир дар; ва Узутлан чан бай вая риш артухъ ккун гъапIур Узуз лайикълу дар. ³⁸ Хъа фуж, хач чан къял'ин алди*, Йиз къя-ляхъди дарфиш, гъадмура Узуз лайикълу дар. ³⁹ Шли чан уьмур уьбхюз чарийр гъизигиш, дугъан думу дубгди, хъа Узу бадали чан уьмур пуч гъапIуриз ккудуудубкIру уьмур хъибди.

Пешкеш

⁴⁰ Учву къабул апIури Узу къабул апIура, хъа Узу къабул апIури Узу му дюн'яиз Гъаур къабул апIура. ⁴¹ Пайгъамбар, думу пай-гъамбар хъпаз лигну, къабул апIуриз пайгъамблизисиб пешкеш хъибди, ва дугъри кас, думу дугърир хъпаз лигну, къабул апIуриз, дугъри касдиз туврубсиб пешкеш хъибди. ⁴² Хъа шли, Йиз ученик хъпаз лигну, гъаму бицIисдарикан сарнуриз саб кIифкъан мичIили шид тувиш, гъякъди кIуразачвуз, дугъаз чан пешкеш хъибди.

Штуан апIу Ягъ'яйин илчийр

11 ¹Чан йицIикьюр ученикдиз табшуругъяр тувну ккудукиган, Иса, дилин удучIвну, Галилей улкейин шагъариз аygъю-валар улупуз гъагъору.

²⁻³ Дустагъдис айи Ягъ'яйи, Месигъ Исайин ляхнарикан гъе-ебхъган, чан ученикарикан кыр дугъаз гъамци пуз гъау: «Гъюз ккайи Месигъ Уву вуна, даршиш жаариз ккилигучу?»

⁴ Исайи дурагариз жаваб туву:

— Учвуз рябкьюрайиб ва ебхурайиб вари, душну, Ягъ'яйиз кидибтاي: ⁵ кур вуйидариз рябкьюра, ликудар лицура, хамран уьзур кайидарин хам марцц шула, кар вуйидариз ебхъура, гъа-Чидар Чиви шула ва касибариз Ужувлан хабар рабгъура.

⁶ Шли Уз'ина вуйи хъугъвал дубградарш, думу баҳтавар ву.

Месигъди Ягъ'яйин гъякъанаан шагъидвал апIура

⁷ Дураг гъушу вахтна Исайи халкъдиз Ягъ'яйикан пуз хъюгъну:

— Ягъ'яихъна ичи чюлиз фтиз лигуз гъушнийчва? МикIлу Тубччвурайи чIеъдиз лигуз гъушнинчвахъя? ⁸ Шлиз лигуз гъу-шунчва дина? Багъа палтар али касдиз? Багъалу палтар алидар

* 10:38 Яна чаин улукъру аyzабар аygъ апIур.



паччъарин дараматариъ ади шулу. ⁹Дици даш, шлиз лигуз гъушунчва учву? Пайгъамбиз лигуз? Ав, кІуразачвуз, пайгъамбар-Іан ахюриз лигуз гъушунчва.

¹⁰ Гъадму Ягъ'яйикан ву гъамци дибикІнайиб: «Магъя, Яв улихъди Узу Йиз кас гъаъраза: дугъу Яв улихъ Яв рякъ кка-балгиidi».

¹¹ Дюзди кІуразачвуз: жиларин зиин дишагълийикан гъахъидарик штуан апІру Ягъ'ятІан зурба кас гъахъундар, хъа Аършарин Паччагъалгъедиъ айидарикан варитІан бишір думутІан зурба ву.

¹² Штуан апІру Ягъ'яйин вахтарихъянмина гъамусдиз Аършарин Паччагъалгъуль, саспидар дидиъ гужниинди учівуз чалишмиш шулашра, мюгъкамди артмиш шула.

¹³ Фицики Ягъ'я гъяйиз вари пайгъамбари ва Мусайин къа-нунди мидкан улихъ ккимиidi дупна.

¹⁴ Учвуз ккундущ, Гирами китабариъ дупнайиси, дуфну ккуни Ил'яс пайгъамбар Ягъ'я ву.

¹⁵ Ебхъуз ибар кайдариз гъит ебхъри!

¹⁶ Хъа гъаму заманайин насыл шлихъ тевза?

¹⁷ Дурар, чиб-чпиз чІигъар апІури, раццариъ гъамци кІури деънайи бишідариz ухшар ву: «Учу учвуз швутІрамар йивури гъахъунча, хъа учву ялхъвнаркъан гъапІундарчва; учу учвуз иш-лар апІури гъахъунча, хъа учву ишузкъан гъишундарчва».

¹⁸ Ягъ'я гъафну, дугъу ипІурдайи ва убхъурдайи, дурари дугъаз «Дугъаъ жин а» кІуйи.

¹⁹ Инсаниятдин Бай гъафну, Дугъу ипІуру ва убхъуру, ва дура-ри Дугъаз: «Лигай, магъя уъж ва пияниска, налукар гьюдохру-даринна гунағъкарин дуст», кІура. Аъкъюлувал ляхнариинди улупну ккун.

Хътругъбу шагърап

²⁰ Хъасин Исайи вартІан гизаф Чав аylаматар улупу шагърапиз тягънийир йивуз хъюгънийи, гъаз гъапиш дурари чпин гунгъар гардандиль гъидисундайи.

²¹ — Гъял пис хъибдияв, Хоразин! Гъял пис хъибдияв, Вифсай-да! Учвуз Узу улупу гъяйбатар Тириз ва Сайдайиз гъяркънийиш, дурарин агъалиири ухдитІан, чпихъ яснан палтар хъахъну ва кІул'ин рюкъ алабхъну, тахсрар чпин гардандиль дисидийи.



²²Амма кІуразачвузки: суддин йигъан учвузтІан Тиризна Сайдайиз рягъятди хъибди!

²³Хъа увурा, Кафернагъум, аршаризкъан за хъибдиза кІурайна? Ваъ, гурбагуриъ абхъдиву, фицики учвухъ улупу айламатнан ляхнар Узу Содомдій улупнийиш, думу гъамусра сагъ-саламатди гъубздий.

²⁴Гъаддиз кІуразачвузки, гъиямат йигъан учвузтІан Содомдин ағылайириз рягъятди хъибди.

Узухъна гъачай, эргвал ивидичва

²⁵Хъасин Исаи гъапи: «Адаш, заваринна жиларин Агъа! Аьяндрарихъанна айқюллударихъан гъитІибкІнайиб бици касариз ачухъ апІбаз Увуз чухсагъул!

²⁶Ав, Адаш, Увуз думу Яв ужувлан ният гъаци дубхъну ккундувуз.

²⁷Йиз Адашди Узуз вари тувну. Адашдилан гъайри, Бай фуж вуш, саризра айгъдар, ва БализтІан гъайри, Адаш саризра айгъдар. Хъа Бали шлиз ачмиш гъапІиш, гъадгъяз Адаш айгъю хъиди.

²⁸Эргну хъадахънайидар вари Узухъна гъачай, ва Узу учвуз рягъятвал тувдиза.

²⁹Узу гъюллир ва фурс ктрур вуз. Йиз табшуругъарин юрккагъ уч'ин иливай ва Узхъан вари дубгъай – архаинвал хъибдичвуз.

³⁰Гъаз гъапиши Узу учвухъна тувру юрккагъ – уж'вал ву, ва Узу уч'ин иливру гъагъра пучІуб ву».

Султ йигъкан гъожат

12 ¹Саб султ йигъан Иса дяхин дубзнайи хутІиантана гъягъору. Гаш дубхънайи Дугъян ученикари, дяхнин кІулар улдутІну, китІишну, итІуз хъюгъру. ²Му гъябкью фарисийири Исаиз гъапи:

– Магъа Яв ученикари султ йигъан Къанунди гъадагъа дапІнайи ляхин апІура.

³Хъа Исаи дуариз кІуру:

– Чазна чахъди хъайдариз гаш гъабхъи вахтна Давудри гъапІиуш, Гирами китабариан гъурхундарнучва? ⁴Фици думу Аллагъдин хулаъ учІвшу ва дугъуна дугъахъди хъайдари я чаз, я чан юлдшариз итІуз гъадагъа вуйи, хъа анжагъ маллайиризтІан



итIуз ихтияр адру Аллагъдиз бахш дапIнайи улер фици гъитI-
нуш, гъурхундарнучва? ⁵ Ясана учву, Аллагъдин хулаь маллиири
султ йигъандин къайда чIур апIурашра, дурап тахсиркрап гъисаб
дарапIбакан Къанундис гъурхундарнучва? ⁶ КIуразачвузки: му-
швахъ Аллагъдин халтIанра зина Вуйир хъа. ⁷ Эгер учвуз: «Гъур-
бан апIуб ваъ, хъа рягым апIуб ккундузуз», кIуру гафарин мяна
аыгъайиш, учву тахсир ктрудар тахсиркар ву, пидайчва, ⁸ фицики
Инсаниятдин Бай султ йигъ’инра Агъа ву.

Хил деебцнайи кас сагъ апIуб

⁹ Хъасин Думу жугъдарин мистаз гъягъюру. ¹⁰ Душваъ хил де-
ебцнайи сар кас аий. Исаийк саб тахсир кипбан бадали, малл-
ири Дугъхан гъерхру:

— Мусайин Къанундиинд султ йигъан ищурайир сагъ апIуз
хай шулин?

¹¹ Исаий дурапиз гъамци жаваб туву:

— Учкан сарира султ йигъан ичIаъ абхъу чан чарва агадабгъ-
ди гъибрин? ¹² Хъа чарватIан инсан гизаф багъа даринхъа? Гъа-
ци вуйиган, султ йигъанра уж’вал апIуз хай шулу.

¹³ Хъасин Исаий хил деебцнайириз кIуру:

— Яв хил гъачIабкк.

Дугъу хил гъачIабккуру, ва гъадмусаят думу гъатмуну хилси
сагъ шулу. ¹⁴ Душв’ан фарисийири, чIатинди удучIвну, Иса фици
пуч апIуруш, йикърап йитIуру.

Магъа ииз гъуллугъчи

¹⁵ Хъа Исаиз мидкан аыгъю шулу ва дишла удучIвну гъягъюру.
Дугъан къяляхъди гизафдар гъягъюру, ва Дугъу ищурайидар
вари сагъ апIуру. ¹⁶ Ва Чакан шлизкIа жарадариз пуб гъадагъа
апIуру. ¹⁷ Му вари мици, Аллагъди Ишая пайгъамбрин мелзна-
лан гъамци гъапиб кIулиз удубчIвбан бадали гъабхъний:

¹⁸ «Магъа Узу кадагънайи Йиз Гъуллугъчи.
Узуз Ккунир. Дугъ’ин Йиз юкIв рази ву.

Дугъахъна Йиз Рюгъра гъаъраза.

Ва Дугъу вари жугъуд дару халкъариз,
гъякъвалин вахт улубкъна кIури, хабар тувди.

¹⁹ Думу я гьюжатназ удучIврур дар,



я Чигъар апIур дар,
ва кючийриз саризра Дугъан сес ебхыидар.

- 20 Дугъу, улубкыну ккуни гъякъвал
гъалибвалихъна дархидикъан гагъди,
дюбгъну кебхнайи Чеъ ктубтIидар
ва хъудубгурайи гъахма ктIубшвидар.
21 Ва вари миллетари Дугъахъ йирфар
хъирчну хъибди».

Иса ва иблис

²² Дидин къяляхъ Исайихъна, жинар кади, дярябкъру ва чал
диибиснайи сар кас хуру, Дугъу думу кас сагъ апIур, гъаци думу
Чалниинара гъюру ва дугъан улариз рябкъюзра хъюгъру.

²³ Му ляхниин вари халкъ айжайиб шулу ва дураги гъамци
кIур: «Гъаяман гъаму Давудгъярин Бай вушул гъа?»

²⁴ Хъа мидкан деебхыну, фарисийи кIур:
— Дугъу жинар жараси варь, хъа жинарин ахюор вуйи Велзеву-
лин къувватниинди ктаура.

²⁵ Амма Исаий, дурагин фикрар айгъяди, гъамци гъапи:
— Чан айтI душманвал адиг, пай гъабши гъарсаб паччагъулугъ
ичIи шул, арайиль душманвал айи я саб шагъур, я саб хизан гъуд-
рубзур. ²⁶ Эгер шейтIини шейтIан ктаураш, думу чав чаз къаршу
дубхъна: дидин паччагъулугъ фици сагъди гъубздихъя? ²⁷ Ва эгер
Узу жинар Велзевулин къувватну ктаураш, ичв адмийири ду-
раг шлини кюмекниинди ктаура? Магъа гъамди учву гъякъ да-
рувал улупура. ²⁸ Дугъриданна, Узу жинар Гирами Рюгъниинди
ктаураш, ичв арайиз Аллагъдин Паччагъулугъвал магъа хъубкъна.

²⁹ Гъаци дарш сарихъанра, гуж кайирин хулаз дуфну, душв тIа-
раш апIуз хъибдар — эгер эйси юйтIину адарш; гъийитIган, хал
тIараш апIуз шул. ³⁰ Фуж Узухъди дарш, думу Узуз къаршу ву ви-
шли Узухъди уч апIурадаш, дугъу зия апIурा.

³¹ Гъаддиз кIуразачвуз: адмийирин гъарсаб гунгъилан ва Ал-
лагъдиз къаршу гафналан хил алдабгъиди, хъа Гирами Рюгъназ
къаршу гафналан хил алдабгъидар. ³² Эгер шли Инсаниятдин Ба-
лиз къаршууди Чуру гаф гъапиш, дугълан хил алдабгъиди, хъа
шли Гирами Рюгъназ гъапиш, дугълан я гъамус, ясана гъюз им-
бу уымрий хил алдабгъидар.



Гъар ва дидин бегъер

³³ Учву гъарра ва дидин йимишра гъяниб ву йипай, ясана гъарра ва дидин йимишра чуруб ву йипай; гъар йимишдиз лигнү альгью шулу.

³⁴ Эй битИракан гъахьидар! Учвхъан, пис юкІвар ади, ужуб гаф пуз фици хъибдичвухъан?! Фицики инсандин мелз, чан юкІв фти абцІнаш, гъаддикан улхури шулу. ³⁵ Ужур касди чан хазнайиан ужуб, хъа чуру касди чан хазнайиан чуруб адабгъуру. ³⁶ КIуразачвузки, инсанари чпин гъарсаб гъавайи гафнан жаваб гъиямат йигъан тувди. ³⁷ Фицики, яв гафариз дилигнү, уву гъякъ вая нягъякъ апIиди.

*Исаикан аylамат улупуб
ккун апIуб*

³⁸ Гъадмуган къанунчириканна фарисийрикан бязидари Исаийиз кIуру:

— Мялим! Учуз уву АллагъидхъантIан даршлу саб аylамат улупну ккундучуз.

³⁹ Хъа Исаий дурагиз жаваб вуди гъапи:

— Хътругъру ва аьрбатан гъамусдин адмийири аylаматнан лишнар улупуб ккун апIура, хъа дурагиз, Юнус пайгъамбрин кIул'ина гъафи аylаматналан гъайри, жара аylамат рябкъидар. ⁴⁰ Юнус пайгъамбар фици шубуд йигъанна шубуд йишван зурба балугъин фуниъ ади гъахънуш, гъаци Инсаниятдин Байра шубуд йигъанна шубуд йишван жилин айтI хиди. ⁴¹ Гъиямат йигъан суд апIру вахтна Ниневия шагърин агъалиир гъамусдин адмийирин гунгъарин шагъидарди гъудужвиди, фицики дураги Юнусди улупу аьгъюваларихъ хъебехъну, гунгъар гардандиз гъидисну; хъа мушвахъ ЮнустIанна зурба Вуйир хъа.

⁴² Гъиямат йигъан суд апIру вахтна къиблайнин паччагъ-ханумди, гъамусдин адмийириз къаршу гъудужвну, дураг тахсиркар апIиди, фицики думу дюн'яйин тму кIулиан Сулеймандин фагъумлувалихъ хъпехъуз гъафнийи; хъа магъа мушвахъ Сулейман-тIан зурба Вуйир хъа.



Жин къяляхъ хътабкуб

⁴³ Чиркин рюгъ, инсандиан удубчIвиган, шид адрушвариь либ-цири, чаз архаинвал абгури шулу, дibriхъиган, ⁴⁴ кIуру: «Узу утIуб-кку йиз хулаз хътабкидиза». Хътабкубдиз хал ичIиди, ичIикнади ва марцц дапIнади рябкьюру. ⁴⁵ Гъадмуган диди, дубшну, хъана ургубсан жин чахъди хуру, дураг дугъаь учIвну яшамиш шулу, ва думу касдиз улихъдитIан гъамус артухъ пис шулу. Гъациб хъиби гъамусдин хътругъру адмийиризра.

Исаин дада ва чвийир

⁴⁶ Исаий халкъдиз гъаму гафар кIури имиди, магъя Исаин дадана чвийир дуфну, Дугъахъди гаф-ЧIал апIуз ккунди, чIат ду-гъужвнади шулу. ⁴⁷ Ва сар шли-вш Дугъаз кIуру:

— Магъя Яв дадана чвийир, Увухъди гаф-ЧIал апIуз ккунди, чIат дийигъна.

⁴⁸ Чаз гъамци гъапириз Исаий кIуру:

— Йиз дада фуж ву ва Йиз чвийир фужар ву?

⁴⁹ Хъя Чан ученикарихъинди хил гъачIабккну, кIуру:

— Магъя Йиз дада ва Йиз чвийир, ⁵⁰ фицики Аyrшарин Йиз Адашдин гаф тамам апIуро Йиз чвера, чира, дадара вуйиз.

Тум убзурикан тахалус

13 ¹ Гъадму йигъан хул'ан удучIву Иса Галилей гъюлихъна душну деъру. ² Дугълан гизаф халкъ илтIибшнийи, ва гъад-диз Думу люткейиъ эънийи, хъя халкъ гъюлин гъирағъдихъ гъубзнийи. ³ Исаий дурагиз, аygъювалар улупури тахалусариин-ди гизафдарикан гъапнийи. Дугъу кIуру:

— Сар нежбер тум убзуз удучIвуру. ⁴ Убзурайиган, гъацIар уд-пар рякъюхъ дахъру — дураг, жакъвар дуфну, удуру. ⁵ Сакьюодар удраг гъван ккайи, руг цIибтIан алдру йишв'ина дахъру, ва дураг ухди ктучIвуру, гъаз гъапиш ругдин гъат чIиллиб вуйи. ⁶ Ригъ гъапIган, дураг чурхуру, ва, ччивар зяифди хъпаз лигну, ерццуру. ⁷ ГъацIар удраг зазарин тумрягъ гъяхъру, ва ахю гъахъи зазари дураг ккаъру. ⁸ Хъя садар удраг авадан ругдик каҳхуру, дураги бе-гъер хуру: фундари — варж, фундари — йирхъцIур, хъя фундари — сумчIур раЖари артухъ. ⁹ Шлин ибариз ебхураш, гъит ебхъри.



Тахалусарин мяна

¹⁰ Багахъ духьну, ученикари Дугъхъан гъерхру:

— Уву халкъдиз тахалусариинди гъаз кIурава?

¹¹ Дугъу дурагиз жаваб вуди кIуру:

— Гъаз гъапиш учвуз Айршарин Паччагълугъдин сирар аygъю хъуб тувначвуз, хъя имбудариз тувнадар. ¹² Фицики шлиз аш, ду-гъаз хъана тувди ва артухъра хъиби, хъя шлиз адарш, аибра тадабгъиди. ¹³ Гъаддиз дурагиз тахалусариинди кIураза, дурагиз, лигурашра, рябкъорадар, хъпехъурашра, ебхурадар ва гъаври ахърадар. ¹⁴ Ишая пайгъамбри магъа гъамци дупнайиб дурагиин улубкура:

«Учвуз ебхъуз гъеебхъунчвуз,
хъя гъаври ахъидарчву,
учвуз рябкъюз гъябкъюнчвуз,
хъя мучIуди гъуздичва.

¹⁵ Гъаз гъапиш му инсанарин юкIвар хъунти духьна.

Дурагин ибариз читиндитIан ебхъури имдар.

Дурагиз, улар уылчIюкънамиди, фукIара рябкъидар.

Гъаци дубхънаки, дурагиз рябкъюзра
рябкъюри имдар.

Ебхъузра ебхъури амдар,
ва хъунти юкIвар гъаври ахърадар,
ва, чпи сагъ апIбан бадали,
Аллагъдихъинди илтIикIидар».

¹⁶ Учву, улариз рябкъюрайидар ва ибариз ебхъурайидар, баhtав-
пар вучва! ¹⁷ Фицики дюзди кIуразачвуз: гизаф пайгъамбариизна
марцци касариз учвуз рябкъюрайиб рябкъюз ккундийи, хъя гъаб-
къюндар, ва учвуз ебхъурайиб ебхъуз ккундийи, хъя гъеебхъундар.

Тахалусдин мяна

¹⁸ Магъа тум убзуруикан вуйи тахалусдин мяна: ¹⁹ Айршарин
Паччагълугъдикан гаф гъеебхъиган, дидин гъаври даршулай
гъарсар касдихъна иблис гъюру ва дугъан кIваь дубзнайиб гъи-
тIикIуру: рякъ'ина ахъу удраг магъа гъадму ву. ²⁰ Гъван ккай
ийиш'ина ахъу удраги, Аллагъдин гаф деебхъну, дишла шадди
къабул апIрур вуйиб улупура. ²¹ Хъя дугъакк ччив ккадар, гъаддиз



дumu цIиb вахтнаztIан дар. Аллагъдин гаф себеб вуди чахъ хъерг-
руган, ясана саб хатIа-бала гъядябхърган, дumu гъадму сяайт гаф-
нахъан гъудучIвуру. ²² Зазар-варжийригъ дахъу удрари Аллагъдин
гаф деебхъну, гъар йигъандин гъайгъушнари ва девлетназ вуйи
нефсну ккагънайи кас улупура. Мицир касдиъ гафну бегъер тув-
дар. ²³ Авадан ругдик каҳъу удрари, Аллагъдин гаф деебхъну,
дидин гъавриъ ахъру кас улупура. Ари гъадму варж, йирхыцIур,
вая сумчIур раЖари артухъ бегъер туврайи удраиз ухшар ву.

AчIал

²⁴ Исаии халкъдиз сабсана тахалус ктибуру:

— Аyrшарин Паччагълугъ магъа гъамдиз барабар ву: сар кас-
ди чан хутIиль марцци тум убзуру. ²⁵ Адмийир даахнайиган, ду-
гъян хайир даккни кас дуфну, дубзнайи хутIиль ачIин тум даб-
гъуру. ²⁶ Чар ктубчIвуру. Дяхни кIул апIуз хъюгъган, адмийириз
душвягъ ачIалра ктубчIвури рябкьюру. ²⁷ Ва хулан эйсийихъна
дуфну, дугъян лукIари кIуру: «Учу яв хутIиль гъубзуб марцци
тум вуйич, ахъир. Душвъа ачIал наънан арайиз гъафну?» ²⁸ Дугъу
дураиз кIуру: «Думу йиз хайир даккни касди гъапIуб ву». Хъа
лукIари кIуру: «Увуз ккундуш, душну ачIал апIуча?» ²⁹ Дугъу кIу-
ру: «Ваъ, ачIал апIрган, дяхинра уьчIюбгъиди. ³⁰ Иган хъубкъя-
йиз, дяхнихъди ачIалра гъиттай. Иган хъубкъган, узу иган уг-
рудариз пииза: сифте ачIал дапIну, цIигъ ургбан бадали, дураг
гъварч-гъварчди йитIай, хъа дяхин йиз танхаризди уч апIинай».

Дилкан тахалус

³¹ Исаии дураиз хъана жара тахалус ктибуру:

— Аyrшарин Паччагълугъ магъа гъамдиз ухшар ву: сар касди
бистниъ бицIи дил кивру. ³² Дил, учв варитIан бицIиб вушра,
хъубкъган, дumu, бистниъ варитIан ахъюб дубхъну, гъарси шулу,
гъаци вуйиган дидигъна завунничхар гъюру ва дидин циркла-
ригъ мукъар апIуру.

Дуникан тахалус

³³ Исаии дураиз хъана жара тахалус ктибуру:

— Аyrшарин Паччагълугъ, дишагълийи, гъадабгъну, шубуб сеъ
хюйик капIну, хамир вари утуз гъибту дуниз ухшар ву.



³⁴ Гъамрап вари Исаи халкъдиз, тахалусар хури, ктитури гъахъну, ва, тахалус дархиди, фукIара кIури гъахъундар. ³⁵ Исаи тахалусарииинди пуб пайгъамбрин мелзналан улдучIву гъаму гафар кIулиз удучIвбаз вуйи:

«Узу улхрган, тахалусарииинди улхидиза,
ва дюн'я ккебгъхъанмина вуйи сира
тахалусарииинди кдитидиза».

АчIикан вуйи тахалусдин мяна

³⁶ Хъасин уч духьнайи халкъдихъан гъудучIвну, Иса хулаз гъю-
ру. Дугъан ученикарра Дугъахъди гъюру, ва хулаъ чпитIан амдру
вахтна дурари Дугъкан тIалаб апIуру:

— Учу хутIиль ктубчIву ачIикан вуйи тахалусдин гъаврикк
ккава сарун. ³⁷ Ва Дугъу жаваб вуди гъапи:

— Марцци тум убзурайир Инсаниятдин Бай ву. ³⁸ ХутIил дюн'я
ву, марцци удрап Аллагъдин Паччагълугъдиль аий касар ву; хъа
ачIал иблисдин баяр ву. ³⁹ Дурап гъурзу душман иблис ву, иган
убгувал гъиямат йигъ ву, хъа иган убгрудар малайикар ву. ⁴⁰ Гъа-
ци вуйиган, фици ачIал дапIну, укI цIигъ убгуруш, гъаци хъибди
аыхирзамандин вахт улубкыиган: ⁴¹ Инсаниятдин Бали Чан мала-
йикар гъаъди, дурари Дугъан Паччагълугъдиль аий вари гунагъ-
карна къанунсуз ляхнар апIурайидар гъядягъну, уч апIиди ⁴² ва
дурап жегъеннемдин цIигъна гатIахъиди; душваш зурба ишуб,
суза-фигъан абхъди. ⁴³ Гъадму вахтна дугъри касари чпин Адаш-
дин Паччагълугъдиль ригъдиси нур тувди. Ебхъуз ибар кайдариз
гъйт ебхъри.

Жиликк ккивнайи хазнайикан тахалус

⁴⁴ Айршарин Паччагълугъ магъа гъамдиз барабар ву: сар касди,
хутIиль жиликк хазна гъибихъган, думу чан айиси ккиврү. Ду-
гъу, къадар адрукъан шад духьну, чаз аий-адруб вари масу тувну,
гъадму хутIил чазди гъадабгъуру.

Гавагъирикан тахалус

⁴⁵ Айршарин Паччагълугъ магъа гъамдизра ухшар ву: Сар ал-
верчийи багъалу гавагъирап агури шулу. ⁴⁶ Саб раЖари дугъаз



уларин акв гъабхрубысб успагы гавагьир масу туври рябкью-
ру, ва дугъу, душну, чаз айи-адруб вари масу тувну, гъадму
гавагьир гъадабгъуру.

Чуликан тахалус

⁴⁷ Аyrшарин Паччагълугъ магъя гъамдизра ухшар ву: балугъ-
чири гъюлиkk чул ккипру ва гъар жюрейин балугъар дисуру.

⁴⁸ Чул абцIган, думу гъирагъдихъна ктабгъуру, ва, дидин гъва-
лахъ деъну, ужудар гъюдохну, чурудар гатIахъуру. ⁴⁹ Гъаци хъиб-
ди гъиямат йигъан: малайикар гъиди ва дурари дугъри касари-
хъян писдар жара апIиди, ⁵⁰ ва дурар жегъеннемдин цIигъна га-
Tахъиди. Душвай зурба ишуб, суза-фигъан абхъди.

⁵¹ Исаий дурарихъан гъерху:

— Гъамдин варибдин гъаврий ахъунчву?

Дугъаз дурари: «АВ», — гъапи.

⁵² Исаий дурариз гъапи:

— Гъаддиз Аyrшарин Паччагълугъ алью гъапIу гъарсар къа-
нучи, чан сундхиан гъам цИийиб, гъамсана йирсиб адабгъурайи
хулан эйсийиз ухшар ву.

Чан багъри шагъриъ ва хулаъ пайгъамбриз гъюрмат ади шулдар

⁵³ Гъаму тахалусар кидитну ккудубкIган, Иса дилин гъушу.

⁵⁴ Чан багъри шагъриз дуфну, дугъу жугъдарин мистарь халкъдиз
аыгъювалар улупуз хъюгъю. Вари мюгътал духънайи:

— Мугъан мукъян фагъум ва къувват наънан вуйкIан? — кIуйи
дурари. — ⁵⁵ Думу харатчийин Бай даринхъа? Дугъан дадайиз
Мар'ям кIурдаринхъа, Дугъан чвийрра Якъуб, Юсуф, Симон ва
Ягъуда даринхъа? ⁵⁶ Дугъан чийрра вари ухъухъди хъадаринхъа?
Дугъан вари къудрат наънан вуйкIан?

⁵⁷ Дурариз Дугъахъ хъугъуз ккун гъабхъундайи.

Исаий дурариз гъапи:

— Гъюрмат адру пайгъамбар хъуб мумкин дар, хъа чан багъри
шагъриъ ва хулаъ пайгъамбриз гъюрмат ади шулдар. ⁵⁸ Исаий ду-
шваъ, дурарин хъугъвал адрувализ дилигну, улупуз ккайи гизаф
аыламатар улупундайи.



Штуан апIру Ягъ'яйин аъжал

14 ¹Гъадму вахтари Галилей уълкейин гъакимдар Гырроддиз
Исайикан хабар шулу. ²Дугъу чан гъуллугъчириз кIуру:

– Думу кас якынди штуан апIру Ягъ'я ву. Думу, гъачихъан,
Чиви дуҳына, гъаддиз дугъхъан гъацдар аъламатар улупузра шула.

³ Гырродди гъаддиз гъамци фикир гъапIнийи: улихънаси дугъу
chan чве Филиппдин хипир Иродиадайн кIуллан Ягъ'я дидисну,
зунжраихъди йитIну, дустагъдиль итнийи. ⁴ Ягъ'яйи Гырроддиз,
яв чвуччвун хпирихъди хъуз хай шулдар, гъапнийи. ⁵ Ва Гыррод-
диз Ягъ'я йикIуз ккун гъабхънийи, амма халкъдихъан гучIбу гъа-
кIундайи, гъаз гъапиш халкъди Ягъ'я пайгъамбар ву кIури гъисаб
апIурайи. ⁶ Гыррод бабкан гъаши йигъан Иродиадайн шуру шад-
лугъназ дуфнайдарин улихъ ялхъван гъапIнийи, ва Гырроддиз
ялхъван къабул гъабхънийи. ⁷ Гыррод гъадмукъан рази гъахъни-
йики, дугъу шуру фу Талаб гъапIишра, гъадму кIули адабгъуз ху
гъапIнийи. ⁸ Шуура, чан дадайи алаъну, гъамци гъапнийи:

– Гъамшвахъ ва гъамсяяйт узуз ленгерийиъди штуан апIру
Ягъ'яйин кIул алдабтIну айкъин.

⁹ Паччагъди, учв фукъан пашман гъахънушра, хяларин улихъ
ху апIбаз лигну, шуран улихъна Ягъ'яйин кIул алдабтIну хуз
буйругъ тувру. ¹⁰ Ва гъаъдари дустагъдиль Ягъ'яйин кIул алдаб-
тIуру. ¹¹ Дугъан кIул, дубхну, шурахъна тувру, шурура чан дада-
йихъна гъабхуру. ¹² Хъасин Ягъ'яйин ученикар дустагъдиз дуфну,
дугъан беден гъадабгъну дубхну, накъвдик кивру, хъасин дурари,
Исайихъна душну, гъабхъиси вари ктибтуру.

Хъуд агъзур кас тухъ апIуб

¹³ Му хабар гъеебхъу Иса, люткейиъ эъну, фужкIа адру саб халват
ийишваз хъапIну, гъягъюру, хъа мидкан хабар дубхъну, адмийир,
чин шагърар гъитну, Дугъан къяляхъди ликри гъягъюз хъюгъю.

¹⁴ Люткейиан удучIву Исайиз ахюочIвэй халкъ уч духънади рябкью-
ру ва, дурарин язухъ дубхъну, Дугъу уъзраг кайидар сагъ апIуру.

¹⁵ Хябахъ гъабшиган, Исайихъна дуфну, ученикари Дугъаз кIуру:

– Му иишв касра адру иишв ву, вахтра сарун къан дубхъна,
халкъар деет, гъит дурари, багарихъ хъайи гъулариз душну, члиз
ипIруб гъадабгъри.



¹⁶Хъя Исаий дуариз кIуру:

— Дуар наанакIа гъягъюб лазим дар, дуариз ипIруб учву тувай.

¹⁷Ученикири Дугъаз гъапи:

— Учухъ мушвањ, хъуб уълна къюб балугътIан гъайри, фукIа хъадарчухъ.

¹⁸Исаий ученикариз, дуар Чахъна аькъин, кIуру. ¹⁹Ва халкъдиз майдандиин деуб амур дапIну, гъадму хъуб уълна къюб балугъ гъадагъну, завузди дилигну, Аллагъдин ужувлакк ккахъри, дупну, улер гъудутIну, ученикарихъна тувру, хъя дуары халкъдиз тувру. ²⁰Вари халкъди ипIуру, тухъ шулу ва хъиригъу къацIари йицIикъюб тавра ацIру. ²¹Уълна балугъ гъипIу жиларин къадар хъуд агъзурихънакъан вуйи. Дуарихъна хъана дишагълийирина бицIидарири гъипIнийи.

Иса гъюлилан гъягъюб

²²Мидин къяляхъ Исаий, Чав сабан халкъ гъаъри имиди, Чан ученикариз люткейиъ эъну, Галилей гъюлин тмуну гъирағъдихъна сирнав апIуб амур апIуру. ²³Халкъ алдабгъиган, Иса, ялгъузди ккарагбан бадали, дагъдиз удучIвуру ва хябахъдизкъан сарди гъадушвањ гъузру. ²⁴Хъя лютке гъюлин гъацIияларизкъан дурубкънайи ва думу лепири зарбди ккалабкъурайи, гъаз гъапиш гъаншар миkI хъиврайи. ²⁵Ахсрар ккиврайи вахтна Иса гъюлилан ликар алдагъури люткейихъна гъюрайи. ²⁶Хъя ученикариз, Думу гъол'инди гъори дяркъну, гъаци гучI гъабхъниийи, Думу гъарантуси гъугъужвну, дуариан гучIбан гъарийр адахъуру. ²⁷Ва гъадмусаят Исаий дуариз гъапи:

— ЮкIв ижми апIинай, му Узу вуз, гучI мапIанай.

²⁸Хъя Петри Дугъаз гъапи:

— Я Агъа, эгер дугъриданра Уву вуш, узуз Увухъна штун зиинди гъюз амур апIин.

²⁹Дугъу гъапи: «Гъач». Ва люткейиан эдеъну, Петр штуинди гъягъюз хъюгъю ва, Исаийхъна хъуркърайиган, ³⁰гужал миkI хъивну гъябкъюрик гучI кабхъру ва, ккахъуз хъюгърайири, чИ-гъяр апIуру:

— Я Агъа, узу ккахъуз мигъитана.

³¹Исаий дишла, хил гъачIабккну, думу дисуру ва дугъаз кIуру:

— Эй Уз'ин бегъем хъугъвал алдрур, уву гъаз шаклу гъахъунва?



³² Дураг люткейиъ учІвган, мікІ яваш гъабхъи. ³³ Хъя люткейиъ айдари, Дугъаз икрам дапІну, кІуру: «Дугъриданна Уву Аллагъдин Бай вува».

*Геннисаретдиң ищурайидар
сагъ апІуб*

³⁴ Дураг, сирнав апІури, Геннисаретдин ругарихъна гъюру. ³⁵ Иса аыгъю духыну, душван ағылайири варишвариъ хабар дебккру ва Дугъахъна вари ищурайидар хуру. ³⁶ Дураги Исаикан анжагъ Дугъан ккурттарин канчIарик куркIузъян гъитуб тIалабар апІуйи. Вари Дугъак куркIрудар сагъ шуйи.

*Абийирантина гъузнайи
аьдатар*

15 ¹ Мидин къяляхъ Исаихъна Ерусалимдиан фарисийирна къа-
нунчийр гъюру, дураги кІуру:

² – Яв ученикари ихъ абийирин аьдатар гъаз кІули гъахурадар?
Дураги, уыл ипIруган, хилар жикIурадар!

³ Хъя Исаий дурагиз жаваб вуди гъапи:
– Учвura, ичв аьдатар уърхбан бадали, Аллагъдин табшуругъар гъаз кІули гъахурадарчва? ⁴ Аллагъди табшурмиш гъапIундаринхъа, «адашдизна дадайиз гъюрмат апІнай» ва «адашдизна дадайиз люкънар апІур аյжализ лайикъ ву», кІури. ⁵ Хъя учву фу кІури шулчва? Эгер сари чан дадайиз вая адашдиз «Узу увуз буржлу вуйиб Аллагъдиз бахш дапІназа», гъапиш, ⁶ дугъу сарун чан адашдизна дадайиз гъюрмат апІуб лазим дар, кІурачва. Гъамци кІури, Аллагъдин гаф тамам апІурадарчва. ⁷ Эй къиоб маш гъяйидар! Ишай пайгъамбри ичв гъякъанаан хуб ужууди дупна:

⁸ «Гъаму адмийири Узуз гъюрмат ушвниинди апІура,
хъя дурагин юкIвар Узхъан ярхла ву.

⁹ Давди дураги Узуз икрам апІура,
фицики дураги инсанарин аьдатар уърхюз улупура».

Инсан фти чиркин апІуру

¹⁰ Хъасин Исаий, халкъдиз дих дапІну, кІуру:

– Узухъ хъебехъай ва аннамиш апІнай: ¹¹ ушвниъ убчIвра-
ибди вая, хъя ушвниан удубчIвраибди инсан чиркин апІуру.



¹² Къандиси Исаиз багахь духыну, ученикари кІуру:

— Фарисийириз Уву гъапибикан гиран гъабшиб, альгъайвуз?

¹³ Исаий жаваб вуди гъапи:

— Чав ктриву гъарсаб рук-кюл Аършарин Йиз Адашди ччива-риан учЧюбгъиди. ¹⁴Дурарикан фикир мапIанай. Дураг, улихъ гъучІвну, кураг хъади гъягъюрайи кураг ву. Хъа кури кур хъади гъягърган, дураг кьюрида ичIац ахъди.

¹⁵ Мидиз жаваб вуди Петри кІуру:

— Учуз тахалусдин мяна ачуҳъ апIина.

¹⁶ Исаий гъапи:

— Учвура гъамцдарин гъаврий ахънаданчва? ¹⁷Ушвниъ уб-Чівуб вари фуниз рубкърувалин ва дилинтина чатинди удубЧів-ну гъябгърувалин гъаз гъаврий ахърадарчва? ¹⁸Хъа ушвниан удубЧівурайиб кІваанмина гъюра, ва диди инсан чиркин апIура. ¹⁹Фицики чIуру ниятар, йивбар-йихбар, къяппавалар, аърбатан-валар, икI апIбар, кучІлар, футнийир — гъамрар вари кІваан уду-Чівурайдар ву. ²⁰Гъамцдари инсан чиркин апIуру, хъа дижрикI-ру хиларихъди уъл гъипIну кІури, инсан чиркин шлуб дар.

Дишагълийин хъугъувал

²¹ Хъасин дилин удучІву, Иса Тир ва Сидон шагъарин айтрапариз гъягъюро. ²²Магъа Хананей улкейиан вуйи сар дишагъ-лийи, ишури дуфну, Исаиз кІуру:

— Я Агъа, Давудгъярин Бай, йиз язухъ апIина! Йиз риш, жи-нар кучІвну, ахъю балайикк кка. ²³Хъа Исаий дугъаз чАлкъан гъапундайи. Ученикари, багахь духыну, Исаикан ккун апIуру:

— Думу дишагъли хъутIуркк, гъаз гъапиш дугъу ихъ къяляхъ Чигъ хъипна. ²⁴Дугъу жаваб вуди кІуру:

— Узу анжагъ Израилин хъудургнайи чарвирихъна Гъайнайир вуза. ²⁵Хъа дишагълийи, дуфну, дугъаз икрам дапIину, кІуру:

— Я Агъа, узуз кюмек апIин сарун.

²⁶Хъа Исаий гъапи:

— Баяр-шубарихъан тадабгъну, уъл хуйириз ккипуз хай даршул.

²⁷Хъа дишагълийи жаваб туви:

— Диюди кІурава, Агъа, хъа хуйирира чпин эйсийин суфрайи-лан ахъу уълин урклар итIуру.

²⁸Гъадмуган Исаий дугъаз кІуру:



— Эй дишагыли! Яв хъугъувал зурбаб вуяв. Гъит увуз ккунинсанси ибшири.

Ва дугъан риш гъадмусяльт сагъ гъахънийий.

Исайи гизафдар сагъ апIуб

²⁹ Гъадлин гъудучIвну, Иса Галилей гъюлихъна гъюру ва, саб тепейинина за духьну, деъру. ³⁰ Дугъахъна ликудар, дярябкърайидар, чIал дибиснайидар ва гизаф жара уззар кайидарра хъади аяхючIвеь халкъ уч шулу. Узурлуйир Дугъан багахъ дитру, Дугъу дурагар сагъ апIуру. ³¹ Ва гъаддиз, чIал дибиснайидар чIалнина дуфну, сакъатлудар сагъ духьну, ликудар рягъятди лицури ва кур духънайидарин уларихъ акв гъибшну гъябкъган, халкъ мюгътал гъахънийий ва Израилин Аллагъдин адар апIуз хъюгънийий.

Исайи юкъуд агъзур кас тухъ апIуб

³² Хъасин Исайи, ученикариз дих дапIну, кIуру:

— Узуз адмийир гъяйиф вузуз. Магъа, дурагин Узухъди хъади шубуд йигъ ву, хъа дурагиз ипIруб адар. Мураг рякъюз зяиф дархъбан бадали, фукIа-мукиIа дирипIди, дурагар деетидарза.

³³ Ученикари Дугъаз кIуру:

— Гъаму вари халкъ тухъ апIрубкъан уъл му ичиI йишваь наънан абгуча?

³⁴ Исайи дурагиз кIуру:

— Учвухъ швнуб уъл хъачвухъ?

Дураги кIуру:

— Ургуб уълна сакъюдар балугъар.

³⁵ Исайи, халкъдикан жилиин деуб ккун дапIну, ³⁶ гъаму ургуб уълна балугъар гъадагъуру ва, Аллагъдиз чухсагъул кIури ккарагнун, улер гъудутIну — ученикарихъна, хъа ученикари халкъдиз тувру. ³⁷ ДипIну вари ацIру, хъа хъиригъу къацIари ургуб тавра ацIру. ³⁸ Уълна балугъ гъипIу жиларин къадар юкъуд агъзурихънакъан вуйи, дурагихъна хъана дишагълийирира, бицIидарира гъипIнийий. ³⁹ Хъасин Иса, халкъ деетну, Учв люткейиль эъну, Магдала кIуру юрдназ гъафнийий.



Аъламат улупуб ккун апIуб

16 ¹Саб арайилан фарисийрина саддукйири, Исаин багахъна дуфну, думу ахтармиш апIуз ккунди, аършириан чпиз саб аъламатнан лишан улупуб ккун апIуру. ²Хъя Исаи дурализ жаваб вуди кIуру:

— Ригъ алабхъурайиган, учву: „Закур ригъ апIиди, гъаз гъапиш зав уьруди а“, — кIуручва. ³Хъя гъирин ухди: „Гъи селсиб мархъ угбъиди, гъаз гъапиш зав уьруди а“, — кIуручва. Эй, кьюб маш гъяйидар! Завуз дилигну, гъава аыгъю апIуз шулчвухъан, хъя гъаму шулайи ляхнарин гъаврий ахъуз шулдарчвухъан. ⁴Хътругъру ва аърбатан гъамусдин адмийири аъламатнан лишнар улупуб ккун апIура, хъя дурализ, Юнус пайгъамбрин кIул’ина гъафи аъламатналан гъайри, жара аъламат рябкъидар.

Гъамци дупну, Иса дуралихъан гъудучIвну гъягъюру.

*Фарисийрихъанна саддукийрихъан
ихтият йихъай*

⁵Дураг гъолин тмуну гъирағъидихъна ктучIвиган, Дугъян ученикарин улер гъадагъуб кIваълан дубшнади гъабхъну. ⁶Исаи дурализ кIуру:

— Лигай-гъа, фарисийринна саддукийирин дунихъан ихтият йихъай. ⁷Ученикар: «Му учу улер гъададагъиган кIурайиб вуй-кIан», — кIури, фикрик каҳънийи. ⁸Дураг фтикан улхураш аыгъяди, Исаи дурализ кIуру:

— Улер гъадагъундарча кIури, гъаз фикрик каҳъначва, хъугъвал адрудар. ⁹Учву гъамусра фтинкIа гъаврий ахънаданчва? Хъя хъуд агъзур кас тухъ гъапIу хъуб уълкан хъиригъу къацIари швнуб тавра ацIнуш, кIваълан гъубшнийичв? ¹⁰Ясана юкъуд агъзур касдигъна пай гъапIу ургуб уълкан хъиригъу къацIари швнуб тавра ацIнуш, учвуз гъархнайин? ¹¹Учву гъаз гъаврий ахърадай-кIан? Узу уълкан улхурадарза, хъя фарисийринна саддукийирин дунихъан ихтият йихъай! кIураза.

¹² Гъадмуган, Дугъу дунихъан ваъ, хъя фарисийринна саддукийирин кучIлин аыгъюваларихъан ихтият йихъай, кIурайивалин дураг гъаври ахънийи.



Петри, Иса Месигъ ву, пуб

¹³Хъя Филипдин Кесария кIуру шагърихъна гъафиган, Исаий Чан ученикарихъан гъерху:

— Адмиири Инсаниятдин Бай фуж ву, кIури, гъисаб апIура?

¹⁴Дурари гъамци кIуру:

— Садари Уву — штуан апIура Ягъ'я ву, тмундари — Ил'яс ву, кIура, шубурпидари — Еремия вая жара пайгъамбраикан сар ву, кIури, гъисаб апIура.

¹⁵Хъя Исаий:

— Хъя учву, Узу фуж ву кIури, гъисаб апIурачва? — пну, гъерхру.

¹⁶Петри:

— Уву Месигъ, чиви Аллагъдин Бай вува, — пну, жаваб тувру.

¹⁷Гъадмуган Исаий дугъяз жаваб вуди гъапи:

— Уву бахтавар вува, Юнусдин бай Симон, гъаз гъапиш увуз му, инсанари въз, хъя Айршарин Йиз Адашди ачмиш гъапIун-вуз. ¹⁸Хъанара кIуразавузки, уву, гъацира Петр яна Гъарз вува ва гъаму гъарз'ин Узу Йиз хъугънайидарин бин ккабалгидиза, думу сарихъанра дабгъуз хъибдар, гъеле айжалихъанна. ¹⁹Узу увухъна Айршарин Паччагълугъдин ачар тувдиза, ва уву жилариин фу гъадагъа гъапIиш, айршириин гъадму гъадагъа дапIину хъибди, ва уву жилариин фтиз ихтияр тувиш, айршириинра гъаддиз ихтияр тувну хъибди.

²⁰Ва гъадмуган Исаий Чан ученикариз, Учв Месигъ вуйиваликан гъич саризра дарпуб ижмишнаан гъадагъа апIуру.

Исаий Чан айжаликан пуб

²¹Гъадму вахтналан хъюгъну, Исаий ученикариз Учв Ерусалим-диз душну ккуниваликан, душват айходари, айхону маллиири, къанунчири Учв гизаф айзабарикк ккитруваликан ва Учв йив-ну йикIруваликан, шубудпи йигъян чиви шлуваликан ктибтуз хъюгънийи. ²²Хъя Петри Иса гъирагъдиз гъадаъну, Дугъан гафар гъадатIуз хъюгъру:

— Аллагъди Увуз рягым апIри, я Агъя! Яв кIул'ин дицисдар къазийр улуулукъри.

²³Исаий, Петрихъинди илдицну, гъапи:



— ГъудубчІв Узхъан, иблин! Уву Узу рякъ’ан адаурава, гъаз гъапиш яв фикрар адмийирин фикрар вуяв, хъа Аллагъдин варь.

²⁴Хъасин Исаи Чан ученикариз гъапи:

— Шлиз Узухъди гъюз ккундуш, думу, чан тямгъяр дирчну, чан хач гъадабгъну, Узухъди гюри. ²⁵Шлиз чан уьмур уьбхюз ккундуш, дугъан думу дубгди. Хъа шли Узу бадали чан уьмур пуч гъапиш, дугъаз думу бихъиди. ²⁶Чан уьмур гъудубгу касдиз, вари дюн’я чаз гъабшишра, фу хайир ахъа? Чан уьмур къяляхъ апібан бадали, дугъу фициб кымат тувди? ²⁷Фицики Инсанитдин Бай Чан Адашдин аднаъди, Чан малайикарра хъади гъиди, ва гъадмуган гъарсар касдиз, чан ляхнариз лигну, кымат тувди. ²⁸Дюзди к’уразачвуз: мушв’ин дийигънайидаракан сакьюдарииз, чипин айжал хъубкъайиз, Чан Паччагълугъдиль учІврайи Инсанитдин Бай рякъиди.

Исаи Мусайихъдина Ил’ясдихъди сюгъбат апІуб

17 ¹Йирхъуд йигълан Исаи Петр, Якъуб ва дугъан чве Югъан гъадагъну, сарун жарап фужкІара хътарди, ягъли дагъдиина гъягъору. ²Хъа Иса дурагин улихъ дигиши шулу: Дугъан маш рябкъюри-рябкъюри ригъси нурлу гъабхънийи, хъа палтар – ийфси лизи. ³Дурагин улихъна Исаиҳъди гафар апІурайи Мусана Ил’яс ачмиш шулу. ⁴Гъадмуган Петри Исаиз гъапи:

— Я Агъа! Учуз мушвахъ ужуди вучуз! Увуз ккундуш, мушвахъ шубуб паж апІуча: саб Увуз, саб Мусайиз ва саб Ил’ясдиз.

⁵Дугъу гъамци к’ури имиди, зав’ан дурагина аку диф ис шулу, ва сабпну дифрагъян гъамциб сес гъюру:

«Му Йиз масан Бай вуйиз. Узу Мугъ’ин гизаф рази вуза! Гъамгъахъ хъебехъай!»

⁶Му сес гъеебху ученикариз яманди гучI гъабхънийи, ва дураг, икрам апІури, жил’ина ахънийи. ⁷Исаи, дурагихъна дуфну, хил кучну, к’уру:

— Гъудужвай, гучI мапланай.

⁸Хъа ученикариз, к’улар за дапІну гъилигган, Исаилан гъайри фужкІа гъяркъюндайи. ⁹Хъа дураг дагъдилан гъоруган, Исаий дурагиз ижмишнаан гъапи:

— Инсанитдин Бай, дукІну, чИви хъайиз, гъаму учвуз гъабкъюдикан саризра макланай.



¹⁰Хъя ученикари Исаийхъан гъерхру:

— Къанунчайири, сифте Ил'яс дуфну ккунду, гъаз кIура?

¹¹Исай дурагиз гъамци жаваб туву:

— Дугъридан Ил'ясди, улихъимиidi дуфну, вари ккабалгну ккунду; ¹²Хъя кIуразачвузки, Ил'яс гъафну, амма инсанариз думу аьгью гъахъундар, ва дугъкан дураги чпиз ккуниб гъапIину. Гъаци Инсаниятдин Бализра дурагин хиларилантина аьзабар хъиди.

¹³Ва гъадмуган ученикар Иса штуан апIру Ягъ'яйикан улхурайивалин гъаври ахънийи.

Жин кубчIвнайи бай сагъ anIуб

¹⁴Дураг халкъдихъна гъафиган, сар касди, Исаийхъна дуфну, Дугъян улихъ къамкъарина ис духъну, ¹⁵кIуру:

— Я Агъя! Йиз балин язухъ апIина! Думу гъарза шула ва читин аьзабарикк ккахъра, чIур шули, цIий ва штуъ урсрира шулу.

¹⁶Узу думу Яв ученикарихъна хъади гъафунза, амма дурагихъан думу сагъ апIуз гъабхъундар.

¹⁷— Эй хътругъру инсанар! — кIуру гъадмуган Исаий. — Узу учвухъди филадизкъан гъузди, кIурачва?! Узу учву филадиз аьгъ апIуз?! Думу Узухъна аькъинай!

¹⁸Исаий буйругъ тувну, жин утIубкку, ва бай гъадмусяльтди сагъ шулу.

¹⁹Хъасин ученикари сасарди, Исаийхъна дуфну, Дугъхъан гъерхру:

— Хъя учхъан думу утIубккуз гъаз гъабхъундайикIан?

²⁰Исаий дурагиз гъапи:

— Учву дериндиан хъугъну адрувалиан, фицики дюзди кIуразачвуз: эгер учвувъ саб бицIи дилсибкъан хъугъувал ади гъабхъиш, учву гъатму дагъдиз: «Гъамлин гъатинди гъудубчIв», гъапиш, думу тинди гъудубчIур, ва учв'ан удукуркуб фукIа хъибдар. [21]*

* 17:21 Грекарин саспи БикIарий гъамци кIура: «Му жин анжагъ ушвар дисбидина ккарагбииндитIан утIубккуз шлуб дар».



Исайи хъана чан аյжаликан пуб

²² Чпи Галилейиъ аий вахтна, Исайи ученикариз гъапи:

— Инсаниятдин Бай багарихъди инсанарин хилиз тувди. ²³ Ду-
рари Думу йикIиди, ва шубудпи йигъан Думу Чиви хъиди.

Дугъу гъаци гъапиган, ученикар гизаф пашман гъахьнийи.

*Аллагъдин хулаз вуйи
налукарин гъякынаан*

²⁴ Дурар Кафернагъумдиз гъафиган, Аллагъдин хулаз налук
гъюдюбхюрайидари, дуфну, Петриз кIуру:

— Ичв Мялимди Аллагъдин хулаз налук тувдаринхъя?

²⁵ Петри:

— Ав, тувру, — гъапи.

Ва Петри хулаъ учIвну, чан ушв абцайизра, Исайи дугъаз
суал туву:

— Уву фици фикир апIурава, Симон Петр: гъаму дюн'яйин
паччгъари шилхъан налукар гъадагъури шулу — чпин баярихъан,
даршиш миди вуйи инсанарихъан?

²⁶ Петри жаваб туву:

— Миди вуйи инсанарихъан.

Думуган Исайи дугъаз гъапи:

— Гъаци вуйиган, дуарин баяр налукариккан азад ву. ²⁷ Амма
ухъантינה дурар инжик дархъбан бадали, гъюлихъна душну,
гъармах ккипну, сифте хъабхъу балугъ гъянзуйихъан хъадабгъ;
ва дидин ушв абццган, душваъ лазим къадар арсран пул бихъи-
дивуз; думу балугъин ушвниан адабгъну, Узхъандина увхъанди
вуйи налукнаанди дуарихъна тув.

*Аллагъдин Паччагълугъдизъ
вартIан аыхюр фуж ву?*

18 ¹ Гъадму вахтна, Исайихъна дуфну, ученикари гъерху:
— Аyrшарин Паччагълугъдизъ вартIан аыхюр фуж ву?

² Исайи, сар бицIириз дих дапIну, думу дуарин къялаъ деркк-
ну, ³ кIуру:

— Гъякъ кIуразачвуз, учву ичв юкIвар дигиш дапIну, бицIи
баярси дархьиш, Аyrшарин Паччагълугъдизъ учIвидарчва; ⁴ гъаци



вуйиган, фуж гъаму бицІи байси мютІюгъ гъахьиш, гъадму Аършарин Паччагълугъдис ахюорра ву. ⁵ Ва шли Узу бадали сар гъамцир бицІир къабул гъапІиш, дугъу Узу къабул апІура; ⁶ хъа шли Узухъ хъугънайи гъаму зияфдарикан саркъан рякъ'ан адайш, дугъаз, чан гардандис рягънин ахал ипну, гъюлизди гатІахъуб ужу шлийи. ⁷ Тямягълу дюн'айиз бала хъибди. Нефс-тямягъ адарди, дюн'я гъубзурдар, амма нефс-тямягъ арайиз гъюбан тах-сиркар ахю балайикк ккахъди. ⁸ Эгер яв хили, вая яв ликри уву тямягънахъна гъахури аш, думу хъадабтІну, ярхлаз гатІабхъ: кку-дудубкІру уымрий хил хътарди, вая лик ккадарди учІивуб ужу вувуз, жегъеннемдис ккудулубкІру цІигъ ургури хъайиз. ⁹ Яв ули уву тямягънахъна гъахураш, думу адабгъну, ярхлаз гатІабхъ: увуз, кьюб ул ади, жегъеннемдин цІигъ ургайиз, саб ул ади, ккудулубкІру уымрий учІивуб ужу вувуз.

¹⁰ Лигайгъа, бицІидар вара ул'ан миидитанай, фицики дугъ-риданра дурарин малайикар Аършарин Йиз Адашдин машнахъ шулу. [11]*

Дудубгнайи марчч

¹² Фици фикир апІурачва? Варж марчч сиварий аи кас, дуранкар саб гъудубгиш, урчІвцІурна урчІивуб гъитну, гъудубгу саб-дихъ лицуз дурушди гъузрин? ¹³ Ва эгер думу гъибихъиш, дюзди кІуразачвузки, думу урчІвцІурна урчІивуб дудругдариинтІан, саб гъаддинн артухъди шад хъиди. ¹⁴ Гъаци ичв Аършарин Адашдиз-ра гъаму бицІидарикан саркъан дургну ккундар.

Улдугнайи гъардшиз фици кюмек апІуруш

¹⁵ Эгер яв гъардши увуз къаршууди гунагъ шлу ляхин гъапІиш, душну, сарна-сарди гаф-Чал дапІну, дугъаз чан тахсир кидибт. Эгер увухъ хъебехъиш, дугъкан увуз хъана гъардаш хъиди.

¹⁶ Эгерки дугъу чан тахсир кІул'ин дубрисиши, жувуахъди хъана сар вая кьюр кас хъади гъараҳ, гъадму шагыдари гъарсаб гаф тасдикъ апІруганси. ¹⁷ Дурарихъра хъпебехъиш, мидкан хъугъ-найдариз иип; хъа хъугънайдарихъра хъпебехъиш, сарун думу

* 18:11 Грекарин саспи БикІбарий гъамци кІурира абхъна: «Инсаниятдин Байвари улдубгнайиб убхюз Дуфнайир ву».



аллагъусыр, ясана налук гьюдюбхурсир гысаб апИн. ¹⁸Дюзди кIуразачвуз: учву жилариин фу гъадагъа гъапиш, айшариина гъадму гъадагъа дапIну хьибди; ва учву жилариин фтиз ихтияр тувиш, айшариина гъаддиз ихтияр тувну хьибди. ¹⁹Гъацира дугъриди кIуразачвузки, эгер жилиин учкен кьюри сатИди фу-кIа Талаб гъапIиш, Айшарин Йиз Адашди думу тамам апИди. ²⁰Фицики кьор вая шубур кас Йиз чвурнахъ уч гъашиш, дурагин арайиль Узу хьидиза.

²¹Гъадмуган Петри, Исаийхъна дуфну, гъерхру:

— Я Агъя! Узуз къаршуди йиз гъардши гунгъар апIури гъашиш, швнубан дугълан хил алдабгъну ккунду? Ургубан?

²²Исаий дугъаз кIуру:

— Увуз «ургубан» кIурадарза, хъа ургцIур ражари ургубан. ²³Гъаддиз Айшарин Паччагълугъ чан гъуллугъчирихъди гъякъ-гъисаб апIуз ккун гъабхъи паччагъдиз ушшар ву. ²⁴Паччагъди гъякъ-гъисаб апIуз хъюгъиган, дугъахъна гизаф миллионариинди пул буржлу вуйи сар гъуллугъчи хъади гъюру. ²⁵Хъа дугъаз бурж къяляхъ апIуз пул адарди хъпаз лигну паччагъди, думура, дугъан хипира, веледарра ва дугъаз айи-адруб вари масу тувну, бурж ктипуз амур апIуру. ²⁶Гъуллугъчи дугъан ликарикк дахъну:

«Я паччагъ! СацIиб аых апИн, хъасин вари бурж ктипида», кIури, ккарагуз хъюгъру.

²⁷Паччагъди, рягъим дапIну, дугъаз бурж гъялал дапIну, думу деетуру. ²⁸Амма думу гъуллугъчийи, дилин удучIивган, чан юлд-шарикан чаз варж динар пул буржлу вуйир дагну, думу дидисну:

«Увук кайи йиз бурж ча», кIури, думу бугъмиш апIуз хъюгъний.

²⁹Гъадмуган дугъан юлдаш, дугъан ликарикк ккархъну, «сацIиб сабур апИн, яв бурж туварза», кIури, ккарагуз хъюгъю.

³⁰Амма мугъаз мюгълет тувуз ккун гъабхъундар ва, душну, бурж тувайизкъан, думу дустагъдиль иту.

³¹Му ляхин гъябкъю дугъан юлшар гизаф мюгътал ва пашман шулу ва, дуфну, паччагъдиз вари гъабши-гъабшиси ктибуру. ³²Гъадмуган паччагъди гъуллугъчийиз дих дапIну, кIуру:

«Эй угъраш лукI! Уву миннат апIбаз лигну, увуз яв думу бурж гъялал гъапIнийза. ³³Узу увуз гъялал гъапIубси, увхъанра яв юлдлиз гъялал апIуз шулдайнухъанхъа?»



³⁴ Хъял кубчIву паччагъди думу, вари бурж ктипайизкъан, азбар тувуз, жаллатIарихъна тувру.

³⁵ Гъамци А yrшарин Йиз Адашдира, учкан гъарури чан гунгъар кайи гъардшилан кIваантIан хил алдадабгъиш, учвуза гъаци апIиди.

Хипр гъадагъбакан

19 ¹Гъаму вари гафар дупну ккудукIхъан, Иса Галилей улке-ийян удучIвну, Ярдан нирин тлихъан терефнаь айи Ягъудияйин аytрафариз гъягъюру. ²Дугъан къяляхъди гизаф инсанар гъюру, ва Дугъу душваь гизафдар сагъ апIуру. ³Хъасин Исаийхъна фарисийр гъюру, дурари, Думу ахтармиш апIуз ккунди, гъерху:

— Фициб себеб гъабхьишра, Къанундинди жилириз хипр гъадауз ихтияр айин?

⁴ Дугъура дурариз жаваб вуди кIуру:

— Инсанар халкъ ГъапIури дурар сифтейиан жилирна хипр вуди халкъ гъапIуб Гирами китабарик гъурхунданчвахъя? ⁵Гъаддиз жилир, адашна дада гъитну, чан хиприк карсди ва дурар къюрид саб беден хъиди. ⁶Гъаци вуйиган, дурар сарун кьюб варь, хъа саб беден ву. Гъамци Аллагъди китIадар инсанди жара дапIну ккундар.

⁷ Фарисийри Дугъан жавабназ кIуру:

— Дици вуш Муса пайгъамбри, жара хъпан кагъаз тувну, хипр гъадауз шулу, гъаз дупнахъя?

⁸ Исаий дурариз жаваб тувру:

— Мусайи, ичв гъициркъю юкIвариз дилигну, учвуз ичв хпарихъди жара хъуз ихтияр тувну, хъа сифтейиан дици дайи. ⁹Амма кIуразачвузки: къяппавал себеб дарди шли чан хипр гъадаьну, жаар гъахиши, гъадгъу чав къяппавал апIура.

¹⁰ Гъадмуган Исаийн ученикари дугъаз кIуру:

— Эгер гъамциб гъял вуш, зат хипр дархуб ужу ву.

¹¹ Исаий дурариз гъапну:

— Му гаф варидарихъан къабул апIуз шулдар, думу чпиз уду-кувал тувнайи жиларихъантIан къабул апIуз даршул. ¹² Гъацис-дар жилар аки, садар бабкан шлуган эвлемиш хъуз даршлудар, садар адмийири хаси апIуру, хъа гъацдарра аки, Аллагъдиз гъул-лугъ апIури гъузбан бадали, чиб эвлемиш даршули гъузру. Гъав-рий ахъуз шлур, гъит, гъаврий ахъри.



Исайи бицIидариз уж'вал ккун апIуб

¹³ Хъасин Исайихъна, хилар иливну, дурагиз уж'вал ккун апI-бан бадали бицIидар хуру, хъа ученикари дураг хътIурккури шу-лу. ¹⁴ Амма Исайи гъапи:

— БицIидар узухъна гъюз гъитай, гъадагъа мапIанай, фицики Аyrшарин Паччагълугъ гъацдаринуб ву.

¹⁵ Исайи дурагиин хилар иливну, хъасин Думу дилин удучIвну гъягъюру.

Девлетлуйир ва Аллагыдин паччагълугъ

¹⁶ Саб ражари, сар живан дуфну, Исайихъан гъерху:

— Я Мялим, узуз ккудуудубкIру уьмур рубкъбан бадали, узу фициб ужуб ляхин дапIину ккунду?

¹⁷ Исайира дугъяз кIуру:

— Узхъан ужувлакан гъаз гъерхрава? Ужур вуйир анжагъ сар АллагытIан адар. Аллагыди увуз ккудуудубкIру уьмур тувну ккун-душ, Дугъу Мусайилантина тувнайи табшуругъар вари тамам апIин.

¹⁸ — Фу табшуругъар? — гъерху Дугъхъан живанди.

Исайи кIуру:

— «Адми миликIан», «къяппавал мапIан», «мигъитIибкIан», «кучIин шагъидвал мапIан», ¹⁹ «Адашдизна дадайиз гъюмат апIин» ва «яв багахъ хъайир жувуз жувузси ккун апIин».

²⁰ Живанди Исайиз кIуру:

— Узу гъамрар вари тамам апIураза, сарун фу ккими узуз?

²¹ Исайи дугъяз гъапи:

— Эгер увуз гъуркIу кас хъуз ккундуш, душну, яв айи-адруб масу тув, гъадмуган айшарий яв девлет хъибдивуз. Хъасин Узухъди гъач.

²² Му гафар гъеерху живан пашманди гъудучIвну гъягъюру, гъаз гъапиш думу гизаф девлетлу вуйи. ²³ Исайи мушв'ин Чан ученикариз гъапи:

— Дијодзи кIуразачвузки, девлетлуйиз Аyrшарин Паччагълугъ-дий учIувуз читинди алабхъиди. ²⁴ Хъанара кIуразачвуз: девлетлу-йиз Аyrшарин Паччагълугъдий учIувутIан девейиз рубдин гъон'-ан удубчIувуз рягъят ву.



²⁵ Му гафар deerхъну, мюгътал гъаши ученикари Исаихъан гъерху:

— Дици вуйиган, шилхъан учв уърхюз хъиди?

²⁶ Дурарихъинди дилигнуну, Исаий гъапи:

— Инсанарихъан му удукъруб дар, хъа Аллагъдихъан удудукъруб адар.

²⁷ Гъадмуган Петри жаваб вуди Дугъаз гъапи:

— Магъа учу, вари гъибтну, Увухъди хъача: хъа учуз фу хъибди?

²⁸ Исаиира дурагиз гъамци кІуро:

— Дюзди кІуразачвуз: ціийи дюн'яйиъ, Инсаниятдин Бай Чан тахтниин деиган, Узухъди гъафи учвура йицІикьюб тахтниин деъну, Израилин йицІикьюб тухмин суд апІидичва. ²⁹ Гъар шли Узу бадали чан хулар, вая чвийир, вая чийир, вая адаш, вая дада, вая чан веледар, вая хутлар дирчиш, дугъу гъадрар вари варж ражари артухъди гъадагъиди, ва дугъаз ккудуудубкІру уъмур рубкъиди. ³⁰ Му раЖари гизаф сарпидар думуган ккудукІрудар хъиди, хъа ккудукІрудар — сарпидар.

ПлумутІчийирикан тахалус

20 ¹ Аyrшарин Паччагълугъ — гвачІин ухди чан тЦумтІин багъдиль лихуз нежбрар агуз удучІиву эйсийиз ухшар ву. ² Дугъу, йигъян саб динар пул тувбан йикърар дапІну, дураг багъдиз лихуз гъаъру. ³ ГвачІинин урчІивуб шулади хул'ан удучІивуриз, ляхин дарди, дуфну майдандиин дийигънайи жара касар рякъюру.

⁴ Дугъу дурагизра кІуро:

— Учвура йиз тЦумтІин багъдиз гъачай, учвузыра ичв рубкъру рякъки тувдиза. — Дурагга гъюру.

⁵ Хъанара лисунган ва лисхъан сяайт шубубдихъанна, дугъу гъаци апІуро. ⁶ Хъа сяайт хъубдихъан, жарадар дуфну дийигъну рякъюру. Дугъу дурагизра гъапи:

— Ярхи йигъди ляхин дарди гъаз дийигъначва?

⁷ Дураги дугъаз кІуро:

— Учу сарира лихуз гъидисундарчу.

Думуган дугъу дурагизра кІуро:

— Учвура йиз тЦумтІин багъдиз гъараҳай.

⁸ Хябяхъ гъабшиганд, эйсийи чан миашатдин гъулугъчийиз кІуро:



— Нежбрализ дих дапІну, ахиримжи вуди лихуз хъюгъдари-лан ккебгъну, сарпидариина гъайизкъан, дурагиз чпин ляхнин гъякъи тув.

⁹Хябяхъдихъна, сяйт хъубари, лихуз хъюгъдарииз са-саб динар пул тувру. ¹⁰Садпидарди лихуз хъюгъдари, чпиз артухъди руб-къур дупну, фикир дапІнайи; амма дурагизра, йикъарнаш айи-ганси, са-саб динар пултлан тувундайи. ¹¹Чпин гъякъи гъадабгъ-ну, дураг эйсийиз чпин наразивал улупуз хъюгъю:

¹²— Гъаму къяляхъна гъафидар саб сяльтнаштан гъилихундар, хъа уву дурагна ярхи йигъди убцру ригъдикк гъилиху учу саб гъапіунва.

¹³Эйсийи дурагикан сариз кІуру:

— Я дуст кас! Узу увуз гиран ктапІурадарза; уву саб динар пулихъ лихуз рази гъахъундайна? ¹⁴Яв рубкъруб гъадабгъну, гъа-рах, узуз къанди лихуз хъюгъюризра увузкъануб тувуз ккунду-зуз. ¹⁵Узуз йиз айибикан узуз ккуниб апІуз ихтияр адаринхъя? Йиз мердвалиин уву гъаз бахил шулава? ¹⁶Гъамци ахиримжи вуйидарикан сарпидар, хъа сарпидарикан ахиримжи вуйидар хъиди, фицики теклиф айидар гизаф ву, хъа кадагънайидар цИб.

*Шубубни ражари
Исаи Чан ахжаликан пуб*

¹⁷Ерусалимдиз гъягъру рякъюь Исаи, Чан йицЛикьюр ученик гъирағъдиз гъадаъну, дурагиз гъапи:

¹⁸— Магъа ухъу Ерусалимдиз гъягъюрахъа. Инсаниятдин Бай ахю маллайринна къанунчийирин хилиз тувди. Думу карсну йи-кІуз жаза гъадабтИди. ¹⁹Хъасин Думу аллагъусузарин хилиз, Дугъ'ина арвалар хуз, гъирмажарихъди Думу урччувуз ва дариз зигуз тувди.

Дадайин тІалаб

²⁰Гъадму арайиь Исаихъна, Чан баярра хъади, Зеведейин хипр гъафнийи ва, икрамнаш ис духъну, дугъу фу-вш тІалаб гъапІни-и. ²¹Исаи дугъхъан, фу ккундуш гъерхиган, дугъу гъамци кІуру:

— Гъаму йиз къюр бализ Яв Паччагълугъдиш сар Яв арччул, тмуунур гагул терефнаш деуз гъита.

²²Исаиира жаваб вуди гъапи:



— Учву фу тIалаб апIураш, учвуз аыгъдарчвуз. Уз’ина гъюз ккайи аyzабар учвхъан аых апIуз хъибдин?

Дураги: «Ав, шулчухъан», — гъапнийи.

²³ Исаий дурагиз гъапи:

— Дугъриданна, Узу къабул апIуз ккайи аyzабар учвура аых апIарчва, хъя Йиз арччулна гагул терефарихъинди дитувал Узлан асиллу дар: думу иишвар, Йиз Адашди шлиз улупнаш, гъад-рариндар ву.

²⁴ Му гафар гъеерхъиган, имбу йицIур ученикди гъадму кьюр чвуччвкан зарбди хъял апIуру. ²⁵ Хъя Исаий, дурагиз вардари дих дапIну, кIуру:

— Халкъарин гъякимари дурагин зиин агъавал апIурайивал ва аыхюдари дурагин зиин чpin гъюкум улупурайивал учвуз аыгъя-чвуз. ²⁶ Хъя ичв арайиъ дици даришри: шлиз ичв арайиъ кIули-нур хъуз ккундуш, гъит думу ичв гъайгъушнаш ишри. ²⁷ Шлиз ичв арайиъ сарпир хъуз ккундуш, гъит ичв лукI ишри. ²⁸ Гъаци Инсаниятдин Байра Чаз жарадари гъуллугъ апIбан бадали ваъ, хъя Чав гъуллугъ апIбан бадали ва гизафдарин гунгъарилан хил алдабгъуз кIури Чан уймур тувбан бадали Дуфнайир ву.

Исаий кьюр кур кас сагъ апIуб

²⁹ Иса ва Дугъан ученикар Ерихондиан удучIурайиган, дурагин къяляхъди гизаф халкъ гъюз хъюгъю. ³⁰ Ва магъя рякъюхъ деънайи кьюр кури, чpin багхъантина Иса гъягъорайивал аыгъю дубхъну, аыхю сесниинди гъапи:

— Я Давудгъярин Бай! Ич язухъ апIина!

³¹ Халкъди дурагиз ккебехъ кIуйи, аммаки дураги хъанара зарбди Чигъар апIуз хъюгъю:

— Я Агъя, Давудгъярин Бай! Ич язухъ апIина!

³² Иса дугъужву ва, дурагиз дих дапIну, гъапи:

— Узкан фу ккундучвуз?

³³ Дураги Исаиз кIуру:

— Я Агъя, ич улар сагъ шлуси апIина.

³⁴ Исаий, язухъ дапIну, дурагин уларик хил кучу, ва сабпну дурагин улариз рябкъюз хъюгъю, хъя дурагга Дугъахъди гъя-гъюру.



Иса Ерусалимдиз гъюб

21 ¹Дураг Ерусалимдиз багахь духьну, Елион дагъдин али Вифания кIуру гъулахьна гъафиган, Исаий гъамциб буйргүрт тувну, кьюр ученик гъаьру:

— Гъатму ичв гъаншариь айи гъулаз гъарахай, душваь, дигбI-найи дажи ва дидин гъудугъ рякъидичвуз; гъадрап, тудурчну, Узухьна аькъинай. ³Ва нагагь учвуз шлика фукIа гъапиш, дураг Агъайиз бакарди ву, Дугъу дураг дишлади къяляхь апIиди, йипай.

⁴Му мици хъуб пайгъамбри дунайи исихъайи гафар кIулиз удучIвбан бадали шулайи ляхнар вуйи:

⁵ «Ерусалим шагъриз йипайки,
магъа, яв Паччагь,
даждин элеъну гъюра.
Думу учвухьна гъудгъинди,
Фурс ктарди, гъиди».

⁶Ученикари, душну, Исаий чпиз гъаписи гъапIу. ⁷Дажина гъудугъ хъаьну гъахнийи, ва дураин чпин палтар илирчнийи. Иса дурарин заьлан элеънийи. ⁸Халкъдикан гизафдари чпин палтар, хъа имбудари гъаарин цирклар-кюлерра рякъюкк ккирчуйи. ⁹Исаийн улихъдира, къяляхъдира гъюрайи халкъди чIигъар апIури гъахьну:

«Давудгъярин Бализ тяриф!
Агъайн ччвурнахь Гъюрайириз
уж'вал ибши!
Аьршариз тяриф!»

¹⁰Иса Ерусалимдиль учIиган, вари шагъур гъяракатназ гъафи;варди: «Му фуж вуйкIан?» кIури, гъерхуйи. ¹¹Хъа халкъдигъян:

— Му Галилейин Назаретдиан вуйи Иса пайгъамбар ву, — кIури, жаваб тувнийи.

*Исаий алвер апIурайидар
Аллагъдин хул'ан утIуккуб*

¹²Иса Аллагъдин хулан гъяятдиз гъафи. Душваь ариш-вериш апIурайидар вари утIукку, пул дигиш апIурайидарин устларна луфар масу туврайидарин кусрийир ккитIикIу. ¹³Исаий дураиз гъамци кIурайи:



— Йиз хулаз ккарагру хал пиди», кIури дибикIна, хъя учву дидкан Тарашибийрин мугъара дапIначва.

¹⁴Хъасин Аллагъдин хулаз Исаийхъна гизаф курарна ликудар хуру, ва Дугъу дураг сагъ апIуру. ¹⁵Дугъу апIурайи аьламатнан ляхнар ва, «Давудгъярин Бализ тяриф!» кIури, чигъар апIурайи баяр-шубар дяркъну, аххону маллиир, къанунчийр хъюлу ацIру.

¹⁶Ва дураги Дугъаз кIуру:

— Мураги фу кIураш, Увуз ебхурануз?

Исаиира дурагиз кIуру:

— Ав, ебхуразуз. Хъя учву Гирами китабарик: «Мухрихъ хъайдарин ва бишдарин мелзналан Узуз тярифнан гафар пуз гъйтдива», пну дибикIнайиб гъурхундарнучвахъя?

¹⁷Дураг гъадушв'ин илмиди, Иса Вифания кIуру гъулаз гъушний ва душваь йишв адапIний.

Инжирин гъеебциу гъар

¹⁸ГвачIinin шагъриз хъадакну гъюрайи Исаиз рякъюъ гаш шулу. ¹⁹Ва, рякъюн гъвалахъ инжирин гъар дябкъну, Думу дидин багахъна гъушу, амма кIажарилан гъайри, дидигъ фукIа гъибихъундайи. Исаий, му гъариз сарун асулагъ бегъер дарибхрива, пну, амур гъапIний. Инжирин гъар сабпну гъеебцнний. ²⁰Му аygъвалат гъябкъю ученикар мюгътал гъахнений:

— Инжирин гъар мици сабпну фици гъеебцннийкIан? — гъапи дураги.

²¹Исаий дурагиз жаваб вуди гъапи:

— Гъякъ кIуразачвуз, эгер учвуз хъугъувал аш ва учву шаклу даршиш, му инжирин гъарин кIул'ина гъафиб гъубзри, учву гъатму дагъдиз: «Яв йишв'лан улдубчIвну, гъюлиъ убс», гъапиш, гъадмура тамам хъибди. ²²Хъугъувал ади учву ккарагури фу ккун гъапIиш, гъадму хъибдичвуз.

Исаийн гъюкмикан

²³Хъасин Исаий, Аллагъдин хулан гъятдиз дуфну, аygъвалар улупурайиган, Дугъахъна аххю маллиирна, къанунчийрна аххюдар гъору.

Дураги гъерхру:

— Уву му ляхнар фициб гъюкмиинди апIурава? Шли Увуз гъацдар ляхнар апIуз гъокум тувну?



²⁴ Исаи дурагиз жаваб вуди гъапи:

— Узурга учвуз саб суал тувдиза. Эгер учву Узур жаваб тувиш, Узурга учвуз, мурар фициб гьюкмиинди апIураш, пилизачвуз.

²⁵ Штуан апIру Ягъ'яйиз штуан апIуз ихтияр шли тувну: Аллагь-ди, даршиш инсанари?

Дураг, фикраиркк ккахъну, чиб-чпикди гъамци пуз хъюгъру:

— Эгер ухьу «Аллагъдихъан» гъапиш, Дугъу ухьуз: «Дици вуш, дугъахъ гъаз хъугъундарчва?» пиди, ²⁶ хъа «инсанарин терефна-ан» пуз ухьуз халкъдихъан гучI а, гъаз гъапиш халкъди, Ягъ'я пайгъамбар ву кIури, гъисаб апIура.

²⁷ Гъаддиз дураги Исаи из жаваб вуди гъапи:

— Учуз альгъдарчуз.

Хъа Исаи дурагиз гъапи:

— Ари Узурга, Йиз му ляхнар фициб гьюкмиинди апIураш, пи-дараачвуз.

Къор балкан тахалус

²⁸ Учву фици фикир апIурачва? Сар касдиз къор бай аий. Ду-му касди, сарпирихъна дуфну, кIуру:

— Жан бай! Душну, гъи ихь тIумтIин багъдиль лих.

²⁹ Думу, «Ккуундарзуз!» — пну, жаваб тувну, хъасин, швумал духъну, лихуз гъагъору. ³⁰ Адашди, къорпи балихъна дуфну, ду-гъазра кIуру.

— Ибшри, гъагъорза, — жаваб туву му бали, амма думу гъу-шундайи.

³¹ Му къорикан адашдин тIалаб шли тамам гъапIну?

Дураги кIуру: «Сарпири».

Исаи дурагиз кIуру:

— Дугъриди кIуразачвуз: налук уч апIрударна чIуру аднан дишагълийир учвутIан ухди Аллагъдин Паччагълугъдиль учIви-ди. ³² Фицики штуан апIру Ягъ'я учвухъна дугъривалин ря-къюъди гъафну. Учву дугъахъ хъугъундарчва, хъа налук уч апIрударна чIуру аднан дишагълийир хъугъну. Учвуз гъамрар вари гъяркънушра, дугъахъ хъугъну, гунгъар гардандиль гъиди-сундарчва.



ТүмүтІчийрикан тахалус

³³ Жара тахалусдихъра хъебехъай. Сар касди түмтін багъ ибтура ва дидлан арчил илтібкіуру. Душваь чаяхир кчюбкыру ичійибккуру ва паж апіуру хъасин, багъ түмүтІчийрихъна тувну, учв жара йишвариз гъягъюру. ³⁴ Хъа түмтіар хъуркыру вахт улубкыиган, дугъу, түмтін багъдикан чан бегъер хуз, лукіар түмүтІчийрихъна гъаъру. ³⁵ ТүмүтІчийри, дугъан гъуллугъчир дидисну, дурарикан фуж урччуру, фуж йивну йикіуру, шлиина гъван ульюбхюру. ³⁶ Эйсийи хъанара жара лукіар гъаъру, хъа дурализра гъаци гъапінийи. ³⁷ Ахирки дугъу «белки дурализ дугъхъан нач шул», кіури, дураихъна чан бай гъаъру. ³⁸ Амма түмүтІчийри, эйсийин бай гъяркыиган, чиб-чпин арайиъ кіуру: «Му эйсийин ирсчи ву; гъачай думу йивну йикіухъа ва дугъан ирс ухъуз гъибтихъя». ³⁹ Думу дидисну, багъдиан адаъну, йивну йикіуру. ⁴⁰ Ари гъамус багъдин эйси гъафиган, дугъу түмүтІчийрикан гъапіди?

⁴¹ Му пис касар дугъу тәнкь апіди, хъа түмтін багъ вахт-ниинди чахъна бегъер рубкыру жара түмүтІчийрихъна арендайиз тувди.

⁴² Хъа Исаи, давам апіури, дурализ кіуру:

— Учву Гирами китабарій дидикінайи гъаму гафар гъурхундарнучва:

«Устийри гатіабху гъван мурччвануб гъабхыну.

Му ухъуз гъябкью аяламат Агъайи гъапіуб ву».

⁴³ Гъаддиз кіуразачвуз, Аyrшарин Паччагълуғ учвхъан тадаб-гъиди ва думу лайикъудариз тувди. ⁴⁴ Хъа фуж гъадму гъвандиина ахъиш, думу парчайр хъиди; хъа шил’ина думу ахъыш, чархъиди.

⁴⁵ Дугъан тахалусар гъеरхъу ахъюн маллайирна фарисийр Думу чпикан улхурайивалин гъавриъ ахъу. ⁴⁶ Дурализ Думу дисуз ккун шулу, амма халкъдихъан гучі шулу, гъаз гъапиш халкъди Думу пайгъамбар вуди гъисаб апіурайи.

Сумчрин мяракайикан тахалус

22 ¹Исаи хъанара дураг тахалусариинді гъаврикк ккауб давам гъапінийи.

² Аyrшарин Паччагълуғ сар гъамцир паччагъдиз ухшар ву. Сар паччагъди, гизафдариз сумчрик дупну, чан балин сумчрин



мярака дюзмиш гъапIнийи. ³ Вахт улубъган, дугъу чан лукIар хялариз теклиф апIуз гъау, амма дурагиз гъюз ккун гъабхъунда-
йи. ⁴ Дугъу хъанара дурагихъна чан жара лукIар гъальнийи:

— Магъа, дюрхнайи жердар, якъар дурккну, хурагарра дапIну,
вари гъязурди а, сумчрин демраз гъачай.

⁵ Садар, дугъан гафарихъ хъпебехъди, чин хутIариз, тмундар
ариш-вериш апIуз гъушнийи. ⁶ Имбудари, дугъан лукIар дидис-
ну, дурччвну йихуру. ⁷ Мидкан, пис хъял дуфну, паччагъди, чан
къушмар гъальну, дураг танкъ апIуру ва дурагин шагърик ца
кипру. ⁸ Хъасин паччагъди чан лукIариз кIуру:

— Сумчрин дем гъязурди а, хъа сумчриз теклиф дапIнайидар
лайикълу гъахъундар. ⁹ Гъаддиз, душну, кючайрий алахъкъандар-
из варидализ сумчрин демраз дих апIнай.

¹⁰ ЛукIарира, душну, кючайрий чипиз алахъкъандар вари: гъам
ужудар, гъамсана харжидар хъади дуфну, сумчрин суфра хялари
хъабцIуру. ¹¹ Хяларихъна удучIву паччагъдиз дурагиргъ сумчриз яра-
миш дару палтар или сар кас рякъюру. ¹² Паччагъди дугъаз кIуру:

— Я дуст кас, сумчрин палтар алдарди увхъан мина гъюз фици
гъабхъунвухъан?

Дугъазра кIуруб гъибихъундайи. ¹³ Гъадмуган паччагъди лукIа-
риз гъапнийи:

— Му, ликар-хилар йитIну, чIатинди мучIушназ, ишуб, гъа-
рай-суга, фигъан айишвазди гатIахъай. ¹⁴ Фицики теклиф дапI-
найидар гизафдар ву, хъа кадагънайидар – цИб.

*«Паччагъдиз паччагъдинуб,
хъа Аллагъдиз Аллагъдинуб туваи»*

¹⁵ Гъадмуган фарисийири, мушв'ан удучIвну, Исаии фукIа дюз
даруб кIайиз ккеуз мясляльт апIуру, ¹⁶ ва Дугъахъна, Гьироддин
терефкярра хъади, чин ученикар гъаъру. Дураги Исаийиз кIуру:

— Я Мялим! Учуз Уву гъякълу кас вуйивал ва инсанар Аллагъ-
дин дугъри рякъюъ таърайивал аыгъячуз. Уву инсандин маш-
наз, яна гъуллутъназ лигурдарва. ¹⁷ Гъаци вуйиган, учуз йип:
Римдин паччагъдиз учу налук тувуз хай шулин, даш шулдарин?

¹⁸ Исаии, дурагин чIуру ниятар рякъюри, кIуру:

— Кьюб маш гъайидар, Узу гъаз ахтармиш апIурачва? ¹⁹ Учву
налукди туврайи пул Узуз улупай.



Дураги Дугъахъна саб манат хур.

²⁰ — Мидик шлин шикилна ччвур ка? — пну, гъерху Исаий дурагихъан.

²¹ — Римдин паччагъдин, — жаваб туву дураги.

Гъадмуган Исаий дурагиз кIуру:

— Дици вуш, паччагъдинуб паччагъдиз, хъа Аллагъдинуб Аллагъдиз тувай.

²² Му гафар гъеерхъиган, дураг мюгътал шулу ва Дугъхъан гъучIвну гъягъору.

ГъачIидар чIиви шлуваликан

²³ Гъадму йигъан Дугъахъна гъачIидар чIиви шуб аийб дар кIурайи саддукйир гъору, ва дураги Исаийхъан гъерхру:

²⁴ — Я Мялим! Муса пайгъамбри дупна: «Эгер фуж чаз велед даршиди гъачIиш, дугъан хипр дугъан чвуччвуз дитри ва чвуччун тухум давам апIри». ²⁵ Учу ургур чве вуйча, ва сарпир эвлениш духъну, гъакIну ва, велед хътарди хъпаз лигнү, хипр дугъан чвуччвуз дитру. ²⁶ Гъамци къюрпирра, шубурпирра, та-а-ап ургурпириина гъайиз, вари йихуру. ²⁷ Аъхирки гъадму хипрра йикIуру. ²⁸ Гъаци гъабшиган, гъиямат йигъан вари чIиви шлуган, думу ургурикан фунурин хипр хъиди? Дурагиз вардари думу шувуз гъушний аххир.

²⁹ Исаий дурагиз гъамциб жаваб апIуру:

— Учву, я Гираами китабар, ясана Аллагъдин къудрат аygъдарди, улдугурачва. ³⁰ ЧIиви гъахъиган, дураги я швушвар хурдар, я шувуз гъягъюрдар. Дураг айршариль айи малайикарси хъиди. ³¹ Хъа гъиямат йигъан гъийихдар чIиви хъувалин гъякынаан Аллагъди учвуз гъапи гъаму гафар яраб учву гъурхундайкIан? ³² «Узу Ибра гъимдин Аллагъ вуза, Исаакъдин Аллагъ вуза ва Якъубдин Аллагъ вуза». Аллагъ дийихнайдарин ваъ, хъа чIивидарин Аллагъ ву.

³³ Му гафар гъеерхъиган, халкъ Исаайн аygъовалар улупбии мюгътал шуйи.

ВартIан метлеблу табшууругъ

³⁴ Исаий саддукйир фици чпин йиш'ин дитнуш, гъеебхъиган, фарисийирна саддукйир, сатIиди уч шулу. ³⁵ Дурагикан сар къа нунчийи, Исаий фу кIуруш кIури, Дугъхъан гъерхру:



³⁶ — Мялим! Къанундиз вартІан метлеблу табшуругъ фунуб ву?

³⁷ Исаири дугъяз кІуру:

— «Яв Агъа Аллагъ, вари юкІв хъипну, вари рюгънаан ва яв вари фагъмиан ккун апІин». ³⁸ Му сабпи ва вартІан метлеблу табшуругъ ву. ³⁹ Кьюбибра гъадиз барабар ву: «Яв багахъ хъайир жувуз жувуси ккун апІин». ⁴⁰ Гъаму къюб табшуругъдин вари Къанун ва пайгъамбарин БикІбар биналамиш духъна.

Месигъ шлин бай ву?

⁴¹ Саб йишв’ина уч духънайи фарисирихъан Исаи гъерху:

⁴² — Учву Месигъдин гъякънаан фу фикир апІурачва? Думу шлин Бай ву?

Фарисири Дугъяз:

— Давудгъярин Бай ву, — кІуру.

⁴³ Исаи дурарихъан хъана гъерху:

— Дици вуйиган, Рюгъну ацІнайи Давудри Дугъяз Агъа фици кІура? Давудри дупнаки:

⁴⁴ «Агъайи йиз Агъайиз гъапну:

Узу Яв душмнар Яв ликарикк дахъайизкъан,
Йиз арччул гъвалахъ дез?»

⁴⁵ Гъамци, Давудри Дугъяз Агъа кІурайиган, Думу дугъан Бай фици хъидихъа?

⁴⁶ Сарихъанра Дугъяз жаваб тувуз гъабхъундар. Ва гъадму йигъланмина, Исаиз суалар тувуз кІури, Сарун сарира Исаихъан гъич сабдиканра гъерхуз кІубанвал гъапІундар.

Къанунчиирихъанна фарисирихъан ихтият иихъай

23 ¹Хъасин Исаи, халкъдихъна ва Чан ученикарихъна илдицну, гъапний:

² — Мусайин Къанундин гъаврикк ккаъри, тахтниин къанунчийирна фарисиир дезна. ³Гъаци вуйиган, гъадрари кІурубдихъ хъебехъай ва кІулиз адабгъай, хъа дурари апІурайиганси ма-Панай, фицики дурари, фу ккун апІураш, кІура, хъа чпи гъаци апІурадар. ⁴Читин къайдийр кІули гъахуз гъитри, дурари гъонариин гъулайсуз гъагъар иливура, хъа дурар алишвлан ришвбан бадали чпи тІубкъан кучрадар. ⁵Хъа дурари фукІа апІурашра,



инсанариз рябкъри кIури апIурайиб ву. Гъамци дураги унтIлан-на хиллан илдижку Къанундиан гафар дидикIнайи чпин Чулар ахю апIури шулу ва палтарин цИимцIлар ярхи апIури шулу. ⁶Дураг мажлисар-демарий ва мистарий ужуздар йишвар дидис-ну деуз ккунидар ву. ⁷Ва базар-майднариин чпи тебрик апIури ва адмийири чпиз «Мялим! Мялим!» кIури, дих апIури ккунидар ву. ⁸Хъа учвуз гъит мялимар дарипри, фицики гъякъ Мялим сар ву, хъа учву вари гъардшар учвча. ⁹Ва жилариин саризра адаш макIанай, фицики учвуз сар Айршарин АдаштIан адар. ¹⁰Ва учвуз насигъятчирра дарипри, фицики сар ву учвуз айи Наси-гъятчи, думура Месигъ ву! ¹¹Учвкан варитIан заан вуйирикан, учвуз гъарааваш ишри, ¹²фицики, шли учв заанди дисури гъашиш, думу аскан апIиди, хъа шли учв асканди дисури гъашиш, гъадму заан хьиди.

Исайи къанунчийирна фарисийир беябур апIуб

¹³Ичв гъял пис хъибди, кьюб маш гъайи къанунчийирна фарисийир! Гъаз гъапиш адмийирин улихъ Айршарин Паччагълугъ-дин раккар хъяркърачва. Душвай я учву учIврадарчва, я учIвра-йидар учвуз гъитрадарчва. [14]*

¹⁵Ичв гъял пис хъибди, къанунчийирна фарисийир, кьюб маш гъайидар, гъаз гъапиш сар каскъан учвухъинди илтIикIбан бада-ли, учву гъюлериланна жиларилан илдицури шулучва; ва дицир кас гъидихъган, дугъкан учвутIан кьюб ражари бешбетер же-гъеннемагъли апIуручва.

¹⁶Ичв гъял пис хъибди, рякъ улупурайи кураг. Учву: «Аллагъ-дин хул’инди ху гъапIну пну, баладар, – кIурачва, – хъа Аллагъ-дин хулаъ айи гъизилиинди ху гъапIур чав туву гаф тамам апIуз мажбур ву», – кIурачва. ¹⁷Я кураг ва ахмакъар! Фу заан ву: гъи-зил, дарш гъадму гъизил гирами апIурайи Аллагъдин хал?

¹⁸Хъанара: «Шли Аллагъдиз багъишар апIру йишв’инди ху гъапIнуш, дугъаз, баладар, кIурачва, – хъа гъадина багъиш апIуз

* 23:14 Грекарин саспи БикIбарий гъамци кIура: «Ичв пис гъял хъибди, кьюб маш гъайи къанунчийирна фарисийир, фицики учву ачIни дишагълиирин хулар хътигIури, кьюб маш гъивну, ярхи гъудгнар апIурачва ва гъаддиз ахю жаза гъадабтIидичвуз».



дубхнайибдинди ху гъапIур чав туву гаф тамам апIуз мажбур ву», — кIурачва.¹⁹ Эй кур духнайидар! Фу заан ву: багъиш апIуз дубхнайиб, дарш думу гирами апIурайи марцци йишв?²⁰ Гъаци вуйиган, шли Аллагъдиз багъишар апIру йишв’инди ху апIураш, дугъу гъадушв’ин дивру варибдиндира ху апIура.²¹ Аллагъдин хул’инди ху апIурайири, гъам Аллагъдин хул’инди, гъамсана душваь яшамиш Шулайириинди ху апIура.²² Зав’инди ху апIурайири Аллагъдин тахтниинди ва дид’ин Деънайириинди ху апIура.²³ Ичв гъял пис хъибди, къанунчийрна фарисийир, фицики учву, Къанунди дунайибси, шюше, гъашв ва шивит укIарин йицIуб пайнакан саб пай туврачва, хъа Къанундиз вартIан метлеблу вуйиб: гъякъувал, рягъимувал, хъугъвал — гъархрачва; сифте вуди гъамрар дапIну ккунду, хъа тмунубра дарапIди гъибтуну ккундар.²⁴ Эй рякъ улупурайи кураг!²⁵ Учву хурагнак кабхъу мизмиз ктабгъурачва, хъа деве хътIюбкъюрачва.²⁶ Ичв гъял пис хъибди, къюб маш гъяйи къанунчийрна фарисийир, гъаз гъапиш учву захна бушгъаб заьлан марцци апIури шулучва, хъа дурагин айтIишв угъраш’валинна тямгъкарвалин йимишари абцIри шулучва.²⁷ Эй кур фарисей! Сифте захранна бушгъабан айтIишв марцци апIин, дурагин чIатан терефра марцциб шлуганси.²⁸ Ичв пис гъял хъибди, къюб маш гъяйи къанунчийрна фарисийир, фицики учву, учвуди рякъюз кIури, чIатанди лизиди дарснайи, хъа айтIишв майтин кIурбарина жюрбежюр чиркишну ацIнайи накъварин гюмбтариз ухшар вучва.²⁹ Гъаци учвура, инсанариз заьланди дугъридарси улупури, айтIанди кучIляхвалина нягъякъвалари ацIначва.

Фарисийирна къанунчийр жазайикк ккуркъбакан

²⁹ Ичв гъял пис хъибди, къюб маш гъяйи къанунчийр ва фарисийир! Учву, пайгъамбарииз ва жара марцци касариз гюмбтар диври, дурагин кабалгурачва.³⁰ «Эгер учу ич ата-бабийирин девриь яшамиш шули гъахънийиш, учу дурагихъди пайгъамбариин ифи удубзбаш иштирак хъидайча», — кIурачва.³¹ Гъаму гафарииинди учву пайгъамбар гъийихдарин веледар вуйивалин гъякънаан ачухъди шагъидвал апIурачва.³² Гъаци вуйиган, ичв абийирин тахсар пар давам апIинай!³³ Эй битIар, битIран ифи аидар! Учву же-гъеннемдин цIигъ гъитру жазайиккан фици гъергдичва?³⁴ Гъаддиз



магъа Узу учвухына пайгъамбэр, фагъумлуйир ва альмар гъарь-раза. Учву дурарикан садар йивну йихидичва, хъа тмундар ичв мистариль урчвидичва ва шагъриан шагъриз утуккури хьидичва.³⁵ Гъякълу Авелин ифдилан ккебгъну, Аллагъдиз багъишар туврушванна Аллагъдин хулан арайиль учву йивну гъачи Вараахайин бай Закар'яйин ифдина гъайизкъан, жилариин нягъякъди удубзурайи вари ифдин тахсирра ичвуб хъибди.³⁶ Дюзди курагавуз: гъамусдин адмийириз гъаму варибдин жаза гъадабтиди.

Ерусалимдин улубкъруб

³⁷ Эй, пайгъамбэр йивну йихру ва чахъна гъау илчийиин гъван улюбхру Ерусалим! Швнубан Узуз, пеъли чан хлинцца-риккна шюхъярси, яв халкъ уч апIуз ккун гъабхъунзуз, хъа учву куул ккивундарчва!³⁸ Лигай, магъа ичв хал ичИди гъубзна.³⁹ Магъа куразачвуз: «Агъайн ччвурнахъ Гъюрайир ужувлакк ишри», кури, учву дих дарапIкъан гагъди, Узу сарун рякъидарчвуз.

Аллагъдин хал дабгъбакан

24 ¹Иса Аллагъдин хул'ан удучIвиган, Дугъян ученикар, Дугъяз Аллагъдин хулан дараматар улупуз кури, багахъна гъафи.² Исаий дурализ куру:

— Гъамрар вари рякъюранчвуз? Дугъридан куразачвуз, мидин гъван гъвандин гъубзидар, вари дабгъиди.

Исаин терефкариин азабар улуркъуб

³Иса Елион дагъдин деънайиган, Дугъяхъна ученикар гъюру ва жарадар алдру йишв'ин дурари Дугъхъан гъерхру:

— Йип учуз, дици фила хъибди? Уву хъадакну гъюрувал ва гъиямат йигъ улубкъруб учуз фицдар лишнариинди аыгъю хъибди?

⁴Исаий дурализ жаваб вуди куру:

— Лигайга, шликIа учву алдатмиш дарапIбан бадали, ихтият йихъай.⁵ Фицики гизафдар: «Узу Месигъ вуз» кури, Йиз ччвурнаккди гъиди ва гизаф халкъар алдатмиш апIиди.⁶ Гъацира учвуз багахъ ва ярхла дявийирикан ебхьидичвуз. Лигайга, гучI мапIанай, фицики мураг духъну ккуни ляхнар ву, амма му сабан аыхир дар.⁷ Фицики халкъ халкъдин, паччагълугъ паччагълугъдин алархъиди. Гаш'валар ахъди, жюрбежюр йишвариъ жилар



түрччилиди. ⁸ Мурагар вары бедбахтваларин, бицілір апіру айзабар-си, сифте кіулар ву. ⁹ Гъадмуган учвуз айзабар түвди ва учву йив-ну йихиди; учву, Йиз ученикар хъпаз лигнү, вары халкъариз да-ккун хъидичва. ¹⁰ Гъадмуган гизафдар хъугъвалихъан ярхла хъи-ди. Сари-сар масу тувуз хъюгъди, инсанарин арайиль душманвал аххъди. ¹¹ Хъасин хайлин күчілін пайғамбрар арайиз удучівиди ва дурары гизафдар алдатмиш апіди. ¹² Къайдасузвалар гизаф артухъ хъпаз лигнү, гизафдарин сар-сарихъна ккунивал ціб хъибди. ¹³ Гъамрапар вары шли аыхиризкъан аых гъапіиш, гъадму дюрхну хъиди. ¹⁴ Гъарсаб миллетдиз ебхұрганси, Айршарин Па-чагылгұлдыкан Ужувлан хабар вары дюн'яйиль рабғыди, гъадму-ган гъияматтійигъ улубқыди.

Улукъуз ккайи айзабар

¹⁵ Гъамци Даниял пайғамбры улихъ ккимиidi дупнайи Гирами йишишвай Аллагы гъясбикк ккадру алчагъывал учвуз гъябкъиган (ур-хурайир гъит гъаврий ишри), ¹⁶ гъадмуган Ягъудия улкейиль айидар дагълариз гъергри. ¹⁷ Фуж гъадму вахтна гъваин алди гъашиш, чан хуласть айиб фукіа гъадабгъуз душвлан улдуручіви, ¹⁸ фуж хутілиш ади гъашиш, думу чан палтар гъадагъуз хуласть дурушри. ¹⁹ Гъагъдій айидаринна нанайихъ бицілідар хъайдарин гъадму йигъари гъял пис хъибди! ²⁰ Гъамрапар вары улукъину, учву гъергүз мажбур гъабхыи вахт я къорд, ясана сүлт йигъ дарибшри пну, ккарагай, ²¹ фицики гъадмуган дюн'я ккебгъхъанмина дарши ва сарун сабанра даршлусдар зурба бедбахтвалар хъиди. ²² Хъа гъадму йигъар Аллагыди кам гъапіундайиш, сар каскъан ккададархърий, амма Чав кадагънайидар бадали Дугъу гъадму йигъар кам апіди. ²³ Эгер учвуз думуган «Лиг, Месигъ гъамшвахъ хъа» вая «Гъату-швахъ хъа» гъапиши, мухъугъанай, ²⁴ фицики күчілін месигъар ва күчілін пайғамбрар удучівнү, зурба айламатнан лишнар улупуз хъюгъди. Дурагар, чипихъан шулуш, гъелле Аллагыди кадагънайи касарра алдатмиш апіуз чалишмиш хъиди. ²⁵ Магъа, Узу улихъими-ди гъапунзачвуз. ²⁶ Гъамци, нагагь учвуз «Магъа Думу ичі чю-лий а» гъапишра, дина мягъянай; «Магъа Думу хуларий гъитікі-на» гъапишра, мухъугъанай. ²⁷ Къоркылын ціа завун му кіулиан тму кіулиз фици крибчуруш, Инсаннайтдин Байра гъаци гъиди. ²⁸ Наан майит ади гъабшиш, гъадина люкъяр уч хъиди.



**Инсаниятдин Бай
аършарын гъюбкан**

²⁹ Хъа сабпну гъадму йигъарин къяляхъ «Ригъ ктIубшвиди, вазли акв тувидар, завариан хядар ахъди, завар ккадаршвиди».

³⁰ Гъадмуган зав'ина Инсаниятдин Балин лишан гъибди. Жилиин али вари халкъар ишиди, дураиз, Чан къувват ва зурба гъяйбат хъади, дифариин алди гъюрайи Инсаниятдин Бай рякъиди.

³¹ Дугъура зурба сес апIру зурна хъади Чан малайикар гъаъди, дурапи Дугъу ктагъу касар, жилин саб кIул'ан тмуну кIулиз гъяйизкъан, юкъиб терефарихъанди уч апIиди.

Инжирин гъарин мисал

³² Инжирин гъархъан мисал гъадабгъай: дидин кюлери кьюкъяр апIруган ва кIажар адашврган, хъад багахъ шулайивал аygъю шулучвуз. ³³ Гъаци учвузра, гъамрар вари гъяркъган, гъадму вахт, ичв раккнихъ хъайиси, багахъ дубхънайивал аygъю йибхъай. ³⁴ Гъякъ кIуразачвуз: му вари улубкъайиз, гъамусдин насили гъубзди. ³⁵ Заварна жилар ккадахъиди, хъа Йиз гафар дургидар.

**Думу фила шулуш,
саризра аygъдар**

³⁶ Я аършарин малайикариз, я Бализ – саризра йигъ ва сяльт аygъдар, хъа сар Адашдиз аygъя. ³⁷ Нюгъдин йигъари фици гъабхънуш, Инсаниятдин Бай гъювалра гъаци хъибди: ³⁸ жилиин шид улубчIвайиз улихъна Нюгъ чан гимдиль учIву йигъ'ина гъяйиз, вари фици ипIури-убхъури, швушвар хури, шувуз гъягъюри гъахънуш ³⁹ ва шид улубчIвайиз фици фтинкIа фикир ктарди гъахънуш, Инсаниятдин Бай гъювалра гъаци хъибди. ⁴⁰ Думу вахтна хутIлий къор нежбер лихури гъахъиш, дураикан сарнур гъахъиди, тмунур гъитди; ⁴¹ хилин рягърихъ тахил рябгъорайдар къор дишагъли гъахъиш, дураикан сар гъадагъиди, тмунур гъитди. ⁴² Гъаци вуйиган, ул иливну мааханай, гъаз гъапиш ичв Агъа гъюру йигъ учвуз аygъдарчвуз. ⁴³ Учвуз аygъю йибхъайки, хулан эйсийиз угъри гъюру вахт аygъяиши, думу даърахрийи ва чан хулаш учIвуз гъидритрий. ⁴⁴ Гъаддиз учвура гъязурди гъузай, фицики учву ккилигурни адру сяльтна Инсаниятдин Бай гъиди.



*Гъуллугъчийр
вафалудар дуխын ккунду*

⁴⁵ Агъайин вартIан аькьюллу, вафалу гъараваш фунур ву? Дутъу имбу гъаравшариз ипIруб тувуруди дуарин зиин гъуллугъчиidi дерккур. ⁴⁶ Хулаz гъафи агъайиз ляхин апIури гъяркью гъуллугъчи бахтавар ву. ⁴⁷ Гъякъ кIуразачвузки, агъайи думу чан вари хал-йишван аыхюрди дерккди. ⁴⁸ Хъя эгер думу гъуллугъчийи, чан кIваан: «Йиз агъа багаригъди гъидар» пну, ⁴⁹ миди вуйи чавсдариz сабра дарди йивури гъахьиш, луттирихъди ипIуз-убхъуз хъюгъиш, ⁵⁰ агъа, думу ккилигурни адру йигъан ва мялум дару сяльтна хъуркъди ⁵¹ ва дутъу думу гъуллугъчи кьюб штур апIиди: дутъкан, кьюб маш гъяйидарикан апIруб апIиди, душваь суза-фигъан, зурба ишуб абхъди.

ЙицIур шуркан тахалус

25 ¹ Гъадмуган Аyrшин Паччагълугъ, лампийр гъадагъну, ишишну жамран улихъна гъюрайи йицIур шураз ухшар хъибди. ² Дуарикан хъур аькьюллудар ва хъур абдалдар гъахьну. ³ Абдал шубари, лампийр гъадагъну, дуарихъ хъубзруб гъадабгъундар. ⁴ Аькьюллудари лампийрихъди хъубзрубра гъадабгъуру. ⁵ Жамру къан апIуради хъпаз лигнуну, дуар варни нивкIуз гъягъюру. ⁶ Хъя гъацIишваринган: «Магъа жам гъюра, улихъна удучтай», – кIури, сесер утIурччуру.

⁷ Вари шубар, гъудужвну, чпин лампийр акуди кархъуз хъюгъру. ⁸ Абдал шубари аькьюллудариз: «Ичв хъубзрубикан учузра чавай, даршиш ич лампийр кIушвур», – кIуру. ⁹ Хъя аькьюллудари: «Хъубзруб учузра, учузра гъубкIидар. Масу туврайидарихъна душну, учуз гъадабгъай», – кIуру.

¹⁰ Хъя дуар хъубзруб гъадабгъуз душну имиди, жам гъюру. Гъязурди аий шубар дугъахъди сумчрин демраз гъягъюру, ва сарун раккар хъяркъру. ¹¹ Хъасин хъубзруб гъадабгъуз гъушу тмуну шубарира дуфну: «Я Агъа, я Агъа! Учуз раккин абцца», – кIуру. ¹² Жамру дуариз жаваб вуди: «Дюзди кIуразачвуз, узуз учву зат аьгъюдаркъан дарзуз», – кIуру.

¹³ Гъаци вуйиган, мааханай, гъаз гъапиш я йигъ, я сяльт аьгъдарчвуз.



Шубур гъуллугъчиликан тахалус

¹⁴ Айршинин Паччагълугь сар гъамцир касдихъ тевуз шул: саб раЖари ярхла уылкайириз гъягъруган, дугъу чан гъуллугъчириз дих дапIну, чан мишиатдиз лигуз табшурмиш гъапIний. ¹⁵ Дурарин удукуувалариз лигну, сарихъна хъуд агъзур, тмунурихъна кюд агъзур, шубурпирихъна сад агъзур манат тувну, учв гъушний. ¹⁶ Хъуд агъзур манат гъибисури, дишлиди думу ляхник кипру ва хъуд агъзурсана гъазанмиш апIуру. ¹⁷ Гъаци кюд агъзур гъибисурира кюд агъзурсан гъазанмиш гъапIний. ¹⁸ Хъа сад агъзур манат гъибисури, душну, жил деебкнун, душвакк ккывну, пул жин гъапIну. ¹⁹ Саб хайлин вахтналан агъа гъюру ва дурарихъан арсан гъякъ-гъисаб апIувал ккун апIуру. ²⁰ Чахъ хъуд агъзур манат гъибтури, пул дубхну, кIуру:

— Агъа! Уву узухъна хъуд агъзур манат тувунва, магъа узу дураинди хъана хъуд агъзурсан гъазанмиш гъапIунза.

²¹ Агъайи дугъяз кIуру:

— Аферин увуз, ужур ва вафалу гъуллугъчи, бицIи ляхни узуз вафалу гъахунва, аыхю ляхнар табшурмиш апIидизавуз; яв агъайин мяракайиз дуфну, дугъахъди шадвал апIин.

²² Гъаци кюд агъзур манат гъибисурира, дуфну, кIуру:

— Агъа! Уву узухъна кюд агъзур манат тувунва, магъа дурарин кюмекниинди узу хъана кюд агъзурсан гъазанмиш гъапIунза.

²³ Агъайи дугъяз кIуру:

— Увузра аферин, ужур ва вафалу гъуллугъчи, бицIи ляхни узуз вафалу гъахунва, аыхю ляхин табшурмиш апIидизавуз; йиз мяракайиз дуфну, узухъди йиз шадвал пай апIин.

²⁴ Хъасин сад агъзур манат хъайир дуфну, кIуру:

— Агъа! Узуз уву учIру адми вуйиб альгъайизуз: дурубзури иишв'ан ккадабцIуз ва ктриву иишв'ан бегъер уч апIуз ккунир вува. ²⁵ ГучI кабхъури пул жиликк жин гъапIунза: магъа яв думу гъадабгъ.

²⁶ Хъа агъайи дугъяз гъамци кIуру:

— Эй жинжал ва темпел гъуллугъчи, увуз узу дурубзури иишв'ан ккадабцIур ва ктриву иишв'ан бегъер уч апIур вуйиб альгъайизуз? ²⁷ Гъаддиз уву йиз пул ляхник кипну ккундийи, гъафири узу думу артухъ дубхну гъадабгъидийза. ²⁸ Гъаддиз тадабгъай му-гъяхъ хъайир пул ва тувай иицIуд агъзур хъайирихъна. ²⁹ Фицики



гъарсар чаз айи касдиз хъанара тувди ва дугъан разу хъибди, хъа чаз адрурихъан айибра тадабгъиди. ³⁰ Ва башаккадру гъуллугъчи Чатинди мучIушназ гатIахъай. Душваь суза-фигъан, зурба ишуб хъибди.

Хъасин Исаий кIуру:

– Ебхъуз ибар кайидариз гъаму гафар ерхъри!

Аххиримжи суд

³¹ Инсаниятдин Бай Чан аднаьди малайикарра хъади гъафи-
ган, Дугъу Чан адлувалин паччагъвал апIиди. ³² Дугъан улихъ ва-
ри миллетар уч духьну хъиди, хъа Дугъу, марчлихъни марччар
ЦИгъарихъан фици жара апIури шулуш, гъаци дураг сар-сари-
хъан жара апIиди: ³³ марччар Чан арччул, цИгъар гагул тереф-
наль дерккди. ³⁴ Гъадмуган Паччагъди Чан арччул терефналь айи-
дариз пиidi:

– Гъачай йиз адашдин ужувлакк ккахънайидар, дюн'я ккебгъ-
хъанмина учвуз гъязурди дебккнай Аършарин Паччагълугъ ирс-
ди къабул апIинай. ³⁵ Узуз гашди айзуз, учву Узуз уъл тувнийчва;
Узу штухъ дахаргнайза, учву штухъди тухъ гъапIинийчва; Узу яд
жви вуйза, учву Узу къабул гъапIинийчва; ³⁶ гъяцалди айза, Уз'ин
палат алабхънийчва; иццури айза, учву Узуз гъилигнийчва; дус-
тагъдиль айза, Узухъна гъафнийчва.

³⁷ Гъадмуган дугъри касари Дугъаз пиidi:

– Я Агъа! Уву учуз гашди дяркъну, Увуз фила уъл гъивнийи-
хъя? Вая дахаргну ади, фила шид тувнийихъя? ³⁸ Уву яд жви ву-
ди, учу Уву фила къабул гъапIинийихъя? Вая гъяцалди дяркъну,
учу Ув'ин фила палат алабхънийихъя? ³⁹ Уву кетIерцну ади,
ясана дустагъдиль ади дяркъну, учу Увухъна фила гъафнийихъя?

⁴⁰ Ва Паччагъ вуйи Инсаниятдин Бали дурагиз жаваб вуди
пиidi:

– Дюэди кIуразачвуз, учву гъаму Йиз бицIи гъардшарикан са-
ризкъан гъаци гъапIинуш, гъадму учву Узуз гъапIу мисал ву.

⁴¹ Гъадмуган Дугъу чан гагул терефнахъ хъайидариз пиidi:

– Йиз улариккан дург духьну гъарахай, нянайикк ккайдар,
иблисдиз ва дугъан хликк ккайдариз гъязур дапIинай жегъен-
немдин ЦИз гъарахай. ⁴² Узуз гашди айзуз, учву Узуз уъл тувун-
дайчва; Узу дахаргнайза, шид тувундайчва; ⁴³ Узу яд жви вуди



гъафиган, Узу къабул гъапIундайчва; гъяцIалди айиган, Узухъ палат хъабхъундайчва; ищурайиган ва дустагъдьи айиган, Узухъ на гъафундайчва.

⁴⁴ Гъадмуган дурагира Дугъаз жаваб вуди пиdi:

— Я Агъя! Увуз гашди вая дахаргну ади, гъураба вая гъяцIалди ади, кетIерццнади, вая дустагъдьи ади дяркъну, учу Увуз гъул-лугъ дарапIди фила гъитнухъя?

⁴⁵ Гъадмуган Дугъу пиdi:

— Диюди кIуразачвузки, учву гъаму Йиз бицIи гъардшарикан саризкъан гъаци гъапIундарш, Уузра гъапIундарчва.

⁴⁶ Гъамци, нягъякъдар жегъеннемдин ккудуубукIру азабнаъ ахъди, хъя гъякълудар ккудуубукIру уьмур хъапIри хъиди.

Иса йикIуз къаст апIуб

26 ¹Вари гъаму гафар дупну ккудукIхъан, Исаий Чан учени-кариз кIуру:

² — Учвуз альгъячвузки, кьюд йигълан Пасхайн машквар хиб-ди ва Инсаниятдин Бай хачриин дариз зигбан бадали душмна-рин хилиз тувди.

³ Гъадму вахтна ахю маллайирна ахюдар Каяфа кIуру ахюну маллайнин гъяттидь уч духънайи. ⁴Дураги, аьмалдарвалиинди дидисну, Иса йикIуз йикърар апIуру. ⁵Амма дураги гъамци гъап-нийи:

— Анжагъ машквар йигълан вади, фицики халкъдик гъалабулугъ кабхъди.

Вифанияийиъ

⁶ Иса Вифанияийиъ хамран аззар кади гъаши Шимондин хулаъ айи вахтна, ⁷Дугъан багахъна, лизи ругдин бетисибдиъди багъа ягъра хъади, сар дишагъли гъюру. Дугъу гутдиз гъюн йивну ил-дигънайи Исаин кIул'ин ягъ улубзуру. ⁸Му гъябкъю ученика-рик, хъял кубчIвру.

Дураги:

— Гъамкъан ицци ниъ хъайи ягъ мугъу гъаз чIур гъапIу? ⁹Му ахю кыматнахъ масу тувну, пул касибари пай апIуз шулий-да, — кIуйи.

¹⁰Дурагин гъавриъ ахъу Исаий кIуру:



— Дишагълийиз нач шлуси гъаз кІурачва? Узу бадали дугъу ужуб ляхин апІура. ¹¹ Касибар гъарган учвухъди хъиди, хъя Узу учвухъди гъарган хъидарза. ¹² Гъаму ягъ Йиз кІулкан ктатбииндигүйдүү дугъу Йиз беден накъвдик кивбан бадали гъязур апІура. ¹³ Гъякъ кІуразачвуз: дюн'яйиъ му Ужувлан хабар наан рагбъури гъабшишра, думу кІваин апІиди ва дугъу гъапІубдикан ктибтиди.

Искариот Ягъудайи

Иса масу тувуб

¹⁴ Гъадмуган иицІикьюрикан сари — Искариот Ягъуда кІурури, аыхуну маллиирихъна душну, кІуру:

— Иса дисуз учвуз кюмек гъапІиш, узуз фу тувдичва?

Дурари дугъаз, арсан сумчІур манат тувурча, гъапи. ¹⁶ Гъаддихъянмина дугъу Иса масу тувуз гъулай вахт абгури шулу.

Пасхайн машквран суфрайихъ

¹⁷ ЛичІван лавшарин машквран садпи йигъян Исаийхъна дуфну, Дугъан ученикари гъерхнийи:

— Узуз пасхайн хураг учу наан гъязур дапІну ккундувуз?

¹⁸ Исаий дурализ кІуру:

— Шагъриз сар фланурихъна гъараҳай ва дугъаз йипай: «Мялимди гъерхра: „Узу пасхайн машквар Йиз ученикарра хъади яв хулаъ апІурза“».

¹⁹ Исаий гъаписи вари дапІну, ученикари пасхайн хураг гъязур гъапІнийи. ²⁰ Хябяхъ гъабхыбыси, Иса Чан иицІикьюр ученикдихъди гъюн йивну суфрайихъ деънийи. ²¹ Дурари ипІуз хъюгъиган, Дугъу кІуру:

— Гъякъ кІуразачвуз: учвкан сари Узу масу тувди.

²² Бегъем дерд дубхыну, гъарури Дугъаз пуз хъюгъю:

— Я Агъа, думу узу дарза аыхир?

²³ Дугъура жаваб вуди кІуру:

— Узухъди саб гъабрак уъл кубсрайири Узу масу тувди.

²⁴ Гъамци, Гираами китабариъ улупнайиганси, Инсаниятдин Бай масу тувди, амма шли Инсаниятдин Бай масу тувраш, дугъаз бала хъибди: думу касдиз, учв бабкан гъахъундайиш, ужу шуйи!

²⁵ Иса душмнализ масу тувуз рази гъахьи Ягъудайи кІуру:



— Думу узу дарза ахир, **Мялим?**

Исайи дугъаз кIуру:

— Гъаци уву кIурава.

ЦИИИ ЙИКЪАРНАН ИФИ

²⁶Дурари хураг ипIурайи вахтна, Исайи уъл гъадабгъуру, ужуб сяаыт ибшри дупну, думу гъудубтIуру ва, ученикарихъна туври, кIуру:

— Ма гъадабгъай, ипIинай: му Йиз беден вуйиз.

²⁷Аллагъазиз чухсагъул дупну, зах гъадабгъуру ва, ученикарихъна тувну, кIуру:

— Мид’ан варидаи убхъай. ²⁸Му цИии йикъар йитIурайи ва гизафдарихъанди, гунгъарилан хил алдабгъбан бадали, удубзура-йи Йиз ифи вуйиз. ²⁹КIуразачвузки, ТумтIарин му чаяхир сарун, Йиз Адашдин Паччагъалугъидъ учвухъди цИии чаяхир убхъайиз-къан, убхъидарза.

³⁰Хъасин Аллагъазин тярифназ мяъли дапIну, дурар Елион дагъазиз удучIуру.

Петрин инкар хъуваликан улихъими迪 пуб

³¹Дагъдина удучIиган, Исайи ученикариз кIуру:

— Учву варидаи ахъли Узу гъитичва, фицики Гирами кита-барий дибикIна:

«Марччлихъан йикIидиза,
ва лижракъ аий марччар даргъиди!»

³²Хъа Узу чIиви гъашиган, Узу Галилейиз гъягъидиза ва ду-шваша учвуз ккилигурни хъидиза.

³³Хъа Петри Исайиз жаваб вуди гъапи:

— Варидаи Уву гъитишра, узу гъич саб вахтнара дици дара-Парза.

³⁴Исайи дугъаз гъапи:

— Гъякъ кIуразавуз, ахъли даттли уъйир дапIну ккудубкIайиз, Узу шубубан «аыгъюр дарзуз» пидива.

³⁵Петри Дугъаз кIуру:

— Узу Увухъди йикIуб алабхъурушра, Уву «аыгъюр дарзуз» пидарза.

Имбу ученикарира гъамцдар гафар гъапнийи.



Исаин ккарагуб

³⁶ Хъасин Иса дуарихъди Гефсимания кІуро йишваз гъягъюру ва Дугъу чан ученикариз кІуро:

— Учву гъамшвахъ деай, хъа Узу душну гъатушвахъ ккарагидиза.

³⁷ Чахъди Петрна Зеведейин кьюрид баярра гъадагъу. ЮкІв лап пашман дубхъну, Дугъак сикинсузвал кабхъру. ³⁸ Гъадмуган Исаи дуариз гъапи:

— Йиз юкІв яман хажалатнаъ абхънайиз, гъамшвахъ Узухъди гъузай, гъафил махънай!

³⁹ Циб тинаси душну, машнахъди жил'ина ис духьну, Думу гъамци кІури, ккарагуз хъюгъру:

— Я А yrшарин Адаш, эгер шулуш, му аyzаб Уз'ина дяргъруси апIина, вушра, Узуз ккуниси ваъ, хъа Увуз ккуниси ибши.

⁴⁰ Хъасин ученикарихъна гъафиган, лигуруш, дуарар нивкIуз душнади рякъюру. Думуган Дугъу Петриз кІуро:

— Саб сяльтнаъкъан Узухъди дадрахди гъузуз шуладарин учхъян? ⁴¹ Гъафил махънай. Тямгъвалариъ адрахъбан бадали, ккарагай. Рюгъ кІубан ву, хъа беден — зяиф. ⁴² Хъана, гъудучIвну, Думу кьюбпи ражарира ккарагуру:

— Я Адаш, эгер Узу му аyzабнаккан ккадауб мумкин дарш, Яв гаф тамам ибши.

⁴³ Къяляхъ гъафириз, дуарар хъана даахну рякъюру. Дуарарин улар гъагъи духънайи. ⁴⁴ Дуарар гъитну, хъана тинаси гъудучIвну, Исаи шубубпи ражари гъадму гафар кІури, Чан ккарагуб текпар гъапIиний. ⁴⁵ Хъасин ученикарихъна дуфну, дуариз кІуро:

— Гъамусра даахну имичва, рягъятивал гъадабгъурчва? Инсаннитетдин Бай гунагъкварин хилиз тувру ваҳт магъа сарун хъубкъна. ⁴⁶ Гъудужвай, гъягъюрхъа; лигайки, Узу масу туврайир ба-гахъ шула.

Иса дисуб

⁴⁷ Дугъу гъеле гъамци кІури имиди магъа йицIикъюрикан сар Ягъуда дуфну хъуркъу. Дугъахъди, ханжларна маргъар хъади, аyxону маллиирина аyxодари гъаънайи адмийирин аyxю гъварч-ра хъайи.



⁴⁸ Иса масу тувуз дуфнайи Ягъудайи дураиз гъамци дупнайи: салам тувуган, узу шлиз мак гъапIиш гъадму Иса ву, ари Гъадму дисай.

⁴⁹ Дугъу, дишлади Исаийхъна дуфну, гъапи:

«Салам Увуз, Мялим!» – ва Дугъаз мак гъапIу.

⁵⁰ Исаий дугъаз кIуру:

– Яв апIуз ккайи ляхин апIин, дусткас.

Дишла, алархъну, эскрари Иса дисуру. ⁵¹ Гъадму арайиъ Исаийн ученикарикан сари, сабпну чан ханжал уьчIюбгъну, иивну, ахюо маллайн гъаравшин иб ктабтIуру. ⁵² Гъадмуган Исаий дугъаз кIуру:

– Яв ханжал чан гъашариъ ив, фицики ханжал уьчIюбгъю гъарсар ханжалихъан йикIиди. ⁵³ Ваяки Узу Йиз Адашдикан тIалаб гъапIиш, Дугъу Узуз гъамусаят малайикарин йицIикьюб кьушумтIан артухъ тутрувур, кIурана? ⁵⁴ Даршиш, гъаму вари гъамци дубхъну ккунду, кIури, Гирами китабариъ дидикIнайидар фици кIулиз удучIвиди?

⁵⁵ Хъасин Исаий халкъдиз кIуру:

– Узу дисуз, гъачагъ дисурайиганси, ханжларна маргъар хъади дуфначва. Узу гъар йигъан Аллагъдин хулаъ аygъовалар улупури деъну шуйза, хъа думуган Узу гъидисундайчва.

⁵⁶ Вари гъаму ляхнар пайгъамбарин Китабариъ дидикIнайидар кIули удубчIувуз шулайидар ву.

Гъадмуган вари Дугъан ученикар, Иса гъитну, гъергнийи.

Иса Заан диванханайин улихъ

⁵⁷ Иса гъидисдари Думу ахюону малла Каяфайхъна гъухнийи, душваъра къанунчирна ахюодар уч духнайи. ⁵⁸ Петр ярхлаанси Исаийхъди Каяфайин гъятдихънакъан гъафнийи ва, айтIинди учIвну, ахир фициб шулуш лигуз кIури, Аллагъдин хулан эскрарихъди деънийи. ⁵⁹ Ахюону маллиири, ахюодари ва вари Диванханайин миди вуйидари, Иса йикIбан къарап адабгъбан бадали, Дугъаз къаршуди кучIлин шагъидвалар агурайи. ⁶⁰ КучIлин шагъидвал апIури, гизафдар уч гъахънушра, дураиз лазим вуйи шагъидвалар гъидихъундайи. Ахирки кьюр кас багахънаси гъафи ⁶¹ ва дурари гъапи:

– Мугъу кIурайи: Узхъан Аллагъдин хал рабгъуз ва шубуд йи-гъян думу цИии кIултIан тикмиш апIуз шулзухъан.



⁶² Маллиириин ахюори, гъудужвну, Исаиз гъапи:

— Уву гъаз чАлкъан кIурадарва? Мурари апIурайи шагыидвал дюзигб вуйин?

⁶³ Исаий чАлкъан гъапундайи. Маллиириин ахюори гъудужвну Исаиз кIуру:

— Узу Аллагъдин улихъ Увкан дишди пуб тIалаб апIураза: Аллагъдин Бай Месигъ Уву вуна?

⁶⁴ Исаий дугъяз кIуру:

— Уву гъаци кIурава. Дицланна гъайри, Узу кIуразачвуз: гъамусдихъантине Инсаниятдин Бай вари Удукурурин арччулну гъвалахъ деъну ва дифарииндигъюри рякъидичвуз.

⁶⁵ Гъадмуган маллиириин ахюори, хъял улупури, чаин али палтар дячIяргъну, кIуру:

— Мугъу Аллагъ гъясбикк ккадру гафар кIура! Ухъуз сарун ша-гъидар гъаз ву? Магъа гъамусяайт учвуз варидализ Мугъан Аллагъ гъясбикк ккадру гафар гъеерхъунчвуз! ⁶⁶Учву фици фикир апIурачва?

Дурагира жаваб вуди гъапи:

— Думу тахсиркар ву ва айжализ лайикъ ву.

⁶⁷ Гъадмуган садари Дугъан машнаа тутийр атIу, гъурдар гъиву. Тмундари гарцIаликкан бачIар ккадату ⁶⁸ва «Увуз шли гъив-нуш, йип ари, Уву Месигъ вуш?» — кIури, кялхъри гъashi.

⁶⁹ Хъя Петр чIат гъятдиль деънайи. Дугъахъна дуфну, сар гъа-раваш дишагълийи кIуру:

— Увура Галилейжви Исаийхъ хъади гъахъунва.

⁷⁰ Амма думу варидалин улихъ инкар гъахъи:

— Уву фу кIурашра, айгъдарзуз.

⁷¹ Петр урнариан удучIурайиган, думу сар жара гъараваш ди-шагълийиз рякъюру, ва душваъ айдализ кIуру:

— Гъаму кас Назаретдиан вуйи Исаийхъ хъади гъахъину.

⁷² Ва дугъу хъанара: «Узуз думу Кас айгъюркъан дарзуз», — пну, ху апIуру.

⁷³ Саб арайилан гъамшварихъ дийигънайидари, багахънаси дуф-ну, Петр из кIуру:

— Дугъриданна увура гъадрарикан сар вува, фицики яв улхбан нугъатнора гъаци вуйиб улупура.

⁷⁴ Думуган Петр:



— Узуз думу Кас гьич аыгъюркъан дарзуз, — кIури, хуйир апIуз хьюгънийи.

⁷⁵ Гъаму арайиль даттли уь-уь гъапIу. Петрин, Исаи гъапи: «Даттли уьйир дапIну ккудубкIайиз, Узу шубубан „аыгъдарзуз“ пидива», — кIуру гафар кIваина гьюру. Ва гъадлин удучIву Петр, дерд дубхъну, зарбди гъишнийи.

Иса Пилатдихъна хуб

27 ¹ ГвачIин улубкыиган, вари аыхю маллайрина аыходари, уч духъну, Иса йикIуз къарап адабгънийи. ² Дугъан хилар-ликар йитIуз гъитну, Думу духну, Римди Ягъудияйиль гъокумдар вуди дерккнайи Понтий Пилатдин хилиз тувру. ³ Гъадмуган Иса масу туву Ягъудайи, Думу йикIуз ккайиб аыгъю дубхъну, чав гъапIубдин шумал духъну, сумчIур арсран манат аыхону маллайрихъна ва аыходарихъна къяляхъ тувнийи. ⁴ Дугъу дурагиз гъапнийи:

— Тахсирсуз кас масу тувну, гунагъ шлу ляхин гъапIунза.

Дурагира гъапнийи:

— Ич дидихъ фу хъа? Думу яв гъайгъу ву.

⁵ Ягъуда, арсар Аллагъдин хулаз гатIахъну, душну, чав учв ккирхну йикIуру. ⁶ Аыхону маллайри, арсран пулар гъадагъну, гъапи:

— Мураг Аллагъдин хулан хазнайиль дивуз хай шулдар, фици-ки дурага ифдихъ туву кымат ву.

⁷ Мясялальт дапIну, яд агъалиир кивбан бадали, арсран пуларихъ, сар гъабар апIру устайин хутIил гъадабгънийи. ⁸ Гъаддиз гъадму хутIлиз гъамусра «Ифдин хутIил» кIури ими. ⁹ Гъамци Еремия пайгъамбрин мелзналан гъапи гъаму гафар кIулиз удучIвну:

«Израилин халкъди
Дугъан кымат вуди дебкку
сумчIур арсран манат гъибиснийи
¹⁰ ва, узуз Агъайи апIин гъапиганси,
сар гъабар апIру устайин
хутIлихъ тувнийи».



Иса Пилатдин улихъ

¹¹ Иса гьюкумдрин улихъ деркку, гьюкумдри Исаийхъан гъерху:

— Уву «жугъдарин Паччагъ» вуна?

Исайи гъапи:

— Уву гъаци кІурава.

¹² Маллйирина ахюдари Исайик тахсрар кирчруган, Дугъу ду-
рализ саб жавабра тувундайи. ¹³ Гъадмуган Пилатди Дугъаз кІуру:

— Увуз къаршу вуди фукъан шагъидвалар апІураш, ебхура-
дарнуз?

¹⁴ Исаий саб гафнииндикъан жавабра тувундайи, хъа гьюкум-
дар мид'ин гизаф мюгътал гъахънийи.

¹⁵ Пасхайн машкварган, гьюкумдри, халкъди тАлаб гъапІган,
сар дидиснайир деетру аьдат ади гъабхънийи.

Пилатдин Иса йикІбан къарап

¹⁶ Гъадму вахтна дустагъдиъ Варава кІуру вардин мелзниин
али чуру кас айи. ¹⁷ Вари уч гъашиган, Пилатди дураихъан
гъерху:

— Узу фуж деетну ккундучувуз: Варава, дарш Месигъ ву кІура-
йи Иса?

¹⁸ Пилатдиз дурари Иса бахилвалиан масу тувнайиваликан
аьгъяйи.

¹⁹ Пилат суд апІру йишв'ин деънайи вахтна, дугъан хпири ду-
гъаз гъамци пуз гъуллугъчи гъахънийи:

— Гъадму марцци Касдин суд апІбахъан ярхла йихъ, гъаз гъа-
пиш узуз сан Дугъкан гучI ккапІру нивкI гъябкъюнзуз.

²⁰ Хъа маллйирина ахюдари халкъ, Варава ккадаъну, Иса пуч
апІуб ккун апІинай, кІури, алауру. ²¹ Гъадмуган Пилатди гъерху:

— Гъамракиан узу фуж деетну ккундучувуз?

Дурари: «Варава», — гъапнийи.

²² Пилатди дураихъан гъерху:

— Хъа Месигъ ву кІурайи Исайикан гъапІза?

Варидари: «Думу дариз зиг», — кІуру.

²³ — Фу чурууб гъапІнухъя Мугъу? — кІуру дурализ Пилатди.

Амма дурари имбуссан артухъ чIигъар апІуйи:

— Думу хачрак карс!



²⁴ ФтиқІа кюмек дарапІрайиб ва халкъдик гъалабулугъ кабхъ-
райиб дябкыну, Пилатди, шид хуз гъитну, чан хилар дижикІну,
кІуру:

— Узу Му марцци Касдин ифи удузбан тахсиркар дарза, учвуз
ккуниси апІнай.

²⁵ Дугъаз жаваб вуди вари халкъди гъапи:

— Дугъан ифи уч'ин ва ич веледариин гъубзри.

²⁶ Гъадмуган Пилатди дураихына Варава деетуру. Иса кІуруш,
гъирмажарихыди дурччвну, хачрак карсуз эскрарин хилиз тувру.

Эскрарин аървалар

²⁷ Гъадмуган эскрари Иса гьюкумдрин гъяятдиз гъахуру, Дугъ-
лан вари эскрарин десте илтІбшуру. ²⁸ Думу гъяцІал дапІну,
Дугъ'ин аку-элвен халат алабхуру. ²⁹ Зазарикан тажсиб дапІ-
ну, Дугъан кІул'ин улубкІуру ва Дугъан арччул хилиз маргъ ив-
ру, хъа Дугъан улихъ къамкъарина ис духьну, «Яшамиш ишри
жугъдарин Паччагъ» кІури, бегъем кялхъюз хъюгъру. ³⁰ Хъасин,
тутийр алатІури, хил'ан маргъ убчІобгъну, Дугъан кІуллан ийивуз
хъюгъний. ³¹ Исаийина бегъем аървалар хублан къяляхъ, Дугъ-
хъан халат хъидибтну, Дугъ'ин Чан палтар алахуру ва хачрак
карсуз гъахуру.

³² Шагъриан удучІвурайиган, дураиз Симон кІуру сар Кири-
неяжви алахуру. Думу Иса дариз зигру хачсиб дарагъаж гъаб-
хуз мажбур апІуру. ³³ «Келле» мяна айи Голгофа кІуру йишв'ина
гъафиган, ³⁴ Дугъаз убхъуз сиб кипнайи чаяхир тувру. Дугъаз, ду-
му дадмиш дапІну, убхъуз ккун гъабхъундай. ³⁵ Иса дариз гъи-
зигхъан, эскрари, тупут ипри, Дугъан палтар чпин арайиль пай
гъапІу. ³⁶ Дурап Иса гъаравлий уърхюри деъну, гъузу. ³⁷ Исаин
кІулихъ, Дугъан тахсир улупнайи гъамциб къул кебху: «Му Иса,
жугъдарин паччагъ ву». ³⁸ Исаихъди хъана кьюр гъачагъра — сар
Дугъан арччул, тмунур гагул гъвалхъанди — дариз гъизигний.
³⁹⁻⁴⁰ Душвхъантина гъудучІвну гъягърудари Дугъаз люкънар апІу-
йи, намуссуз кІурганси кІулар түрччвуйи ва кІуйи:

— Эй Аллагъдин хал дабгъур ва шубуд йигъан диврур! Уву
Аллагъдин Бай вуш, Уву уърх ва хачракан кудучІв.

⁴¹ Гъаму саягъниинди аыхю маллиирира, къанунчиирихъдина
аыхюдаихъди сатІиди Исаик кялхъри, кІуйи:



⁴² — Жарадар уърхюйи, гъамус Чахъан Учв уърхюз шуладар! Думу Израилин Паччагъ дарин? Гъит гъамус хачракан кудучІври, ва гъадмуган Дугъахъ хъугъархъа! ⁴³Дугъу Аллагъдик миж кивнайи. «Узу Аллагъдин Бай вуз», — КIурайир, Думу, Аллагъдиз Гирамир вуш, Аллагъди уърхри.

⁴⁴ Гъацира Дугъахъди дариз дизигнайи гъачгъарра Дугъак кялхьюйи. ⁴⁵Лисунган вари жилар мучIушну ккаъру. Гъамци шубуб сяльтнаш гъубзнийи. ⁴⁶Хъа сяльт шубудихъна Исаий зарбди Чигъ апIуру:

— Эли! Эли! Лама савахфани? — яна: «Я Адаш! Я Адаш! Уву Узу гъаз гъитунва?»

⁴⁷ Душвахъ хайдарикан бязидариз му гафар ерхъуру ва кIуру:

— Дугъу Ил'яс пайгъамблиз дих апIура.

⁴⁸ Гъадмусяльт дурарикан сар, жаргъну дуфну, бамбагсибдин учІвру чаяхир улубзну, думу маргълиинди, убхъуз кIури, Дугъан ушвнихъна гъачIабккуру. ⁴⁹Тмундари гъапи:

— Гъит Думу Чан гъялнаш, гъеле Думу уърхюз Ил'яс гъюруш, лигурхъа.

Исаийин аъжал

⁵⁰ Исаий хъанара зарбди Чигъ апIуру, ва Дугъу Чан жан тув-ру. ⁵¹ Сабпну Аллагъдин хулаш гъебхнайи перде, зиълан исина дячIябгъну, кьюб швур шулу, жилар дутIурччвну, гъарзар-гъванар тIуркIуру. ⁵² Накъвар ачмиш духъну, гизаф марцци касар Чиви шулу.

⁵³ Иса Чиви хъублан къяляхъ, накъвариан удучІву марцци касар Ерусалимдиз гъафнийи ва душваш дураг гизафдариз гъяркънийи.

⁵⁴ Исаийин гъаравлиш аши юзбашийина дугъахъди хъайи эскрапи, жилар тIурччувал ва мушв'ин гъаши жара гъядисийир гъяркъиган, бегъем гучI кабхъну, гъапи:

— Му дугъриданра Аллагъдин Бай вуйиштIан.

⁵⁵ Гъацира, Исаиз гъуллугъ апIуз кIури, Дугъахъди Галиле-йиан дуфнайи гизаф дишагълийирра, ярхлаан лигури, дийигънайи. ⁵⁶ Дурагин арайиль Магдалайиан вуйи Мар'ям, Якъубдинна Юсуфдин дада вуйи Мар'ям ва Зеведейин хпирра аши. ⁵⁷ Хябяхъ гъабшиган, Исаийин ученик Аримафейиан вуйи Юсуф кIуру сар



девлетлу кас гыору. ⁵⁸Дугъу, Пилатдихъна дуфну, Исаин беден чахъна тувуб талаб гъапту. Пилатдира Думу тувуз амур аптуру. ⁵⁹Юсуфди Исаин беден кадагъын, думу марцци ирин кафнигъян гъидиржуру. ⁶⁰Хъасин гъарзарыт утбукнайи чан хусуси таза накъвдиз Дугъан беден ивнийи ва, душваз учврушвахъ ахю гъван гъипну, гъушнийи. ⁶¹Магдалайиан вуйи Мар'ямна тмуну Мар'ям накъвдин гъаншарыт деъну гъузру.

⁶²Хъайигъан – му султ йигъ вуйи – ахюну маллирина фарисири, Пилатдихъна дуфну, ⁶³гъамци ктуру:

– Ич ахюор, гъадму КучЛяхри, Чав чИвиidi имиди: «Узу гъачИхъан шубуд йигълан чИви хъидиза», – гъапиб кІвайна гъафнинич. ⁶⁴Гъаци вуйиган, шубуд йигъ улдубчІвайиз, накъв ужуди уьбхюз амур апIин, даршиш Дугъан ученикари беден жин дапIину, хъасин халкъдиз: «Думу гъачИхъан чИви гъахъну», – пиidi, хъа му кучIал сабпибIан писуб хъибди.

⁶⁵Пилатди дурализ гъапи:

– Магъа учвуз гъаравлар, учвуз аygъюганси накъв уьбхяй.

⁶⁶Дурарира, душну, гъаравлар дерккнийи. Дишихъ хъайи гъван мюгъкам дапIину, дид'ин питчат алабснийи.

Иса чИви хъуб

28 ¹Султ йигъ улдубчІвну, гъяфтайн садпи, яна элгъет ии-
гъан сигърин ухди, Магдалайиан вуйи Мар'ямна тмуну
Мар'ям Исаин накъвдиз лигуз гъору. ²Сабпну зарбди жилар
тПурччуру, фицики аршариан Аллагъдин малайик гъору ва,
накъдихъ гъипнайи гъван гъидипну, дид'ин деъру. ³Дугъан ряб-
кьюб къюркълин цасиб, палат лизи йифсиб вуйи. ⁴Дугъхан гучI
гъабхъи гъаравларин жандыз зиз абхънийи, дураг майтарси гъахъ-
нийи. ⁵Малайикди, чIалниина дуфну, дишагълиириз гъапи:

– ГучI мапIанай, учву дариз гъизигу Иса агури дуфнайиб
аygъязуз. ⁶Амма Думу мушваз имдар. Думу, Чав гъапиганси,
чИви гъахъну. Багахъ духъну, Думу дитну гъахъи иишваз лигай.
⁷Тяди душну, Дугъан ученикариз йипай: «Иса гъачIир чИви
гъахъну. Думу учвутIан ухди Галилейиц хъиди, душваз Думу ря-
къидичвуз. Магъа, узу учвуз йиз кIуруб гъапунза».

⁸Дураг дишлиди накъвдихъан гъудучІвну, гучI кабхъну ва
къадар адрукъан шадра духъну, ученикариз цИийи чIал апIуз,



жаргъури гъушу. ⁹ Сабпну Иса Учв дуарин улихъна гъудучІву-
ру, салам тувру. Дурарра, Исаиз багахъ духыну, Дугъан ликар
хаблан дапІну, Дугъаз икрамнаъ дахъу. ¹⁰ Гъадмуган Исаи дура-
риз кІуру:

— ГучI мапIанай. Душну, Йиз гъардшариз, Галилейиз гъара-
хай, кІуру хабар тувай, душваъ дуариз Узу рякъиди.

Гъаравлариз гъабхъиб

¹¹ Дишагълийир рякъюъ имиди, гъаравларикан бязидари шагъ-
риз дуфну, варибикан ахюону маллиириз ктибтний. ¹² Мура-
рира, ахюодарихъди сатIиди мясяляйт дапІну, эскрариз бегъемди
пул тувру ва кІуру:

¹³ — Варидариз йипайки: «Йишвну, учу даахну имиди, Дугъан
ученикар дуфну, Думу жин дапІну гъурхну». ¹⁴ Нагагъ му хабар
гъюкумдрихъна хъубкъиш, учу учвуз гаф дяргърганси апIидича.

¹⁵ Дураги, пул гъадабгъну, чпиз гъапибси гъапIийи. Хъа гъа-
му аваза жугъдарин арайиъ гъира дарабгъну ими.

Ученикариз вуйи Исаин табшуругъ

¹⁶ Хъа йицIисар ученик Галилейиз Исаи гъарахай гъапи дагъ-
дина гъафнийи. ¹⁷ Думу гъяркъиган, дураги икрамнаъ дахънийи,
амма сакъюдар шаклу гъахънийи. ¹⁸ Багахъна дуфну, Исаи дура-
риз гъапи:

— Узуз заварииин ва жилариин вари гъюкум тувназуз. ¹⁹ Гъаци
вуйиган, душну, Адашдин, Балин ва Гирами Рюгънан ччурна-
хъан штуан апIури, вари миллетарикан Йиз ученикар апIинай.
²⁰ Дураги Узу учвуз табшурмиш гъапIкъандар вари кІули гъахуз
улупай. Хъа Узу, гъиямат йигъ хъайизкъан, гъаммишан учвухъди
хъидиза.



МАРКДИ КТИБТУ УЖУВЛАН ХАБАР

Гъаму Ужувлан хабар, «Марци вакиларин ляхнар» кIуру китабдиан ачухъ шулайиганси, саб вахтна Павелихъди гъаши Маркди Гирами Рюгънан кюмекниндигъибикIуб ву. Му Хабар Маркди, чавна Павел Римдиг айиган, Исаийхъ хъугъну имбу жара халкъариз кIури, 60-пи – 65-пи йисари гъибикIуб вуди гъисаб апIура. Му Хабарнаң кIулин фикир, Иса Месигъ Аллагъдин Бай вуди, Дугъан гъурдаң гъарсаб уъзриин, табиаътдин, аյжалишин гъюкум айиб улупна. Аллагъдин шагыидвалинди Исаий Чаз айи гъюкум гъич саб вахтнара Чан хайирназ ишлемши гъапIундар – Дугъу Чан вари къувват инсан гунагъвалин гъялкъайиан азад апIуз харж гъапIину. Автори Исаин гъаму жилариин гъабхи уымрин айхиримжи ийгъарикан, Дугъан айзабарикан, айжалнакан ва Думу чIиви хъуваликан ктибтура. Гъаму Ужувлан хабарну Иса айжалишин гъалиб хъуваликан лап ачухъди шагыидвал апIура.

*Штуан апIру Ягъ'яи
халкъ Месигъ гъювалихъна гъязур апIуб*

1 ¹Аллагъдин Балкан, Иса Месигъдикан вуйи Ужувлан хабар гъамци ккебгъра. ²Ишая пайгъамбрин китабдиъ дибикIна: «Магъа, Яв улихъди Узу Йиз дюн'яйиз кас гъаъраза.

Дугъу Увуз рякъ гъязур апIиди.

3 Ичи чюлий дих атIабгура, „Агъайиз рякъ ккабалгай.



Дугъаз рякъяр-жилгъийир дишдар апИнай!“»

⁴ ИчИи чюлиъ, адмийир штуан апIури, гъар касди чан тахс-
пар гардандиль дисбан, инсанар штуан апIбан ва гъамци чин
гунгъарилан хил алдабгъбан бадали, аygьювалар рагъури, Ягъ’я
ачмиш шулу.

⁵ Дугъахъна вари Ягъудия жиларилан ва Ерусалимдиан халкъар
гъюйи, чин гунгъарииин швумал духъну, дурари чин гунгъар
гардандиль дисуйи, ва дугъу дурар Ярдан нирий штуан апIуий.

⁶ Ягъ’яйин девейин хъайнин палат алии ва юкъвнаан гъидкын
яркыу чIул идибтIайи. Дугъу елгнагарна чIурдин йиччв ипIуий.

⁷ Дугъу адмийириз кIуий: «Йиз къяляхъди узутIан Къудратлур
гъюра. Узу, ис алахъну, Дугъан шаламарин гъахмийир гъядарчуз-
къан лайикъ дарза. ⁸Узу учву штуан гъапIунзачву, хъа Дугъу учву
Гирами Рюгънахъди цIийи алаидичву».

Иса штуан хъуб

⁹ Гъадму йигъари Галилей улкейин Назарет шагъриан Иса
гъюру, Ягъ’яйи Думу Ярдан нирий штуан апIуру. ¹⁰ Иса штуан
удучIвурайиган, аэршар гъатIарщну, Дугъаз Чайна Гирами Рюгъ
лүфси ис шули рякъюру, ¹¹ зав’ан дих шулу: «Уву Йиз масан Бай
вуга, Узу Ув’ин гизаф рази вуз!»

Иса ахтармиш апIуб

¹² Ва гъадму саяйт Рюгъну Исаиз ичИи чюлиз гъягъюз амур
апIуру. ¹³ Иблисди ахтармиш апIури, Исаий ягъчIвур йигъ ичИи
чюлиъ гъапIуру. Думу чIурдин гъайванатарин арайиъ яшамиш
шулу, ва малайикар Исаин гъайгъушнаа дийигъуру.

Исаий ученикар ктагъуб

¹⁴ Ягъ’я дустагъдиль итбахъан, Ужувлан хабар рабгъури, Иса Га-
лилей улкейиз гъягъюру.

¹⁵ Дугъу кIуий: «Вахт улубкына. Аллагъдин Паччагълугъ багахъ
дубхъна! Ичв гунгъар гардандиль дидисну, уьмур дигиш апIнай,
Ужувлан хабарнахъ хъугъай!»

¹⁶ Иса Галилей гюлхъантина гъягъюрайиган, Дугъаз гюлиkk
чулар ккирчрайи Симон ва дугъан чве Андрей рякъюру. Дурар
балугъчийр вуйи.



¹⁷ Исаий дурагиз кIуру:

— Узухъди гъачай ва Узу учвкан инсанарин юкIвар дисру ба-
лугъчийр ктаурза.

¹⁸ Дураг, гъадмусяльт чин чулар дирчну, Гъадгъахъди гъя-
гъюру.

¹⁹ СацИб тина гъушган, Дугъаз Зеведейин бай Якъубна дугъан
чве Югъан рякъюру. Дураги люткейль чулар рас апIурайи. ²⁰Ду-
гъу дурагиз дих апIуру, ва дураг, чин адаш Зеведей ва дугъан
балугъчийр люткейль гъитну, Гъадгъахъди гъягъюру.

Жин кайир сагъ апIуб

²¹ Дураги Кафернагъум шагъриз рякъ бисуру. Султ йигъян Иса
жугъдарин мистаз гъюру ва душвавь Дугъу адмийириз аygъувалар
улупуру. ²²Дураг Дугъан улупбарии мюгътал духовнайи, фицики
Исаий къанунчийриси варь, хъа гъюкум хлиль айириси улупуйи.

²³ Сабпну мистаз жин кайи адми гъюру, дугъу чигъар апIуру:

²⁴ — Учкан фу ккундувуз, Назаретдиан вуйи Иса? Учу пуч
апIуз дуфнана? Узуз Уву аygъязуз — Аллагъдин гъайнайи Ги-
рамир!

²⁵ Исаий жиндиз буйругъ тувру:

— ХьючIюбкъ ва дугъ'ан удубчIв!

²⁶ Гъадмуган жин, думу дутIурччвну, чIветI дапIну, дугъ'ан
удубчIвтуру. ²⁷ Вари русвагъ шулу, сари-сарихъан гъерхуз хьюгъру:

«Мураг гъапIру цийи аygъувалар ву? Мугъу жинаризра кми-
ди амур апIураки, хъа дураг Мугъаз мютIюгъ шулира а». ²⁸ Мугъ-
кан аваза вари Галилей уълке вуйибси рабгъуру.

Исаий гизаф адмийир сагъ апIуб

²⁹ Мист'ан удучIвган, Иса Якъубна Югъан хъади Симондинна
Андрейин хулаз гъагъюру. ³⁰ Симондин сижарбаб цIа алди дахъ-
найи. Дугъкан Исаиз кIуру. ³¹ Иса багахъна дуфну, хил дебис-
ну, дугъаз гъедужвуз кюмек апIуру. ЦIа дишла улдумбчIвтуру, ва
дишагъли хяларин гъайгъушналь учIвтуру.

³² Хябяхъдихъна ригъ алабхъиган, Исаийхъна вари иццрудар
ва жинар кайидар хуру. ³³ УрчIарихъна вари шагъур уч дубхъ-
найи. ³⁴ Жюрбежюр уъззари ккагънайи гизафдар сагъ гъапI-
нийи ва гизафдариан жинар утIурккнийи. Исаий жинариз



Учв ашкар апIуб гъадагъа гъапIиний, фицики дурализ, Думу фуж вуш, аьгъайи.

³⁵ Сигъринган, гъеле мучIуди имиди, Думу хул'ан удучIвну, архаин йишвахъна гъягъюру ва гъадушвахъ ккарагуру. ³⁶ Симон-на Дугъахъди хъайдар Думу агуз гъягъюру ³⁷ ва, гъидихъган, Дугъаз кIуру:

— Варидари Уву агура.

³⁸ — Гъачай багахъ хъайи шагъариз гъягъюрхъа, Узхъан душва-риъра аьгьювалар улупуз шлуси. Узу гъаддиз дуфнайир вуза, — кIуру Исаий дурализ.

³⁹ Гъамци Думу вари Галилей вуйибси, мистариъ аьгьювалар улупури ва жинар утIурккури, лицуру.

Хамран аьзар кайир сагъ апIуб

⁴⁰ Хамран аьзар кайир Исаийхъна дуфну, къамкъарихъди Ду-гъан улихъ дусну, кюмек ккун апIури, ккарагуз хъюгъру:

— Эгер Увуз ккун гъабшиш, узу марцц апIуз шулвухъан.

⁴¹ Дугъан язухъ гъабхъи Исаий хил гъачIабккну, дугъак кубкI-ну, кIуру:

— Ккундузуз, марцц йихъ!

⁴² Хамран аьзар гъадму сяльт дугълан улдубчIвуру ва марцц шулу. ⁴³⁻⁴⁴ Исаий, ижими迪 гъамци дупну, думу гъаъру:

— Лиг гъа, мидкан гъич саризра макIан, хъа маллайихъна душ-ну, жуву улуп, халкъдиз уву марцц хъпан шагъидвал вуди, Муса пайгъамбри дупнайиганси, гъурбан апIуз ужуб гъайибх.

⁴⁵ Хъа дугъу, душну, гъеле чаз макIан гъапнушра, варишвариъ чаин улубкъуб ктибтуру, гъаддиз Исаийхъан сарун ашкарди шагъ-риз гъюз шули гъабхъундайи, Думу адмийир адрушвариъ гъузу-йи. Гъадушваризра кмиди Дугъахъна варишвариан гъойи.

Паралич кайир сагъ апIуб

2 ¹Сакъодар йигъарилан Иса Кафернагъумдиз къяляхъ гъюру. ²Дина гъадмукъан халкъ уч шулуки, гъеле урчIарихъкъан йишв бихъури гъабхъундар. Ду-гъу дурализ аьгьювалар улупуий.

³ Саб къадар адмийир Дугъахъна гъюру, дурарикан юкури паралич кайир хурайи. ⁴ Аммаки дурарихъан халкъдигъянмина



Исайихъна рукъуз шуладайи. Гъадмуган дураги хулан гъвъ алдабгъну, паралич кайир дахънайи ахин Думу хъайи йишвахъинди ибхру.

⁵Дурагин хъугъвал гъябкью Исайи ищурайириз кІуро:

— Йиз бай, яв гунгъарилан хил алдабгъураза!

⁶Мушваъ сакъюдар къанунчийр деънайи. Дураги чиб-чпикди фикир гъапІу:

⁷— Му Касди гъаз мици кІура? Думу Аллагъдиз къаршуди улхура! Сар Аллагъдилан гъайри сарун шлихъан гунгъарилан хил алдабгъуз шул?

⁸Хъа Исайи, Чан Рюгънахъди дишла дурагин кІван фикрар аягъю дапІну, кІуро:

— Гъаз дицдар фикрар ичв юкІвариъ тІаърачва? ⁹Паралич кайириз фу пуб рягъятди ву: «Яв гунгъарилан хил алдабгъураза», даршиш: «Гъудужв, яв ахин гъадабгъ ва гъараҳ?» ¹⁰Инсаниятдин Бализ жилиин гунгъарилан хил алдабгъуз гъюкум айиб учвуз аягъю хъпан бадали, магъа лигай — пну, Дугъу паралич кайириз:

¹¹— Гъудужв кІуразавуз, гъадабгъну яв ахин, яв хулаz гъарах, — кІуро.

¹²Думу дишла гъудужвуру ва, гъадабгъну чан ахин, варидаrin улхъантina гъудучІвну гъягъюру. Халкъди, гучІбаан зегъле дубшну, Аллагъдин тярифар апІури, гъамци кІуро:

— Учуз гъич зат мидиз ухшар аяламат гъябкьюб дарчуз!

¹³Иса хъана гъюлихъна удучІвту, вари халкъ Дугъахъна гъюру, ва Дугъу дурагиз аягъювалар улупуру.

¹⁴Саб йишвхъантina гъягъюрайиган, Дугъаз налукар уч апІрушв'ин деънайи Алфейин бай Левий кІуро кас рякъюру ва дугъаз кІуро:

— Узухъди гъач!

Думу, гъудужвну, Исайихъди гъягъюру.

¹⁵Саб ражари Исайи Левийин хулаъ лисун апІурайи. Исайихъдина Чан ученикарихъди налукар уч апІрудари ва хъана гизаф гунагъкраги уъл ипІурайи, дураг гъаци Исайихъди хъахънайидар гизаф вуйи. ¹⁶Фарисийирикан вуйи къанунчиири, Думу гунагъкрагирихъди ва налукар уч апІрударихъди уъл ипІури дяркъну, Дугъан ученикариз кІуро:



– Мугъу налукар уч апIрударихъдина гунагъкрагиҳъди гъаз уыл ипIура?

¹⁷ Му гъеебхъган, Исаий кIуру:

– Духтири сагъидариз ваъ, хъа аззарлуйириз лазим ву. Узу марци касар дюз рякъюз хуз дуфнайир дарза, хъа гунагъкраг.

Ушвар дисбакан гъюжат

¹⁸ Гъадму ваҳтна Ягъ'яйинна фарисийири ученикари ушвар дисурайи. Сакъюдар адмийири Исаийхъна дуфну, гъерхру:

– Ягъ'яйин ученикарина фарисийири ушвар дисури шулу, хъа Яв ученикари гъаз ушвар дисурадар?

¹⁹ Исаий дурализ кIуру:

– Сумчрин хялари, швувш хурайир чпихъди хъимбуқъан гагъди, ушвар дисдар! ²⁰Хъа дураихъан швувш хурайир гужназ гъадагъру ваҳт гъибди, хъа гъадму йигъян дурари ушвар дисиди.

²¹ Гъич сарира йирси палатдик цИий парчайикан кадабтIну цИил ктривур, даршиш цИилну, палатдиз зигури, урхъ хъана аъхю апIиди. ²² Гъич сарира таза чаяхир йирси иржариъ удрубзур, даршиш таза чаяхри иржар гъутIурччили, чаяхирра удубзида, иржар-ра пуч хъиди. Таза чаяхир цИий иржариъ убзру.

Султ йигъкан

²³ Султ йигъян Исаиз дяхин дубзнайи хутIариантинагъя-гъюб алабхъуру. Гъадмуган Дугъян ученикари дяхнин кIулар ул-дутIуз хъюгъру.

²⁴ Гъаци гъябкъю фарисийири Исаиз кIуру:

– Лиг, гъаз мурапи султ йигъян Къанунди гъадагъа дапIнайи ляхин апIура? ²⁵Дугъу дурализ жаваб туви:

– Мегер учву, Давудри, чаз ва чаҳъди хъайдариз гаш гъаб-шиған, гъапIнуш Гирами китабариан гъурхундинчва? ²⁶Авиа-фар кIуру аъхю маллайнин девриъ думу Аллагъдин хулаъ учIвну, маллайрилан гъайри шликIа итIуз ихтияр адру, Аллагъдиз баҳш дапIнайи уйлер гъадагъну итIбакан ва чаҳъ хъайдаризра тувба-кан аъгъдиринчвуз?

²⁷ Исаий давам апIуру:

– Султ йигъ адмийиз дапIнайиб ву, хъа султ йигъаз адми – ваъ. ²⁸ Гъаци вуйиган, Инсаниятдин Бай султ йигъ'инра Агъа ву.



*Гъебицу хил хъайир
сагъ апIуб*

3 ¹Иса хъа ражарира мистаз гъюру. Душваъ хил деебцнайи сар кас айи. ²Сакьюдар адмийири, чпиз рябкюри сар фуж-къа гъаму султ йигъан сагъ апIидайкIан, кIури, ва гъаддилантина тахсир кипуз, Исаихъ ул хъипнайи. ³Дугъу хил дебцнайи кас-диз кIуру:

— Варидарин улихъ дийигъ.

⁴Хъа Исаи гъатмундариз кIуру:

— Султ йигъан гъапIну ккунду: уж'вал ясана писвал? Уьмур уьбхну ккундин, дарш пуч дапIну?

Хъа дураг ккебехъну гъузнийи. ⁵Исаи хъял кади ул дураги-лан илбицуру ва, дурагин инсафсуз юкIвар вуйивалин хажалат зигури, гъадму адмийиз кIуру:

— Яв хил гъачIабкк.

Дугъу хил гъачIабккуру, ва му хилра гъатмунубси сагъ шулу.

⁶Хъа фарисийири, удучIвну, гъадму сяльт Гыроддин терефкра-рихъди, Иса фици пуч апIоруш, йикърар йитIуру.

Ученикар Исаилан илтIишуб

⁷ Иса Чан ученикарра хъади гъюлихъна гъюру. Дугъахъди гизаф къадар халкъар Галилей ва Ягъудия уълкиириан хъайи.

⁸ Дугъу гъапIкъандарикан деебхъну Ерусалимдиан, Идумея уъл-кейиан, Ярдан нирин гъатмуну патариан, Тир ва Сидон шарь-паринишивариан гъатар-гъатарди адмийир Дугъахъна ахмиш шуйи. ⁹ Гизаф халкъ уч духънайивализ дилигну, дурагикк Учв ккадрахъбан бадали, Дугъу Чан ученикариз лютке гъязурди гъитуб табшурмиш апIору. ¹⁰ Дугъу гизафдар сагъ гъапIнийи, гъаддиз иццурайидар Гъадгъак кучузкъан шулуш кIури, Иса-йилан илтIишуйи. ¹¹ Гъар ражари жинариз Думу рякърубкъан, дураг Дугъан улихъ машнахъди икрамназ дахъуйи ва гъамци кIури Чигъар апIуйи: «Уву Аллагъдин Бай вува!» ¹² Хъа Дугъу ижмишнаан дурагиз, Учв фуж вуш, ашкар апIуб гъадагъа апIуйи.



ЙицЛикъюр вакил ктагъуб

¹³ Иса, Чав дих дапІну ктагъдарра, хъади дагъдина улдучІвур. ¹⁴ Дураг йицЛикъюр кас вуйи, Дугъу дурагиз Чан вакилар кІүйи. Дураг Дугъахъди гъаммишан духъну ккундийи. Дугъу дураг Ужувлан хабар рабгъуз гъаъди, ¹⁵ ва дурагиз жинар утІурккүз шлу гьюкум тувди. ¹⁶ Магъа Дугъу ктагъу йицЛикъюр: Симон (Дугъу мугъаз Петр кІуру ччвур тувнийи), ¹⁷ Зеведейин бай Якъуб ва Якъубдин чве Югъан (Дугъу мурагиз «Воанергес», яна «Кьюркъалин цІин баяр» кІуру ччвур тувнийи), ¹⁸ Андрей, Филип, Варфоломей, Матта, Фома, Алфейин бай Якъуб, Фадей, Кананит кІуру лакІам хъайи Шимон, ¹⁹ ва хъасин Иса масу туув Искариот кІуру лакІам хъайи Ягъуда.

Жугъдарин ахюдари, Исаик жин ка, пуб

²⁰ Мураг хулаз хътакуру. Хъана халкъ уч шулу, Исаана Чан ученикар ушв гъибтузкъан хъуркънадайи. ²¹ Дугъан багахълуириз мидкан гъеебхъган, дураг дуфну, Иса гужназ мушв'ан хъади гъягъюз ккун шулу, фицики дураги, Думу абдал духъна, кІүйи.

²² Ерусалимдиан гъафи къанунчайири кІүйи:
— Мугъаъ Велзвул учбІвна! Мугъу жинар дурагин ахюори-хъян вуйи къувватниинди ктавра.

²³ Гъадмуган Исаии дурагиз Чахънаси дих дапІну, тахалусари-инди кІуру:

— ШейтІнихъан шейтІан фици утІубккүз шулу? ²⁴ Эгер паччагъылгъудин айтІ дявийир аш, дициб паччагъылгъут сагъди гъубзидаар. ²⁵ Эгер хизандин айтІ дявийир аш, дициб хизан сагъди гъубзидаар. ²⁶ Эгер шейтІан учв чаина гъедебгнуш, диди чав чахъди дяви гъубхнуш, дидхъан чан-учвди гъубзуз хъибдар — дидин аххир хъибди. ²⁷ Сарихъанра, гуж кайирин хулаз дуфну, душв Тарааш апІуз хъибдар — эгер эйси йитІну адарш; гъийитІган, хал Тарааш апІуз шул. ²⁸ Гъякъ кІуразачвуз: адмийири Аллагъ-диз фициб къаршу гаф гъапишра, варибидлан хил алдабгъиди, ²⁹ хъа Гираами Рюгъназ къаршу гаф гъапирилан гъич зат, сабвахтнара хил алдабгъидар, дугъан гунағ гъаммишандиз гъубзди!

³⁰ Адмийири: «Мугъаъ жин учбІвна» кІурайиган, Исаии гъаци гъапнийи.



Исаин хизан – чан ученикар

³¹Хъасин Дугъян дадана чвийр гырю; Чатинди дугъужвнами-ди, дураги Дугъаз гъач пуз гъаъру. ³²Дугълан халкъ илтИбшна-йи, ва Дугъаз гъапний:

— Чат, кючейиль Яв дада, чвийр ва чиир дугъужвна, Уву гъерхра.

³³Исаий дурагиз жаваб туув:

— Йиз дадана чвийр фужар ву? — ³⁴Чалан илтИишнайидарилан ул илбицну, Дугъу кIуру:

— Магъя Йиз дада ва чвийр! ³⁵Аллагъдин гаф тамам апIур Уиз чвера, чира, дадара вуйиз.

Тум убзурикан тахалус

4 ¹Исаий хъана гъюлихъ аygъовалар улупурайи. Дугълан гъад-мукъян халкъ илтИбшнайики, Думу люткейиль эуз мажбур шулу, ва лютке гъюл'инаси цИб хъапIру, хъа халкъ гъюлихъ гъузру. ²Исаий дурагиз тахалусариинди гизафдарикан аygъова-лар тувуий, ва Чан улупбари кIуий:

³— Хъебехъай: нежбер тум убзуз удучIвуру. ⁴Убзурайиган, гъа-цIар удраг рякъюхъ дахъру — дураг, жакъвар дуфну, удуру. ⁵Са-кьюдар удраг гъван ккайи, руг цИбтIан алдру иишв'ин дахъру, ва дураг ухди ктучIвуру, гъаз гъапиш ругдин гъат чИиллиб вуйи. ⁶Ригъ гъапIган, дураг чурхуру ва, ччивар зяифди хъпаз лигну, ерцшуру. ⁷ГъацIар удраг зазарин тумрягъ гъяхъру, ахю гъахъи зазари дураг ккаъру, ва дяхни кIул апIдар. ⁸Хъа жара удраг ава-дан ругдик кахъру, ктучIвуру, ахю шулу ва сумчIур, йирхъцIур ва варж раЖари артухъ бегъер тувру.

⁹Хъасин Исаий гъапи:

— Шлин ибариз ебхураш, гъит ебхьри!

Исаий тахалусдин мяна ачухъ апIуб

¹⁰Чпи ялгъузди гъузиган, иицIикюрид ученикарина Иса-ихъди хъайидари Дугъхъян, гъаз гъамци, тахалусариинди кIу-раш, гъерхру.

¹¹— Учвуз Аллагъдин Паччагълугъдин сир аygъю хъуб тувна-чвуз, — кIуру дурагиз Исаий, — хъа аygъдрудариз тахалусариинди



кIура. ¹²Фицики дураг лигури шулу, хъа рябкьюрдар, хъпехъури шулу, хъа гъаврий ахъурдар. Жараси вуйиш, дуарихъан Аллагь-дихъинди илтIикIуз шуйи ва дуарилан хил алдабгъидий.

Тум убзрурикан вуйи тахалус ктибтууб

¹³Хъа Дугъу дурагиз кIуру:

— Мегер учву гъаму тахалусдин гъаврий ахъундарнучва? Хъа учву жара тахалусарин фици гъаврий ахъдичва? ¹⁴Убзрури Аллагьдин гаф убзуру. ¹⁵ГъацIар адмийир рякьюхъинди дахъу удра-риз барабар ву. Дурагиз Аллагьдин гаф ебхуру, ва гъадму сяльт, иблис дуфну, дурагин кIава гъубзу гаф гъитИбкIуру. ¹⁶ГъацIар адмийир гъван ккайи иишв'ина ахъу удрагиз барабар ву. Ду-раги, гаф гъеебхъубси, дишла шадди къабул апIуру. ¹⁷Хъа дурагикк ччив ккадар, гъаддиз дураг цИб вахтнастIан вуйидар дар. Аллагьдин гафналантинча чпиҳъ хъергруган, ясана саб хатIа-бала гъядябхъргуран, дураг гъадму сяльт гафнахъан гъудучIуру. ¹⁸Гъа-цIар зазаригъ гъяхъу удрагиз барабар ву. Мураг гаф ебхърудар ву, ¹⁹хъа гъар йигъандин гъайгъушнари, девлетнахъ хъергували ва жара тямягъари Аллагьдин гаф кIавылан гъапIуз гъитру, ва диди бегъер хури шулдар. ²⁰Хъа гъацIар авадан ругдик кахъу уд-рагиз барабар ву. Мураг гаф ебхърудар ва думу къабул апIуран ву, ва диди саспиган сумчIур раЖари, саспиган йирхъцIур раЖа-ри, хъа саспиган варж раЖари артухъ бегъер хури шулу.

Учвуз айиб ишилеммиш апIури гъузай

²¹Исайи хъана дурагиз кIуру:

— Чирагъ хулаз, дид'ин гъаб иливуз, ясана краватдикк ккивуз, хруб вуйин? Ваъ, думу чан иишв'ин дивру! ²²Чнатинди уду-дубчIвди гъубзуру фукIа жиниб адар ва фукIара гъитИбкIнайиб адар. ²³Шлик ибар каш, гъит ебхъри!

²⁴Хъа Дугъу гъамцира кIуру:

— Учвуз ебхърайибдиз фикир тувай. Фициб уылчмейииинди учву ебцураш, гъацибдииинди учвузра ебциди ва артухъдира кади иливиди. ²⁵Шлиз аш, дугъаз хъана тувди, хъа шлиз адарш, айиб-ра тадабгъиди.



Хъубкъру удрikan тахалус

²⁶ Дугъу кIуру:

— Аллагъдин Паччагълугъ, думу фициб ву? Думу адмийи ругдиз тум гатIабхъувалсиб ву. ²⁷ Йишвну адми ахуру, йигъ шулади гъудужвуру, хъа тум гъадму вахтна ктубчIвуру ва аыхю шулу — хъа думу фици аыхю шулаш, адмийизра аыгъдар. ²⁸ Ругди чав-чалан бегъер хуру: сифте чар ктубчIвуру, хъа кIул апIуру, хъасин кIул ударихъди абцIру. ²⁹ Удар хъубкъиган, адми дишла дагърихъан хъчихуру, гъаз гъапиш иган хъубкъина.

Диликан тахалус

³⁰ Исаий хъана кIуру:

— Аллагъдин Паччагълугъ фтихъ теквуз шул? Ясана фициб тахалусдиинди дидкан пуз шул? ³¹ Думу дюн'яйинн варитIан бицIи дилихъ теквуз шул. ³² Хъа думу кивган, ктубчIвуру ва бистниш айдарик варитIан аыхю шулу. Дид'ин гъацисдар аыхю кюлер илиршуруки, дуарин сирнарикк жакъварихъанра кмиди дусуз шулу.

³³ Гъамцдар гизаф тахалусариинди Дугъу дуарихъан аннамиш апIуз шлукъан аыгъювалар улупуйи. ³⁴ Тахалусариинди дарди Дугъу фукIара кIурдайи, хъа Учв Чан ученикарихъди гъузиган, дуариз вари ктибтуйи.

Исаий тIурфан дебккуб

³⁵ Гъадму йигъян хябяхъган, Дугъу дуариз кIуру:

— Гъачай, гъюлин тмуну гъирағъдихъинди сирнав апIухъя.

³⁶ Дуар, халкъ гъитну, Исаийхъди люткейиль эъру. Дуарихъди жара люткийирра хъайи. ³⁷ Гужал миқI утIубччуру ва лепийир люткейикан йивури, думу шту абцIрайи. ³⁸ Иса люткейин къялхъян йишвавь, кIуликк гутара ккивну даахнайи. Люткейиль аидари Думу хъиргрву ва кIуру:

— Мялим! Ухъу ккахърайиваликан Увуз вижна ктарнуз дарш?!

³⁹ Гъадмуган Думу гъудужвну, миқIаз сикин хъуз амур апIуру ва штуз кIуру:

— Сикин йибхъ! Мирибшван!

⁴⁰ МиқI сикин шулу, ва архаинвал абхъру.



— Гъаз гъамкъан гучIбяхъяр вучва? — кIуру дурагиз Исаий. — СацIибкъан хъугъвал адаринчвуз дарш?

⁴¹Дурагик лап яман гучI кабхъру, ва чиб-чпикна кIуру:
— Му фуж ву, эгер миkIра, гъюлра Мугъахъ хъпехъураш?

Жинар кайир сагъ апIуйб

5 ¹Дураги гъюлин тмуну гъирагъдихъна Герасин юрдназ сир-нав апIуру. ²Иса люткейиан удучIвубси, Дугъан гъаншариизди накъваригъ яшамиш шулайи жинар кайи адми утIурччуру. ³Думу сарихъанра дирккуз шуладайи — гъеле зунжариинди-къан. ⁴Дугъан хилар-ликар зунжариихъди швнуб-сабан гъийитI-ний, аммаки дугъу зунжэрар ва гъялкъийр къатIар апIуйи — гъич сарихъанра думу дерккуз шулдайи. ⁵Зат сикин дарди йигъ-йишв накъварин хъаарар-дюрхъяригъ ва гъярап-тепийиригъ дугъу чИ-гъяр апIуйи ва учв гъванарикан йивуйи.

⁶ Ярхлаан Иса гъяркьюбси, думу Дугъахъна жаргъну дуфну, икрам апIури, къамкъарииинди дахъру ⁷ва аыхю дихниинди кIуру:

— Яв узухъди фу вуяв, ВаритIанзаанур, Аллагъдин Бай Иса? Аллагъисан, Увуз миннат вуйиз: йиз зегъле мабхан! ⁸Исаий: «УдубчIв гъаму адмийиан, чиркин рюгъ!» — гъапиган, диди гъаци гъапнийи. ⁹Хъа Исаий дугъхъан гъерхру:

— Ччвур фуж вуяв?

— Йиз ччвур къушум вуйиз, гъаз гъапиш учу гизаф жинар вучва, — жаваб туву дугъу. ¹⁰Жинар, му юрдариан чпи мутIур-ккан кIури, Исаийз миннат апIуз хъюгъру.

¹¹Хъа душвахъ таблик силарин аыхю лиж дарабгънайи.

¹²— Учхъан силарий учIвуз шлуси, учу гъадраизди гъягъюз гъит, — кIури, жинари Исаийкан тIалаб апIуру.

¹³Дугъу ихтияр тувру. Ва адмийиан удучIву чиркин рюгъяр си-ларий учIвру. Хъа силарин лиж гъарзарилансина гъюлизди убсрү ва ккабхъру. Дурагин къадар къюд агъзурихъна вуйи.

¹⁴Силарин габнари, жаргъну душну, шагърий ва гъирагъарий айи гъуларий, гъабхъибикан ктибтуру. Агълар, фу гъабхънуш, лигуз гъюру. ¹⁵Дураг Исаийхъна гъюру ва, фу лигурва: къу-шумкъан жинар кади гъашир, палтар алди, чан фикрихъ хъади дэйна. Дурагик гучI кабхъру. ¹⁶Му аylамат гъябкъдари дурагиз,



жинар кайирикан ва силарикан фу гъабхънуш, ктибтний.
¹⁷ Гъадмуган Исаикан дурари, чин юрдариан удучІвну гъягъюб, ккун апIуру.

¹⁸ Иса люткейиъ эърайиган, чакан жинар ктIурккури учвра гъадагъуб ккун апIуру.

¹⁹ Хъа Дугъу ихтияр тувундай.

— Хулаз гъарах явдарихъна. Аллагъди фици яв язухъ гъизигнуш ва Дугъу увуз гъапIубдикан дурариз кидибт, — кIуру Исаий.

²⁰ Думу гъягъору ва ЙицЦубшагърин юрднан агълариз Исаий чакан гъапIнуш, ктибуру — вари аыламат гъахънийи.

Ягъирин риш чIиви ва ищцур сагъ апIуб

²¹ Исаий хъана гъамуну гъирагъдихъна сирнав гъапIиган, Дугълан аыхючІвеъ адмийир илтIишнийи. Иса гъирагъдихъ гъузнайи.

²² Дугъахъна жугъдарин мистан аыхюр, Ягъир кIурур, гъюру. Иса гъяркьюбси, думу Дугъан ликарикк икрамназ дахъру ²³ ва, Дугъкан миннат апIури, кIуру:

— Йиз риш йикIура. Миннат вуйиз, дуфну дугъ'ин хилар илив, думу сагъ хъиди, Чивиди гъузди.

²⁴ Иса дугъахъди гъягъору. Дугъахъди гизаф халкъра гъябгъюрайи ва юкъуб тереф Думу къялаъ тIаънайи.

²⁵ Дурагигъди сар дишагълира гъяйи. ЙицIикюод йисандин арайиъ дугъан ифи хътабтIурдайи. ²⁶ Фукъан хьюгънийишра, гъич сар духтрихъанра думу сагъ апIуз гъабхъундайи. Дугъу чаз айи-адруб вари харж гъапIнушра, дугъаз кюмек гъабхъундайи, хъа гъял айитIан пис гъабхънийи. ²⁷ Дугъаз Исаикан гъеебхъиган, думу гужназ адмийиригъ гъючІву ва, Исаин къялхъянди дуфну, Дугъан ккурттарик куркIу, ²⁸ фицики дугъу фикир дапIнайи: «Эгер узу Мугъан ккурттарик саб тикисикъан куркIиш, сагъ хъидизу». ²⁹ Гъадму сяайт дугъан ифи хътабтIуру, ва дугъаз чан вари жан сагъ хъувал гъисс шулу. ³⁰ Исаиз дишла Чаан къувват удубчIувуб аыгъю шулу ва, халкъдихъинди илтIикI-ну, гъерхру:

— Узук фуж куркIну?

³¹ — Рябкьюрадарнуз, учIукъну, халкъди Уву фици хъурж-раш, хъа Увук фуж куркIну кIури, гъерхира ава! — кIуру Дугъаз



ученикари. ³² Хъа Дугъу ул алдатбиинди Чак куркIур агурайи. ³³ ГучI дубхънайи ва гукIинишин кабхънайи дишагълийи, чав гъапIубдин гъаврий ахъну, халкъдигъян гъюдучIвну, икрам апIури, Исаин ликарикк ккархъну, вари вуйибси ктибуру. ³⁴ Дугъу дишагълийиз кIуру:

— Йиз риш, уву яв хъугъвали сагъ гъапIунву. Архаин духьну гъарах, ва сагъвалий хъидива.

³⁵ Исаий му гафар кIурамиди, мистан ахюор вуйи Ягъирин хул'ан адмийир дуфну кIуру:

— Яв риш гъакIну. Мялим инжик мапIан!

³⁶ Хъа Исаий дурагин гафариз фикир тутрувди, мистан ахюориз кIуру:

— ГучI мапIан, анжагъ хъугъну гъуз!

³⁷ Дугъу Петризна, Якъубдизна, Якъубдин чве ЮгъандизIан ктарди, сарун саризра Чахъди гъюз ихтияр тувундайи. ³⁸ Дураг мистан ахюорин хулаъ учIвру. Исаиз, душваъ гъалабулугъ ади, яманди ишурайидар ва ишлар апIурайидар рякъюру.

³⁹ — Учву гъаз дерд зигурачва, — кIуру учIву Исаий. — Риш дукIнадар, хъа даахна.

⁴⁰ Дураг Дугъ'ин аylхъюз хъюгъру. Хъа Дугъу дураг вари адауру. Чахъди Чан ученикарна шуран адашна дада гъадагъну, риш дитнайи хулаъ учIвру. ⁴¹ Шуран хил дибисну, Дугъу дуѓаз кIуру:

— Талифа, куми! (яна «Риш, увуз кIураза, гъудужв!»)

⁴² Риш дишла гъудужвуру ва гъягъюз хъюгъру. Дугъан йициIикюд йискъан вуйи. Вари гъах гъахънийи. ⁴³ Исаий мидкан са-ризра дарпуб ижмишнаан ккун апIуру ва, шураз ипIруб ту-вай, кIуру.

Иса Чан гъахи шагъриз гъягъюб

6 ¹Душв'ан удучIву Иса Чан гъахи шагъриз гъягъюру. Ду-гъахъди Чан ученикарра хъайи. ² Султ йигъян Исаий мистаъ аygъювалар улупуз хъюгъру. Дугъахъ хъпехъурайи гизафдари, мюгътал духьну, кIуйи:

— Гъамгъян гъаму аygъювалар наънан ву? Мугъаз мициб фа-гъум шли тувна? Гъамцдар аylаматнан ляхнар Гъамгъян хилари-инди фици шула?! ³ Му харатчи уста, Мар'ямдин Бай, Якъубдин,



Юсуфдин, Ягъудайин ва Симондин чве дарин? Мугъан чийр гъамшваъ, ихъ арайиъ, адаринхъа?

Гъаци вуйиган, дурагиз Исайихъ хъугъуз ккунди адайи.

⁴ – Гъюмат адру пайгъамбар хъуб мумкин дар, – кIуру Иса-и, – хъа чан багъри шагъриъ ва хулаъ, жуван багахълуйиригъ ва хизандиъ пайгъамблиз гъюмат адри шулдар.

⁵ Гъаддиз Дугъхъан душваъ, сакьюдар иццурайидариин хилар иливну сагъ гъапIдар ктарди, сану сабкъан айламат улупуз гъаб-хъундайи. ⁶Думу дурагин хътругърайивалиин мюгътал духнайи.

Хъасин Думу гъул’ан-гъулаz гъягъюри, адмийириз айгъювалар туври шулу.

⁷ Исай Чахъна иицЦикъюрид вакилариз дих дапIну, дурагиз чиркин рюгъяр утIурккүз шлу гъюкум тувну, кью-кьюрди айгъю-валар улупуз гъаъру. ⁸Дугъу дурагиз, чумакъ ктарди, фукIара гъа-дадабгъуз амур апIуру: я уъл, я тавра, я пул – ⁹анжагъ чпин ли-кариин али шаламартIан.

– Я гъич саб жара палатра магъадабгъанай, – кIуру Исайи ду-рагиз. – ¹⁰Учву фунуб гъулаъ къабул гъапIиш, гъадму иишвариан гъягъайизкъан, гъадушваъ гъузай. ¹¹Хъа учву фунуб иишваъ-вуш-ра къабул дарапIиш ва учухъ хъпебехъиш, душ’ан удучиIвну гъягърудари, ичв ликарик кайи биширут кадабхъай. Гъит му ду-рагиз чпин улубкърубдин улихъимиidi дебкрайи лишан ишри.

¹² Дураг гъягъюри ва, адмийир чпин гунгъариин швумал хъпан бадали, дурагиз айгъювалар улупуру. ¹³Дураги гизаф жинар утIур-ккуру ва, хифарин ччим ктатури, хайлин иццурайидар сагъ апIуру.

*Гъирод паччагъди,
Иса штуан апIру Ягъ’я ву кIури,
гъисаб апIуб*

¹⁴ Чан нубатнаъ Исайикан Гъирод паччагъдиз ебхуру, гъаз гъапиш Дугъан аваза варишвариъ атIабгуру. ГъацIари: «ДукI-найи штуан апIру Ягъ’я Чиви гъахъну ва гъаддиз айламатар улу-пура» – кIуйи. ¹⁵Жарадари: «Думу Ил’яс ву» – кIуйи, хъа шу-бурпидаи: «Думу кюгъне пайгъамбариикан сарсир ву» – кIури тасдикъ апIуйи. ¹⁶Гъамци гъеебхуу Гъиродди: «Узу кIул алдабтIу Ягъ’я Чиви гъахъну» – гъапнийи.



Штуан апIру Ягъ'я йикIуваликан

¹⁷ Гыиродди чав буйругъ тувну, Ягъ'я дидисну, чан чве Филиппдин хпир Иродиадайин кIуллан дустагъдиль итру. Хъасин Гыиродди Иродиада чаз шивди дитний. ¹⁸ Фицики Ягъ'яйи Гыироддиз: «Яв чвуччвун хпир увуз хай шулдар» — гъапний. ¹⁹ Гъамци гъапну кIури, Иродиадайи Ягъ'яйин хъял иливни-йи ва дугъаз думу йикIуз ккун гъабхънийи, амма шуладай, ²⁰ гъаз гъапиш Ягъ'яихъан Гыироддиз гучIуйи, фицики ду-гъаз думу гъякълу ва гирами кас вуйивал аygъяйи ва, гъаддиз, думу урхюрайи. Гыирод Ягъ'яйин аygъювалар улупбахъ, сас-пиган дурарикан учв инжик шулушра, иштагъниинди хъпе-хъуй.

²¹ Ужуб дюшюш ккабхъру: Гыироддин бабкан гъахи йигъ улубкъну ва гъаддиз гюре гешт хъапIуз ханар-беглар, юзбаш-ийир ва Галилей уылкейин аыхюдар уч апIуру. ²² Думу шадлугъ-наз ялхъвнар апIуз Иродиадайин ришра гъюру. Дугъан ялхъван Гыироддиз ва хялариз гизаф бегелмиш шулу ва паччагъди шу-раз кIуру:

— Узкан увуз фу ккундуш вари туварзавуз! — ²³ Хъя паччагъди ху апIуру. — Фу ккун гъапIиш, вари тувурзавуз, гъеле йиз айи паччагълугъдин гъацI пай вушра.

²⁴ Думу шуру душну дадайихъан гъерхру:

— Фу ккун апIуза?

— Штуан апIру Ягъ'яйин кIул, — жаваб тувру Иродиадайи.

²⁵ Шуру, паччагъдихъна душну:

— Узуз штуан апIру Ягъ'яйин кIул ленгерийиъди ккундузуз, думу узуз гъаму сяльт ча! — кIуру.

²⁶ Паччагъ яманди пашман шулу, хъя чав хяларин улихъ ху апIбаз лигну, дугъхъан, ккун гъапIуб тамам дараpIди гъибтуз гъабхъундайи. ²⁷ Дугъу дишла эскер гъальну, чахъна Ягъ'яйин кIул хуз буйругъ тувру. Эскри дустагъдиль Ягъ'яйин кIул алдабIуру, ²⁸ ва ленгерийиъди кIул дубхну, шурахъна тувру, хъя дугъу — да-дайихъна. ²⁹ Мидкан аygъю гъабхъи Ягъ'яйин ученикари дугъан жандак гъадабгъуру ва кивру.



*Исайи хъуд агъзур кас
тухъ апIуб*

³⁰ Вакилар Исайихъна хътакуру ва Дугъаз чпи гъапIдарикан ва туvu аygъюваларикан варибдикан ктибтуру. ³¹ Дугъу дурализ кIуру:

— Хъа гъамус, адмийир адру фунуб-вушра йишваз гъягъидихъа, гъадушваь ялгъузди гъузай ва сацIиb рягъятвал гъадабгъай.

Гъаз гъапиш, дураг айишаь гизаф халкъ аи, дурагиз гъеле уъл ипIузкъан мажал шуладайи. ³² Гъаддиз дураг люткейиъди халват йишваз гъушу. ³³ Гъаци вушра гизафдариz дураг люткейиъди гъягъюри рякъюру, фужар вуш, аygъю шулу, ва гъюлин гъирағъ вуйибси вари шагъриан адмийир хъергру ва вакилартIан ухди гъюру. ³⁴ Люткейиан удучIву Исайиз аyxючIвеь халкъ рякъюру. Дугъаз дурагин язухъ шулу, гъаз гъапиш дураг марччлихъан хътру марччарси аи. Дугъу дурагиз гизаф ляхнарикан ктибтуру.

³⁵ Йигъар хябахъ шулайи, ва Дугъан ученикари, багахъна дуфну, кIуру:

— Мушвайишв ичIи йишв ву, ва сарун йигъарра хябахъ ву, мураг деет, гъит багахъ гъулар-хулариз гъараҳри, чпиз ипIруб гъадабгъри.

³⁷ — Учву дурагиз ипIруб тувай, — кIуру Исайи.

— Гъамус учу, душну, дурагиз уъл гъадабгъурайин? Ухъу вари саб вазли гъилихишра, гъациб пулихъ дурагиз уъл гъадабгъну удудукур! — кIуру вакилари.

³⁸ — Учвухъ фукъан уъл хъачвухъ? — пну, гъерхру Исайи. — Гъарапахай, лигай гъеле.

Дураг лигуру ва кIуру:

— Хъуб уълна кьюб балугъ.

³⁹ Гъадмуган Дугъу дурагиз, халкъ десте-дестеди чру укI'ин дитай, кIуру.

⁴⁰ Халкъ хъу-хъуцIур ва варж-варж кас ади, жергиириъди деъру.

⁴¹ Исайи, хъуб уълна кьюб балугъ гъадагъну, завузди дилигнү, Аллагъдин ужувлакк ккахъри, дупну, уълер гъудутIну, халкъдиз пай апIуз ученикарихъна тувру. Дугъу варидариgъна кьюб



балугъра пай апIуру. ⁴² Вари халкъди ипIуру, тухъ шулу ⁴³ ва балугъаринна улин хъригъу къацIари йицIикьюб тавра ацIуру. ⁴⁴ Хъя вари гъипIдар хъуд агъзур кас вуйи.

Иса штуинди гъягъюб

⁴⁵ Мидин къяляхъ Исайи, Чав сабан халкъ гъаъри имиди, Чан ученикариз люткейиль эъну, гъатмуну гъирагъдихъ хъайи Вифсайд-да гъуаз сирнав апIуб амур апIуру. ⁴⁶ Халкъ деетну, Думу ккара-гуз дагъдиз удучIвру.

⁴⁷ Хябяхъдин вахт дубхънайиган, ученикар айи лютке гъюлин гъацI къялариъ айи, хъя Иса сарна-сарди гъирагъдихъ гъузний. ⁴⁸ МикIлаз къаршуди сирнав апIбу къувватнахъан душнай ученикар дяркъну, Иса, акв алабхъуради, гъюлилантана дураихъна гъягъюру. Думу дуарин люткейиз багахъ шулайи. ⁴⁹ Иса гъюлленмина гъюри гъяркъдариан, думу чпиз гъугъубжвурайи гъа-ранту вушул, пну, варидариан сабпну гъарай утIубччуру, ⁵⁰ гъаз гъапиш дуариз, Думу гъяркъюбси, гучI гъабхънийи. Хъя Иса дишла дураихъди улхуз хъюгъру:

— ЮкIв ижми апIинай, Узу вуза. ГучI мапIанай! — ⁵¹ пну, ду-парин люткейиль учIвган, микI яваш гъабхъи. Мици хъували ду-пар хъана артухъ гъахъ апIуру. ⁵² Ульерихъди гъабхъи аьламатнан дуар гъавриъ ахъундайи, ва дуарин юкIвар курди гъузний.

⁵³ Сирнав апIурайидар Геннисарет юрдназ гъюру. ⁵⁴ Дуар лют-кейиан эдеубси, гъирагъдихъ хъайидариз Иса аьгъю шулу, ⁵⁵ ва жаргыну душну, варишвариъ мидкан хабар ипру. Думу наан аш деебхъну, дураги гъадина ахнарииндира кмиди ищрудар хуйи. ⁵⁶ Иса наанди гъушишра: гъулариз, шагъариз, ятгъарина — ва-ришвариъ иццурайидар духну дитуйи ва Дугъкан Чан ккуртта-рин канчIарик куркIузкъан гъитуб тIалабар апIуий. Вари Дугъак куркIрудар сагъ шуйи.

Инсанари деркку аьдатартIан Аллагъдин законар заан ву

7 ¹ Ерусалимдиан Исайихъна саб къадар фарисийирна къанунч-ийр гъюру. ² Дуариз ученикарикан сари дижрикIу хила-рихъди ипIури гъябкънийи. ³ Хъя фарисийирнира, вари жугъда-ринси, чпин абийриланмина гъубзнайи хъуршлихънакъан хилар



дижрик¹ди уълихъ дедреъру айат айи. ⁴Базариан гъафидари сабан хилар дижрик¹кан гагъди уъл ип¹дар. Гъамцдар хъана гизаф айатар дураги уърхюйи, мисалназ, захар, гажнар ва йифрин гъаб-гъажагъ жик¹бан айатар.

⁵Фарисийрина къанунчиири Исайихъан гъерхру:

– Яв ученикари абийирин айатар гъаз хъаърадар? Хилар дижрик¹ди уъл ип¹ура.

⁶Хъа Дугъу дурагиз жаваб тувру:

– Гирами китабариъ Ишай пайгъамбри учвкан, кьюб маш гъяйидарикан, ужуди гъапну:

«Гъаму адмийири Узуз гъюрмат ушвниинди ап¹ура,
хъа дурагин юк¹вар Узхъан ярхла ву.

⁷ Давди дураги Узуз икрам ап¹ура,
фишки дураги инсанарин айатар уърхюз улупура».

⁸Учву адмийири ктагъу къайдийрихъан хъич¹ихначва, хъа Аллагъдин табшуругъар тина ап¹урачва. ⁹Учву гъисаб ап¹урашалчва: ичв къайдийир тамам ап¹бан бадали Аллагъдин табшуругъар бат¹ул ап¹уб фагъумлу ляхин вуйич, к¹ури! – давам ап¹уру Исайи.

¹⁰– Магъа мисал. Мусайи гъапну: «Адашдизна дадайиз гъюрмат ап¹инай» ва «адашдизна дадайиз люкънар ап¹ур аъжализ лайикъ ву». ¹¹Хъа учву фу к¹ури шулчва? Эгер сари чан дадайиз вая адашдиз «Узу увуз буржлу вуйиб Аллагъдиз гъурбан гъап¹унза», гъапиш, ¹²дугъхъан сарун чан адашдизна дадайиз кюмек дарап¹ира гъузуз шулу, к¹урачва. ¹³Гъамци учву Аллагъдин гаф ичв айатназ илт¹ибк¹унчва ва наслариз гъаци ктибурачва. Гъаму мисалназ ухшар гизаф ч¹уру ляхнар ап¹ури шулчва.

¹⁴Исайи, хъана Чахъна халкъдиз дих дап¹ину, к¹уру:

– Вари узухъ хъебехъай ва гъаврий иихъай. ¹⁵Инсандиль ч¹атан уччи¹вру гъич сабдихъанра думу чиркин ап¹уз даршул. Инсандиан удубчи¹вруб – магъа думу чиркин ап¹руб. [16]*

¹⁷Думу, халкъ гъитну, хулаз гъафиган, ученикари Дугъхъан гъадму гафарин мяна ачуҳъ ап¹уб к¹ун ап¹уру. ¹⁸Дугъу дурагиз ктибуру:

– Учву гъамдин гъаврий ахъраданчва? Инсандиль ч¹атан уччи¹вру гъич сабдира думу чиркин дарап¹райивал рябкъюраданчвуз?

* 7:16 Грекарин саспи Бик¹барий гъамци к¹ура: «Ибар кайириз гъит ебхъри».



¹⁹ Фицики думу адмийин кІваз гъябгьюрадар, хъа – фуниз, ва хъасин удубчІвуру (Гъамдинди Дугъу иПруб вари марцциб ву-йивал улупура). ²⁰ Инсандин удучІврудари, – кІуру Исаи, – думу чиркин апІуру. ²¹⁻²² «Самбал алдапІувалар», яна хил’ан ада-хъувалар, тІафалвалар, йивну йикІувалар, къяппавалар, тямъгъ-карвалар, угъраш’валар, инсафсузвалар, машнаъ ягъ адрувалар, гъанихвал ва хъял, футна, фурс, ахмакъвалар – гъамраихъна хру пис фикрар инсандин кІваан удучІвуру. ²³ Гъаму вари писвалир инсандин айтІан удучІвуру ва дураги инсан чиркин апІуру.

Исаи жугъуд даруриз кюмек апІура

²⁴ Гъадму йишвар дирчну, Иса Тир юрднан жилариина гъя-гъюру. Душваъ Думу садар хуларий дергрү. Дугъяз мидкан гъич саризра аыгъю дубхъну ккундайи, аммаки гъитІибкІну гъибтүз гъабхъундайи. ²⁵ Исаикан чиркин рюгъ убчІвнайи сар шуран дадайиз аыгъю шулу. Думу дишла Дугъахъна гъюру ва ликарикк, икрам апІури, ккархъру. ²⁶ Хъа думу дишагъли жугъуд дайи, думу Сирофиникияйин миллетдикан вуйи. Дугъу Исаикан чан шур’ан жин утІубккуб тІалаб апІурайи.

²⁷ Исаи гъапи:

– Сифте баяр-шубар ацІри. Дурагихъан тадабгъну, уъл хуйи-риз ккипуз хай даршул.

²⁸ Хъа дишагълий кІуру:

– Йиз Агъа, хуйирира баяр-шубари тадахъу уълин урклар итІуру, аыхир.

²⁹ – Яв гъамциб жавабназ лигну увхъан мясяльтниинди хулаз гъягъюз шулвухъан. Яв шур’ан жин удубчІвну, – кІуру Исаи.

³⁰ Фу лигурва, хулаз хътаку дишагълийиз чан риш, сагъ духъну, ахниъ дахънади рякъюру ва жинра дугъ’ан удубчІвна.

Исаи кар сагъ апІуб

³¹ Тир юрднан жиларилан къяляхъ хътаку Иса Сидон ва Йи-ціубшагърин жилариланмина Галилей гъюлихъинди гъюру. ³² Ду-гъахъна кар ва цІибтІан улхуз даршлу сар кас хъади гъюру, дугъ’ин хилар иливуб ккун апІуру.

³³ Исаи думу халкъдихъан гъадауру, дугъан ибарий Чан тІубар урччвру, хъасин Чан тІубарик шуруш кабтІну, дугъан



мелзнак кучру. ³⁴Хъа завузди дилигну, дериндиз ил хъадабгъ-
ну, кІуру:

— Эффата! (яна «Арцц!») ³⁵Гъадму сяйт дугъаз ебхъуз хъюгъру
ва дубиснайи мелз либхуз хъюгъну, дугъан чІал ачухъ шулу.
³⁶Исайи дурагиз мидкан гъич саризра дарпуб ккун апІуру. Хъа
Дугъу дарпуз гъадагъа апІбахъ, дураги артухъ рабгъуйи. ³⁷Адми-
йири, гизаф аylамат духыну, кІуий:

— Мугъу вари ужу апІуру. Мугъу гъеле кардариз ебхъузра
гъитру, улхуз даршлудариз чІалра улупуру!

Юкъуд агъзур кас тухъ апІуб

8 ¹Гъадму йигъари хъана бегъем халкъ уч шулу, хъа дурагихъ
ипІруб хъадайи. Исайи, ученикариз дих дапІну, кІуру:

² — Узуз адмийирин язухъди вузуз. Магъа, дурагин Узухъди
хъади шубуд йигъ ву, хъа дурагиз ипІруб адар. ³Эгер Узу дураг
хулариз гашди гъаиш, рякъю зяиф хъиди, хъа гъацІар ярхлари-
ан дуфнайдар даринхъа.

⁴ — Гъаму ичІи йишвавь варидализ гъубкІрубси уъл наънан
апІуру? — жаваб апІуру ученикари.

⁵ Исайи дурагихъан гъерхру:

— Учвухъ швнуб уъл хъачвухъ?

— Ургуб уъл, — кІуру дураги.

⁶ Гъаци вуйиган, Дугъу халкъдикан жилиин деуб ккун апІуру.
Ургуб уъл гъадагъну, Аллагъдиз чухсагъул кІури ккарагнү, Ду-
гъу уъл гъудубтІуру ва халкъдиз пай апІуз ученикарихъна тув-
ру. Хъа дурагира пай апІуру. ⁷Дурагихъ сакъюдар балугъарра
хъайи. Исайи дурагии чухсагъулин ккарагуб дапІну, гъадрарра
пай апІуз тувру. ⁸Адмийири гъипІу, дураг арцІу. Дидахъна хъи-
ригъу къацІари ургуб таврага ацІний. ⁹Хъа дураг вари юкъуд
агъзурхънакъан вуйи. Исайи дураг чпин хулариз деетуру. ¹⁰Хъа
Учв, ученикарра хъади, дишла люткейиъ эъру ва Далманут юрд-
нан жилариина сирнав апІуру.

Аylаматнан лишан тІалаб апІуб

¹¹Фарисийр гъюру ва Исайихъди гъюжатнаъ учІвру. Дураги
Думу ахтармиш апІури, Дугъкан а yrшиан лишан улупуб тІа-
лаб апІуру. ¹²Исайи, гъагъиди ил хъадабгъну, дурагиз кІуру:



— Гъаз му наслин адмийири лишан ккун апIура? Дюзди кIу-разачвуз: му касариз лишан хыбдар.

¹³Хъасин, дураг гъитну, Думу хъана люткейиъ эъру ва гъатму-ну гырагъихъинди сирнав апIуру.

**«Фарисийирин ва Гьироддин
дунихъан ихтият иихъай»**

¹⁴Ученикириз чпиҳъди люткейиз уъл гъадабгъуз кIваълан гъарх-нийи. Дурагиҳъ саб уълтIан хътайи. ¹⁵Дурагиҳъди сюгъатнаъ айи Исаи ихтият хъуб ккун апIу:

— Лигай-гъа, фарисийирин ва Гьироддин дунихъан ихтият иихъай.

¹⁶Хъа дураги чиб-чпин арайиъ гъапи: «Мугъу мици, ухъухъ уъл хъадруган, кIурайиб ву».

— Дураг фтикан улхураш альгъяди, Исаи кIуру:

— Учву уъл хътарчухъ кIури, гъаз гъалабулугънаъ ахъначва? Мегер учву гъамусра гъаври ахънаданчва? Ва учву фукIара убчIвнадарин? Ичв юкIвар гъамусра курди имийин? ¹⁸Мегер учвуз, улар ади рябкьюраданчвуз, ибар кади ебхураданчвуз? Мегер гъаври адандчва? ¹⁹Узу хъуб уъл хъуд агъзуригъна пай гъа-Пиган, хъиригъу уълерин швнуб тавра ацIунчва?

— ИицIикюб, — жаваб тувру дураги.

²⁰— Хъа ургуб юкъуд агъзуригъна пай гъапIиган, швнуб тавра хъиригъу уълерихъди ацIунчва?

— Ургуб, — жаваб тувру дураги.

²¹— Мегер учву гъамускъан гъаври ахъунданччу? — кIуру дураги гъадмуган Исаи.

**Вифсайда гъулаъ
Исаи кур сагъ апIуб**

²²Дураг Вифсайде гъулаъ гъору. Исаиихъна кур хуру ва дугъак куркIуб ккун апIуру. ²³Исаи курин хилхъан дибисну, гъул’ан адауру, ва дугъан улар Чан шурушнахъди къяши дапIину, хилар кIул’ин иливну, гъерхру:

— ФукIа рябкьюрануз?

²⁴Дугъу дилигну кIуру:

— Рякьюразуз адмийир, рякьюразуз гъаарси гъягъюрайидар.



²⁵ Гъадмуган хъана Исаи хилар дугъан уларихъ гъивру, ва думу сагъ шулу, уччвуди рябкъюри шулу. ²⁶ Хъа Исаи думу:

— Лиг-гъа, му гъулазди удручIвди, ичв хулаз гъарах, — пну, гъаъру.

*Иса Месигъ ву, —
кIуру Петри*

²⁷ Иса мушв'ан, Чан ученикарра хъади, Филип паччагъдин Кесария юрднан гъулариз гъягъору. Рякъю Дугъу ученикарихъан гъерхру:

— Адмийири Узу фуж ву кIури, гъисаб апIура?

²⁸ — Садари Уву штуан апIру Ягъ'я ву, кIура, тмундари — Ил'яс, хъа шубудпидари — пайгъамбрарикан сар, — пну, жаваб тувру дураги.

²⁹ — Хъа уччу Узу фуж ву кIури, гъисаб апIурачва? — гъерхру Дугъу дураги.

— Уву Месигъ вува, — жаваб тувру Петри. ³⁰ Исаи дураги Чакан гъич саризра дарпуб ккуун апIуру.

*«Шлиз Узухъди гъягъюз
ккуундуш...»*

³¹ Хъа Дугъу дураги, Инсаниятдин Бал'ин гизаф аyzабар улукъиди, ахъюдари, маллиири ва къанунчири Думу нигъ апIиди ва йикIиди, хъа шубуд йигълан накъвдиан, чиви духьну, удучIвиди, кIури, аygъювалар улупуйи. ³² Дугъу мидкан дураги ачухъди кIуйи. Хъа Петри Иса гъирағъдиз гъадаъну, Дугъан гафар гъадатIуз хъюгъру. ³³ Хъа Дугъу, илдищну, ученикарихъинди лигури, Петрин гафар къатI апIуру.

— ГъудубчIв Узхъан, иблис! Яв фикрап адмийирин фикрап вуяв, хъа Аллагъдин — варь!

³⁴ Чахъна халкъдизна ученикариз дих дапIну, Исаи гъапи:

— Шлиз Узухъди гъягъюз ккуундуш, думу, чан тямягъяр дирчну, чан хач гъадабгъну, Узухъди гъюри. ³⁵ Шлиз чан уьмур уьбхюз ккуундуш, дугъан думу дубгди. Хъа шли Узу ва Ужувлан хабар бадали чан уьмур пуч гъапIиш, дугъу думу уьбхиidi. ³⁶ Фу мянфаят а адмийиз, уьмрихъан гъахъиган, вари дюн'я туври гъабшишра? ³⁷ Чан уьмур къяляхъ апIбан бадали, дугъу фициб



кымат тувди? ³⁸ Гъаму гунагъкар ва Аллагъ аыгъдру халкъдин улихъ шли Узхъан ва Йиз гафариҳъан нач гъапIиш, дугъхъан Инсаниятдин Балира, Чан Адашдин аднаъди гирами малайика-рихъди му жилиина гъафиган, нач апIиди.

❾ ¹Хъа Исаи кIуру

— Гъякъди кIуразачвуз: мушв'ин дийигънайидарикан сакью-дариз чпин айжал хъубкъайиз Аллагъдин Паччагълугъ гъубкIну чан къувватнаъ ади рябкъиди.

Исаин Мусайихъдина Ил'ясдихъди сюгъбат

² Йирхъуд йигълан Иса, Чахъди Петрна, Якъубна, Югъан гъа-дагъну, ягъли дагъдиона хъади гъягъору. Душв'ин жара кас ал-дайи. Хъа Иса дурагин улихъ дигиши шулу. ³ Дугъан палтар, улин нур гъабхури, къадар адрубкъан лизи шулу — гъурччу пну, гыч сарихъан дици лизи апIуз даршлий. ⁴ Дурагин улихъна Иса-йихъди гафар апIурайи Ил'ясна Муса ачмиш шулу. ⁵ Хъа Петри Исаихъинди илтIикIну кIуру:

— Мялим! Учуз мушвахъ ужуди вучуз! Гъач, шубуб паж апIуча: саб Увуз, саб Мусайиз ва саб Ил'ясдиз.

⁶ Петри мици, фу кIуруш ва гъапIруш аыгъдрури, гъапиб вуйи, фицики ученикариз яман гучI дубхънайи. ⁷ Гъадмуган диф ара-йиз гъюру ва диди дурагин чан сирникк ккаъру, хъа дифрагъян сес шулу: «Му Йиз масан Бай вуйиз. Гъамгъахъ хъебехъай!»

⁸ Гъадму сяйт дурагин чарни терефариизди лигуру, амма дурагин чпин багахъ Исаиylan гъайри фужкIа гъяркъондайи.

⁹ Дурагин дагъдилан гъюргуган, Исаи Чан ученикарикан чпиз гъябкъюбикан, Инсаниятдин Бай дукIну чиви хъайиз, саризра даркIуб, ккун апIуру.

¹⁰ Дурагин чарни арайиъ гъибтру, аммаки дурагин чиб-чпигъ: «Чиви дархъикъан гагъди», — фу кIуру гафар вуй-кIан, кIури, улхурайи. ¹¹ Дурагин Исаихъан гъерхру:

— Къанунчиири сифте Ил'яс дуфну ккунду гъаз кIура?

¹² Исаи дурагин жаваб тувру:

— Ав, дугъридан, Ил'ясди, улихъмиди дуфну, вари ккабалг-ну ккунду. Хъа Гирами китабарий Инсаниятдин Балкан Дугъ'ин



гизаф аyzабар улуркыиди ва Думу ужуз апIиди кIури, гъаз дi-
бикIна? ¹³Хъя Узу учвуз кIуразачвуз: Ил'яс гъафну, ва дугъкан
чпиз ккуниб гъапIну. Гъаци дiбикIна Гирами китабариъра.

Исаи ицурайи бай сагъ апIуб

¹⁴Дурапиз, имбу ученикарихъна гъафиган, дурапилан халкъ
илтIишну, гюжатар апIурайи къанунчийр рякърю. ¹⁵Гъадму
саяйт Иса гъяркъю халкъ аyzайиb шулу ва, Думу тебрик апIури,
Дугъахъна жаргъуру.

¹⁶Исаи ученикарихъан гъерхру:

— Фтин кIуллан мурарихъди гюжатар апIурачва?

¹⁷Халкъдигъян сар касди жаваб тувру:

— Мялим! Увухъна йиз бай духназа. Дугъаъ чиркин рюгъ а.
Диди дугъахъди гафар апIуз гъитрадар. ¹⁸Жин алабхърган, думу
жилиина гатIахъури шулу, кIавантIаригъна каф гъядапIуру ва,
сппар илчIигури, жан дичIибгну дебккру. Узу яв ученикарихъан
думу жин утIубккуб ккун гъапIунза, хъя дурапихъан гъабхъундар.

¹⁹— Эй хътругъру инсанар! — кIуру гъадмуган Исаи. — Узу
учвухъди филадизкъан гъузди кIурачва?! Узу учву филадиз аyzъ
апIуза?! Думу Узухъна аyzъинай!

²⁰Бай Дугъахъна хуру. Жинди, Иса гъяркъюбси, бай жилиина
гатIархъуз гъитру ва кIавантIаригъна каф гъютIубччвну, мина-ти-
на диргъуз гъитру.

²¹— Мици дубхъну мугъан гизаф вахт вуйин? — гъерхру Исаи
дугъан адашдихъан.

— БицIидихъанмина, — жаваб тувру дугъура.

²²— Гизаф раЖари жиндиз думу пуч апIуз ккун гъабхъну: сас-
пиган цIигъна гатIархъури, саспиган — штуз. Хъя эгер Увхъан
фукIа-мукIа апIуз шулуш, ич язухъ зиг, кюмек апIин!

²³— Фу кIуру гаф ву «Эгер шулуш?!» — кIуру дугъаз Исаи. —
Хъугъвал аирихъан вари шулу.

²⁴Балин адашди ишури кIуру:

— Хъугъурза! Хъя узхъан хъугъуз шулдарш, кюмек апIин!

²⁵Халкъ Чахъна гъюри дябкъну, Исаи чиркин рюгъназ буй-
ругъ тувру:

— Ебхъуз гъидритру ва чIал бисру жин, Узу увуз буйругъ тув-
раза: удубчIв дугъ'ан ва сану муубчIан!



²⁶ Жин, балин жан яманди дутІубччвну, чИгъар апІури, удуб-Чівур. Думу дукІнайирси дитнайи, ва гизафдари думу гъакІну кІүйи. ²⁷ Хъа Исаий думу, хилхъан дидисну, заъру, ва бай гъудувору.

— Иса хулац гъафиган, Дугъахъди гъузу ученикари гъерхру:

— Хъа учхъан думу утІубккуз гъаз гъабхъундайи?

— Мицдар жинар ккарагбииндитІан утІурккуз шлудар дар, — гъапи Исаий.

Исаий Чан аյжаликан пуб

³⁰ Душв'ан удучІвдар Галилей уылкейиантана гъягъюру. Исаийиз мидкан жарадариз аыгъю дубхъну ккундайи, ³¹ гъаз гъапиш Дугъаз Чан ученикариз аыгъовалар улупуз ккундийи. Дугъу ду-рариз гъапнийи:

— Инсаниятдин Бай багарихъди инсанарин хилиз тувди ва йикІиди. Думу йикІиди, амма шубуд йигълан чИви хьиди. ³² Ду-рар Исаий гъапибдин гъаври шуладайи, хъа Дугъхъан гъерхуз гучІүйи.

Исаий аыхюрикан пуб

³³ Дураг Кафернагъумдиз гъюру. Хулац айиган, Исаий учени-карихъан гъерхру:

— Мина гъюрайиган, гъюжатар гъапІрудар вуйичв?

³⁴ Дураг ккебехъну гъузу, гъаз гъапиш рякъюъ айиган дура-ри, чикан гъуллугъанинди фуж аыхюр вуш, гъюжат гъитІбкк-найи. ³⁵ Иса деъру, Чахъна ЙицІкьюриддизра дих дапІну кІуру:

— Шлиз учв сарпирди дубхъну ккундуш, гъит думу варитІан аыхиримжир ишри ва варидачин лукI ишри.

³⁶ Дугъу бицІир гъадагъну, дурагин къялац дерккру ва, ха-бас тІаъну, ученикарихъинди кІуру:

³⁷ — Шли Узу бадали гъамцдар бицІидарикан саркъан къа-бул гъапІиш, дугъу Узу къабул апІура. Хъа шли Узу къабул гъапІиш, неинки Узу къабул апІура, хъа гъацира — Узу Гъаурра.



*Ухъуз къаршу дарур
ухъхъанди ву*

³⁸ — Мялим, — кIуру Дугъаз Югъанди, — учуз Яв ччурниинди жинар утIурккурайи сар кас гъяркъончуз, ва учу дугъаз, ухъухъди хътруган, гъадагъа гъапIунча.

³⁹ Исаий жаваб туву:

— Машат мапIанай дугъаз. Шли Йиз ччур дибисну, айламат улупиш, думу Узкан чIуруди улхидар. ⁴⁰ Фуж ухъуз къаршу дарш, думу ухъхъанди ву! ⁴¹ Шли учвуз, Месигъдин ученикар буди хъпаз лигну, саб кIиф шид тувиш, хъугъай Узухъ, дугъаз чан пешкеш хъибди. ⁴² Хъя шли саркъан гъамцдар айдатидарикан ва зияфдарикин хъугъувалихъан хътаиш, дугъаз чан гарданцир рягънин ахал ипну, гъюлизди гатIархънийиш, ужу шуйи. ⁴³ Эгер яв хили уву тямягънахъна гъахураш, хъадабтI думу! Увуз саб хил хъади женнетдиль учIивуб ужу ву, кьюб хил хъади зат кIрубшвру цIа айи жегъеннемдиль ахъайиз. [⁴⁴] * ⁴⁵ Эгер яв ликри уву тямягънахъна гъахураш, ккадабтI думу! Увуз саб лик ккади женнетдиль учIивуб ужу ву, кьюб лик ккади жегъеннемдиль ахъайиз. [⁴⁶] ⁴⁷ Эгер яв ули уву тямягънахъна гъахураш, адабгъ думу! Увуз саб ул ади Аллагъдин Паччагълугъдиль учIивуб ужу ву, кьюбиб уларра амиди жегъеннемдиль ахъайиз. ⁴⁸ Душваъ зат дийийигъди мялхъвяри итIури шулу ва кIрубшвру цIигъ ургури шулу. ⁴⁹ Гван къилахъди тартиб апIрганси, гъарсар цIихъди марцц апIиди. ⁵⁰ Кыил ужуб мутму ву. Хъя эгер къилан къилзишин гъудубгиш, фти думу къилзи апIидичва. Учвук кыил кади йибхъай! Ва сар-сарихъди мясяльтнаш йихъай.

Нюкягъ чIюбгъбакан

10 ¹Му йишв'ан Иса Ягъудия юрдназ ва Ярдан нирин тмуну жилариина гъягъюру. Дугъахъна хъана халкъар гъойи, Дүгъу, гъарганси, дурагиз айгъювалар улупуйи.

² Иса ахтармиш апIуз ккунди, фарисийр гъюру ва Дугъаз суал тувру:

* 9:44,46 Грекарин саспи БикIбарий гъамци кIура: «Душваъ зат дийийигъди мялхъвяри итIури шулу ва кIрубшвру цIигъ ургури шулу».



— Къанундиинд жилириз хипир адауз ихтияр айин?

³ — Хъя Мусайи фици табшурмиш гъапІунчвуз? — кIуру Исаий.

⁴ — Мусайи, жара хъпан кагъазра дикиІну, хипир адауз ихтияр тувну, — жаваб тувру дураги.

⁵ — Мусайи, ичв гъициркъу юкІвариз дилигну, гъаци гъапунчвуз, — кIуру Исаий. ⁶Хъя дюн'я ккебгъхъянмина Аллагъди жилирна хипир халкъ дапІна. ⁷Гъаддиз жилир, чан адашна дада гъитну, чан хипир карди, ⁸ва дураги кьюрид саб беден хъиди. Гъаци вуйиган, дураги сарун къюб ваъ, хъя саб беден ву. ⁹Гъамци Аллагъди китІдар инсанди жара дапІну ккундар

¹⁰Хъасинси дураги хулаз гъафиган, ученикари Исаийхъан хъана нюкъикан гъерху.

¹¹Дугъу жаваб туву:

— Шли, чан хипир гъадаъну, жараги гъахиши, дугъу къяппавал апІура. ¹²Хъя эгер дишагъли, чан жилирихъан гъудучІвну, жарариз гъушиш, гъадму дишагълийира къяппавал апІура.

Исаий бицІидариз уж'вал ккун апІуб

¹³Исаийхъна, Дугъу кIуллан карк алдатбан бадали, бицІидар хуру, хъя ученикари хуз гъитри гъахъундар. ¹⁴Гъамци гъябкъю Исаик хъял кубчІвру ва Дугъу дурагиз кIуру:

— БицІидар узухъна гъюз гъитай, гъадагъя мапІанай. Аллагъдин Паччагълугъ гъацдаринуб ву. ¹⁵Гъякъ кIуразачвуз: шли Аллагъдин Паччагълугъ бицІириси къабул дарапІиш, думу душваъ учІвидар.

¹⁶Хъя Исаий бицІидар хабаъ тІаъну, дурагиин хилар иливури, уж'вал ибшричвуз, кIуру.

Девлетлуйин суал

¹⁷Иса рякъюъ учІврайиган, сар касди, Дугъахъна жаргъури дуфну, икрам апІури, къамкъариина дусну, гъерху:

— Я гъяни Мялим, узу женнетдиз ахъбан бадали гъапІну ккунду?

¹⁸— Гъаз Узуз гъянир кIурава? — кIуру Исаий. — Сар Аллагъ-дилан гъайри саркъан гъянир дар. ¹⁹Увуз Дугъан табшуругъар



аъгъявуз: адми миликІан, къяпавал мапІан, мигъитІбкІан, кучІлин шагыидвал мапІан, алдатмиш мапІан, адашдизна дадайиз гъюрмат аپІин.

²⁰ – Мялим, узу дураг вары бицІидихъанмина тамам апІураса, – жаваб гъабхыи Исайиз.

²¹ Иса дугъахъинди лигуру ва дишла Дугъаз думу ккун шулу. Исайи кІуро:

– Сабсана увуз гъубкІрадар: гъараҳ, увуз айиб вары масу тув ва пул касибариш пай апІин, гъадмуган аършариъ яв девлет хъибдивуз. Хъасин Узухъди гъач.

²² Хъа думу му гафарикан пашман шулу ва гъудучІвну гъягъюру, гъаз гъапиш думу гизаф девлетлу вуйи.

²³ Исайи, ул илбицну, ученикариз кІуро:

– Девлетлуйириз фукъан читин дарин Аллагъдин Паччагъ-лугъдиль учІвуз!

²⁴ Дугъан гафариин ученикар аъжайиб духънайи, хъа Исайи дурагириз хъана гъапи:

– Йиз веледар, фукъан читин дарин Аллагъдин Паччагълугъ-диль учІвуз! ²⁵ Девлетлуйириз Аършарин Паччагълугъдиль учІвубтІан девейиз рубдин гъюн'ан удубчІвуз рягъят ву.

²⁶ Дураг хъана артухъ аъжайиб гъаши ва сари-сариз гъапи:

– Дици вуйиган, шилхъан учв уърхюз хъиди?

²⁷ Дурагирихъинди дилигнуну, Исайи кІуро:

– Инсанарихъан му удукъруб дар, хъа Аллагъдихъан удукукъ-руб адар.

²⁸ Гъадмуган Петри пуз хъюгъру:

– Хъа магъа, учу, вары гъибтну, Увухъди хъача.

²⁹ – Гъякъ кІуразачвуз, – кІуро Исайи, – Шли Узу ва Ужувлан хабар бадали чан хал, чвийир, чиир, дада, веледар, хутІлар гъит-нуш, дугъаз му дюн'яйин ³⁰ варж раЖари артухъ хулар, чвийир, чиир, дадайир, веледар, хутІлар, хъа гъацира жвувахъ хъчІир-ккувалар хъиди, хъа гъюз ккимбу уъмриъ – гъаргандин уъмур.

³¹ Аммаки, гъаму раЖари гизаф сарпидар думуган аъхиримжиidar хъиди, хъа аъхиримжиidar – сарпидар.



Исайи хъана чан аъжаликан пуб

³² Гъамус дурари Ерусалимдиз рякъ дибиснайи. Улихъди Иса гъягъюрайи. Исайихъди гъягъюрайи ученикарик гъалабулугъ кабхънийи, хъа дурарихъди хъайи имбудар гучIбу ккагънайи. Исайи, ЙицIикьюридра гъирагъдиз гъадаъну, Чаз фу шулуш, пуз хъюгъю:

— Магъа ухъу Ерусалимдиз гъягъюрахъа. Инсаниятдин Бай аъхю маллиириинна къанунчиирин хилиз тувди. Думу, карсну йикIуз жаза адабIину, жугъуд дарударин хилиз тувди. ³⁴Хъа ду-пар Дугъак кялхъди, рихшанд апIиди, туттир катIиди, гъирма-жарихъди урчвиidi ва йикIиди. Аммаки шубуд йигълан Думу Чиви хъиди.

Югъандинна Якъубдин тIалаб

³⁵ Зеведейин баяр Якъубна Югъан Исайиз багахъ улучIвуру ва кIуру:

— Мялим! Учу кIурайи тIалаб тамам апIина.

— Узу учвуз гъапIину ккундучувуз? — гъерхру Дугъу.

³⁷ Дурари жаваб тувру:

— Яв аднаа Уву учIвган, учу Яв гъвалахъ деърубси апIин — сарарчул, тмунур гагул терефнаа.

³⁸ — Учву фу тIалаб апIураш, учвуз аъгъдарчвуз, — кIуру Иса-йи. — Уз'ина гъюз ккайи аъзабар учвхъан аых апIуз хъибин? Ясана, Узу марцц шлуганси, учвхъан шулин?

³⁹ Дурари: «Ав, шулчухъан», — гъапнийи.

Хъа Исайи дурализ гъяпи:

— Дугъриданна, Узу къабул апIуз ккайи аъзабар учвура аых апIарчва, ⁴⁰хъа Йиз арчулну ва гагулну терефарихъинди дитувал Узлан асиллу дар: думу иишвар, Йиз Адашди шлиз улуп-наш, гъадариндар ву.

⁴¹ Якъубдинна Югъандин гафар гъеерхъиган, имбу йицIи-дариик хъял кубчIвру. ⁴² Хъа Исайи дурализ Чахъна дих дапIину кIуру:

— Халкъарин гъякимарди гъисаб апIурайидари халкъарин зи-ин агъавал апIурайивал ва аъхюдари дурарин зиин чпин гъюкум улупурайивал учвуз аъгъячвуз. ⁴³ Хъа ичв арайиъ дици дарибши:



шлиз ичв арайиль кіулинур хъуз ккундуш, гъит думу ичв гъай-гъушнаш ишри, ⁴⁴ ва шлиз ичв арайиль сарпир хъуз ккундуш, дицирикан варидачин лукI ишри. ⁴⁵ Инсаниятдин Байра Чаз жарадари гъуллугъ апІбан бадали ваъ, хъа Чав гъуллугъ апІбан бадали ва, гизафдарин гунгъарилан хил алдабгъуз кIури, Чан уьмур тувбан бадали Дуфнайир ву.

Исайи кур сагъ апIура

⁴⁶ Хъасин дураг Ерихон шагъриз гъюру. Иса Чан ученикар ва гизаф халкъ хъади Ерихондиан удучIвурайиган, рякъюхъ, тувру садакъайиз ккилигурни, курсий касиб, Тимейин бай Вартимей деънайи. ⁴⁷ Дугъу, душвхъантине Назарет шагъриан вуйи Иса гъягъюра кIури деебхъину, Чигъ апIуру:

— Давудгъярин Бай Иса, йиз язухъ апIина!

⁴⁸ Гизафдари дугъаз ккебехъ кIуи, хъа курсий айибтIан артухъ Чигъар апIуз хъюгъю:

— Давудгъярин Бай, йиз язухъ апIина!

⁴⁹ Иса хъугъужвуру ва Дугъу кIуру:

— Мина гъач йипай дугъаз.

Куриз дих апIуру:

— Чкиди гъудужв, Исайи увуз Чахъна гъач кIура!

⁵⁰ Вартимей, чуха хъидипну, гъедергуру ва Исайихъна жаргъуру.

⁵¹ — Узкан фу ккундувуз? — гъерхру Исайи.

— Мялим, узуз рябкъоз ккундузуз! — жаваб тувру кури.

⁵² — Гъарах, яв хъугъвали уву гъюрхюнву, — кIуру Исайи.

Дугъаз дишла рябкъори шулу, ва думу Исайихъди гъягъюру.

Иса Ерусалимдиз гъюб

11 ¹Дураг Ерусалимдиз багахъ шулайиган, Вифагия ва Вифания гъуларихъан ярхла дарди, Элион кIуру дагъдин багахъ хъимиidi, Исайи гъамци дупну, кьюр ученик гъаъру:

² — Гъатму ихъ гъаншариъ айи гъулаз гъарахай. Гъулаъ учIавайиз ярхла дарди, дубтIайи жигъил дажи рябкъидичвуз. Диd'ин мегъел фужкIара элеундар. Тудубчну, думу гъамина абкъинай. ³Хъа эгер учхъан шли: «ГъапIрачва?» кIури гъерхиш, «Думу Агъайиз лазимди ву, Дугъу думу дишла къяляхъ апIиди», йипай.



⁴Дураг гъягъору, ва кючейиъ уаррин багахь дигбїнайи жигыил дажи рябкъору. Думу тудубчуз хъюгъру. ⁵Душвахъ дийигънайи адмийири: «ГъапІрачва? Гъудугъ гъаз тудубчурачва?» – гъапи. ⁶Хъа дураги чпиз Исаи гъаписи кIуру, ва дураги ихтияр тувру. ⁷Дураги дажи Исаихъна хуру. Дураги чпин палтар дид'ин иличуру, ва зиълан Иса элеуру. ⁸Гизафдари чпин палтар, хъа имбудари хутІлий гъарарикан ктатIу кюлер Думу гъягъору рякъюкк ккирчуйи. ⁹Улихъ-дира ва къяляхъдира гъябгъорайи халкъди гъарий апIурайи:

– Аллагъдиз тяриф!

Агъайнин ччвурнахъ Гъюрайириз
уж'вал ибшри!

¹⁰ Ихъ аба Давудрин улубкъурайи Паччагълугъдиз
уж'вал ибшри!

Аршариз тяриф!

¹¹ Иса Ерусалимдиз учIвру ва Аллагъдин хулаз гъягъору. Ва-
ришварилан ул илбицну, хъяяхъган къанди, Думу, йицIикьюрид
вакиларра хъади, Вифанияйиз хътакуру.

¹² Хъайигъан, дураг Вифанияйиан удучIвган, Исаиз гаш хъу-
вал гъибгъру. ¹³ Ярхлаъ инжирин гъар гъябкъю Думу, дидигъ
йимишар гъяш лигуз кIури, багахъна гъягъору, амма Дугъаз,
гъаригъ фукIара гъибихъундайи, фицики инжиирар хъуркъру вахт
улубкънадай. ¹⁴ Гъадмуган Дугъу гъариз кIуру:

– Сану гъич сарира сабанра яв йимишар диритIри!
Мици кIури ученикаризра гъеебхънийи.

Иса Аллагъдин хулаз гъюб

¹⁵ Дураг Ерусалимдиз гъору. Иса Аллагъдин хулан гъятдиз
гъафи, ва душваъ ариш-вериш апIурайидар утIуккуз хъюгъру.
Дугъу пул дигиши апIурайидарин устлар, луфар масу туврайида-
рин кусрийир ккитIикIуру, ¹⁶ ва гъич сарира чан шей'ар Аллагъ-
дин хул'антине гъахуз гъитдар. ¹⁷ Хъасин Исаи дураги аygъю-
валар улупуз хъюгъю. Дугъу кIуру:

– Гирами китабарий дикикIнадаринхъа: «Йиз хулаз вари мил-
летар ккарагру хал пиди». Хъа учву дидкан тIарашчириин мугъа-
ра дапIначав!

¹⁸ Ахъюдариизна къанунчириз гъамци кIури гъеебхъиган, Думу
ийкIуз, дураг саб чара абгуз хъюгъю. Дугъхъан дураги гучIуйи,



гъяз гъапиш вари халкъ Дугъан аygьюваларихъ ахю иштагъни-инди хъпехъуйи.

¹⁹ Хябахъ гъабшиган, Иса ученикарра хъади, шагъриан удучІв-ну гъягъору.

Хъугъвалин къувватнакан

²⁰ ГвачІинган инжирин гъарин багхъантина гъягъорайдариз думу чиварианзина тап кІакІаризкъан вари деебцну рябкъю-ру. ²¹ Петри, накъ гъапиб кІваин дубхъну, Исаиз кІуру:

— Мялим, лиг, Уву накъ чаз люкъян гъапІу инжирин гъар гъе-ебцну!

²² Исаий дурагиз жаваб туви:

— Аллагъдихъ хъугъай! ²³ Гъякъ кІуразачвуз: эгер шли гъаму дагъдиз «Яв иишв'лан улдумбЧІвну, гъюлиъ убс!» гъапиш ва, кІваъ шаклу даршиди, хъугъиши, гъадмура тамам хъибди. ²⁴ Гъад-диз Узу кІуразачвуз: учву ккарагури фу ккун гъапІиш, вари учвухъна рубкърувалихъ хъугъай, рубкъидичвухъна ва думу ичв хъибди. ²⁵ Аyrшарин ичв Адашдихъан ичв гунгъарилан хил ал-дабгъуз шлуси, ккарагруган, шлик ичв хъял каш, гъадгъулан хил алдабгъай. [²⁶]*

Исаин гъюкум наънан ву?

²⁷ Дураг хъана Ерусалимдиз гъору. Иса Аллагъдин хулан гъя-ятдис лицурайиган, Дугъахъна ахю маллайирна, къанунчийрна, ахюдор гъору.

²⁸ Дураги гъерхру:

— Уву му ляхнар фициб гъюкмиинди апІурава? Шли Увуз гъа-циб гъюкум тувну?

²⁹ Исаий дурагиз кІуру:

— Узу учвуз саб суал тувдиза. Жаваб тувай — Узура, мураг фи-циб гъюкмиинди апІураш, пилизачвуз. ³⁰ Ягъ'яйин штуан апІувал Аллагъдихъан вуйин, даршиш инсанарихъан? Гъан, жаваб тувай!

³¹ Дураг, фикрарикк ккахъну, чиб-чиликди гъамци пуз хъюгъ-ру: «Эгер ухъу „аyrшариан“ гъапиш, Дугъу: „Хъа учву дугъахъ

* 11:26 Грекарин саспи БикІарий гъамци кІура: «Хъа жарадарилан хил алдадаб-гъиши, Аyrшарий айи ичв Адашлира ичв гунгъарилан хил алдабгъидар».



гъаз хъугъундайчва?“ пну, гъерхди. ³² Хъа адмийирихъан гъапиш...»

Дурагиз халкъдихъан гучIуйи, гъаз гъапиш варидаи Ягъ’я дугъриданра пайгъамбар ву кIурайи. ³³ Гъаддиз дураги гъамциб жаваб тувру:

— Аъгъдарчуз.

— Диши вуш, Узура учвуз, фициб гюокмиинди гъамцдар апIураш, пицарзачвуз, — жаваб тувру Исаий.

Абайи чан бай гъаъра

12 ¹Иса дурагиз тахалус ктибтуз хъюгъру:

— Сар касди тIумтIин багъ ибтру, арчил илтIибкIуру, ичI ебккну, тIумтIар кчIюкърушв ва паж апIуру. Хъасин багъ арен-дайиз тIумтIчирихъна тувну, учв удучIвну жара иишвариз гъягърю. ² Вахт гъабхыиган, дугъу тIумтIчирихъна чан пай тIумтIар хуз лукI гъаъру. ³Хъа дураги думу дисуру, урччуру ва, фукIара тутруди, утIуккуру. ⁴ТIумтIин багъдин эйсийи сарсана лукI гъаъру, аммаки мугъан кIул уьбгърю ва, айиб алаPиу, утIуккуру. ⁵Сарсана гъаъру — му йивну, йикIуру. Хъана гизаф жарадарра гъаъру — садар урччуийи, тмундар йивну гъядайи. ⁶Эйсийиз хъайина-хътру сар бай ади шулу. Ва ахиримжи ра-жари дурагирихъна «Йиз балхъан нач апIурда» пну, гъадму гъаъру. ⁷Хъа тIумтIчири чиб-чпин арайиъ гъамци кIуру: «Му эйсийин ирсчи ву. Гъачай, думу йивну йикIухъа, ва ирс ухъуз гъубзди!» ⁸Дураги думу дисуру, йикIуру ва тIумтIин багъдиан гатIахъуру. ⁹ТIумтIин багъдин эйсийи гъапIди? Думу хъадакну гъиди ва тIумтIчири йихиди, хъа багъ жарадариихъна тувди.

Мурчван гъван

¹⁰ Мегер учву Гирами китабарий гъурхунданчва:

«Устийири гатIабхъу гъван мурчвануб гъабхъну.

¹¹ Му ухъуз гъябкъю айламат Агъайи гъапIуб ву».

¹² Жугъдарин ахюдариз му тахалус чпиз къаршуди дупнайива-ликан айгъю шулу ва Иса дисуз ккун шулу, аммаки халкъдихъан гучIуйи. Гъаддиз дураг, Думу гъитну, гъягърю.



*Исайи фукІа дюз даруб
кІайиз ккеуб*

¹³ Хъасин Исайихъна, Дугъу фукІа дюз даруб кІайиз ккеъбан бадали, сакьюдар фарисийирна Гыироддин терефкран гъаъру.

¹⁴ Дураги дуфну кІуру:

— Мялим, учуз аygъячуз Уву гъякъ кІурайиб, гъич сарихъанра гучІадарвуз, гъич саризра гучІар ккаурдарва, хъа дишиди ва ачухъ-ди Аллагъди кІурайиси яшамиш хъуз аygъювалар улупурава. Йип гъеле, Рим паччагъдиз налук туврувал дюз вуйин, дарш дарин? Учу налук туврин, дарш тувурдарин?

¹⁵ Дурагин чуру ниятарин гъаври айи Исайи кІуру:

— Гъаз Узу ахтармиш апІурачва? Аьбкъинай Узухъна манат, лигуга дидиз.

¹⁶ Дураги хуру. Исайи дурагихъан гъерхру:

— Мидик шлин шикилна ччвур ка?

— Римдин паччагъдин, — жаваб тувру дураги.

¹⁷ Исайи кІуру:

— Паччагъдинуб паччагъдиз, хъа Аллагъдинуб Аллагъдиз тувай. Дураги Дугъан жавабнин гъаш гъаши.

Саддукийир ва Иса

¹⁸ Гъадму вахтна гъачІидар Чиви шлуб дар кІурайи саддукийи-ри дуфну гъерхру.

¹⁹ — Мялим! Мусайи учуз, эгер хпир айи чве веледар дарши-ди гъачІиш, гъадгъан хпир тмуну чвуччву гъадагъну, чан чвуччун тум арайиз дубхну ккунду, кІури дибикІна. ²⁰ Ургур чве гъахъну. Сарпи чвуччву шив хуру, амма, веледар дархъиди, йикІуру. ²¹ Кьюрпи чвуччву дугъан хпир чаз дитру, ва мур, веледар дархъиди, йикІуру, шубурпирра — гъаци. ²² Ургрид чвийи-рикан гъич саризра веледар гъахъундар. Вардарилан къяляхъ гъадму дишагълира йикІуру. ²³ Гъиямат йигъян вари Чиви шлу-ган, думу шлин хпир хъиди? Ургрид чвийиризра думу шувуз гъушний аххир!

²⁴ Исайи дурагиз гъамциб жаваб апІуру:

— Учву, я Гирами китабар, ясана Аллагъдин къудрат аygъ-дарди, улдугурачва. ²⁵ Гъийихдар Чиви гъахъиган, дураги я



швушвар хурдар, я швувааз гъягъюрдар. Дураг айрширий айи малайикарси хьиди. ²⁶Хъа гъийихдар чИви хъуваликан кIури гъабшиш, учву Мусайин китабдиъ, Аллагъди фици убгурайи рукнаан дугъаз «Узу Ибрагимдин Аллагъ, Исакъдин Аллагъ ва Якъубдин Аллагъ вуз» кIури дибикIнайиб гъурхунданчва, дарш? ²⁷Аллагъ дийихнайидарин ваъ, хъа чIивидарин Аллагъ ву. Учву гизаф улдугурачва.

ВаритIан заан табшуругъ

²⁸Гьюжат апIурайишвах сар къанунчира хъайи. Исайи дурагиз фукъан уччвуди жавабар тувраш, дугъаз гъеебхънийи, ва думу, Дугъахъна дуфну, гъерхру:

— Фуну табшуругъ варитIан заануб ву?

²⁹— ВаритIан заан вуйи табшуругъ, — кIуру Исайи. — «Хъебехъай, эй жугъдар! Ихъ Агъя Аллагъ — сар АгъатIан дар. ³⁰Яв Агъя Аллагъ, вари юкIв хъипну, вари рюгънаан, вари фагъмиан ва вари жувван къувватнаан ккун апIин». ³¹Хъа магъа къюбиб: «Багахъ хъайир увуз жувваз жуввси ккун апIин». МурартIан аыху табшуругъар сарун адар.

³²— Ужуди дупна, Мялим, — кIуру къанунчийи. — «Думу сар ву ва, Дугълан гъайри, сану гъич фужжIара адар», — кIури, гъякъ гъапунва. ³³«Думу вари юкIв хъипну, вари фагъмиинди ва вари жувван къувватниинди» гъацира «багахъ хъайир жувваз жуввси ккун апIин» кIуру гафар, вари урккру ва ургру гъурб-нартIан зиина ву.

³⁴Дугъу фагъумлуди жаваб тувувал дябкъну, Исайи дугъаз кIуру:

— Уву Аллагъдин Паччагълугъдихъан ярхла дарва.

Гъамдихъан сарун сарира Исайихъан гъич сабдиканра гъерхуз кIубанвал гъапIундар.

³⁵Аллагъдин хулаъ халкъдиз аygъювалар улупурайиган, Исайи кIуру:

— Къанунчиирихъан, Месигъ Давудгъярин Бай ву, пуз, фици удубкъуру? ³⁶Гирами Рюгъну ацIнайи чав Давудри гъапну, аыхир:

«Агъайи йиз Агъайиз гъапну:

„Узу Яв душмнар, духну,



Яв ликарикк дахъайизкъан

Йиз арччул гъвалахъ деъ“».

³⁷ – Чав Давудри Дугъаз, Думу чан Агъа вуйиз, кIура. Гъаци вуйиган, Думу дугъан Бай фици хъидихъя?

Гизаф халкъ Дугъахъ ахю иштагъниинди хъпехъурайи.

³⁸ Дугъу халкъдиз Чан улупбарий кIуйи:

– Ярхи палтар алди лицру къанунчиирихъан ихтият йихъай. Дурагиз, чпин тяриф апIури, халкъар уч шлушвариъ чпи теб-рик апIури ккунду, ³⁹ дураг мистариъ ва ипIру-убхърушвариъ варитIан гъюматлу иишварииин деуз ккунидар ву. ⁴⁰ Гъадрап ву дураг, ачIини хпарин мутму хътипIурайидар, хъа халкъдин ула-рихъан ярхи гъудгнар апIрудар. Гъиямат йигъан дурагиз вари-тIан пис жаза ккилибгурал.

Касиб ачIини хпирин садакъа

⁴¹ Иса, садакъади пул ипру ишкIин багахъ деъну, фици пул ипраш, лигурайи. Ахю пай девлетлуйири гизаф пул ипуйи.

⁴² Хъа сар касиб ачIини хпир дуфну, душваш кьюб кепек ирчру.

⁴³ Гъадмуган Исаи, ученикариз Чахъна дих дапIну, кIуру:

– Гъякъ кIуразачвуз: гъаму касиб ачIини хпире варидарапIан артухъ пул ипну. ⁴⁴ Пул ипдари варидарапIан чпиз артухъди вуйиб ипну, хъа мугъу, гъамцир касибири, чаз ипIрубдихъ тувру айи-ад-руб вари ипну.

Исаи Аллагъдин хал дабгъруваликан пуб

13 ¹Иса Аллагъдин хул’ан удучIурайиган, ученикарикан сари Дугъаз кIуру:

– Мялим, лиг, фицдар гъванар, фукъан уччуу дараматар дарин!

² – Уву гъаму зурба дараматдин гъайран духънана? – кIуру Исаи. – Мидин гъван-гъвандин гъубзидар, вари дабгъиди.

³Хъасинси, Думу Элион дагъдин Аллагъдин хулаз гъаншарди деънайиган, ялгъузди гъузнайи Петрина, Якъубдина, Югъанди-на Андрей Дугъхъан гъерхру:

⁴ – Йип учуз, дици фила хъибди? Думу дабгърубикан учуз фици аыгъю хъибди? Фициб лишниинди аыгъю хъибди?



⁵ Исаи кIуру:

— Лигайгъа, шлика учву алдатмиш дарапIбан бадали, ихтият йихъай. ⁶Фищики гизафдар: «Гъадму узу вуз» кIури, Йиз чвурнаккди гъиди ва гизаф халкъар алдатмиш апIиди. ⁷Учвуз багахъ ва ярхла дявирикан гъеебхьиш, гучI мапIанай: гъаци дубхъну ккунди айиб ву, хъа гъаци хъувал сабан аыхир вуди хъибдар. ⁸Халкъ халкъдиина паччагълугъ паччагълугъдиина алархъиди, варишвариъ жилар тIурччури хъиди, гаш абхъди. Мураг бедбаахтваларин, бицIир апIругандин аyzбарси, сифте кIулар ву. ⁹Ихтиятди гъузай, гъаз гъапиш мажлисариъ жазийр гъадатIидичвуз, мистариъ урчвидичву; Узкан шагъидвал апI-бан бадали, Узлантина паччъарин ва гъакимдриин улихъна гъахидичву. ¹⁰Хъа сабан аыхир гъяйиз вари миллетариз Ужувлан хабар деебхъну ккунду. ¹¹Учву суддиз гъухиган, фу кIуруш, дидин гъайгъушнаъ маxанай: гъадму сяльт учву кIуруб, фу тувнади гъабшиш, гъадму йипай — учву кIури хъидичва, хъа Гирали Рюгъну ичв мелзниинди пиidi. ¹²Чвуччури чве йикIуз масу тудви, хъа адашди — бай. Веледари, абиir-бабариз къаршу удучIвну, дураг йихиди. ¹³Йиз ученикар хъпаз лигну, учву варидариz даккун хъиди. Хъа шли ахиризкъан аыгъ гъапIиш, думу дюрхну хъиди. ¹⁴Учвуз, Аллагъ гъясбикк ккадру алчагъ-вал лайикъ дарушваъ шули гъябкъиган (урхурайир, мидин мяна фу вуш, гъаври ахъну ккунду), Ягъудия уълкейиъ аидар дагълариз гъергри. ¹⁵Хъа фуж гъваин алди гъабшиш, улдуручIви-ри ва чан хулаз фукIа гъадабгъуз дурушри. ¹⁶Фуж хутIиль адi гъашиш, чан палтариz хулаз дурушри. ¹⁷Гъагъдiъ аидаринна нанайихъ бицIидар хъайдарин гъадму йигъари гъял пис хъибди! ¹⁸Мици къордну дарибшри пну, ккарагай. ¹⁹Гъадму йигъа-ри гъациб бедбаахтвал хъибди, дициб Аллагъди дюн'я арайиз гъабхихъанмина гъамусдиз гъабхъундар, ва гъамдихъантинара хъибдар! ²⁰Ва эгер гъадму йигъар Агъайи кам гъапIундайиш, гъич фужкIара ккадархъидай. Хъа Чан кадагънайидар бадали Дугъу гъадму йигъар кам гъапIину. ²¹Эгер учвуз думуган «Лиг, Месигъ гъамшвахъ хъа», вая «Лиг, гъатушвахъ хъа» гъапиш, му-хъугъанай. ²²Гъаз гъапиш кучIин месигъар ва кучIин пай-гъамбраг ачмиш хъиди. Эгер удукурууш, гъеле кадагънайидар-ра чпихъинди илтIикIуз дураги айламатнан лишнар ва айтайиб



ляхнар улупиди. ²³ Гъаци вуйиган, ихтиятди гъузай. Узу учвуз вари улубкъруб улихъ имиди гъапунзачвуз. ²⁴ Хъа гъадму йигъари пис бедбахтваларин къяляхъ «Ригъ ктIубшвиди, вазли акв тувидар, завариан ²⁵ хядар ахъди ва завар ккадаршвиди». ²⁶ Гъадмуган дифарииндз зурба къувват ва гъяйбат хъади Инсаниятдин Бай гъюри рякъиди. ²⁷ Гъадмуган Дугъу, дюн'яйин юкъбиб терефарихъан жилин саб кIулхъан тап гъатмунуб кIулихъна кадагънайдар уч апIуз малайикар гъаъди. ²⁸ Инжирин гъархъан мисал гъадабгъай: дидин кюлери къюкъяр апIруган ва кIажар адашврган, хъад багахъ шулайивал аыгъю шулучвуз. ²⁹ Гъаци учвузра, гъамрар гъяркъган, гъадму вахт, ичв ракк-нихъ хъайиси, багахъ дубхънайдар аыгъю апIинай. ³⁰ Гъякъ кIуразачвуз: му вари улубкъайиз гъамусдин наисил гъубзди. ³¹ Заварна жилар ккадахъиди, хъа Йиз гафар дургидар! ³² Я аэршарин малайикариз, я Бализ – саризра йигъ ва сяйт аыгъдар, хъа сар Адашдиз аыгъя. ³³ Гъаци вуйиган, лигай, ккилигури ва гъязурди гъузай. Думу вахт фила улубкъуруш, учвуз аыгъдарчвуз. ³⁴ Думу вахт, чан хал ва гъардиз рубкъру ляхин лукIариин гъибтну, хъа гъаравлиз «ул иливну маахан» дупну, гъушу хулан эйсийихъ теквуз шулу. ³⁵ Учвура ул иливну мааханай! Учвуз аыгъдарчвуз, аыхир, хулан эйси фила гъюруш: хябахъган, гъацIишваринган, сяйт сабди, даттари уъйир апIруган, даршиш гъиринганд. ³⁶ Хабарсузди Думу хъадакну гъафиган, учву даахнади Дугъаз дярякъри-гъя! ³⁷ Узу учвуз кIурайиб варидализ кIура-за: ул иливну мааханай.

Иса иикIбан ниятар

14 ¹ Къюд йигълан Пасха ва ЛичIван лавшарин машкврап улукъурайи. Аыхю маллиирина къанунчири Иса дидисну йикIуз чарийр агурайи. ² «Хъа анжагъ машквар йигълан варь, – кIуйи дураги, – даршиш халкъдин арайиль гъалабулугъ ахъди». ³ Думу Вифания гъулаъ хамран аyzар кади гъахъи Шимондин хулаъ гештнаъ айиган, душваъ, лизи ругдин бетисибдиъди, нард гъарин багъя марцци ягъ хъади, сар дишагъли учIвру, ва дугъу дидиль айи ицци ниъ хъайи ягъ Исаин кIул'ин улубзру. ⁴ Душваъ айи хяларикан сакьюдари наразиди чиб-чпикди гъамци кIуйи:



⁵ – Гъамкъан ицци ниъ хъайи ягъ мугъу гъаз чIур гъапIу? Гъаму чим шубудварж динар пулихъ масу тувну, хъа гъадму пул касибариш пай апIуз шуйи, аххир!

Дурари дишагълийиз люкънар апIуз хъюгъю, ⁶ хъа Исаий кIуру:

– Думу сикинди гъитай! Фу кIури учву дугъак кудукъначва? Узуз дугъу ужуб ляхин гъапIну! ⁷ Касибар гъарган учвухъди хъиди, ва учвхъан дуариз кюмекар апIуз хъибичвухъан, хъа Узу учвухъди гъарган хъидарза. ⁸ Дугъу чахъан шлуб гъапIну: улихь-миди дугъу Йиз жан, чим кадатну, накъвдиль ивуз гъязур гъапIну. ⁹ Гъякъ кIуразачвуз: дюн'яйиль му Ужувлан хабар наан раб-гъури гъабшишра, думу кIваин апIиди ва дугъу гъапIубдикан ктибиidi.

Ягъудай Isa масу тувуб

¹⁰ Гъадмуган ЙицIикъюрикан сар, Искариот лакIам хъайи Ягъуда, аххону маллиирихъна, Иса масу тувбан бадали, гъя-гъюру. ¹¹ Ягъудайихъ хъпехъдар шад шулу ва, дици гъабшиш, пул тувуз гаф тувру. Гъаддихъан думу Иса масу тувуз гъулай вахт абгури шулу. ¹² ЛичIван лавшарин машквран садпи йи-гъян, пасхайнин ччил гъурбан апIруган, ученикари Исаийхъан гъерху:

– Увуз пасхайнин хураг учу наан гъязур дапIну ккундувуз? Йип, гъязур апIуз гъягъюча.

¹³ Гъадмуган Дугъу, гъамци дупну, кьюр ученик гъарьру:

– Шагъриз гъараҳай. Учвуз шид айи гажин гъабхурайи сар кас гъахъдичвуз, гъадгъан къяляхъди гъараҳай, ¹⁴ ва думу учIву хулан эйсийиз: «Мялимди гъерхра: „Узу ученикарихъди пас-хайнин хураг ипIру хал набши?“» йипай. ¹⁵ Дугъу учвуз кка-балгнайи, машквраз вари гъязурди айи, заан аххю хал улупи-ди. Гъадушваъ ухъуз вари гъязур апIинай. ¹⁶ Ученикар гъягъюру. Шагъриз гъафидариз Исаий гъапибси вари шулу ва пасхайнин хураг гъязур апIуру. ¹⁷ Хябахъ гъабхыбси, йицIикъюридра хъа-ди, Иса гъюру. ¹⁸ Дурари, суфрайихъ дэньну, уыл ипIурайиган, Исаий кIуру:

– Гъякъ кIуразачвуз: учвкан сари, Узухъди ипIурайири, Узу масу тувди.



¹⁹ Дураг пашман шулу, ва гъарури гъерхуз хъюгъру:

— Думу узу дарза ахьир?

²⁰ Хъя дугъу дурагиз жаваб тувру:

— Думу иицИккюрикан сар, Узухъди саб гъабрак уъл кубсра-
йир ву! ²¹ Гъамци Инсаниятдин Бай, Гирами китабарий улупна-
йиганси, масу тувди, амма шли Инсаниятдин Бай масу тувраш,
дугъаз бала хъибди — думу касдиз, учв бабкан гъахъундайиш,
ужу шуй!

Агъайин хъяяхъ

²² Дураги хураг ипIурайи вахтна, Исаий уъл гъадабгъну, ужуб
саяйт ибши дупну, думу гъудубтIуру ва, ученикарихъна тув-
ри, кIуру:

— Ма гъадабгъай, му Йиз беден вуйиз.

²³ Зах гъадабгъну, чухсагъулин ккарагуб дапIну, дурагихъна
тувру. Хъя варидари дид'ан убхъуру. ²⁴ Дугъу дурагиз кIуру:

— Му цИийи йиккярар йитIурайи ва гизафдарихъанди удубзура-
йи Йиз ифи вуйиз. ²⁵ Гъякъ кIуразачвуз: Узу сарун тIумтIарин му
чяхир убхъидарза. Узу цИийи чяхир Аллагъдин Паччагъулгъдиль
убхъидиза.

²⁶ Хъасин Аллагъдин тярифназ мяъли дапIну, дураг Елион
дагъдиз удучIуру.

Ученикари Учв нигъ апIрубдикан Исаий улихъимиidi пуб

²⁷ Исаий дурагиз кIуру:

— Учву варидари Узлан хъугъвал алдабгъидичва, Гирами кита-
барий дупнайиси:

«Марччлихъан йикIидиза,
ва марччар даргъиди».

²⁸ Хъя Узу чиви гъашиган, Узу Галилейиз гъягъдиза ва ду-
шваша учвуз ккилигурни хъидиза.

²⁹ — Варидари хъугъвал алдабгъишра, узу алдабгъидарза! — кIу-
ру Петри.

³⁰ — Гъякъ кIуразавуз, — кIуру дугъаз Исаий, — гъи, гъаму йи-
шван, даттли къюб раЖари уъйир апIайиз, шубуб раЖари Узу
аъгъюр дарзуз, пицива.



³¹ Хъя Петри айибтIан артухъ гыссы кади текрап апIуру:
— Узуз Увухъди йикIуб алабхъуруушра, Уву «аыгъор дарзуз»
пидарза!
Имбударира гъамцдар гафар гъапнийи.

Исаин ккарагуб

³² Мидхъян дураг Гефсимания кIуру йишваз гъюру, ва Исаин
ученикариз кIуру:

— Узу ккарагури имиди гъамшвахъ деай.

³³ Дугъу Чахъди Петрна, Якъубна Югъан гъадагъуру. Дугъан
КIаън дердна гъалабулугъ абхъру. ³⁴ Исаин дурагиз кIуру:

— Йиз юкIв яман хажалатнаь абхънайиз, гъамшвахъ гъузай,
гъафил махъанай!

³⁵ Думу сацIиб тина гъудучIуру, жилиина къамкъарихъди ис
духъну, му аьзаб, эгер шулуш, Чахъан гъадапIбан бадали, ккара-
гуз хъюгъуру. ³⁶ Дугъу кIуйи:

— Авва! Адаш! Увхъян вари шулвухъан! Гъаму аьзабнаккан Узу
ккадай! Аммаки Узуз ккунибси дарибши, хъя — Увуз.

³⁷ Хъасин ученикарихъна гъафиган, лигуруш, дураг нивкIуз
душнади рякъюру. Дугъу Петриз кIуру:

— Симон, уву даахнана? Саб сяйтдикъан нивкI дарди гъузуз
гъабхъундарнухъан? ³⁸ Гъафил махъанай. Учву тямягъваларий ад-
рахъбан бадали ккарагай. Рюгъ кIубан ву, хъя беден — зяиф!

³⁹ Иса хъана гъудучIуру ва гъацдар гафариинди хъана ккара-
гуро. ⁴⁰ Къяляхъ гъафириз, дураг хъана даахну рякъюру. Дурагин
улар гъагъи духънайи. Дурагихъан Дугъаз саб жавабра тууз шу-
ладай.

⁴¹ Шубубпи ражарира Иса къяляхъ гъюру, Дугъу кIуру:

— Гъамусра даахну имичва, рягъятвал гъадабгъуранчва? Ики-
баштIан! Вахт хътубкъыну: магъя Инсаниятдин Бай гунагъкарин
хилиз туура. ⁴² Гъудужвай, гъачай гъягъюрхъя! Лигай, масу туура-
йир багахъ хъя.

Иса дисуб

⁴³ Дугъу гъамци кIайизра, ЙицIикъюрикан сар Ягъуда кказа-
гуро, ва дугъахъди аыхю маллиирина, къанунчиирина, аыхюдари
ханжларна маргъар хъади гъаънайи адмийирин гъварчра хъайи.



⁴⁴ Иса масу тувуз дуфнайи Ягъудайи дурализ гъамци дунайи: «Салам тувуган, узу шлиз мак гъапIиш, гъадму Иса ву, ари Гъадму дисай, ва дишка, дидисну, мюгъкам гъаравлиkkди гъайихай».

⁴⁵ Ягъуда диш дапIину Исаийхынди гъюру.

— Мялим! — кIуру дугъу, ва Исаиз мак апIуру.

⁴⁶ Гъадму сяльт Иса дисуру ва гъаравлиъ урхюру. ⁴⁷ Хъа багахъ дугъужвнайи сар ученикди ханжал уъчIюбгъну, аыхю маллайн гъаравшин иб ктабтIуру. ⁴⁸ Гъадмуган Исаий кIуру:

— Учву Уз’ин ханжларна маргъяр хъади алжагъуз Узу гъачагъ вуйин? ⁴⁹ Гъар йигъян Узу учвухъди, аygъовалар улупури, Аллагъдин хулаъ айза, ва учву Узу гъидисундайчва. Хъа гъит Гира-ми китабариъ дунайиси ибши!

⁵⁰ Гъадмуган Думу сарди гъитну, ученикар вари гъергну гъя-гъюру.

⁵¹ Исаин терефкрайхъди хъади гъахъи сар жигъил, гъяцI-ли жандиин ирин чарч илипну, Иса дидисну гъахурайдарин къяляхъди гъягъюру. Думу дурари дисуру, ⁵² амма думу, чарч дурарин хилиъ гъибтну, гъютIурччвну, гъяцIалди гъергну гъя-гъюру.

Иса аыхюдарин улихъ дерккуб

⁵³ Иса аыхю маллайрихъна гъахуру. Душвахъна аыхю малл-ийрна, агъсакъларна къанунчийр уч духнайи. ⁵⁴ Хъа Петр ярхла-ярхлади дурарин къяляхъди гъюру, аыхюну маллайн гъятдизди учIвну, гъаравшихъди учвра цIихъ мани апIуз деъру.

⁵⁵ Аыхю маллайрина вари дурарин мажлисди Исаиз ажгал адабтIбан бадали Дугъаз къаршу шагъидвалар агурайи. ⁵⁶ Гъеле кучIлин шагъидар гизаф удучIвнийишра, дурарин улупбар дюзди алахъурадай.

⁵⁷ Гъадмуган гъамцдар кучIлин шагъидвалар улупру касар дихъуру:

⁵⁸ — Ич ибариинди гъебхъунчуз, Мугъу: «Хилариинди гъапIу гъаму Аллагъдин хал дабгъурза ва шубуд йигъандин арайиъ, хи-лариинди дарди, жараб дивурза», — кIура.

⁵⁹ Гъеле гъаму улупбаркъана дурарин дюзди алахъдайи.



⁶⁰ Гъадмуган ахюну маллайи, къялазси дуфну, Исаийхъан гъерхру:

— Увуз къаршуди кІурайдариз гъаз жаваб туврадарва?

⁶¹ Амма Исаий, ккебехъну, жаваб туврадай.

Ахюну маллайи хъана Дугъхъан гъерхру:

— Уву Месигъ вуна, ВаритІанзаанурин Бай?

⁶² — Ав, вуза, — жаваб тувру Исаий. — Ва учвуз, вари Удукурурин арччул хилихъинди деъну, айршин дифариинди Инсаниятдин Бай гъюри рякъидичвуз.

⁶³ Ахюну маллайи, хъял кубчІвбаан чан ккурттар дячІяргъну, кІуру:

— Ихъ сарун шагъидар гъаз ву? ⁶⁴ Аллагъдикан рихшанд апІури учвузра гъеебхъунчвуз! Ичв къарап фициб хъибди?

— Таксиркар ву, ва аյжал адабтІну ккунду, — кІуйи варида.

⁶⁵ Дурарикан бязидари Дугъак туттир катІуйи, Дугъан маш илибкну, кІуллан йивуйи, хъа кІуйи:

— Эй, Пайгъамбар! Увуз шли гъивнуш, йип гъеле!

Петри Иса айгъюр дарзуз пуб

⁶⁶ Хъа гъадму вахтна Петр тинаси хъайи гъятдиъ айи. Дина ахюну маллайнин гъараваш дишагълийирикан сар гъюру. ⁶⁷ Дугъаз щихъ чаз мани апІурайи Петр рякъюру ва, дугъахъинди дикъатниинди дилигну, кІуру:

— Хъа увура хъайва гъаму Назаретжви Исаийхъди.

⁶⁸ Амма Петри кІул'ин бисдар:

— Узуз айгъюб фукІара адарзуз, узу гъаври адарза, уву фтикан кІураш. — Думу чIатинди улихъ гъятдизди удучІву. Гъадмуган даттли узув гъапІу.

⁶⁹ Гъараваш дишагълийиз думу душваъ дяркъну, душваъ айи адмийириз хъана кІуру:

— Гъаму гъаддариликан сар ву.

⁷⁰ Петри хъана кІул'ин бисдар. СацІиб хъугъужвну, гъятдиъ дугъужвнайидари Петриз кІуру:

— Хъа уву дугъриданра гъаддариликан вува. Уву Галилейиан вува, аххир.

⁷¹ Хъа Дугъу хуйир апІуйи:

— Учву кІурайи Кас узуз айгъюр дарзуз!



⁷² Гъадмуган кьюбпи ражнора даттли уъйир апIуру. Петрин, Исаи гъапи гъаму гафар, кIаин шулу: «Даттли кьюб ражари уъйир апIайиз, шубуб ражари Узу аygъюр дарзуз пидива». Ва ишуру.

Пилатди Исаийхъан силис гъадабгъуб

15¹ ГвачIинин ухди аыхю маллиир, агъсакълар, къанунчир ва вари заан диванханайин членар мажлисдиз уч шулу ва къарап адабгъуру. Иса, хилар йитIну, духну, Пилатдин хилиз тувру.

² Пилатди Дугъхъан гъерхру:

— Уву «жугъдарин Паччагъ» вуна?

— Увура гъаци кIурадарна, — пну, жаваб тувру Исаи.

³ Ахъону маллиири Дугъак гизаф тахсрар кирчуйи, ⁴ гъадмуган Пилатди Дугъхъан хъана гъерхру:

— Уву гъаз жаваб туврадарва! Лиг, Увук фукъан тахсрар кирчраш.

⁵ Амма Исаи дугъазра фукIа гъапундайи, хъа Пилат мид'ин гизаф мюгътал гъахънийи.

Пилатдин Иса азад апIуз дав чалишиши'валар

⁶ Халкъдин тIалабназ лигну, Пасхайн машкварган дураги ккун гъапIу сар дидиснайир деетру аьдат ади гъабхънийи. ⁷ Наразивалар ахънайиган, адми йивну гъачIи, гъалабулугъ гъитIибккдарихъди дидиснайи сар Варава кIурурра дустагъдиль айи.

⁸ Халкъди, Пилатдихъна дуфну, дугъкан муганайиз айи аьдат та-

мам апIуб ккун апIуру. ⁹ Пилатди дурагиз гъапи:

— Учвуз ккундуш «жугъдарин Паччагъ» деетуз?

¹⁰ Пилатдиз аыхю маллиири Иса бахилвалиан масу тувнайивалкан аygъайи.

¹¹ Хъа аыхю маллиири халкъ, Варава деетбан бадали, Пилатдикан тIалаб апIуз алауру.

¹² — Учву «жугъдарин Паччагъ» кIурайрикан гъапIза? — кIуру хъана Пилатди.

¹³ — Думу хацрак карс! — кIури, чIигъяр апIуру дураги.

¹⁴ — Фу чIуруб гъапIнухъа Мугъу? — кIуру дурагиз Пилатди.



Амма дураги имбусан артухъ чигъар апIуйи:

— Думу хачрак карс!

¹⁵ Халкъдиз учв ужур хъузди, Пилатди Варава деетуру, хъа Иса гъирмажарихъди урччувуз гъитну, хачрак карсуз эскрин хилиз тувру.

¹⁶ Гъаравлари Думу айтI гъяятдизди, паччагъдин тахт шлущвазди гъахуру ва эскрин дестейиз дих апIуру. ¹⁷ Дураги Дугъ-ин аку-элвен халат алабхъну, хъа кIул'ин зазарикан гъубху таж-сиб улубкIуру, ¹⁸ ва Думу «тебрик» апIуз хъюгъру: «Яшамиш иши „жугъдарин Паччагъ“!»

¹⁹ Хъасин Дугъан кIуллан маргъар йивуий, Дугъак тутайир катIуйи ва, Дугъан улихъ къамкъарихъди дусну, хътIерццури, икрам апIуйи. ²⁰ Чпиз ккунибкъан Исаикан рихшанд дапIну, Дугъхъан халат хътибуру ва хачрак карсуз гъахуру.

Хачриин Исаин азабар

²¹ Думу дариз зигуз гъахуру. Сар багхъантина гъягъюрайирихъди (Думу гъул'ан гъюрайи Александринна Рауфдин адаш, Киринейя кIурушв'ан вуйи Симон вуйи) Дугъан хач гъабхуз гъитру. ²² Думу Голгофа кIурушвахъна хуру (илтIибкIиган, душван ччвур «Келле» кIуру гаф ву). ²³ Дугъаз фикрихъан хътаьру дармнар кайи чяхир убхъуз теклиф апIуйи, хъа Дугъу гъубхундайи. ²⁴ Думу хачрак карсру. Эскри, чпиз гъардиз фунуб алабхъуруш, Дугъан палтар пай апIури, тупут ипру.

²⁵ Иса дариз зигурайиган, гвачIин сяльт урчIув вуйи. ²⁶ «Жугъдарин Паччагъ» ву кIури тахсир кипну, гъамци дикикIнайи куул Дугъан кIулихъ кибхнайи. ²⁷ Дугъахъди сатIиди кьюр гъячагъра дариз гъизигнийи: Дугъхъан сар — арчул, тмунур — гагул терефназди. [28]*

²⁹ Душвхъантина гъудучIвну гъягърудари Дугъаз люкънар апIуйи, намуссуз кIуруганси кIулар турччуий ва кIуйи:

— Эй Аллагъдин хал дабгъур ва шубуд йигъан диврур! ³⁰ Уву Жвуу Жвуу уърх, кудучIв хачракан! — ³¹ гъамци зивзивар кЧИ-къуйи Дугъкан къанунчийирра хъади аъхю маллиири.

* ^{15:28} Грекарин саспи БикIбариъ гъамци кIура: «Гъамци Гирами бикIбариъ дикикIнайиб тамам гъабхънийи: „Думу гъячагъарин арайиъ дерккнийи“».



— Жарадар уърхюйи, — кIуйи дураги, — хъа Чахъан Учв уърхюз шуладар! ³²Месигъ, Израилин Паччагъ! Ич уларикк, гыйт, учуз рякъюри, хачракан кудучIври — гъадмуган учу Дугъахъ хъугъдича!

Гъеле Дугъахъди сатIиди дариз дизигнайдарра кмиди Дугъак кялхьюйи.

Исайин аъжал

³³Лисхъантина тап сяльт шуббариэкъан вари дюн'яйин мучушин алабхъуру. ³⁴Хъа сяльт шубубди Исайи аъхю дихниинди гъарай апIуру:

— Элахи, Элахи, лама шевактани? (яна «Йиз Аллагъ, Йиз Аллагъ! Гъаз Узу Гъитунва?»)

³⁵Душван багахъ дийигънайдарикан бязидари, Дугъан гафар гъеерхъиган, кIуйи:

— Ебхурайчвуз, Ил'ясдиз дих апIура!

³⁶Хъа сар кас, жаргъну дуфну, бамбагсибдиз сирке зигуз гъитну, маргълик кибIину, Дугъаз убхъуз туври, кIуру:

— Гъамус лигухъа, Му ктагъуз Ил'яс гъюруш — гъюрдарш.

³⁷Исайи, чIветI дапIину, рюгъ деебтуру.

³⁸Аллагъдин хулаъ, Гирамишвахъ гъибхнайи чарч зильансина кIаназкъан кьюб иишв'ина чIябгъору. ³⁹Хачран багахъ дийигънайи юзбашийиз, Исайилан фици ил алдабгънуш, рябкъюру ва кIуру:

— Дугъриданна Му Кас Аллагъдин Бай вуйи.

⁴⁰Душвахъ, ярхлаан лигури, сакъюдар дишагълийирра хъайи. Дурарин арайиъ Магдалайиан вуйи Мар'ям, бицIирнур Якъубдинна Юсийин дада Мар'ям ва Саломея айи. ⁴¹Иса Галилейиъ айиган, мурап Гъадгъахъди ва Гъадгъан гъайгъушнаш шуйи. Дугъахъди Ерусалимдиз гъафи хъана жара дишагълийирра мушвахъ хъайи.

Исайин беден накъвдиз ивуб

⁴²Сарун хябяхъ шулайи. Хъа му йигъ, султ йигъан улихъ хым-бу жвуми йигъ вуди хъпаз дилигну, ⁴³жугъдарин заан диванханайиъ къувват айи, гъацира Аллагъдин Паччагълугъдиз ккилигурайи Аримафейиан вуйи Юсуфди, кIубанвал кади Пилатдихъна



дуфну, Исаин беден чан ихтиярназ тIалаб апIуру. ⁴⁴Думу гъам-къан ухди йикIбиин Пилат мюгътал духьнайи ва, юзбашийиз дих дапIну, Иса ухди дукIнаш, гъерхру. ⁴⁵Юзбашийикан гъаци вуйиб альгю дапIну, дугъу Юсуфдиз дубкIнайи беден гъадабгъуз ихтияр тувру. ⁴⁶Дугъу кафан гъадабгъуну, беден кадабгъуну, дид-гъян гъибиржуру ва гъарзарын утIубкнайи накъвдиль ивну, дувват учIврушвахъ гъван гъипру.

⁴⁷Хъа Магдалайиан вуйи Мар'ямна Юсийин дада Мар'ям, Думу наан кивраш, лигурайи.

*Ученикариз Иса чIиви хъуб
альгю шулу*

16 ¹Султ йигъ улдукъиган, Магдалайиан вуйи Якъубдин дада Мар'яди ва Саломеяйи Исаин бедендикан ктатуз ищи ний хъайи ччимар гъадагъуру. ²Гъяфтайн садпи йигъан, яна элгъетган, гвачIнин ухди, ригъдин сабпи нурахъди, дураг накъвдихъна гъюру.

³ – Ухъуз накъвдихъан гъван шли гъадабгъиди, – кIуйи чиб-чпиз дураги, гъаз гъапиш душвахъ гъипнайи гъван гизаф альгю вуйи.

⁴Лигуруш, гъван гъидипна.

⁵ Накъвдиль учIвдари, арчул терефнаъ лизи палтар алди десь-найи жигъил рякъюру ва сабпну гучI шулу.

⁶ – ГучI мапIанай! – кIуру дугъу дараriz. – Дариз гъизигу Назаретдиан вуйи Иса учву агурачва. Думу чIиви гъахъну, мушваъ имдар. Магъа Думу дитну гъахъи йишвра. ⁷Сарун учву гъарахай, Дугъан ученикариз, иллагъки Петриз, Думу Галилейиъ дурагиз ккилигур, йипай.

⁸ Дураг, накъвдиан удучIвдар, гучIбаан гъергну гъягъюру. Дураги гъич саризра фукIара гъапундайи – дурагиз гучIуйи.

*Сакъюдар ученикариз
Иса рякъюру*

⁹ Гъяфтайн садпи йигъан гвачIнгган чIиви гъахъи Иса сиф-те чаан ургуб жин утIукку Магдалайиан вуйи Мар'ядиз ачмиш шулу. ¹⁰Дугъу мидкан гъам зигурайи ва ишурайи ученикариз хабар дебккру. ¹¹Хъа дураг Думу чIиви духьнайивалихъ, му дишагълийи чаз гъяркъюнзуз гъапнушра, хъугъундайи. ¹²Мидхъан



Думу жара суратнаъди дурарикан кьюриз, чпи шагъриан удуб-Чвурайи рякъюь айиган, ачмиш гъахънийи. ¹³ Дураг къяляхъ хътакнийи ва мидкан имбударизра хабар дебккийи. Амма дураг мурарихъра хъугъундайи.

*Исайи вакиларихъди
гафар апIуб*

¹⁴ Аххирки, йицIисар ученик суфрайихъ деъну уъл ипIурайиган, Иса Учв ачмиш шулу ва, кIван курвализ ва хътругъувализ дилигну, Дугъу дурагиз тягъна йивуру, гъаз гъапиш дураг Думу Чиви духъну гъяркъдариҳъ хъугъундайи. ¹⁵ Дугъу дурагиз кIуру:

— Вари дюн'я вуйиси гъаракай ва Ужувлан хабар вари инсаннитетдиз дебккай. ¹⁶ Шли, хъугъну, штуан апIувал къабул гъаш-Пиш, думу женнетдиз ахъди, хъа фуж хътругъиш, думу же-гъеннемдиз итди. ¹⁷ Хъугъдариҳъан айламатар улупуз хъибди: дурагиҳъан Йиз ччурниинди жинар угIурккуз хъиди, цИийи Чаларииинди кIури хъиди. ¹⁸ Эгер битI гъибисиш, ясана агъу гъубхъиш, дурагиз саб зарарра хъибдар; иццрударииин хилар иливиди — ва дураг сагъ хъиди.

¹⁹ Гъамци дупну, Агъа Иса завариз за шулу ва Аллагъдин ар-ччулну хилихъ деъбу. ²⁰ Хъа дураг гъягъюру ва варишвариъ Ужувлан хабар рабгъуру. Дурагин му ляхниз Агъайи кюмек апIуру, ва дураги улупру айгъовалар айжайиб лишнариинди мюгъкам шуий.



ЛУКАЙИ КТИБТУ УЖУВЛАН ХАБАР

Му Ужувлан хабар Лукайи 58-62-ни йисари гъибик¹уб вуди гъисаб апIура. Лукайн кеспи духтирвал вуди гъабхъну. Жара миллетарикан вуди, Исаихъ хъугъу Лука, Аллагъдин рякъюъ вари къувват хъину лихуз хъюгъру. Ужувлан хабар рабгъури, Рим вилаят вуйибси лицури гъахъи Павелихъди сасиган Лукара лицури шулу. Дугъан хиларилан, кIава Аллагъдин Рюгъ ади, «Ужувлан хабар» кIуру му китаб, зигъимлу грекжеви, Фиофилин ччвур дубисну улдубч²уб вуди урхури шулухъа. Гирами Рюгъну дугъаз, дугъридан Иса Фуж вуш, Дугъу инсаният бадали фу гъапIнуш, улунту. Китабдин сифте кIулариан хъюгъну, Ягъ'я пайгъамбрихъди ва Иса Месигъ бабкан хъпахъди аялакъалу гъядисийрикан ктибтура. Му китабди жара «Ужувлан хабарнан» китабарий алалахъру уымрин гизаф терефарикан ктибтура, гъадму вахтнан гъядисийрихъди вуйи аялакъир улупура. Гъадму вари гъядисийрикан вуйи хабар неинки Исаин багахъ хъайидариз, хба дюн'яйин вари инсанариз дебккра.

Лукайн Феофилихъна вуйи гаф

1 ¹Ич арайиъ гъаши мямум вуйи гъядисийрин гъякъанаан гъамус гизафдари бикIуз хъюгъна. ²Учузра дураг сифте кIулиан чпин уларииинди гъяркъдари ва Аллагъдин Гафнан гъуллугъ-ниин алидари гизафдар ктитну. ³Узура, гъарсаб жигъат дикъат-ниинди сифтейиан аыхиризкъан ахтармиш апIбалан къляхъ,



гъамрарикан увуз, гъюрматлу Феофил, хъайи-хъайиси дибик^I-ну, ктибтуб лазим вуди фикир гъапIунза. ⁴Миди увуз туву альгьюваларин бин мюгъкам апIиди.

*Малайикди Закар'яиз
Ягъ'я бабкан хъубкан тууву хабар*

⁵ Ягъудия уълкейин паччагъ Гыироддин деврий душваъ Абия-иирин «ражнаъ» гъуллугъ гъабхурайи Закар'я кIуру сар малла ва Гъарундин тухмиан вуйи Елисавета кIуру дугъан хпир ади гъахьну. ⁶Дурагъ кьюридра, Аллагъдин вари табшуругъар ва къайдийр уърхюри, Дугъан улихъ дугъри агълар вуди гъахьну. ⁷Дурагиз веледар адайи, гъаз гъапиш Елисавета бегъерсузур вуйи. Дурагъ кьюридра агъли яшнахъна хъуркънайи.

⁸ Сабан, Закар'яи Аллагъдиз чан гъуллугъ апIурайи вахтна (дугъаҳди хъайи маллиирина раж, яна гъуллугънан нубат хъубкънайи), ⁹ маллиирина арайиъ, айдат вуйиганси, тупут ипиган, думу Аллагъдин хулаъ ицци ниъ хъайидар ургуз гъягъбакк ккуркъни-и. ¹⁰Хъа Аллагъдин хулан гъятдиль халкъ му вахтна ккарагура-и. ¹¹Гъадмуган Закар'яиз ицци ниъ хъайидар ургурайишван арчул терефнаъ Аллагъдин малайик дийигъну рякъюру. ¹²Думу гъяркъган, Закар'я чашмиш шулу ва дугъак яманди гучI кабхъ-ру. ¹³Малайикди дугъаз гъамци кIуру:

— ГучI мапIан, Закар'я, яв ккарагувал деебхъна, ва яв хпир Елисаветайи увуз бай апIиди, дугъ'ин Ягъ'я кIуру ччвур илив. ¹⁴Увуз хуш'вална шадвал хъибди, ва гизафдар думу бабкан хъувалиин шад хъиди, ¹⁵фицики думу Аллагъдин улихъ, зурба касси, заан хъиди. Дугъу чяхир вая жара ички убхъидар. Думу чав бабкан гъахы йигъхъанмина Аллагъдин Рюгънахъди ацIнайир хъиди. ¹⁶Дугъу Израилин баярикан гизафдар Аллагъдихъинди илтIикIиди. ¹⁷Абийирина юкIвар веледарихъна илдицбан бадали, мютIюгъ дарудар марцци касарин фикририхъна илтIикIбан бадали ва Агъа гъайиз халкъ гъазур апIбан бадали, думу Дугъан улихъди Ил'ясдин рюгънаъди ва къудратнаъди гъягъюри хъиди.

¹⁸ Закар'яи Малайикдиз кIуру:

— Му гъякъ вуйиб узуз фици агъю хъибди, узу къабир вуза, хъа йиз хпирра агъли яшарий а?

¹⁹ Малайикди дугъаз гъапи:



— Узу Аллагъдин улихъ дийигънайи ва увухъна ужуб хабар тувуз гъаънайи Жабраил вуза. ²⁰ Амма гъадму ляхин кIулиз удубчIвру йигъ гъяйиз, яв чIал бисиди ва увуз улхуз мумкинвал хъибдар. Гъаз гъапиш чарасуз кIулиз удучIвру му йиз гафарихъ хъугъундарва.

²¹ Му арайиъ чIат Закар'яйиз ккилигурайи халкъ думу Аллагъдин хулаъ энгел духьнайивалиин мюгъталди айи. ²² Думу халкъдихъна удучIвиган, улхуз даршули гъузру ва дурагиз, Закар'яйиз Аллагъдин хулаъ Малайик гъяркъюб, аygъю шулу. Закар'яра, лал гъаширси, халкъдихъди хилин ишаратариинди улхуз хъюгъру. ²³ Хъя Аллагъдин хулаъ гъуллугъ апIбан йигъар ккудукиган, Закар'я чан хулаъ хътакуру.

²⁴ Гъадму йигъарилан къяляхъ дугъан шив Елисавета, гъагъдиль духьну, хъуб вазлин арайиъ чIатна удудчIвди, учв улупури гъахъундар. Дугъу гъамци кIуйи:

²⁵ — Гъаму йигъари узухъинди илдицу Аллагъди инсанарин арайиъ уз'ин или бегъерсузвалин нянат алдабгърганси гъапIну.

*Малайикди Мар'ямдиз
Иса бабкан хъуваликан туву хабар*

²⁶ Хъя йирхъубпи ваз улубкъиган, Аллагъди Галилей уълке-ийи айи Назарет кIуру шагъриз ²⁷ Давудрин тухмиан вуйи Юсуф кIуру касдиз хъирснайи шурахъна Жабраил малайик гъаъру. Шуран ччвур Мар'ям вуйи. ²⁸ Малайикди, риш айи хулаъ учIвну, гъапну:

— Хайир ибшри, Аллагъди кадагънайи Дишагъли! Аллагъ гъар-ган увухъди хъади хъиди!

²⁹ Думу гъяркъиган, Мар'ям дугъан гафариин мюгътал шулу ва, учв мици саламламиш апIувал фу вуйкIан кIури, фикратик каҳхру.

³⁰ Хъя малайикди дугъаз гъапну:

— ГучI мапIан, Мар'ям, Аллагъди увуз уж'вал улупна: ³¹ магъа БицIир киршдивук ва Бай апIидива. Дугъ'ин Иса кIуру ччвур иливидива. ³² Думу зурба Кас хъиди, ва Дугъаз ВаритIанзаануриин Бай пиди. Агъа Аллагъди Дугъаз Чан аба Давудрин паччагъвалин тахт тувди. ³³ Дугъу Якъубдин халкъдииин уъмурлугъди паччагъвал апIиди, ва Дугъан паччагъвалин аххир хъибдар.



³⁴ Мар'ямди малайикдиз кIуру:

— Му ляхин хъуб фици мумкин вухъа, узу мегъел шувуз душнадарди?

³⁵ Малайикди Дугъаз гъапи:

— Аллагъдин Рюгъ учIви уувъ ва ВаритIанзаанури уув Чан куувватнакк ккаъди, гъаддиз бабкан шулайи Гирамийиз Аллагъдин Бай пиdi. ³⁶ Магъа чаз бегъерсузур кIурайи яв багахълу Ели-саветара чан къабишнаккди, бицIир кади гъагъдис ади, йирхъубпи ваз ву, ³⁷ гъаз гъапиш Аллагъдин гъич саб гафра куувватсузди гъубзурдар.

³⁸ Мар'ямди:

— Узу Аллагъдин лукI вуза, уз'ин уув кIурайидар улуркъри, — кIуру.

Хъа малайик Дугъхъан гъудучIвуру.

Мар'ядинна Елисаветайн сюгъбат

³⁹ Гъадму йигъарикан сад йигъян Мар'ям, гъялаквал кади, Ягъудия уълкейин дагълариъ айи саб шагъриз гъягъюру ⁴⁰ ва, Закар'яйин хулац учIвну, Елисаветайиз салам тувру. ⁴¹ Мар'ядин салам гъеебхъиган, Елисаветайн фуниъ бицIир гъиришву ва Елисавета Аллагъдин Рюгънахъди ацIру. ⁴² Елисаветайи, зарбди чIигъ дапIну, гъапну:

— Уув дишагълийирин арайиъ бахтавар вува, ва яв фуниъ айи бегъерра бахтавар ву! ⁴³ Узухъна йиз Агъайин дада гъовалин бахт узуз наънан гъафиб вуйкIан? ⁴⁴ Яв салам туврайи сес йиз ибарихъна гъурубкъубси, йиз фуниъ айи бицIир шадди гъялак гъахъну. ⁴⁵ Аллагъдихъан дунайиб тамам шувалихъ хъугънайир, хуш бахтавар вува.

⁴⁶ Мар'яди гъамци жаваб тувру:

— Узу йиз кIваан Агъа заан апIураза.

⁴⁷ Йиз рюгъ узу гъарсадихъан урхюрайи Аллагъдикан шад дуихъна.

⁴⁸ Дугъу чан лукIран айкуз гъялназ лигну рягым гъапIну, гъамусдихъантина вари наслари узуз уж'вал алабхъу кас пиdi,

⁴⁹ Гъаз гъапиш Къувватлури узуз зурба ляхин гъапIну, ва Дугъан ччвур гирами ву.



- 50 Чахъан гучIрудариз наслариан насларииз Дугъан уж'вал а.
 51 Дугъу, Чан хиларин къувват улупури, кIваь дамагълу
 фикрап айидар гъубкъушвахъинди гъарагъну.
 52 Къудратлудар тахтарилан илдитну ва аьжузар заан гъапIну.
 53 Дарвал айидар ужувлариинди рази гъапIну,
 хъа девлетлутIан девлетлу шулайидар
 фукIа адарди деетну.
- 54-55 Чан гъуллугъниин али Израилин халкъдиз кюмек гъапIну,
 Чав ихь абийириз гъапиганси, Ибрагымдиз ва дугъан
 тухмиз гъаргандиз уж'вал апIуз тувнайи гаф кIваин
 уьбхюра.
- 56 Мар'ям Елисаветайихъ шубуб вазлиъкъан гъузну, хъа чан ху-
 лаз хътакуру.

Ягъ'я бабкан хъуб

- 57 Елисаветайи, вахт улубкъиган, бицIир апIуру. 58 Агъайи ря-
 гъим дапIну думу за апIбакан гъуншйиризна майил-мадатдиз
 гъеебхънийи ва дураг дугъахъди сабси шад гъахънийи.
 59 Миржидпи йигъан багахълуйир бицIирин суннат апIуз
 гъюру ва дугъ'ин чан адашдин ччвур Закар'я иливуз ккун шу-
 лу. 60 Мид'ин балин дада рази даршиди, дугъаз Ягъ'я кIурхъа,
 гъапну.

61 Хъа дугъаз: «Яв багахълуйиригъ дициб ччвур алир фужкIа
 гъядар», кIуру. 62 Хъасин, бал'ин фициб ччвур иливуруш, хилин
 ишаратариинди Закар'яихъан гъерхру.

63 Дугъу, чахъна чан къул хуз гъитну, дидик гъамци бикIуру:
 «Дугъан ччвур Ягъ'я хъибди». Хъа вари мюгътал шулу. 64 Гъадму
 саяльт дугъан ушвна мелз деебтнийи ва думу, Аллагъдин ад апIу-
 ри, улхуз хъюгъру. 65 Дуарин гъуншйир-мировасарик гучI кабхъру
 ва вари гъамрарикан бютюн дагълу Ягъудия уьлке вуйибси ктиб-
 тури гъахъну. 66 Мидкан гъеебхъдари, мураг чпин кIваь уьрхюри,
 гъамци кIури гъахъну:

— Аллагъдин хил али му балкан фуж шуйкIан?

Закар'яин чан балихъна вуйи гаф

67 Хъа балин адаш Закар'яира, Аллагъдин Рюгънахъди ацI-
 нади, гъамци кIури, чан аьяндарвал улупуру:



- 68 — Израилин Аллагъ вуйи Агъайиз чухсагъул!
Дугъу, кюмекназ дуфну, Чан халкъ азад гъапIну.
- 69-70 Дегъзаманайи гъахъи марцци пайгъамбрарин мелзналан
мялум гъапIубси, Дугъу Чан лукI вуйи Давудрин
тухмиан Къурдатлур — ухъу гунгъарикан азад
АпIур — адаьну.
- 71 Дугъу ухъу вари ихъ душмнарихъан ва ухъу даккнидарихъан
уърхюз гаф тувну.
- 72 Дугъу ихъ абириз уж'вал апIуз ва дурарихъди гъийитIу
гирами вуйи йикъар тамам апIуз гаф тувну.
- 73 Му йикъар Аллагъди ихъ ахю аба Ибрагимдиз ухъу
душмнарихъан уърхюз туву альгът ву:
- 74-75 Дурари ухъуз, гучI дарди, ихъ уъмрин кIулиан аъхиризкъан
Дугъан улихъ марцциди ва гъякъди гъуллугъ апIуз
гъитди.
- 76 Хъа увуз, йиз бай, ВаритIанзаанурин пайгъамбар пиdi,
гъаз гъапиш уву Агъайн улихъди Дугъаз рякъяр
ккабалгуз, ⁷⁷ Дугъу халкъ уърхрувалин ва инсанарин
гунгъарилан хил алдабгърувалин гъякънаан халкъ
гъаврикк ккауз,
- 78 Аллагъдин зурба уж'вал ахсрарин Нурси ухъ'ина дуфну,
- 79 Мучушнаъ ва аъжалин гъабгъу дяхъникк дэньнайдариз
акв тувуз, ихъ рякъяр мясяльтнина хуз, гъидива.
- ⁸⁰ БицIи Ягъ'я, ахю шули, рюгъниинди мюгъкам хъуз хъюгъ-
ру. Думу, Израилин халкъдиз гъуллугъ апIуз гъайизкъан, ичИи
чюллериъ яшамиш шулу.

Иса бабкан хъуб

2 ¹Думу йигъари Август кIуру Римдин паччагъдин чан вари
ругариин али агъалайир гъисаб апIуз амур удубчIуру. ² Му
Сирия вилаятдиз Квиринийи паччагъвал апIурайи девриъ сабпи
ражну гъабхурайи ляхин вуйи. ³ Гъаддиз вари, чпи дикIбан бада-
ли, гъарур чан шагъриз гъушнийи.

⁴ Галилей уълкейиъ айи Назарет шагъриан Ягъудия уълке-
йиъ айи Давуд бабкан гъахъи Вифлеем кIуру шагъриз Юсуфа
гъягъюру, фицики думу Давудгъярин тухмиан вуйи. ⁵ Думу чаз
хъирснайи ва гъагъдиз айи Мар'ямдихъди чпи дикIуз душнайир



вуйи. ⁶Дураг душваъ айиган, Мар'ямдин бицИир шлу вахт улуб-кьюру, ⁷ва дугъу чан сарпи велед – Бай апIуру. Думу ччаппари-гъян гъидиржну, аыхъиъ айи тIунаъ дитру, гъаз гъапиш дурагиз хялар дергрю хуларий иишв адигъибихъундайи.

*Малайикари марччлихънариз,
Иса бабкан гъахыну, кIури, хабар дебккуб*

⁸Гъадму уълкейиъ иишвнү чюлиъ марччлихънар чин сюрий-рин гъаравлиъ айи. ⁹Сабпну дурагин улихъна Агъайин малайик гъафнийи. Агъайин гъайбатнан нурну дураг варишварихъанди аку гъапIнийи, ва дурагик гучI кабхънийи.

¹⁰Малайикди дурагиз кIуру:

– ГучI мапIанай, узу учвуз вари халкъ шад апIру ужуб хабар дубхназа: ¹¹гъи Давудрин шагъриъ учву гунгъариккан азад АпI-тур, Агъя Месигъ, бабкан гъахыну. ¹²Магъя учвуз мидин лишанра: учвуз, ччаппаригъ гъидиржнади, тIунаъ БицИир дихъи-дичвуз.

¹³Ва сабпну му малайикдин къяляхъди гизаф къадарнаъди жара малаикарра гъюру ва дураги, Аллагъдин ад апIури, гъам-ци кIуру:

¹⁴– Аършариин али Аллагъдин ад за ибши, жилиин Аллагъ-диз разивал хурайи инсанарин арайиъ ислягъвал ибши!

¹⁵Малайикар дурагихъан завариз удучIвиган, марччлихънари чиб-чилиз гъамци кIуру:

– Вифлеемдиз душну, душваъ фу гъабхънуш, Агъайи ухъуз фтин гъякънаан хабар дебкнуш, лигухъя.

¹⁶Тядивал кади гъафидариз Мар'ямна Юсуф ва тIунахъ хъайи БицИир рякъюру. ¹⁷Дураг гъяркъиган, марччлихънари му БицИи-рин гъякънаан чипиз малайикди гъапибикан ктибтуру.

¹⁸Мидкан гъеебхъкъандар вари марччлихънари ктитдариин мюгътал шулу. ¹⁹Хъя Мар'ямди му вари гафар, саб-сабдииин иливури, чан кIваш уърхюру.

²⁰Марччлихънара, чипиз малайикди гъапидар, чин улариз рякъбаз лигну, Аллагъ адлу апIури ва Дугъан тярифар апIури, къяляхъ хътакуру.



Иса Аллагъдиз бахш апIуб

²¹ Миржид йигълан БицIирин суннат апIру вахт улубъиган, Дугъ'ин, Учв бабак киршайиз малайикди улупу, гъадму Иса кIуру ччур иливуру.

²² Хъа, Мусайин къанундиз лигну, суннат марцц хъпан йигъар тамам гъашиган, Думу Агъайн улихъ дерккбан бадали, Ерусалимдиз хуру. ²³ Агъайн Къанундиз улупнайиганси, «гъарсаб хизандиь сарпи жили бай Агъайиз бахш апIуб лазим вуйи». ²⁴ Ва, гъадму Къанундиз дикикIнайиганси, «кьюб гъюд вая луфран чиркквар, гъурбан дапIну, урккуб лазим вуйи».

Симеон ва Анна

²⁵ Думу деврин Ерусалимдиз Симеон кIуру сар кас айи. Думу Израилиз Аллагъдихъан кюмек рубкъайиз ккилигурайи дугъри ва аьдалатлу адми вуйи. Дугъ'ин Аллагъдин Рюгъ алийи. ²⁶ Дугъаз Аллагъдин Рюгъну, Агъайи кадагънайи Месигъ чаз рякъайиз, аьжал хъибдарив пну, улупнайи. ²⁷ Симеон Аллагъдин Рюгънаккди Аллагъдин хулаз гъюру. Абийр-бабари БицIи Иса Къанундиз улупнайиб апIуз гъахиган, ²⁸ Симеонди, Иса хилариина гъадагъуру ва, Аллагъдин ад дапIну, кIуру:

²⁹ – Я Гъюкумдар! Уву гъапиганси, гъамус узу, Яв лукI,
разивалиинди деет, ³⁰⁻³² сарун, магъа вари халкъарин
улихъ Уву улупу, учу завалариккан урхюз дуфнайи
Месигъ Вуйир, аллагъсузар зигъимдихъна гъахру нур
Вуйир ва Яв Израилин халкъдин адлувал Вуйир йиз
улариз гъяркънис.

³³ Юсуфна Мар'ям БицIи Исаикан гъапидариин мюгътал шулу. ³⁴ Симеонди, дурагиз уж'вал ккун дапIну, Мар'ямдиз гъамци кIуру:

– Гъаму яв Бай Израили гизафдар асккан хъпан, гъам заан хъпан себеб хъиди. Мугълантина гизаф улхбар хъиди. ³⁵ Яв кIавантина яракъ итПибгъиди ва гъаддинди ахючIвеъ юкIвариъ айи ниятар ачухъ хъиди.

³⁶ Мушваъ гъацира Ашерин тухмиан вуйи, гизаф къаби яшнаъ айи, чан жилирихъди ургуд йисантIан яшамиш дарши, Фанулин риш аьяндар Аннара айи. ³⁷ Думу, миржцIурна юкъуд йисаъ



айи ачIни гъари, йигъ-ийишвди ушвар дисбииндина ккарагбиин-ди Аллагъдиз гъуллугъ апIури, Аллагъдин хулхъан гъудудучIви шуйи. ³⁸ Аннайи, гъадму вахтна душвахъна дуфну, Аллагъ адлу апIури, Ерусалим азад хувализ ккилигурайкъандариз вардариз Исаин гъякънаан кти тури гъахъну.

³⁹ Вари ляхнар Агъайн Къанундиз улупнайиси ккудуКИган, Юсуфна Мар'ям Галилей уълкейиъ айи чпин Назарет шагъриз хътакуру. ⁴⁰ Хъа БицIир аъхю шули, мюгъкам шули, аygъювалари ацIри, Дугъ'ин Аллагъдин уж'вал алди гъабхъну.

**«Узу йиз Адашдин ужагъдиз
духъну ккун»**

⁴¹ Исаин абийр-бабар гъар йисан Ерусалимдиз Пасхайн маш-квраз гъягъюри шуйи. ⁴² Исаин йицIикьюд йис тамам гъаб-шиган, дураг, чпин аьдат вуйиганси, Ерусалимдиз гъадму маш-квраз гъафну. ⁴³ Машквран йигъар ккудуКИну, къляхъ хътакру вахтна, живан Иса Ерусалимдиз гъузру. Амма абийр-бабариз мидкан аygъяди гъабхъундар. ⁴⁴ Дураги, Иса жарадарихъди гю-рашул кIури, фикир апIуру. Хъа сад йигъандин рякъ ккадапIи-ган, дураги багахълуйири ин ва таниш вуйидарин арайиъ Иса агуз хъюгъру. ⁴⁵ Хъа чпиз Иса дидрихъиган, Дугъахъ лицури Ерусалимдиз хътакуру. ⁴⁶ Шубуд йигълан Думу, Аллагъдин хулаъ мялимарин арайиъ дэньну, дураги хъпехъури ин ва дураги суалар туври рякъюру. ⁴⁷ Исаихъ хъпехъурайидар вари Дугъан фагъумлавалиин ин ва Дугъан жавабариин мюгътал духънайи. ⁴⁸ Душваъ Иса гъяркъиган, абийр-бабар мюгътал гъахъи. Дада-ий Дугъаз гъапну:

— Я жан Бай! Уву учкан гъапIунва? Магъа узуна Яв адашди зурба хажалат кади Уву агури гъахъунча.

⁴⁹ Исаий дураги гъапи:

— Узу гъаз агури гъахъунчва? Мегер учвуз узу йиз Адашдин ужагъдиз духъну ккуниб аygъданчвуз?

⁵⁰ Амма дураг Дугъу гъапи гафарин гъаври ахъундайи.

⁵¹ Хъа Иса дураги хъди Назаретдиз гъюру ин мютIюгъ шулу. Ду-гъан дадайи вари гъаму ляхнар чан кIваъ уърхюри шуйи. ⁵² Иса гъам фагъумлавалиъ, гъам яшнаъ улихъна гъягъюри гъахъну. Думу Аллагъдизра, инсанариизра ккунди гъузру.



Ягъ'яйи инсанар штуан апIуб

3 ¹Тиберий кIуру Римдин паччагыдьи паччагъвал апIури ии-цIихъудпи йис вуйиган, Ягъудия улкейиь Понтий Пилатди аыхювал апIурайи деврий, Гирод – Галилей улкейин, дугъан чве Филип – Итурей улкейинна Трагъонит юрданан, хъа Лисаний – Абилей улкейин гьюкумдрап вуйиган, ² Гъаннай ва Каяфа аыхюну маллиир вуди гъахъну. Гъадму йисан ичИи чюлий айи Закар'яйин бай Ягъ'яиз завариан Аллагъдин дих гъабхъний. ³ Гъаму дихнахъди Ягъ'яи, вари Ярдан нирин гъирагъар вуйиси лицури, гъар касди чан тахсрар гардандиь дисбан, инсанар штуан апIбан ва гъамци чпин гунгъарилан хил алдабгъбан бадали, аygъювалар рагъури гъахъну. ⁴Му Ишая пайгъамбрин китабдиъ дидикIну айиси гъабхъну:

– ИчИи чюлий дих атабгура: «Агъайин рякъ ккабалгай, Дугъаз рякъяр-жилгъийир диш апIинай. ⁵Гъарсаб гъяр ругди гъяб-цIиди, гъарсаб дагъна тепе – ис, къяни иишвар – дюз, дюз дару рякъяр цIалцIам хъиди. ⁶Гъарсар жан алириз Аллагъди Чав гунгъариккан азад апIувал рябкъиди».

⁷Чахъна штуан апIуз гъафи халкъдиз Ягъ'яи кIуйи:

– БитIракан гъахъидар! Гъоз ккайи Аллагъдин хъюлхъан гъер-гуз шли улупунчвуз? ⁸Учву, ичв гунгъар гардандиь дидисну, уьмур дигиши апIуз слуси, ичв ляхнариинди улупай ва, «Ич аба Ибрагым ву» кIури, фикиръана мапIанай, гъаз гъапиш учвуз кIуразаки, Аллагъдихъан гъаму гъванариканра Ибрагым-диз веледар ктауз шулу. ⁹Гъарин қаблихъ магъа екIв гъязурди хъа: гъяни иимиш туври адру гъарсаб гъар алдабтIиди ва цIигъна гатIабхъиди.

¹⁰Хъа халкъди дугъхъан гъерхру:

– Хъа учу гъапIну ккунду?

¹¹Ягъ'яи кIуру:

– Кьюб гъат палат айири, сабнуб адруриз туври; шлиз ипI-руб-убхъруб аш, гъадгъура гъаци пай апIри.

¹²Налук уч апIрударира, чпи штуан апIбан бадали дуфну, дугъаз: «Я мялим! Учу гъапIча?» – кIури, гъерхру.

¹³Ягъ'яи дураризра жаваб туву:

– Учвуз улупнайибIан артухъ нарлук мибисанай.



¹⁴ Эскрарира дугъхъан гъерхру:

– Учу гъапІну ккуунду?

Хъа дугъу дурагизра кІуру:

– Сар касдизъян гиран макадапІанай, футна мапІанай ва ичв дуллугъниин рази йихъай.

¹⁵ Халкъ Месигъдиз ккилигуради, вардари: «Гъаяман, му Ягъ’я Месигъ даришри гъа?» – кІури, фикир апІурайиган, ¹⁶ Ягъ’яйи дурагиз вардариж жаваб туври гъахъну:

– Узу учву штуан апІуразачву, амма йиз къяляхъди узутІан Къудратлур гъюра, узу Дугъан шаламарин гъахмийр гъядарчуз-къан лайикъ дарза. Дугъу Гирами Рюгънахъдина цІихъди цИйи алаидичву. ¹⁷ Дугъан хилий йирф хъибди, Дугъу дяхинна нахъв жара апІиди: дяхин Чан танхарий ахъди, хъа нахъвар хътрубгру цІигъ гъяхъну ургиди.

¹⁸ Ягъ’яйи гъамци ва хъанара жара гафариинди халкъдиз ужуб хабар дебккри гъахъну.

¹⁹ Хъа Ягъ’яйи гъякимдар Гъироддик, чан чвуччун хипир Иро-диада чаз дитбаз ва жара пис ляхнар апІбаз лигну, тахсир кип-ган, ²⁰ Гъиродди чан чуру ляхнар, думу дустагъдиль итбиинди, гужал гъапІну.

²¹ Вари халкъ штуан шулайиган, Исара Ягъ’яихъна гъафну. Штуан гъахъи Иса ккарагурайиган, зав атІабццуру, ²² ва Ал-лагъдин Рюгъ луф жюрейиинди Исайиина ис шулу, хъа зав’ан дих шулу:

– Ув’ Йиз масан Бай вува! Узу Ув’ин гизаф рази вуза!

Исайн ата-бабийр

²³ Исайн, Аллагъдиз гъуллугъ апІуз хъюгъруган, сумчур йис дубхънайи. Халкъди фикир апІурайиганси, Думу Юсуфдин бай ву кІура. Юсуф Гъелийин бай, ²⁴ Гъели Маттатдин бай, Маттат Левийин бай, Левий Мелкийин бай, Мелки Яннайин бай, Янна Юсуфдин бай, ²⁵ Юсуф Маттайин бай, Матта Амосдин бай, Амос Нагъумдин бай, Нагъум Эслимдин бай, Эслим Наггайин бай, ²⁶ Наггай Маатдин бай, Маат Маттайин бай, Матта Симе-индин бай, Симеин Ясегъдин бай, Ясегъ Ядайнин бай, ²⁷ Яда Янандин бай, Янан Рисайин бай, Риса Зеруббабелин бай, Зеруббабел Шеалтиэлин бай, Шеалтиэл Нерийин бай, ²⁸ Нери



Мелкийин бай, Мелки Аддийин бай, Адди Косамдин бай, Косам Элмадамдин бай, Элмадам Эрин бай,²⁹ Эр Ешийин бай, Еши Элизарин бай, Элизар Яфимдин бай, Яфим Маттатдин бай, Маттат Левийин бай,³⁰ Левий Симеондин бай, Симеон Ягъудайн бай, Ягъуда Юсуфдин бай, Юсуф Янамдин бай, Янам Элиякимдин бай,³¹ Элияким Мемайин бай, Мема Мен-нандин бай, Меннан Маттатдин бай, Маттат Натандин бай, Натан Давудрин бай,³² Давуд Ессеин бай, Ессе Обеддин бай, Обед Воаздин бай, Воаз Салмандин бай, Салман Нецрондин бай,³³ Нецрон Амминадабдин бай, Амминадаб Арамдин бай, Арам Гъецрондин бай, Гъецрон Перецдин бай, Перец Ягъудайн бай,³⁴ Ягъуда Якъубдин бай, Якъуб Исакъдин бай, Исакъ Ибрагымдин бай, Ибрагым Терагъдин бай, Терагъ Нагъорин бай,³⁵ Нагъор Серукдин бай, Серук Реуйин бай, Реу Пелегдин бай, Пелег Эберин бай, Эбер Шелайн бай,³⁶ Шела Каинандин бай, Каинан Арфакшаддин бай, Арфакшад Симдин бай, Сим Ниугъдин бай, Ниугъ Лемекдин бай,³⁷ Лемек Метушелагъдин бай, Метушелагъ Янокдин бай, Янок Яреддин бай, Яред Магъ-леелин бай, Магълеел Кайнандин бай,³⁸ Кайнан Еношдин бай, Енош Шитдин бай, Шит Адамдин бай, Адам Аллагъдин бай ву-ди гъахыну.

*Иблисдин Иса рякъ'ан адауз
чалишиши'вал*

4 ¹Гирами Рюгъну ац^Іу Иса Ярдан нирхъан къяляхъ хътакуру, ²ва Рюгъну Думу ич^Іи чюлиз гъахуру. ²Душваъ иблис ягъ-чIур йигъян Иса рякъ'ан адауз чалишиши шулу. Исаи му йи-гъари фук^Іа дирип^Іди гъахыну, хъа гъадму йигъар улдуч^Івиган, аыхирки, Дугъаз яманди гаш шулу.

³Хъа иблисди Исаиз гъапи:

— Эгер Уву Аллагъдин Бай вуш, гъаму гъвандикан уъл хъуз гъйт.

⁴Исаи жаваб вуди гъапи:

— Гирами китабариъ дибик^Інаки: «Инсан ялгъуз уъл'инди яшамиши шуладар».

⁵Иса ягъял йишв'ина адаъну, иблисди Дугъаз саб геренди вали дюн'яйин паччагълугъар улупуру, ⁶ва кIуру:



— Вари гъаму паччагылугъар ва дурарин гъайбат Увуз тувдиза, фицики дурар йиз ихтиярназ тувна ва узхъан дурар узуз ккуни-риз тувуз шулзухъан.⁷ Эгер Уву узуз икрам гъапIиш, гъадрар вари Явдар хьиди.

⁸ Исаий дугъаз жаваб туву:

— Гирами китабариъ дибикIна: «Яв Агъа Аллагъдиз икрам апIин ва сар ДугъазтIан гъуллугъ мапIан».

⁹ Иблисиди хъана Иса, Ерусалимдиз духну, Аллагъдин хулан вартIан ягълишв'ин дерккру ва кIуру:

— Эгер Уву Аллагъдин Бай вуш, ари гъамлин исина урс,¹⁰ фицики дибикIна: «Аллагъди Чан малайикариз, гъайгъушнаъ духьну Уву урх кIури, амур апIиди.¹¹ Ва Яв ликкъан гъвандихъ йи-вуз гъидритруганси, Уву чпин хилариина гъадагъиди».

¹² Исаий дугъаз жаваб вуди гъапи:

— Гъамцира дупна: «Яв Агъа Аллагъ ахтармиш мапIан».

¹³ Иса рякъ'ан адаъру вари чарийр хътIарцциган, жара саб ужуб ваҳт ккабхъайиз, иблис Дугъхъан гъудучIвну гъушу.

*«Гъич сар пайгъамбарра чан ватандиъ
лайикълуди къабул апIури шулдар»*

¹⁴ Иса Аллагъдин Рюгъан тясиrnаккди Галилей уълкейиз хъта-куру ва Дугъан гъякънаан бютон уълке вуйибси аваза рабгъуру.

¹⁵ Исаий мистариъ аыгъювалар улупуйи, ва вардари Думу адлу апIуий.

¹⁶ Хъа Иса, Учв тербияламиш гъаши Назаретдиз дуфну, Чан аядат вуйиси, султ йигъан мистарь учIвру ва Гирами китаб урхуз гъудужвуру.¹⁷ Гъадмуган Исаийхъна Ишая пайгъамбрин китаб тувру. Дугъура китаб абццру ва гъамци дибикIнайишв'ин ала-хъуру:

¹⁸ — Агъайин Рюгъ Уз'ин ал. Узуз Аллагъди касибарииз Ужувлан хабар рабгъуз гъюкум тувнайиз ва Узу йисириариз азадвал хъади, курагириз акв хъади ва гъацира зулум-зиллетнакк ккайдар азад апIуз ва ¹⁹ Аллагъдин рягъимнан ваҳт улубкыну, кIуру, хабар ту-вуз гъаъну.

²⁰ Хъасин китаб ккибкну, мистан гъулугънаъ айирихъна тувну, Иса дэйру. Хъа мистарь аий вардарин улар Гъадгъуин алди гъахъ-ну.²¹ Исаий дурализ кIуру:



— Учвуз гъеерху Гирами китабдись дидикІнайи гъаму гафар, магъа, гъи ичв улихъ кІулиз удучІвна.

²² Исаин улихъ варидаи гъаци вуйивал улупу ва, Дугъан мелз-налан гъюрайи кабалгру гафариин мюгътал шули, дурари гъерх-ри гъахыну:

— Му ихъ Юсуфдин бай даринхъя?

²³ Исаира дурализ гъапи:

— Гъелбетки, учву Узуз, абиирин мисалик дунтайиганси, пи-дичва: «Эй духти! Сифте Жуву Жуву сагъ апІин!» «Уву Кафер-нагъумдись гъапІу альаматнан ляхнарикан учуз деебхъначуз, гъа-мус гъадму ляхнар мушваъ, Яв абайин ватандиъра, апІин» пиди-чва. ²⁴ Гъякъди кІуразачвуз, гъич сар пайгъамбарра чан абайин ватандись лайикълуди къабул апІури шулдар. ²⁵ Дюзди кІураз-чвуз: Израилиш Ил'ясдин деврий, шубуд йисанна йирхъуб ваз-лин арайиъ мархъ адарди гъабхы вахтна, гизаф ачІни дишагъ-лийир гъахънийи, фицики вари жилиин ахю гаш алабхънийи. ²⁶ Хъа дурарикан гъич сарихънакъян Ил'яс пайгъамбар гъаунда-йи. Думу ялгъуз Сайдайин багахъ хъайи Сарепта кІуру шагъриз сар ачІни дишагълийихънатІан гъаундайи.

²⁷ Гъацира Елисей пайгъамбрин деврий хамран аязар кабхъна-ийдарра гизаф айи, хъа Сирийиан вуйи Найман кІуру сар кас-дикантІан ктарди, сариканра хам марцц гъабхъундайи.

²⁸ Му гафар гъеерхъиган, мистарь айидарик хъял кубчІвру ²⁹ ва, гъудужвну, дурари Иса, гъарзарилан итбан бадали, утІурккну, шагъур али дагъдиина гъахуз хъюгъру. ³⁰ Хъа Иса, рякъюъди ду-рин къялгъян гъодучІвну, гъушнийи.

Исаи жинар кайи кас сагъ апІуб

³¹ Хъа Галилейиъ аий Кафернагъум кІуру шагъриз дуфну, Иса-и халкъдиз султ йигъари аыгъовалар улупури гъахъну. ³² Исаин улупбариин халкъ мюгътал шуйи, фицики Дугъан гафар гъюкум айидар вуйи.

³³ Мистарь жин кубчІвнайи сар кас аий, ва дугъ'ан диди зарбди чигъ апІуру:

³⁴— Учухъ фу хъаяв, Назаретдиан вуйи Иса? Уву учу пуч апІуз дуфнана? Уву фуж вуш, аыгъязуз, Аллагъдин Гирамир!



³⁵ Исаи, дидиз улхуз гъадагъа дапІну, гъапи:

— ХьючІюбкъ ва удублІв дугъ’ан!

Жин, думу кас мистан къял’ин алдакну, дугъаз саб зарарра тутрувди, дугъ’ан удублІвуру.

³⁶ Му гъябкъю вардари, русвагъ духьну, чиб-чпиз гъамци кІури гъахъну:

— Мурап фу альаматнан гафар ву: Дугъу, Чан гьюокмиинди ва күувватнинди амур апІури, жинар ктаурада!

³⁷ Юкыуб альтраф вари йишвариъ Исаин аваза рабгъуру.

Симондин сижарбаб

³⁸ Мист’ан удублІну, Думу Симондин хулаз гъушу. Симондин сижарбабак пис убцрушнан уъзур кайи ва Исаикан думу сагъ апІувал тІалаб гъапІний. ³⁹ Дугъан зиина ял духьну, Исаи убцрушназ гъадагъа апІуру ва думу ктублІвуру. Симондин сижарбаб, дишла ликриина гъудужвну, хяларин гъайгъушнаъ учІву.

⁴⁰ Ригъ алабхъурайи вахтна, Исаин багахъна жюрбежюр иццрушнар кайдар хури гъахъну. Исаира, гъаруриин Чан хилар иливури, дураг сагъ апІури гъахъну. ⁴¹ Гизафдариан жинарра удублІури гъахъну. Жинари: «Уву Аллагъдин Бай вува!» — кІури, Чигъяр апІуий. Хъа Дугъу Учв Месигъ вуйибдикан жарадариз пуб дурагиз гъадагъа апІури гъахъну, фицики дурагиз, Думу Месигъ вуйиб, альгъайи.

Ягъудияйиъ аыгъювалар улупуб

⁴² Хъайигъан гвачІин улубкыиган, хул’ан удублІну, Иса халват ишишваз гъягъюру, хъа халкъди Думу агури шулу. Хъасин Исаихъна дуфну, учхъан мягъян кІури, Дугъахъ ккарагури хъюгъру.

⁴³ Амма Исаи дурагиз гъапи:

— Жара шагъаризра Аллагъдин Паччагъувал гъорайиваликан Ужувлан хабар рабгъуб лазим ву, гъаз гъапиш Узу гъаддин бадали Гъайнайир вуза.

⁴⁴ Исаи Ягъудия уълкейин мистариъ аыгъювалар улупувал давам апІури гъахъну.



**«Гъамусдихъантина
адмийишин юкІвар дисидива»**

5 ¹Сабан, Аллагъдин гаф ебхъбан бадали, халкъ Исаилан ил-тИшуру, хъа Думу Учв Геннишарет гыюлихъ дийигъну айиган, ²Дугъаз гыюл'ин кьюб лютке рякьюру. Дурариан эдеу балугъчири чулар марцц апIурайи.

³Люткиирикан Симондинубдиз учIвну, Исаи дугъхъан лютке гырагъдихъан цИб тинаси хъапIуб ккун гъапIну ва гъадлин, дельну, аыгьювалар улупуз хъюгъру.

⁴Чан улхуб ккудубкIиган, Исаий Симондиз кIуру:

— Яв лютке гыюлин къялариз хъапI, хъа яв чулра ккип.

⁵Симонди Исаиз жаваб вуди гъапну:

— Я Мялим! Ярхи йишвди чалишмиш духьну, учхъан фукIа бисуз гъабхъундарчуухъан, амма Яв гафназ лигну чул ккипарза.

⁶Хъа гъаци дапIну, дурари гъадмукъан балугъар гъидиснуки, гъеле чул чIябгъюзра цИбтIан имдайи.

⁷Дурари тмуну люткейиъ аи юлдшарииза кюмекназ дих дапIну, дураарра дуфну кьюбиб люткиирра гъаци арцIруки, люткийир ккадрахъди саб нуфт гъубзнийи.

⁸Му гъябкIиган, Петр кIуру лакIам хъайи Симонди, Исаин къамкъариина ис духьну: «Я Агъа! Узхъан гъудучIв, гъаз гъапиш узу гунагъкар вуз», гъапи. ⁹Фицики Симон ва дугъахъ хъайидар, чпи гъидису аыхючIвеъ балугъариз лигну, русвагъ гъахънийи. ¹⁰Хъа Симондин дустар вуйи Зеведейин баяр Якъубикнна Югъандик Симондиксиб пис гучI кабхъру. Симондиз Исаий: «ГучI мапIан, гъамусдихъантина инсанарин юкІвар дисидива», кIуру.

¹¹Хъасин кьюбиб люткиирра гырагъдихъна кадагъну, вари душваъ гъибтну, дураг Исаин къяляхъди гъягъору.

Хамран аyzар марцц apIувал

¹²Иса саб шагъриъ аиган, Дугъахъна хамран аyzар кабхънайи сар кас гъюру. Иса гъяркъиган, жил'ина ккадакну, думу Дугъаз ккарагур:

— Я Агъа! Увуз ккун гъабшиш, узу марцц апIуз шулвуухъан.

¹³Исаи, хил гъачIабккну, дугъак кубкIну, кIуру:



— Ккундузуз, марцц йихъ!

Ва дишлади дугъан хам аьзарнахъан марцц шулу. ¹⁴ Исаи дугъаз: мидкан саризра макІан, хъя маллайихъна душну, жвув улуп, халкъдиз уву марцц хъпан шагъидвал вуди, Муса пайгъамбри дуннайиганси, гъурбан апІуз ужуб гъайибх, кІури, табшурмиш гъапІу.

¹⁵ Амма гъаци вушра, Исаикан аваза гъарабгъу, ва Дугъахъ хъпехъуз, чпин уъзрар сагъ апІуз гизаф халкъ гъюз хъюгъру. ¹⁶ Хъя Иса, фужкІа адру йишвариз гъягъюри, ккарагури шулу.

Паралич кайир сагъ апІуб

¹⁷ Сад йигъан Исаи аygъювалар улупурайиган, Галилейна Ягъудия уълкъириан ва гъацира Ерусалимдиан Дугъахъна дуфнайи фарисийирна къанунчийр деънайи. Дугъу аьзарлуйир Аллагъди туvu къувватниинди сагъ апІурайи, ¹⁸ ва магъа Дугъахъна ахниин алди паралич кайи сар кас хуз хъюгъю. Думу хулаz духну, Исаин улихъ дитуз ккун гъабхъи. ¹⁹ Му кас гизаф илтИшнаий халкъдин арайигъян гъахуз йишв дубрихъди, хулан гъваина за дапІну, гъваъланди, ахниин илмиди, Исаин улихъна хулан къял'ина ирхру. ²⁰ Исаиира, дуарин зурба хъугъвал рябкъюри, гъадму касдиз кІуру:

— Эй инсан, яв гунгъарилан хил алдабгъураза.

Къанунчииризна фарисийиз Исаин гъюкум улупуб

²¹ Къанунчиирина фарисийири чиb-чпикди фикир гъапІу:

— Аллагъдиз къаршуди улхурайир гъаму фуж ву? Сар Аллагъдилан гъайри, сарун шлихъан гунгъарилан хил алдабгъуз шулухъа?

²² Исаи, дуарин фикрарин гъаври ахъну, жаваб тувру: «Гъаз дицдар фикрар ичв юкІвариъ тІаърачва? ²³ „Яв гунгъарилан хил алдабгъураза“ пуб рягъят вуйин, даршиш „гъудужвну лиц“ пуб?

²⁴ Инсаниятдин Бализ жилиин гунгъарилан хил алдабгъуз гъюкум айиb учвуз аygъю хъпан бадали, магъа лигай» — пну, Дугъу паралич кайириз: «Гъудужв кІуразавуз, гъадабгъну яв ахин, яв хулаz гъараx», — кІуру.



²⁵ Думура дишла гъудужвну, учв дахънайи ахинра гъадабгъну, Аллагъдин адар апIури, чан хулаз гъягъюру.

²⁶ Хъя вари мюгътал шулу ва, Аллагъдин тярифар апIури, гучI-баан зегъле дубшну, гъамци кIури гъахъну:

– Гъи аյжаб кереметнан ляхнар гъяркъюндарин ухъуз!

Левийиз дих апIуб

²⁷ Мидхъан хул’ан удучIву Исаиз налук уч апIури деънайи Левий кIуру гъуллугъагъли рякъюру ва дугъаз Чахъди гъач кIуру.

²⁸ Думура, чан кеспи гъибтну, Дугъан къяляхъди, гъудужвну, гъягъюру.

²⁹ Хъасин дугъу чан хулаь Исаиз ахю хялижв’вал апIуру. Душваь ахюочIвеь налукар уч апIрудар ва дурарихъди гуттириз гъюн йивну дахънайи жара хяларра айи. ³⁰ Альимарина фарис-ири наразивал кади Исаин ученикариз: «Учву налукар уч апIрударихъдина гунагъкрагири гъапIуз ипIури-убхъури шулчва?» – кIури гъахъну.

³¹ Исаий дурализ жаваб вуди гъапну:

– Духтир сагъидариз ваь, хъя аззарлуйириз лазим ву. ³² Узу марцци касари ваь, хъя гунагъкрагири, чпин гунгъар гардандиль дидисну, умур дигиши апIбан бадали, дуфнайир вуза.

Ушвар дисбакан

³³ Дурари кIуруш Исаиз гъапи:

– Гъаз Яг’яйин ва гъацира фарисийирин ученикар кми-кмиди ушвар дисури ва ккарагури шулу, хъя Явдар чпиз ккун гъабши вахтна ипIури-убхъури гъаз шулу?

³⁴ Исаий дурализ кIуру:

– Швушв хурайрихъди хъайи сумчрин хяларихъди учвхъан ушвар дисуз гъитуз шулинхъя? ³⁵ Хъя швушв хурайир гужназ гъадагъру вахт гъибди, ва гъадму йигъари ушварра дисиди.

³⁶ Мидихъди сабси Дугъу саб тахалус ктибтуру:

– Гъич сарира, цИийи палатдикан кадабтIну, йирси палатдик цИил ктривур, даршиш дугъу цИийи палатра ЧIябгъиди, хъя гъацира дидкан ктабтIу цИил йирсибдик балгидира дар. ³⁷ Ва гъич сарира таза чяхир йирси иржарий убзидар, финики таза чаяри иржар гъутIурчвиди, учвра удубзиди ва иржарра пуч хъиди.



³⁸ Гъаддиз таза чяхир цийи иржарыб убзуб лазим ву.

³⁹ Ва гъич саризра, кюгъне чаяхир дубхъну, дишилди таза чаяхир ккун хьидар, фицики «кюгъне чаяхир ужу ву» — кIури шулу.

**«Инсаниятдин Бай
султ йигъ'инра Агъа ву»**

6 ¹ Султ йигъян Иса дяхин дубзнай хутIлариан гъягъбакк ккуркъну, ва Дугъаҳъ хъайи ученикари, дяхнин кIулар кту-
тIури, хилариғъ ктIиршури, итIури шулу. ² Фарисийирикан бязи-
дари дурагиз кIуру:

— Учву султ йигъян Къанунди гъадагъа дапIнайи ляхин апIу-
ранчва?

³⁻⁴ Исаий дурагиз жаваб туви:

— Мегер учвуз Давудри, чаз ва чахъ хъайдариз гаш гъабши-
ган, гъапIнуш, фици дугъу, Аллагъдин хулаъ учIиган, маллии-
рилан гъайри шликIан итIуз ихтияр адру Аллагъдиз бахш дапI-
найи улер гъадагъну гъитIнуш ва чахъди хъайдаризра тувнуш,
Гирами китабарыб гъурхунданчва?

⁵ Хъасин гъапи:

— Инсаниятдин Бай султ йигъ'инра Агъа ву.

Гъебицу хил хъайи кас

⁶ Жара саб султ йигъян Иса мистаз гъягъбакк ва душваъ
аыгъювалар тувбакк ккуркъру. Душваъ арччул хил деебцнайи
сар кас ади шулу. ⁷ Къанунчайирна фарисийр, Исаик тахсир
кипбан бадали, Дугъу султ йигъян думу сагъ апIидайкIан кIури,
ул хъипнайи. ⁸ Амма Исаий, дурагин ниятар аыгъяди, хил дебц-
найи касдиз кIуру:

— Гъудужвну гъач, варидалин улихъ дийигъ.

Думу гъудужвну, улихъна гъюру. ⁹ Гъадмуган Исаий дурагиз
гъапи:

— Узу учвхъан гъерхраза: султ йигъян фу апIуз ихтияр а? Уж'-
вал, даршиш писвал? Уьмур уьбхоз, дарш пуч апIуз?

Дураг чалкъан даркIури гъузру. ¹⁰ Вардарилан ул илбицну,
Исаий гъадму касдиз кIуру:

— Яв хил гъачIабкк.



Дугъу гъаци гъапIумитIла, дугъан хил сагъ шулу. ¹¹Фарисийр-на альимар хьюол'ан деллу шулу ва, чпин арайиь улхури, Исаий-кан гъапIруш, айжуз духыну гъузру.

Исаин вакилар

¹²Гъадму йигъари Иса, ккарагбан бадали, дагъдиз удучIвуру ва ярхи йишвди Аллагъдиз ккарагури шулу.

¹³Йигъ улубкыиган, Чан ученикариз дих дапIну, дураикан ии-цликюр кас ктагъуру ва дураиз Чан вакилар кIуру ччвур туруу.

¹⁴Дурап: Петр кIуру лакIам хъай Симонна дугъан чве Андрей, Якъубна Югъанна, Филипна Варфоломей, ¹⁵Маттана Фома, Алфе-йин Якъубна Зилот кIуру лакIам хъай Шимон, ¹⁶Якъубдин Ягъу-да ва хъасин душман гъаши Искариот Ягъуда – гъамрапар вуйи.

Рази хъубан гафар ва агърап

¹⁷Иса, дураихъди дагъдилан гъафир, дюз майдандиина гью-ру. Дугъахъди айхючIвеъ Чан ученикарра, вари Ягъудияйианна Ерусалимдиан, хъа гъацира гъюлин гъирағъдихъ хъай Тир ва Сидон шагърариан дуфну, ¹⁸Исайихъ хъпехъуз ва чпи айзарари-хъан сагъ апIуз гъафидарра, гъацира жинари гъаркI апIурайи-дарра хъади гъахъну. Хъа, дурап вари сагъ шулира гъахъну. ¹⁹Ва-ри халкъдиз Исайик кучуз ккунди гъабхъну, фицики Дугъхъан къувват рабгъури ва диди вари сагъ апIури гъахъну. ²⁰Хъа Дугъу, Чан ученикарилан ул илбицури, гъапи:

– Бахтаврап вучва, касиб вуйидар,
фицики Аллагъдин Паччагъульгъ учвусдаринуб ву.

²¹ Бахтаврап вучва, му вахтари гашлудар,
фицики тухъ хидичва.

Бахтаврап вучва, му вахтари ишурайидар,
фицики айлхъидичва.

²² Учву инсанариз даккун гъахъиган,
учву дураи утIурккган
ва беябур апIруган,
ичв ччвур нянайикк ккипруган
Инсаниятдин Бай бадали,
бахтаврап вучва.

²³ Гъадму йигъан рази иихъай



- ва шадвал ачмиш апIинай,
фицики аьршары учвуз айи пешкеш зурба ву.
Учву даккнидарин абийира
пайгъамбраихъди гъаци апIури гъахъну.
- 24 Муаризси дарди, пис гъял хъибди ичв,
девлелтуйир,
фицики учвуз сарун ужувлар дяркъначвуз.
- 25 Пис гъял хъибди ичв, му вахтари уылдюгъну гъярайидар,
гъаз гъапиш гаш хъибдичвуз.
Пис гъял хъибди ичв, му вахтари аылхъюрайидар,
фицики, гъайиф дизигнү, ишидичва.
- 26 Учвкан жарадар ужуди улхрганра,
пис гъял хъибди ичв,
фицики дуарин абийри
кучIлин пайгъамбрариканра гъаци апIури гъахъну.

Душмнарра ккуун апIинай

²⁷ Хъа вари Узухъ хъебехънайдариз кIураза: ичв душмнар ккуун апIинай, учву даккнидариз уж'вал апIинай. ²⁸ Учву нянатлу апIурайидариз гъюрматлу гафар апIинай ва учвуз гиран ктапI-рударихъанди ккарагай. ²⁹ Яв саб гарцIликкан бачI ккадатуриз тмунубра ккив ва яв зильлан палат илдибтуриз кIанакк ккайи ккуруттра чаз гъадабгъуз манигъ'вал мапIан. ³⁰ Увкан тIалаб апIурайидариз тув ва явуб гъадабгъуриз «къяляхъ ча» макIан. ³¹ Учвуз учвухъди адмийир фици духьну ккундущ, гъадарихъди учвура гъаци йихъай. ³² Хъа эгер учву ккунидартIан учвуз ккундарш, мидкан фу чухсагъул ачвуз? Фицики гунагъкрагириза чиб ккунидар ккунди шулу. ³³ Учвуз уж'вал апIрудариз учвура уж'вал апIураш, мидкан фу чухсагъул ачвуз? Фицики гунагъкрагириза гъаци апIуру. ³⁴ Хъа эгер учву бурж къяляхъ апIуз удукурурихъна миж кади тувраш, мидкан фу чухсагъул ачвуз? Фицики гунагъкрагириза чпи буржназ тувкъануб къяляхъ гъадабгъуз ният ади туври шулу. ³⁵ Хъа учву ичв душмнар ккуун апIинай, ужувлар апIинай, къяляхъ бисуб миж ктарди, буржназра тувай, ва учвуз зурба пешкеш хъибди, ва учву ВаритIанзаанурин баяр хъидичва. Фицики чипиз гъапIу уж'вал аыгъю даршлударизра, пис касаризра Аллагаг гъянир ву. ³⁶ Гъаци учвура, ичв Адашси, мани юкIвар ади йихъай.



*Жаарарин диван мапIанай,
Аллагъди ичвра апIидар*

³⁷ Жаарарин диван мапIанай, Аллагъди ичвра апIидар; жаарар тахсир мапIанай, учвурда тахсир апIидар. Хил алдабгъай, учвурда алдабгъиди. ³⁸ Хил ачухъ апIинай, учвузра тувди: убжнайи ва кIакI алди абцIнайи уылчмейииндиги ичв танхлий абхъди, фицики учву фициб уылчмейииндиги ебцураш, учвузра гъацибдинди ебциди.

³⁹ Дурагиз Исаий тахалусарра ктитуру:

— Курихъан курс хъади гъягъюз шулинхъя? Дураг кьюридра ичIаъ ахьидаринхъя? ⁴⁰ Ученик чан млялимтIан заан дар, амма зельмет зигури, дубгъури гъабхъиш, гъарсар чан млялимдихъ хъуркъди.

⁴¹ Увуз яв чвуччун улий аи чIюрх гъаз рябкъюрвуз, яв улий аи хамхар дярябкърайи вахтна? ⁴² Ваяки яв гъардшиз: «Яв улий аи чIюрх адабгъуз», — фици пицива, увуз яв улий аи хамхар дярябкърайиган? Эй, кьюб маш гъяйир! Сифте яв улий аи хамхар адабгъ, хъа гъадмуган увуз, яв гъардшин ул'ан чIюрх фици адабгъуруш, рябкъидивуз.

*Гъар йимишдиз лигну
аыгъю шулу*

⁴³ Гъяни гъари чIуру бегъер, чIуру гъари гъяни бегъер хурдар, ⁴⁴ фицики гъарсаб гъар чан йимишдиз лигну аыгъю шулу. Гъаддиз зазарилан инжир, чIуру хутарилан тIумутI уч апIури шулдар. ⁴⁵ Ужур касди чан кIван хазнайиан ужуб, хъа чIурури чан кIван хазнайиан чIуруб адабгъуру, фицики инсандин мелз, дүгъян юкIв фти абцIнаш, гъаддикан улхури шулу.

Кьюб шибритI

⁴⁶ Учву Узуз: «Я Агъа, я Агъа!» гъаз кIурчва, Узу учвуз гъапиб дарапIрайиган? ⁴⁷ Узухъна дуфну, Узухъ хъебехъну, Йиз гафар тамам апIру гъарсар кас шлиз ухшар вуш, кIарзачвуз: ⁴⁸ Думу, хулар дивруган, жил дериндиз дирибккну, шибритIар гъвандин диву касдиз ухшар ву, фицики, селлер дуфну, шид улубчIивиган, думу хулар ришвуз гъахъундар, гъаз гъапиши дураг гъвандин дивнайидар вуди гъахъну.



⁴⁹ Хъя Йиз гафар ерхъури, дурагар тамам дарараШрайи кас шибри-
ттар ккадру хулар диву касдиз ушшар ву, фицики шид улубчИви-
ган, дурагар дишлади ахъну, дармадагъин хъиди.

Юзбашийин гъуллугъчи сагъ апIуб

7 ¹Чахъ хъебехънайидариз пуз ккайи гафар ккудукиган, Иса Кафернагъумдигъ учIвру. ²Римдин юзбашийин чаз ккуни сар гъуллугъчи кетIерццну йикIру гъялнаъ ади шулу. ³Исайикан хабар дубхъну, юзбашийи, чан гъуллугъчи сагъ апIбан бадали, Думу хъади гъюз жугъдарин агъсакълар гъаъру. ⁴Дурагар, Исайихъ-на дуфну, Дугъкан ижими迪 minnat apIuru:

— Му юзбashi Уву кюмек апIбаз лайикълу кас ву, ⁵фицики думу кас ич халкъ гизаф ккунир ву ва дугъу учуз ккарагру халтикиши гъапIину.

⁶ Иса дурагихъди гъягъюру. Думу юзбашийин хуларихъна хъуркъради, юзбашийи Исайихъна гъамци пуз чан дустар гъаъру:

— Инжиг махъан, Агъа, гъяз гъапиш Уву йиз хулаъ учIвбаз узу лайикъ дарза. ⁷Гъаддиз узу Увухъна гъюзкъан жуву лайикълур вуди гъисаб гъапIундарза. Анжагъ Уву саб гаф йип, ва йиз гъуллугъчи сагъ хъиди.

⁸ Фицики узора жаарарин хлиkk ккайир вуза, ва узуз мютIюгъ вуйи эскрарра азуз. Дурагикан сариз узу «гъарах» кIурза — думу гъягъюру, тмунуриз «гъач» кIурза — гъюру, йиз гъуллугъчийиз «гъамци апIин» кIурза, дугъу тамам апIуру.

⁹ Му гафар гъеरхъиган, Иса дугъ'ин мюгътал шулу ва, илдиц-ну, Чан къяляхъ хъайи халкъдиз кIуру:

— КIуразачвузки, Израилиъра Аллагъдихъ гъамкъан хъугърайи кас гъяркъюндарзуз.

¹⁰ Юзбашийи гъаъдарииз, чпи дугъан хулаъ хъадакну гъафиган, кетIерццнайи гъуллугъчи сагъ духънади рякъюру.

ДукIнайириин жсан аланIуб

¹¹ Дидхъантана Иса Наин кIуру шагъриз гъушу. Дугъахъди Чан ученикар ва ахъючIвэъ халкъра гъягъюри гъахъну. ¹²Хъя Иса шагъ-рин урнарихъна багахъ гъашиган, сар ачIини хпириин айина-адру бай дукIину, дугъан майит накъваригъна гъабхуз адабгъури шулу,



ва майтихъ хайлин халкъра хъайи. ¹³Агъайиз, балин дада гъяркъиган, язухъ шулу ва дугъаз, мишан, кIуру. ¹⁴Хъа багахъна дуфну, Исаи мятъражарик хил катру, майит гъабхурайидар дийгъуру ва Дугъу кIуру: «Живан! Увуз кIураза, гъудужв!» ¹⁵ДукI-найир за духъну деъру ва улхуз хъюгъру, хъа Исаи думу дада-йихъна тувру.

¹⁶Мушв'ин вардариk пис гучI кабхъну, Аллагъдин адар апIури, гъамци кIури гъахъну:

– Ихъ арайиз зурба пайгъамбар адахъна, ва Аллагъ Чан халкъдин гъайгъушнаа а.

¹⁷Исаикан гъамциб фикир вари Ягъудия вилаятдиъ ва айтрапарихъ хъайи миди вуйи юрдариь рабгъуру.

Ягъ'яйихъан вуйи илчиip

¹⁸Хъа Ягъ'яйиз чан ученикари гъамрар варидарикан ктитуру. ¹⁹Ягъ'яйи, чан ученикарикан кьюриз дих дапIну, дураг Агъа Исаихъна гъамци гъерхуз гъаъру: «Гъюз ккайи Месигъ Уву вуна, даршиш жаариз ккилигучу?»

²⁰Дураги, Исаихъна дуфну, кIуру:

– Штуан апIру Ягъ'яйи учу Увухъна гъерхуз гъаъна: «Гъюз ккайи Месигъ Уву вуна, даршиш жаариз ккилигучу?»

²¹Му вахтназ Исаи аззарарикканна иццрушнариккан гизаф-дар ккадаъну, жинар кадаъну, ахъючIвеъ курс вуйидариз акв улуп-ну айи. ²²Гъаддиз Исаи дурагиз жаваб вуди кIуру:

– Душну Ягъ'яйиз, учвуз гъяркъдар ва гьеерхъдар кидитай: курс вуйидариз рябкъюра, ликудар лицура, хамран уъзур кайидарин хам марцц шула, кар вуйидариз ебхъура, гъачIидар чиви шула ва касибариz Ужувлан хабар рабгъура. ²³Шли Уз'ина вуйи хъугъвал дубградарш, думу баxтавар ву.

Штуан апIру Ягъ'яйикан Исаин гаf

²⁴Ягъ'яйи гъаъдар гъушхъан, Исаи Ягъ'яйикан халкъдиз гъамци кIуру:

– ИчIи чюлиз фтиз лигуz гъушнийчва? МикIлу тIубччурайи чеъдиз лигуz гъушнийчвахъя? ²⁵Шлиз лигуz гъушунчва дина? Багъа палтар али касдиз? Хъа дамагънан палтар алахърудар ва чпиз ккуниси яшамиш шлудар паччъарин дараматариь а.



²⁶ Шлиз лигуз гъушунчва учву? Пайгъамбриз лигуз? Ав, кІура-зачвуз, пайгъамбартІан ахюориз лигуз гъушунчва. ²⁷ Гъадму Ягь'-яикан ву гъамци дибикІнайиб: «Магъа, Яв улихъди Узу Йиз кас гъаъраза: дугъу Яв улихъ Яв рякъ ккабалгиди». ²⁸ КІуразачвуз: дишагълийири бабкан гъахидаригъ Ягь'ятІан зурба кас гъядар; хъа Аллагъдин Паччагълугъдиль айидарикан варитІан бицІир дут-мутІан зурба ву.

²⁹ Дугъахъ хъпехъурайи вари халкъди ва налук гъюдюбхрудар-ра кмиди, Ягь'яйин штуан апІувалиинди цИийи духьну, Аллагъ гъякъ вуйиб гардандиль гъибису. ³⁰ Хъа фарисийирна къанунчир, Аллагъдихълан чпииз вуйи ният гъясбикк дарараІри, Ягь'яйихъ штуан гъахъундар.

³¹ — Гъаму наслин адмийир шлихъ тевза ва дураг шлиз ухшар ву? — пну, гъерху Исаи. — ³² Дураг, чиб-чпииз чигъар апІури, раццариль гъамци кІури деънайи бицІидариз ухшар ву: «Учу учвуз швутІрамар йивури гъахъунча, хъа учву ялхъвнаркъан гъап-Пундарчва; учу учвуз ишлар апІури гъахъунча, хъа учву ишуз-къан гъишундарчва».

³³ Штуан апІру Ягь'я гъафну ва дугъу я уыл ипІури, ясана чя-хир убхъури гъахъундар. Хъа учву: «Дугъаъ жин а», кІурачва.

³⁴ Инсаниятдин Бай гъафну, Дугъу ипІуру ва убхъуру, ва дураги Дугъаз: «Лигай, магъа уъж ва пияниска, налукар гъюдюхрударинна гунагъкъарин дуст», кІурачва. ³⁵ Айкъюлувал вари айкъюлудари улупну ккун.

Дишагълийин ахючиІвеъ гунгъарилан хил алдабгъыну

³⁶ Фарисийиркан сари Исаикан чан хулаз уыл ипІуз гъюб тек-лиф апІуру. Фарисейин хулаз гъушу Иса гъюн йивну дахъру.

³⁷ Хъа магъа, гъаму шагъриан вуйи сар гунагъкар дишагълийи, Думу фарисейин хулай гъюн йивну дахънайиб айгъю дубхъ-ну, лизи ругдин гажниъди айтрин ниъ хъайи ягъсиб хуру ва,

³⁸ Исаин ликарихъ дийигъну ишури, Дугъан ликар нивгъарихъ-ди къяши апІури ва чан кушарихъди марцц апІури, Дугъан ли-кариз макар апІури, гъадму ягъ ктатури шулу.

³⁹ Му ляхин гъябкъиган, теклиф дапІну, Иса хулаз хъади гъа-фи фарисейи чав-чакди фикир апІуру:



— Эгер Думу дугъриданра пайгъамбар вуйиш, Чак хилар катрайи дишагъли фуж вуш, Дугъаз айгъю шлийи. Думу гунагъкар даринхъя!

⁴⁰ Фарисейихъинди илдицну, Исаи дугъаз гъапи:

— Я Симон! Увуз кIуру саб гаф айиз.

Дугъу: «Йип, Мялим!» — гъапи.

⁴¹ Исаи кIуру:

— Сар пул буржназ тувурихъ кьюр буржлу кас шулу. Дурагикан сар хъудварж динар-пул буржлу вуйи, тмунур — хъцIур.

⁴² Хъя дурагихъ къяляхъ тувуз пул хътарди хъпаз лигну, дугъу къюридизра буржар гъялал апIуру. Йип ари, гъадму жви гъадрагикан фунуриз артухъди ккуун шул?

⁴³ Симонди жаваб тувру:

— Ахъю бурж кайириз вушул, пну, фикир апIураза. Исаи дугъаз: «Ари дюздзи фагъум гъапIунва» кIуру.

⁴⁴ Хъя дишагълийихъинди илдицну, Симондиз гъапи:

— Гъаму дишагъли рякъюрануз? Узу яв хулаz гъафунза, уву Узуз ликар жикIуз шид тувундарва; хъя дугъу Йиз ликар чан нивгъарииндигъижикIинийиз, чан кушарихъди марцц гъапIинийиз. ⁴⁵ Уву Узуз мак гъапIундарва, хъя дугъу, Узу гъафихъантинагъ Йиз ликариз сикин дарди макар апIура. ⁴⁶ Уву Йиз кIулкан ягъ ктатундарва, хъя дугъу Йиз ликарикан ягъ ктатну. ⁴⁷ Магъа гъаддиз кIуразавуз: чан гизаф ккуун хъували дугъан ахъочIвеъ гунгъарилан хил алдабгъурайиб улупура. Хъя шлиз цИбди багъишиламиш'вал тувруш, дугъан ккунивалра цИбIан дар.

⁴⁸ Дишагълийиз Исаи кIуру:

— Яв гунгъарилан хил алдабгъына.

⁴⁹ Хъя дугъан багахъ гъюн йивну дахънайидари чиб-чникиди пузхъюгъю:

— Му фуж ву гунгъариланра хил алдабгъуз?

⁵⁰ Исаи, кIуруш, дишагълийиз гъапи:

— Яв хъугъували уву гъюрхну, архаин духьну гъарах.

Исаихъди лицурайи дишагълиир

8 ¹Дидхъантинагъ Иса, шагърариъна гъулариъ, Аллагъдин Па- чагъльугъикан Ужувлан хабар рабгъури, Чан йицIикьюр ученикарра хъади, лицури гъахъну. ²Дурагихъди жинарихъан



гъюрхю ва уъзрар сагъ гъапІу бязи дишагълийир: чаан ургуб жин удучІву Магдалайиан вуйи Мар'ям,³ Гыроддин мулкар идара апІурайи Хуздин хпир Югъанна, Сусанна, гъацира чпиз айи-ад-рубдииндиг Дугъан гъайгъу зигурайи жара дишагълийирра хъади гъахъну.

Тум убзбакан тахалус

⁴ АхюочІвеъ халкъ уч гъашиган ва вари шагъариан агъалийир Дугъахъна гъафиган, Исаий тахалусдинди пуз хъюгъру:

⁵ – Сар нежбер тум убзуз удучІвuru. Убзурайиган, гъацІар уд-пар рякъюхъ дахъру, малари ликариккан апІуро ва жакъвари удуру. ⁶ Сакьюдар гъван ккайи ругдин дахъру ва ктучІвиган ер-ццуру, гъаз гъапиш дурализ ламушин адарди гъабхъну. ⁷ Сакью-дар удрап зазаригъ гъяхъру ва удрапІан зарбди ктучІву зазари дурап ккаъру.

⁸ Хъа сакьюдар авадан ругдик кахъру, ктучІвиган дурали варж-бан артухъ бегъер тувру.

Гъамци дупну, Исаий гужал дихнииндиг гъапи:

– Шлин ибариз ебхураш, гъит ебхъри!

Тахалусдин мяна

⁹ Ученикири Дугъхъан гъерхуз хъюгъну:

– Му тахалусдин мяна фу ву?

¹⁰ Дугъу гъапи:

– Учвуз Аллагъдин Паччагълугъдин сирарап аygъю хъуб тувна-чвуз, хъа имбудариз му тахалусариytІан аygъю хъуб тувнадар. Гъаци вуйиган, лигурашра, дурализ рябкъорадар ва, ебхураш-ра, дурали аннамиш апІурадар.

¹¹ Му тахалусдин мяна магъа: тумар – Аллагъдин гаф ву.

¹² Рякъ'ина тадаҳъдар – мурап, чпиз Аллагъдин гаф ебхурайи, амма чпихъна хъасин иблис дуфну, дурап ебхурайи гафнахъ хътругъри ва гъаци уърхювал гъазанмиш дарибшри пну, дурапин кІваан иблиси гъадму гаф гъабхурайи касар ву. ¹³ Хъа гъва-нариина ахъдар – мурап, Аллагъдин гаф гъеебхъиган, думу шад-ди къабул апІрудар, хъа чпихъ мюгъкам ччивар хътарди хъпаз лигну, бязи вахтари хъугърудар, хъа читин гъабшиган, хътругъ-рудар ву. ¹⁴ Хъа зазаригъ гъяхъдар – мурап Аллагъдин гафнахъ



хъпехърудар, амма гъайгъушнари, девлетну ва гешт хъапIбу ий-
сир дапIну, Аллагъдин гафнахъан гъудучIврудар ва, гъадиз, бе-
гъер дархрудар ву. ¹⁵Хъа авадан ругдина ахъдар — мураг, Ал-
лагъдин гаф гъебхъиган, му чпин марцци кIваь убхрудар ва са-
бур апIбинди бегъер туврудар ву.

Чирагъ чан иишв'ин дивру

¹⁶Исайи хъанара давам апIуру:

— Сарира, чирагъ кабхъну, дид'ин гъаб иливдар вая кровать-
дикк ккивдар. Дугъу думу, хулаь учIврайидариз акв шлуси, чан
ийшв'ин дивру. ¹⁷Фицики ашкар даршу жиниб фукIара адар
ва, мялум даршиди, арайиз ададабхъру гъич саб сир адар. ¹⁸Гъа-
ци вуйиган, учву Узухъ дикъатниинди хъебехъай: шлиз аш, ду-
гъяз хъана тувди; хъа шлиз адарш, айидихъна хъибдизуз кIуруб-
ра тадабгъиди.

Исайн дадана чвийр

¹⁹Исайихъна дадана чвийр гъюру ва дураг, халкъ гизаф ади
хъпаз лигну, Дугъахъна багахъ хъуз даршули аии. ²⁰Хъа Исайиз:
«Яв дадана чвийр, Уву рякъюз ккунди, чIат дийигъна», — кIури,
хабар тувру. ²¹Дугъу дурагиз жаваб вуди кIуру:

— Ииз дадана чвийр, Аллагъдин гафнахъ хъпехърудар ва думу
тамам апIрудар вуйиз.

Исай тIурфан яваши апIуб

²²Сад йигъан Дугъу, Чан ученикарра хъади люткейиль эъну,
дурагиз гъапи:

— Гъюлин тмуну гъирагъдихъна сирнав апIидихъя.

Дураг люткейильди гъушу. ²³Сирнав апIурайиган, Иса нивкIуз
гъягъюру. Гъюл'ина гужал тIурфан утIубччвну, лепийри лютке
ккапIуз хъюгъру, ва дураг хатIалу гъялнаь ахъру. ²⁴Дураг, Иса-
йихъна дуфну, Думу нивкIан хъиргну кIуру:

— Мялим! Мялим! Батмиш шулахъу!

Хъа Дугъу, гъудужкну микIаз ва штун лепийриз гъадагъа апIу-
ру, ва дураг лал шулу, архайнвал абхъру. ²⁵Гъадмуган Исайи ду-
рагиз гъапну:

— Хъуѓ'вал набшдичв?



Дурари, гучI кабхъну ва мюгътал духъну, чиб-чпиз кIури гъахъну:

— Му фуж вуйкIан, микIариизра, штузра амур апIур, ва дурар Мугъаз мютIюгъра шула?

Жинар кайир сагъ anIуб

²⁶Хъя дурари Галилей уылкейин гъаншариъ айи Герасин юрдназ сирнав апIур. ²⁷Иса гъирағъдихъна ктучIвиган, Дугъахъна ухдихъанмина жинар кайи сар кас гъюру. Думу, учв шагъриан вушра, палтар алалахъди, хулаъ ваъ, хъя накъварин хъарап-дюрхъяригъ яшамиш шулайир вуйи.

²⁸⁻²⁹Жин гагъ-тагънак кубчIврган, дугъан хилар-ликар зунж-париҳди ва гъялкъирихъди йитIуйи, амма дерккүз даршули, дурар къатIар апIуйи, жинди думу айсси апIуйи, хъя чIурагиз гъергүйи. Исаий чиркин рюгъназ, мугъ'ан удубчIв пну, амур апIур. Иса гъяркъиган, дугъ'ан чIигъ утIубччвуру ва, Дугъан улихъна ккадакну, зарбди кIуру:

— Яв узухъди фу вуяв, ВаритIанзаан Аллагъдин Бай Иса? Миннат вуйиз, йиз зегъле мабхан!

³⁰Исаий дугъхъан гъерхру:

— Чувур фуж вуяв?

Дугъура: «Кьушум вуйиз» — кIуру, гъаз гъапиш дугъак гизаф жинар кучIвнади гъабхъну.

³¹Хъя жинари Исаикан чпи гурбагуриз гъадрауб тIалаб апIур. ³²Мушвхъан ярхла дарди дагъдик силарин айхю лиж карабгънайи, ва жинари чпиз гъадрариъ учIувуз ихтияр тувуб тIалаб апIур. Исаий дурариз ихтияр тувру. ³³Адмийиан удучIуву жинар силариъ учIвру, ва силарин лиж гъарзарилан гъюлиъ убсрру ва ккабхъру. ³⁴Му ляхин гъябкъю силарбнари, жаргъну душну, шагъриъ ва гъулариъ гъамдикан халкъдиз ктибу. ³⁵Хъя му гъякъиқи гъабши ляхниз лигуз халкъ Исаийхъна гъюру. Жинар ктучIуву кас Исаин ликарихъ деънади, палатра алди ва чан фикрихъ хъади гъяркъиган, дурарик гучI кабхъру.

³⁶Му айламат гъябкъдари дурариз, жинар кайир фици сагъ гъахънуш, ктибу. ³⁷Хъя Герасин юрднан вари халкъди Исаикан чпихъан гъудучIвну гъягъювал ккун апIур, фицики дурарик зурба гучI кабхънайи. Исада, люткейиъ эъну, къяляхъ хътаку.



³⁸ Чакан жинар ктучІву касди учвра гъадагъуб Исаикан тІалаб гъапІнийи. Амма Исаи думу гъамци дупну гъадауру:

— Яв хулаз хъадакну, Аллагъди увуз фу гъапІнуш, кидибт.

Дугъура душну, Исаи чакан гъапІнуш, шагъур вуйибси ктибуру.

«Яв хъугъували уву гъюрхну»

⁴⁰ Иса къяляхъ хътакиган, халкъди думу тебрик апІуру, физики вари Дугъаз ккилигурайи. ⁴¹ Ва магъя жугъдарин мистан ахюор вуйи Ягыр кІуру сар кас дуфну, Исаин ликарикк дахъну, Дугъаз чан хулаз гъюб тІалаб апІуру, ⁴² гъаз гъапиш дугъахъ йикІру гъялнаа айи йицІикьюд йисалькан аий риш хъайи.

Иса дина гъягъру вахтна халкъ, Дугълан илтІишну, къяляхъди гъюри гъаҳыну. ⁴³ Му арайиъ, йицІикьюд йисан ифи хътадабтІраи, духтрапиз вари чан айи-адруб харж дапІну, сарихъанра сагъ апІуз дархъи сар дишагълийи, ⁴⁴ къялхъянди дуфну, Исаин палатдин гъирағъдик хил кубкІру ва дишлади дугъан ифи хътабтІуру. ⁴⁵ Хъа Исаи гъерху:

— Узук фуж куркІну?

Вари инкар шулайиган, Петри кІуру:

— Я Мялим! Халкъди уву къялать тІаъна ва хъуржра.

⁴⁶ Хъа Исаи гъапи:

— Фуж-вуш Узук куркІну, Уз’ан къувват удубчІвуб гъисс гъапІунза.

⁴⁷ Дишагълийиз чахъан гытІикІуз даршлуб дябкъну, гукІунди багахъ духыну, Исаин ликарикк ккархъну, чав Дугъак гъаз куркІнуш ва фици учв дишла сагъ гъаҳынуш, вари халкъдин улихъ мялум гъапІу. ⁴⁸ Исаи дишагълийиз гъапи:

— Йиз риш! Яв хъугъували уву сагъ гъапІунву; архаин духыну, гъараах.

Ягырин риш сагъ апІуб

⁴⁹ Исаи гъамци кІури имиди, жугъдарин мистан ахюорин хул’-ан дуфну, сар касди дугъаз кІуру:

— Яв риш гъакІну, сарун Мялим инжик маплан.

⁵⁰ Хъа Исаи, гъаму гафар deerхъну, дугъаз кІуру:

— ГучІ маплан, анжагъ хъугъ, яв риш ккадархъиди.



⁵¹ Дуарин хулаз хъуркъган, Исаии Петризна, Югъандизна Якъубдиз ва гъацира шуран адашдизна дадайизтІан хулаъ учІвуз ихтияр тувундайи. ⁵² Вари гъачІи шурахъ ишури ва ишлар апІури айи. Хъа Исаии дуариз гъапи:

— Мишанай, думу дукІнадар, хъа даахна.

⁵³ Хъа халкъ, думу дукІнайиб аygъяди, Исаийин аylхюри гъахъну. ⁵⁴ Дугъу, кIуруш, вари хул'ан утIурккну, шуран хил диснусу, кIуру:

— Я риш! Гъудужв!

⁵⁵ Ва шуран рюгъ къяляхъ хътабкуру, думу дишлади гъудужву-
ру. Исаи, шураз ипIруб тувай, кIуру. ⁵⁶ Шуран абиир-бабар
мюгътал шулу. Исаи му ляхникан шлизкIа даркIуб амур апIу-
ру.

ЙицIикьюр ученик Аллагъдин Паччагълугъдикан хабар рабгъуз гъауыт

¶ ¹ Чан йицIикьюр ученикдиз дих дапIну, Исаии дуариз,
вари жинарин зиин гъюкум ва уъзрар сагъ апIбан бадали,
къувват тувру. ² Дугъу дуар Аллагъдин Паччагълугъдикан ха-
бар рабгъуз ва иццрудар сагъ апIуз гъауру. ³ Исаии дуариз
кIуру: «Рякъюз фукIа магъадабгъанай: я чамах, я тавра, я уъл,
я пул, ва къюб жар палатра хъади дарибши. ⁴ Фуну хулаъ
учІвишра, гъадушваъ дергай ва гъадлин рякъюз учІвай. ⁵ Хъа
эгер учву наанкIа къабул дараапIиш, думу шагъриан удучІвру-
ган, ичв ликарик кайи бишируг гъаддариҳынди кадабхъай. Гъит
му дуариз чпиин улубкърубдин улихъимиidi дебккрайи лишан
ибшири».

⁶ Аллагъдин Паччагълугъдикан Ужувлан хабар рабгъури ва
аъзарлуйир сагъ апIури, дуар гъулариъ лицуз рякъюз учІву.

Гъироддин гъалабулугъ

⁷ Исаии апIурайи гъаму вари ляхнарикан гъакимдар Гъирод-
диз ебхуру. Думу мюгътал шули гъахъну, гъаз гъапиш садари му
гъачIихъан чIиви гъаши Ягъ'я ву кIури, ⁸тмундари, Ил'яс пай-
гъамбар гъафну кIури, имбударира дегъзаманийиrin пайгъамбра-
рикан сар чIиви гъахъну кIури, аваза ипнийи. ⁹ Хъа Гъиродди
кIури гъахъну:



— Ягъ'яйин кIул узу алдабтIунза, хъа узуз Мугъкан гъамкъан
ебхуурайи му Кас фуж вуйкIан?

Гъаддиз Гьиродди Иса рякъюз чарийр зигурайи.

Хъуд агъзур кас тухъ anIуб

¹⁰ Хъадакну гъафи вакилари, чпи фу гъапIнуш, Исаиз ктибтуру. Хъасин Иса, вакиларра гъадагъну, Вифсайда кIуру шагыриз гъягъюру. ¹¹ Амма мидкан хабар гъабхыи халкъ Исаин къяляхъ хъахъру. Дугъура, къабул дапIну, дурагиз Аллагъдин Паччагълугъдикан сюгъбат гъабхуру, хъа сагъ дуихъну ккунидар уъзраихъан марцц апIуру.

¹² Йигъ хябахъ хъуз хъюбгъю. ЙицИкъюриддира Исаин ба-
гахъна дуфну, кIуру:

— Халкъ деет, гъит багахъ хайи гъулариъ ва ятгъариъ иишв
адапIри ва ипIруб агбри, гъаз гъапиш ухъу фукIа адрушваш ахъа.

¹³ Исаи: «Дурагиз ипIруб учву тувай», — кIуру. Ученикарира:
«Учухъ хъуб уълна къюб балугътIан хъадарчуухъ, гъамус учу, душ-
ну, му халкъдиз ипIруб гъадабгъну ккундинхъя?» — кIуру.

¹⁴ Дураг хъуд агъзур касдихънакъан вуйи. Исаи дурагиз: «Ду-
раг дестийриъ хъу-хъуцIуркъан ади дитай», — гъапи. ¹⁵ Ученика-
ри гъаци дапIну дураг дитру.

¹⁶ Исаи, хъуб уълна къюб балугъ гъадагъну, завузди дилигну,
Аллагъдин ужувлакк ккахъри, дупну, гъудутIну, ученикарихъна
халкъдиз пай апIуз тувру. ¹⁷ Вари халкъди ипIуру, тухъ шулу ва
хъиригъу къацIари йицИкъюб тавра апIру.

Исаи Чаин улубкърубдикан кIура

¹⁸ Сабан, Чан ученикарра хъади, саб халват иишваш ккарагура-
йиган, Исаи дурагихъан гъерхру:

— Халкъди, Узу фуж ву пну, гъисаб апIура?

¹⁹ Дураги жаваб вуди кIуру:

— Садари Уву штуан апIру Ягъ'я, тмундари Ил'яс, шубурпи-
дари кюгъне пайгъамбрарикан сар чIиви гъахъну кIури, гъисаб
апIура.

²⁰ Исаи дурагихъан хъана гъерхру:

— Хъа учву, Узу фуж ву кIури, гъисаб апIурачва?



Петри жаваб тувру:

— Аллагъдин Месигъ ву кIури.

²¹Хъя Дугъу, мидкан гыч саризра дарпуб ижмишнаан гъада-гъя дапIну, ²²хъя давам апIуру:

— Инсаниятдин Бал'ин гизаф аyzабар улукъиди, аyxюдари, маллиири ва къанунчиири Думу нигъ апIиди ва йикIиди, хъя шубудпи йигъян чиви хьиди.

**«Узухъди гъюз ккунири
чав учв нигъ апIри»**

²³Вардаихъинди илдицну, Исаий кIуру:

— Шлиз Узухъди гъягъюз ккундуш, думу чан тямягъяр дирч-ну, гъар йигъандин хач гъадабгъын* Узухъди гъюри. ²⁴Фици-ки, шлиз чан уьмур уьбхоз ккундуш, дугъан думу дубгди, хъя шли чан уьмур Узу бадали пуч гъапIиш, дугъу думу уьбхиди. ²⁵Чав учв пуч, ясана чав чаз заар гъапIхъантине, вари дюн'я чаз гъабшишра, инсандин фу хайир ахъя? ²⁶Шли Узхъан ва Ийз гафарихъан нач гъапIиш, Адашдин, Чан ва марцци малайика-рин гъяйбатлувалиъди гъафиган, дугъхъан Инсаниятдин Бали-ра нач апIиди. ²⁷Гъякъди кIуразачвуз: мушв'ин дийигънайдари-кан сакъодариз, чпин ажгал хъубкъайиз, Аллагъдин Паччагъулугъ рябкъиди.

**Муса ва Ил'яс пайгъамбарихъди
гъабхъи гюрюш**

²⁸Гъаму гафар дупну миржид йигъланси Иса Петр, Югъан ва Якъуб хъади дагъдиина ккарагуз удучIуру. ²⁹Ккарагурайиган, Исаин машнан рябкъювал дигиши шулу ва Дугъан палтарра лизи шулу, вацIрацIар апIури, нур туври шулу. ³⁰Ва магъа, Ду-гъахъди кьюр жвуу сюгъбат апIура: мураг Муса ва Ил'яс вуйи. ³¹Гъяйбатлу аднаъди дуфнайдари, Ерусалимдис улубкъру Иса-ин ажаликан улхури айи. ³²Петрна дугъахъ хъайдар му ара-йиль нивкIуз душнайи, хъя нивкI'ан хъиргиган, дуариз Исаин гъяйбатлувал ва Дугъан багахъ хъайи гъадму кьюр кас рякъору.

* 9:23 Исаий му гафариинди Чан уьмур хачриин фици аyzабариккна тувнуш, гъаци чан уьмур гъайиф дарди тувуз шлурис кIурайиб ву.



³³Дураг Исаиихъан гъудучІвурайиган, Петри, чав фу кІурашра аягъдарди, Исаиз кІуро:

— Я Мялим! Учуз мушвахъ ужуди вучуз! Гъач учу шубуб паж апІуча: саб Увуз, саб Мусайиз ва саб Ил'ясдиз (Петриз, чав фу кІураш, аягъдай).

³⁴Дугъу гъаци кІурайи вахтна, диф арайиз гъюру ва дураг ккаъру. Дураг дифру ккаъган, ученикарик гучI кабхъру. ³⁵Хъа дифрагъян сес шулу:

— Му Йиз кадагънайи Бай вуйиз, Гъамгъахъ хъебехъай!

³⁶Му сеснахъан, Иса сарди гъузру. Ученикар гъадму йигъари чпиз гъябкьюбикан саризра Чалкъан дарпиidi гъузнийи.

*Жин кубчири шлу бай
сагъ апІуб*

³⁷Хъайигъан дураг дагъдилан улдучІвган, Иса гизаф халкъди къаршуламиш апІуро. ³⁸Сабпну халкъдин арайигъян сари гъарай гъапІну:

— Мялим! Миннат вуйиз Увуз, дуфну йиз бализ лига, узухъ хъайир думу сар вуйиз! ³⁹Жинди думу Чюркьюри шулу, хъа сабпну Чигъар утІурччуру ва Чиргуру, ушвниан каф утІубччуру, хъасин, бегъемди аззабар тувбалан къяляхъ, цИб яваш шулу. ⁴⁰Узу Яв ученикарикан думу ктІубккуб тІалаб гъапІнийза, хъа дурагихъан гъабхъундар.

⁴¹Исайи жаваб тувру:

— Агъ хътругъру ва аэрбатан дубхънайи наисил! Узу филадиз учвухъди хъиди ва учву аых апІури гъузди! Хъади гъач мина яв бай.

⁴²Исаиихъна гъюрайиган, бай жинди ккитІикІуро ва Чиргуру. Исайи чиркин рюгъназ буйругъ тувру ва жигъил, сагъ дапІну, чан адашдихъна тувру.

*Ученикар Чан аյжалыккан гъапи Исаин
гъаври ахъундар*

⁴³Вари Аллагъдин къудратниин мюгътал шуи. Исайи гъапІ-къандарииин вари мюгъталди имиди, Дугъу Чан ученикариз кІуро:

⁴⁴— Гъаму гафар ужуди ичв кІваин гъитай: Инсаниятдин Бай багарихъди инсанарин хилиз тувди.



⁴⁵ Амма дураги ми гафарин гъаври ахъундар ва дурагин мяна ученикарихъан гъебкнади гъабхыну, гъаддиз дураги думу аннамиш гъапIундайи. Хъа мидкан Исаихъан гъерхуз дурагиз гу-Чуйи.

Фуж аыхюр ву

⁴⁶ Хъасин ученикарин арайиъ, дурагикан аыхюр фуж вуйкIан кIури, гъюжат абхъру. ⁴⁷ Исаи, дурагин юкIвариъ айиб аygъяди, сар бицIир гъадагъну, думу Чан улихъ дерккру, ⁴⁸ ва ученикариз Дугъу гъамци кIуру:

— Шли ми бицIир Йиз ччвурнахъ къабул гъапIиш, гъадгъу Узу къабул апIура. Хъа шли Узу къабул гъапIиш, гъадгъу Узу Гъа-ур къабул апIура, фицики учвкан вартIан цИб вуйир фуж вуш, гъадму зурба ву.

⁴⁹ Гъадмуган Югъанди гъерхру:

— Мялим! Учуз Яв ччвурнахъан жинар ктаурайи сар кас гъяр-къюнчуз ва дугъаз гъадагъа гъапIунча, гъаз гъапиш думу ухъухъ-ди лицури шлур дар.

⁵⁰ Исаи дугъаз кIуру:

— Гъадагъа мапIанай, фицики фуж учвуз къаршу дарш, думу учвхъанди ву.

Самария уълкейин саб гъулაъ Иса къабул гъапIундар

⁵¹ Иса жиларилан айршариз гъадагъру йигъар багахъ гъахъиган, Дугъаз Ерусалимдиз гъягъюз ккун шулу. ⁵² Ва Дугъу Чан улихъди чархачайир гъаъру. Дурагга душну, Думу гъюбаз гъязурвал апIбан бадали, Самария уълкейиъ айи саб гъулъ учIвру. ⁵³ Амма душваъ Иса къабул гъапIундайи, гъаз гъапиш дурагиз Думу Ерусалимдиз гъягъюрайир вуйиб аygъю гъабхънийи. ⁵⁴ Му ляхин дябъ-ну, Дугъан ученикар вуйи Якъубдина Югъанди кIуру:

— Я Агъа! Учу, завариан цIа убгъ, дупну, диди дураг тIанкъ дапIну ккундунуз?

⁵⁵ Хъа Дугъу, дурагихъинди илдицну, гъадагъа апIуру. ⁵⁶ Хъа-син дураг саб жара шагъриз гъягъюру.



*Аллагъдин Паччагълугъдиз
учІуз лайкылуваликан*

⁵⁷ Дураг рякъюъ айиган сари Исаиз:

— Уву наана гъушишра, узу Увухъди гъидиза, — кІуру.

⁵⁸ Исаий дугъяз гъапи:

— Сулариз — мугъарийир, завунничхариз мукъар а, хъа Инсаниятдин Бализ кІул дивну дахъру йишв адар.

⁵⁹ Хъа сар жаариз Исаий: «Узухъди гъач!» — кІуру. Хъа дугъу: «Агъа! Узухъди сифте, душну, дукІнайи йиз адаш кивуз гъит», — кІуру.

⁶⁰ Хъа Исаий дугъяз гъапи:

— Гъит дийихнайдари чпин гъийихдар киври, хъа уву душну Аллагъдин Паччагълугъдикан Ужувлан хабар рабгъ.

⁶¹ Хъана сари гъапи:

— Узура Увухъди гъягъидиза, Агъа, амма сифте, душну, йиз хуландариз баркаллагъ пуз гъит.

⁶² Исаий дугъазра гъамци гъапи:

— Дурциин чан хил иливхъан, къяляхъинди илдицру кас Аллагъдин Паччагълугъдиз ярамиш дар.

*Исаий чан улихъди шағырар-гъулариз
ургцІурна кью ученик гъаъру*

10 ¹ Мидхъан Исаий ургцІурна кью жара ученикарра ктагънува кью-кьюрди, Чан улихъди, Учв гъягъюз ккайи гъарсаб шагъриз вая гъулаз гъаъру. ² Дурагиз гъамци кІуру:

— Иган гизаф а, хъа убгрудар цІб; гъаддиз игнин Агъайиз, Чан игнлиз убгрудар гъаъ кІури, ккарагай. ³ Гъараҳай! Узу учву жанавараригъна агълижарси гъаъразачву. ⁴ Жвувахъди я пул, я тавра, я шаламар магъадагъанай ва саризра рякъюъ салам мутуванай.

⁵ Фуну хулаъ учІвишра, сифте: «Му хулаъ мясяляйт ибши!» йипай. ⁶ Ва эгер гъадму хулаъ мясяляльтчи кас аш, дугъяз учвухъди мясяляйт хъибди, хъа нагагъ адарш, мясяляйт учвухъна къяляхъ гъибди. ⁷ Дергу хулаъ гъузай, дурагиз айидикан ипІнай-убхъай, фицики лихруриз чан гъякъи лайикъ ву. Хул'ан хулаъ уду-Чівурни маҳъанай. ⁸ Фунуб вушра шагъриз гъафиш ва учву къабул гъапІиш, учвуз гъивуб ипІнай. ⁹ Душваъ айи айзарлуйир сагъ



апИнай ва дураиз: «Учвухъна Аллагъдин Паччагълугъ багахъ дубхъна», йипай.¹⁰ Эгерки саб шагъриз дуфну, учву къабул дарапИш, кючейиз удучIвну йипай:¹¹ «Ичв шагърий учук кабсу биширугра ичв ликариина ктIубччурача, хъа аыгъю йибхъайки, учвухъна Аллагъдин Паччагълугъ багахъ дубхъна».¹² Узу учвуз кIуразаки, гъиямат йигъян Содомдиз гъадму шагъризIан ужу хъибди.

*Тахсрар гардандиз дидрисру
Галилей улкейин шагърарин
гъял пис хъибди*

¹³ Гъял пис хъибдияв, Хоразин! Гъял пис хъибдияв, Вифсайда! Учвуз Узу улупу гъайбатар Тириз ва Сайдайиз гъяркънийиш, дурарин агъалиири ухдитIан, чпиҳъ яснан палтар ва кIул'ин рюкъ алди деъну, тахсрар чпин гардандиз дисидийи.¹⁴ Гъаци вушра, суд апIруган, учвузтIан Тиризна Сайдайиз рягъятди хъибди.¹⁵ Хъа увура, Кафернагъум, а yrшаризкъан за хъибдиза кIурайна? Ваъ, гурбагуриз абхъдиву!

¹⁶ Учвухъ хъпехъурайир Узухъ хъпехъура, ва учвхъан маш гъадабгъурайири Узхъан маш гъадабгъура. Хъа Узхъан маш гъадабгъурайири Узу му дюн'яиз Гъаурихъан маш гъадабгъура.

*УргцIурна къюр
шадди хъадакну гъафи*

¹⁷ Исаи гъайнайи ургцIурна къюр ученикди, шадди къяляхъ хъадакну, кIуру:

— Агъя! Яв ччвурнахъди учуз жинарра кимиidi мютIюгъ шуйи.

¹⁸ Исаи дураиз гъапи:

— Узуз зав'ан къюркълин цIаси абхъу иблис гъябкъюнзуз.

¹⁹ БитIарииин, айкърабарииин ва вари душманвалин къувватарииин алархъуз Узу гъюкум туваразачвуз ва учвуз фтикIа зарар тувидалар.

²⁰ Аммаки жинар учвуз мютIюгъ шула кIури, мид'ин шад маҳнай; хъа гъаддин шад йихъайки, ичв ччвурар сарун а yrшарик дидикIна.



Исаин шадвал

²¹ Гъадму сяльтна Иса Аллагыдин Рюгъналан шадвали ацІру ва кІуру:

— Адаш, заваринна жиларин Агъя! Аяңдарихъанна аькьюл-лударихъан гъитІбкІнайиб бицІи касариз ачуҳъ апІбаз Увуз чухсагъул! Ав, Адаш, Увуз думу Яв ужувлан ният гъаци дубхъну ккундувуз. ²² Йиз Адашди вари тувунзуз. Бай фуж вуш, Адаш-дизтІан гъайри саризра аыгъдар, Адаш фуж вуш, БализдизтІан гъайри саризра аыгъдар. Ва Бали Адаш шлиз ачмиш гъапІиш, гъадгъаз аыгъю хыбди.

²³ Анжагъ ученикаriz вуди, Исаий дурагиҳынди илдицну кІуру:

— Учвуз рябкьюрайиб рябкьюрайи улар хушбаҳтаврар ву!

²⁴ Фицики кІуразачвуз: гизаф пайгъамбариизна паччъариз учвуз рябкьюрайиб рябкьюз ккундийи, хъа гъябкъондар, учвуз ебху-райиб ебхууз ккундийи, хъа гъеебхуундар.

Багахъ хъайир фуж ву

²⁵ Магъя сар къанунчии гъудужвну, Иса ахтармиш апІури, гъерхру:

— Мялим! КкудуубукІру уымур рубкъуз узу гъапІну ккунду?

²⁶ Исаий дугъхъан гъерхру:

— Къанундись фу дибикІна? Диidisь фу урхури шулва?

²⁷ Дугъу гъапи:

— Яв Агъя Аллагъ, вари юкІв хъипну, вари рюгънаан, вари күвватнаан, вари фагъмиан ккун апІин ва яв багахъ хъайир жувуз жувуси ккун апІин.

²⁸ Исаий дугъаз кІуру:

— Диюзи жаваб тувунва; гъаци апІин ва яшамиш хъидива.

²⁹ Хъа дугъу, учв дюз алауз ккунди, Исаийз кІуру:

— Хъа йиз багахъ хъайир фуж ву?

³⁰ Мидиз Исаий гъапи:

— Сар кас Ерусалимдиан Ерихондиз гъягъюри гъахъну ва, гъач-гъарин хилий ахъру, дураг, дугъан палтар илдитну, думу дурччв-ну, йикІру гъялнаа итну, гъудучІвну гъягъюру. ³¹ Чан ляхин адигъадму рякъюъди сар малла гъягъюри гъахъну ва, гъадму кас



гъяркънушра, гъудучІвну гъушну. ³² Гъаци Левитра, гъадушвхъантина, дидригъди, гъудучІвну гъягъюру. ³³ Самария уълкейиан вуйи сар кас, гъадлинтина даждинди гъягъюрайир, дугъ'ин алахъуру ва, дугъаз думу дяркъну, дугъан язухъ шулу. ³⁴ Хъасин багахъна дуфну, чимна чяхир улубзури, дугъан зийнар илитІну, чан даждин илитну, хялар дергрушваз духну, дугъан гъайгъу гъизигну. ³⁵ Хъайигъан гъягъюрайири, хялар дергрушван эйси-йихъна къюб динар пул тувну, дугъаз кIуру: «Мугъан гъайгъу зиг, хъа пул артухъди харж гъабхъиш, хъадакну гъюрури туварзаяв». ³⁶ Гъаму шубур касдикан гъачгъарин хилиъ ахъуриз вартІан багахъ гъашир фуж ву кIури, фикир апIурава?

³⁷ Къанунчий:

— Гъелбетда, дугъаз уж'вал гъапIур, — гъапи.

Исайи:

— Гъараҳ ва увура гъаци апIури йихъ, — кIуру.

Марфайин хулаъ

³⁸ Сабан Чан ученикарихъди рякъюъ аи Иса саб гъулаз гъю-ру; мушваъ сар Марфа кIуру дишагълийи Думу чан хулаъ къа-бул апIуру. ³⁹ Дугъаз Мар'ям кIуру чи аи; думу, Исайин ли-карихъ деъну, Дугъан гафариҳъ хъпехъури гъахъну. ⁴⁰ Марфайи, ужуб хураг апIбан гъайгъушнаъ ади, Исайин багахъна дуфну гъапи:

— Я Агъа! Йиз чуччу узу сарди гъитну Увуз вижна ктарнуз? Узуз кюмек апIин йипа дугъаз.

⁴¹ Исайи дугъаз жаваб буди гъапи:

— Гъей Марфа, Марфа! Уву гизаф ляхнарин гъайгъушнаъ ади гъяляргъюрава. ⁴² Хъа лазим вуйиб анжагъ саб ву. Хъа Мар'яди сарихъянра тадабгъуз даршлу ужувлан пай кадабгъна.

Исайи ученикариз ккарагуз улупуб

11 ¹Сабан Иса саб йишаъ ккарагурайи. Ккарагбаҳъан, Дугъан ученикарикан сари Дугъаз гъапну:

— Агъа! Ягъ'айи чан ученикариз ккарагуз фици улупнуш, учузра ккарагуз улупа.

²Дугъу дурагиз гъапи:



— Карагруган, йипай:

Я ич Адаш! Яв ччур гирами ибши;

Яв Паччагълугъ улубкыри;

³ Гъарсаб йигъяз учуз лазим вуйи уъл ча;

⁴ Ич гунгъариланра хил алдабгъ,

учура гъарсар учуз буржлурилан хил

алдабгъури шулча;

хъа учу тямягъарий мааан.

*Ча кIууриз тувди, абгруриз бихъиди,
раккник куччуриз абциди*

⁵Хъана Исайи дурагиз кIуру:

— Пухъаки, учвкан сари, чаз дуст ади, гъацIишваринган ду-
гъахъна дуфну, дугъаз кIуру: «Я дуст! Узуз шубуб уъл буржназ
ча, ⁶рякъюь айи йиз сар дуст хулаз дуфнайиз, ва узуз дугъаз
гъивуз ужуб фукIа адарзуз». ⁷Хъа дугъу хулан айтIан увуз жа-
ваб тувди: «Узу бизар мапIан, раккнар сарун хъяркыназа ва йиз
баярра узухъди ахникик дахъна; узхъан гъудужвну, увуз уълер
тuvуз шулдарзухъан». ⁸Хъана кIарзачвуз, дугъу увуз ичв дуства-
лин гюроматнаан уъл тутрувишра, хъа эгер чахъан уву тувайиз-
къан хътадакруб аыгъю гъабхъиш, гъудужвну, ккун гъапIу къа-
дар уълер тувдивуз. ⁹Узу кIуразачвуз: ча йипай — тувдичвуз;
абгай — бихъидичвуз; раккник кучай — абцидичвуз. ¹⁰Гъарсар
ча кIурайириз тувди; абгурайириз бихъиди; кучрайириз абциди.
¹¹Уву фицир адаш вува, бали балугъ ча гъапиган, дугъаз балу-
гъин ерина битI туврур? ¹²Ясана, мурта ча гъапиган, дугъаз
аыкъраб туврур?

¹³Гъаци вуйиган, учву пис адмийир вушра, ичв веледариз
ужуб тувуз удукурган, айшариин али Адашдихъан, хъанара
ужуди, Чахъан ча кIурудариз Аллагъдин Рюгъ тувуз хъибди.

Иса ва Велзевул

¹⁴Саб ражари Исайи Чал дубиснайирикан жин ктапIу ва думу
улхуз хъюгъю, халкъра мид'ин мюгъттал гъахъи. ¹⁵Дурагикан бя-
зидари кIури гъахъну:

— Дугъу жинар жинарин аыхор Велзевулин къувватниинди
ктаура.



¹⁶Хъя тмундари, Иса ахтармиш апIури, Дугъкан аyrшиан саб аylаматнан лишан ккун апIури гъахъну.

¹⁷Хъя Дугъу, дурарин ниятар аygъяди, кIуру:

— Чан айтI душманвал ади, пай гъабши гъарсаб паччагълугъ ичIи шул ва душманвал ади жара гъабши хизанра ккадабхъур.

¹⁸Эгерки иблисра чан айтI чахъди дявдиль гъабшиш, дидин паччагълугъ фици сагъди гъубзихъя? Хъя учву, Узу Велзвулин ккуватну жинар ктаура, кIурачва. ¹⁹Эгер Узу Велзвулин ккуватну жинар ктаураш, хъя ичв терефкраги дурар шлин ккуватну ктаура? Гъаддиз дурар учвуз диванчийр ишри. ²⁰Эгерки Узу жинар Аллагъдихъан гъюрайи ккуватну ктаураш, икибаштIан, учвуз Аллагъдин Паччагълугъ хъубкъна.

²¹Ккуватлури, хилиъ яракъ ади, чан хал уьбхюрайиган, дугъян мутмуйиз хатIавал адар. ²²Хъя дугъ'ина думутIанра гужлир алархъиган ва дугъ'ин гъалиб гъашиган, гъадмуган дугъян, учв уьрхюрга кIури миж кайи вари яракъра чаз гъадабгъиди ва тадабгъубра пай апIиди.

²³Фуж Узухъди дарш, гъадму Узуз къаршу ву ва, шли Узухъди уч апIурадарш, гъадгъу зяя апIура.

Жин хъадабкну гъюваликан

²⁴Чиркин рюгъ, инсандиан удубчIвиган, шид адрушвариль либ-цури, чаз архайнвал абури шулу, дубрихъиган, кIуру: «Узу утIуб-кку йиз хулаз хътабкидиза». ²⁵Хътабкубдиз хал ичIикнади ва марцц дапIнади рябкъору. ²⁶Гъадмуган диди, дубшну, хъана ургубсан жин хуру, дурар дугъяш учIвну яшамиш шулу, ва думу касдиз улихъдитIан гъамус артухъ пис шулу.

Гъякъикъи баhtаварвал

²⁷Исайи гъамци кIурайиган, сар дишагълийи халкъдигъян яманди Дугъяз кIуру:

— Уву дюн'яйиз гъахи ва аыхю гъапIу дишагъли хушбаhtавар ву!

²⁸Хъя Исайи дугъяз кIуру:

— Аллагъдин гаф ебхурайидар ва тамам апIрудар хъана ар-тухъ хушбаhtавар ву!



Заварисан вуйи айламатарикан
Исайи айгъювалар улуупура

²⁹ Хъя халкъ гизаф уч гъашиган, Исайи пуз хъюгъру:

— Му хътругъру насыл ву; дураг заварин айламатариз ккилигурда, хъя Юнусдин айламатналан гъайри дурагиз жара айламат рябкъидар. ³⁰ Юнус Ниневияйин агъалиириз фици айламат вуди гъахънуш, гъаци Инсаниятдин Байра му наслиз айламат вуди хьиди. ³¹ Гъиямат йигъан суд апIру вахтна къиблайнин пачагъ-ханум гъамусдин адмийириз къаршу гъудужвну, дурагар тахсиркар апIиди, фицики думу дюн'яйин тму Күлиан Сулеймандин фагъумлувалихъ хъпехъуз гъафний; хъя магъа мушвахъ СулеймантIан зурба Вуйир хъя. ³² Гъиямат йигъан Ниневияйин агъалиир му наслин адмийирин дивандиз дуфну, дурагар тахсрар ачухъ апIиди, фицики Юнусди улуупу айгъювалариинди дураги чин гунгъар гардандиль гъидисну. Хъя магъа мушвахъ ЮнустIан ахъюр Вуйир хъя!

Бедендин чирагъ

³³ Сарира, чирагъ кабхъну, жини йишвахъ дивдар, я дид'ин гъаб иливдар, хъя, хулаъ учIврайидариз акв шлуси, чан йишв'ин дивру. ³⁴ Бедендин чирагъ ул ву, гъаци вуйиган, эгер яв ул марцциди вуш, яв вари беденра акуди хъибди. Хъя эгер яв ул чIуруб вуш, яв беденра мучIуб хъибди. ³⁵ Гъаци вуйиган, лиг гъа: уувъ айи акв мучIушин вуди дарибши! ³⁶ Эгер яв беден вари акуб вуш ва дидик сабкъан мучIу пай ктарш, вари гъаци аку хъибдики, хиял апIин, чирагъди уву чан нурниинди аку дапIна.

Исайи фарисийирикна къанунчиирик
тахсрар кирчра

³⁷ Исайи гъаци кIурайиган, сар фарисейи Дугъаз чан хулаг ли-сундин хураг ипIуз теклиф апIуру. Иса, дугъахъна дуфну, гъон йивну, дахъру. ³⁸ Фарисей, Исайи, уъл ипIайиз, чан хилар диж-рикIиган, мюгътал шулу. ³⁹ Агъайи дугъаз кIуру:

— Учву, фарисийири, ичв рюкъчарин чIатан тереф марцц апIури шулчва, хъя ичв айтIишв угъраш'валихъдина аймалдарвалихъди абцIину шуличв. ⁴⁰ Эй фагъумсузар! ЧIатан тереф яратмиш



ГъапIури айтIишвра яратмиш гъапIундаринхъ? ⁴¹ Ужуб гъадму вуки, учвуз айибдикан садакъа тувай, гъадмуган ичв вари ляхнар марццидар хъиди.

⁴² Ичв пис гъял хъибди, фарисийир, фицики учву шюшеукIа-рилан, кIашнишарилан ва миди вуйи мейвийирилан йицIубдик саб пай туврачва, хъа гъякъувалин ва Аллагъдин масанвалин гъайгъушнаь адарчва. Учву гъамунубси, тмунубра дапIну ккунду. ⁴³ Ичв пис гъял хъибди, фарисийир, фицики учву жугъдарин мистариль гъорматлу йишвар дисуз ва мажлисариль жувван тяри-фар ерхъуз ккунидар вучва. ⁴⁴ Ичв пис гъял хъибди, фицики учву, чпин зиълан инсанар лицури ва мидкан чпиз хабар адру, жиликк ккайи накъварсадар вучва.

Къанунчийирихъди сюгъбат

⁴⁵ Мидиз жаваб вуди къанунчиирикан сари Дугъаз гъапи:

— Мялим! Гъамци кIури, уву учузра гиран ктапIурава.

⁴⁶ Хъа Исайи кIуру:

— Учвухъра, къанунчийир, бала хъабхъди, фицики инсанари-ин гъахуз даршлу гъагъар илирчурачва, хъа дураг гъахбан ба-дали, учву ичв саб Тубкъан кучрадарчва. ⁴⁷ Пис гъял хъибди ичв, фицики учву, ичв абири гъийиху пайгъамбрариз гюмбтар диврачва. ⁴⁸ Гъамдинди ичв абири гъапIу Чуру ляхнарин гъякъанаан шагьидвал апIурачва ва дурарихъди рази шулачва, фицики гъадрари пайгъамбрар гъийихну. Хъа учву дурагиз гюмбтар диврачва. ⁴⁹ Гъаддиз Аллагъдин аяндарвалиинди гъам-ци кIура: «Дурарихъна пайгъамбрарна вакилар гъаъдиза, хъа дурагикан садар йивну йихиди, хъа тмундар утIурккиди». ⁵⁰ Ва гъаму насликан дюн'я яратмиш гъапIхъамина гъийиху вари пай-гъамбрарин удубзу ифи кадабгъри. ⁵¹ Авелин ифдилан гъадабгъ-ну, Аллагъдин хулаь айи гъурбан гъапIдар урккру йишванна Гирами йишван арайиъ удубзу, Закар'яйин ифдиона гъайиз-къан, кадабгъри. Ав, кIуразачвуз, гъаму насликан ктабгъиди. ⁵² Пис гъял хъибди ичв, къанунчийир, фицики учву аygьюваларин ачар бисуз дебисначва, амма я учву учIундарчва, ясана учIврудар гъитрадарчва.

⁵³ Иса гъудучIурайиган, къанунчийирна фарисийир Исайиз, хъючиюркъну, багахъ шуз хъюгъру. Дугъкан чпин ахючиювъ



суалариз жаваб тувуб ккун апIури, ⁵⁴ дурализ, Исаий туву жавабарий Дугъак тахсир кипуз шлу гафар агуз ният ади гъабхыну.

Кьюб маш гъяйи фарисийрикан

12 ¹Му арайиъ, агъзрариинди халкъ уч духьну, сари-сар хъур-жуз хъюгъиган, Исаий сифте Чан ученикариз кIуру:

— Ихтият иихьай фарисийрин дунихъан. Думу кьюб маш гъя-йивал ву. ²Учв ачухъ даршлу гъич саб гъитIибкIуб адар ва ашкар даршлу гъич саб жиниб адар. ³Гъаддиз учву мучушнаш гъапиб аквнахъ ебхьиди ва хулан айтI ибахъна гъапиб гъваълан атIабг-ну пиidi. ⁴Учвуз, Йиз дустариз, кIураза: беден иибкIрударихъан гучI мапIанай, фицики дурарихъан сарун артухъ фукIа апIуз шулдар. ⁵Хъа шлихъан гучI дапIну ккундущ, кIурзачвуз: гъачIи-ган, жегъеннемдиль Итрурихъан гучI апIинай. Ав, кIуразачвузки, Гъадгъухъан гучI апIури иихьай. ⁶Кьюб кепкихъ хъуб гъулан-жакъв масу тувдаринхъа? Гъадрикан сабкъан Аллагъди кIаъ-лан гъаънадар. ⁷Ичв кIул'ин али чIарарра кмиди Дугъу гъисаб дапIна. Гъаци вуйиган, гучI мапIанай: гизаф гъуланжакъвартIан учву заан вучва.

Исаий аыгъювалар улупура

⁸ КIуразачвузки, адмиириин улихъ Узу къабул гъапIу гъарсар кас Инсаниятдин Бали Аллагъдин малайикарин улихъ къабул апIиди. ⁹Хъа шли адмиириин улихъ Узу къабул дарапIиш, думу Аллагъдин малайикарин улихъ къабул апIидарза. ¹⁰ Инсаниятдин Бализ къаршу гаф гъапиш, дугълан хил алдабгъиди, хъа шли Аллагъдин Рюгънакан чIуру гаф гъапиш, дугълан хил алдабгъидар. ¹¹Хъа учву мистариз гъякимаринна гъокумдрарин улихъна хъади гъахи вахтна, фици ва фициб жаваб тувруш, вая фу кIуруш, ди-дин гъайгъушнаш маъланай. ¹² Аллагъдин Рюгъну, учву фу дупну ккундущ, учвуз гъадму гъялатнаш аыгъю апIиди.

Тямягъкrap маҳъанай

¹³ Халкъдин къялгъян сари Дугъаз гъапи:

— Я Мялим! Йиз чвуччвуз, адашдилан учуз гъурубкъу ирс узухъди пай апIин, йипа.



¹⁴ Исаи гъадму касдиз гъапи:

— Ичв диван апIуз вая пай апIуз Узу шли дерккну?

¹⁵ Мидихъди сабси Дугъу дурагиз гъапи:

— Лигай гъа, тямягъкрап махъанай, фицики инсандин уьмур дугъан девлетналан асиллу дар.

*Нефс кур девлетлуйикан
тахалус*

¹⁶ Хъа Исаи дурагиз тахалус ктибтуру:

— Сар девлетлу касдин хутIиль ужуб бегъер битмиш дубхънади шулу. ¹⁷ Дугъу чав-чакди гъамци фикир апIуру: «Узу гъапI-ру? Узуз йиз ризкъар ахърушв адарзуз, аыхир. ¹⁸ Гъамци апIидиза: йиз амбарханийир дарагъну, ахъюдар дивдиза ва гъадина вари йиз рузи ва вари йиз девлет уч апIидиза. ¹⁹ Хъа йиз кIаз пиidi-за: эй йиз юкIв, увуз гизаф йисариз ахъючIвэй девлет уч дапI-наза: архайн йибхъ, ипIин, убхъ, шад йибхъ». ²⁰ Хъа Аллагъди дугъаз кIуру: «Эй ахмакъ! Ахъли яв юкIв увхъан гъадабгъиди: уву гъязур гъапIуб шлиз ккабхъдийкIан?» ²¹ Шли чаз девлеттар уч апIураш, гъадгъаз гъаци хьибди. Думу Аллагъдин улихъ дев-летлу шулдар.

*Гъян хурагтIан,
жан палаттIан заан ву*

²² Чан ученикариз Исаи гъапи:

— Гъаддиз учвуз кIуразаки, ичв гъян бадали фу ипIуруш ва ичв жан бадали фу алабхъруш, гъаддин гъайгъушна махъанай.

²³ Фицики гъян хурагтIан, хъа жан палаттIан заан ву.

*Фана дюн'яйин гъайгъушнар
ва фтин гъаннаш дубхъну ккундуш*

²⁴ Къяркъариз лигай: дураги я убзури, я ккадабцIури шулдар, дурагиз я хулар, я амбарханийир адар. Аллагъди дурагиз ипIруб тувра. Хъа учву ничхраптIан хайлин артухъ дарнучвахъя?

²⁵ Учвкан сарихъанра, жувван гъайгъу зигури, гъич саб хъуршли-индиқъана жан ягъял апIуз шулин? ²⁶ Гъаци вуйиган, эгер учвхъан лап цИб вуйибра апIуз удукуурдаш, имбуунубдин гъякънаан фу гъайгъу зигидичвахъя? ²⁷ Лизи кюкийир фици ахъю шулаш,



лигай: дураги я зегъмет зигурадар, я парча убхурадар. Хъя, кIу-разачвуз, Сулейман паччагъди чан лап ад айи вахтнара дурагихъ гъарсабдихъ хъайисдар палтар алахъури гъахъундар. ²⁸ Эгер гъи чюлий ади, закур цIигъ убгурайи укI Аллагъди гъаци уччвуди балгурайиган, Дугъу учв'ин дицитIан уччвуди палат алабхъидаринхъя, цIибIан хътругърудар! ²⁹ Гъаци вуйиган, учву ипI-рубдихъна убхърубдихъ милицанай ва инжик маҳланай. ³⁰ Гъаз гъапиш вари гъамрар му дюн'яйин аллагъсузари агури шулу; хъя ичв Адашдиз учвуза дураг лазим вуйиб аygъя. ³¹ Аллагъдин Паччагълугъ абгури йихъай. Гъаци гъапIиш, имбуb вари Дугъу тувдичвуз.

³² ГучI мапIанай, бици лиж! Фицики ичв Адашди учвуз Чан Паччагълугъ тууз ужуб къаст дапIана. ³³ Ичв мулкар масу туври, садакъади пай апIинай. Жувуз аэршарий угъри удручиIвру, йирси даршу ужагъ, камк ктрабхъру ва хътIатIабцру хазна гъязур апIинай. ³⁴ Фицики, ичв девлет наан аш, ичв юкIвра гъадушваb хъиби.

Гъуллугъчийин уягъвал

³⁵ Гъарсабдиз гъязур вуди йихъай: юк'ан чIулар идитIну ишири ва чирагъар кархъну ишри. ³⁶ Агъа сумчриан дуфну, хъумп гъапIубси, дугъаз раккнар арццуз ккилигурайи гъуллугъчириз ухшар хъидичва. ³⁷ Агъайиз, хулаz хътакиган, даахнадарди гъяркью лукIар хушбахтаврап ву; гъакъди кIуразачвузки, дугъу, чан юк'ан идибIину, дураг дитди ва, гъарурихъна гъюри, чавра дурагиз гъуллугъ апIиди. ³⁸ Ва думу гъацIишваринган гъафишра, гъириккна гъафишра, гъязур гъялнаz гъидихъу лукIар хушбахтаврап ву. ³⁹ Учвуз аygъю йибхъайки, хулан эйсийиз угъри гъору вахт аygъяш, думу чан хулаz учIвуз гъитдар. ⁴⁰ Учвура гъязурди гъузай, фицики учву ккилигурни адру сяльтна Инсаниятдин Бай гъиди.

⁴¹ Гъадмуган Петри Дугъхъан гъерху:

— Я Агъа! Му тахалус учуз кIурана, даршиш вардари?

⁴² Агъайи кIуруки:

— Вафалу ва аькьюллу гъуллугъчи фуж ву? Агъайи чан лукIа-риз вахтниинди хураг пай апIбан бадали ахюорди дерккур. ⁴³ Хулаz гъафи агъайиз ляхин апIури гъяркью гъуллугъчи бахтаврап ву.



⁴⁴ Гъякъ кIуразачвузки, агъайи думу чан вари хал-ийишван ахюорди деркъди. ⁴⁵ Эгерки гъуллугъчийи чан кIваан: «Из агъа багаригъди гъидар» пну, гъаравшариз йивуз, ипIуз-убхъуз ва пи-янвалар апIуз хъюгъиш, ⁴⁶ агъа, думу ккилигури адру йигъян ва мялум дару сяльтна хъуркъди ва думу гъуллугъчи кьюб швур апIиди: дугъкан чаз мютIюгъсузариз апIруб апIиди.

***Чаз гизаф тувнайи гъарсарикан
ккунра гизаф апIиди***

⁴⁷ Чаз агъайин къаст альгъяди, дугъу гъаписи дарапIу лукI гизаф урчвиди. ⁴⁸ Хъа чаз альгъдарди жазайиз лайкълу ляхин гъапIур цибди урчвиди. Гизаф тувнайи гъарсарикан ккунра гизаф апIиди, ва шлин ихтиярнаъ гизаф ивнаш, гъадгъахъди йишв'ина-ра гизаф хуз гъитди.

***«Узу инсанар жара апIуз
Гъафир вуза»***

⁴⁹ Узу жил'ина цIа кчIибгуз Гъафир вуза ва гъаци ккунди азуз-ки, думу сарун гъамустIанра кабхъну! ⁵⁰ Узу альзабарикк ккуркъну ккунду ва гъаму кIулиз удубчIвайиз инжик вуза! ⁵¹ Узу жилина мясяляйт тууз дуфна кIури, фикир апIурчча? Ваъ, кIураз-чвуз. Узу сар-сарихъан жара апIуз дуфнайир вуза. ⁵² Фицики гъамусдихъантине саб хулаъ айи хъур кас жара хъуз хъюгъди, шубур къориз къаршу ва къор шубуриз къаршу вуди; ⁵³ адаш бализ, бай адашдиз къаршу хъиди, дада шураз, риш дадайиз къаршу хъиди; сижарбаб швшуваз, швшув сижарбабаз къаршу хъиди.

Деврин буйругъар

⁵⁴ Халкъдизра Исаи гъапи:

— Ригъалабхъу терефнахъан гъюрайи диф гъябкъиган, дишлиди: «мархъ угбъиди» кIурчча, ва гъаци шулу. ⁵⁵ Кыйблайн миkI хъивиган, «гизаф мани хъибди» кIурчча, ва гъацира шулу. ⁵⁶ Эй кьюб маш гъайидар! Уччу, жилин ва завун лишнари фу улупураш, гъудубгъунчча, хъа му вахтарин лишнарин мяна гъаз альгъю шуладарчвуз? ⁵⁷ Гъаз учвхъан жувуван фикриинди, фу дапIину ккундуш, альгъю апIуз шуладарчвухъан? ⁵⁸ Уву яв гъюжаткрихъди ахюорихъна гъягъайиз, рякъюъ имиди дугъахъди мясяляйт апIуз



чалишмиш йихь. Гъаци даршиш, дугъу уву суддиз гъахиди, судди уву жаллатIрихъна тувди, хъя жаллатIри уву дустагъдиль итди.
⁵⁹ Хъя кIуразавуз: аыхиримжи кепкиина гъайиз, яв вари бурж ктипайизкъан, душв'ан удучIвидарва.

Гунгъар гардандиль дисай

13 ¹ Гъадму арайиъ сакьюодари, гъадина дуфну, Аллагъдиз икрам апIурайиган, Пилатди Галилей уылкейин гъийиху агъларикан, Исаиз кIуру.

² Исаий дурагариз ктибтуру:

— Дурагариз мициб инсафсуз жаза тувуз, дураг миди вуйи Галилей уылкейин агълартIан артухъди гунагъкрапар ву, пну, фикир апIуранчвахъ? ³ Ваъ, кIуразачвуз: эгер учву ичв гунгъар гардандиль дидрисиш, тахсрар апIури гъашиш, учвура вари гъаци йихидичву. ⁴ Ясана учву, Силамдин чIвурд абхъиган, гъийиху йицIимиржир кас Ерусалимдин миди вуйи агълартIан артухъди тахсиркрапар ву кIури, гъисаб апIуранчва? ⁵ Ваъ, кIуразачвуз: эгер учву ичв гунгъар гардандиль дидрисди, тахсрар апIури гъашиш, учвура вари гъаци йихидичву.

Бегъерсуз инжирикан тахалус

⁶ Хъя Исаий гъамциб тахалус ктибтуру:

— Сари чан багъдиль инжирин гъар кивнади гъабхъну. Сабан, думу гъаригъ йимишар гъяш лигуз гъюру, амма гъядарди рябкъюру. ⁷ Дугъу багъбанчийиз кIуру: «Магъя, шубуд кIуру йисан мина йимишар гъяш лигуз гъюраза ва гъядарди шула; думу алдабтI, диди давди иишв бисура». ⁸ Хъя багъбанчийи дугъз: «Эй агъя! Гъаму йисансана гъибт, узу, дидин къаблихъишив дирибккну, пейин хъабхъдиза. ⁹ Диди бегъер хуруш лигухъя, нагагъ дархиш, гъюру йисан думу алдабтIархъя».

Султ йигъян жинар кайи дишагъли сагъ апIуб

¹⁰ Султ йигъян Исаий саб жугъдарин мистаъ аygъювалар улупурайи. ¹¹ Душваъ йицIимиржид йисан уззрин жин кайи сар дишагъли айи. Думу, дацIаркну, беден хъцIабкуз даршули гъахъну.

¹² Исаий, думу дяркъну, дих апIуру ва дугъз кIуру:



— Дишагъли! Уву яв уъзрихъан азад шулава.

¹³Хъя Исаи дугъ'ин хилар иливuru, дишагъли дишлади хъцла-
куру ва Аллагъдин ад за апIуз хъюгъру. ¹⁴Мистан ахюри гъадму-
ган, Исаи султ йигъан адми сагъ гъапIну кIури, хъял кубчIвну,
халкъдиз кIуру:

— Му ляхин апIуз йирхъуд йигъ а, гъаддиз сагъ апIбан бадали
султ йигъан ваъ, хъя миди вуйи йирхъуд йигъари гъачай.

¹⁵Агъайи дугъаз жаваб вуди гъапи:

— Эй кьюб маш гъайидар! Ухъкан гъарури султ йигъан чан
ийц вая дажи, тунхъан хъудубчну, шид тувуз хъапIри шулда-
ринхъа? ¹⁶Хъя магъа йицIимиржид йисан иблисди юитIнайи му
Ибрагимдин риш султ йигъан азад апIуз хай шулдаринхъа?

¹⁷Исаи гъамци кIуруган, Дугъаз къаршу удучIвнайи вардариз
нач шулу, ва вари халкъ Исаин адлу ляхнариин шад гъахънийи.

Дилкан ва дуникан

¹⁸Дугъу хъана гъапи:

— Аллагъдин Паччагълугъ фтихъна гъубшуб ву ва думу фтихъ
тевза? ¹⁹Думу, инсанди бистниъ киву дилиз ухшар ву: ктубчIви-
ган, дидкан бегъем гъар шулу ва завун ничхари дидин циркла-
ригъ мукъар апIуру.

²⁰Исаи хъанара гъапи:

— Аллагъдин Паччагълугъ сарун фтихъ теква? ²¹Думу дишагъ-
лийи гъадабгъну, шубуб сеъ хюйик капIну, хамир вари утуз
гъибути дуниз ухшар ву.

Ккуру урнарикан

²²Хъасин, гъамци аьгъовалар улупури, шагъриан шагъриз,
гъул'ан гъулаз гъягъюри, Иса Ерусалимдиз рякъю учIвру. ²³Ря-
къю сари Дугъхъан гъерхру:

— Я Агъа! Яраб уърхрюдар цIибтIан хъидайкIан?

Исаи дугъаз кIуру:

²⁴— Ккуру урнариантина учIвуз гъялак йихъай, фицики ги-
зафдариз учIвуз ккунди, хъя учIвуз хъибдар. ²⁵Гъадмуган эйси-
йи, гъудужкну, урчIар хъяркъди, хъя учву чIатан гъамци кIури
урчIарик кучри гъуздичва: «Я Агъа! Учуз урчIар арцава». Хъя
Дугъу учвуз пиди: «Учву фужар ва наънан вушра, аьгъдарзуз».



²⁶ Гъадмуган пиичва: «Учу Яв улихъ ипІури-убхури гъахъунча ва кючиирий Уву учуз аыгъювалар улупуйва». ²⁷ Хъа Дугъу пиidi: «Учву фужар ва наънан вушра, аыгъдарзуз; Узхъан дург иихъай, вари нягъякъвалар апІрудар!» ²⁸ Учвуз Ибрагым, Исақь, Якъуб ва вари пайгъамбрар Аллагъдин Паччагълугъдиль гъяркъиган, хъа учву дилин утІурккруган, зурба ишубна суза зигидичва. ²⁹ Хъа ригъгуудубчIвруна алабхъру, кафарина къибла тере-фарихъанди дуфнайидар Аллагъдин Паччагълугъдиль гъюн йивну дахъди. ³⁰ Ва магъя, аыхиримжидар сарпидарди, сарпидар аыхиримжидарди хъиди.

*Ерусалимдин гъякънаан
Исайин дердлувал*

³¹ Думу йигъан фарисийирикан бязидари, дуфну, Исайиз гъапи:
— УдучIвну, гъамлин гъараҳ, дарш Гъироддиз Уву йикIуз ккунди а.

³² Дугъу дурариз гъапи:
— Душну, гъадму аымалдар сулаз йипай: магъя гъира, закур-ра Исайи инсанарикин жинар ктаиди ва инсанар сагъ апІиди, хъа саритI Чан ляхин ккудубкIиди. ³³ Дупну ккундуки, Узуз гъина, закурна саритIтан лицуз ваҳт имдарзуз, фищики пайгъам-бар, Ерусалимдильтан дарди, жара йишваъ йикIбакк ккуркъри шулдар.

³⁴ Эй, пайгъамбрар йивну йихру ва чахъна гъау илчиириин гъван уълюбхру Ерусалим! Швнубан Узуз, пеъли чан хлин-цицариккна шюхъярси, яв халкъ уч апІуз ккун гъабхъунзуз, хъа учву кIул ккивундарчва! ³⁵ Лигай, магъя ичв хал ичIиди гъубз-на. Магъя кIуразачвуз: «Агъайин ччуврнахъ Гъюрайир ужувлакк ишири», кIури, учву дих дарапIкъан гагъди, Узу сарун ря-къидарчвуз.

Фарисейин хулаъ

14 ¹ Саб султ йигъан Иса фарисийириин гъякимарикин сарин хулаъ уъл ипІуз гъюбакк ккуркъру; хъа, Дугъу гъапІруш, дурари ул хъипний. ² Исайин улихъ хамракк шид уч шлу аyzар кайи сар кас деънайи. ³ Мициб дюшюшназ лигну, Исайи къа-нунчиирихъанна фарисийирихъан гъерхру:



— Султ йигъан дуихтирвал апIуз хай шулин?

⁴Дураг ккебехъну гъузру. Дугъу му аьзарлу дииснү, сагъ дапIину, хулаз деетур.

⁵Мидихъди сабси Дугъу гъали:

— Нагагь учвкан сарин бай вая йиц фурий абхьиш, дугъу, султ йигъ вушра, думу дишлади адабгъидаринхъя?

⁶Дурахъян Исаиз жаваб тувуз гъабхъундар.

«Шли учв заан апIури гъашии»

⁷Дих дапIайидари ужудар йишвар ктагъуради дябкъну, Исаий дуариз тахалус ктибтуру:

⁸— Сари увуз сумчриз гъюб теклиф гъапIиган, ужуб йиш'ин медеан, гъаз гъапиш гъач дупнайидарикан фужкIа увутIан артухъур вуди гъабшиш, ⁹хъа увузна дугъаз теклиф гъапIури, увухъна дуфну: «Мушв гъадгъан йишв ву», кIуруси дарибшри, даршиш думуган, начра дубхъну, харжи йишв'ин деуз мажбур хьидива. ¹⁰Саки увуз гъач дупнайиган, дуфну харжи йишв'ин деъ, увуз гъач гъапири, увухъна дуфну: «Дуст кас! Минаси кудучIв» кIурганси. Гъадмуган увуз увухъди деънайидарин улихъ артухъ гъормат хьибди. ¹¹Фицики, шли чав учв за апIури гъашиш, гъадму асккан хьиди, хъа учв аскканди дисрур заан хьиди.

Хулан эйсийиз туву тербия

¹²Хъа хулан эйсийизра Исаий кIуру:

— Лисундин вая хябахъдин хураг апIрган, я яв дустариз, я яв чвиириз, я яв мирасариз, ясана девлетлу гъуншийириз гъач ма-кIан, дуарии, увузра гъач дупну, уву гъивуб увухъна хътадбрукранси. ¹³Хъа шадвал апIру вахтна айжузариз, шикастариз, ликударииз, курдарииз дих апIин. ¹⁴Ва уву баҳтавар хьидива, фицики дурахъян чпиз гъивуб увуз къяляхъ апIуз хьибдар, хъа явра, дугъридар чIиви гъашиган, гъисабнаъ хьибдияв.

Зурба дем дюзмиш гъапIурикан тахалус

¹⁵Му гафар гъеерхъиган, Исаин гъвалахъ деънайидарикан сари кIуру:

— Аллагъыдин Паччагълугъдиъ уъл ипIур хушбахтавар ву!



¹⁶ Исаий дугъаз гъамци кІуру:

— Сар касди, аыхю шадвал дюзмиш дапІну, гизафдариз гъач гъапну ¹⁷ ва, хябяхъ гъабшиган, чан лукІ хялариз: «Гъачай, гъарсаб гъязур дуխна» пуз, гъарьу. ¹⁸Хъа вардари, гаф саб дапІнайиганси, кІулар ккадагъуз хъюгъыну. Сарпири дугъаз гъапну: «Узу жил гъадабгъназа ва узу, дина душну, дидиз дилигну ккунду, ккун апІурза узлан хил алдабгъуб». ¹⁹Тмунури гъапну: «Узу хъуд жут иицар гъадагъназа ва узу дурапиз лигуз душну ккунду, узлан хил алдабгъуб ккун апІурза». ²⁰Шубурпири: «Узу багарихъди эвлемиш духнамиза ва гъаддиз гъюз шулдарзухъан» кІуру. ²¹Хъа хъадакну гъафи гъадму лукІру чан агъайиз гъамрар вари ктитну. Гъадмуган хъял кубчІву хулан эйсийи чан лукІраз гъапну: «Гъарах, шагърин кючииригъян дагну, тяди мина айжузар, шикастдар, ликудар ва курдар хъади гъач». ²²ЛукІрура, душну гъаци дапІну, кІуру: «Агъа, яв буйругъ тамам гъапІунза, вушра саб хъана иишв ими». ²³Агъайи лукІраз гъапну: «Душну, кючиириан хъана хъади гъач, йиз хулан суфра хъабцІруси апІин. ²⁴КІуразавуз: гъадму улихъна дих дапІнайдарикан сарикъан ииз хураг ипІидар».

Исаин ученик хъувалин шартIар

²⁵ Сабан Исаихъди хайлин халкъ гъюради гъабхыну ва Дугъу, дураприхъинди илдицну, гъапи:

— Эгер сар кас Узухъна, чан адашна дада, хпирна веледар, чвийрна чийир, гъацира чан хусуси уымур нигъ дапІну дарфиш, дугъкан Йиз ученик хъидар. ²⁷Чан хач къял'ин алдрурихъан, ва Узухъди дяргъюрихъан Йиз ученик хъуз хъибдар. ²⁸Учван фунури, хулар дивуз ккунди, сифте деъну, дидиз удучІвру харжар гъисаб дарапІди, думу дивну ккудубкІбан бадали фийр лазим вуш гъисабназ гъададагъиши, ²⁹ва шибритIар ирчну, хулар ккуду-кІуз дархъиш, мици гъяркъдар вари дугъ'ин гъамци кІури айлхъидарин: ³⁰«Гъаму касдихъан, хулар дивуз хъюгъыну, ккудуркІуз гъабхуундар?»

³¹ Ясана фуну паччагъди, чахъ йицIуд агъзур эскер хъади, жара паччагъдинна дяви апІуз гъягъруган, чаина гъюрайи къад агъзур эскер айи къушмихъди дяви апІуз удукъидиш, улихъимиidi деъну,



везиарихъди мясяльт дарапІди гъитур? ³² Ясана, гъадму къушум ярхлаъ имиди, дугъу дяви дарапІбан бадали йикъарап апІуз вакилар гъаидарин? ³³ Гъамци учвкан гъарурихъан, чаз вари айбдихъан гъудудучIвиш, Йиз ученик хъуз хъидар.

Кыилан кылзивал

³⁴ Кыил ужуб мутму ву; хъа эгер кыилан кылзишин гъудубгыш, думу фти кылзи апІиди? ³⁵ Думу я ругдиз, я пейиндиз ярамиш дар; думу тина гатIабхъур. Шлин ибариз ебхураш, гъит ебхъри!

Дудубгну гъибихъу агълижикан тахалус

15 ¹Исайихъна, Дугъахъ хъпехъбан бадали, вари налук гъю-дубхрудар ва гунагъкрап гъюри гъахъну. ²Фарисийрина аylimари, Дугъу гунагъкрап къабул апІура ва дурарихъди уъл ипІури шула кIури, наразивал улупури гъахъну. ³Гъадмуган Иса-йи дурализ гъамциб тахалус ктибуру:

⁴— Учвкан, чаз варж марчч ади, дурарикан саб гъудубгиган, урчIвцIурна урчIвуб чюлиъ гъитну, гъудубгуб бихъайизкъан дарабгур фуж шул? ⁵Хъа дубихъну, думу гъюнариина шадди за апІидарин? ⁶Ва хулаз дуфну, дустарна гъуншийир уч дапІну, дурализ «Узухъди шадвал апІинай, гъудубгу чарва гъибихъунзуз», — пидарин? ⁷КIуразачвузки, гъамци аэршариъра чан тахс-рап гардандинь гъидису гунагъкрикан, урчIвцIурна урчIвур гун-гъар ктарзук кIурайи марцци касарикантIан, артухъ шад хъиди.

Гъудубгу арсран кепеккан тахалус

⁸ Ясана фуну дишагълийи, чаз йицIуб арсран кепек ади, ду-рарикан саб гъудубгиган, чирагъ кабхъну, хал ичIибури, думу бихъайизкъан дарабгди гъибтур? ⁹Хъа му гъибихъган, чан дуст хпар ва гъуншийир уч дапІну, дугъу: «Узухъди шад йихъай, узуз гъудубгу арсран кепек гъибихъунзуз» дарпиidi гъитрин? ¹⁰Гъам-ци Аллагъдин малайикарра чан тахсрап гардандинь гъидису сар гунагъкриканра шад хъиди.



*Чуру рякъюъ ади дудургну,
хъасин шумал духыну гъафи балкан*

¹¹ Исаи хъана кІуру:

— Сар касдиз кьюр бай ади гъахьну. ¹²Дурагикан бицІинури адашдиз гъапну: «Я адаш! Ихъ девлетнан узуз рубкъру пай ча». Адашдира баяриз девлет пай апІуру. ¹³Сакъюдар йигъарилан бицІину чве, чаз ккубкъуб вари уч дапІну, ярхла юрдари гъагъорува, душвариъ кефниинди яшамиш шули, чаз айи девлет вари хътипІуру. ¹⁴Хъа вари хътипІган, гъадму юрдари зурбади гаш абхъру, ва думу дарвалиъ ахъру. ¹⁵Думу гъадму юрднан сар агъалийихъ яшамиш хъпакк ккуркъру. Эйсийира думу чан силар уърхюз чюллериц гъаъру. ¹⁶Думу силари ипІурайи бужвам дипІ-нуре чан фун абцІуз рази вуди шуйи, амма гъадмуре дугъаз туври шулдайи. ¹⁷Чан фагъмихъна гъафиган, дугъу гъамци гъапну: «Йиз адашдин хул’ин лихурайидариз фукъан булди уъл ади шуи, хъа узу мушваъ гашу йикІури азу! ¹⁸Душну йиз адашдиз пидиза: „Я адаш, узу, аэршариз ва увуз къаршу духьну, гунагъвалар гъапІунза. ¹⁹Ва сарун яв бай ву пуз лайикълур дарза. Узу увухъ лихурайидарин жергейиз къабул апІин“».

²⁰ Гъамци дупну, думу чан адашдихъна хътакуру. Думу ярхлаъ имиди дяркъну, адашдиз дугъан язухъ шулу ва, жаргъну душну, дугъан гардандиль архъру ва макар апІуру. ²¹Бали дугъаз кІуруки: «Я адаш! Узу, аэршариз ва увуз къаршу духьну, гунагъвалар гъапІунза ва сарун яв бай ву пуз лайикълу дарза». ²²Хъа адашди чан лукІариз кІуру: «Ужубсиб палат дубхну дугъахъ хъабхъай, хилихъ тіубланра хъапІай ва ликариинра алахъай. ²³Хъасин гваназ дюбхнайи кІари дубхну, убккай. ИпІури ва убхъури шадвал апІидихъя. ²⁴Фицики му йиз бай дукІну аий ва чиви гъахьну, дудургну аий ва гъидихъну». Гъамци вари шадвал апІуз хъюгъну.

²⁵ Аххону бай думуган хутІлиъ ади гъахьну. ХутІлиан гъюра-йириз, хуларихъна багахъ гъашиган, ялхъвнин мукъмар ерхъуру. ²⁶Дугъу гъаравшарикан сарихъан гъерхру: «Му фу хабар ву?» ²⁷Дугъура мугъаз: «Яв чве дуфна; яв адашди, думу сагъ-саламатди хътакбан сагълугънаан ганаз дюбхнайи кІари дубккна» кІуру.

²⁸ Аххону чве, хъял дуфну, хулаъ учІвуз даккунди гъахьну. Адашди, удучІвну, дугъаз хулаз дих апІуру.



²⁹ Хъа дугъу адашдиз жаваб буди кIуру: «Магъа швнуд йисан уувуз гъуллугъ апIури аза ва сабанра яв гаф ликриkk ккивундарза. Хъа уувуз из дустарихъди шадвал апIуз мегъел саб мудуркъан тувундарва. ³⁰ Хъа чан пай улдугнайдарихъди дипIну, яв гъамуну бай гъафиган, уувуз дугъаз дюбхнайи кIари гъубккунва». ³¹ Адашди дугъаз кIуру: «Я жан бай! Уувуз гъафиган узухъди хъава ва вари изизуб явуб ву, ³² хъа яв му чве дукIну айи ва Чиви гъахьну, дудургну айи, гъидихъну, ва гъаддин шад хъуб ва гешт хъапIуб лазим вуйи».

*Дугъривал ктру идараачийкан
тахалус*

16 ¹Хъа Исаий Чан ученикариз кIуруки:

— Сар девлетлуйиз чан мишишт идара апIури сар кас ади гъахьну. Гъадгъу эйсийин мишишт зяя апIура кIури, аэрза гъюру. ² Эйсийи дугъаз дих дапIну гъапи: «Увкан уувуз ерхъурайи аэрзийр гъапIрудар ву? Яв идара апIбан ляхнарин гъякъ-гыисаб ча, фици-ки сарун уувхъан мишишт идара апIуз шулдарвухъан».

³ Гъадмуган мишиштдин идараачий чав-чакна кIуру: «Узу гъапI-ну ккун? Из агъайи хулан мишишт идара апIувал уувхъан та-дабгъиди: жил ийбккүз уувхъан удубкыидар, шликанкIа пул Талаб апIуз начди вузуз. ⁴ Из ляхнихъан гъадаиган, узу жарадарин хуларий къабул апIури ужуб аймал аygъязуз». ⁵ Хъа чан агъайин буржар кайидариз жа-жара ради чахъна дих апIури, дугъу сарпири-хъан гъерхну: «Уувуз из агъайиз фукъан буржлу вува?» ⁶ Дугъу: «Варж бети ччимдин» кIуру. Хъа дугъаз идараачийи: «Ма яв рас-писка» ва тядиди «хъуцIур бети бикI» кIуру. ⁷ Хъасин тмунури-хъан гъерхру: «Хъа уувуз фукъан буржлу вува?» Дугъу: «Варж шишал дяхнин» кIуру. Дугъазра кIуру: «Ма яв распискара ва „миржIур шишал“ бикI». ⁸ Хъасин эйсийи, чан нягъякъ идараачий айкъюл-лу ляхин гъапIну кIури, дугъан тяриф апIуру. Фицики гъамус-дин деврин адмийир аквонахъна чалишмиш шулайидартIан чпин хайирнан гъавриkk ккайидар ву.

⁹ Хъа гъаддиз Узу кIуразачвуз: учвуз жил'ин тувнайи девлет-ниинди жарадариз хайир тувай. Фицики му дюн'яйин девлеттар Танкъ гъапиган, учву Агъайин гъаргандин хуларий къабул апIи-дичву. ¹⁰ Циб вуйибдиш дугъри кас — ахюбдиш дугъри ву, хъа



цИб вуйибдиъ угъри – ахюбдиъра угъри ву. ¹¹ Гъаци вуйиган, эгер учв’ина жилариин али девлете аманат апIуз шулдарш, хъа айршириин али хазна шли учв’инна аманат апIиди? ¹² Ва эгер учву жаарарин девлетеңа угъри гъахьнуш, учвуз ичвуб шли тувди? ¹³ Гыч сар гъуллугъчийхъанра кыор агъайиз гъуллугъ сабси апIуз шулдар, фицики дугъаз санур даккун, хъа тмунур ккун хъиди, вая сариз ужууди гъуллугъ апIиди, хъа тмунуриз – Чуруди. Аллагъдизра девлетеңазра сатIиди гъуллугъ апIуз хъибдар-чвухъан.

*Къанун
ва Аллагъдин Паччагълугъ*

¹⁴ Пул ккуни фарисийир, гъаму гафарихъ хъпехъури, Исайин аylхъюри гъashi.

¹⁵ Дугъу дурагиз гъапи:

– Учву инсанарин улихъ гъякълудар вуди улупурачва, хъа Аллагъдиз ичв юкIвар айгъя, фицики инсанариз фу заан вуш, Аллагъдиз думу алчагъвал ву. ¹⁶ Ягъ’я гъайизкъан къанун ва пайгъамбэр ади гъахьну. Хъа Ягъ’я гъафиҳъанмина Аллагъдин Паччагълугъдикан Ужувлан хабар рабгъура ва гъарсар дидиъ гужниинди учIувуз чалишмиш шула. ¹⁷ Амма къанундин саб цАркъанра дубгайиз, заварна жилар ухди дармадагъин шул.

¹⁸ Чан хипр гъадаурайири ва жаарар хурайири къяппавал апIура. Хъа гъарсар жилирихъан гъудучIву хипр хурайирира къяппавал апIура.

*Девлетеңинна Лазарин гештваликан
ва аyzабнakk хъуваликан*

¹⁹ Сар кас девлетеңу вуди, багъа вуйи палтар алахъури, гъар ийгъян гешт хъапIри гъахьну. ²⁰ Хъа гъацира Лазар кIуру, чан хамриин хац алабхънайи, дугъан урнарихъ дахъри шлу касибра гъахьну. ²¹ Думу девлетеңин суфрайихъан хътахъру къацIар вушра итIуз рази вуйи, ва хуйири, дуфну, дугъан хацализ мелз ийвури гъахьну. ²² Касиб гъачIиган, малайикари думу Ибрагъимдин багахъна гъахуру. Девлетеңура йикIуру, ва думура кивру.

²³ Жегъеннемдиъ аyzабар зигури ади, дугъу улар за гъапIиган, дугъаз ярхлаъ Ибрагъимна дугъан гъвалахъ деънайи Лазар



рякъору. ²⁴ Ва дугъ’ан гъарай утIубччуру: «Я Ибрагым аба! Йиз язухъ апIин; Лазар узухъна гъаъ. Дугъу чан тIубан кIакI штук кубсну, йиз мелз къяши апIри, узу му жегъеннемдин цIин аззабнакк кказа». ²⁵ Хъа Ибрагымди дугъаз кIуру: «Йиз бай! КIваин апIинки, сарун увуз яв уьмриъ рубкъру уж’вал гъуруб-къунвуз, хъа Лазариз писвалтIан фукIа гъябкъюндар. Гъамус дугъаз мушваъ гешт ккабхъна, хъа уву аззабнакк ккава». ²⁶ Хъа дитIланра гъайри, явна ич арайиль гъациб зурба деринар айхъ-ки, милин увухъна гъюз ккунидарихъан ва дилин гъамина гъюз ккунидарихъан дилан улдучIувуз хъибдар». ²⁷ Гъадмуган девлет-луюй гъапи: «Я аба! Увкан Лазар йиз адашдин хулаз гъауб ккун апIурза. ²⁸ Узухъ хъур чве хъазухъ: гъит Лазари, гъадму йиз чве-ра гъаму аззабнан иишваз дяргъруси, гъаддарихъ чаз гъябкъюб-дикан шагыидвал апIри». ²⁹ Ибрагымди дугъаз гъапи: «Дураиз Мусайин ва жара пайгъамбраин китабар а; гъит гъаддарихъ хъебехъри». ³⁰ Хъа девлетлуюй кIуру: «Ваъ, Ибрагым аба! Бел-ки, магъа гъачIидарикан сар, дураихъна дуфну, ктибиши, ду-рари гунгъар гардандиль дисиди ва тахсрар апIидар». ³¹ Гъадму-ган Ибрагымди дугъаз кIуру: «Эгер дураиз Мусайихъ ва пай-гъамбраихъ хъпехъурдаш, дураг, фуж гъачIидаригъян чиви гъахъишра, хътругъур».

*Гунагъ ляхникан, швумал хъубкан
ва хил алдабгъбакан*

17 ¹Исаи чан ученикаriz кIуру:

— Инсан гунагъвалий тIаъру тямиягъяр чарасуз гъиди. Ам-маки тямиягъяр шлиланмина гъюруш, гъадгъан гъял пис хъиб-ди. ² Думу касдиз, тямиягъвал кипну, зияфдарикин саркъан рякъ’-ан адаайиз, чан гардандиль рягънин ахал ипну, учв гъюлиз га-тIахънийиш, ужу шлиий. ³ Уягъди гъузай. Эгерки яв чвуччуу увуз къаршу гунагъвал апIураш, мапIан йип дугъаз, ва эгер тахсир гар-дандиль гъибисиш, дугълан хил алдабгъ. ⁴ Сад йигъян увуз къар-шу буди ургуб раЖари гунагъ ляхин дапIину, ва ургубан швумал вуза гъапиш, дугълан хил алдабгъ.

⁵ Ученикари Исаиз кIуру:

— Ич хъугърувал артухъ апIина, Агъа!

⁶ Агъайи дураиз кIуру:



— Эгер учвуъ бицIи дилсибкъан хъугъувал аш ва учву инжирин гъариз: «КудубчIвну гъюлиъ убс» гъапнийиш, думу учвухъ хъпехъидий.

Ужудар лукIар иихъай

⁷ Чаз хутIил хъапIру вая маларихъ гъягъру лукI ади, думу чюлиан гъафиган, дугъаз: «Гъяракат апIин, сүфрайихъ деъ» шли кIуру? ⁸ Дугъаз айксина вуди: «Узуз хябахъдин хураг гъязур апIин ва, юкъв'ан идитIину, узу ипIури ва убхъури имиди, узуз гъуллугъ апIин, хъасин уву ипIин ва убхъ», пидаринхъя? ⁹ Му лукIру чан буйругъ тамам гъапIину пну, дугъаз аферин пидинхъя? Пидар пну, фикир апIураза. ¹⁰ Гъаци учвура, учвуз буйругъ дапIнайи ляхнар тамам гъапIиган, йипай: «Учу фтинкIа ккадру лукIар вучча, гъаз гъапиш учу буржлу вуйиб гъапIунча».

Хамран аьзар кайидар сагъ апIуб

¹¹ Ерусалимдиз гъюрайи Иса Самария уълкейинна Галилей уълкейин арайиъ айи ¹² саб гъулаъ учIврайиган, Дугъаз цИб ярхласи дийигъну, хамран аьзар кайи йицIур кас алахъуру. ¹³ Дура-ри аяхю сесниинди кIуру:

— Я Мялим Иса! Ич язухъ апIинава!

¹⁴ Дураг дяркъну, Исаий дурагиз кIуру:

— Душну учву маллайириз улупай.

Дураг, гъягъюри имиди, уъзрихъан марцц шулу.

¹⁵ Дурагикан сар, учв сагъ гъашиб дябкъну, Аллагъдин ад за апIури, къяляхъ хътакуру ¹⁶ ва, Исаин ликарикк дахъну, дугъу Исаиз чухсагъул кIуру. Му Самария уълкейин агъали вуйи.

¹⁷ Гъадмуган Исаий гъерху:

— Учву йицIидра сагъ гъахъундайнхъя? Имбуну урчIвур нашди? ¹⁸ Дурагара гъаз, сар гъураба самариялу ктарди, Аллагъдиз чухсагъул пуз къяляхъ хътакундар?

¹⁹ Хъа мугъаз гъапи:

— Гъудужвну гъарах, яв хъугъували уву гъюрхну.



Аллагъдин Паччагълугъ
улубкъуваликан

²⁰ Фариси ири, Аллагъдин Паччагълугъ фила улубкъиди, кІури, гъерхиган, Исаи дуариз жаваб тувру:

— Аллагъдин Паччагълугъ рябкъуси гъибдар. ²¹ Ва сарира пидарки: «думу дуфну магъа гъамшваъ а», вая «магъа гъатшваъ а», фицики Аллагъдин Паччагълугъ ичв арайиль а.

²² Гъацира Исаи ученикаризра кІуру:

— Гъацдар йигъар гъидики, сад йигъанкъан Инсаниятдин Бай учуз рякъюз ккунийкІан пидичва, амма рякъидарчвуз. ²³ Ва учвуз «гъатмагъа гъатушвахъ», вая «магъа, гъамушвахъ хъа» гъапишра, мягъянай ва мехъерганай: ²⁴ фицики къоркъын цАси, завун саб кІулихъ крибчубди фици завун тмуну кІулиз нур тувруш, гъаци хъиди Инсаниятдин Байра Чан йигъян. ²⁵ Хъа гъи Думу гизаф аъзбар ккюргъбакк ва гъамусдин наслари нигъ апІбакк ккуркъди. ²⁶ Нюгъдин йигъари фици гъабхънуш, Инсаниятдин Балин вахтарира гъаци хъибди: ²⁷ Нюгъ гимийиль эу йигъ’ина гъайиз, вари халкъ ипІури-убхъури, швушвар хури, швуваз гъягъюри гъахъну, хъа вари дюн’яйин шид улубчІван, дуарар вари пуч шулу. ²⁸ Лутдин вахтарира гъаци гъабхънийи: вари халкъ, гъайгъусуди, ипІури-убхъури, ариш-вериш апІури, тум убзури, хулар тикмиш апІури гъахъну; ²⁹ хъа Лут Содомдиан удучІву йигъян завариан цИнна гугуртин мархъ гъубгънийи ва вари тІанкъ гъапІнийи. ³⁰ Инсаниятдин Бай гъафи йигъянра гъаци хъибди.

³¹ Думу йигъян фуж гъваин алди гъашиш, хъа мутму — хулаъ, дуарар гъадагъуз хулаз дурушри, фуж хутІлиъ адигъашиш, думура дурушри. ³² Лутдин хпир кІваин апІнай. ³³ Фуж чан уьмур уьбхюз хьюгъиши, думу дугъу пуч апІиди, хъа шли думу пуч гъапІиш, гъадгъу думу чІиви апІиди. ³⁴ КІуразачвуз: думу йишван саб аъхникк къор хъиди, дуарикан сар гъадагъиди, хъа тмунур гъитди. ³⁵ Къор хпир ахларихъ хъаш, дуарикан сар гъадагъиди, тмунур гъитди. [³⁶]*

* 17:36 Грекарин саспи БикІбари кІура: «Къор кас хутІлиъ хъиди, дуарикан сар гъадагъиди, тмунур гъитди».



³⁷ Хъя гъадмуган ученикари Исаийхъан гъерхру:

— Мици наан хъибди, Агъа?

Дугъу дурагиз гъапи:

— Майит наан аш, гъадина люкъярра уч хъиди.

*АчИни дишагълийшкан
ва диванбегийшкан тахалус*

18 ¹Хъасин Исаий ученикариз, чпи гъарган ккарагури ва юкІв дар дараපІди духьну ккун кІури, дурагиз саб тахалус ктибуру:

² — Саб шагърий Аллагъидхъан гучІ ва инсанарихъан нач адру диванбеги ади гъахъну. ³ Гъадму шагърий сар ачИни дишагъли ади ва дугъу, диванбегийхъна гъюри, учв душмнихъан урх, кІури гъахъну. ⁴ Амма диванбегийи хайлар вахтна дугъаз иб дириври гъахъну. Хъя ахирки дугъу чав-чакди кІуру: узуз я Аллагъидхъан гучІударшра, я адмийирихъан нач кадаршра, ⁵ гъаму ачИни дишагълийи узу сикинди гъидритди хъпаз лигну, гъарган гъюри, узу инжик дараපІбан бадали, думу урхидиза.

⁶ Агъайи хъя кІуру:

— Ебхуранчвуз, гъякъсуз диванбегийи фу кІураш? ⁷ Аллагъди урхидаринхъа, Чаз йигъ-йишвди ккарагурайи, Чав ктагъдар, гъеле дураг урхюз къан апІурушра? ⁸ КІуразачвузки, Дугъу дишлади дураг урхюз кюмек тувди. Амма Инсаниятдин Бализ, жил'ина гъафиган, хъугъувал бихъуйкІан яраб?

*Фарисейшканна
налук уч апІуруркан тахалус*

⁹ Исаий гъацира чпин дугъивалиин шак алдарди, имбудар ас-ккан апІурайдаризра гъамциб тахалус хуру:

¹⁰ — Кьюр кас Аллагъидин хулаь ккарагуз учІвну: сар — фарисей, тмуунурра — налукар гъадагъур. ¹¹ Фарисейи, ккарагруган, чакна гъамци кІуру: «Я Аллаг! Увуз чухсагъуль кІураза, узу миди вуйи пис инсанарсир, тарашибийсир, алдатмиш апІрударсир, къяппийсир вая гъаму налукар уч апІурсир дараපІбаз. ¹² Гъяфтайиъ кьюб раЖари ушв бисури шулза, вари гъазанмиш гъа-Пубдин йицІубпи пай тувраза». ¹³ Налукар гъадагъурихъан, ярхласи дийигъну, завузди улар за апІузкъана гъабхундайи,



хъа чан мухур убччури, кIури гъахьну: «Я Аллагъ! Язухъ апIи-на йиз, гунагъкрин!» ¹⁴КIуразачвуз, думу чан хулаз фарисей-Тан артухъди марцц духьну гъушну, фицики чав учв заан апIурайи гъарсар кас асккан апIиди ва чав учв аскканди дису-райир заан хъиди.

Исан бицIидар

¹⁵Исайихъна, дурагилан хил алдатри кIури, набалугъ бицIидарра хури шуйи; ученикари, кIуруш, му гъябкъиган, гъадагъа апIуру. ¹⁶Хъа Исайи, бицIидариз чахьна дих дапIину, кIуру:

— БицIидар узухъна гъюз гъитай, гъадагъа мапIанай, Аллагъдин Паччагълугъ гъацдаринуб ву. ¹⁷Гъякъ кIуразачвуз, Аллагъдин Паччагълугъ бицIириси къабул дарапIур дидиль учIвидар.

¹⁸Гъюкумдрикан сари Исайихъан гъерхру:

— Я гъяни Мялим! КкудуубукIру уьмур рубкъбан бадали, узу фу дапIину ккунду?

¹⁹Исайи дугъяз гъапи:

— Гъаз Узуз гъянир кIурава? Сар Аллагъдилан гъайри саркъан гъянир дар. ²⁰Хъа гъамцдар Аллагъдин табшуругъар аygъявズки: «къяппавал мапIан», «адми миликIан», «мигъитIибкIан», «кучI-лин шагъидвал мапIан», «адашдизна дадайиз гюромат апIин».

²¹Дугъу жаваб туув:

— Вари гъамрапар йиз жигъил вахтарихъанмина тамам апIураза.

²²Гъаму деебхъну, Исайи дугъяз гъапи:

— Сабсан увуз гъубкIрадар: увуз айи-адру девлет масу тувну, касибарииз пай апIин, гъадмуган а yrшириз увуз девлет хъибди-вуз. Хъасин Узухъди гъач. ²³Му гафар гъеерхъиган, му кас пашман шулу, гъаз гъапиш думу гизаф девлетлу вуйи.

²⁴Дугъан пашманвал гъябкъю Исайи кIуру:

— Девлетлуийииз фуқъан читин дарин Аллагъдин Паччагълугъ-диль учIувуз! ²⁵Девлетлуийииз Аyrшин Паччагълугъдиль учIувутIан, девеийиз рубдин гъюн'ан удубчIувуб рягъят ву.

²⁶Му гафар гъеерхъдари гъерхру:

— Шилхъан учв уърхюз хъиди?

²⁷Исайи кIуру:

— Инсанарихъан даршлуб Аллагъдихъан шулу.

²⁸Петри Дугъаз кIуруки:



— Магъя учу, вари учуз айиб гъибтну, Увухъди хъачаки.

²⁹ Исаи дурализ кІуро:

— Дугъриди кІуразачвуз: Аллагъдин Паччагълугъ бадали чан хал вая шив, ваяки чвийирна чиир, ясана айиир-бабар ва веледар дирчну, фуж Узухъди гъафиш, ³⁰ гъадгъаз му вахтари мурартІан швнубсабан артухъ хъибди ва гъюзимбу вахтарира ккудулубкІру умур хъибди.

³¹ Хъя иицІикьюр Чан ученикар гъирагъдиз гъадаъну, дурализ кІуро:

— Магъя ухъу Ерусалимдиз гъягъюрахъ ва Инсанитдин Балкан пайгъамбарилентина дибикІнайиб вари тамам хъибди:

³² «Ав, Думу аллагъсузарин хилиз тувди, Дугъ'ина айрвалар хиди, Думу алчагъ апІиди, Дугъ'ин тутыйир алатІиди. ³³ Думу гъирмажарихъди урчвиди ва, аыхирки, йикІиди, хъя шубудпи йигъян Думу Чиви хъиди».

³⁴ Амма ученикар фтинкІа гъаври ахъундай; му гафарин сир дурарихъна гъурубкъундай ва дурарихъан Исаи гъапиб аннамиш апІуз шуладай.

³⁵ Иса Ерихон шагърихъна гъюрайиган, сар кур кас, садакъа ккун апІури, рякъюхъ деънайи. ³⁶ Дугъу, чан гъвалхъантине халкъ гъягъюрайиб деебхъну, гъерхру:

— Му фу хабар ву?

³⁷ Дугъаз: «Назаретдиан вуйи Иса гъюра», — гъапнийи. ³⁸ Гъадмуган дугъу Чигъ апІуру:

— Я Давудгъярин Бай Иса! Йиз язухъ апІина!

³⁹ Улихъди гъягъюрайидари куриз ккебехъ кІуи, амма дугъу айибІан артухъ Чигъ гъапІу:

— Давудгъярин Бай! Йиз язухъ апІин!

⁴⁰ Исаи, хъугъужвну, думу Чахъна хуз амур апІуру. Ва думу гъафиган, дугъхъан гъерхру:

⁴¹ — Узкан фу ккундувуз?

Дугъу кІуро:

— Агъа! Узуз рябкъюз ккундузуз.

⁴² Исаи дугъаз гъапи: «Рябкъ! Яв хъугъвали уву гъюрхну».

⁴³ Дугъаз дишлади рябкъюри шулу, ва думу, Аллагъдин ад за апІури, Исаиихъди гъушу. Вари халкъди, му дябкъну, Аллагъдин тяриф апІури гъashi.



Заккай

19 ¹Хъасин Иса, Ерихондис учІвну, шагъриантина гъягъюри гъахъну. ²Душваъ налук гъюдюбхрударин ахюр вуйи Заккай кІуру сар девлетлу кас айи. ³Дугъаз Иса рякъюз ва фицир вуш лигуз ккун гъабхъи, амма халкъдигъян рякъюз шуладайи, фицики Заккай жандкин исчIлир вуйи. ⁴Хъа улихъинди жаргъну, Иса рякъбан бадали, Заккай инжирин гъаригъ гъочІвру, гъаз гъапиш Иса гъадушвхъантина душну ккунди айи. ⁵Исайиз, душвахъна гъафиган, Заккай рякъюру ва кІуру:

— Заккай! Чикиди гъюдучІв, фицики гъи Узу яв хулаъ хялижв духъну ккунду.

— Дугъу, дишлади гъюдучІвну, Иса чан хулаъ шадвалиинди къабул апIуру. ⁷Му гъябкъю халкъдик гъал кабхъру ва, Иса гунағъкар касдихъ дергну кІури, наразиди улхури гъахъну. ⁸Заккай Агъайиз кІуруки:

— Агъя! Йиз девлетнан гъацI узу касибариз тувдиза ва, эгер узу шлихъан артухъ гъадабгънуш, юкъуб раЖари артухъ тувдиза.

⁹ Исаий дугъаз гъапи:

— Гъи му хулазра уърхювал гъафну, фицики мурас Ибрагимдин насликан ву. ¹⁰ Инсаниятдин Бай пуч шулайидар агуз ва ккадагъуз дуфнайир ву.

¹¹ Гъамдихъ хъпехъурайидариз Исаий сабсана тахалус ктибуру, фицики, Думу Ерусалимдиз багахъ духънайиган, гизафдари, лап багарихъди Аллагъдин Паччагълугъ улубкъиди пну, фикир апIурайи. ¹² Гъаци вуйиган Исаий кІуру:

— Заан тухмиан вуйи сар кас, учв паччагъвализ тяйин апI-бан къяляхъ хътакуз кІури, ярхла уълкейиз гъягъюру. ¹³ Рякъюз учІвайиз, дугъу чан иицIур гъуллугъчийиз дих дапIну, гъардихъна иицIуб гъизилин манат тувру ва кІуру: «Узу хътакайиз, му пул ляхник кипай». ¹⁴ Хъа му юрднан агъалиириз думу ккунир дайи, ва дугъан къяляхъди учв гъягърушваз адмийир гъаъру: «Дугъу ич паччагъвал дапIну ккундарчуз» пуз. ¹⁵ Мидизра дилигди, паччагъди тяйин дапIну хътакиган, чав пул туву гъуллугъчиириз, шли фу гъазанмиш гъапIнуш агъю апIбахъди, чахъна дих апIуру. ¹⁶ Сарпири дуфну кІуру:



— Агъа, яв саб гъизилин манатди йицIуб гъизилин манат гъазанж гъабхну.

¹⁷ Агъайи дугъаз гъапну:

— Аферин увуз, ужур гъуллугъчи! Уву бицIи ляхниъ дугъри хъувализ яв хилиз йицIуб шагъур гъадагъ.

¹⁸ Кьюрпири дуфну кIуру:

— Агъа, яв саб гъизилин пули хъуб гъизилин манат гъазанж гъабхну. ¹⁹ Мугъазра кIуру:

— Увухънара идара апIуз хъуб шагъур тувраза.

²⁰ Шубурпири дуфну кIуру:

— Агъа, магъа яв гъизилин манат: ягълухъигъ гъивну гъюбхонза. ²¹ Фицики узуз увхъан гучI гъабхънийзуз, гъаз гъапиш уву инсафсуз адми вува: жвуву дидривуб гъадабгъур ва жвуву дурубзуб ккадабцIур.

²² Паччагъди дугъаз гъапну:

— Узу яв гафариинди яв диван апIидиза, аьмалдар лукI! Увуз узу инсафсуз адми вуйиб, жвуву дидривуб гъадабгъур ва жвуву дурубзуб ккадабцIур вуйиб аьгъяди, ²³ уву йиз пул, узуз гъазанж гъюрганси, гъаз ишлетмиш гъапIундарва?

²⁴ Ва чан улихъ дийигънайидариз кIуру:

— Дугъахъ хъайи пул дибисну, йицIуб гъизилин пул хъайириз тувай.

²⁵ Хъа дурари паччагъдиз кIуру:

— Я агъа, дугъахъ йицIуб гъизилин манат гъацира хъа.

²⁶ — КIуразачвуз, гъарсар айириз хъана тувну хъибди, хъа адрурихъан айибра тадабгъиди. ²⁷ Хъа узу чпин паччагъ духъну даккни, йиз душмнар гъамина аькъинай ва йиз улихъ урччвай.

²⁸ Гъамци дупну, рякъ давам апIури, Иса Ерусалимдиз багахъ шулайи. ²⁹ Елион дагъдихъ, Вифагия ва Вифания гъуларихъна багахъ шулайиган, Дугъу Чан кьюр ученик, гъамци дупну, дина гъаъру:

³⁰ — Гъатму гъаншарий айи гъулаз гъаракай, душваш учIиган, мегъель сар каскъан элелеу, дигтIайи гъудугъ бихъидичвуз. Думу тудубчну гъамина аькъинай. ³¹ Нагагъ шликIа: «Му гъаз тудубчу-рачва?» пну, гъерхиш, дугъаз гъамци йипай: «Думу Агъайиз ба-карди ву».

³² Гъайдар гъушу ва, Исаи гъаписи, дурализ гъудугъ бихъуру.

³³ Дурали гъудугъ тудубчурайиган, дидин эйсийи дурарихъан гъерхру:



— Гъудугъ гъаз тудубчурачва?

³⁴ Дураги жаваб тувру:

— Думу Агъайиз бакарди ву.

³⁵ Думу Исаийхъна хуру. Даждин чпин палтар илирчну, хъасин Иса дид'ин илитуру. ³⁶ Иса гъягърган, халкъди рякъюкк чпин палтар ккирчуйи.

³⁷ Хъа Думу Елион дагъдин канчИлихъна гъуркуиган, вари Дугъан ученикари шадвалиан, чпиз гъяркъю вари айламата-рин сагълугънаан, зарб сесниинди Аллагъдин тяриф апIуз хъюгъру:

³⁸ — Агъайн ччурнахъди гъюрайи

Пачагъдиз уж'вал ишри!

Завариин мясяльт, айршири ад ибшри!

³⁹ Халкъдин арайигъян бязи фарисийи Исаиз кIуру:

— Мялим! Яв ученикариз гъадагъа апIин.

⁴⁰ Хъа Дугъу дурагиз жаваб вуди кIуру:

— КIуразачвузки, нагагь дураг ккебехъиш, гъванар улхиidi.

⁴¹ Хъа Ерусалимдиз багахъ гъашиган, дидиз лигури, Иса гъи-шу. ⁴² Хъа кIуру:

— Хуб ужу шлийи, эгер увуз мясяльт шли хураш, гъамус айгъю гъабхънийиш! Амма му яв уларихъан гъамусяльт гъебкна.

⁴³ Ув'ин гъацдар йигъар улуркъидики, яв душмнари увлан барийр илтIикIиди, къялъ тIапIиди ва варишварихъанди ув'ина гъюжум апIиди. ⁴⁴ Ва яв веледарихъди уву ккидипиди, яв гъван гъвандиин гъибтидар, фицики увухъна Аллагъ гъафи йигъ айгъю гъабхъун-дарвуз.

⁴⁵ Хъасин Аллагъдин хулаъ учIвну, Дугъу душвавъ шей'ар масу туврайидарна гъадагъурайидар, гъамци кIури, утIурккуру:

⁴⁶ — Гирами китабарий дибикIина: «Йиз хал ккарагру хал хъиб-ди», хъа учву дидкан тIаращчийирин мугъара дапIначва.

⁴⁷ Хъа гъаддихъантана Исаий Аллагъдин хулаъ гъар йигъан айгъювалар улупури гъахъну. Жугъарин ахюну маллиирина, айламирина халкъдин улихъ хъайдари Думу йикIуз чара абгу-ри шулу. ⁴⁸ Хъа бихъури гъабхундар, гъаз гъапиш халкъ, Дугъхъан гъудудучIври, Дугъахъ хъпехъури шуйи.



ТұумутІчийирикан тахалус

20 ¹Гъадму сад йигъан, Исаи Аллагъдин хулан гъяятдій Ужувлан хабарнакан аыгьювалар улупурайи вахтна, ағысакъларра хъади Дугъаҳна жугъдарин аыхону маллиирна аымар дуфну, ²Дугъаз кіру:

— Учуз, Уву му ляхнар фициб гьюкмиинди апіураш, Увуз мициб гьюкүм шли тувнаш, иип.

³ Исаи дурализ жаваб вуди кіру:

— Узура учвуз саб суал тувдиза, иипай Узуз: ⁴Яғь'яйин штуан апіувал айрариан вуйин, даршиш инсанарихъан?

⁵ Дурари, фикрарикк ккахъну, чиб-чиқиди гъамци пуз хъюгъру:

— Эгер ухъу «айрариан» гъапиш, Дугъу пиdi: «Учву дугъаҳъ гъяз хъугъундарчва?» ⁶Хъа эгер «инсанарихъан» гъапиш, гъадмуган вари халкъди ухъ'ина гъван ульюбхи迪, гъаз гъапиш халкъ, Яғь'я пайгъамбар ву кіури, хъугъна.

⁷ Гъаддиз дурари: «Наынан вуш айгъдарчуз» гъапнийи. ⁸Исаи дурализра гъапи:

— Узура пидарзачвуз, фициб гьюкмиинди му апіураш.

⁹ Хъасин халкъдихъинди илдицну, Дугъу гъамциб тахалус ктибуру:

— Сар касди тұумтін багъ ибтру, ва тұумтічийирихъна арендайиз тувру ва учв хайлин вахтназ удучівну гъягъору. ¹⁰ Вахт гъабхыган, дугъу тұумтічийирихъна чан пай тұумтіар хуз лукI гъаъру, амма дурари лукI дурччвну, фукIара тутруди утіуккуру. ¹¹ Хъана жара лукI гъаъру, ва думура дурччвну, сюгмиш дапіну, фукIа хътарди хътауру. ¹² Хъана шубурпирра гъаъру, дурари думура дурччвну, зийнар дапіну, хътірккуру. ¹³ Гъадмуган тұумтін багъдин эйсийи гъапну: «Узу гъапіну кқунду? Йиз масан бай гъаъдиза, белки, думу дяркъну, дурализ нач шул».

¹⁴ Хъа думу гъяркъиган, тұумтічийири чипин арайиъ гъамци фикир апіуру: «Му эйсийин ирсчи ву, гъачай думу йивну йикіухъа, ирс ухъуз гъубзди». ¹⁵ Думу, багъдиан адаъну, йикіуру. Багъдин эйсийи дурарикан гъапіди? ¹⁶ Учв дуфну, му тұумтічийирихъи:

Му гъеебхъдари кіуруки:

— Дишиб ляхин саб вахтнара дарибшри!



¹⁷ Хъя Исаи, дуарилан ул илбицну, гъерху:

— Хъя му дибикІнайибдин мяна фу ву: «Устийири гатІабхъу гъван мурччвануб гъабхъну?» ¹⁸ Гъадму гъвандиина ахъу гъарсар парчийр хъиди, хъя думу гъван шил’ина абхъиш, чархъиди.

¹⁹ Жугъдарин ахъюну маллиирна альмар Исаи ктибути та-халус чпикан вуйибдин гъаври ахъру. Дураги гъадмуган, Иса йикІбан бадали, саб багъна абгuri гъахъну, хъя халкъидихъан гу-Чийи.

*Паччагъдинуб паччагъдиз,
Аллагъдинуб Аллагъдиз*

²⁰ Хъасин Дугъ’ин ул алди гъитру, Дугъахъ футнакрар хъитру. Дураги, чпи зиълан дугъриди улупури, Дугъу гъапи гафарикин багъна дапІну, хъасин Иса гьюкумдарин хилиз тувбан бадали, чарийр агуз хъюгъру.

²¹ Сабан дураги Исаихъан гъерху:

— Мялим! Учуз Узу гъякъ кІурайиб ва аygъювалар улупура-йиб, гъич сарин машназ дилигди инсанар Аллагъдин дугъри рякъюь Таърайиб аygъячуз. ²² Учуз йип: Учу Римдин паччагъдиз налук тувуз хай шулин, дарш шулдарин?

²³ Исаи дурагин аьмалдарвалин гъаври ахъну, гъапи:

²⁴ — Узуз пул улупай: мидик шлин шикилна ччвур ка?

Дураги: «Рим паччагъдин» — пну, жаваб тувру. ²⁵ Дугъу дурагиз кІуру:

— Гъаци вуйиган, паччагъдинуб паччагъдиз, хъя Аллагъдинуб Аллагъдиз тувай.

²⁶ Гъамци халкъдин улихъ, Исаин гафариъ гъякъсувал абгуз даршиди, Дугъан жавабниин мюгътал духъну, дураг ккебехъу.

*Ургур чвуччвуз гъушу
сар хпирikan*

²⁷ Гъадму вахтна гъачІидар Чиви шлуб дар кІурайи саддукий-рикан сакъюдари дуфну гъерху:

²⁸ — Мялим! Мусайи учуз, эгер хпир айи чве веледар даршиди гъачІиш, гъадгъан хпир тмуну чвуччву гъадагъну, чан чвуччвун тум арайиз дубхъну ккунду, кІури дибикІна. ²⁹ Ургур чве гъахъну: сарпир, хпир духну, велед даршиди гъакІну. ³⁰ Гъадму хпир



кьюрпи чвуччуу чаз дитну, хъа гъадмура велед даршиди гъакІну.
³¹ Думу хпир шубурпири, хъасин — вари ургрид чвийирира чиз дитри, велед даршиди, вари чвийир гъийихну. ³² Аххирки гъадму дишагъира гъакІну. ³³ Гъаци вуйиган, гъиямат йигъан вари Чиви шлуган, думу шлин хпир хъиди? Ургрид чвийиризра думу швуваз гъушнийи аххир!

³⁴ Исаи дурагиз жаваб буди гъапи:

— Гъамус яшамиш шулайи гъаму айсрин веледари швушвар хура ва швуваз гъягъюра. ³⁵ Хъа ккудудбкІру умриз гъачихъан Чиви хъуз лайикъ вуйидари душваа я швушвар хурдар, я швуваз гъягъюрдар. ³⁶ Дурагихъан сарун йикІузра хъидар, фицики дураг малайикарси ву. Хъа дураг Чиви хъувалиинди Аллагъдин веледар ву.

³⁷ Хъа гъийихдар Чиви хъуб дугъридан гъякъ вуйивал Мусайира улупураки: учв зазран рукнахъ хайиган Агъайиз «Ибрагимдин Аллагъ, Исаакъдин Аллагъ ва Якъубдин Аллагъ» гъапниийики.

³⁸ Аллагъ дийихнайидарин ваъ, хъа Чивидарин Аллагъ ву, фицики дугъандар вари Чивидар ву.

³⁹ Мидиз альмарикан бязидари гъапну:

— Мялим! Уву дурагиз ужуди гъапунва.

⁴⁰ Сарун сарира Исаихъан гъич сабдиканра гъерхуз кІубанвал гъапіундар.

Месигъ шлин Бай ву?

⁴¹ Хъа Исаи дурагиз кІуро:

— Гъаз Месигъ Давудгъярин Бай ву кІура? ⁴²⁻⁴³ Чав Давудри Мяльлийирин китабди кІура:

«Аллагъди йиз Агъайиз гъапну:

Узу Яв душмнар, духну,

Яв ликарикк дахъайизкъан,

Йиз арччул гъвалахъ десь».

⁴⁴ Давудри Дугъаз Агъа кІура, гъаци вуйиган Думу дугъан Бай фици хъидихъа?

Альмарихъан ихтият хъуб

⁴⁵ Вари халкъ хъпехъурайиган, Исаи Чан ученикариз кІуро:

⁴⁶⁻⁴⁷ — Ярхи палтар алди лицру къанунчиирихъан ихтият йихъай. Дурагиз чпин тяриф апІури, халкъар уч шлужвари чпи тебрик



апIури ккунду, мистариъ ва ипIру-убхърушвариъ варитIан гьюрматлу йишварииин деуз ккунидар ву. Дурари ачIни хпарин хулар тадагъну хътитIуру, кьюб маш гъяди гъудгнар апIуру. Дурариз варитIан яман жаза хъибди.

АчIни дишагълийин садакъя

21 ¹Къяляхъ илдициган, Исайиз Аллагъдин хулан хазнайиъ садакъиир иврайи девлетлуйир рякъюру. ²Дугъаз гъацира кьюб шигьи дирчу сар касиб ачIни хпирра рякъюру. ³Гъадмуган Исайи кIуру:

— Гъякъди кIуразачвуз, гъаму ачIни дишагълийи вардаритIан гизаф дивну, ⁴Фицики миди вуйидари садакъиир уылдюгънайи-валиан артухъ вуйибикан дивну, хъа дугъу чан касибвалиан чаз айи-адруб вари дивну.

Аллагъдин хал дабгъуб

⁵Ученикарикан сакъюдари: «Аллагъдин хал фукъан уччуу гъва-нарихъди ва багъиширихъди фукъан ужууди дабалгнадаринхъя!» гъапиган, Исайи гъамци кIуру:

⁶ — Гъацдар йигъяр гъидики, учвуз рябкьюрайишваа гъван гъвандинин гъубзидар, вари даргъиди.

⁷Хъа Дугъхъан гъерхру:

— Я Мялим! Дици фила хъибди? Мици шлу вахт фициб лиш-ниинди аygъю хъибди?

⁸Исайи гъапи:

— Учву алдатмиш апIуз мигъитанай, фицики гизафдар Ииз чвурнаккди, «Месигъ вуза» кIури, вая «Месигъ гъюру вахт улубкъна» кIури, гъиди. Вара-вара дурарихъди мягъянай. ⁹Учвуз дявириканна гъалабулугъарикан гъеебхъиган, гучI мапIанай, фицики дурар вари улихъ хъуз ккайи ляхнар ву, хъа му сабан аыхир дар.

¹⁰Хъана Исайи ученикариз гъапи:

— Халкъ халкъдиин ва паччагълугъ паччагълугъдин алархьиди. ¹¹Жюрбежюр йишвариъ зурбади жилар тIурчвиди, гаш'вал ва узэрар ахъди, завариан гучI шлу гъядисийр хъиди ва зурба аяламатнан лишнар гъиди. ¹²Вари гъамрар хъайиз, учву дисбан бадали, ичв къяляхъ хъергди. Узу себеб духъну, мажлисариъ ичв



диван апIиди, учву дустгъарып итди, паччгаринна гьюкумдрарин улихъ учвухъ жаваб тувуз гыйти. ¹³ Учву Йиз шагыдар хьидичва. ¹⁴ Гъаци вуйиган, Узхъанди учву фициб жаваб тувруш, дидкан улихъими фикир мапIанай, ¹⁵ фицики учвуз къаршу дийгъуз вая учву батIул апIуз гъич сарихъанра даршлуси гафар ва акъюлувал Узу тувдизачвуз. ¹⁶ Гъацира абайир-бабари, чвиирина мирасари ва дустари учву масу тувди, учкан саспидар йивну ихиди. ¹⁷ Йиз ученикар хъпаз лигну, учву варидализ даккун хъиди. ¹⁸ Хъя ичв күуллан гъич саб чаркъан алдабхъидар. ¹⁹ Ичв сабур апIувалиинди ичв рюгъ-юкIв уърхидичва.

Ерусалим дабгъуб

²⁰ Ерусалим къушмари къялаш тапIину гъябкъиган, аygъю йибхъайки, думу ккадабхъуз багахъ дубхъана. ²¹ Гъадмуган Ягъудия уълкейиль айидар дагълариз гъергри, фуж шагъриль ади гъашиш, дид'ан удучIври, хъя фуж шагърин атрафарихъ хъади гъашиш, дидиль удручIври. ²² Гъаз гъапиш му йигъар жаза гъадабI-ру йигъар хъиди ва вари дибикIнайиб гъадмуган тамам хъиди. ²³ Гъагъдиль айидаринна нанайихъ бицIидар хъайдарин гъадму йигъари гъял пис хъиди! Аллагъдин хъял гъаму халкъдин алабхъиди. ²⁴ Гизафдар ханжлин мурзонахъан ихиди ва гизафдар жара халкъарин йисирвалиш хъиди. Хъя Ерусалим жара халкъари, чпин деврар ккудукIайиз, ликриккан апIури хъиди.

²⁵ Хъя ригъдинин, вазлиин ва хядарииин аylаматнан лишнар хъиди. Жилиин гъюлерин сесерихъан ва ирикъуваларихъан халкъариз айжузвал ва гъалабулугъ хъиди. ²⁶ Инсанар гучIбаан ва дюн'яйина гъюз ккайи бедбаутвалариз кклигувалиан зяиф хъиди, гъаз гъапиш завар ккадаршвиди. ²⁷ Хъя гъадмуган дурализ ккувват ва зурба гъайбат хъади дифриинди гъюрайи Инсаниятдин Бай рякъиди.

²⁸ Гъамрар вари кIулиз удучIвуз хъюгъиган, гучI мапIанай ва ичв кIулар за апIинай, фицики гъадмуган учву азад апIру вахт хъубкъира.

²⁹ Хъасин Исайи дурализ тахалус ктибтуру:

— Инжириин ва миди вуйи вари гъаарализ лигай: ³⁰ дурари кIаж адабшувурайиган, учвуз, му дябкъну, хъад багахъ шулайиб аygъю шулучвуз. ³¹ Гъаци учвузра, гъамрар гъяркъган, Аллагъдин



Паччагылугъ багахъ дубхънайивал аыгъю апИнай. ³² Гъякъ кIура-
зачвуз: му вари улубкъайиз гъамусдин насыл гъубзди. ³³ Заварна
жилар ккадахъиди, хъа Йиз гафар дургидар.

³⁴ Уч'ин гъадму йигъ хабарсузди улулубкъбан бадали, убхъ-
биинди, ичквалиинди ва яшайишдин гъайгъушнариинди ичв
юкIвар тямгъвалий адрахъбаз ихтият йихъай, ³⁵ фицики му жи-
лиин яшамиш шулайи вардариин якынди улубкъиди. ³⁶ Гъаци
вуйиган гъарсаб вахтна уягъди гъузай, гъозимбу вари завалари-
ккан ккадархъруси, ккарагури йихъай ва Инсаниятдин Балин
улихъ дийигъуз шлуганси гъузай.

³⁷ Йигъяр Исаи Аллагъдин хулаъ аыгъовалар улупури, хъа
йишвар, кIуруш, дилин удучIвури, Елион дагъдиин адауий.

³⁸ Вари халкъ гвачIин Аллагъдин хулааз Исаихъ хъпехъуз гъю-
ри гъахъну.

Пасхайн хураг

22 ¹ЛичIван лавшар итIру Пасха кIуру машквар багахъ шу-
лайи. ²Аыхю маллиирина къанунчиири Иса йикIуз чарийр
агурайи, аммаки дуариз халкъдихъан гучIурайи. ³Хъа Исаин
йицIикьюр ученикдикан сарыъ, Искариот лакIам хъайи Ягъуда-
йиль, иблис убчIвру. ⁴Думу аыхю маллиирихъна ва гъаравларин
аыхюдарихъна, Иса фици дуарин хилиз тувруш, йикъяр апIуз
гъягъюру. ⁵Дуар, шад дуухъну, дугъаз пул тувуз рази шулу. ⁶Ягъу-
дайи гаф тувру: халкъ алдру йишваъ Иса дуарин хилиз тувуз гъу-
лай вахт абгури шулу.

⁷Лавшарин йигъ улубкъуру, ва гъадмуган Пасхайн ччил, гъур-
бан дапIну, дубккну ккундийи.

⁸ Исаи Петрна Югъан: «Душну ухъуз пасхайн хураг гъязур
апИнай», – дупну, гъарьу. ⁹Дуары Дугъхъан гъерхру:

– Учу наан гъязур дапIну ккундувуз?

¹⁰ Дугъу дуариз кIуру:

– Учву шагърий учIвиган, шид айи гажин гъабхурайи сар кас
гъахъдичвуз. Гъадгъан къяляхъди душну, гъадму учIву хулаъ
учIвай, ¹¹ ва хулан эйсийиз йипай: «Мялимди гъерхра: „Узу уче-
никирихъди пасхайн хураг ипIру хал набши?“» ¹²Дугъу, учвуз
ккабалгнайи заан аыхю хал улупиди; хураг гъадушваъ гъязур
апИнай.



¹³Дураг гъушу, ва чпиз гъаписи дибихъну, пасхайн хураг гъя-
зур гъапIу.

¹⁴Хъа вахт гъабшиган, Чан вакиларра хъади, Иса, гъон йивну,
суфрайихъ деънийи. ¹⁵Исайи дурализ кIуру:

— Узу азбаннкк ккуркъайиз, учвухъди гъаму пасхайн хураг
ипIуз гизаф юкIв хъайиз. ¹⁶КIуразачвузки, сарун му пасха-
йин хураг, Аллагъдин Паччагълугъдиль гъязур дархыкъан гагь-
ди, ипIидарза.

¹⁷Зах гъадабгъну, Аллагъдиз чухсагъул дупну, Исайи кIуру:

— Гъаму бисай ва ичв арайиъ пай апIинай, ¹⁸кIуразачвуз: Узу
сарун тIумтIарин му чаяхир убхъидарза. Узу цИийи чаяхир Аллагъ-
дин Паччагълугъдиль убхъидиза.

¹⁹Хъасин уъл гъадабгъну, Аллагъдиз чухсагъул дупну, думу
гъудубтIуру ва, дурарихъна тувну, кIуру:

— Му учвхъанди туврайи Йиз жан ву. Узу кIваин алаури,
гъамци апIинай.

²⁰Ари гъамци, хябяхъдин хураг ипIахъян, Исайи хъанара, зах
дибисну, кIуру:

— Му зах учвхъанди удубзурайи Йиз ифдииинди йитIурайи
цИийи йикърар вуйиз. ²¹Хъа магъа Узу масу тувуз ккайир Узухъ-
ди саб суфрайихъ деъна. ²²Инсаниятдин Бай Чаз улупнайиганси
гъягъюра, вушра Думу масу туврайи касдин гъял пис хибди!

²³Ученикиари чиб-чиликъан, гъамци апIуз ккайир ухъкан фуж
ву, кIури, гъерхру.

²⁴Дуралин арайиъ, чпикан фуж ахюор вуш, гьюжатра абхъни-
йи. ²⁵Исайи дурализ гъапи:

— Паччгъари чпин халкъарииин агъавал апIура, хъа халкъди,
чпи хилиъ дючIюркънайидариз: «халкъдиз уж’вал апIрудар»
кIура. ²⁶Учву дицдар дарчва: учвкан фуж ахюор вуш, варитIан
бицIи гъуллугъчиси йихъ ва, гьюкумдарвал апIур гъаравашси
йихъ. ²⁷Фицики, фуж зина ву: суфрайихъ гъон йивну дахънайир
зина даринхъа? Хъа Узу ичв арайиъ суфрайихъ гъуллугъ апIу-
райирси аза.

²⁸Учву гъарган Йиз вари дарвалариъ Узухъди гъахъунчва. ²⁹Узуз
Йиз Адашди Паччагъвал фици табшурмиш гъапIнуш, гъаци Узу-
ра учвуз Паччагъвал табшурмиш апIураза. ³⁰Йиз Паччагълугъдиль



Йиз суфрайихъ ипIури-убхъидичва ва, тахтниин деъну, Израилин йицЦикьюб тухмин суд апIидичва.

³¹ Симон, я Симон! Магъя иблисдиз учву, сифккан дапIайи дяхинна харукси, ужур-харжир жара дапIину ккуунди а. ³² Хъя Узу, яв хъугъвал дурубгри пну, ккарагунза. Узухъна хътакиган, уву яв чвийирин хъугъувал мюгъкам апIин.

³³ Дугъу Исайиз жаваб туvu:

– Я Агъя! Увухъди узу дустагъдизра, аъжалназра гъягъюз гъя-зур вузу.

³⁴ Хъя Исайи дугъаз гъапи:

– КIуразавуз, Петр, гъи даттли уъйир дапIину ккудубкIайиз, Узу шубубан аъгъюр дарзуз пи迪ва.

³⁵ Исайи давам апIуру:

– Узу учву я пул, я тавра, я шаламар хъадарди гъаърган, учвуз фукIа гъудрубкIуб гъабхъунчвуз?

Дурари: «Ваъ» пну, жаваб туvru. ³⁶ Исайи дурализ гъапи:

– Хъя гъамус, шлиз пул аш, гъадму гъадабгъри, гъаци – тав-пара, хъя шлиз адарш, чан палтар масу туvnu, ханжал гъа-дабгъри.

³⁷ КIуразачвузки, Уз'ин гъамци дибикIнайибра улубкьиди: «къанунсузарикан вуди гъисаб апIиди». Гъацира Узкан фу ди-бикIнаш, дурапари тамам хъиди, ва магъя аъхирихънара гъюра.

³⁸ Дурари гъапи:

– Я Агъя! Лиг, магъя мушваъ къюб ханжал а.

Исайи дурализ: «Чияльн ву» кIуру.

³⁹ Хъя хул'ан удучIвну, Иса, Чан аьдат вуйиганси, Елион дагъдиина гъягъюру. Дугъан къяляхъди ученикарра гъушнийи.

⁴⁰ Йишв'ина гъафиган, Исайи дурализ гъапи:

– Тямягъвалариъ адрахъбан бадали ккарагай.

⁴¹ Хъя Учвра, душвхъан хил хъапIину гатIабхъру кIекIлин ман-зилий къамкъарина ис духыну, гъамци ккарагуз хъюгъру:

⁴²⁻⁴⁴ – Адаш! Эгер Увуз ккундуш, Узхъан гъаму аъзабнан зах гъадабгъ! Вушра Йиз ният ваъ, хъя Явуб гъит ибши.

⁴⁵ Ккарагбахъан ученикарихъна гъафиган, Исайиз дурап хажа-латнаан даахнади рякъюру. ⁴⁶ Ва дурализ кIуру:

– Гъаз даахначва? Гъудужвну, тямягъвалариъ адрахъбан бада-ли ккарагай.



Иса дисуб

⁴⁷ Дугъу гъамци кIури имиди, адмийирин саб ахю гъварч гьюру. Дурагин улихъ йицIикьюр ученикдикан сар Ягъуда хъади шулу. Думу Исаиз мак апIуз Дугъаз багахъ гъахъи. ⁴⁸ Исаиз дугъаз кIуру:

— Ягъуда! Мак апIбииндиг Инсаниятдин Бай масу тувранахъя?

⁴⁹ Исаихъ хъайдариз, му гъял наанди илтIибкIураш дябкъну, Дугъаз кIуру:

— Агъа! Ханжал йивидикIан?

⁵⁰ Дурагикан сари жугъдарин ахю маллайн гъаравшиз йивну, арччу иб ктабтIуру. ⁵¹ Гъадмуган Исаиз гъапи: «Гъистай, ЧIаян ву!» ва лукIран ибак хил кучну, думу сагъ апIуру.

⁵² Учв дисуз дуфнайи жугъдарин ахюнун маллайриз, Аллагьдин хулан гъаравларин ахюдарииз ва агъсакълариз Исаиз гъапи:

— Узу дисбан бадали, учву, гъачгъинаси, ханжларна маргъар хъади удучIвначва! ⁵³ Узу учвухъди гъар йигъан Аллагьдин хулаш шуйза, учву Уз'ина хил за гъапIундайчва. Хъа гъамус, мучушну гъюкум апIурайи вахт ичв вахт ву.

Петр инкар хъуб

⁵⁴ Иса, дидисну, жугъдарин ахюнун маллайн хулаз хуру. Петр ярхла-ярхлади дугъан къяляхъди гъягъюру. ⁵⁵ Гъятдиъ уч духьнайдар, цIа алапIну, вари сатIиди деигган, Петра дурагин арайиль деъбу. ⁵⁶ Сар гъараваш дишагълий, думу цIихъ деънади дяркъну, дугъаз уччвуйи дилигнү, гъапи:

— Гъамура Исаихъ хъайдарикан ву.

⁵⁷ Амма Петри: «Узуз Думу агъюр дарзуз» дупну, кIул ккадаб-гъуру. ⁵⁸ Саб бицIи арайилан, Петр дяркъну, дугъаз сар жарагира: «Увурга гъадрарикан вува», — кIуру. Петр, му касдизра: «Ваъ, дарза» пну, инкар шулу.

⁵⁹ Саб сяльткъан вахт улдубчIвиган, хъана сари ижмишнаан кIуру:

— Якъин гъамура Исаихъ хъайир ву, фицики му Галилей ул-кейиан ву.

⁶⁰ Хъа Петр думу касдиз кIуру:

— Уву фу кIурашра, агъдарзуз.



Дугъу му гафар кIури имиди, даттли уъйир гъапIу. ⁶¹ Гъадмуган Агъа, илдицну, Петрихынди гъилигу, ва Петрин Агъайи чаз гъапи гъаму гафар кIваина гъюру: «Гъи даттли уъйир дапIну ккудубкайиз, шубубан Узу аьгьюр дарзуз пида!» ⁶² Гъадмуган Петр, гъятдиан удучIвну, дерлуди гъишү.

⁶³ Иса дидиснайи адмийир, Дугъин аylхьюри, Дугъаз йивури гъахыну. ⁶⁴ Дугъан улар гъеркри: «Увуз шли гъивнуш, йипа, эгер Уву пайгъамбар вуш!» кIури, йивури гъахыну. ⁶⁵ Гъацира Исаиз хъанарап жара аьрвалар апIури гъахыну.

⁶⁶ Хъайигъан гвачIинган агъсакълар, жугъдарин аыхю малл-ийир ва къанунчийир уч духыну, Иса заан диванханайиз гъахуру.

⁶⁷ Дугъхъан гъерху:

— Эгер Уву Месигъ вуш, йип учуз?

Дугъу дурагиз кIуру:

— Узу учвуз гъапишра, хъугъидарчва; ⁶⁸ Хъа Узу учвуз суал тувишра, Узуз жаваб тувидарчва; ⁶⁹ Гъамусдихъантине Инсаниятдин Бай къудратлу Аллагъдин арччул гъвалахъ деъди.

⁷⁰ Хъа вардари Дугъаз кIуру:

— Яна Уву Аллагъдин Бай вува, сарун?

Исайи дурагиз жаваб тувру:

— Учвуз кIурайиси ву.

⁷¹ Дураги кIуруки:

— Ухъуз сарун фициб шагъидвал лазим вухъа, фицики му га-фар ухъуз Мугъан Чан мелзналан гъеерхъунхъуз!

Иса Пилатдин улихъ

23 ¹Хъасин дураги, гъудужвну, Иса Пилатдихъна гъуху ² ва Дугъак гъамцдар тахсрар кирчуз хъюгъю:

— Мугъу, Чаз Месигъ, паччагъ кIури, халкъ рякъ’ан адаура, Римдин паччагъдиз налук тувуб дюз дар кIури, гысад апIура.

³ Пилатди Исайихъан гъерху:

— Уву «жугъдарин Паччагъ» вуна?

Исайи жаваб вуди дугъаз кIуру:

— Уву гъаци ву кIурава.

⁴ Пилатди жугъдарин аыхону маллайириз ва халкъдиз гъапи:

— Узуз Гъаму Касдик саб тахсирра бихъурадарзуз.

⁵ Амма дураги гужниинди алаурайи:



— Дугъу Галилей уылкейилан ккебгъну гъамина гъайиз, вари Ягъудия уылке вуйибси, аыгьювалар улупури, халкъарин арайиль наразивал ипра.

⁶ Галилейикан деебхыну, Пилатди гъерху:

— Му Галилейин агъали вуйинхъа?

⁷ Хъя Иса Гыироддин вилаятдиан вуйиб аыгъю гъабшиган, Пилатди Иса гъадму йигъари Ерусалимдисъ айи Гыиродихъна гъаъру.

⁸ Иса гъяркъиган, Гыирод гизаф шад шулу. Дугъаз ухдит¹ан Думу рякъюз ккунди айи, гъаз гъапиш дугъаз Исаийикан гизафдар deerхънайи ва Дугъкан саб аыламат рябкъюз миж кади айир вуйи. ⁹ Гыиродди Исаиз гизаф сувалар туври гъахыну, амма Дугъу саб жавабра тувундар. ¹⁰ Жукъдарин аыхуну маллиирина айлами-ри, гъудужвну, гужниинди Иса тахсиркар апIурайи. ¹¹ Гыиродна чан эскэр, Дугъ'ина аырвалар хури, кялхъру. Исаийин пачч-гъаринсдар палтар алахыну, Пилатдихъна къяляхъ гъаъру. ¹² Ва гъадму йигъан Гыиродна Пилат дустар шулу; улихъди дураг чиб-чиҳыди душманвалий ади гъахьний.

¹³ Пилатди, аыхуну маллииризна гъюкумдрагиз ва халкъдиз дих дапIну, ¹⁴ гъапи:

— Учву гъаму Кас, халкъ рякъ'ан адаурайирси гъисаб дапIну, узухъна гъахунчва. Хъя магъя, ичв улихъ ахтармиш дапIну, ууз гъаму Касдик учву кIуру саб тахсирра гъибихъундарзуз. ¹⁵ Ва Гыиродизра гъибихъундар, узу Му дугъахъна гъаунза ва Мугъак ийкIбаз лайикъылу вуйи саб тахсирра дубихънадар. ¹⁶ Гъадлиз, жаза тувну, Му деетидиза. [¹⁷]*

¹⁸ Гъадмуган вардари сабси Чигъар апIуз хъюгъру:

— Дугъаз айжал, хъя учухъна Вараева деет.

¹⁹ Вараева, шагърий гъалабулугъ ипбаз ва адми йивну ийкIбаз лигнү, дустагъдиль итнайир вуйи.

²⁰ Пилатди хъанара, Иса деетуз ккунди, чан сес за апIуру, ²¹ хъя дураги: «Хачрак карс, хачрак карс Думу!» — кIури, Чигъар апIуйи.

* ²³:¹⁷ Грекарин саспи БикIбари кIура: «Гъюкумдин аыхорин, гъар йисан Пасхайнин машквраз дидиснайдарикан сар халкъдин талабниинди деетру айдат айи».



²² Пилатди шубубпи раЖари гъерхру:

— Исаий фу чырувал дапIнахъя? Узуз Мугъак йикIбаз лайикь-лу вуйи саб тахсирра гъябкъондарзуз, гъаци вуйиган, Мугъаз саб бицIи жаза тувну, деетидиза.

²³ Амма мушв'ин уч духьнайидари зарбди чIигъар апIури, Иса хачрак карсуб ккун апIурайи, ва дурарин чIигъар гъалиб шулу.

²⁴ Пилатди гъадрари кIуруси апIуз гъял апIуру: ²⁵ Шагърий гъала-булугъ ипбазна адми йикIбаз лигну дустагъдиль итнайи Варав де-етуру, хъя Иса дурарин ихтиярназ тувру.

²⁶ Иса гъахуз хъюгъиган, рякъюъ чан хутIлиан гъюрайи сар Симон кIуру Киринеяйин агъали гъахъру. Дурари, Иса карсру хач дугъан къял'ин иливну, думу гъабхуз гъитру.

²⁷ Исаин къяляхъди гизаф адмийир ва Дугъахъ зарбди ишура-йи дишагълийир гъягъюру.

²⁸ Исаий, дурарихъинди илтIикIну, гъапи:

— Ерусалимдин дишагълийир! Узухъ мишанай, хъя учвухъ ва ичв веледарихъ ишай. ²⁹ Гъамци кIуру йигъар гъюра: «велед даршлудар, бицIир дархъидар ва нана тутрувдар хушбахтаврар ву!» ³⁰ Гъадмуган дагълариз: «уч'ина ахъай», хъя тепийириз: «учу элеркай» пуз хъюгъдичва, ³¹ адмийири ужур касдиз гъамцдар чIуру ляхнар апIурайган, дурари чIуру касариз фицдар ляхнар апIуйкIан?

³² Исаихъди сатIиди дариз зигбан бадали, кьюр гъачагъра ху-райи. ³³ «Келле» кIурушв'ина гъафиган, Иса ва гъачгъар, сар Исаин арччул, тмунур — гагул терефназди ха�арик карсру.

³⁴ Хъя му арайиъ эскрари, тупут ипри, Дугъан палтар пай апIу-райи. ³⁵ Халкъ лигурى дийигънайи. Дурарин гъякимдрар Дугъ'ин айлхъюрайи:

— Жарадар уърхюри гъахъну, гъит Чав Учв уърхри, эгер Думу Аллагъди кадагънайи Месигъ вуш.

³⁶ Эскрарира, Исаиз люкънар апIури, Дугъан багахъна гъюри, кIантIарихъна сирке хуйи ³⁷ ва гъамци кIуйи: «Эгер Уву жугъда-рин паччагъ вуш, Яв Уву уърх». ³⁸ Дугъан кIулихъ «Му жугъдарин паччагъ ву» дибикIнайиб кебхнийи.

³⁹ Исаихъди дариз дизигнайи гъачгъарикан сари Дугъаз чIуру гафар апIурайи:

— Эгер Уву Месигъ вуш, Увура, учура уърх.



⁴⁰ Тмунури чан юлдшиз кIуру:

— Увуз Аллагъдиҳъан гучI шуладарнуз, уувзра гъациб жаза тувнайиган? ⁴¹ Ухъуз гъякъди жаза тувна, гъаз гъапиш ухъуз ихъ тахсрариз лайикъ вуйиб гъурубкъунхъуз, хъа Мугъу саб чIуру ля-хинра гъапIундар.

⁴² Хъа Исаиз кIуру:

— Уву Яв Паччагълугъдиз гъафиган, узу кIваин апIина, Иса!

⁴³ Исаий дугъаз гъапи:

— Гъякъди кIуразавуз, гъи Узухъди женнетдиъ хьидива.

⁴⁴ Лисундин ваҳт вуйи. Сабпну вари уълкейин сяйт щубуб-дизъан мучIушин улубчIвнийи. ⁴⁵ Ригъдин акв хътабтIу ва Ал-лагъдин хулаъ Гирамишваҳ гъибхнайи чарч гъацIкъял'ансина гъячIябгъю.

⁴⁶ Исаий зарбди гъарай гъапIу:

— Адаш! Йиз рюгъ Яв ихтиярназ тувраза.

Ва гъамци дупну, Дугъан нефес хътубтIу.

⁴⁷ Гъаму гъябкъю эскарин юзбашийи, Аллагъдин ад за дапI-ну, гъапи:

— Дугъриданна, гъаму Кас марщир вуйиштIан!

⁴⁸ Гъаму тамашайиз лигуз уч духънайидар, душваҳ гъабшиб дябкъну, чпин муҳрар убччуври, алдагъуру.

⁴⁹ Иса айгъюкъандар вари ва Дугъаҳди гъаҳи Галилей уъл-кейианмина гъафи дишагълийир, ярхлаанси дийигъну, мидиз лигурайи.

⁵⁰ Гъадму арайиъ Юсуф кIуру сар гъяни ва гъякълу вуйи, заан диванханайин иштиракчи, ⁵¹ дидин къарапихъди рази дарши кас гъюру. Думу Аллагъдин Паччагъвализ ккилигурайи Ягъудия уъл-кейин Аримафей кIуру шагъриан вуйи. ⁵² Пилатдиҳъна душну, дугъу Исаин беден чаҳъна тувуб тIалаб гъапIнийи. ⁵³ Дугъу Исаин беден хачракан кадабгъну, иригъян гъибиржну, гъарзуъ дапI-найи ва гъелелиг фужкIа кивнадру накъвдиль ивру.

⁵⁴ Жвуми йигъ вуйи, султ йигъ улубкъуз багахъ шулайи. ⁵⁵ Иса-йихъди Галилей уълкейиан гъафи дишагълийирра, накъвдихъ-на дуфну, Исаин беден фици ивнаш, лигуру. ⁵⁶ Хъасин хулариз хътаку, дураги ицци ниъ хъайи альтарна ягъар гъазур гъапIу, хъа султ йигъян, Къанундиль улупнайиганси, дураг фарақъат гъаҳи.



24 ¹Чпи гъязур дапІнайи артрин ний хъайи ягъарра хъади, элгъет йигъан, ахсарихъди, гъадму дишагълийир хъана накъвдихъна гъягъюру. ²Хъа дурагиз майит айи хъараҳь гъипнайи гъван гъидипнади рябкъюру, ³накъвдизди учІвиган, дурагиз Агъа Исаин беден гъибихъундар. ⁴Дураги, мид'ин мюгътал духъну, фикрар апІури имиди, сабпну дурагин улихъна вацІрап-Іар апІру палтар али къюр жви ачмиш шулу. ⁵Дураги гучІбаан ис алахъдариш кІуру:

— Учву Чивир гъачІидарин арайиль гъаз агурачва? ⁶Думу мушваъ адар. Думу Чиви гъахъну. Дугъу, гъеле Галилей улкейиль имиди фици гъапнийиш, кІваин апІнай: ⁷«Инсаниятдин Бай гунагъкарин хилиз тувди, дариз зигиди, хъа шубудпи йигъан Чиви хъиди». ⁸Гъадмуган Исаин му гафар дурагин кІваина гъафи.

⁹⁻¹⁰ Къяляхъ хътаку дишагълийири (мурагин арайиль Магдалайиан вуйи Мар'ям, Югъанна, Якъубдин дада Мар'ям ва дурагихъди хъади гъаши жарадарра айи) мидкан йицІисар учениклиз ва миди вуйидариз хабар дебккуру. ¹¹Ученикари, му гафар ичІидарси гъисаб дапІну, дурагихъ хъугъундайи. ¹²Хъа Петр гъуджвну, жаргъну накъвдихъна гъушу ва душваъ ис алахъну гъилигуриз кафнартІан гъяркъюндар ва, мид'ин мюгътал духъну, къяляхъ хътаку.

¹³ Гъадму йигъан ученикарикан къюр Ерусалимдихъан къюб сяльтнан рякъюн манзилнаъ айи Эммаус кІуру гъулаз гъятгъорайи. ¹⁴Дурагар Исаин улукъу гъядисийирикан улхурайи. ¹⁵Чиб-чипихъди улхури фикрар апІурайи вахтна, багахъ духъну, Исара дурагихъди гъягъюз хъюгъю. ¹⁶Чпин улар йитІнайиси, дурагиз Иса альгъю гъахъундар.

— Дугъу дурагихъан гъерху:

— Учву, рякъди фтикан улхурачва?

Дураг пашманди дийигъу. ¹⁸Дурагикан Клеоп кІуру сари Дугъаз жаваб туув:

— Му йигъари Ерусалимдиль гъабшиб душваз гъафидарикан сар Уву вува альдур, дарин!

— Исаий дурагиз гъапи:

— Фтикан?

Дураги Исаиз кІуру:



— Аллагъдин ва вари халкъдин улихъ, ляхнариъ ва гафнаъ къувватлу пайгъамбар вуйи Назаретдин Исаикан.²⁰ Думу жугъдарин маллиирина гюокумдраги тахсиркар дапІну, хачрак карсну дариз зигуз гъитнү. ²¹Хъа учу, Думу Израилин халкъ азад АпІрур ву кІури, умуд апІурайча, хъа гъамус, магъа шубуд йигъ ву гъамциб гъядиса дубхъну. ²²Хъа гъи ич дишагълийирикан сакъюдари учу мюгътал гъапІну: дураг гвачІнин ухди Исаин накъвдихъна гъушиган, ²³дурагиз Дугъан беден гъибихъундар ва хъадакну гъафидари, Думу Чиви гъахъну кІури, хабар дебккрайи, гъадина гъафи малайикарра гъяркъюнчуз кІури, ктибтура. ²⁴Ичдарикан сакъюдар накъвдихъна гъушиган, дурагизра гъадму дишагълийириз гъяркъдар гъяркъну, амма Дугъан беден гъябкъюндар.

²⁵ Гъадмуган Исаи дурагиз гъапи:

— Агъ, пайгъамбрари гъапидарихъ хътругъру ахмакъар ва кІван кагъалсузар! ²⁶Месигъди гъацдар аззабар гъизигхъантІан, Думу Чан гъяйбатнаъ учІвидар, дупнадаринхъа?

²⁷ Хъасин Исаи, Мусайилан ккебгъну, вари пайгъамбрари Чакан Гирами китабарий дидикІнайидарин гъякънаан дураг гъаври Таъру.

²⁸Дураг чпи гъягъюрайи гъулаз багахъ гъашиган, Исаи Чаз дилинтина гъягъюз ккунди айиганси улупури гъахъну. ²⁹Хъа дураги Дугъаз гъапи:

— Учухъди дерг, йигъ хябяхъ шула.

Исара гъадму гъулаъ дурагихъди гъузру.

³⁰Дурагихъди суфрайихъ гъон йивну деънайиган, Исаи, уыл гъадбгъну, Аллагъдиз баркаллагъ дупну, гъудубтІуру ва дурагиз пай апІуру. ³¹Гъадмуган дурагин улар ачмиш шулу ва дурагиз Думу Иса вуйиб аьгъю шулу, хъа Думу дурагин улариккан дургру.

³²Хъа дураги чпи-чпиз кІуру:

— Дугъу рякъюъди ухъухъди улхруган ва Гирами китабарий дидикІнайибин гъаврикк ккаргуган, ихъ юкІвар ургури гъахъундайнхъа?

³³ Гъадму сяйт гъудужвну, дураг Ерусалимдиз хътакуру ва йи-цисар вакиларна имбудар сатІиди ади дихъуру. ³⁴Дураги: «Агъа дугъриданра Чиви гъахъну ва Симондиз ачмиш гъахъну», кІура-йи. ³⁵Хъа муарира, рякъюъ чпиин улуркъдар ва, уыл гъудубтІру-ган, чпиз Думу фици аьгъю гъахънуш, ктитуру.



³⁶Мурар мидкан улхури имиди, Иса Учв дуарин арайиъ ачмиш шулу ва Дугъу: «Учвуз мясяльт ибшри!» кIуру. ³⁷Дуары, аյжайиб духьну ва гучI кабхьну, чпиз рюгъ рябкьюра пну, хиял гъапIу. ³⁸Хъа Исаий дуариз гъапи:

— Гъаз айжайиб духьначва ва дицдар хиялар ичв юкIвариъ гъаз учIвра? ³⁹Йиз хиларизна ликариз лигай: Му Узу вуза, хил кучри ва лигури Узу ахтармиш апIинай, рюгъ жан хъайиб ва кIурбар айиб шулдар.

⁴⁰Гъамци дупну, Исаий дуариз чан хилар ва ликар улупуру. ⁴¹Хъа дуарар шадвалиан мегъел хътругъри ва мюгътал шули айиган, Дугъу дуариз гъапи:

— Мушваъ фициб-вушра ипIруб аничв?

⁴²Дуары Исаийхъна гъубжу балугъин пай гъачIабккуру. ⁴³Исаий, дуариз рябкьюри, ипIуру ⁴⁴ва кIуру:

— Узу учвухъди хъимиidi, учвуз гъаписи, Узкан Мусайнин къанундиъ, Пайгъамбрарин китабдиль ва гъацира Мяльиирин китабдиль дибикIнайиси, Йиз кIул'ина гъюз ккайдар вари тамам духьну ккундийи.

⁴⁵Гъадмуган Дугъу Гирами китабариъ дибикIнайибдин гъаври ахъбан бадали, дуарин фагъум ачмиш апIуру. ⁴⁶Хъасин дуариз гъапи:

— Гирами китабариъ дибикIнаки, Месигъ альзабарикк ккуркъди ва, дукIну, шубудпи йигъан Чиви хьиди ⁴⁷ва, вардари чпин гунгъар гардандиль дисруси, Аллагъди чпилан хил алдабгъруси, Ерусалимдилан ккебгъну варишвариъ Йиз ччвурнахътан Ужувлан хабар рабгъиди. ⁴⁸Магъа гъаши хъузра гъабшибдин учву шагъидар вучва. ⁴⁹Хъа Узу Йиз Адашди учвуз тувурза дупнайиб гъамус тувдизачвуз. Учву, аршариан учвухъна къувват рубкъайиз, Ерусалим шагъриъ гъузай.

⁵⁰Хъасин Исаий дуарар шагъриан адаъну, Вифанияйихънакъан хъади гъюру ва, Чан хилар за дапIну, дуариз ужувлар ккун апIуру. ⁵¹Дуариз ужувлар ккун апIури айи арайиъ, Иса, ученикарихъан гъудучIвури, завуз за шулу. ⁵²Дуары, жилиина ахъну, Дугъаз икрам апIуру, хъасин зурба шадвалииндз Ерусалимдиз хътакуру ⁵³ва, гъаммишан Аллагъдин ад за апIури, Аллагъдин хулаъ гъузру.



ЮГЬАНДИ КТИБТУ УЖУВЛАН ХАБАР

Уходи вахтахъанмина гысаб апIурайиси, юкъубпи «Ужувлан хабар» Аллагъдин Рюгънан кюмекдииндиг Югъандин хилари-лантана, Иса Месигъ дукIну чIиви гъахыхъанмина 50 йискъан улдумбичIвган, учв Эфес шагъриз яшамиши шулайи вахтари гъи-бикIуб ву. Маттаси Югъанра, Иса Палестинайин жилариин Аллагъдин ляхнар апIури лицурайи вахтнахъанмина хъюгъну, Гъадгъахъди ученикди гъуллугънаш гъахъну. Имбуну шубрид «Ужувлан хабарий» адрубдикан ктибтуб ва хъугърударин хи-лиз динариз къаршу ижми яракъ вуди ишлетмиши апIуб – магъа мууну Ужувлан хабарнан улихъ хъайи месела. Китабдин сифте кIулариан Иса неинки гунаш ктру айдати адми, хъа вари дюн’я халкъ гъапIу Аллагъ вуйивалра аьгъю шула. Дюн’яйиз Акв, Гъя-къвал, дугъри Марчлихъан, Уьмур, Хураг, уьмур Тувур – му вари Иса вуйивал ухъуз лап ачухъди аьгъю шулахъуз. Му Хабар-наан рябкьюрайиси, Иса, неинки Чан тереф гъибисурихъна, хъа гъацира жаарарихънара фукъан дикъатлу вуйкIан! Му Ужувлан хабарнан метлебнакан Гирами Рюгъну Чав Югъандин къалми-инди гъамци кIура: «Аммаки гъаму вари дигикIнайиб, учву Иса Месигъ вуйибдихъ, Думу Аллагъдин Бай вуйибдихъ хъугъри пну ва Дугъахъ хъугъбинди учвуз зат ккудуудубкIру уьмур хъпан бадали дигикIнайиб ву» (20:31).



Месигъ гъювал

1 ¹Сифте Гаф айи, Гаф Аллагъдихъ хайи, Гаф Аллагъ вуйи. ²Думу сифте Аллагъдихъ хайи. ³Вари Гъадгъуланмина гъабхьну ва, Думу дарди, арайиз дуфнайибдиқ, фукIара арайиз гъа-фундар. ⁴Уьмур Гъадгъаь а, ва гъадму уьмур инсаниятдиз акв ву. ⁵Аквну мучIушнаь акв тувру ва мучIушнахъан акв ккаб-гъуз шулдар.

⁶ Аллагъди Ягъ'я кIуру ччвур али адми гъаър. ⁷Думу Акв улупуз, Акв Месигъ вуди, Гъадгъулантина вари хъугъбан бадали, гъаур вуйи. ⁸Думу учв Акв дайи, амма Аквнан гъякънаан ша-гъидвал апIуз гъаънайир вуйи. ⁹Гъякъикий Аквну му дюн'яйиз гъюру гъарсар касдиз альгъювалар тувру. ¹⁰Думу, Чав арайиз гъабхи му дюн'яйиз гъафну, хъа му дюн'яйиндариз Думу къа-бул гъахъундар. ¹¹Думу жувандарихъна гъафну, хъа жувандар-ри Думу гъясбикк гъапIундар. ¹²Учв къабул гъапIдариz ва Чан ччвур дубисну хъугъдариz Дугъу дураг Аллагъдин веледар хъувал багъиш гъапIну. ¹³Дураг инсанарин ниятириинди, ясана адмийириз ккун гъабшиган бабкан шлудар дар. Думу веледар Аллагъдихъан ву.

¹⁴ Гаф Инсандиз илтIикIуру ва ухъухъди яшамиш шулу. Ухъуз Дугъан Аллагъвалин зурбавал ва къувват гъябкъюнхъуз, масанва-ли ва гъякъвали ацIнайидар – Дугъаз дураг, Адашдихъ хайи сар Бай вуди хъпаз гъурукъну. ¹⁵Дугъкан адмийириз Ягъ'яйи хабар дебккру: «Магъа Думу узу учвуз кIурайир: „Думу, йиз къя-ляхъди Гъюрайир, узтIан заан ву, гъаз гъапиш Думу узу хъайиз айир ву“». ¹⁶Дугъан абцIнайи ужувленинди ухъуз ужувлахъди уж'вал гъабхъунхъуз. ¹⁷Аллагъди ухъуз Къанун Мусайилантина тувну, хъа ужувларна гъякъвал Месигъ Исайиланмина гъафидар ву. ¹⁸Зат саризра Аллагъ гъяркъюндар, Думу ухъуз анжагъ Ал-лагъди, хъайина-хътру сар Бали, гъарган Чан Адашдихъди хъа-ири, ачмиш гъапIну.

Исаикан Ягъ'яйин шагыидвал

¹⁹ Магъа Ягъ'яйин шагыидвал. Жугъдари Ягъ'яихъан, уву фуж вува, кIури, гъерхуз Ерусалимдиан чпин маллиир ва левитар гъаи-ган, ²⁰ Ягъ'яйи дурагиз ачухъди жаваб тувру: «Месигъ Узу дарза».



²¹ – Хъя дици вуш, уву фуж вува? – гъерхру дурари. Уву Ил'яс вуна?

– Ваъ.

– Уву пайгъамбар вуна?

– Ваъ.

²² – Хъя уву фуж вува? – давам апIуру гъерхувал дурари. – Учу гъаъдариц учу жаваб тувну ккунду. Уву фуж вуди гысаб апIурава?

²³ – Узу, Ишая пайгъамбри гъапиганси: «,,Агъайиз рякъ диш апIинай!“ кIури, ичИ чюлий атIабгу дих вуза».

²⁴ Гъадмуган фарисийи гъаънайидари ²⁵ Ягъ'яйихъан гъерхру: «Хъя уву я Месигь, я Ил'яс, ясана пайгъамбар даруган, уву халкъ гъаз штуан апIурава?»

²⁶ – Узу учву штуан апIураза, – кIури, Ягъ'яйи дурагиз жаваб тувру, – хъя ичв арайиц Адми а. Думу учвуз аygъдарчвуз. ²⁷ Думу узутIан къанди гъюрашра, узу Дугъан шаламарин гъахмийр гъядарчузкъан лайикъ дарза.

²⁸ Му вари Ягъ'яйи халкъ штуан апIури гъаши Ярдан нирин тмуну гъирагъдихъ хъайи Вифания кIурушваш гъабхънийи. ²⁹ Хъайигъан Ягъ'яйиз чахъинди гъюрайи Иса рякъюру ва кIуру: «Магъя, дюн'яйин гунгъар Чайна гъадагъуз ккай Аллагъдин Агълиж гъюра. ³⁰ Думу узу Чакан: „Думу йиз къяляхъди Гъюрайир узутIан заан ву, гъаз гъапиш Думу узу шайиз Айир ву“, – Гъапир ву. ³¹ Думу фуж вуш, узузра аygъдайзуз, амма узу, Месигь Израил из аygъю ишри пну, халкъ штуан апIуз дуфнайир вуза».

³² Ягъ'яйи гъацира гъапи: «Узузра Думу Месигь вуйиб аygъдайзуз, хъя штуан апIуз узу Гъаури гъапунзуз: ³³ „Шлиина-вш Гирами Рюгъ ис шули рякъидивуз ва Гъадгъуин гъузди. Ари Гъадмунур хъиди Гирами Рюгънахъди адмийир цIийи Алаътур“: Узуз гъаци рябкъюзра гъябкъюнзуз:

Гирами Рюгъ луф жюрейииндигъа Гъадгъуина аьршариан гъаффиний. ³⁴ Магъя узу адмийирин улихъ шагъидвал апIураза: Ари Гъадму ву Аллагъдин Бай».

Исаин сарпи ученик

³⁵ Хъайигъанра Ягъ'я, чан кьюр ученикра хъади, гъадушв'ин алди шулу. ³⁶ Багхъантина гъярайи Иса дяркъну, Ягъ'яйи кIуру:

– Лигай, магъя Аллагъдин Агълиж!



³⁷ Дугъан му гафар гьеерхьу ученикар Исаин къяляхъди гъягъюру.

³⁸ Иса къяляхъинди илтІикІуру ва, дураг дяркъну, гьеерхру:

— Фу ккундучвуз?

— Я Рабби! (Му илтІибкІиган «Мялим» кІуру гаф ву.) Уву наан яшамиш шулава? — пну гьеерхру дураги Исаихъан.

³⁹ — Узухъди гъачай, ва учвуз рябкъидичвуз, — гъапи Исаи. Дураг Исаихъди гъягъюру. Думу яшамиш шулайиш дябкъну, дураг хябяхъдиз Гъадгъах гъузру. Сяльт юкъбарихъна вуйи.

⁴⁰ Ягъ'яйин гафарихъ хъебехъну Исаихъди гъушу кьюрикан сариз Андрей кІуйи, думу, чаз Петр кІури шлу Симондин чве вуйи. ⁴¹ Дугъу, гъадму сяльт чан чве Симон дагну, дугъаз кІуру:

— Учуз Месигъ гъидихъунчуз! (Му илтІибкІиган «Христос» — «Аллагъдихъан вуйир» кІуру гаф ву.)

⁴² Андреий думу Исаихъна хъади гъюру. Иса дугъаз дикъатлуди лигуру ва кІуру:

— Уву Югъаннайин бай Симон вува. Увуз Кифа, яна Петр кІуру хъиди. (Жугъуд чАлниинди «Кифа» ва грек чАлниинди «Петрос» «Гъван» кІуру гаф ву.)

⁴³ Хъайигъан Исаи Галилей улкейиз гъягъюз къаст апІуру. Дугъаз Филип алахъуру:

— Узухъди гъач! — кІуру дугъаз Исаи.

⁴⁴ Филипра Вифсадайиан — Андреинна Петрин гъахи шагъриан — вуйи. ⁴⁵ Филипди Нафанаил агуру ва кІуру:

— Учуз, Мусайи чан Къанундиль шлиkan дибикІнаш ва пайгъамбраира шлиkan дибикІнаш, Гъадму гъидихъунчуз. Думу Назарет шагъриан Юсуфдин бай Иса ву.

⁴⁶ — Назаретдиан? Назаретдиан фукІа ужуб удубчІвур кІурана? — наразиди кІуру Нафанаили.

— Гъач гъягъюхъа, ва уву лигара, — кІуру дугъаз Филипди.

⁴⁷ Чахъна гъюрайи Нафанаил гъяркъиган, Исаи дугъакан гъамци кІуру:

— Магъа, затра кучІал ва цАарувал ктру, чан дугъри израилжви.

⁴⁸ — Увуз узу наънан аygъявуз? — гьеерхру Нафанаили.

— Узкан увуз Филипди ктибтайиз улихъна Узуз уву инжирин гъарикк гъяркъюнзуз, — пну, жаваб туву дугъаз Исаи.



⁴⁹ – Агъа! Уву Аллагъдин Бай вува – Израилин Паччагъ! – гье-весниинди гъапи Нафанаили.

⁵⁰ – Уву Узухъ гъаддиз хъугъунва, Узуз уву инжирин гъарикк гъяркъюнзуз гъапну кIури? Хъа увуз мутIан бегьем артухъ аль-матар рякъидивуз.

⁵¹ – Исаи давам апIуру:

– Гъякълу вуйи гъякъ кIуразачвуз: учвуз завар гъатIарццури ва Аллагъдин малайикар Инсаниятдин Бал’ина ис-за фици шулуш, рякъидичвуз.

Кана шагъриъ сумчир

2 ¹ Кьюд йигълан Галилей улкейин Кана шагъриъ сумчир шулу. Душвавь Исаин дадара айи. ² Сумчриз Исаиз ва Дугъан ученикаризра теклиф вуйи.

³ Хялари вари чаяхир гъубхъиган, Исаин дадайи Дугъаз кIуру:

– Муарин чаяхир имдар.

⁴ – Уву гъаз кIурава Узуз дици? – жаваб тувру дугъаз Исаи. – Йиз вахт мегъел улубкънадар.

⁵ – Дугъу фици гъапиш, гъаци апIинай, – гъапи Исаин дадайи кюмекчириз.

⁶ Гъадушвахъ жугъдари чпин диндихъди жикIувалариз ишлет-миш апIури шлу йирхъуб гъандин латар хъайи, дурарикан гъа-рубдиль къуб-шубуб гаргун шид гъабгъойи.

⁷ – Латар штухъди ацIай, – кIуру Исаий кюмекчириз. Дура-рира латар даргарикиннакъан штухъди ацIру.

⁸ – Гъамус сацIиб шид удубзну, мярака кIули гъабхурихъна гъайибхай, – гъапи Исаий.

⁹ Мярака кIули гъабхури чаяхир илтIибкIнайи штук ниъ капIру. Дугъаз чаяхир гъапIиб-вуш альгъдайи, хъа кюмекчириз альгъдайи. ¹⁰ Мярака гъабхури, жамраз дих дапIну, кIуру:

– Адмиири хялариз сифте ужуб чаяхир гъивру, хъасин вари пиян гъашиган, чурууб хуру. Хъа уву ужубсиб чаяхир гъамусдиз гъаз гъибтнава?

¹¹ Му Исаий Галилей улкейиль айи Канайиъ улупу альама-тарикан сабпи альамат вуйи. Гъамдинди Дугъу Чан зурбавал улупний ва Дугъан ученикар Дугъахъ хъугънийи.



¹² Гъамдихъан Иса Кафернагъум шагъриз гъягъюру. Дугъахъди Чан дада, чвийр ва ученикара хъайи. Дурагин душваъ сякьюдар йигъар шулу.

¹³ Жутъдарин Пасхайн машквар багахъ шулайиган, Иса Ерусалим шагъриз гъягъюру. ¹⁴ Душваъ Аллагъдин хулан гъятдиъ учІвиган, Дугъаз малар, марчар ва луфар масу туврайидар ва пулар гъюдохрударра рякъюру.

¹⁵ Исаи, тІурнарикан гъирмаж дапІну, дураг вари гъадушв'ан чпин малар-марччарра хъади ут'урккуру, пул гъюдохрударин пулар даргъуру ва устлар ккитІикІуру. ¹⁶ Дугъу луфар масу туврайидариз гъапи:

— Мураг милин дургин апІинай! Йиз Адашдин хал базариз миилтІбкІланай!

¹⁷ Гъаму вари гъабхыиган, Исаин ученикарин Гирами китабарик дидикІнайи гъамцдар гафар кІваина гъюру: «Яв Хулахъна вуйи ккунивали Узу цласи ургиди».

¹⁸ Мушв'ин жугъдарин гъюкумдрар гъедергуру.

— Увуз гъамцдар апІуз ихтияр айивал фициб альаматниинди улупидива? — гъерхру дураги.

¹⁹ — Му Аллагъдиз ккарагру хал учву дабгъай, хъа Узу думу шубуд йигъан айтІ дивурза, — дурагиз жаваб вуди гъапи Исаи.

²⁰ — Му Аллагъдин хал диври инсанар ягъчІвурна йирхъуд йисан гъилихну, хъа Уву шубуд йигъан дивдина?! — гъапи жугъдари.

²¹ Исаи Аллагъдин хулкан улхурайиб Чан бедендикиан кІурайивал вуйи. ²² Иса, дукІну, шубудпи йигъан чИви гъашиган, Дугъу гъамдикан дупнайи гафар Дугъан ученикарин кІваина гъафнийи, ва дураг Гирами китабарихъ ва Исаихъ хъугънийи.

²³ Иса Ерусалимдиъ Пасхайн машквраъ аии вахтна, Дугъу улупу альаматар дяркъну, гизафдар Дугъахъ хъугънийи. ²⁴ Хъа Учв, Иса, саринна ихтибарнаъ учІвдайи, гъаз гъапиш Дугъаз инсанар ужуди аygъайи.

²⁵ Исаиз адмийириин хасиятирикан шли-вш ктитувал лазим дайи, фицики Дугъаз гъарсар касдин кІваль айиб аygъайи.



Иса ва Никодим

3 ¹Фарисийирин арайиъ жугъдарин гъякимирикан сар Никодим кIурур айи.

² Иишвну Исаийхъна дуфну, дугъу кIурур:

— Мялим! Учуз уву Аллагъдихъан дуфнайи Мялим вуйиб аыгъячуз, фицики Уву апIрусадар айламатар, эгер Аллагъ Увухъди хътайиш, сарихъланра апIуз даршлийи.

³ Исаий дугъаз жаваб вуди кIурур:

— Гъякълу вуйи гъякъ кIуразавуз: анжагъ учв цIийикIултIан бабкан гъаширихъантIан Аллагъдин Паччагълугъдиъ учIувуз хъибдар.

⁴ — Ахю адмийихъан хъана бабкан хъуз фици шулухъя? Думу, сабансана чан дадайин фуниль учIвну, хъана бабкан даршулда? — кIурур Дугъаз Никодимди.

⁵ Исаий дугъаз жаваб туву:

— Гъякълу вуйи гъякъ кIуразавуз: фуж штуан ва Гирами Рюгъ-нахъан цIийикIултIан бабкан дархьиш, дицирихъан Аллагъдин Паччагълугъдиъ учIувуз хъибдар. ⁶ Бедендикиан бабкан шлуб беден ву. Анжагъ Гирами Рюгънакан рюгътIан бабкан шулдар. ⁷ Узу увуз: учву цIийикIултIан бабкан духъну ккунду, гъапну кIури, мюгътал маҳъанай. ⁸ МикI ккунишвахъинди хъивру. Увуз дидин сес ебхуруувуз, хъа думу наанди ва наънан хъивраш, аыгъю шул-дарвуз. Гирами Рюгънакан бабкан гъаширра, ари гъаци ву.

⁹ — Дици фици хъуз мумкин ву? — пну, гъерху Никодимди.

¹⁰ — Уву Израилин мялим вуди, гъамцдар шей'арикан аыгъдар-нуз? — жаваб тувру дугъаз Исаии. — ¹¹ Гъякълу вуйи гъякъ кIу-разавуз: Учу кIурача Учуз аыгъюбдиан ва шагъидвал апIурача гъябкьюбдикан. Хъа учву Учу шагъидвал апIурайидихъ хъугъ-радарчва. ¹² Эгер Узу учвуз му дюн'яйинубдикан кIурайиган учву хъугърадарш, хъа айршаринубдикан гъапиш, фици хъугъ-дичвахъя? ¹³ Гыч саркъана айршариз за гъахъундар, гъадушв'ан жилиина ГъафиртIан — Инсаниятдин БайтIан гъайри. ¹⁴ Ичи чюлий Мусайи фици битI ягъалди гакIвлик кибтIну дебккнуш, гъаци Инсаниятдин Байра хамхрик карсну хъиди, ¹⁵ Дугъахъ хъу-гъу гъарсариз зат ккудудубкIру уымур хъпан бадали. ¹⁶ Аллагъдиз дюн'я гъаци ккун гъабхънуки, Дугъу Чан айи-адру сар багъри



Бай, Дугъахъ хъугъну, гъарсар кас дукІну дариши, хъа зат кку-
дудубкІру уымур ибшри пну, гъальну гъурбан гъапІну.¹⁷ Аллагъди
Чан Бай дюн'яйиз, дидин диван апІуз ваъ, хъа Гъадгъулантина
дюн'я дюбхну хъуз гъальну.¹⁸ Дугъахъ хъугънайирин диван апІи-
дар, хъа фуж Дугъахъ хъугъундарш, сарун диван гъапІу мисал ву,
гъаз гъапиш думу Аллагъдин багъри Балихъ хъугъундар.¹⁹ Диван
апІувал гъаддиз аки, дюн'яйиз акв гъафну, хъа адмийириз акв-
тІан мучІушин артухъди ккун гъабхъну, гъаз гъапиш дуарин
ляхнарра чурудар ву.²⁰ Фицики чурууб апІурайи гъарсар касдиз
акв даккун шулу ва, чан чуру ляхнар ашкар дариши пну, думу
аквнахъна гъягъюрдар.²¹ Хъа гъякъвалиинди апІур, чан ляхнар
ашкарди хъуз, аквнахъна гъягъюру, гъаз гъапиш дугъан дуар
Аллагъдиъди дапІнайидар ву.

Иса ва штуан апІру Ягъ'я

²² Мидхъантינה Иса, Чан ученикарра хъади, Ягъудия улкейин
ругариина гъюру ва, душваъ гъаддарихъди яшамиш шули, дуар
штуан апІури гъахъну.²³ Гъадму вахтна Ягъ'яра Салим кІуру-
швахъ хъайи Энондиз адмийир штуан апІури шулу, гъаз гъапиш
душваъ шид гизаф аи ва дина штуан хъуз хайлар халкъ гъюри
гъахъну.²⁴ Му Ягъ'я дустагъдиз итайиз гъабхъиб вуйи.

²⁵ Гъадмуган Ягъ'яйин ученикарикан сакъюдари жугъдарихъди
штуан хъпан гъякънаан гъюжат ккебгъру,²⁶ ва дуарари Ягъ'яихъ-
на дуфну гъерхру:

— Мялим, кІваинди иминуз, увухъди Ярдан нирин тмуну гъи-
рагъдихъ гъуркъу, уву Чакан ктибу Гъадму Кас? Магъа, Дугъу
адмийир штуан апІура ва Дугъахъна вари гъюра!

²⁷ — Адмийихъан анжагъ чаз аэршириан улупубтІан апІуз дар-
шул, — пну, жаваб тувру Ягъ'яи. — ²⁸ Узу учвуз: „Узу Месигъ дар-
за, хъа узу Аллагъди Дугъаз рякъ ккабалгуз гъаънайир вуза“, —
гъапибдин шагыдар вучва.²⁹ Швушв анжагъ швшув хурайириз
ву, хъа дугъахъ хъебехъну, дугъу гъапиб апІурайир швшув хура-
йирин дуст ву. Швшув хурайирин дих кубкІиган, шад шулу: узу-
ра гъаци шадвали ацІназу.³⁰ Фицики Дугъан ад машгъур ва ахю
дубхъну ккунду, хъа йизуб — циб шула ва ахирохъна гъюра.



Заълан Гъафир

³¹ Айршириан Гъафир гъаму дюн'яйин алидартIан зина ву, хъа му дюн'яйин алидар гъаму дюн'яйиндартIан дар, ва дураг му дюн'яйин ляхнарикантIан улхурира шулдар. Айршириан Гъафир варитIан заан ву.

³² Дугъу Чаз гъеебхъубдикан ва гъябкьюбдикан кIура, аммаки адмийири Дугъан шагыидвал къабул апIурадар. ³³ Дугъан гафар къабул апIурайир гъякъ Аллагъ туйивалихъ хъугъра. ³⁴ Фицики Аллагъди Гъаънайир Аллагъдин гафариинди улхура, гъаз гъапиш Аллагъди Дугъаз бегъем Гирами Рюгъ тувна.

³⁵ Адашдиз Чан Бай масанди ву ва гъаддиз варибииин гьюкум Дугъан хилиз тувна. ³⁶ Аллагъдин Балихъ хъугънайириз зат ккудуубдикIу ръумур хъибди, хъа Дугъахъ хътругъуриз дишиб ръумур ябкьидар ва дицириин гъаммишандиз Аллагъдин хъял хъибди.

*Иса ва
Самарияиан вуйи дишагъли*

4 ¹⁻³Фарисийириз Ягъ'яйизтIан Исаиз артухъди ученикар ва штуан хъуз гъорудар айбдикан аygъю шулу. Гъякъикъатдиль адмийир Исаи Чав варь, хъа Дугъан ученикари штуан апIури гъахъну. Мидкан аygъю гъабшиган, Ягъудия улке гъибтну, Агъа хъана Галилей улкейиз гъягъюру. ⁴Дугъан рякъ Самария юрданаантина вуйи. ⁵Ва магъа Иса Самарияйиъ аий Сихар кIуру шагъриз гъюру. Думу шатыр Якъубди чан Юсуф кIуру бализ ба-хиш гъапIу хутIлин багахъ хъайи. ⁶Душвай Якъубдин гъуйи аий. Рякъюв эргу Иса гъадму гъайдихъ деъру. Вахт лисухъна вуйи. ⁷Дина штуз Самарияиан сар дишагъли гъюру.

— Узуз убхъруб чава, — кIуру дугъаз Исаий.

⁸Дугъан ученикар шагъриз ипIруб гъадабгъуз душнайи.

⁹— Уву, жугъудри узхъян, Самарияиан вуйирихъян, убхъуз ужуб фици ча кIурава? — гъерху Дугъхъан жаваб вуди дишагълии. Фицики жугъдар самариялуйирихъди албагну адайи.

¹⁰Исаий жаваб туву:

— Эгер увуз, Аллагъди адмийириз фу тувруш, аygъяйиш ва, «Узуз убхъруб чава» КIурайир Фуж вуш, аygъяйиш, уву Узхъян шид ккун апIидийва ва Узу увуз чииви шид тувдийза.



¹¹ – Я аыхю кас! – кIуру Дугъаз дишагълийи, – Увухъ гыч бедрекъан хъадарвухъ, хъа гъуйи деринуб ву. Хъа Уву дициб шид наньнан гъадабгъидийва? ¹² Уву учуз му гъуйи туву ва дид’-ан чавра, чан баярина мал-къарайира шид убхьури гъashi ич аба ЯкъубтIан заанур вунахъя?

¹³ Исаий жаваб тувру:

– Му шид убхьру гъарсар касдиз цIиб арайилан хъанара убхъуз ккуун хъибди. ¹⁴ Хъа узу шид тувну гъубхъур сану гыч зат харгидар. Гъаз гъапиш Узу дугъаз туву шид зат ккудулубкIру умур тувру яшайишдин булагъдиз илтIибкIиди.

¹⁵ – Я аыхю кас! – кIуру Дугъаз дишагълийи, – Узуз сарун затра шид ккуун даршлуганси ва мина дидиз дяргъргутанси гъадму шид чава!

¹⁶ Душну яв жилирра гъамина хъади гъач, – кIуру Исаий.

¹⁷ – Узухъ жилир хътарзухъ, – гъапи дишагълийи.

– Уву, жилир хътарзухъ кIури, дюзди гъапива, – кIуру Исаий дугъаз. – ¹⁸ Фицики уву хъуб раЖари швувахъ гъахъунва, хъа гъамсяялти увухъ хъайир яв жилир дар. Уву дюз гъапунва.

¹⁹ – Я аыхю кас! – кIуру Дугъаз дишагълийи, – Уву пайгъамбар вуди рякъюразуз. ²⁰ Ич абийир гъатму дагъдина икрамназ гъюри гъахъну, хъа учву, жугъдари, кIурачва, икрам апIуз анжагъ ЕрусалимдизтIан душну ккундар.

²¹ Исаий дугъаз кIуру:

– Хъугъ Узухъ, дишагъли, гъамус учву я му дагъдиин, я Ерусалимдиз ихъ Адашдиз икрам апIидарчва – гъациб ваҳт улубкъура.

²² Учвуз, самариялуйириз, учву фтиз икрам апIурашра, аygъдарчвуз. Хъа учуз, жугъдари, учву фтиз икрам апIураш, аygъячуз, фицики уърхювал жугъдари хъанмина гъибди. ²³ Хъа гъациб ваҳт улубкъидики, ва думу улубкъузра улубкъина, халис икрам апIрудари Адашдиз рюгъниинди гъякъвалиинди икрам апIиди. Ихъ Адашди, иллагъки, гъамцдар икрам апIрудар агура. ²⁴ Аллагъ Рюгъ ву ва гъаддиз Дугъаз икрам апIрудари рюгъниинди гъякъвалиинди Дугъаз икрам дапIину ккунду.

²⁵ – Месигъ дуфну ккуниваликан узуз аygъязуз, – гъапи дишагълийи. – Думу гъафиган, Дугъу учуз варибикан ктибтиди.

²⁶ – Гъадму уву кIурайи Адми увухъди улхура. Узу вуза Месигъ, – кIуру Исаий.



²⁷ Гъадму арайиъ Исаин ученикар гъюру ва, Дугъу дишагъли-йихъди гафар апIури дябкъну, дураг мюгътал шулу. Амма сари-ра Дугъхъан, фу ккунди аш, вая дугъахъди гафар гъаз апIураш, гъерхундай.

²⁸ Дишагълии чан шид айи гвар гъибтну, шагъриз хъадакну, адмийириз кIуру:

²⁹ – Узухъди гъачай ва узу йиз уымриъ гъапIу вари ляхнарикан китту Касдиз лигай. Мумкин ву Думу Месигъ хъузра?

³⁰ Дураг шагъриан удучIвну, Гъадгъахъна гъягъюру.

³¹ Хъа му вахтна ученикари Исаикан:

– Я Мялим, фукIа ипIина, – кIури, тIалаб апIурайи.

³² – Узухъ гъациб хураг хъазухъки! Дидкан учвуз аygъю хъузра аygъдарчвуз, – гъапи Дугъу.

³³ Гъадмуган ученикари чиб-чпихъан гъерхру: «Белки Дугъаз ипIруб шликIа гъабхнушул-гъя?»

³⁴ Исаии дурагиз кIуру:

– Йиз хураг Узу Гъаурин ният тамам апIуб ва Дугъан ляхин ккудубкIуб вуйиз. ³⁵ХутIил убзури, учву кIури шулчва: «Юкъуб вазсана – ва иганра хъубкъди». Хъа магъа Узу учвуз кIураза: улар арщай ва хутIализ лигай – дураг ургуз хъуркъна. ³⁶Убгу-райири гъамустIанра чан гъякъи гъадабгъура ва зат ккудудубкI-ру уымриз бегъер уч апIура, гъубзурра ва гъубгурра – кьюридра сабси шад хъпан бадали. ³⁷«Сари убзуру, тмунури ккадабцIуру» кIуру мисал гъамци вуйиган гъякъ ву. ³⁸Узу гъаразачву, учву убган бадали, учву зегъмет дизригушваз. Жарадари зегъмет гъи-зигну, хъа учву дурагин зегъметнан бегъер уч апIурачва.

³⁹ Му шагъриан вуйи самариялуйирикан гизафдар Исаихъ хъугъру, фицики му дишагълии Дугъан дурагиз дупнайи: «Ду-гъу йиз уымриъ узу гъапIу вари ляхнарикан ктибтунзуз». ⁴⁰Сама-риялуйири, Исаихъна дуфну, Думу чпих гъузуб тIалаб апIуру. Ва Думу дурагихъди кюод йигъан гъузру. ⁴¹Исаии дурагиз гъа-пIу ктибариинди Дугъахъ хъанара гизафдар хъугънийи. ⁴²Ду-рари думу дишагълииз кIуру: «Сифте учу Исаихъ яв гафариз дилигну хъугъунча. Хъа гъамус Дугъахъ учу ич-уч’инди хъебехъ-ну хъугърача, ва аygъячуз: Думу дугъриданра дюн’я урхру Ме-сигъ ву».



Зурба гъуллугъчийин бай сагъ апIуб

⁴³ Кьюд йигълан Иса, дилин удучIвну, Галилей уълкейиз гъягъюру, ⁴⁴ фицики Дугъу Чав мидиз улихъна гъапний: «chan ватандын пайгъамбрин гъюрмат даршул». ⁴⁵ Галилейиз гъафиган, душван агълари Иса хуш’валиинди къабул апIуру, гъаз гъапиш Ерусалимдиз Пасхайн машквраз гъушиган, дураиз Дугъу гъапIкъандар вари дяркънайи, фицики дураппа гъадму машквраш айи.

⁴⁶ Иса хъана Чав шид чаяхриз илтIибкIу Кана кIуру Галилей уълкейин шагъриз гъягъюру. Гъадму вахтна Кафернагъум шагърий паччагъдин гъякимдариликан сар яшамиш шулайи ва дугъан бай яманди иццурайи. ⁴⁷ Иса Ягъудия уълкейиан Галилейиз дуфнайибикан деебхъну, думу Дугъахъна гъюру ва, чан йикIру гъялнай айи бай сагъ апIуз Кафернагъумдиз гъач, кIури, Исайиз миннатар апIуру.

⁴⁸ — Учвкан саркъан, альаматар ва аյжайиб лишнар дяркънай кан гагъди, хъугъуз ккайдар дарчва! — гъапи дугъаз Исайи.

⁴⁹ — Я ахю кас! Йиз бай йикIайиз гъача! — кIури, паччагъдин гъякимдар Дугъаз хъана ккарагуру.

⁵⁰ — Хулаз гъарах, яв бай яшамиш шули гъузди, — кIуру Исайира. Ва му адми Исайин гафарихъ хъугъру ва рякъюь учIвру.

⁵¹ Рякъюь дугъаз чан гъуллугъчийир алахъуру ва дураи дугъаз: «Яв бай сагъ гъахъну», кIуру. ⁵² Дугъу дураихъан: «Бализ филаси рягъят гъабхъну?» — пну, гъерхру. «Накъ лисхъан дугълан убцрушин алдабхъну», — гъапи дурари.

⁵³ Муш’ин балин адашдиз, чан бай Исайи: «Яв бай яшамиш шули гъузди», гъапи вахтна сагъ гъашиб айгъю шулу, ва дугъан вари хуландар Исайихъ хъугъний.

⁵⁴ Му Ягъудияиан Галилейиз гъафиҳъан Исайи улупу кьюбпи альамат вуйи.

*Вифезда гъямамназ ккилигурайип
сагъ апIуб*

5 ¹Дидхъан саб цИб вахтналан жугъдарин машквар улубкуруу ва Иса Ерусалимдиз гъягъюру.

² Ерусалимдиз Марччарин латар кIурушвахъ, жугъуд чIал-ниинди «Вифезда» (Рягъимлувалин хал) кIуру саб кахъру



гъямам хъайи. Дишихъна элеркнайи гъвандин мурхълар кку-
дукънайи хъуб дегълиз гъюрайи.³ Гъадму хъубиб дегълизарра
ацІну фалиж кайдар ва майифдар ади шуйи. Дураг,fila
шид ккибикуз хъюгъруш, гъаддиз ккилигири шуйи.⁴ Фици-
ки Аллагъдин малайикди бязи вахтари, гъюри, шид ккиби-
къуи ва, шид ккибикухъан сифте вуди фуж учІвиш, гъадму,
чак фициб уъзур кашра, сагъ шули гъахъну.⁵ Мушваъ сум-
чурна миржид йисан ицуурайи сар кас айи.⁶ Исаиз думу
дахънади дяркъну ва хайлин вахтна ицуурайиб аygъяди, дугъ-
хъан гъерхру:

— Сагъ хъуз ккундуунуз?

⁷ — Йиз ахюор, — жаваб туvu ицуурайири, — ккун даршулин.
Аммаки, шид ккибикубси, штук кучІвуз узуз кюмек апІру
адми шуладар. Хъа узу кучІвуз хъюгъиган, узутІан ухди душвак
жарар кучІвнади шула.

⁸ — Гъудужвну, яв ахинра гъадабгъну, гъарах, — кІуру дугъаз
Исаий.⁹ Ва думу дишлади сагъ духъну, чан ахинра гъадабгъну,
гъягъюру.

Думу султ йигъ вуйи.¹⁰ Гъаддиз жугъдарин гъюкумдари сагъ
гъаши касдиз кІуру:

— Гъи султ йигъ ву, гъаддиз Къанундиинди ахин гъабхуз ихти-
яр адар!

¹¹ — Узу сагъ гъапІури: «Ахин гъадабгъну гъарах», гъапунзуз, —
гъапи дугъу.

¹² — Хъа фуж ву думу Адми, увуз: «Ахин гъадабгъну, гъарах»,
гъапир? — гъерху дураги.

¹³ Сагъ духънайириз, Думу фуж вуш, аygъдайи, фицики гъаду-
шваъ ахючІвэх халкъ ади, Иса гъаддари гъякъюри имдайи.

¹⁴ Хъасин Исаий, гъадму кас Чаз Аллагъдин хулаъ алахъиган,
дугъаз гъапи:

— Магъа лиг, уву сагъ гъахъунва, сарун гунағ ляхнар мапІан,
даршиш митІан артухъ пис гъял хъибдияв.

¹⁵ My касди гъамус душну, учв сагъ гъапІур Иса ву, кІури,
жугъдарин гъюкумдари хабар дебккру.¹⁶ Жугъдарин гъюкумд-
пар, Исаий му ляхин султ йигъан гъапІну кІури, Дугъахъ хъергүз
хъюгъру.¹⁷ Хъа Исаий дурагиз жаваб тувру:

— Йиз Адаш гъарган лихури шулу, Узура лихураза.



¹⁸ Жугъдарин гьюкумдраги Иса, неинки Дугъу султ йигъандин къайда гьючІюбъыну кІури, хъа гъацира, Аллагъдин Бай вуз, кІури, Учв Аллагъдихъди барабар апІурайиган, айибІан артухъ Думу йивну йикІуз чпин къаст ижми апІур.

Балин къудрат

¹⁹ Исайи дурализ кІуруки:

— Гъякълу вуйи гъякъ кІуразачвуз: сабан Чан Адашди гъапІ-раш дярябкъкан гагъди, Балхъан Чан-Чайнди фукІара апІуз шулдар. Адашди гъапІраш, Балира гъадму апІура. ²⁰ Адашдиз Бай ккунду, ва Дугъу Чав апІурайдар вари Бализ улупура. Дугъу Бализ бегъем артухъ улупиди ва учву мөгътал хъуз кки-мичва. ²¹ Адашди гъачІидар чИви апІруси ва дурализ уымур тувруси, гъаци Балира Чаз ккунириз уымур тувди. ²² Адашди са-ринра суд апІурадар; ²³ варидари, фици Адашдин гьюрмат уьб-хюраш, гъаци Балинна гьюрмат уьбхбан бадали Дугъу вари суд апІру гьюкум Балихъна тувна. Шли Балин гьюрмат уьбхюрадарш, гъадгъу Думу гъау Адашдинра гьюрмат уьбхюрадар. ²⁴ Гъякълу вуйи гъякъ кІуразачвуз: шлиз Йиз Гаф ебхураш ва фуж Узу Гъаурихъ хъугъраш, гъацири зат ккудуудубкІру уымур гъазанмиш дапІна, дицир суддин улихъ дийигъидар. Дицир гъамустІанра, дукІну хуввалихъан, гъаргандин уымрий учІвна. ²⁵ Гъякълу вуйи гъякъ кІуразачвуз: вахт улубкъура — сану улубкъынора ву! — дийихнайдариз Аллагъдин Балин дих ебхьиди, ва гъеебхъдар гъар-гандин уымрихъна чИви хъиди. ²⁶ Фици Адаш уымрин булагъ вуш, гъаци Байра Дугъу уымрин булагъ гъапІну. ²⁷ Ва Дугъу Бализ суд апІру гьюкумра тувна, фицики Думу Инсаниятдин Бай ву. ²⁸ Учву мид’ин мөгътал маҳъанай, вари накъварик кайида-риз Аллагъдин Балин сес ебхъру вахт улубкъура ва накъвариан удучІвиди. ²⁹ Фужари уж’вал гъапІнуш, дураг яшайишдиз чИви духъну удучІвиди; фужари писвал гъапІнуш, дицдар чпин суд апІбан бадали удучІвиди. ³⁰ Узхъан Йиз хусуси гьюкмиинди фукІа апІуз шулдарзухъан. Узу кІураза Узуз Аллагъдихъан еб-хъурайиси ва Йиз суд дишуб ву, фицики Узу Узуз ккуниб апІу-радарза, хъа Узу Гъауриз ккуниб апІураза.



Исайикан шагыидвал

³¹ Эгер Узу Узкан адмийириз ктибури гъашиш, дурап Узухъ хътругъубра мумкин ву. ³² Аммаки Узкан ктибту жара Шагъид а, ва Узуз аygъязуз, Дугъу Узкан ктибтурайиб гъякъ вуйивал. ³³ Учву Ягъ'яихъна адмийир гъаунчва, ва дугъура вари гъамрар гъякъ вуйиб тасдикъ гъапIну. ³⁴ Хъа Узу адмийирин шагыидвалилан асиллу дарза: Узу му вари, учву урхбан бадали кIураза. ³⁵ Ягъ'я угурни акв туврайи чирагъсир вуйи, ва учву дугъан акв шадвалиинди цIиб вахтнастIан къабул гъапIундарчва. ³⁶ Амма Узуз, Йиз гъякънаан Ягъ'яйи гъапивал-Тан хъанара мюгъкам шагыидвал азуз, фицики, Адашди Узуз апIин дупнү, Узу апIурайи ляхнари, Узу Адашди гъаур вуйиб тасдикъ апIура. ³⁷ Гъаци Узу гъау Адашдира Узкан шагыидвал апIура. Хъа учвуз Дугъан дих затра гъебхъундарчвуз, ва учвуз Думу затра гъяркъюндарчвуз. ³⁸ Ва учву ичв кIавъ Дугъан Гаф уьбхюрадарчва, фицики Дугъу гъау Узухъ хъугърадарчва. ³⁹ Учву Гирами китабар дурхну ахтармиш апIурачва, фицики дурари-ан гъаргандин уьмур гъазанмиш апIуз шулу кIури, фикир апIу-рачва, хъа Гирами китабариъ Узкан дибикIна. ⁴⁰ Гъаци вушра, зат ккудуудубкIру уьмур учвуз хъпан бадали, учвуз Узухъна гъоз ккунди адарчвуз. ⁴¹ Узуз инсанарин тярифар лазим дарзуз. ⁴² Хъа Узуз учву аygъюдар вузуз ва учву учвуз Аллагъдихъна вуйи масанвал адрувалра аygъязуз. ⁴³ Узу Йиз Адашдин ччвур бадали учвухъна дуфназа, хъа учву Узу къабул апIурадарчва, хъа эгерки сар жара фуж-вш, чан чаинди чан тярифар апIу-ри учвухъна гъафиш, къабулра апIурчва. ⁴⁴ Учву сар-сарин тярифар апIури, сар Аллагъдихъан вуйи тярифарихъ хъергну даршлуган, учву Узу фици къабул апIидичва? ⁴⁵ Узу Адашдин улихъ учву тахсир апIур, кIури, фикир мапIанай. Учву тахсирк-рар апIур Муса хъиди, фицики учву гъадгъуин умудлу вучва! ⁴⁶ Эгер учву дугъридан Мусайихъ хъугърайиш, Узухъра хъугъ-рийчва, гъаз гъапиш дугъу Узкан дибикIна. ⁴⁷ Хъа эгер учву ду-гъу гъидикIдариихъ хъугъри адарш, Йиз гафарихъ фици хъугъ-дичвахъя?



Хъуд агъзур тухъ апIуб

6 ¹Гъамдихъан Иса Галилей гъюлин тмуну гъирағъихъ хъайи Тивериад шагърин аўтрафариҳъна гъягъюру. ²Исайихъди гизаф халкъра гъюри гъахъну, гъаз гъапиш дуариз Дугъу аўзар-луйириз гъапIу аўламатар дяркънайи. ³Хъа Иса, дагъдина за духъну, Чан ученикарин къялаъ деъру. ⁴Жугъдарин Пасхайнин машквар багахъ шулайи. ⁵Исайи, улар за гъапIиган, Чахъна хай-лин халкъ гъюради дябкъну, Филипдиз кIуру:

— Муариз ипIуз ухъу гъамкъан ульер наньнан гъадагъухъайкIан?

⁶ Исаи мү, Филип ахтармиш апIузди гъапиб вуйи, фицики Дугъаз гъапIруш улихъими аыгъяйи.

⁷ — Дуариз варидализ уълин саб къацIкъан ккубъбан бадали, уъл гъадабгъуз къодварж динар пулра гъудрубкIур, — жаваб туви Филипди.

⁸ Исаин жара ученик Петрин чве Андрейи кIуру:

⁹ — Мушваъ сар балихъ хъуб мухан уълна къюб балугъ хъа, хъа гъамукъан халкъдиз дуарикан фу шулухъя?

¹⁰ — Дуарихъди деуз гъитай, — гъапи Исаи.

Думу йишв'ин гизаф укI алийи ва дуар гъадушв'ин деъру. Дуарин къадар хъуд агъзуртIан артухъ вуйи.

¹¹ Исаи Аллагъдиз баркаллагъ дупну, ульер гъудутIну, деъна-йидариз тувру. Ва балугъарра гъаци дапIну, гъардиз чаз ккуниб-къан тувру.

¹² Адмийир ацIбалан къяляхъ, Исаи ученикализ кIуру:

— Зяя дархъбан бадали, хъригъу къацIар уч апIинай.

¹³ Дуарии ипIуз хъюгъурган, хъуб уъл вуди, гъадарихъан хъри-гъу къацIар уч гъапIиган, йицIикъюб тавра шулу. ¹⁴ Исаи гъапIу мү аўламат гъябкъиган, адмийири пуз хъюгъю:

— My Кас якъинди дюн'яйиз дуфну ккуни Гъадму Пайгъам-бар ву! — ¹⁵Адмийири Чакан гужниинди чпин паччагъ апIуз ккунди айиб аыгъяди, Иса хъана, ялгъузди гъузбан бадали, дагъ-лариз гъягъюру.

Иса гъюлилантина гъягъюб

¹⁶Хябяхъ шулади, Исаин ученикар гъюлихъна ктучIуру. ¹⁷Му-Чура шулайи, хъа Иса дуарихъна мегъел гъюри адайи. Дуар,



люткейиъ эъну, гыюлин тмуну гырагъдихъ хъайи Каферна-гъумдиз рякьюъ учIвру.¹⁸ Гужал миkI хывну, гыюлиин лепийир ягъал-ягъал хъуз хъюгъру.¹⁹ Гырагъдихъан хъуб-ийрхъуб километр манзилназ сирнав гъапIган, дурализ гыюлин лепийириланмина люткейихъна ликри гъюрайи Иса рякьюру ва гизаф гучI шулу.

²⁰ – Му Узу вуза, гучI мапIанай! – кIуру Исаий.

²¹ Дурализ Думу люткейиъ итуз ккуун гъабхънийи, аммаки, фу лигурва, дураг чпи гъярайи гырагъдихъна хъуркънади шулу.

Адмийир Исаийихъна ахмииш шула

²² Хъайигъан гыюлин тлихъан гырагъдихъ гъузу халкъдин гъюлин гырагъдихъ саб люткетIан хътарди хъуб ва дидиъра ученикар эъну гъушуб, хъа Иса, кIуруш, дидиль эдреуб кIваин шулу.²³ Гъадмуган Тиверияиан гъафи сякъодар люткйир, Агъайи бар-каллагь дупну, халкъди уъл гъипIу йишвахъна гъюру.²⁴ Мушваъ я Иса, я Дугъан ученикар адруб гъябкъиган, дураги люткейиъди, Иса агури, Кафернагъумдиз сирнав апIуру.

Иса – уымрин уъл

²⁵ Иса гыюлин тмуну гырагъдихъ дагну, Дугъаз дураги кIуру:
– Мялим! Уву минаfila гъафунва?

²⁶ Исаий дурагин суалназ кIуру:
– Гъякълу вуйи гъякъ кIуразачвуз: Йиз айламатнан лишна-рин учву гъавриъ а кIури, Узу агурадарчва, хъа Узу туви уъли учву тухъ апIбаз лигнун агурачва!²⁷ Уҳди пуч шлу му дюн’яйин хураг бадали вай, хъа гъаргандин уъмур тувру ва зат пуч дарш-лу хураг бадали чалишмиш йихъай. Гъациб уъмур учвуз Инсан-иятидин Бали тувра, фицики ихъ Адаш Аллагъди Инсаниятидин Бай Чан къудратниинди, печать йивну, лишанламиш дапIна.

²⁸ – Аллагъдиз хуш шлу ляхин апIбан бадали, учу гъапIну ккуун? – пну, гъерху дураги.

²⁹ Исаий жаваб туви:
– Магъа Аллагъдиз ккуниб: Дугъу Гъаурихъ хъугъай.
³⁰ – Уву Дугъу Гъаур вуш, учу Увухъ хъугъбан бадали, Уву учуз фициб айламат улупидива? – гъерху дураги. – Уву гъапIдива?
³¹ Ич ата-бабийири ичIи чюлиъ манна ипIуйи. Мидкан Гираими



китабариъра гъамци дибикIна: «Дугъу дурагиз ипIуз уъл аршардан гъапIну».

³² Исаи жаваб туув:

— Гъякълу вуйи гъякъ кIуразачвуз: учвуз аршардан уъл гъапIур Муса дар. Учвуз гъякъ уъл аршардан туврайир Йиз Адаш ву. ³³ Фицики Аллагъдин уъл — аршардан дуфну, му дюн'яйиз уъмур бахиш апIурайи Гъадму Кас ву.

³⁴ — Я ич ахюор, — кIуру дураги, — учуз гъациб уъл гъамусди-хъантина гъаргандиз чава!

³⁵ Исаи дурагиз кIуру:

— Узу вуза уъмур хурайи уъл. Фуж узухъна гъюруш, затра гашди гъузидар. Узухъ хъугънайир гъич затра харгидар. ³⁶ Хъя Узу учвуз улихънасира дупнайзачвуз, учвуз Узу рякъюрачвуз кIури, хъя учву хъугъри гъахъундарчва. ³⁷ Йиз Адашди Уз'ина аманат гъапIу гъарсар кас Узухъна гъиди ва, Узухъна гъафир, Узу гъич затра хътIурккидэрза. ³⁸ Фицики Узу аршардан, Узуз ккуниб апIуз ваъ, хъя Узу Гъаурин ният тамам апIуз дуфнайир вуза.

³⁹ Хъя магъя Узу Гъаурин ният — Чав Уз'ина аманат гъапIдари-кан гъич саркъан Узу дургуз гъидритуб, хъя гъияматдин йигъян дураги вары уъмрихъна къяляхъ апIуб. ⁴⁰ Даршуз магъя Йиз Адаш-диз ккундайиб: Чан Бай рякъуриз ва Дугъаъхъ хъугъру гъарсар касдиз гъаргандин уъмур хъуб. Узу думу гъиямат йигъян гъарган-дин уъмрихъна хътаидиза.

⁴¹ Исаи: «Узу уъл вуза, аршардан дуфнайи», — гъапну, кIури, жугъдариц кабхъру.

⁴² — Му Юсуфдин бай Иса даринхъя? — кIуий дураги. — Ухъуз Мугъан адашна дада аягъдарди айинхъя? Гъаз Мугъу мици: аршардан гъафир Вуза, кIурахъя?

⁴³ — Иц макабхъанай, — кIуру дурагиз Исаи, — ⁴⁴ Узухъна, Узу гъау Адашди гъюз гъидритищ, сарихъанра гъюз хъибдар, хъя гъафир, Узу гъиямат йигъян учв уъмрихъна хътаидиза. ⁴⁵ Пай-гъамбариин Гирами китабарик дибикIна: «Аллагъди дурагиз варидализ улупиди». Гъарсар Адашдихъ хъпехъур ва Гъадгъухъан аягъю гъапIур Узухъна гъюру. ⁴⁶ Анжагъ Аллагъдихъан Гъафириз-Тан гъайри, гъеле гъич саризра Адаш гъяркъюндар. ⁴⁷ Гъякълу вуйи гъякъ кIуразачвуз: фуж хъугъраш, гъадгъу гъаргандин уъмур гъязанмиш дапIна. ⁴⁸ Узу уъмрин уъл вуза. ⁴⁹ Ичв ата-бабиири



иЧИ чюлий чпиз Аллагъди гъапІу манна иПури гъахъну ва им-
бударси дурарра гъийихнү. ⁵⁰Хъа а yrshariyan гъафи Уъл дициб
дар: шли Думу гъипІиш, дицир затра йикІидар. ⁵¹Узу вуз а yr-
шариан гъафи Чиви уъл. Шли думу Уъл гъипІиш, гъадму зат
ккудуубукІрубкъан яшамиш хъиди. Узу туврайи уъл – му йиз бе-
ден вуйиз. Узу думу, дюн'яйин уъмур бадали, тувраза.

⁵² Гъадмуган жугъдари:

– Дугъхъан ухъуз иПуз Чан беден фици тувуз хъибди?! – кІу-
йи, ва дуарин арайиль яман гьюжат абхъру.

⁵³ Исаий дурализ жаваб тувру:

– Гъякълу вуйи гъякъ кІуразачвуз: эгер учву Инсаниятдин Ба-
лин беден дирипІиш ва Дугъан ифи дурубхъиш, учвуз уъмур
рубкъидар. ⁵⁴ Йиз беден иПуриз ва Йиз ифи убхъуриз гъар-
гандин уъмур хъибди, ва Узу дицир гъиямат йигълан уъмирихъна
Чиви апІидиза. ⁵⁵ Йиз беден – магъа гъякъди вуйи хураг, Йиз
ифи гъякъди вуйи убхъруб ву. ⁵⁶ Шли Йиз беден иПураш ва
Йиз ифи убхъураш, гъадму Узу яшамиш хъиди, хъа Узу дугъа
ящамиш хъидиза. ⁵⁷ Узу гъау Чиви Адашдиантана Узу фици яша-
миш шулаш, гъаци Йиз беден иПурайидарра Уз'антана яшамиш
хъиди. ⁵⁸ А yrshariyan гъафи Уъл магъа гъамциб ву. Хъа думу иЧИ
чюлий ичв ата-бабийи гъипІу завариан гъафи маннасиб дар –
хъасин, гъар чан аյжалниинди, дурарра гъийихнийи. Хъа шли
а yrshariyan вуйи гъаму Уъл иПураш, гъадгъу зат ккудуубукІру
уъмур хъапІди.

⁵⁹ Гъамци аygьювалар улупуйи Исаий Кафернагъумдин жугъ-
дарин мистаъ.

Гъаргандин уъмрикан улупуб

⁶⁰ Дугъан ученикарикан гизафдари, му гафар гъеерхъиган, кІу-
ри гъахъну:

– Мурап фу аյжайиб гафар ву? Мурап шлихъан аннамиш
апІуз шул!

⁶¹ Хъа Исаий, Чан ученикар нарази вуйиб аygъяди, дурализ
гъапі:

– Йиз гафари учвук гучI капІрайин? ⁶²Хъа учву, Инсаниятдин
Бай Учв наънан гъафнуш, гъадина за шули рякъруган гъапІди-
чва? ⁶³ Беден фукІа дар, анжагъ Рюгъ ву уъмур хурайир. Узу



учвуз кIурайи гафариъ уьмрин Рюгъ а. ⁶⁴ Аммаки ичв арайиъ хътругърударра а.

ИкибаштIан, Исаиз гьеле дюн'я ккебгъайиз аygъайи: фу-жар Чахъ хъугъдайиш ва Учв шли масу тувыйиш. ⁶⁵ Дугъу давам апIуру:

— Гъаддиз учвуз гъапнийза Узу: анжагъ шлиз Адашди улуп-наш, гъадму Узухъна гъиди. ⁶⁶ Гъаддихъан Исаин ученикарикан гизафдар Дугъхъан хътакнийи ва Дугъахъди шули гъахъундай.

⁶⁷ Гъадмуган Исаий Чан иицIикьюрид ученикарихъан гъерху:

— Белки учвузра Узхъан хътакуз ккунди ашулчвуз?

⁶⁸ — Агъа, — жаваб туву Симон Петри, — учу шлихъна гъягъи-дихъ? Зат ккудуудубкIру уьмур тувру гафар Увухъ хъавухъ. ⁶⁹ Гъа-мус учу хъугърача ва аygъачуз, Уву Аллагъдин Гирамир вуйиб.

⁷⁰ — Узу дайкIана учву иицIикьюридра ктагъур? — гъапи дугъаз жаваб вуди Исаий. — Хъа учвкан сар иблис ву.

⁷¹ Исаий му Искариотдиан вуйи Симондин бай Ягъудайикан кIурайиб вуйи. Дугъу, учву иицIикьюрикан сар вуйири, хъасин Иса масу тувнийи.

Иса машквраз гъягъбакан

7 ¹Дидхъантина Иса Галилей уьлкейиъ лицури гъахъну, гъаз гъапиш Дугъаз Ягъудия уьлкейиз гъягъюз ккунди адайи, фи-ники душваь Думу жугъдарикан бязидариз иицIуз ккунди аий.

— Гъадму вахтна жугъдарин Пажарин машквар багахъ шулайи.

³ Ва гъаддиз Исаин чвиири дугъаз кIуру:

— Уву мушв'ан, Уву апIурайи ляхнар Яв ученикаризра рякъ-руси, Ягъудия уьлкейиз машквраз гъарах. ⁴ Сарира чан гъунаар жиниди апIури шулдар. Гъарсариз ккунду чибкан адмийириз аygъю дубхъну. Хъа Уву гъацисдар гъунаар апIураваки, гъит Ув-кан варι дюн'яйиз аygъю ибши!

⁵ Дугъан чвииркъан Дугъахъ хъугъри гъахъундар.

⁶ Исаий дуариз кIуру:

— Йиз вахт мегъел гъафундар, хъа ичв фуну вахтна вушра хай шуличв. ⁷ Му дюн'яйихъан учву даккун апIуз хъибдар, хъа Узу да-ккунди ву, финики Узу дидин вари ляхнар писдар, гуагъвалин-дар ву, кIураза. ⁸ Хъа машквраз учву гъараҳай. Узу думу машквраз гъягъидарза, Йиз вахт мегъел улубкънадар.



⁹ Гъамци дупну, Иса Галилей уълкейиъ гъузру. ¹⁰ Саки Чан чвийир машквраз гъушхъан, Исара жиниди гъадина гъагюру.

¹¹ Жугъдарин гъякимари машквран вахтна Иса агуйи. «Наан а гъадму Адми?» – гъерхуи дурари. ¹² Дугъкан халкъдин арайиъ гизаф гъюжатар ахънайи: садари, Думу ужур ву, хъа тмундари, Дугъу халкъ алдатмиш апIура, кIуйи. ¹³ Амма гъюкумдрихъан гучIбу, Дугъкан ачухъди сарира кIурдайи.

*Исайи Аллагъдин хулан
аыгьювалар улупуб*

¹⁴ Иса Аллагъдин хулан гъяятдиз дуфну, аыгьювалар улупуз хъюгъган, машквран гъацI вахт дубшнайи. ¹⁵ Жугъдар мид’ин мюгътал духънайи.

– Мугъаз наънан гъамкъан аыгъайкIан? – кIуйи дурари. – Дугъу наанкIа дурхнадар, аыхир.

¹⁶ Исаи гъапи:

– Йиз аыгьювалар Йиздар дар, хъа Узу Гъауриндар ву. ¹⁷ Шлиз Дугъан ният тамам апIуз ккундуш, гъацириз гъаму аыгьювалари-кан аыгъю хибди, дурар Аллагъихъан вуш, даршиш Узу Йиз Узкан кIурайидар вуш. ¹⁸ Шли чан-чахъан кIураш, гъацири чаз хусуси ад гъазанмиш апIура. Хъа шли чав гъауриз ад гъазанмиш апIураш, гъацири дугъриди кIура, ва дугъан кIавъ кучIал адар. ¹⁹ Учвуз Къанун Мусайи тувну, гъаци даринхъа? Гъаци вушра, учвкан сарира Къанун тамам апIурадар. Узу фтин бадали йикIуз ккундуучвуз?

²⁰ – Уву амрихъан душнава! – жаваб туву гъварч духънайдари. – Шлиз Уву йикIуз ккунди а?

²¹ Исаи дурариз жаваб вуди гъапи:

– Узу саб аыламат улупайизра, учву вари мюгътал духъначва. ²² Мусайи учвуз суннат апIин гъапну, дугъридан, думу Мусайихъан дар, хъа ата-бабийирilanмина дуфнайиб ву, ва учву султ йигъанра кмиди суннат апIури шулчва. ²³ Мусайин Къанун дючI-рюбгъбан бадали, учву султ йигъанра адмийин суннат апIураш, Узу султ йигъан адми сагъ гъапIну кIури, Уз’ин хъял гъаз илив-начва? ²⁴ Зиълан лишнариинди суд мапIанай, суд апIанай дугъ-ри вуйи судииндиги!



*Адмийири Иса
Месигъ вуди гъисаб апIуб*

²⁵ Ерусалимдиан вуйи бязи агълари кIуйи:

— Му ихъ гъякимири йикIуз ккайи Адми даринхъя? ²⁶ Лигай-чва, Дугъу ачуҳуди аыгъювалар улупура ва сарира Дугъаз фукIара кIурадар. Мумкин ву, гъякимириз Думу дугъриданра Месигъ ву-йиб аыгъю гъабхънушул? ²⁷ Амма ухъуз, Гъадму Кас наънан вуш, аыгъяхъуз. Хъя Месигъ гъафиган, сариизра аыгъю хъидар, Думу наънан вуш.

²⁸ Ва гъадмуган, Аллагъдин хулаъ аыгъювалар улупурайиган, Исаи аыхю сесниинди гъапи:

— Узура аыгъячвуз, Узу наънан вушра, аыгъячвуз. Гъаци вуш-ра Узу Узхъан гъафир дарза. Шли Узу гъаънуш, Гъадгъахъ хъу-гъуз хай шулу, аммаки Думу учвуз аыгъдарчвуз. ²⁹ Хъя Думу Узуз аыгъязуз, фицики Узу Гъадгъухъан гъафир вуза ва Узу Гъадгъу гъаъну.

³⁰ Гъадмуган дурагиз Думу дисуз ккун шулу, амма сарира Ду-гъак кучундар, гъаз гъапиш Дугъан сяйт дуфнадайи. ³¹ Халкъди-кан гизафдар Дугъахъ хъугънийи ва дураги кIуйи: «Месигъ гъа-фиган, Дугъхъан Гъаму КасдихъантIан артухъ аламатар улупуз шулинхъя?»

*Жугъдар Иса дисуз
чалишмии хъуб*

³² Исаикан халкъдин арайиъ гъамцдар гафар-Чалар деерхъну, фарисирина жугъдарин аыхюну маллиири Думу дисуз Аллагъ-дин хулан гъаравлар гъаъру.

³³ Гъадму вахтна Исаи халкъдиз кIурайи:

— СацИбсана Узу учвухъди гъуздиза, хъасин Узу мина Гъау-рихъна хътакидиза. ³⁴ Узухъ лицури хъидичва, хъя дихъидарчвуз, гъаз гъапиш учвхъан Узу наан шулуш, гъадина гъюз хъибдар-чвухъан.

³⁵ Жугъдари чпин арайиъ кIури гъахъну:

— Думу, ухъхъан агуз даршлуси, наана гъягъюз ккайкIан? Бел-ки Дугъаз, Грек уылкейин шагъариз душну, дурагин арайиъ яшамиш шулайи ихъ агъалиириз вая грекариз аыгъювалар улупуз



ккунди ашул гъа? ³⁶ Дугъу ухъуз: «Узу агури хъидичва, хъа дихъидарчвуз», ва «Узу наан шулуш, гъадина гъюз хъибдарчвухъан», — гъапи гафариинди Мугъаз фу пуз ккунди айкIан?

*Исайи Гирами Рюгънакан
пувал*

³⁷ Машкврин аххиримжи, вартIан машгъур йигъан Исайи, гъуджвнүү, аххю дихниинди кIуру:

— Фуж дахаргнаш, гъит гъадму Узухъна гъюри! ³⁸ Ва фуж Узухъхъугъраш, гъит гъадгъу убхъри! БикIбариь кIура: «Дугъан кIваан чиши штарин нирап ахмиш хъиди».

³⁹ Исайи гъамци Гирами Рюгънакан гъапнийи. Думу Исайихъхъугънайидариз рукъиди. Думу вахтназ Гирами Рюгъ мегъел тув-ну адайи, гъаз гъапиш Иса сабан Аллагъдин аднаь ахънадайи.

*Жугъдарин улихъ-кIулий айидар
Исайихъ хътругъуб*

⁴⁰ Му гафар гъеерхъиган, халкъдин арайиан сякьюдари кIуру:

— Му дугъриданра Пайгъамбар ву.

Хъа жарадари кIуйи:

— Му Месигъ ву!

⁴¹ — Галилей улкейиан Месигъ гъюб мумкин вуйинхъа? — къаршуди кIуйи дурализ. — ⁴² Гирами китабариь, Месигъ Давуд-рин насликан ва Давуд бабкан гъахъи Вифлеем шагъриь Думу бабкан хъиди, кIура.

⁴³ Гъамци Исайин гъякънаан халкъдин арайиь гъюжат ахъни-ийи. ⁴⁴ Дурарикан бязидариз Иса дисуз ккун гъабхънийи, аммаки сарира Дугъ'ина хил за гъапIундайи.

⁴⁵ Хъа Иса дисуз гъау Аллагъдин хулан гъаравлар жугъдарин аххону маллиирихъна ва фарисирихъна къяляхъ хътакнийи.

— Думу гъаз дидисну гъахундарчва? — гъерху дураги гъаъда-рихъян.

⁴⁶ — Гъадму Касдиси мегъел гъич сарира саб вахтнара кIури гъахундар! — жаваб тувнийи гъаравлари.

⁴⁷ — Гъаяман, Дугъу учвура алдатмиш гъапIуншалчву гъа? — гъапи дурагиз фарисири. — ⁴⁸ Гъюкумдрикан Дугъахъ гъич фужкIа хъугънинхъа? Ясана фарисирикан фужкIа? ⁴⁹ Дугъахъ



хъугърудар Къанун аыгъдру авамар ву ва дураг Аллагъдин нянайикк ккайдар ву!

⁵⁰Хъа дурагин арайиъ улихъна вахтари Исаийхъна гъафи Никодим кIуру кас айи, вадугъу дурагиз гъапи:

⁵¹— Ихъ Къанунди ихтияр туврайинхъа, сабан адмийихъ хъпебехъди вадугъу вутаксир гъапIнуш аыгъю дарапIди, дугъан суд апIуз?

⁵²— Гъаяман, увтура Галилей улкейиан вушала гъа? — гъапи дураги. — Уву Гирами бикIбар аыгъю апIин вавуву гъаврий ахъдива Галилей улкейиъ гъич сар пайгъамбарра бабкан дархъубу.

⁵³Ва дураг алдагъну хъасин хулариз гъагъюру.

*«Гунагъ ктрури
дугъ'ина гъван гатIабхъри»*

8 ¹Хъа, Иса Елион дагъдиина гъагъюру. ²ГвачIнин ухди Думухъана Аллагъдин хулаъ ачмиш шулу. Дугъан багахъ халкъ учхъуз хъюгъру вака Исаий, деъну, аыгъовалар улупуро.

³Гъадму вахтна Къанундин мялимариа фарисийи Исаийхъна, къяппавал апIури гъидису дишагъли хуру вадуму халкъдин улихъ дерккну, ⁴дураги Исаиз кIуру:

— Мялим! Гъаму дишагъли къяппавал апIурайи вахтна дидис-найир ву. Му чан жилирихъди дарди, жаарихъди хъайи. ⁵Мусайи чан Къанундъи мицисдариин гъван ульюбх дупна. Хъа Уву фу кIурава?

⁶Му, Иса ахтармиш апIбан вака Дугъак тахсир кипбан бадали, саб багъна абгуз ккунди гъерхрайиб вуйи.

Амма Исаий, ис алахъну, дурагиз саб фикирра тутрувди, тIуб'-инди жилиин фу-вш бикIури гъахъну. ⁷Исаий Чахъан гъерхри хътадакрайиган, кIул за дапIну, дурагиз кIуру:

— Учвкан шли затра гунагъ гъапIундарш, гъит гъадгъу сарпирди му дишагълииина гъван гатIабхъри! ⁸Ва хъана, Чан кIул ис дапIну, жилиин бикIувал давам апIуру.

⁹Му гафар гъерхыиган, аыхюдарилан хъюгъну, душв'ин алидар са-сарди гъудучIвну гъагъюру вака аыхири Исаана гъадму дишагъли гъузру. ¹⁰КIул за дапIну, Исаий дугъхъан гъерхри:

— Эй дишагъли, увук тахсир кипрайидар наши? Уву сарикъан тахсиркар гъапIундарин?



¹¹ – Сарикъанра, йиз ахю кас, – пну, жаваб туву дугъу.

– Узур уву тахсир алПурадарза; гъарах ва сану гунагъ ляхнар мапIан, – гъапи Исаий.

**«Узу аьгъайиш,
Из Адашра аьгъю шуйчвуз»**

¹² Къандиси халкъдихъди Иса хъана улхуру:

– Узу му дюн'яиз акв вуз. Фуж Узухъди гъахъиш, дицир му-Чушнаш улдугнү хъидар, дицирихъди уымрин акв хъибди.

¹³ – Уву Яв Увкан шагыдвал алПурава, – кIуру фарисийири. – Яв шагыдвал гъякьюб дар.

¹⁴ Исаий жаваб тувру:

– Эгена Узу Из Узкан шагыдвал алПури удучIураш, Из га-фарихъ хъугъуз хай шулу, фицики Узуз аьгъязуз Узу наънан гъаф-нуш ва наана гъягъюраш. Хъа учвуз, Узу наънан гъафнуш ва наана гъягъюраш, аьгъдарчвуз. ¹⁵Учву сар-сарин, инсанарин ульч-мейииндиги суд алПурачва, хъа Узу саринра суд алПурадарза. ¹⁶Эгер-ки Узу ичв суд алПуйишира, Из суд гъякьюб хъибдийи, фицики Узу сар дарза, Узухъди Узу гъа Адашра хъазухъ. ¹⁷Хъа ичв Къа-нундиъра, кьюр касдин шагыдвалихъ хъугъуз хай шул, кIури дикиIнавуч. ¹⁸Учу кьюр шагыд вучу: Узу ва Узу гъа Адаш.

¹⁹ – Хъа Яв Адаш наан аяв? – гъерху дурари.

– Учвуз я Узу, я Из Адаш аьгъдарчвуз, – гъапи Исаий. – Эгер учвуз Узу аьгъайиш, Из Адашра аьгъю шуйчвуз.

²⁰ Му гафариинди Исаий, Аллагъдин хулан тъятдиъ, садакъ-йир иврушван гъвалахъ дийигъну, аьгъювалар улупури, гъап-нийи. Гъаци вушра Думу сарира гъидисундайи, гъаз гъапиш Ду-гъян сяльт сабан улубкънадайи.

Жугъдар Исаин гъавриъ ахърадар

²¹ Ва хъана Исаий гъапнийи:

– Багарихъди Узу гъягъюраза. Учву Узу агуз хъюгъдичва, ам-маки ичв гунгъариъди йихидичву. Узу гъушушваз, учвхъан гъюз хъибдар.

²² – «Узу гъушушваз учвхъан гъюз хъибдар», – гъапиган, Му-гъян фу кIуру гаф вуйкIан? – кIурайи жугъдари чиб-чпигъ. – Дугъаз Учв йикIуз ккундайкIан дарш?



²³ Исаи гъапи:

— Учву исккан вуйи дюн'яйиан вучва, хъа Узу заълан вуза. Учву гъаму дюн'яйиан вучва, хъа Узу му дюн'яйиан дарза. ²⁴ Узу учвуз гъапунзачвуз:

«Гунгъариъди йихидичву!» Узу Гъарганур Аллагъ вуйибдихъ эгер учву хътругъиш, учву вари гунгъариъди йихидичву!

²⁵ — Гъаци вуйиган Уву Фуж вува? — гъерхру дурари.

— Узу учвуз гъарган бинайиан кІурайи Гъадмунур вуза, — жаваб туви Исаи. — ²⁶ Учвкан, Узхъан гизафдар пуз ва ичв суд апІуз шуйзухъан. Амма Узу, гъаму дюн'яйиз Узу Гъаурихъан фу гъеебхънуш, анжагъ гъадму кІураза, хъа Узу Гъаур гъякълу ву.

²⁷ Дугъу Чан Адашдикан кІурайибдин дурагъ гъавриъ ахъундай.

²⁸ Исаи давам гъапІу:

— Учву Инсаниятдин Бай за гъапІиган, гъадмуган аygю хъибдичвуз, Узу Гъарганур вуйиб, ва Узу Йиз Узлан фукІара даралІруб: Узу анжагъ Адашди улупуб кІураза. ²⁹ Хъа Узу Гъаур Узухъди хъа — Дугъу Узу сарди гъитнадар, фицики Узу гъарган Дугъаз ккуниб апІураза.

³⁰ Гъаму гафарилантина Дугъахъ гизафдар хъугънийи.

*Исаи
гунгъариккан азад хъуваликан пуб*

³¹ Хъасин Исаи Чахъ хъугънайи жугъдарииз гъапи:

— Эгер учву Йиз Гаф учвуз гъюбхиш, гъякъицки Йиз ученикар хъидичва, ³² гъадмуган учвуз гъякъвал аygю хъибдичвуз ва диди учву азад апІиди.

³³ — Учу Ибрагимдин наслар вуча ва саб вахтнара саризра лу-кІар гъашидар дарча! — гъапнийи дурари. — «Азад хъидичва» кІуруган, гъамдинди Увуз фу пуз ккунди авуз?

³⁴ Исаи дурагъиз жаваб туви:

— Гъякълу вуйи гъякъ кІуразчвуз: гъарсар шли гунағ апІураш, гунағвалин лукІ ву. ³⁵ ЛукІ гъарган (девлетуйин) хизандиц яшамиш шули гъузидар, хъа бай душваш яшамиш гъарган хъиди.

³⁶ Фила учвуз Бали азадвал тувиш, анжагъ гъадмуган учву азад адмийир хъидичва. ³⁷ Учву Ибрагимдин тум вуйиб Узуз аygъязуз,



гъаци вушра учвуз Узу йикIуз ккундачвуз, фицики Йиз Гаф учвульбчIвнадар. ³⁸Учвуз Йиз Адашдихъ гъябкьюбикан кIуразачвуз, хъя учву учвуз ичв адашдикан гъеебхъуб тамам апIурачва.

³⁹ – Ич адаш – Ибрагым! – жаваб туви дурари.

Исайи дурализ кIуру:

– Эгена учву Ибрагимдин чан гъякъ баяр вуйиш, учву Ибрагымдиси апIрийчва. ⁴⁰Хъя учвуз Узу йикIуз ккундачвуз. Чаз Аллагъдикан деебхънайи гъякъвал учвуз улупурайи Гъадму Адми йикIуз ккундачвуз! Гъамци гъапIийинхъя Ибрагимди?! ⁴¹Ваъ, учву ичв адашдиси апIурачва!

– Учу Къанундииинди вуйи баяр вучал! – наразивалий ахъу дурап. – Ич сар адаш вуйич – Аллагъ!

⁴² Исайи дурализ жаваб туви:

– Эгер ичв адаш Аллагъ вуйиш, учвуз Узу ккунди хьидийчвуз, фицики Узу Аллагъдихъан гъафир вуза ва Гъадгъахъна гъягъюраза. Узу Узхъан дуфнадарзаки – Гъадгъу Узу гъаъну. ⁴³Учву Йиз Гаф къабул апIурадарчва? ⁴⁴Ичв адаш иблис ву, ва учву ичв адашдин интIи тIулар тамам апIуз шад вучва. Хъя думу гъарган адмийир пуч апIур ву, ва дугъаз гъякъвал душман ву, гъаз гъапиш дугъаъ гъякъвал адар. Дугъу кучIал апIурайиган, кучIал дугъан багъри чIал ву, гъаз гъапиш думу кучIлях ву ва кучIларин адаш ву. ⁴⁵Хъя Узу учвуз гъякъ кIуруган, учву Узухъ хъугърадарчва. ⁴⁶Учвкан шлихъан Узу, гунагъвал апIурава, кIури, дисуз шул? Ва эгер Узу учвуз гъякъ кIураш, гъаз учву Узухъ хъугърадарчва? ⁴⁷Фуж Аллагъдинур вуш, гъадму Аллагъдин гафарихъ хъпехъура. Учву Аллагъдин даруган, гъаддиз учву Узухъ хъпехъурадарчва.

Исайи Чакан ва Ибрагымдикан пуб

⁴⁸ – Дюзди кIура учухъ: Уву самариялужви вува ва амрихъан душнайир вува, – гъапи Дугъаз жугъдари.

⁴⁹ Исайи жаваб туви:

– Узу амрихъан душнадарза: Узу Йиз Адашдин гъюрмат убхюораза, хъя учву Узу нянайиз хурачва. ⁵⁰Узу Узуз аднахъ хъергнайир дарза, Жарар а – Гъадмунур ву хъергнайир ва суд АпIур.

⁵¹ Гъякълу вуйи гъякъ кIуразачвуз: шли Йиз Гаф чаъ гъюбхиш, айсрарий гъацириз айжал рябкъидар.



⁵² — Магъя учуз гъамус якынтиан аygъю гъабхъунчуз, Уву амрихъан душнайир вуйиб, — жаваб туvu дурари. — Ибрагым гъакину, пайгъамбрарра гъийихну. Хъа Уву: «Шли Йиз Гаф чай гъобхиш, асрариъ гъацириз аյжал рябкъидар!» кIурава. ⁵³ Дугъриданна дукIнайи ич аба ИбрагымтIан Уву артухъур вуна? Ясана — гъиниху пайгъамбартIан? Хъа Уву Фуж вуди гъисаб апIурава?

⁵⁴ Исаи жаваб туvu:

— Эгер Узу Йиз ад апIураш, Йиз ад фукIара дар. Хъа Узу Йиз Адашди адлу апIура — учву ичв Аллагъ вуйич КIурайири. ⁵⁵ Учвуз Думу гъич саб вахтнара аygъор дайчвуз, хъа Узуз Думу аygъязуз. Эгер Узуз Думу аygъор дарзуз, гъапнийиш, Узура учвусир кучIлях вуди гъахънухъидий. Хъа Узуз Думу аygъязуз ва Узу Дугъян гафниин алза. ⁵⁶ Ичв аба Ибрагым Узу дюн'яйиз гъору йигъ рябкъидиз пну, шадвали ацIру. Дугъаз му йигъ гъябкъну ва шадра гъахъну.

⁵⁷ — Яв сабан хъуцIур йискъан дубхънадарив, хъа Увуз Ибрагым гъяркъюнвуз?! — Чигъяр апIуз хъюгъю жугъдари.

⁵⁸ Исаи жаваб туvu:

— Гъякълу вуйи гъякъ кIуразачвуз: Ибрагым хъайиз Узу Айир ва Вуйир вуза.

⁵⁹ Гъадмуган дурап, Исаиз йивуз, гъванарихъан хъЧИхуру. Саки Иса гъитIикIуру ва гъадрарин къялгъянтина Аллагъдин хул'ан удучIвур.

Курди бабкан гъашир сагъ апIуб ва уърхюб

9 ¹ Рякъди гъягъюрайи Исаиз, бабкан гъашихъанмина кур ву-
ий сар кас рякъюру.

² — Мялим, му гъаз кур вуди бабкан гъахъну? — гъерхру Дугъ-
хъан ученикари. — Шли гунагъ гъапIину: мугъу чав, даршиш мугъ-
ян абийир-бабари?

³ — Я мугъу, ясана мугъян абийир-бабари гунагъ ляхин гъапIун-
дар, — жаваб туvu Исаи. — Мугъян курвал гъаддиз вуки, Ал-
лагъдин къувват гъаддииндi улупбан бадали. ⁴ Сабан йигъ имиди
уху Гъадгъян, Узу Гъаурин ляхнар дапIину ккунду. Гъамус йишив
хъибди, гъадмуган сарихъанра лихуз хъибдар. ⁵ Сабан Узу дюн'-
яйиль имиди, Узу дюн'яйиз акв вуза.



⁶ Гъамци дупну, Исаии жил'ина туту гатIабхыну, шурш ругдик кибикьну, гъадму батIур, кур вуйирин уларикан ктатуру⁷ ва кIуру:

— Душну Силам (му «гъаънайир» кIуру гаф ву) дагрик яв маш жибкI. Думу гъягъюру, жикIуру ва, рябкъюз хъюгъыну, хътакуру.

⁸ Думу садакъа ккун апIури дяркънайи дугъан гъуншири ва жара адмийири кIури гъахыну:

— Фици? Му гъаму адми, садакъа ккун апIури деънайир да-ринхъа?

⁹ — Ав, му гъадму ву, — жаваб тувуйи садари.

— Ваъ, думу гъаци, гъадгъахына гъушур ву, — кIуйи жарадари.

— Му гъякъди узу вуза, — гъапнийи чав гъадму адмийи.

¹⁰ — Хъа увуз фици рябкъюри гъабхъунвуз? — гъерху дурари.

¹¹ — Иса ччвур али сар адмийи йиз уларикан батIур кадатну, «Душну Силам дагрик яв маш жибкI», гъапунзуз. Узу гъушунза, гъижибкIунза ва рябкъюз хъюгъонзуз, — жаваб туву дугъу.

¹² — Наши Думу? — гъерху дурари.

— Аъгъдарзуз, — гъапи сагъ гъашири.

¹³ Гъадму адми, улихънаси кур вуйир, фарисийирихъна хъади гъюру.

¹⁴ Хъа Исаии курин улар сагъ гъапIу йигъ султ йигъ вуйи.

¹⁵ Фарисийирира дугъхъан, дугъан улар фици сагъ гъахынуш, гъерхру.

— Дугъу йиз уларикан батIур ктатну, узу машар гъижибкIунза ва гъамус рябкъюразуз, — жаваб туву дугъу.

¹⁶ — Думу Адми Аллагъыхъан хъуз мумкин дар, гъаз гъапиш Дугъу султ йигъандин айдат уьбхюрадар, — кIури, гъадмуган айрз гъапIу фарисийирикан садари.

— Гунагъкар касдихъан мицдар айламатар апIуз шулинхъа? — кIуйи тмундари.

Ва гъамци, фарисийирин арайиль гъюжат абхъру. ¹⁷ Курди гъаширихъан хъана гъерхру:

— Уву кIурава, Дугъу увуз рябкъювал тувну. Яв хиялиан Думу Фуж ву?

— Пайгъамбар, — жаваб туву дугъу.

¹⁸ Жугъдарин агъсакълариз адми кур вуди хъувалихъ ва ду-гъахына рябкъювал къяляхъ гъювалихъ гъапIура хъугъуз ккунди



адайи. Гъаддиз рябкьюз хъюгъюрин абиир-бабариз дих дапІну гъерхру:

¹⁹ — Му ичв бай вуйин? Учву кIурачва, думу кур вуди бабкан гъахъну. Хъа фици дугъаз гъамус рябкьюра?

²⁰ — Учуз му ич бай вуйиб аыгъячуз ва кур вуди бабкан гъахъибра аыгъячуз, — жаваб туву абиир-бабари. — ²¹Хъа гъамус дугъаз фици рябкьюраш ва шли дугъаз рябкьювал тувнуш, гъамунуб учуз аыгъдарчуз. Чахъан гъерхай. Думу аыхюру ву, чахъан ктибитуз шулукки.

²² Абиир-бабари, жугъдарин гъакимарихъан чпиз гучIруган, гъамциб жаваб тувнийи. Фицики дурари, Иса Месигъ ву кIури хъугърур гъарсар мистхъан ярхла апIуз къарап адабгънайи. ²³ Гъаддиз дугъан абиир-бабари:

«Сарун думу аыхюру ву, чахъан гъерхай», — гъапнийи.

²⁴ Ва магъа къюбли ражарира, кур вуди гъаши адмийиз дих дапІну, дугъаз кIуру:

— ГъакътIан пидарза дупну, ху апIин! Учуз аыгъячуз Гъадму Кас гунагъкар вуйиб.

²⁵ — Узуз Думу гунагъкар вуйин-дарин аыгъдарзуз, — жаваб туву дугъу. — Саб аыгъязуз: узу кур вуйза, хъа гъамус рябкьюразуз.

²⁶ — Дугъу увкан гъапІну? — хъана гъерху дурари. — Дугъу яв улар фици арццну?

²⁷ — Узу учвуз гъапунзачвуз, хъа учвуз хъпехъуз ккуун гъабхъундарчвуз, — жаваб туву дугъу. — Учвуз сабансана хъпехъуз ккуунди айчвуз? Гъаяман, учвузра Дугъан ученикар хъуз ккуундашалчвуз-гъа?

²⁸ — Дугъан ученик уву вува-гъа, — кIури хъжагъуру дураг дугъаз. — Хъа учу Мусайин ученикар вуча. ²⁹Учуз Аллагъ Мусайихъди гъулхуб аыгъячуз, хъа Думу наънан гъядяхъюр вушра, аыгъдарчуз.

³⁰ — Мюгътал шлу ляхин вуки, учвуз Думу наънан вуш аыгъдарди хъуб, хъа Дугъу узуз рябкьювал тувунзуз, — жаваб вуди гъапи думу адмийи.

³¹ — Хъа ухъуз аыгъяхъуз Аллагъ гунагъкарихъ хъпебехъруб, хъа анжагъ гъаддарихъди хъа Думу: Чав ккуун гъапІдарихъди ва Чан ниятар тамам апIрударихъди. ³²Дюн'я ккебгъхъанмина



гъеебхъуб дархъуз, сар шли-вуш бабкан шлугантІан кур вуйириз рябкьювал тувуб.³³ Эгер Думу Аллагъидхъан гъафир дайиш, Дугъхъан фукIара мициб апIуз хыбдай!

³⁴ – Уву, вари гунгъариъди бабкан гъашири, гъамус учуз улупурана! – кIури, вари дугъ’ина алжагъуру ва думу утIурккуру.

³⁵ Исаиз думу утIурккуваликан аygю шулу ва, дагну, гъерхру:

– Уву Инсаниятдин Балихъ хъугърана?

³⁶ – Йиз аыхюр, йип Думу Фуж вуш, узу Дугъахъ хъугъдиза, – гъапи дугъу.

³⁷ – Увуз Думу гъяркюнвуз ва магъа Дугъахъди гафарра апIурава, – кIуру дугъаз Исаий.

³⁸ – Хъугъурза, Агъа! – дупну, думу Дугъан улихъ, къамкъариина ис духъну, икрам апIуру.

³⁹ Исаий гъапи:

– Узу му дюн’яйиз дярябкърайидариз рябкъри дупну, хъарабкъюрайидар кур хъпан бадали, суд апIуз дуфнайир вуза.

⁴⁰ Исаин багахъ дугъужвнайи фарисийи Дугъаз кIуру:

– Саки Уву учура кур вуйидар гъисаб апIурадарва аыхир?

⁴¹ Исаий жаваб туви:

– Эгер учву кур вуйидар вуйиш, учву апIурайи гунгъарий ичвихасир адархъидий; хъа учву кIурачва: «учуз рябкъюрачууз», гъаддиз ичв гунаргъ учв’ин гъубзра.

Габан ва дугъан марччар

10 ¹ – Гъякълу вуйи гъякъ кIуразачвуз: фуж марччаринишваш урчIариан дарди, фици-вуш жараси учIвруш, думу тIафал ва тIарашчи ву. ² Хъа фуж урчIарианди учIврур, гъадму марччарин лижан габан ву. ³ Гъаравли дугъаз урар арццу. Марччар дугъан дихнахъ хъпехъуру. Дугъу чан марччариз ччуураинди кIуру ва Чатинди адауру. ⁴ Дугъу чандар вари адаьган, думу дуарин улихъди гъягъюру, хъа марччар дугъан къяляхъди гъюру, гъаз гъапиш дуариз дугъан дих аygъя. ⁵ Жарадарихъди дуарар гъягъидар, дуарар дугъхъан гъергди, гъаз гъапиш дуариз жаарин дих таниш дар.

⁶ Исаий дуариз гъаму тахалус ктибтуру, хъа Дугъу чипиз фтикан гъапнуш, фарисийир гъаврий ахъундайи.

⁷ Исаий давам апIуру:

– Гъякълу вуйи гъякъ кIуразачвуз: марччариз урчIар – Узу вуза.



⁸ Вари Узу гъайиз гъафидар тIафлар ва тIарашчийр вуйи. Саки марччар дурарихъ хъпехъундар. ⁹ УрчIар – Узу вуза. Фуж Уз’антина учIвиш, дюрхну хьиди. Гъацир УрчIариизди учIви迪 ва дилинтина удучIивиди, гъацириз чаз ипIруб алишв бихъиди. ¹⁰ Хъя тIафал саб апIуз гъюри шулу: гъитIибкIбан бадали, ийбкIбан ва пуч апIбан бадали. Узу гъафунза гъацдариz уьмур хъади, варибдиль – абцIу уьмур. ¹¹ Узу гъяни Габан вуза. Дицир ужур габни марччар бадали чан уьмур тувру. ¹² Хъя гъирағъдилан дуфнайир – думу габан дар, дицириз марччар жарадар ву – жанавар лижахъна багахъ шулайиb гъябкьюбси, марччара гатIахъуру ва гъергрира ву. Жанаври дурап дисуру ва ЧIяргъюру. ¹³ Дицир габан дар, хъя гъирағъдилан, гъякъи тувну, хъитнайир ву; дицир марччарин гъайгъушнаш шулдар. ¹⁴ Узу ужур Габан вуза: Узуз Йиз марччар аыгъязуз ва Узура Йиз марччариз аыгъя. ¹⁵ Адашдиз Узу фици аыгъяш, гъаци Узуз Адашра аыгъязуз. Узу Йиз уьмур марччарихъанди тувдиза. ¹⁶ Узуз жара марччарра азуз, гъаму марччаринишв’ан дарудар. Узу гъадрара хъади дуфну ккунду, Йиз дихнахъ дурап хъпехъиди, гъадмуган саб лиж хъибди ва сар Габан хьиди! ¹⁷ Узу Адашдиз гъаддиз ккундуки, Узу уьмур туврайиган, тазакIултIан думу гъадабгъуз. ¹⁸ Йиз уьмур сарира дадабгъидар, Узу Йиз хушниинди думу тувраза. Думу тувуб Йиз ихтиярнаш, думу, къяляхъ гъадабгъубора Йиз ихтияриаш айиз. Думу гъаци Узуз Йиз Адашди улупунзуз.

¹⁹ Хъана гъаму гафари жугъдарин арайиь гъюжатар ирчу. ²⁰ Дурапикан гизафдари кIуйи:

– Думу амрихъан душна ва гъарзади улхура. Дугъахъ гъаз хъпехъурачва?

²¹ – Му улхбар жинар кайириндар дар, – кIури, къаршу уду-ЧIвуйи тмундар. – Жинар кайирихъан курс вуйириз рябкьювал тувуз шулинхъя?

Исайиз жугъдар къаршу хъуб

²² Кьюрд улубкьюру. Ерусалимдиль Аллагъдин хал таза апIбан машквар вуйи. ²³ Иса Аллагъдин хулан гъятдиь Сулейман пай-гъамбрин айвандихъ лицурайи. ²⁴ Жугъдари, Дугълан илтIикIину, Дугъхъан гъерхру:

– Уву фукъан вахтназ ич сабур ахтармиш апIури гъузуз ккава? Иип учуз дюзди, Уву Месигъ вуна?



²⁵ – Узу учвуз гъапунзачвуз, хъа учву Узухъ хъугърадарчва. Узу Йиз Адашдин ччурнахъан апIурайи ляхнар – магъа Узкан ша-гъидвал апIурайидар. ²⁶ Амма учву Узухъ хъугърадарчва, фицики учву Йиз марччарикан дарчва. ²⁷ Йиз марччариз Йиз дих ебхъуру ва Узуз дураг альгъязуз, дураг Узухъди гъюру. ²⁸ Узу тувдиза ду-рариз гъаргандин уьмур, дураг альсаририъа йихдар, дураг Узхъан сарира гъитIикIдар. ²⁹ Йиз Адаш варидарапIан зурба ву. Гъаддиз дураг Йиз Адашдихъан сарихъанра дадагъуз хъибдар, ³⁰ хъа Узуна Йиз Адаш сар вуча.

³¹ Жугъдар хъана Исаиз йивуз гъванарихъан хъчIихуру.

³² – Йиз Адашдихъан Узу учвуз гизаф ужудар ляхнар улупунза-чвуз, – гъапи Исаии. – Гъаддрикан фунубдин гъякънаан Узуз йивуз ккунди ачвуз?

³³ – Учуз, Уву ужудар ляхнар гъапIну кIури, йивуз ккунди адар-чуз, хъа Аллагъидикан рихшанд апIурайиган. Уву вуйир адми, хъа Увкан Аллагъ апIурава.

³⁴ Исаий жаваб тууву:

– Ичв Къанундиль дибикIнадаринхъа: «Узу гъапунза: учву ал-лагъар вучва?» кIури. Хъа гъякъ дибикIна. ³⁵ Эгер Аллагъди Чан Гаф шлихъна гъапIнаш, Дугъу дурагиз аллгъар кIура. ³⁶ «Узу Ал-лагъдин Бай вуза», гъапну кIури, фици учвхъан Узуз пуз шул-чвухъан: «уву рихшанд апIурава», кIури. Шлиз кIурачва гъа-ци? Узуз? Адашди гирами дапIну, гъаму дюн’яйиз гъаънайириз?!

³⁷ Эгер Узу Йиз Адашди апIурайи ляхнар апIурадарш, гъадмуган Узухъ мухъугъанай! ³⁸ Хъа эгер Узу дураг апIураш, учвхъан Узухъ хътругъуз шулчвухъан, саки Йиз ляхнарихъкъан хъугъай! Гъадму-ган, учвуз альгъю хъибдичвуз ва: Узуль – Йиз Адаш, хъа Узу – Ду-гъая айибдин гъаврий хъидичва.

³⁹ Гъадмуган дурагиз Иса хъана дисуз ккун шулу, амма Думу дурагин хиларигъян гъютIурччвур.

⁴⁰ Хъасин Иса, Ярдан нирихъ Ягъ’яйи улихъди штуан апIури гъаши йишвариз гъягъюру ва душваш саб къадар вахтна гъузру.

⁴¹ Дугъахъна гизаф адмийир гъойи.

«Ягъ’яйи саб альаматра улупундайи, – кIуйи дураги, – хъа Исаикан гъапидар вари гъякъ ву». ⁴² Ва гъадушваш гизафдар Ду-гъахъ хъугънийи.



Лазарин аъжал

11 ¹Сар адми иццуру шулу. Дугъяз Лазар кІуи. Думу Мар'ям-на чан чи Марфа яшамиш шулайи Вифания гъул'ан вуйи. ²Мар'ям, Агъайн ликарикан ягъ ктатури, дураг чан кушарихъди кжикури гъаши дишагъли вуйи. Ари Мар'ямдин чве Лазар иццуру гъахънийи.

³Чири Исаийхъна гъамци кІури хабар дебккуз гъаинийи: «Агъа, гъадмунур, Увуз ккунирнур, кетлерцнна». ⁴Гъаддикан аygю дубхъну, Исаий кІуру:

— Му иццурушин аъжалихъна дар, думу Аллагъдин ад бадали ва гъаддилантине Аллагъдин Бали Чан адлувал улупбан бадали, вуйиб ву.

⁵ Исаиз Марфа, дугъан чи Мар'ям ва Лазар ккунидар вуйи. ⁶ Гъаци, Лазар иццурайибикан гъеебхънушра, Иса кьюд ии-гъансана Учв айишваь гъузру. ⁷Хъасин Дугъу Чан ученикариз кІуру:

— Гъачай, Ягъудия улкейиз къяляхъ гъягъюрхъа.

⁸ — Я Мялим! — кІуру Дугъаз ученикари, — жугъдари Ув'ин гъван ульюбхну, улихънаси йикІуз ккунди аии, хъа Уву хъана дина гъягъюрана?

⁹ Исаий дурагиз гъапи:

— Йигъаь йицПикьюб сяаьт адаринхъа? Фуж йигъну гъяруш, дицир хъарсну алдакидар, фицики гъадгъаз му дюн'яйин акв рябкюра. ¹⁰Хъа эгер дицир йишвну гъяруш, хъарсну алдакиди, гъаз гъапиш акв ади шулдар.

¹¹ Гъамци дупну, Исаий давам апІуру:

— Ихъ дуст Лазар гъаахну. Узу думу хъиргуз гъяраза.

¹² — Агъа, сарун думу нивкІуз душнаш, сагъ хъиди, — кІуру Дугъаз ученикари.

¹³ Исаиз гъамдинди Лазар дукІнайиваликан пуз ккунди аии, хъа дураги, думу аьдати нивкІуз душна кІури, фикир дапІнайи.

¹⁴ Гъадмуган Исаий дурагиз ачухъди кІуру:

— Лазар гъакІну. ¹⁵Хъа учву бадали Узу гъадушваь адарди хъуб'-ин шад вуза. Гъаци дубхънайиган, учву хъугъдичва. Сарун гъай гъадгъахъна гъягъюрхъа!

¹⁶ «КівятІях» кІуру лакІам хъайи Фомайи чан юлдшариз кІуру:



— Гъачай, Мялимдихъди сатИди ухьура йихурухъя!

¹⁷ Дина гъафи Исайиз, Лазар дукИну накъвдиш ади юкъуд йигъ вуйиб аygъю шулу. ¹⁸ Вифания Ерусалимдихъан шубуб километрIан манзилнаш адайи, ¹⁹ ва дина гъадрарихъди Марфайихънана Мар'ямдихъна чвуччуун дердер зигуз гизаф жугъдар дуфна-йи. ²⁰ Иса гъюрайибдикан гъеебхъубси, Марфа дишлади Дугъан улихъна гъягъюру, хъа Мар'ям хулаш имийи.

²¹ — Агъа, эгер Уву мушваш айиш, йиз чве йикIидай! — гъапи Марфайи Исайиз. — ²² Саки узуз аygъязуз, хъа гъамус вушра, Уву Аллагъдикан фу ккун гъапIишра, Дугъу Увуз тувди.

²³ — Яв чве хъана гъудужвиди, — гъапи дугъаз Исайи.

²⁴ — Гъиямат йигъан вари чиви шлуган, думура гъудужвруб аygъязуз, — жаваб туву Марфайи.

²⁵ Исайи гъапи:

— Узу вуза чиви хъувал ва уьмур. Фуж Узухъ хъугъраш, гъеле гъачIишра, яшамиш хъиди. ²⁶ Хъа гъарсар, яшамиш шулади Узухъ хъугънайир аьсрариъра йикIидар. Уву гъамдихъ хъугъурна?

²⁷ — Ав, Агъа, — жаваб туврайи дугъу, — узу хъугъурза: гъаму дюн'яиз гъюз ккади аиши ва, магъа дуфнайи Месигъ, Аллагъдин Бай, Уву вува.

Исайилан нивгъбар алдахъуб

²⁸ Гъамци дупну, Марфайи, Мар'ямдиз жиниди дих дапIину, кIуру:

— Мялим гъамшваш а, Дугъу увуз дих апIура.

²⁹ Му гафар гъеерхъубси, Мар'ям гъудужвну, Дугъахъна гъягъюру.

³⁰ Иса мегъель гъулаш учIвнадайи ва Учв Марфайи къаршула-миш гъапIуш'ин илмийи.

³¹ Мар'ямдихъди хулаш ади ва думу ккарцури гъаши жугъдар, Мар'ям тяди кади гъудужвну чнатна удучIувб дябкъну, думу накъвдихъна ишуз гъягъюра, кIури, хиял дапIину, дурарра дугъан къяляхъди гъягъюру. ³² Хъа Мар'ям, Иса хъайишвахъна дуфну, Думу гъяркьюбси Дугъан ликарикк ккархъру ва кIуру:

— Я Агъа, эгер Уву мушваш айиш, йиз чве йикIидай.

³³ Мар'ям ва дугъахъди гъафи жугъдар дердлуди ишури дябкъ-ну, кIван деринаризкъан Чазра язухъ дубхънайи Исайи гъерху:



³⁴ — Думу наан кивначва?

— Гъач учу улупидича, — гъапи дурари.

³⁵ Иса ишуро.

³⁶ — Лигайчва, фици Мугъаз думу ккундуш! — гъапи жугъдари чпин арайиъ.

³⁷ — Мугъу кур вуйириз рябкьювал тувну, — гъапи шли-вуш ду-
раригъян сари, — Белки Дугъхъан Лазарра Чиви шлуси апIуз шул?

³⁸ Иса хъана артухъ пашманвалиинди накъвдихъна гъюру. Накъв
дюрхъсиб вуйи. Душвазди учIврушвахъ гъван гъипнайи.

³⁹ — Гъван гъадабгъай! — кIуру Исаий.

— Агъа, душваь майтин ниъ абхънашул, фицики думу кив-
хъан юкъуд йигъ улдубчIвна, — кIуру Дугъаз дукIнайириин чи
Марфай.

⁴⁰ Исаий дугъаз кIуру:

— Узу увуз гъапундайин: «Эгер уву хъугъри гъзиш, Аллагъдин
гъунар рябкъидивуз», — кIури?

⁴¹ Гъван гъадабгъуру. Исаий улар зина заьру ва кIуру:

— Адаш, Увуз баркаллагъ кIураза, Увуз Узу ерхъбаз. ⁴² Увуз
Узу гъарган ерхъурайиб альгъязуз. Гъамушв'ин али халкъ Узу Уву
гъаънайибдихъ хъугъри пну, ачухъди кIурайиб вуйиз!

⁴³ Ва гъамци дупну, Исаий зарбди дих гъапIу:

— Лазар, удучIв!

⁴⁴ Хилар-ликар кафнаригъян гъидиржнайи, машниинра ирин
чарч илипнайи Лазар накъвдиан удучIвтуру.

— Думу гъодурчай, гъит гъараҳри! — гъапи дурализ Исаий.

Жугъдар Иса икIуз чалишмиш хъуб

⁴⁵ Мар'ямдихъна гъафи ва Исаий гъапIуб гъябкью жугъдари-
кан гизафдар Дугъахъ хъугънийи. ⁴⁶ Хъа дурарикан, фарисий-
рихъна душну, Исаий гъапIубдикан ктибтрударра гъидихънийи.

⁴⁷ Жугъдарин ахюну маллайирна фарисийир чпин собрандиз уч
гъаши:

— Ухъу гъапIину ккунду? — кIуий дурари. — Му касди гизаф
аьламатар улупура. ⁴⁸ Эгер Думу мици гъитиш, вари Гъадгъахъ
хъугъди ва римлайир гъафиган, дурари ихъ гъокуматра ва ихъ
халкъра терг апIиди.



⁴⁹ Каяфа кIуру ва гъадму йисан жугъдарин маллиириин ахюр вуди кадагънайи дурарикан сари кIуру:

⁵⁰ — Учву сабдинра гъавриъ ахърадарчва! Я кас, учвуз гъаз аygъдарчвуз: учвуз ужу хъибди, эгер вари халкъдихъанди сар адми гъачIиш, вари жугъдар йихайиз?

⁵¹ Мурар Каяфайн хусуси гафар дайи: гъадму йисан думу жугъдарин маллиириин ахюорра вуди, дугъу пайгъамбриси гъапний, Иса халкъдихъанди йикIиди кIури, ⁵² ва неинки гъаму халкъдихъанди, хъя гъацира вари дюн'я вуйибси дарагънайи Аллагъдин веледар сабвалихъна хпан бадалира.

⁵³ Гъадму йигъхъан дурари Иса фици пуч апIуруш, фикир апIуз хъюгъру.

⁵⁴ Гъаддиз Иса жугъдарин арайиъ ашкарди лицури гъахъундар, ва гъадлин Думу, ичи чюолин гыирагъдихъ хъайи Ефраим кIуру шагъриз душну, гъадушваш Чан ученикарихъди гъузру.

⁵⁵ Жугъдарин Пасхайн машквар багахъ шулайи. Уълкейин варышвариан, чпи машквар хъайиз улихъна гунгъарихъан марцц апIбан бадали, гъациб аьдат тамам апIуз гизафдар Ерусалимдиз дуфнайи. ⁵⁶ Дурари, Иса агури, Аллагъдин хулаз уч духьну, чиб-чпигъ кIуйи: «Фици хиял апIурачва? Думу Пасхайн машквраз гъюрдайкIана?»

⁵⁷ Ахюну маллиирина фарисайири Иса дисбан бадали, гъар шлиз Думу айишв аygъю гъабхьири гъаддикан чпиз хабар деб-ккуб буйругъ тувру.

*Иса Чан дустарихъди
Вифанияийъ хъуб*

12 ¹Пасхайн машквар ккебгъуз йирхъуд йигъ ккимиidi, Иса Чав чIиви гъапIу Лазар яшамиш шулайи Вифанияийиз гъору. ²Дурари Дугъан сагълугънаан хураг гъязур апIуру. Марфа суфрайихъ Исаин гъайгъушнаа айи. Суфрайихъ хъайидарихъди Исаин багахъ Лазарра дэньайи. ³Мар'ямди, нард гъарин гизаф багъа вуйи марцци ягъ дубхну, Исаин ликарикан ктатуру ва Дугъан ликар чан кушарихъди кжикуру. Вари хал айтринсиб ицци ниyraxхидаи абцIру.

⁴ Исаин ученикарикан сари, хъасин Агъа масу туврури, Ис-кариотдиан вуйи Симондин бай Ягъудайи кIуру:



⁵ — Гъаму ягъ, шубудварж арсран пулихъ масу тувну, пул каси-
бариш пай апIуз гъаз шулдайихъ?

⁶ Дугъу миши, касибарин гъаннаш ади ваъ, хъа учв тIафал вуди
хъпаз лигну гъапиб вуйи, гъаз гъапиш дугъаҳъ уртахъ вуйи пулин
мажник хайи ва саспиган, чан тямягъяр гъуркIуз, гъадму пули-
кан харж апIуюи.

⁷ Гъадмуган Исаий кIуру:

— Думу сикинди гъитай! Дугъу му ягъ Узу накъвдик кивру йи-
гъяз гъязур дапIнайиб ву. ⁸ Касибар гъарган учвухъди хьиди, хъа
Узу учвухъди гъарган хьидарза.

⁹ Жугъдарикан гизафдариш Иса душват айиб аygъю дубхъну,
Дугъу Чиви гъапIу Лазаризра лигуз кади, дурап Исаийхъна гъю-
ру. ¹⁰ Гъадмуган маллайирин ахюдари Лазарра йикIбан къаар
адабгънайи, ¹¹ гъаз гъапиш гъадгъулантана, кавхирна маллайир
гъитну, гизаф жуғъдар Исаийхъ хъугънийи.

*Ерусалимдиз гъюрайи Иса
тебрик апIуб*

¹² Хъайигъан машквраз гъафи халкъ, Иса Ерусалимдиз гъю-
руб деебхъну, ¹³ хурмайн гъарин кюлерра хъади, Исаин улихъ-
на, гъамцдар Чигъар апIури, удубчIуру:

Агъайн ччвурнахъ гъюрайи Израилин Паччагъдиз
уж'вал ибшри!

¹⁴ Иса, саб гъудугъ дибихъну, гъаддин элеуру, фицики Гира-
ми китабариш дибикIна: ¹⁵ «ГучI мапIан, Сиондин риш! Лиг, яв
Паччагъ увуухъна жигъил даждинди гъиди».

¹⁶ Исаин ученикар сифте мидин гъавриш ахъундайи, хъа къан-
ди Иса Аллагъдин аднаш гъашиган, Иса гъамци гъюваликан Ги-
рами китабариш дибикIнайиб дурапин кIваина гъафнийи, ва гъа-
ци дурапи Думу къаршуламишра гъапIнийи.

Адмийшири Исаийкан ктибтуб

¹⁷ Лазар Чиви апIруган, Исаийхъди хъайидари дидин гъякъна-
ан варидализ ктибури гъахъну, ¹⁸ гъаддиз халкъди Иса гъамци
тебрик апIури къаршуламиш гъапIнийи, гъаз гъапиш варидализ
гъадму ахамат улупур Думу вуйибдикан деебхънайи. ¹⁹ Хъа фа-
рисийири чиб-чпиз кIуйи:



— Рябкьюранчвуз, фукIа-мукIа апIуз ухьу кьюватсуз ву. Вари Гъадгъахъди гъягъюра!

²⁰ Аллагъдиз икрам апIуз машквраз гъафидарин арайиль гре-карра аий. ²¹ Дурари, Галилей уылкейиль аий Вифсадайиан вуйи Филип кIуру касдихъна дуфну, гъамци кIури саб талаб апIуру:

— Я ич ахюр, учуз Иса рякъюз ккунди ачуз.

²² Филипди душну Андрейиз, хъа дураг кьюридра Исаихъна душну, Дугъаз мидкан ктибутуру.

²³ Исаий гъапи:

— Аллагъдин аднаш шлу Инсаниятдин Балин сяайт улубкыну!

²⁴ Гъякълу вуйи гъякъ кIуразачвуз: сабан дяхнин удар жил'ина ахбъну дарчIиш, думу гъаци сабди гъубзди, хъа гъабчIиш, диди бегъем мягъсул хибди.

²⁵ Шлиз чан уьмур багъади вуш, гъацири думу пуч апIура, хъа шлиз гъаму дюн'яйин чан уьмур даккунди вуш, гъацири думу ккудуудубкIу уьмриз уьбхюра. ²⁶ Фуж Йиз гъуллугънаш аш, гъит гъацир Йиз шилнашди гъюри! Ва Узу наан аш, гъадушваш Йиз гъуллугъчира хьиди. Фуж Йиз гъуллугънаш аш, гъацир Йиз Адашди за апIиди.

Исаий Чан аյжаликан пуб

²⁷ Гъамус Йиз юкIв гъалабну абцIна! Фу пну ккунду Узу? ПидикIан: «Я Адаш! Узу гъаму гъялнаккан уьрх!» Саки Узу му дюн'яйиз гъаддиз дуфназа — гъаму гъял бадали! Адлу апIин Яв ччвур, Адаш!

²⁸ Гъадму арайиль завариан дих атIабгуру:

— Адлу гъапIунза ва хъана адлу апIидиза!

²⁹ Гъадушвахъ дугъужнайи халкъ думу дихнахъ хъпехъурайи. Садари, завар гъарахну кIурайи; тмундари, Дугъахъди малайик гъулхну, кIуйи.

³⁰ Исаий дурагиз жаваб вуди кIуру:

— Му дих Узуз вуйиб дайи, хъа думу халкъ бадали вуйи! ³¹ Му дюн'яйин суд апIура вахт, магъа, хъубкынора ву. Гъамус му дюн'-яйин гъякимдар (иблис) тина утIуккну хьиди! ³² Хъа Узу жилилан за гъахыган, Узу варидахъди Узухъинди иб тууз гъитдиза.

³³ Гъаму гафариинди Дугъу дурагиз, Учв фициб айжалиинди икIуруш, улупнийи.



³⁴ — Учуз Гирами китабариан Месигь гъарган учухъди шлуваликан альгъячуз, — гъапи халкъди. — Увхъан фици пуз шулвуихъан, Инсаниятдин Бай завариз зигиди, кІури? Ва фуж ву, Думу Инсаниятдин Бай?

³⁵ Исаий дурализ кІуру:

— Саціб вахтнальан акв учухъди гъубзидар. Гъаци вуйиган, Учву мучІушну ккадраъбан бадали, сабан акуди имиди, гъараҳай. Фицики фуж мучІушнальди гъяраш, гъацириз учв наанди илтІикІнашра, альгъдар. ³⁶Хъа сабан учвуз аку апІурамиди, аку аквнахъ хъугъай ва аквнан веледар хъидичва!

Гъаму гафар дупну, Иса гъягъору ва дурарихъан жин шулу.

³⁷ Дугъу дурагин улихъ гъамкъан альламатар гъапІнушра, аммаки дураг, дидизра дилигди, Дугъахъ хъугъдай. ³⁸Гъамци Ишая пайгъамбери дупнайи гафар тамам духыну ккундийи. Дугъу гъапнийи:

«Учхъан гъеебхъубдихъ фуж хъугъну, Агъя? Шлиз ачуҳъ гъабхънухъа Агъайин къудрат?»

³⁹ Ва гъаддиз дураг хъугъуз удукърудар дайи, хъана Ишайи кІуруганси:

⁴⁰ «Аллагъди дурагин улар кур гъапІнийи, дурагин фикир хъунти гъапІнийи, гъаци вуйиган, улар ади дярябкърудар ва фикирниинди гъаврий адрахърудар. Гъаци ккундарш, Узухъинди илтІикІрийи, ва Узу дураг сагъ апІидиза».

⁴¹ Ишайи му гафар, чаз улихъимиidi Исаийин адлувал гъябкъиган, гъапидар вуйи.

⁴² Агъсакъларин арайильра кмиди Исаийихъ хъугънайидар ціб адайи, хъа дураги дидкан, фарисийи чпи мистариан утІрукк-бан бадали, ачуҳъди кІурдайи. ⁴³ Адмийириин тярифар дурагиз Аллагъдин адлувалтІан зина вуйи.

Месигьди туву альгъюваларииинди ичв суд хъибди

⁴⁴ Исаий альхю дихниинди гъапи:

— Фуж Узухъ хъугъраш, гъацир Узухъ хъугърадар, хъа Узу Гъауррихъ хъугъра. ⁴⁵ Шлиз Узу рякъюраш, гъацириз Узу Гъаур рякъюра. ⁴⁶ Узу акв вуза ва Узухъ хъугъру гъарсар мучІушналь гъуд-рузбан бадали дюн'яиз дуфназа. ⁴⁷ Эгер шлиз Йиз гафар де-ерхъну, дураг тамам дарапІиш, Узу гъацирин суд апІидиза, гъаз



гъапиш Узу дюн’яиз суд апIуз ваь, хъа думу убхюз дуфнайир вуза.⁴⁸ Узу шли нигь апIураш ва Йиз Гаф къабул апIуз даккнириз, гъамустIанра судья а: Узу дупнайи Гаф – магъа судья, гъиямат йигъан суд апIур! ⁴⁹ Фицики Узу Йиз Узхъан гъапиб дариз – му Узу гъау Адашдин, Узуз вуйи амур ву, фу кIуруш ва фици кIуруш. ⁵⁰ Узуз аьгъязуз: Дугъан амур – му зат ккудуубукI-ру уьмур ву. Узу анжагъ Узуз Адашди йип гъапиб кIураза.

Исайи
Чан ученикарин ликар жикIуб

13 ¹Жугъдарин Пасхайн машквар багахь шулайи. Исайиз, Чав му дюн’я дипну, Адашдихъна хътакру вахт улубъяниб аьгъяйи. Му дюн’яий Чандар вуйидар Дугъаз ккундийи, ва гъамус Дугъу дураихъна вуйи Чан масанвалин къувват улупуз гъял гъапIнийи.

²Иблисди Искариотдиан вуйи Симондин бай Ягъудайн кIавь Isa масу тувбан ният гъамустIанра иvnайи. ³Хябахъдин уыл ипI-ру вахтна Исайи, Адашди вари Чан хилий иvnайиб аьгъяди ва Учв Аллагъдихъан дуфнайиб, Аллагъдихъна хътакурайиб аьгъяди, ⁴гъудужвну, Чан зиълан палат илдибтуру ва, дастамал гъадабгъну, Чан къял’ан идибIуру. ⁵Хъасин легниь шид убзну, Isa ученикарин ликар жикIуз хьюгъру ва къял’ан идибIнайи дастамлихъди кжикуру. ⁶Гъамци Isa Петрихънакъан хъуркъру. Ва Петри Дугъаз кIуру:

– Я Агъа! Увоз йиз ликар жикIуз ккунди айвуз?!

⁷ – Узу гъапIраш, уву сабан гъаври’ адарва, – жаваб туви Исайи. – Къанди аннамиш апIидива.

– Йиз ликар жикIуб?! Гыч хыбдар! – кIуру Петри.

– Эгер Узу дижрикIиш, сарун уву Йизур дарва! – гъапи Исайи.

– Агъа! Дици вуш, неинки ликар, гъацира – хилар, кIулра! – гъевеслуди кIуру Петри.

¹⁰ – Вари жан дижибIнайидарин анжагъ ликар жикIубтIан лазим дар, дицир марцциди ву аьхир. Учвура марцциди вучва. Аммаки учвкан вари марццидар дар, – гъапи Исайи.

¹¹ Исайиз Учв масу тувур аьгъяйи, гъаддиз Дугъу: «Учвкан вари марццидар дар», гъапнийи. ¹²Хъа дураин ликар гъижикIган,



алабхьну палат, хъана гъюн йивну суфрайихъ дахъиган, Дугъу кІуру:

— Узу учвуз гъапІнуш, гъаддин гъаврий гъахъунчва? ¹³ Учву Узуз «Агъа», «Мялим» кІуручва ва гъякъди кІурира ачва, гъаз гъапиш Узу якынди гъадму хъузра вуза. ¹⁴ Гъаци вуйиган, эгер Узу — Агъайи ва Мялимди — ичв ликар гъижикІнуш, учвура чиб-чпин ликар жикІури ккунду. ¹⁵ Узу гъапІиганси, гъаци учвура апІбан бадали, Узу учвуз мисал улупунза.

¹⁶ Гъякълу вуйи гъякъ кІуразачвуз: гъуллугъчи чан аххортІан артухъ дар ва Гъаънайирра Учв ГъауртІан артухъ дар. ¹⁷ Ва гъамус учвуз му аygъю дубхънайиган, эгер гъаци апІури гъашиш, бахтаврар хъидичва. ¹⁸ Узу учвкан варидарикан кІурадарза: Узуз аygъязуз Узу кадагънайидар. Саки Гирами китабарий дидикІнайи му гафар кІулиз удучІври: «Узухъди уъл гъипІур Узуз къаршу удучІвну». ¹⁹ Му хъайиз, мидиз улихъна Узу учвуз кІураза. Гъаци вуйиган, му ляхин улубкъиган, учву Узу Гъадму — Гъарган Айир — вуйибдихъ хъугъдичва. ²⁰ Гъякълу вуйи гъякъ кІуразачвуз: Узу Гъаърайир шли къабул апІураш, гъацири Узу къабул апІура, хъа шли Узу къабул апІураш, гъацири Узу му дюн'яйиз Гъаур къабул апІура.

*Учв масу туврур
Исайи ашкар апІуб*

²¹ Гъамци дупну, Иса яман гъалабулугъназ гъору.

— Гъякълу вуйи гъякъ кІуразачвузки, — гъапи Дугъу, — учвкан сари Узу масу тувди.

²² Думуган ученикар, Думу шликан улхурайкІан кІури, гъаврий адарди, сар-сарихъинди лигури гъузру. ²³ Исайин юкІв али ученикарикан сар Чан гъвалахъ гъюн йивну дахънайи. ²⁴ Симон Петри дугъяз, Мялим шликан улхураш Дугъхъан гъерх кІури, ишарат апІуру. ²⁵ Ва ученик Исайихънаси хъиркІну, гъерхру:

— Я Агъа! Думу фуж ву?

²⁶ — Узу уъл кубсну шлихъна тувиш, гъадму ву, — гъапи Исайи.

Дугъу уълин къацІ гъабраш хурагнак кубсну, Искариотдиан вуи Симондин бай Ягъудайихъна тувру. ²⁷ Гъаму къацІ хилиз гъадбгъубси Ягъудайиль шейтІан убчІвру.

— Яв апІуз ккайиб ухди апІин, — кІуру дугъяз Исайи.



²⁸ Суфрайихъ хъайидар саркъан, Исаи дици гъаз гъапнуш, гъаврий ахъундайи. ²⁹ Хъа Ягъудайихъ чпин уртахъ пул хъайиган, дурарикан сякъюдари: Исаи дугъаз: «ухъуз машквраз фукIа гъадагбъ» вая «касибариз фукIа тув», кIурайиси фикир апIуру. ³⁰ Уыл гъибису Ягъуда дишла хул’ан удучIвуру.

Йишв вуйи.

Цийи табшуругъ

³¹ Думу удучIвиган Исаи гъапи:

— Магъа гъамус Инсаниятдин Бализ Чан ад гъабхъну. Дугъан ад — Аллагъдин ад ву. ³² Эгер Дугъан ад Аллагъдин ад вуш, Аллагъдира Думу Чан аднаz гъадагъиди ва зат хъугъужвидар. ³³ Эй Йиз лижан веледар! Узуз учвухъди хъуз дицикъан вахт имдар. Учву Узу агури хъидичва — му жарадариз гъапиб Узу учвузра кIураза: «Узу гъярушваз учвхъан гъюз хъибдар». ³⁴ Узу учвуз цИи-и табшуругъ тувраза: сари-сар ккун апIинай, Узу учву ккун гъапIиганси, гъаци учвура сари-сар ккун апIинай. ³⁵ Эгер ичв арайиль масанвал ади гъабшиш, Учву Йиз ученикар вуйиб варда-риз аygъю хъибди.

³⁶ — Агъа, Уву наана гъягъюрава? — гъерху Дугъхъан Симон Петрийи.

— Узу гъягъюрайишваз сабан увхъан Узухъди гъюз хъибдарвухъан, — жаваб туvu Исаи. — Хъа хъасин гъидива.

³⁷ — Я Агъа! — кIуру Петри. — Узхъан Увухъди гъамус гъаз шулдар? Увхъанди йикIузра узу гъязур вуза!

³⁸ Исаи гъапи:

— Узхъанди йикIузра?! Гъякълу вуйи гъякъ кIуразавуз: датти ульиir дапIину ккудубкIайиз, шубуб раЖари Узу аygъю дарзуз пидива!

Исаи Чан ученикар ккарицуб

14 ¹ Исаи варидализ кади кIуру:

— Гъит ичв юкIвариан шаклувалар удучIври! Учву Аллагъ-дихъ хъугърачва, гъаци Узухъра хъугъай! ² Йиз Адашдин ужагъ-диль гизаф хулар а. Эгер гъаци дайиш, Узу учвуз мидкан пидайза. Узу учвуз душваш юишв гъязур апIуз гъягъюраза. ³ Узу гъушиган, учвуз юишв гъязур апIидиза. Узу наан шулуш, учвура гъадушваш



хъпан бадали, Узу хътакидиза ва учву Узухъна гъахидиза. ⁴Хъа Узу наана гъягъюраш, дина рякъ учвуз альгъачвуз.

⁵— Агъа, Уву наана гъягъюраш, учуз альгъдарчуз, — кIурайи Фомайи. — Гъаддиз учуз дина рякъ наънан альгью шул?

⁶Исайи жаваб туув:

— Узу вуза Рякъ, Узу вуза Гъякъ ва Умур. Анжагъ УзхъанминатIан Адашдихъна гъягъюз шулдар. ⁷Эгер учвуз Узу альгъаш, Адашра альгъачвуз. Гъамусдихъантине учвуз Думу альгъачвуз ва гъяркънура учвуз!

⁸— Я Агъа! — кIуру Филипди. — Учуз Адаш улуп ва сарун учуз фукIара лазим дарчуз.

⁹— Узу учвухъди гъамкъан вахтна хъади, учвуз Узу гъамусра альгью гъахъундарнуз, Филип? — жаваб туув Исайи. — Шлиз Узу гъяркънуш, гъадгъаз Адашра гъяркъну. Уву фици: «учуз Адаш улуп», кIурава?

¹⁰— Узу Адашдиль, Адаш Узу айибдихъ учвуз хъугърадарна? Узу учвуз кIурайи гафар Узхъан кIурайидар дариз, хъа дурап кIурайир Узу аий Адаш ву, Чан ляхнар апIурайи. ¹¹Узухъ хъугъай: Узу — Адашдиль, ва Йиз Адаш Узу а. Узухъ хъугъдарш, Узу апIурайи ляхнарихъкъана хъугъай. ¹²Гъякълу вуйи гъякъ кIуразачвуз: фуж Узухъ хъугъюраш, гъацири Узу апIурайи ляхнар апIиди ва УзутIан артухъдира кади апIиди, фицики Узу Адашдихъна гъягъюраза. ¹³Йиз ччвур дубисну учву ккуун гъапIуб вари Узу тамам апIидиза, ва Адашди Чан ад Чан Бал'антине улупиди. ¹⁴Эгер учву Йиз ччвурназ дих гъапIиш ва фу ккуун гъапIишра, Узу тамам апIидиза.

Гъякъвалин Рюгъ гъау

¹⁵Эгер учвуз Узу ккуундуш, Узу учвуз фу табшурмиш гъапIиш, гъадму тамам апIинай. ¹⁶Узу Адашдикан ккуун апIидиза ва Дугъу учвухъна жаар — Хъюгъур гъаъди. Думу альсариз учвухъди гъузди. ¹⁷Думу Хъюгъур — Гъякъвалин Рюгъ ву. Му дюн'-яихъан Думу къабул апIуз хъидар, гъаз гъапиш Думу рякъур дар ва альгъюр дар. Анжагъ учвуз альгъачвуз Думу, Думу учвухъди хъа ва учву а. ¹⁸Узу учву ийтимарди гъитидарзачву, хъана учвухъна хътакидиза. ¹⁹СацIиб вахтналан дюн'яйиз Узу сарун гъякъидар, хъа учвуз Узу рякъюри хъидичвуз: гъаз гъапиш Узу



яшамиш шулаза ва учвура яшамиш хьидичва.²⁰ Ва гъадму йигъян учвуз альгъю хьибдичвуз, Узу Йиз Адашдиш шулайиб, учву – Узу, хъа Узу – учвуль.²¹ Шли Узхъан вуйи табшуругъар тамам апIураш, гъадму ву Узу ккунир. Шлиз Узу ккундущ, Йиз Адашра гъадгъу ккун апIиди. Гъацир Узузра ккун хьидизуз ва гъацирин улихъ ачмиш шули хьидиза.

²² – Я Агъя! – кIуру Искариотдиан дару Ягъудайи, – Уву, имбуну дюн'яйиз ктарди, учуз фици ачмиш хьидива?

²³ Исаий жаваб туув:

– Шлиз Узу ккундущ, гъадгъу Йиз Гаф уьбхи迪. Ва гъадмуган дицир Йиз Адашдизра ккун хьиди, гъадмуган Узуна Думу сатIиди гъацирихъна гъидича ва гъадгъа яшамиш хьидича.²⁴ Шлиз Узу ккундарш, Йиз гафар уьрхидар. Учвуз ебхурайи Гаф Йизуб дариз альхир, хъа Узу гъау Адашдинуб ву.²⁵ Узу учвуз му гъеле учвухъди хъамидитIан гъапунза.²⁶ Узу бадали Адашди учвуз гъарьайи Хъюгъури – Гирами Рюгъну учвуз вариб улупиди ву Узу учвуз гъапиб вари кIваин апIидичвуз.²⁷ «Мясяляйт ибшири!» – Узу кIуразачвуз гъярайири. Узу учвуз Йиз мясяляйт тувразачвуз. Узу учвуз, инсанари туврубсиб мясяляйт туврадарзачвуз. Ичв кIваан дердер адаай! ГучI мапIанай!²⁸ Узу учвуз «гъягъюра-за» гъапиб учвуз гъеебхуунчвуз, ва: «Узу учвухъна хътакидиза», гъапнурा вуза. Эгер учвуз Узу ккундийиш, Узу Адашдихъна гъя-райибдин учву шад хьидийчва, фицики Йиз Адаш УзутIан артухъ ву.²⁹ Узу гъамус гъаму вари улубкъайиз улихъна вари гъа-пунза, ва гъадмуган, гъаму улубкъиган, учву Узухъ хъугъидичва!³⁰ Сарун Узхъан учвухъди артухъ гафар апIуз хьибдарзухъан: сарун му дюн'яйин гъякимдар багахъ духъна. Йиз зин дугъяз гью-кум адар.³¹ Аммаки му дюн'яйиз альгъю дубхъну ккунду: Узуз Йиз Адаш ккундайиб. Магъа гъаддиз Дугъу Узуз гъапиб вари тамам апIураза. Гъудужвай, гъягъюрхъа гъамушв'ан!

Иса тIумтIин шириз ухшар ву

15¹ Узу халис тIумтIин шир вуза, хъа Йиз Адаш тIумтIчи ву.² Уз'ин али бегъер дархру гъарсаб кюл Дугъу ктабтIу-ру, хъа бегъер хруб, диди хъанара артухъди бегъер хпан бадали, марцц апIуру. ³Узу учвуз улупу Гафналантина учву сарун мар-цидар вучва. ⁴Узу учвуль шлуганси, учву Узу йихъай. Кюлихъан



чав-чаланди бегъер хуз шулдар, думу ширнан пай вуди ккунду. Гъаци учвуря Узу – шир, хъя учву – кюлер. Анжагъ гъадмуни, Узу чать айиганси, фуж Узу аш, бегъем бегъер хури шулу. Узу хътарш, учвхъан фукла апIуз шулдар. ⁶Хъя фуж Узу адарш, дурагъ, багъдиан гатIахъину, ерщура-йи кюлерси ву; дурагъ уч апIиди, цИгъна гатIахъиди ва ургиди. ⁷Хъя эгер Узу учвувь ва Йиз гафар учвувь аш, учвуз фу ккундуш, гъадму талаб апIинай, учвуз вари тувди! ⁸Йиз Адашдин ад ба-дали аяхъо бегъер хибничва ва Йиз ученикар хъидичвкан. ⁹Узу Адашди фици ккун гъапIунш, гъаци Узуря учву ккун гъапIун-за. Йиз масанвалиинди яшамиш йихъай! ¹⁰Эгер Узу учвуз таб-шурмиш гъапIуб учву тамам апIури гъашиш, Йиз масанвалиш яшамиш хъидичва. Гъаци Узуря гъапIунза: Узуз Йиз Адашди табшурмиш гъапIуб Узу тамам гъапIунза ва Адашдин масанва-лиъди яшамиш шулаза.

¹¹Узу учвуз му гъаддиз гъапунза: Йиз шадвал ичвуб хъпан бадали, учву къикъянягъди ацIину шлуси. ¹²Магъа Йиз учвуз ву-ий табшуругъ: Узу учву ккун гъапIиганси, сари-сар ккун апIинай. ¹³Дустарихъанди умур тувбутIан артухъ масанвал дюн'яйиль адар. ¹⁴Эгер Узу учвуз табшурмиш гъапIуб учву тамам апIурууш, учву Узуз дустар вучва. ¹⁵Сарун Узу учвуз Йиз гъуллугъчири пну дих дарапIарза – гъуллугъчири чан аяхюри гъапIраш аягъдар аяхир. Узу учвуз Йиз дустар пну дих апIураза. Йиз Адашдихъан аягъю гъапIуб, Узу учвуз вари ктибтунза. ¹⁶Узу ктагъур учву дар-чва, гъаму Узу вуза учву ктагъур, гъаму Узу вуза учву дюн'яйиз улупнайир, ва бегъер туврудар (учву вучва) – варитIан ужуб бегъер. Ва гъадмуган Йиз Адашди учвуз, учву ккун гъапIуб, вари тувди. ¹⁷Магъа Узу учвуз табшурмиш апIурайиб: сари-сар ккун апIинай.

*Исай Чан ученикариз
улихъимиidi хатIаваликан пуб*

¹⁸Эгер учву дюн'яйиз даккунди вуш, учвутIан Узу ухди даккун гъашиб аягъю йибхъай. ¹⁹Учву му дюн'яйиндар вуди ккундий, диди учву чандарси ккун апIидий. Хъя учву му дюн'яйиндар даруган, гъаддиз учву дюн'яйиз даккунди ву (яна, Узу учву ка-дагъну му дюн'яихъан жара гъапIунзачву). ²⁰КIваин апIинай,



Узу учвуз гъапундайин: «гъуллугъчи чан аххортан артухъ дар?» Эгер Узу утIуккуйиш, учвура утIурккури хьиди. Эгер Йиз гафар тамам апIуйиш, ичвра тамам апIури хьиди.²¹ Амма гъамрар вари учву Йиздар вуйиган апIиди, гъаз гъапиш дуариз Узу Гъаур аыгъдар.²² Эгер Узу дюн'яйиз гъафундайиш ва дуарихъди гъулхундайиш, дуар тахсиркрап хьидай. Хъа гъамус дуарин чпи гъякъ вучка кIурайивализ бин имдар.²³ Шлиз Узу даккунди вуш, гъацириз Йиз Адашра ккундар.²⁴ Эгер сарихъанра апIуз даршлу ляхнар Узу гъапIундайиш, гъадмуган дуар тахсиркрап хьидай. Хъа гъамус дуариз Узу гъапIдар вари гъяркъну, ва гъаци вушра дуариз Узура, Йиз Адашра даккунди ву.²⁵ Саки гъаци дубхъну ккундийи, дуарихъ хъайи Къанундиль дибикIнайи «Саб багънара адарди Узу даккунди ву» кIуруб тамам хъпан бадали.²⁶ Саки учвухъна Хъюгъур гъафиган, яна Адашдихъан гъорайи Гъякънан Рюгъ, Узу учвухъна Адашдихъан гъаъдиза – ва Думу Йиз шагьид хьиди.²⁷ Ва учвура Йиз шагьидар вучва, фиики садпи ийгъланмина Узухъди хъачва.

«Дуариз я Узу, я Йиз Адаш аыгъдар»

16 ¹Учву хъугъвалихъан хътадахъбан бадали, Узу учвуз гъамрар гъапунзачвуз. ²Учву мистариан утIурккури хьиди. Гъациб вахт гъибиди, учву йикIрудари, чпи гъаци апIбинди, Аллагъдин гъуллугънаа ача кIури, фикир апIиди. ³Дуарари дици гъаддиз апIидики, гъаз гъапиш дуариз я Узу, я Йиз Адаш аыгъдар. ⁴Хъа Узу учвуз гъамрар, вахт улубкыиган, Узу дуарикан ктитуб ичв кIваина гъюбан бадали, гъапунзачвуз. Сифте раЖари дидкан учвуз гъапундайза, гъаз гъапиш учвухъди хъайза.

«Узу дурушиш, Хъюгъур гъидар»

⁵Хъа гъамус Узу Гъаурихъна гъяраза. Учвкан сарикъан: «Уву наана гъягъюрава?» – пну гъерхадарчва, ⁶гъаз гъапиш Узу учвуз вари ктибитиган, ичв юкIвар пашман духънайичв. ⁷Хъа Узу гъякъ кIуразачвуз: учвуз уж’вал бадали гъяраза. Эгер Узу дурушиш, Хъюгъур учвухъна гъидар. Хъа Узу гъушиш, Думу учвухъна гъаъдиза. ⁸Дугъу, гъафиган, дюн’яйин агълариз дуар гунагъвалин, дугъривалин ва Аллагъдин суддин дюзди гъаврий адрувал улупиди. ⁹Узухъ хътругъргурган, дуар гунагъвалин дюзди гъаврий



адар. ¹⁰ Узухъинди даруган, дурагар дугъривалин дюздзи гъаврий адар, гъаци вуйиган, Узу Адашдихъна гъяраза, ва учвуз Узу сарун рякъидарчвуз. ¹¹ Гъаму дюн'яйин гьюкумдариин гъамуст-Панра гъалиб духънашра, дурагар Аллагъдин суддин дюздзи гъаврий адар. ¹² Узхъан учвуз хъана гизафдарикан пуз шуйзухъан, аммаки учвхъан дурагарин гъаму ражари сабан гъаврий ахъуз хъибдарчвухъан. ¹³ Учвухъна Гъякъвалин Рюгъ гъафиган, Дугъу учву дюз рякъди гъахи迪, рюгънан метлеб – гъубкІну вуйи гъякъвал ву, фицики Дугъу кІурайиб Чахъан дар. Дугъу анжагъ Чаз гъеебхъубдикан пиidi, Дугъу учвуз гъюз ккимбубдикан хабар дебккди. ¹⁴ Дугъу Узу адлу апIиди, гъаз гъапиш Дугъу, Узхъан гъадабгъну, думу учвуз ачухъ апIиди. ¹⁵ Вари Адашдиз айиб Йизуб ву. Магъа гъаддиз Узу: „Дугъу, Узхъан гъадабгъну, учвуз тувди“, гъапунза.

Пашманвалин ерина шадвал гъибди

¹⁶ Багарихъди Узу сарун рякъидарчвуз, цІиб вахтналан хъана рякъидичвуз.

¹⁷ Ученикарикан сакъодари чиб-чпигъ кІури гъахъну:

– Мугъан фикирнаь фу ади мици кІурайкІан? Мугъу кІура: «Багарихъди Узу учвуз сарун рякъидарчвуз, хъа сацІиб вахтналан хъана рякъидичвуз». Ва гъамцира кІура: «Гъаз гъапиш Узу Адашдихъна гъяраза». ¹⁸ Хъа мидин фици гъаврий ахъди – «багарихъди?» Му фтикан улхураш, ухъу гъаврий адархъа.

¹⁹ Исаиз альгъяйи, дурагариз Чахъан фтикан гъерхуз ккунди аишиш ва гъаддиз Чав кІуру:

– Учву чиб-чпихъан гъерхачва, Узу Йиз хиялнаь фу ади мици: «багарихъди» ва «учвуз Узу сарун рякъидарчвуз, хъа цІиб вахтналан хъана рякъидичвуз» – кІурайкІан кІури? ²⁰ Гъякълу вуйи гъякъ кІуразачвуз: ишидичва ва дердер зигидичва, хъа миди вуйи дюн'я шад хъибди. Учву пашман хъидичва, амма ичв пашманвал шадвализ хъибди. ²¹ БицІир апIурайи дишагъли альзабнакк шулу, фицики дугъан сяльт улубкъна, хъа бицІир гъапIуриз альзабар гъархру – дюн'яйиз цІийи инсан хъуб'ин думу шад шулу. ²² Гъаци учвура гъамус пашман вучва, саки учву Узуз хъанара рякъиди ва гъадмуган ичв юкІвар шадвали ацІди, му ичв шадвал



сарихъанра дадабгъуз хыбдар. ²³ Ва гъадму йигъан учву Уз'хъан сабдиканра гъерхидарчва. Гъякуу вуйи гъякъ күразачвуз: Йиз ччур дибисну, учву Йиз Адашдихъан фу талаб гъапишра, Дугъу тувдичвуз. ²⁴ Учву мегъель фуктара Йиз ччурнахъан талаб гъапундарчва. Гъамус талаб апинай – хыбдичвуз, ва учву шадвалихъди ацидичву!

Дюн'яйин зин гъалибвал

²⁵ Мугагъназ Узу учвуз тахалусариинди күри гъахъунза, хъя гъамус Узу учвуз, тахалусариинди дарди, Адашдикан ачухъди дупну ккуни ваҳт улубкъура. ²⁶ Гъадму йигъан учву, Йиз ччур дибисну, Дугъкан талабар апидичва. Узу күразачвуз, учвхъанди Адашдиз ккарагидиза, дупну. ²⁷ Ичв Узухъна вуйи ккунивализ дилигнү ва Узу Аллагъдихъан дуфна күри ичв хъугънайивализ дилигнү, Адашдиз Чаз учву ккундү. ²⁸ Узу му дюн'яйиз Адашдихъан гъафунза ва гъамус, дюн'я дипну, Дугъахъна хътакураза.

²⁹ – Ари гъамус Уву, тахалусариинди дарди, ачухъди күрава, – гъапи Дугъаз ученикари. – ³⁰ Увуз вари аygъюбин учу гъамус гъаврий ахъунча. Увхъан гъерхайизра кмиди Уву жавабар туврава. Магъа гъаддиз Уву Аллагъдихъан дуфнайидихъ хъугърача.

³¹ – Альирки хъугъунчва? – гъапи жаваб вуди дурализ Исаий. – ³² Хъебехъай, Узу сарди гъитну, учву вари хулариз гъергру сяайл улубкъура. Амма Узу сар дарза, гъаз гъапиш Узухъ Йиз Адаш хъазухъ. ³³ Узу му гафар, Узуль учву мясляльт абрри пну, гъапидар вуйиз. Му дюн'яйиль учвуз дердер алахьидичвуз, аммаки миж макадабтланай: Узу му дюн'яйин гъалиб гъахъунза.

Исайин Чан Адашдихъди улхуб

17 ¹Му гафар гъапиган, Исайи завузди күл за апирву ка күру: – Я Адаш! Йиз сяайл улубкъуну. Яв Бай адлу апин, Яв Бали Уву адлу апібан бадали. ² Вари яшамиш шлубдин зин Уву Дугъаз гъюкүм тувунва. Уву Дугъахъна гъайдариз гъаци Гъадгъура гъаргандин уымур тувди. ³ Хъя гъаргандин уымур – му Уву, сар вуйи, гъякуу вуйи Аллагъ, ва Уву гъау Иса Месигъ аygъю апіувал ву. ⁴ Узуз Уву табшурмиш гъапіу ляхин тамам дапину, Узу Уву жилиин адлу гъапунзаву. ⁵ Ва гъамус, дюн'я ккебгъайиз



улихъна, Узу Увухъди хъайиган, Узуз фици ад айиш, гъациб адниинди Узу адлу апIин, эй Адаш. ⁶Уву, му дюн'яйиан адагъну, Узухъна туву адмийириз Яв ччвур ачмиш гъапIунза. Думу адмийир, Явдар вуйидар, Уву Узуз тувунва. Дурари Яв Гаф гъюбхну. ⁷Гъамус дураг, Уву Узуз тувуб вари Явуб вуйивалин, аыхирки, гъавриъ ахъну. ⁸Уву Узухъди гъау гафар, Узу дурагихъна тувунза ва дураг дурари къабул гъапIину. Узу Увхъан дуфнайивалин дураг якынтиан гъавриъ ахъну ва Уву Узу гъаувалихъ хъугъну. ⁹Узу гъадрарин гъякънаан ккарагураза: Узу вари дюн'яихъанди ккарагурадарза, хъа Уву Узухъна тувдарихъандитIан, гъаз гъапиш дураг Явдар ву, ¹⁰фицики вари Узуз айиб Явуб ву, ва вари Увуз айиб Йизуб ву. Гъадраиантине Узу Йиз ад улупунза. ¹¹Узу сарун му дюн'яйиъ гъузрадарза, Узу Увухъна хътакураза, хъа дураг му дюн'яйиъ гъузра. Эй гира-ми Йиз Адаш! Яв ччвурнан къувватниинди – Уву Узуз тувунва гъадму ччвур – дураг урх, Увина Узу сар вуйиганси, дурага сарси хъпан бадали. ¹²Яв ччвурнан къувватниинди – Уву Узуз тувунва гъадму ччвур – чпихъди хъайи вахтна Узу урхюри гъахъунза дураг. Узу гъюрхюнза дураг: айжалихъна улупнайи сартIан гъайри фужкIара гъакIундар, гъамци Гирами бикIбарин Гаф тамам дубхъну ккундийи. ¹³Хъа Узу гъамус Увухъна гъюра-за. Узу сабан жилиин илмиза, му вари Узу гъаддиз кIураза, Йиз абцIину вуйи шадвал Узухъди дурарира пай апIбан бадали. ¹⁴Узу Яв Гаф дурагиз улупунза, гъаддиз му дюн'яйи дураг даккун гъапIину, гъаз гъапиш дураг му дюн'яйиан даруган, Узу му дюн'яйиан даруганси. ¹⁵Узу Увкан дураг му дюн'яйилан гъада-гъуб ккун апIурадарза, Узу ккун апIураза, дураг писвалихъан урхюб. ¹⁶Узу му дюн'яйиан даруганси, дураг му дюн'яйиан дар. ¹⁷Гъякъвалин къувватниинди дураг Яв гъуллугъниина жалб апIин, Гъякъвал – му Яв Гаф ву. ¹⁸Уву Узу дюн'яйиз фици гъаънуш, Узура дураг му дюн'яйиз гъаунза. ¹⁹Гъадраг бадали, Узу Увуз дугъриданра дураг Явдар хъпахъди бахш гъахъунза. ²⁰Анжагъ Узу гъадраихъандитIан ккарагурадарза, гъадраги гъа-пи Узкан вуйи гафналантина Узухъ хъугънайидарихъандира ккарагураза. ²¹Гъит дураг вари саб хилди ишри, Уву Узуль фици шулаш, хъа Узу Увуль фици шулаш, гъит гъадраг Ухъуль ишри. Ва гъит дюн'яйиз Узу Уву гъаънайивал айгъю ибшри. ²²Уву Узуз



туву ад Узу дурализ тувунза, Увuna Узу сар вуйиси, дурарра саб хилди хъпан бадали.²³ Узу дурарий шулаза ва Уву Узуль шулава. Гъйт дурарра ижмиди сабхилди гъузри! Ва гъйт дюн'яйиз аьгью ибшри Узу Уву гъаувал ва, Увуз Узу ккуниганси, Увуз дурарра ккунивал.²⁴ Я Адаш! Узуз ккундузуз, Уву Узуз тувдар Узу шлушваъ Узухъди духьну. Гъйт дурализ Уву Узуз туву Йиз ад рябкъри. Фицики дюн'я арайиз хайиз Уву Узу ккун гъапIунва.²⁵ Эй гъякълу вуйи Йиз Адаш! Дюн'яйи Уву аьгью гъапIундар, Узуз Уву аьгъязуз, хъасин Узу Уву гъауб дурализ аьгью гъабхъну.²⁶ Увуз Узу ккуни масанвал гъадариъра, Узу гъадариъри фици аш, гъаци хъпан бадали, Узу дурализ Яв ччвур ачмиш гъапIунза ва апIидира вуза.

Иса дисуб

18 ¹Гъамци ккарагбалан къяляхъ, Иса, Чан ученикарра хъади, Кедрон кIуру дерейиантана багъдиль аий иишваз гъягъюру. Дураг сатIиди багъдиль учIиву. ²Иса масу тувуз ккуни Ягъудайиз му иишв аьгъюб вуйи – Исаны ученикар дина кми-кмиди уч шуйи. ³Ва магъя, римлуйириин эскарарин десте ва гъацира жугъдарин маллиириин ахюдарина фарисийири гъау Аллагъдин хулан гъаравларра хъади, Ягъуда мина гъюру. Дураг вари яракъламиш духьнайи: дурарихъ цIа кайи гакIвларна фани-кар хъайи.

⁴ Исаий, Чаин улубкъруб аьгъяди, дурагин улихъна удучIвну гъерхру:

– Учву фуж агурачва?

⁵ – Назаретдиан вуйи Иса, – жаваб туву дураги.

– Гъадму Узу вуза, – кIуру Дугъу.

Масу туврайи Ягъудара гъадарихъди хъайи. ⁶Исаий: «Гъадму Узу вуза» гъапибси, дураг къяляхъ шулу ва жил'ина ахьру.

⁷ – Учву фуж агурачва? – хъанара гъерхру дурарихъян Исаий.

– Назаретдиан вуйи Иса, – кIуру дураги.

⁸ – Узу учвуз гъапунзачвузки: Гъадму Узу вуза, – гъапи Исаий. – Эгер учвуз Узу лазим вуш, гъаму адмийир деетай.

⁹ Исаий гъаци гъапнийи, гъаз гъапиш Чав дупнайи гъаму га-фар: «Уву Узуз тувдарикан, Узу фужкIара пуч гъапIундарза», кIурудар тамам духьну ккундийи.



¹⁰ Гъадмуган ханжал хъайи Петри, думу учIюбгъну, маллиирин ахюрин гъаравшиз йивну, дугъан иб ктабтIуру. Гъаравшиз Малх кIуйи.

— Ханжал чан халариъ ив! — гъапи Исаий Петриз. — Му аззабарин зах Узуз Адашди тувунзуз. Мегер Узхъан думу дурбухъди гъибтуз шулин?

¹² Гъадмуган Аллагъдин хулан гъаравлари Иса дисуру ва йитIуру. ¹³ Сифте Думу гъадму йисан маллиирин ахюр вуйи Каяфа-йин язна Гъаннайихъна хуру. ¹⁴ Эгер вари халкъдин ерина сар адми гъачIиш ужу шул, дупну, жугъдариz насиgъят тувур гъадму Каяфа вуйи.

*Петри Исаиз
«Альгъюр дарзуз» пуб*

¹⁵ Симон Петрна сарсан ученик Исаийин къяляхъди гъушнийи. Му ученик, маллиирин ахюрихъди танишур вуйи ва думу Исаийихъди кавхайнин гъятдис учIвнийи. ¹⁶ Хъя Петр уратин Чатинди гъузру. Хъасин гъадму кавхайиз таниш ученик удучIвну, урапихъ хъайи гъараваш шурахъди дулхну, Петrrа гъятдизди аъру.

¹⁷ Ва гъамшвахь му шуру Петриз кIуру:

— Хъя уву, гъаписи даршул, гъатму адмийин ученик дарна?

— Ваъ, — пну жаваб туви Петри.

¹⁸ Аххюди вуйи. Гъаравшари ва гъараваш дишагълиири, алапI-рушвахь цIа алапIну, мани апIуз хъюгъю. Петrrа дурагин багахъ дугъужвнайи ва мани апIурайи.

Исаийхъан силис гъадабгъуб

¹⁹ Кавхайири Исаийхъан Дугъан ученикарикан ва Дугъу улупурайи альгъюваларикиан гъерхрайи.

— Узу варидаrin улихъ ачухъди гъапунза, — жаваб туви Исаийи. — Вари жугъдар гъюру мистай Узу гъарган альгъювалар улупури гъахъунза. Узу фукIара гъитIибкIну, жиниди улупундарза.

²¹ Гъаци вуйиган, Узхъан гъаз гъерхачва? Узу фтикан гъапнуш, ебхурайидарихъан гъерхай. Дурагиз альгъя, Узу фу гъапнуш.

²² Дугъу гъамци гъапиган, багахъ дийигънайи гъаравларикиан сари Исаийин машнягъян йивуру ва кIуру:

— Фици гафар апIурава кавхайихъди?!



²³ — Эгер Узу фу-вуш жараси гъапнуш, йип Узу фтин дюз дарш, — гъапи Исаи. — Хъа эгер гъякъ кIураш, гъаз Узуз ии-вурава?

²⁴ Гъадмуган Гъаннайи, Иса йитIну имиди, маллиириин ахюр вуйи Кафайихына гъарьу.

*Петри Иса кьюбпи ражарира
«Альбюр дарзуз» пуб*

²⁵ Хъа Симон Петр чаз мани апIури дугъужвнамиий.

— Ич хиялиан, увура Дугъан ученикарикан вуйва? — гъерхру дугъхъан.

— Ваъ, — жаваб туву Петри.

²⁶ — Уву дайнахъа узуз багъдиъ Дугъахъди гъяркъю? — гъерхру Петри иб кдабтIу гъуллугъчийин багахълуи.

²⁷ Петри хъана дарза кIуру, ва гъадму сяйт даттили уъйир апIуру.

Пилатдин силис

²⁸ Гъириин ухди Иса, Кафайин хул'ан адаьну, Римдин гьюкум-дарин дараматариз хуру. Жугъдар, чпи чиркин духьну, Пасхайн машквар апIуз хъибдар кIури, дараматдиъ учIундай. ²⁹ Гъаддиз гъякимдар Пилат учв дурарихъна удучIуру.

— Учву узухъна духнайи му Кас фтин тахсир апIурачва? — гъерху дугъу.

³⁰ — Эгер Думу тахсиркар дайиш, учу Думу Увухъна суд апIуз дархрийча, — жаваб туву дураги.

³¹ — Думу учвухъна гъадагъай ва ичв закондииинди суд апIинай, — гъапи Пилатди.

— Учуз фужкIара аյжализ тувуз ихтияр адарчуз, — гъапи дураги.

³² Гъамци гъабхънийи, гъаз гъапиш Исаи, Чав улихъимиidi Учв фициб айжалиинди йикIуруш, гъапи гафар тамам духьну ккундий.

³³ Пилат дараматдиз хътакуру ва, Исаизра дих дапIну, гъерхру:

— Уву «жугъдарин Паччагъ» вуна?

³⁴ — Гъаци уву кIурана, даршиш думу увуз Узкан жарадари гъапиб вуйин? — гъерху Исаи.



³⁵ – Узу жугъуд вуйинхъа? – хътIурччу Пилат. – Гъаму Яв ватаңагълийири ва кавхиири Уву узухъна тувну. Уву гъациб фу гъапунва?

³⁶ – Йиз Паччагъувал му дюн’яйиан дар. Эгер Йиз Паччагъувал гъаму дюн’яйиан вуйиш, Йиз гъуллугъчири, Узу жугъадрин хилий адрахъбан бадали, чпихъан шлуб апIидий. Ваъ, Йиз Паччагъувал мушв’ан дариз, – гъапи Исаий.

³⁷ – Гъаци вуйиган, фици-вушра Уву Паччагъ вуна? – гъерху гъадмуган Пилатди.

– Узу паччагъ ву, уву кIурава. Узу гъаддиз бабкан гъахъунза ва гъаддиз дюн’яйиз гъафунза: гъякъвал улупбан бадали. Шлиз ккундуш гъякъвал, гъарсариз Йиз дих ебхура, – гъапи Исаий.

³⁸ – Хъа гъякъвал фу ву? – гъерху Пилатди. Ва гъамци дупну, думу хъана жугъарихъна удучIву.

– Узуз му Касдик гъич саб тахсирра бихъурадарзуз, – гъами дугъу.

³⁹ – Учвуз гъациб аьдат ачвуз: Пасхайн машквраз дидиснайидарикан сар деетуб. Узу учвуз дидиснайидарикан сар Пасхайиз деетурза. «Жугъарин Паччагъ» деетурза, ккундунучвуз?

⁴⁰ – Думу ваъ! Варава деет! – хъана дураги чИгъар апIуз хъюгъю.

Варава гъачагъ вуйи.

«Думу дариз зиг»

19 ¹Гъадмуган Пилатди, Иса хъади душну, Думу урччууз гъитру. ²Эскрарира, зазарикан таж дапIину, Дугъан кIул’ин улуб-кIуру ва гъюнарихъ аку-уьру халат хъипру. ³Дураг Дугъахъна гъюйи ва кIуйи:

– Яшамиш ишри «жугъарин Паччагъ!» – ва гъамци кIури, Дугъан машнягъян ийвуйи.

⁴Хъана Пилат удучIвуру.

– Мугъак узуз гъич саб тахсирра бихъурадарзуз, учвуз аьгъю хъпан бадали, магъа узу Думу ичв улихъна адаураза, – гъапи Пилатди.

⁵ Ва гъадмуган, зазарикан гъапIу таж ва аку-элвен халат хъади, дурагирихъна Иса удучIвуру.

– Магъа Думу Адми! – гъапи дурагиз Пилатди.



⁶Хъа кавхийрина гъаравлари, Иса гъяркьюбси, Чигъар апIуру:
— Хачриина Думу! Хачриина!

— Думу учву гъадагъну, дариз зигай! — кIуру дурагиз Пилатди.
— Узуз Мугъак саб тахсирра бихъурадарзуз.

⁷— Учуз закон ачуз, — гъапи жугъдари, — закондиинді Думу
дукIину ккунду, гъаз гъапиш Дугъу, Учв Аллагъдин Бай вуза,
гъапнү.

⁸Му гафар гьеерхьиган, Пилатдиз хъана артухъди гучI шулу.

⁹Думу хъана дараматдиз хътакуру ва Исаихъан гъерхру:

— Уву наънан вува?

Амма Исаий фукIара гъапундар.

¹⁰— Гафар апIуз ккундарнуз? — кIуру Пилатди гъадмуган. —
Увуз аыгъдарнузхъа, Уву деетувал йиз гьюкмиъ айиб ва Уву хач-
риин дариз зигувалра йиз гьюкмиъ айиб?

¹¹Исаий жаваб туvu:

— Йиз зин яв гыч саб гьюкумра даршлии, эгер увуз думу
зиълан тувнадайиш. Ва гъаддиз Узу яв хилиз масу тувурин гу-
нагъ хъана зурбабуб ву.

¹²Гъаму гафарин къяляхъ Пилат Иса азад апIуз чарийр агбахъ
шулу. Хъа жугъдари Чигъар апIуру:

— Эгер уву Думу деетиш, уву Цезар-паччагъдин дуст дарва!
Фуж учв паччагъ вуза кIурайир, думу Цезар-паччагъдиз къаршу
гъедергурайир ву!

¹³Гъамцдар гафар гьеерхъу Пилат, Исада адаъну, суд апIру-
шв'ин деъру. Думу иишваз «Гъвандин таht» кIуру, жугъуд Чал-
ниинді: «Гаввафа».

¹⁴Му ляхнар Пасхайн машквар ккебгъайиз улихъна, жвуми
ийгъян лисунган шулайидар вуйи.

— Лигай, магъа ичв паччагъ! — гъапи Пилатди.

¹⁵— ЖвартI апIин Думу! ЖвартI! Хачриина! — гъарийр гъапIу
дурари.

— Гъаци вуйин? Ичв паччагъ узу дариз зигну ккундуңчвуз? —
кIуру Пилатди.

Цезарилан гъайри, учуз жара паччагъ адарчуз! — жаваб туvu
дурари.

¹⁶Ва гъадмуган Пилатди, аыхирки, Иса дариз зигбан бадали
жугъдарихъна тувру. Эскрарира, Иса дидисну, хъади гъахуру.



Хачриин Исаийн аյжал

¹⁷ Дугъу «УнтIаъ» (жугъуд чалниинди «Голгофа») кIуро ии-швахънакъан Чайнди Чав карсру хачра дубхну ккундий. ¹⁸ Гьадушв'ин Думу къумарихъди хачрак карсру, хъя Дугъахъди къурсана – сар арччул, гъатмунурсана гагул терефнахъанди карсру, хъя Иса – дурагин къялъ.

¹⁹ Пилатди хачрак дибикIнайи табличкара кебхуз буйругъ тув-ру. Душвак дибикIнайи: «Назаретдиан вуйи Иса, жугъдарин паччагъ».

²⁰ Му бикIуб гизаф жугъдари гъурхнийи, Иса дариз дизигна-йишв шатърихъан ярхлъ адайи: ва душвак жугъуд, латин ва грек чалариинди дибикIнурда айи. Жугъдарин кавхиири Пилат-диз гъапи:

²¹ – «Жугъдарин паччагъ» кIури мибикIан. «Гъаму адмийи учв жугъдарин паччагъ вузу кIура», – пну, бикI.

²² – Узу, фу дибикIнаш, дибикIназа, – жаваб туву Пилатди.

Түпүт ипүб

²³ Иса дариз гъизигхъан, эскрари, Дугъан халат гъадабгъну, юкъубишваз пай апIуру – гъарсар эскриз саб. Дураги Исаийн балахунра (кIанккан алабхъру ккуртт) гъадабгъуру. Думу гъибир-хушв ктарди заълансина дубхнайиб вуйи.

²⁴ – Му чябгъидархъя, шлиз удубчIвуруш, тупут ипиш ужу шул, – гъапи дураги чиб-чпин арайиъ. Гъамци, Гирами китабарий дидикIнайи му гафар тамам гъахънийи: «Йиз палтар дураги чпин арайиъ пай гъапIнийи, Узу алабхънайибдин тупут ип-нийи». Чан гъаци эскрари апIузра гъапIнийи.

Исаий Чан жсан тувуб

²⁵ Иса керхнайи хачран багахъ Дугъан дада, дадайин чи, Кле-опдин шив Мар'ям ва Магдалайиан вуйи Мар'ям дийигънайи.

²⁶ Чан дада ва душвахъ хъайи Чан юкIв али сар ученик дяркъну, Исаий дадайиз кIуро:

– Дишагъли, магъя яв бай. – ²⁷ Хъасин ученикдизра кIуро:

– Магъя яв дада.

Гъаддихъанмина ученикди Исаийн дада чахъна гъадагъуру.



²⁸ Исаи, вари ляхнар Гирами китабариъ дидикІнайиси духъ-
найиб альгъяди, кІуро:

— Дахаргназу!

²⁹ Душвахъ чаяхрин сиркейихъди абцІнайи гажин хъайи. Иссоп
рукнан кюлигъ чаяхрин сирке дизигнайи мачалкасиб гъивну,
эскрари Дугъян кІвантІарихъна хуру.

³⁰ Исаи, сиркейикан дубхъну, кІуро:

— Тамам гъабхъну!

Ва, кІул кибхну, Дугъу рюгъ туву (Аллагъдиз).

Гирами китабариъ дидикІнайиб тамам хъуб

³¹ Му жвуми йигъян гъабхъиб вуйи, ва жугъдарин гъакимариз
дариз дизигнайдарин майтар султ йигъаз хачарик керхну гъи-
туз ккунди адайи, фицики гъаму султ йигъян дуралин ахю вуйи
Пасхайнин машквар ккебгърайи. Гъаддиз дурари Пилатдикан,
керхнайдарин ликар дюргъну, дураг хачракан ктагъуб тІалаб
гъапІнийи. ³² Гъадмуган эскрар дуфну, Исаиихъди дариз гъизиг-
дарикан сарпириин ликар ургъюру, хъасин — кьюрпириин. ³³ Хъа
Исаиихъна гъафиган, лигуруш, Думу дукІнайи, ва гъаддиз Ду-
гъян ликар дюрюргъди гъитру.

³⁴ ДукІну ашра, эскрари кан сари Дугъян гъвалаль жида убчч-
ру, ва дишла ифина шид удубчІвуро.

³⁵ Му вари чан хусуси уларинди гъябкъю адмийи, учвуро
хъугъбан бадали ктибтура. Дугъян шагъидвал гъякълуб ву, чав
гъякъ кІурайивал дугъаз альгъя. ³⁶ Гъамци Гирами китабариъ дид-
икІнайибра тамам гъабхъиийи:

«Дугъян гъич саб кІуробра дюбгъну хъибдар». ³⁷ Гирами кита-
барин жара йишваъра кІуро: «Шлиъ жида убччвнуш, Гъадгъаз
лигури хъиди».

Исаин беден накъвдиз ивуб

³⁸ Мидин къяляхъ, жугъдарин гъакимарихъан гучІури жиниди,
Исаин ученик гъаши Аримафейиан вуйи Юсуф кІурори Пи-
латдикан, Исаин беден ктагъуз ихтияр тІалаб апІуро. Пилатди
ихтияр тувиган, дугъу, душну, беден хачракан ктагъуру. ³⁹ Ми-
на, саб фулан йишвнуш жиниди Исаиихъна гафар апІуз гъафи



девлету кас Никодимра гъюру. Дугъу варж литр ицци ниль хъайи ягъарна, мирия рукнанна алоэ укIан кибикьнайи ччим хурпу. ⁴⁰ Жугъдарин накъвдик киврган, айдат вуйиси, дураги Исаин беден гъадму ягъар дизигнайи ирин кафнигъян гъибиржуру. ⁴¹ Иса дариз гъизигу йишвахь багъ хайи, хъа багъдий саркъан мегъел кивнадру накъв айи. ⁴² Султ йигъян улихъ хъайи йигъ вуди хъпаз ва накъв багахъ хайивализ дилигну, душващ Иса кивру.

*Исаин беден
накъвдиз имдар хъуб*

20 ¹ Гъяфтайн садпи йигъян гвачIинин ухди, мучIуди имиди, Магдалайиан вуйи Мар'ям накъвдихъна гъюру ва, дугъаз накъвдин айтIинди учIврушвахъ гъипнайи гъван гъидипнади рябкъюру. ² Думу жаргъури дуфну, Симон Петризна ва Исаин ккунди гъаши жара ученикдиз кIуру:

— Агъа накъвдиян гъурхну, агъдарчуз наана гъурхнуш.

³ Петрна гъадму ученик накъвдихъна жаргъуру. ⁴ Дураг кьюридра ккажагъуру, хъа ПетрIан тмуну ученик зарбди жаргъуйи, ва думу накъвдихъна сарпирди хъуркъру. ⁵ Думу ис алахъну лигурру, фу лигурва: душващ (майит диврушв'ин) кафнартIан адар, амма думу накъвдин айтI учIундайи.

⁶ Дугъахъна Симон Петрица хъуркъру. Думу накъвдиз учIвру — душващ дугъаз дипнайи кафан ва ⁷ Исаин кIул илибIнайи чIулар рякъюру. Му чIулар кафнихъан тина йишвахъ дидиржну дирчнайи. ⁸ Сифте накъвдихъна хъуркъу тму ученикра айтIна учIвру. Мураг гъяркъиган, думура хъугъру. ⁹ Аммаки дураг сабан Гирами китабарий дикибIнайибин гъаврий адайи. Хъа дураги, Иса чIиви хъиди, кIури дикибIна.

Иса чIиви хъуб

¹⁰ Ученикар хулац хътакуру.

¹¹ Хъа Мар'ям чIатинди дугъужвнайи ва ишурайи. Ва, ишурамиди, ис алахъну, накъвдизди лигурру, ¹² дугъаз, Исаин беден алди гъабши йишв'ин лизи ккурттар али кюор малайик рякъюру: сар кIулихъ жвурнахъинди, тмунур ликар гъашишвахъинди деънайи.



¹³ – Эй дишагыли, гъаз ишурава? – гъерху малайикари.

– Йиз Агъа гъурхну, хъа наана вуш, аыгъдарзуз, – жаваб ту-
ву дугъу.

¹⁴ Гъаму гафар кIурамиди Мар'ям къяляхъинди илтIикIуру, фу
лигурва: чан улихь Иса дийигъна. Аммаки думу му Иса вуйиб-
дин гъавриль ахъундайи.

¹⁵ – Эй дишагыли, гъаз ишурава? – кIуру дугъаз Исайи. – Фуж
агурава?

Мар'ямди, му багъбанчи вушул пну хиял дапIну, Дугъаз кIуру:

– Йиз ахюр, эгер уву Думу гъашв'ан адагъну гъурхнуш, йип
узукна, наан дитнуш, узу Думу гъадагъурза.

¹⁶ – Мар'ям! – кIуру Исайи.

Мар'ям илдицуру.

– Раввуни! (Жугъуд чалниинди: «Мялим»), – пну, чIигъ
апIуру Мар'ямди.

¹⁷ – Узук мукучан! – кIуру дугъаз Исайи. – Узу сабан Йиз
Адашдихъна хъадакнадарза. Уву, душну, Йиз чвийириз: «Узу Йиз
Адашдихъна ва ичв Адашдихъна, Йиз ва ичв Аллагъдихъна хъта-
кураза», кIура, йип.

¹⁸ Магдалайиан вуйи Мар'ям ученикарихъна гъюру ва дура-
риз кIуру:

– Узуз Агъа гъяркъюнзуз!

Ва дугъу чаз Исайи гъапиб кIуру.

Иса ученикариз ачмиш хъуб

¹⁹ Гъяфтайн гъадму садпи йигъан хябяхъган Исайин учени-
кар, жугъдарин гъякимдарихъан гучIбу раккнарра хъяркыну, саб
хулаъ уч духънайи. Мушваъ Иса учIвру ва дуралин арайиъ ду-
гъужвур:

– Мясяляйт учвуз! – гъапи Дугъу. ²⁰Дугъу Чан хиларна гъвал
улупуру. Агъа гъяркъю ученикар шад шулу.

²¹ – Мясяляйт учвуз! – текрап апIуру Дугъу. – Адашди Узу фи-
ци гъаънуш, гъаци Узу учвура гъэрзаза.

²² Гъамци дупну, Дугъу дурариин уф илитуру ва кIуру:

– Гирами Рюгъ къабул апIинай! ²³Учву шлин гунгъарилан хил
алдабгъиш, гъадгъан алдабгъну хъибди, хъа шлиин гъитиш, гъад-
ариин гунарг гъубзди.



Фомайин хътругърувал

²⁴, „КіятІях“ кІуру лакІам хъайи иицІикьюрикан Фома кІуру сар, Иса ачмиш шлуган, дураихъди хътай.

— Учуз Агъа гъяркъончуз! — кІуру дугъаз тмуну ученикари.

— Дугъан хилариин къумари гъиту урхъар дярякъди, дурарий узу йиз тІуб удрубччви ва йиз хил Дугъан гъвал’ан жидайи иди-пу зийниъ идривиди, мидихъ хътругъарза! — жаваб туvu дугъу.

²⁶ Саб гъяфтайилан Исаин ученикар хъанара уч шулу. Му разжари дураихъди Фомара хъайи. Раккнар хъяркънашра, хулаъ Иса учІвru ва, дурарин къялаъ дийигъну, кІуру:

— Мясляльт учвуз!

²⁷ Хъасин Фомайиз кІуру:

— ТІуб гъачІабкк! Магъа Йиз хилар. Хил гъачІабкк ва гъвалак зийниъ убччв! Ківахъни махъан, аммаки хъугъ!

— Йиз Агъа ва йиз Аллагъ! — гъарайниинди гъапи Фомайи.

— Узу хъугъунва, гъаз гъапиш Узу гъяркъонвуз? Аммаки хушбаҳтаврар ву гъадрар, Узу дярякъди, хъугъдар! — кІуру дугъаз Исаин.

Югъанди гъаз му китаб гъибикІну

³⁰ Исаин дурарин улихъ гъаму китабдиль дидикІну адру хъана гизаф айламатарра улупнү. ³¹ Аммаки гъаму вари дибиқІнайиб, учву Иса Месигъ вуйибдихъ, Думу Аллагъдин Бай вуйибдихъ хъугъри пну ва Дугъаҳъ хъугъбинди учвуз зат ккудуубукІру умур хъпан бадали дибиқІнайиб ву.

Иса ургур ученикдиз ачмиш хъуб

21 ¹Хъасин Тивериад гъюлин гъирағъдихъ Иса Чан ученика-риз хъана ачмиш шулу. Думу магъа гъамци гъабшиб ву.
² Симон Петр, КіятІях кІуру лакІам али Фома, Галилей улке-йиъ айи Кана шагъриан вуйи Нафанаил, Зеведейин кьюрид ба-яр ва Исаин кьюр жара ученикар — вари сатІиди уч шулу.

— Узу балугъар дисуз гъяраза, — кІуру дурализ Симон Петри.

— Учура увухъди гъюрча, — кІуру имбударира.



Дурар душну люткейиль эйру, аммаки думу йишван дурари фукIара гъибисундайи.⁴ Хъя аку хъуз хъюбъиган, гъирагъдихъ Иса дугъужвнайи. Саки му Иса вуйибин ученикар гъаврий ахънадайи.

⁵ – Дустар, лисуз фукIа-мукIа гъибисунчва? – гъерху дурари-хъян Исаий.

– Ваъ, – жаваб туву дурари.

⁶ – Чул люткейин арчулну гъвалхъанди ккипай, ва дисиди-чва, – кIуру Дугъу.

Дурари чул ккипру – гизаф балугъар ади хъпаз, дурарихъан чул ккадабгъуз шулладайи.

⁷ – Му Агъа ву! – кIуру Петриз Исаийин юкIв али сар учениди. Му Агъа ву пну гъеебхъубси, Петр чан гъяцIли жанди-ин али плащдин канчIар зина ккаъну, ийтIну, штузди урсру.

⁸ Хъя тмуну ученикар, балугъари абцIнайи чулра хъчиюбхюри, люткейильди гъирагъдихъна гъюру. Гъирагъдихъна ярхла дайи – варж метркъан. ⁹ Гъирагъдихъна ктучIиган, дурализ кархънайи аржлар рякъюру, дурариин балугъ илипнайи ва гъвалахъ уълра хъайи.

¹⁰ – Учву гъидистарикан сякьюбсанда балугъ акъинай, – кIуру дурализ Исаий.

¹¹ Симон Петри, люткейихъна душну, чIатху балугъарихъди абцIнайи чул хъчиюбхюру. Диidi варжна хъуцIурна шубуб балугъ айи. Ва гъамкъан гизаф балугъар ади гъахънушра, чул гъя-Чиябгъюндайи.

¹² – Деай гъириндин уъл ипIуз, – кIуру дурализ Исаий.

Ученикарикан сарира Дугъхъан, Думу фуж вуш, гъерхундайи. Думу Агъа вуйиб дураг дишла гъаврий ахънийи. ¹³ Исаий дуфну, гъадабгъну уъл, дурализ пай апIуру, ва балугъра пай апIуру. ¹⁴ Гъаму Иса, дукIину Чиви гъахъихъанмина, Чан ученикариз ач-миш шули шубубпи раж вуйи.

Исаийин Петрихъди улхуб

¹⁵ Дураги гъирин уъл ипIбалан къяляхъ, Исаий Симон Петриз кIуру:

– Я Югъаннайин бай Симон, увуз Узу гъамрализIан гизаф ккундуунуз?



— Ав, Агъа, узуз Уву ккуниб Увузра аыгъявуз, — жаваб туву Петри.

— Йиз ччилар уърх, — кIуру Исаий. ¹⁶Кьюбпи ражарира Исаий Петрихъан гъерхру:

— Я Югъаннайин бай Симон, увуз Узу ккундунуз?

— Ав, Агъа, узуз Уву ккуниб Увузра аыгъявуз, — жаваб туву Петри.

— Йиз марччарин гъайгъу зиг.

¹⁷Ва шубубпи ражарира Исаий дугъаз кIуру:

— Я Югъаннайин бай Симон, увуз Узу ккундунуз?

Дугъу, Учв ккундунуз кIури шубубпи ражнурат гъерхиган, Петриз иццу апIуру.

— Я Агъа, Увуз вари аыгъявуз, — кIуру дугъу Исаийз. — Узуз Уву ккуниб Увуз аыгъявуз.

— Йиз марччар уърх, — кIуру Исаий. — ¹⁸Гъякълу вуйи гъякъ кIуразавуз: уву жигъилди айиган, яв чIул уву идитIину, увуз ккунишваз гъягъюйва. Хъа къаби гъашиган, хилар гъатIарццидива, жарари яв чIул идитIиди ва увуз даккнишваз хъади гъа-хидиву.

¹⁹Гъаму гафариинди Исаий, Петри фициб айжалиинди Аллагъ адлу апIуруш, думу учв гъаврий ахъбан бадали, дугъаз чаз гъап-ний. Ва гъадму гафарихъан Петриз кIуру:

— Узухъди гъач!

²⁰Петр къяляхъинди илдицуру ва дугъаз Исаийн юкIв али ученик рякъюру. Дугъу хябяхъдин уъл ипIурайи вахтна Исаийхънаси гъачIарккну: «Агъа, Уву шли масу тувди?» — кIури гъерху гъадму ученик вуйи. ²¹Ва думура чпихъди гъюрайиб дяркъну, Петри Исаийхъан гъерхру:

— Я Агъа, хъа мугъкан фу хибди?

²²— Узуз думу, Узу хъадакну гъайизкъан, яшамиш шули гъузну ккунди шул. Хъа яв фу хъаяв дугъахъ? — жаваб туву Дугъу. — Уву Узухъди гъач!

²³Магъа гъаддиз гъардшарин арайиъ, думу ученик йикIур дар, кIуру хабар арабгънийи. Аммаки Исаий, думу йикIидар кIури гъапундайи. Дугъу анжагъ: «Узуз думу, Узу хъадакну гъайизкъан, яшамиш шули гъузну ккунди шул. Хъа яв фу хъаяв дугъахъ?» — гъамцитIан гъапундайи. ²⁴Думу гъадмууну ученик



вуйи, гъаму вариб ктибтур ва гъаму вари гъибикIур. Ва ухъуз альгъяхъуз, дугъан шагъидвал гъякълуб вуйиб.

²⁵ Исаи хъанара гизаф жара ляхнарра гъапIну. Эгер дураг вари хъайи-хъайиси дикIури гъашиш, вари дюн'яйиъра гъад-мукъан къадар китабариз йишв гъудрубкIрийи.



МАРЦЦИ ВАКИЛАРИН ЛЯХНАР

Гирами Рюгъну Лукайиантина ккебгъу «Ужувлан хабар» «Марци вакиларин ляхнар» Китабдиинді давам апIура. Му Китабра Фиофилин ччвур дубисну дубикIнайиб ву. Сифте Иса-ихъ хбугъри гъахыдарин уымрикан ктибтури, Иса Месигъдилантина Аллагъди гъаму дюн'яйиц ىИийиди ккебгъу ляхин, гъамусдихъантинара Исаин терефкәраринди давам хыбди. Гъаддиз, Иса чIиви духыну хьцIуд ийгълан, гъамицдар аъжайиб ляхнар арайиз гъюру: иицIикьюр вакилиз ва Исаихъ хбугъдариз Аллагъди Чан Рюгъ багъиши апIуру. Ва гъадмуган гизаф адмийириз Иса Месигъ дюн'я Уъбхур вуйиб аъгъю шулу. Ари гъаму касари Ерусалимдиц Исаихъ хбугърудар сатIи апIуру. Гъадму вахтнахъанмина хъюгъну, Исаихъ хбугърудар фици лихуйиш ва яшамиш шуйиш, Китабдиц ктибтура. Хбугърударин кIулиц айи фикрап ва апIру вари ляхнар дукIну чIиви гъаши Исаикан вуйи Ужувлан хабар неинки Ерусалимдиц, хъа гъацира дюн'яйин вари пIипIариз дебккбакан вуйи.

Месигъдикан вуйи Хабар рабгъбан аъхюну пай ляхин иллагъки Павели гъапIну. Китабдин аъхюбсиб пай, дугъу жара миллетарин арайиц фици Ужувлан хабар рабгъуйиш, гъаддиз баши дапIна. Мушвац Павелин сиягъятарикан ктибтура: думу гъаму рагсари, Турция ва Греция гъокуматар или жилариин лицури, гъеле Рим шагъризкъан гъушнийи. Му вакили, учв наан гъашиш, гъадушвац гъаммишан Аллагъди гъапIубдикан ва чан



улариз гъябкьюбдикан, инсанар уърхбан бадали, ктибтури гъахыну. Чаз вари мютІюгъ апІру гъадму къувватну вари дюн'я вуйибси Исаихъ хъугърударин къадар зарб апІура ва ин-саниятдиз уж'вал хура.

Иса чIиви хъуваликан

1 ¹Йиз сабпи китабдиъ, Феофил, узу Исаи гъапІу вари ляхнар ва улупу аygьювалар ктитунза, ²Дугъан уьмур, Дугъу Чан ученикарикан ктагъу вакилариз Гирами Рюгъналантина насигъятар тувну, Учв аyrшариз удучІвайиз, лап эвелиан хъюгъну улупунза. ³Учв дукІну чIиви гъахъихъантинара, Иса швнубсабан дурарин улихъна гъюри гъахыну ва Дугъу, Учв чIиви хъувал усбат апІури, хайлин шагъидвалар улупнуну. Учв чIиви гъахъихъантини ягъчІвур йигъандин арайиъ Чан вакилариз ачмиш шули, Дугъу дурализ Аллагъдин Паччагълугъдикан ктибтури гъахыну.

Иса аyrшариз удучІвуб

⁴Саб раЖари, вакиларихъди улихъ хъайи вахтна, Исаи дурариз амур апІуру:

— Ерусалим мидипанай, хъа Адашди тувурза гъапибдиз ккилигури гъузай, фицики Дугъу, учвуз Узкан гъеебхъубси, гъамци дупна: ⁵«Ягъ'яйи инсанар штуан апІури гъахыну, хъа учву багарихъди Гирами Рюгъниинди цIийи алаидичву».

“Хъасин дурагар вари сабишв’ина уч гъашиган, вакилари Исаихъян гъерхний:

— Я Агъя! Уву гъамус Израилиз паччагълугъвал дебкрадарнахъя?

⁷Исаи дурализ жаваб тувру:

— Адашди Чан гъюкмиъ таънайи вахтарна муддатар аygью хъувал ичв ляхин дар. ⁸Гирами Рюгъ учв’ина гъафиган, къувватну ацIичву ва Йиз шагъидар, сифте Ерусалимдиъ хъа вари Ягъудияна Самария уълкиириъ, ва гъацира тап дюн'яйин тмуну кIулизкъян, хъидичва.

Иса аyrшариз за хъуб

⁹Гъамци дупну, Иса, дурализ рякъюри, аyrшариз за гъахыну ва дифру Думу дураихъян ккеркру. ¹⁰Дурагар дикъатниинди завариз



лигури имиди, дуарин улихъна лизи ккурттар али кьюр жви ачмиш шулу. ¹¹ Дуарри гъапну: «Галилей уълкейин агъалайир! Завариз лигури, мушв'ин гъаз дийигъначва? Учвуз, Думу фици айршариз за гъахнуш, гъяркъюнчвуз. Ва гъадму Иса, учвуз айршариз за шули гъяркъиганси, къяляхъра гъиди».

¹² Хъасин вакилар шагърихъан саб километр манзилий айи Елион дагъдилан Ерусалимдиз хътаркуру. ¹³ Чпи дергнайишваз дуфну, дуар заан хулаз удучIвтуру. Душваш Петр, Югъан, Якъубна Андрей, Филипна Фома, Варфолемейна Матта, Алфейин бай Якъуб, Женгчи кIуру лакIам хъайи Симон ва Якъубдин бай Ягъуда айи. ¹⁴ Дуар вари сатIиди ккарагурайи. Дуарихъди Исаин дада Мар'ям, Дугъан чвийир ва гъацира сакьюр дишагълыир хъайи.

Вакил ктагъуб

¹⁵ Сакьюод йигълан Исаихъ хъугънайдар сабишв'ина уч шулу (душваш вари варжна къар касдихънакъан айи). Петри, ученикарин арайиъ дийигъну, кIуру:

¹⁶⁻¹⁷ — Эй йиз гъардшар! Гирами китабариъ Гирами Рюгъну Давудрин мелзналан дунайиб улубкыну ккунду: ухъухъди зегъмет дизигнайи, ухъкан сар вуйи Ягъудайи, Иса дисуз ккеяниайдар хъади гъиди, дибикIна. (¹⁸ Ягъудайи Иса масу тувну гъибису пулихъ хутIил гъадабгъну. Думу душв'ин кIулихъди алдак-ну гъакIну ва дугъан айтIишвар чатна адахъну. ¹⁹ Му ляхин Ерусалимдиз яшамиш шулайидариз варидализ аygюю шулу ва му хутIлиз жугъуд чалниинди Акелдама кIуру, яна «Ифдин хутIил»). ²⁰ Мяълиириин китабдиз мидин гъякънаан гъамци дибикIна:

«Дугъан жил ичIи ибшри,
душв'ин фужкIа яшамиш даришри». Ва хъанара:
«Дугъан иишв
жара касди бисри».

²¹⁻²² Гъаддиз ухъу Иса чиви хувалин шагъид гъаши сар жара кас кадагъну ккунду. Думура, Ягъ'яйи адмийир штуан апIуз хъюгъю вахтналан ккебгъну, Иса, ухъухъди хъади гъаши вахтра кади, тап айршариз удучIвайизкъан, гъарган ухъухъди гъашир духъну ккунду.



²³Хъя дураги къюр кас улупур: Варсава вая Юст кІури шлу Юсуф ва Матта. ²⁴Хъасин вакилари ккарагури гъапнийи:

— Я Агъа, Увуз гъар касдин кІваъ айиб альгъявуз. Гъаму къюрикан Уву фуж ктагъурууш, ²⁵яна учв гъягъюз лайикъ гъахы иишваз гъушу Ягъуда гъадахъу вакилвал шли гъабхурууш, учуз улуп.

²⁶Хъя дураги тупут ипу, ва Аллагъдин амриинди думу Маттайиз улубчІву. Гъамци Маттайикан, миди вуйи йицІисариканси, Исаин вакил шулу.

Аършариан Гирами Рюгъ гъюб

2 ¹ХъуцІдарин машквраз вари Исаин вакилар сабишв'ина уч гъахънийи. ²Сабпну завариан тІурфансиб микІлан сес шулу ва вакилар айи хал абцІру. ³Дурагин улихъна цІин мелзарстар гъядахъну, жара шули, гъаруриина саб алабхъуру. ⁴Хъя вари Гирами Рюгънахъди ацІру, ва жара чІаларииндиги улхуз хъюгъру, фицики гъаци хъувал дурагиз Гирами Рюгъну бахш гъапІнийи.

⁵Гъадму вахтна Ерусалимдиге дюн'яйин жюрбежюр юрдариан вуйи дингагыли жугъдар яшамиш шулайи. ⁶Гъадму сес гъабшиган, дураг уч шулу ва гизаф мюгътал шулу, гъаз гъапиш вакилаикан гъарсар дурагиз чан чІалниинди улхурайиси гъибгърайи.

⁷Вари гъайран ва аylамат духънайи:

— Мегер гъаму улхурайи касар вари Галилейин агъалайир вуйин? — кІури, чиб-чпин арайиъ гъерхрайи. — ⁸Дици вуш, ухъуз дураг ихъ бабан чІаларииндиги улхурайиси гъаз гъибгърайкІан?

⁹Ихъ арайиъ Парфияйин, Мидияйин, Эламдин ва Месопотамияйин, Ягъудияйин, Каппадокияйин, Понтайин ва Асияйин агъалайирра айихъ, ¹⁰Фригияйинна Памфилияйин, Египетдин ва Киринеийиз багахъ юрдариан ва Римдин агъалайирра, ¹¹гъацира Критдин, Аравияйин агъалайирра, жугъдара, дин къабул гъапІу аллагъсузарра айихъ — вушра ухъуз варидализ Аллагъдин зурба ляхнарикан дураги ихъ багъри чІаларииндиги ктитурайиганси ебхъурахъуз.

¹²Гъамци вари гъайран духънайи ва, дубхънайибин гъавриъ адрахъди, «Му фу ляхин вуйкІан?» кІури, чиб-чпигъ гъерхрайи.

¹³Хъя бязидари кялхъбахъди: «Дураги гизаф чяхир дубхънайи гъял ву», — кІурайи.



¹⁴ Гъадмуган Петри, йицІисаридра хъади гъудужвну, халкъди-хъинди илдицну, кІуру:

— Эй жугъдар ва Ерусалимдиз яшамиш шулайи вари агъал-ийр! Узу учву му ляхнин гъаври таъдиза. Йиз гафарихъ дикъат-луди хъебехъай! ¹⁵ Учву фикир апІурайиси, учу пиянди адарча, фицики гъеле гвачІининдин сяаыт урчІвубтІан дар. ¹⁶ Хъа учву гъурхуб Яил пайгъамбилилантина дибикІнайиб ву:

¹⁷ «Гъаци хъибди аъхиримжи йигъари, —

кІура Аллагъди, —

Узу Йиз Рюгъ вари инсанариина улурзида.

Ичв баярина шубари

аъяндар гафар пиidi

ва ичв живанаriz аъламатнан рякъбар рякъиди,

хъа ичв къабидариз

фагъумлу нивкІар рякъиди.

¹⁸ Ав, гъадму йигъари Узу Йиз Рюгъ

Йиз лукІариина:

гъам жилариина, гъамсана хпариина улурзида,

ва дурагира хъуз ккайиб улихъимиdi кІури хъиди.

¹⁹ Узу завариин ва жилариин

гъамцдар аъламатнан лишнар:

ифи, цІа ва кумран дифар — улупидиза.

²⁰ Ригъ — мучІу,

хъа ваз ифиси уьру хъибди,

Агъайн зурба ва адлу йигъ улубкайиз.

²¹ Агъайн ччвур дібисну ккарагу

гъарсар кас уърхиди».

²² Эй Израилин агъалайир! Гъаму йиз гафарихъ хъебехъай: Назаретдиан вуйи Исаийхъ Аллагъдин гъюкум хъайи. Аллагъди Чан гъюкум Гъадгъуантина гъапІу аъламатнан, аъжайиб ва зурба ляхнариинди улупну. Му учвузра аygъячвуз, фицики гъадму ляхнар ичв улихъ гъашидар ву. ²³ Аллагъди улупнайиганси Тувна-йир учву, къумариинди хачрак карсну, къанунсузарин хилариинди гъакІунчва. ²⁴ Хъа Аллагъди, аъжалин къюкъяр дармадагъин дапІну, Думу чиви гъапІну, фицики Думу аъжалихъан дерккуз гъабхуундайи.

²⁵ Фицики Давудри Исаикан гъамци кІура:



«Узуз Агъа гъарган йиз улихъ хъади рякъюразуз.

Дугъу, йиз арччул хилихъ дийигъну,
узы урхюрайи.

²⁶ Мид'ин йиз юкІв шад гъабхыну,
йиз мелзну гъарган Яв тяриф апІура.

Йиз беденра кмиди архаинвалий а,
ва узу умуд ктабтІурадарза,

²⁷ фицики Уву йиз рюгъ жегъеннемдій гъидрибтарва
ва Яв Марцци Кас накъвдій утІуз гъитидарва.

²⁸ Уву узуз уымрин рякъ ачуҳ гъапІунва,
Уву йиз улихъ хайивали узу шадвали ацІди».

²⁹ Эй йиз чвийир! Узхван учвуз ихъ абиирин аба Давудрин гъякънаан саб шак адарди пуз шулзухъан: думу гъакІну ва думу киву накъв гъийин йигъазкъан имихъухъ. ³⁰ Учв пайгъамбар вуди хъпаз дилигну, дугъаз, учв али тахтниина чан насларикан сардитуз Аллагъди аыгът дапІнайиваликан аыгъайи.

³¹ Дугъаз Месигъ гъачІихъан Чиви шлубдиканра аыгъяди гъабхъну, фицики дугъу гъамци кІура:

«Месигъ гъийихдарин паччагъалугъдійра гъитдар,
ва Дугъан беденра накъвдій убтІидар».

³² Аллагъди гъадму Иса Чиви гъапІну, ва учу вари мидин шағыдар вуча.

³³ Гъамус Думу а yrшариин Аллагъдин арччул хилихъ деъна. Дугъу Адаштихъан туурза дупнайи Гирами Рюгъ къабул гъапІну ва Гъадму, учвуз рябкъюрайиси ва ебхъурайиси, уч'ин улурзну.

³⁴ Давуд а yrшариз за гъапІундаршра, дугъу гъамци дупна: «Агъайи йиз Агъайиз гъапну: ³⁵ „Сабан Узу Яв душмнар Яв ли-карикк дахъайизкъан, Йиз арччул хилихъ деъ“».

³⁶ Гъаци вуйиган, аыгъю йибхъайки, эй Израилин халкъ, Иса-йикан Аллагъди Агъа ва Месигъ гъапІну, хъа учву Думу къума-риинди хачрак карсунчва!

³⁷ Му гафар гъеерхъиган, дуарин лап кІваз тясири гъапІнийи ва Петризна миди вуйи вакилариз дураги гъамци гъапнийи:

– Хъа учу гъамус гъапІча, гъардшар?

³⁸ Петри дурагиз кІуруки:

– Ичв гунгъар гардандій дидисну, уымур дигиши апІнай. Ва ичв гунгъарилан хил алдабгъбан бадали, гъарсар кас Месигъ



Исайин чвурнахъан штуан йихъай: гъадмуган учвуз Гирами Рюгъ пешкеш хъиди.³⁹ Му, учвузси, ичв веледаризра, сабан Аллагъдихъан ярхла вуйидаризра, Агъа Аллагъди, Чахъна дих дапI-найидаризра кади, тувнайи гаф ву.

⁴⁰ Петри «аъrbатанди яшамиш шулайидарихъан ихтият йихъай» кIури ва хъана жара гизаф гафариинди дурагиз ихтият хъуз дих апIури гъахъну.

Xъугънайидарин яшайши

⁴¹ Дугъан гафар къабул гъапIдар штуан гъахънийи; хъа гъадму йигъян хъугънайидарин къадар шубуд агъзур кас шулу. ⁴² Дураги, гъаммишан вакиларин аыгъюваларихъ хъпехъури, чpin арайиль сюгъбатар гъахури, сатIиди ипIури ва ккарагури, чpin вахт ада-пIури шуйи.

⁴³ Аллагъдихъан варидализ гучIуйи, ва Аллагъди вакиларилантина дурагиз аыхючIвеъ аыламатар ва айжайиб лишнар улупнийи.

⁴⁴ Хъугънайидар вари сатIиди гъузнайи, ва вариб дурагин ур-тахъди вуйи. ⁴⁵ Дураги чpin мал-мулк масу туври ва дарвал кайидариз пай апIури гъахъну. ⁴⁶ Дураг гъар йигъян Аллагъдин хулаз уч шуйи ва улра кмиди чpin хуларий сатIиди ипIуйи, сари-сариз разивалиинди хураг гъиври, шадди яшамиш шуйи.

⁴⁷ Гъацира дураги, Аллагъдин тяриф апIури, вари халкъ чпиҳъ-ди ужууди хъуб'ин шадвал хъапIри гъахъну. Ва гъар йигъян, Аллагъдихъ хъугънайидарихъна, гунгъариккан азад гъаши касар артухъ шуйи.

Петри ликур сагъ апIуб

З¹ Сабан Петрна Югъан лисхъан, сяйт шубуб шулайиган, ккарагуз Аллагъдин хулаз гъягъюрайи. ² Дурагиз учв бабкан гъашихъанмина ликар ккурсуз даршлу сар ликур рякъюру. Думу, чан дустари хури, гъар йигъян Аллагъдин хулан «Уччуу урна-рихъ» кIурушвахъ дитри шуйи. Дугъу дина гъорудариз садакъя ча кIури шуйи.

³ Дугъу, Аллагъдин хулан урнарихъна гъафи Петрна Югъан дяркъну, дурагиз садакъя ча кIуру. ⁴ Дураг дугъаз дикъатниинди лигуру ва Петри кIуру:

— Учухъинди лиг.



⁵Думура, чаз фукIа тувур кIури, дураихъинди лигуру. ⁶Амма Петри дугъяз гъапи:

— Узухъ арс, ясана гъизил хътарзухъ, хъа узуз айиб тувдизавуз: Назаретдиан вуйи Месигъ Исаин гъюкмиинди кIураза: гъудужвну гъара!

⁷Гъамци дупну, Петри, дугъан арччулну хил дибисну, дугъаз за хъуз кюмек апIуру. ⁸Гъадмуган ликурин ликар мюгъкам шулу ва думу гъедергну лицуз хъюгъру. Хъасин думу, ергури ва Аллагъдин тярифар апIури, дураихъди Аллагъдин хулаь учIвру. ⁹Варидариз думу, фици Аллагъдин тярифар апIури гъягъюраш, рякъюру ва ¹⁰думу, садакъа ча кIури, «Уччуу урнарихъ» деъну шлу ликур вуйиб аygъю шулу. Дугъан ликар сагъ хъувалиин адмийир русвагъ духънайи.

*Сулеймандин айвандихъ
Петрин улхуб*

¹¹Гъадму ликар сагъ гъаши кас Петрихъанна Югъандихъан гъудудучIви гъахънийи, хъа гъаму арайиъ мюгътал духънайи вари халкъ Сулеймандин айван кIурушвахъ дураихъна уч хъуз хъюгъру. ¹²Му гъял дябкъну, Петри кIуру:

— Израилин агъалийир, мид'ин гъаз аylамат духъначва? Гъаз учву учуз, му касдин ликар ич къувватниинди ва ужувиинди сагъ дапIайиси, лигурачва? ¹³Му Аллагъди гъапIуб ву: Ибрагъимдин, Исакъдин ва Якъубдин Аллагъди, ихъ абиирин Аллагъди Чан Гъараваш Иса адлу гъапIну. Хъа учву Думу йикIуз гъитунчва ва, Пилатдиз Думу азад апIуз ккун гъабшигган, Думу нигъ гъапIунчва. ¹⁴Марцци ва Гъякъулу вуйи Кас нигъ дапIну, адми гъачIи гъачагъ азад апIувал тIалаб гъапIунчва. ¹⁵Учву уьмур Туврайир гъакIунчва. Ари Гъадму Аллагъди, гъачIихъан, чииви гъапIну, ва учу мидин шагъидар вуча. ¹⁶Му кас Исаин къувватниинди сагъ духънайир ву, фицики учу Исаин къувватнахъ хъугънча. Учвуз гъаму кас аygъячвуз ва Исаихъан вуйи хъугъували думу сагъ апIувал магъа гъябкъюнчвуз!

¹⁷Амма узуз аygъязузки, йиз чвийир, му ляхнар ичв ахюда-ризси учвузра аygъдарди хъувалиан гъапIдар вуйичв. ¹⁸Аллагъди чан пайгъамбраин мелзналан Месигъдин аyzабарикан улихъми-ди гъапну ва гъаци гъапIнурा ву. ¹⁹Гъаци вуйиган, ичв тахсрар



гардандись дисай ва, ичв гунгъарилан хил алдабгъбан бадали, Агъайихынди илтИкай. ²⁰ Гъадмуган Агъайи учвуз шадвалар тувили ва учвухъна гъязур духънайи Иса Месигъ гъаъди.

²¹ Думу айршарийн Аллагъди Чан марцци пайгъамбрарин мелз-налан дупнайи вари ляхнар тамам апIайизкъан гъузди. ²² Фици-ки Муса пайгъамбри дупна: «Ичв Аллагъ вуйи Агъайи ичв чвийи-рин арайиан, узси, Пайгъамбар адаиди. Дугъу учвуз фу гъа-пишра, тамам апIинай». ²³ Ва гъадму Пайгъамбрихъ хъпебехъу гъарсар кас Аллагъдин халкъдин арайиан адаиди ва терг апIи-ди». ²⁴ Ав, Шамуил пайгъамбрилан ккебгъну, дугъхъанмина гъа-хъи вари пайгъамбари гъамцдар йигъар улуркъбакан улихъими-ди кIури гъахъну. ²⁵ Пайгъамбари улихъими дупнайи йикъар, Аллагъди ичв абирихъди гъийитIдар, учвуз дурукъна. Аллагъди Ибрагимдиз гъапнуки: «Яв тумралантине дюн’яйин вари инса-нариз ужувлар хъиди». ²⁶ Аллагъди сифте учвухъна, ичв чIуру ря-къариан адаъну, учвуз ужувлар хъпан бадали, Чав чIиви гъапIу Чан Гъараваш Иса гъаъна.

Петринин ва Югъандин суд

4 ¹Петрна Югъан халкъдихъди улхурайи вахтна, дуарин ба-гахъна маллайир, Аллагъдин хулан гъаравларин ахюдарна саддукайир гъафнийи. ²Петрина Югъанди халкъдиз Исайилан-тина гъачIидар чIиви хъуваликан аygъовалар улупура кIури, дуариз гизаф хъял кайи. ³Дураги, Петрна Югъан дидисну, са-рун хябяхъ хъпаз лигну, гвачIиндизкъан гъаравликкди урхюору. ⁴Аygъовалар гъеरхъдарикан гизафдар хъугънийи. Дуарин къа-дар хъуд агъзурихънакъан вуйи.

⁵Хъайигъан гъякимар, агъсакълар ва айлимар Ерусалимдиз уч шулу. ⁶Душваь ахюну малла Гъаннай, гъацира Каяфа, Югъан, Александр ва жугъдарин ахюну маллайнин тухмиан вуйи жа-радарра айи. ⁷Дураги, Петрна Югъан хъади духну, дуарихъан гъерхну:

— Фициб къувватниинди вая фуну ччурнахъан учву гъамци гъапIунчва?

— Гъадмуган, Гирами Рюгънахъди ацIну, Петри дуариз кIуру:

— Эй халкъдин гъякимдрарна Израилин кавхайир! ⁹Эгер учву айжуз адмийиз уж’вал гъапIну кIури ва, думу фици сагъ гъахънуш,



пуб гъи учкан жаваб тIалаб апIураш, ¹⁰учвуз варидализ ва вари Израилин халкъдиз аygъю ибшри, му, учву дариз гъизигу ва Аллагъди Чиви гъапIу Назаретдиан вуйи Месигъ Исаин гъунар-ниинди думу ичв улихъ сагъ духъну, дийигъна.

¹¹Думу,

устийири нигъ дапIну

ва хъасин мурчван кIулин гъван гъashi, Гъван ву.

¹²Фицики заварин кIанакк инсанарииз тувнайдарикан, ухъуз урхювал тувру, сарун жара ччвур ккадар.

¹³Жугъдарин тъякимдарииз Петринна Югъандин дирбаш'-вал дябкъну, дураг гъурхдар дару ва аьдати адмийир вуйивалин гъаври ахъну, гъаддин мюгътал духънайи. Дураг Исаийхъди гъахъидар вуйиб аygъю гъабхънийи. ¹⁴Исаин вакиларин гъва-лахъ сагъ дапIнайи адми дийигънайиган, сарун артухъ дура-рихъан гаф пуз гъабхъундайи. ¹⁵Петризна Югъандиз диванха-найиан удучIвуз буйругъ тувну, гъакимдари чпин арайиъ мяс-ляялт апIуру:

¹⁶— Ухъу мурарикан гъапIхъа, фицики Ерусалимдиль яшамиш шулайи гъарсар касдиз му аyxю аylамат гъапIуб ачухъ-ди аygъя, ва ухъхъан му гъапIундар пуз шулдар. ¹⁷Амма му аваза хъанара ярхлаз дарабгъбан бадали, Исаикан гъич сарихъдира дулухуз дурагииз гъадагъа апIидихъя.

¹⁸Ва дурагииз дих дапIну, Исаикан сарун саризра фукIа дарпуб ва аygъювалар улулупуб гъадагъа апIуру. ¹⁹Хъа Петрина Югъанди дурагииз жаваб тувру:

— Учву саб фикир апIинай: Аллагъдин улихъ АллагъдихътIан учвухъ артухъ хъпехъуб дугъри вуйинхъя? ²⁰Учхъан учуз гъяб-къюбиканна гъеебхъубикан дарпиidi гъитуз шулдарчухъан.

²¹Дураг, хъана гучIар ккальну, деетну. Гъаз гъапиш дурагииз жаза тувуз гъакимарихъан багъна аbgуз гъабхъундайи, фицики гъабхъибиз лигну, вари халкъди Аллагъдин ад апIурайи. ²²Сагъ гъashi касдин ягъчIвур йистIан артухъ вуйи.

Вакиларин ккарагувал

²³Деету Петрина Югъанди, чпиндарихъна дуфну, аyxюну малл-ирина кавхъири чпиз фу гъапнуш, ктибуру. ²⁴Мураг деерхъну, заварихъинди илдицну, Аллагъдиз варидари кIуру:



— Я Гъякимдар Аллагъ, Уву зав, жил, гъюл ва дюн'яйиъ айи гъарсаб яратмиш гъапIунва! ²⁵ Ич аба ва Яв лукI Давудрин мелз-ниинди Гирами Рюгъналанмина Уву гъапунва:

«Гъаз жара миллетар гъяясуз шулу?

Гъаз дурарий кIулиз удудучIвру ниятар а?

²⁶ Дюн'яйин паччгъар ва гъякимдрар

дяви апIуз гъязур духъна,

Агъайиз ва Дугъян Месигъдиз

къаршу вуди сабишв'ина уч духъна».

²⁷ Фицики дугъриданра мурагари, Гыиродна Понтий Пилат Израил халкъдихъди ва жара миллетарихъди гъаму шагърий Уву Месигъди ктагъу Яв Гирами Гъаравашдиз къаршу вуди уч гъахъну. ²⁸ Чин ляхнар кIулиз адагъуз уч гъашидаанинди Яв къаст-ниинди ва гъюкмиинди улупнайи ляхнар кIулиз удучIвну. ²⁹ Гъамус Уву лиг, Агъя, учуз гучIар ккаъри, дураги фиир кIураш, Яв лукIариз Яв гаф гучI дарди пуз кюмек апIин. ³⁰ Альзарлуирир сагъ апIури, аъламатар ва аъжайиб лишнар улупури, Яв Гирами Гъараваш Исайин ччвурнахъди Яв къувват улуп.

³¹ Ккарагбахъян, дураги али иишв тIубччуру ва дураги Гирами Рюгънахъди ацIру. Гъаддиз дураги Аллагъдин Гаф аьшкъниинди пуз хъюгънийи.

Bari urtakhъub vуйи

³² Вары хъугънайдар саб юкIви ва саб жанси гъахънийи. Ду-рагикан сарира чаз айи мал-мутмуйиз, йизуб ву, кIурдайи, хъя вариб дурагин уртакъуб вуйи. ³³ Вакилари зурба къувватни-инди Агъя Иса Чиви хъуваликан шагыйдвал апIури гъахъну. Дурагин Аллагъдин уж' вал алди гъабхъну. ³⁴ Дурагин арайиъ дарвал кайидар адайи, фицики мулкар вая хулар-йишвар айи-дари, дураги масу туври, пул хури шуйи. ³⁵ Хъя пул вакиларихъ-на тувуйи, ва дураги, шлиз фтин дарвал каш, гъубкIбан бадали пай апIийи.

³⁶ Месела, Киприй бабкан гъаши сар левит Юсуфди (вакилари дуғъаз Варнав кIуйи, яна «Ккарцур») ³⁷ чан хутIил масу тувну, дидихъ гъадабгъу пул дубхну, вакиларихъна тувнийи.



Ананайин ва Сапфираин кучIал

5 ¹Ананай кIуру сар касдина дугъян шив Сапфираи чин мулк масу тувру. ²Хъасин гъадабгъу пуликан, хпиризра аygъяди, саб пай гытIибкIуру ва имбуb дубхну вакиларихъна тувру. ³Гъадмуган Петри дугъаз кIуру:

— Ананай, гъаз яв кIван аыхювал апIуз иблисдихъди гытуунва, гъаз, Гирами Рюгъназ кучIал дапIну, жилихъ туvu пуликан гытIибкIунва? ⁴Масу тувайиз думу жил явуб дайнхъя? Ва гъадабгъу пулра яв ихтиярнаа адайнхъя? Мициб ляхин фици фикриз гъафнияв?! Уву адмийириз ваъ, хъя Аллагъадиз кучIал гъапIунва.

⁵⁻⁶ Гъаму гафар гьеерхъу Ананай алдакуру ва алиш'ин йикIуру. Хъя дуфну жигъилари, думу кивуз гъязур апIуру, хъасин кивуз адагъуру. Ва мидкан гьеебхъдарин гучIбаан зегъле гъябгъюру.

⁷ Мина шубуб сяльтналан гъабшибидикан хабар адру Ананайин шив гъюру. ⁸Петри дугъхъан гъерхру:

— Йип узуз, учву хутIил гъаму кыматнахъ масу тувинчвахъя?

Дугъу: «Ав, гъадмукъандиз тувунча» пну, жаваб тувру.

⁹ Гъадмуган Петри дугъаз кIуру:

— Уч'ан Агъайин Рюгъ ахтармиш апIуз фици удубкүунчвуан?! Гъатмагъя яв жилир кивдар, къяляхъ хъадакну, урчIарихъна дуфна. Дураги яв майитра гъабхиди.

¹⁰ Му дишагъли сабпну Петрин ликариккиндi алдакуру ва йикIуру. Хулаъ учIи жигъилариз думура дукIну рякъюру ва, духну, жилирин гъвалахъ кивру. ¹¹ Вари хъугънайдарик ва мидкан гьеебхъдарик зарди гучI кабхънийи.

Аллагъдин лишнар

¹² Вакилари халкъдин арайиъ гизаф аylаматарна айжайиb лишнар гъапIийи. Дураг гъарган вари сатIиди Сулеймандин айвандихъ хъади шуйи. ¹³ Жарадарикан гыч сарихъанна вакиларин багахъ хъуз шули гъабхъундар. Халкъди дурагин ад апIуйи.

¹⁴ Агъайихъ хъугънайи халкъдин — гъам жиларин, гъам дишагълиириин — къадар артухътIан артухъ шулайи. ¹⁵ Айзарлуиyrра кими, кючейиз адагъуюи, ахнар-леъфариин дитуйи, дилинтина гъягъруган, Петрин сиринкъян кубкIри кIури. Фицики дураг сагъ хъпан бадали гъадмура чIаян шул пну, дураги миж кивуйи.



¹⁶ Ерусалимдин аѣтрафарихъ хъайи шагъариан аѣзарлуйир ва жинар кучІвнайидар хури, инсанарин ахю дестійир гьюз хъюгъойи, ва варі сагъ шулира гъахъну.

Вакилар дисуб

¹⁷ Гъадмуган маллиирина ахюор ва дугъаҳъ хъайи саддукійир гъанихвалиан тІуркIури гъахъну ва ¹⁸ дураги вакилар, дидисну, жямаятлугъ дустагъдіш итру. ¹⁹ Хъа Агъайин Малайикди, иишвіну дустагъдин урчIар арццу ва, дураг адьыну, кIуру:

²⁰ — Душну Аллагъдин хулаъ халкъдиз цийи уымрикан варі кидибтай.

²¹ Му гафар деерхъну, дураг акв мілум шулайи вахтна Аллагъдин хулаъ учIвру ва халкъдиз аѣгьювалар улупуз хъюгъру. Маллиирина ахюори ва дугъаҳъди хъайидари, варі диванбейірна Израилин сихларин варі кавхайир суддиз уч апIуру, хъасин суддин гъаравлар дустагъдиз вакилар хуз гъаъру.

Диванбейірин улихъ

²² Вакилар хуз гъафидариз дустагъдіш фужкIара дихъурдар ва, хъадакну, гъафидари кIуру:

²³ — Учуз дустагъ мюгъкамди хъябкыну ва гъаравларра урчIарихъ дийигънади гъяркюнчуз, амма раккнар арциган, учуз душваъ касра гъидихъундарчуз.

²⁴ Му гафар гъеерхъиган, ахюону маллиир ва Аллагъдин хулан гъаравларин ахюор, му фу хабар вуйкIан кIури, мюгътал духыну гъузний. ²⁵ Хъасин сари дуфну кIуру:

— Учву дустагъдіш иту адмийир Аллагъдин хулаъ а ва халкъдиз дураги аѣгьювалар улупура!

²⁶ Гъадмуган гъаравларин ахюори, чан эскрарихъди душну, вакилар хъади гъюру. Вакилариз гуж апIуз эскрариз гучIуи, физики халкъди дурагиин гъван улюбхоб мумкин вуйи.

²⁷ Дураги вакилар диванбейірин улихъ дерккру. Гъадмуган маллиирина ахюори дурагиин гъерхру:

²⁸ — Учу учвуз Гъадму Касдин гъякънаан аѣгьювалар улупуб иж-мишнаан къадагъа гъапIундайинхъ? Хъа магъа, учву Ерусалим вуйиси Дугъкан аѣгьювалар рагъурачва ва Думу йикIбан тахсир уч'ин илипуз ккунди ачвуз.



²⁹ Петри ва вакилари жаваб тувру:

— Учу адмийиризт^{Іан} Аллагъдиз артухъди мют^{Іюгъ} духьну ккунду. ³⁰ Учву Иса, дариз дизигну, гъак^{Іунчва}, амма ихь абийрин Аллагъди Думу, гъач^{Іихъан}, Чиви гъап^{Іну}. ³¹ Аллагъди, Израилин халкъди чпин тахсрар гардандисъ дидисну гунгъарилан хил алдабгъуз гъитбан бадали, Иса Чан арччул хилихъна Альхурди ва ухбу Уърхрюорди за гъап^{Іну}. ³² Мидин шагыдар Чаз мют^{Іюгъ} шлудариз Аллагъди тувнайи Гирами Рюгъ ва учу вуча.

³³ Му гафар гъеерхъиган, диванбегийирик яманди хъял кубч^{Івру}, ва дурализ вакилар йихуз ккун шулу.

Гамалиилин насиғъят

³⁴ Къанунчийизси гъюрмат айи, диванбегийирикан Гамалиил к^{Іуру} сар фарисейи, али йишвлан за духьну, вакилар саб генреди суддиан адауз буйругъ тувру. ³⁵ Хъасин дугъу к^{Іуру}:

— Израилин агъалайир! Учву мурарикан гъап^{Іруш}, ужуди фикир ап^{Інай!} ³⁶ Ичв к^{Іваин} илмиш, сац^{Іиб} улихънаси, учв зурба кас вуза к^{Іури}, Февда к^{Іурур} гъядяхънийи ва юкъудваржъкан адми дугъахъди гъахънийи. Хъа думу йивну гъак^{Інийи}, дугъан терефкрап гъадаргънийи ва жварт^І гъахънийи. ³⁷ Дугъан къяляхъ, агъалайир гъисаб ап^{Іру} вахтна, Галилейиан Ягъуда гъядяхъну, дугъура чахъди хайлин халкъ жалб гъап^{Іну}. Думура йивну гъак^{Іну}, хъа дугъахъди гъушдарра вари гъубкъушвахъинди гъарагъну. ³⁸ Гъаддиз лигну, гъамус к^{Іуразачвуз}: гъадму касарихъан гъудуч^{Івай} ва дураг сикинди гъитай. Фицики эгер му ляхин инсанарин терефнаан вуйиб вуш, думу к^{Іулис} удубч^{Івидар}. ³⁹ Хъа эгер Аллагъдин терефнаан шулайиб вуш, учвхъан думу дебккузра хъибдарчвухъан, учву Аллагъдиз къаршудира хъуз мумкин ву.

⁴⁰ Диванбегари дугъан насиғъят къабул ап^{Іуру}. Хъасин вакилариз дих дап^{Іну}, дураг дурччвну, сарун Исаикан аygъовалар улупуз гъадагъа дап^{Іну}, деетуру. ⁴¹ Вакилар к^{Іуруш}, чпи Иса себеб вуди жазайикк ккуркъуз лайикълу хъуб'ин шад духьну, суддиан удуч^{Івну} гъягъюру. ⁴² Гъар йигъан Аллагъдин хулаъ ва адмийирин хуларий халкъдиз Иса Месигъдикан аygъовалар улупури, дураги Ужувлан хабар рабгъуру.



Ургур кюмекчи ктагъуб

6 ¹Вакиларин терефкрап артухъ хъпахъ, бинайиан грек чал'-инди улхурайи жугъдари Ерусалимдин жугъдари кан аэрзар апIуз хъюгъру. Дураги, гъар йигъян Ерусалимдин жугъдари кюмек пай апIру вахтна, Ерусалимдиан дару ачIни хпариз фикир тувири шулдар, кIуйи.

² Гъадмуган иицIикьюр вакили, вари ученикариз дих дапI-ну, кIуру:

— Учу Аллагъдин гаф гъибтну, кюмек пай апIуб ужу дар. ³Гъа-ци вуйиган, гъардшар, ичв арайиан ухъуз аygъюдар, Гирами Рюгъну ва фагъумлували ацIнайи ургур кас кадагъай. Дураги гъадму гъуллугъниин дерккдихъ. ⁴Хъа учу ккарагури ва Ужувлан хабар рабгъури хъидича.

⁵ Му теклифниин вари рази шулу. Дураги хъугъвали ва Гира-ми Рюгъну ацIнайи Стефан кIуру кас, гъацира Филип, Прохор, Никанор, Тимон, Пармен ва улихъди аллагъсуз вуди гъashi Ан-тиохияиан вуйи Николай ктагъуру. ⁶Мураг вакиларин улихъ дерккнийи ва, Аллагъдиз ккарагну, дурагиин хилар иливнийи.

⁷ Гъамци Аллагъдин гаф рабгъури, Ерусалимдиз хъугънайида-рин къадар артухъ шулайи, маллиириканра гизафдар Аллагъдихъ хъугъри гъахънийи.

Стефан дисуб

⁸ Хъугъвалий ва къувватналь аий Стефанди халкъдин арайиль зурба вуйи аylаматар ва аյжайиб лишнар улупуйи. ⁹Киринея-иан, Александрияиан, Киликияиан, Асияиан вуйидар ва Азадлуириин мистан терефкрап Стефандихъди гъюжатналь учIв-ру. ¹⁰Амма дураги хъан Стефандин фагъумлувал ва дугъак кайи Гирами Рюгъ ккагъуз гъабхъундар. ¹¹Гъаддиз дураги пул тувну бязи адмийир: «Учуз, дугъу фици Муса пайгъамбизна Аллагъ-диз люкънар апIурайиш, гъеебхъунчуз» кIури, пуз алауру. ¹²Ду-раги гъамци халкъдик, тухмарин кавхайирик ва аылимариk гъала-булугъ кипру ва, алархъну дидисну, Стефан аыхю суддиз хуру.

¹³ Душваз кучIлин шагъидарра хъади гъюру, ва дураги кIуру:

— Му касди сикин дарди Аллагъдин хулаz ва Къанундиз люкъ-нар апIура. ¹⁴ Учуз дугъу, Назаретдиан вуйи Исаий Аллагъдин



хал дабгъиди ва Мусайи ухьуз тувнайи айдатар гьюдохиди кIури, гьеебхъунчуз.

¹⁵ Суддисъ деънайидари Стефандин машналан ул алдабгъурдайи, фицики дурагиз дугъан маш малайикдин машси рябкюрайи.

Стефандин улхуб

7 ¹Гъадмуган жугъдарин ахюну маллайи гъерхру:

— Му гафар гъякъ вуйин?

² Стефанди жаваб тувру:

— Хъебехъай, чвийр ва айир! Ихъ аба Ибрагимдиз, гъеле чав Харрандись бин апIайиз улихъна, яна учв Месопотамияйиъ яшамиш шулайи деврий, къудратлу Аллагъ ачмиш гъахъну ³ ва гъамци гъапну: «Яв багъри юрд ва яв багахълурир гъитну, Узу улупу уълкейиз гъараҳ». ⁴ Ибрагимдира, халдеялуйирин уълке дипну, Харрандись бин гъапIну. Дугъан адаш кечмиш гъашихъан, Аллагъди Ибрагим гъамусяльтди учву яшамиш шулайи уълкейиз гъюз гъитну. ⁵ Аллагъди дугъаз ирс вуди жилин саб чIукI-къян тувундар, амма думуган Ибрагимдиз веледар адайишра, гележегдисъ дугъазна дугъан веледариз жил тувуз гаф тувру. ⁶ Аллагъди дугъаз гъапну: «Яв веледар яд ругариина гъафи гъурабийр хъиди ва дураг юкъудварж йисан лукIарди альзабнакк ва зулмикк ккади гъузди. ⁷ Дураг лукIариз илтIикIу халкъдин узу диван апIидиза, ва дураги, гъадму юрд дипну, гъамина дуфну, гъаму ругдииин Узуз икрам апIиди». ⁸ Аллагъди, Ибрагимдихъди йикъарар ийтбIлан лишан вуди, суннат апIлан айдат дугъаз багъиш гъапIну. Гъаддиз лигну, Ибрагимдикан Исакъдин адаш гъашиган, дугъу миржидпи йигъан Исакъдин суннат гъапIну. Исакъдикан Якъубдин адаш гъашиган, дугъура гъаци Якъубдин суннат гъапIну, дидхъантине Якъубди чан баяринна суннат гъапIну, хъа дурагикан гележегдисъ йицIикъюб сихлин ата-бабийр гъахъну.

⁹ Дураги, чпин чве Юсуфдин бахил духъну, думу Египет уълкейиз йисирвализ масу тувру. Хъа думу Аллагъдин кIваин илмиди гъахъну. ¹⁰ Аллагъди думу вари завалариккан урхюору, дугъаз зурба фагъумлевал ва Египетдин паччагъ дугъахъна ужузи янашамиш хъувал тувру. Паччагъди дугъакан вари Египетдин ва чан хусуси хулан гъакимдар гъапIнийи. ¹¹ Египетдиъна Ханаан юрданъ



гаш'вал абхъру, ва вари агъалиир зурба аъзабарикк ккуркьру. Ихъ абийиз ипIруб дубрихъри гъабхъну. ¹² Египетдис уъл а, кIури деебхъну, Якъубди дина ихъ абийир гъаънийи. Му дурари Египетдиз гъапIу сабпи сиягъят вуйи. ¹³ Дураг гъадина къубпи раЖари гъушиган, Юсуф чан чвиириз ачмиш шулу, ва Египетдин паччагъдиз Юсуфдин тухум аъгью шулу. ¹⁴ Хъя Юсуфди чан адаш ва вари багахълуиир хъади гъюз адми гъаъру. Дураг варии ург-Цурна хъур кас вуйи. ¹⁵ Якъуб Египетдиз гъюру ва ихъ абийир душваъ чпин аъжал хъубкъайиз яшамиш шулу. ¹⁶ ГъачIихъан, дурагин майтар багъри юрдана айи Сихем кIуру шагъриз духну, Ибрагимди Хаморин баярихъан арсрахъ гъадабгъу накъвдис ивру.

¹⁷ Аллагъди Ибрагимдиз тувнайи гаф тамам апIру вахт багахъ хъубахъ, Египетдис айи жугъдарин къадар гъюблан-гъюбаз артухъ шули гъабхъну. ¹⁸ Аъхириш Египетдин тахтниина, Юсуф аъгъдру жара паччагъ гъафнийи.

¹⁹ Дугъу ихъ халкъ аъмал кади ишлетмиш гъапIну ва ихъ абийиз гужар тувну. Дурагин бицIидар, пуч хъубан бадали, чIурагиз гатIахъуз мажбур апIури гъаъхъну. ²⁰ Гъадму вахтна Муса бабкан шулу. Думу Аллагъдиз къабул шлу бай гъаъхъну. Думу шубуб вазли чан адашдин хулаъ дадайн мухрихъ шулу, ²¹ хъя думу гатIахъиган, паччагъдин шуру гъадагъуру ва чахъ, чан байси, тербияламиш апIури. ²² Мусайиз Египетлуиирин гъадмугандин илмар аъгью гъаъхъну. Думу улхбариъ дилавар, ляхнариъ бажаранлу кас вуди гъаъхъну.

²³ Мусайнин ягъчIтур йис гъабхъиган, гъардашлугъ жугъдарииин улукъуз дугъан кIваз гъюру. ²⁴ Чан гъардширакан сарик Египетдин агъали кялхъради ва дугъаз йивуради дяркъну, дугъхъанди духну, Мусайи египетлу йивну йикIуру.

²⁵ Мусайи, чан халкъдиз чалантина Аллагъди азадвал гъапIра-йивалин дураг гъаври ахъуршул пну, фикир гъапIнийи, амма дураг гъаври ахъундайи. ²⁶ Хъайигъан дугъаз хабарсузди чиб-чпик кархънайи къюр жугъуд рякъюру ва дугъаз дураг, гъамци кIури, мясялятнахъна хуз ккун шулу: «Эй инсанар, учву гъардшар вучва, гъаз учву сари-сариз гиран ктапIурачва?» ²⁷ Амма чан багахълуииз гиран ктапIурайири, Мусайиз хъизигну, кIуру: «Уву ич аъхюорди ва диванбегиди шли дерккунув?» ²⁸ Накъ Египетлуси, узура йивну йикIуз ккунди ануз?» ²⁹ Му гафар гъеерхъиган, Муса



Египетдиан гъергну, Мадиам юрданъ гъурабайиси чаз бин ккебгъру. Душувь дугъаз кьюр байра шулу.

³⁰ ЯгъчІвур йис улдучІвхъан, ичИ чюлий Синай дагъдин дугъаз чан улихъ угбурайи зазун рукчин ялавнягъ малайик рякърю. ³¹ Му гъяркъю Муса мюгътал шулу. Хъа ужуди тамаши апІбан бадали рукчиз багахъ хъуз хъюгъиган, дугъаз Агъя Аллагъдин сес ебхъуру: ³² «Узу яв абириин Аллагъ, Ибрагымдин Аллагъ, Исакъдин Аллагъ ва Якъубдин Аллагъ вуз!» ГучІбаан гукІни духнайи Муса рукчиз лигуз даршули гъахъну. ³³ Гъадмуган Агъайи дугъаз кIуру: «Яв ликарилан илдит, фицики уву дийигънайиш Аллагъдиз гирами жил ву. ³⁴ Узуз Египетдиз Йиз халкъдиз зулмар апІуроди рябкъоразуз, дураин сузириин агъузар ерхъоразуз ва дурап азад апІуз жилиина кудучІвназа. Гъаци вуйиган, Узу уву хъана Египетдиз гъаъразаву».

³⁵ «Уву ич альюрди ва диванбегиди шли дерккну» пну, жугъадри нигъ гъапІур гъадму Муса ву. Угбурайи зазун рукчигъ Аллагъдин малайик гъяркъю, Аллагъди малайикдилантине жугъдарин гъякимдарди ва азад апІуроди гъаурра гъадму Муса ву. ³⁶ ЯгъчІвур йисан Египет жилариин Узру гъюлихъ ва ичИ чюлий альаматар ва альжайиб лишнар улупури, дурап Египетдиан адаурра гъадму Муса ву. ³⁷ Израилин баяриз: «Ичв Агъя Аллагъди учвухъна ичв чвириин арайиан, узуси, Пайгъамбар гъаъди» гъапирра гъадму Муса ву. ³⁸ ИчИ чюлий уч гъашиган, Израилин халкъдихъ хъайир, чахъди Синай дагъдин малайик гъулхур, Чиви гафар къабул гъапІур, дурап ухъухъна рукбуз гъитур, ихъ абирихъди хъади гъаширра гъадму Муса ву. ³⁹ Ихъ абириз дугъахъ хъебехъну хъуз ккун гъабхъундар, думу нигъ дапІну, Египетдиз хътакуз ккун гъабхъну. ⁴⁰ Дурапи Гъарундиз гъапнү: «Ухъу дина хъади гъягъюз ухъуз идолар кадаъ, фицики ухъу Египетдиан адау Мусайихъди фу гъабхънуш, альгъдархъуз». ⁴¹ Гъадмуган дурапи идол вуди кIарисиб кадапІну, дидиз гъурбнар хури ва чпи гъапІубдин кан шадлугъар апІури гъахъну. ⁴² Аллагъди дураихъан маш гъадабгъуру, ва дурапи завун идолариз гъурбнар хури икрамар апІуру. Пайгъамбраин Китабдиз гъамци дикинайиси гъабхъну:

«Израилин халкъ!

ЯгъчІвур йисан ичИ чюлий

урккру ва ургру гъурбнар



учву Узуз хури гъахъунчвахъа?
⁴³ Ваъ, учву икрам апІбан бадали,
 учвухъди Молоҳдин чадур,
 ичв Ремфан-идолин хяд,
 ичв ктау идолар гъахури гъахъунчва.
 Гъаддиз лигну, Узу учву
 Вавилон сяргъятарилен тина гъайдиза».

⁴⁴ Ихъ абири, ичИ чюлиъ лицурайи ваҳтна, йикъарнан гира-
 ми Чадур гъабхури гъахъну. Думу Чадур Мусайи, Аллагъди чаз
 улупу чешнейинди гъапІну. ⁴⁵ Ихъ абири Гъисайин хиликкди
 чпин абирилан гъурубкъу гъадму чадур гъабхури гъахъну. Ду-
 рари, Аллагъди улихъди жара халқъар ултІуркку жил гъибисну.
 Гъамци Давудрин йигъар улукъайиз гъабхънийи. ⁴⁶ Давуд Аллагъ-
 диз ккунир гъахъну. Думу, Якъубдин Аллагъдиз хал дивбан ба-
 дали, ккарагну.

⁴⁷ Хъя Агъайиз хал Сулейманди дивру. ⁴⁸ Анжагъ ВаритІанзаа-
 нур хилариинди диву дараматариъ яшамиш шлур дар, фицики,
 пайгъамбри дунайиганси:

⁴⁹ «Аършар Йиз тахт вуйиз,
 хъя жил – Йиз ликарин кІан.
 Фициб хал Узуз дивуз шулчвухъан? –
 кІура Агъайи, –
 Ясана Йиз эргвал йивру йишв наан а?
⁵⁰ Му вари Узу яратмиш гъапІуб даринхъа?»

⁵¹ Эй, Аллагъдиз юкІвар бахш апІуз ва Дугъахъ хъпехъуз дакк-
 ни фурсачий! Учву гъарган Гирами Рюгъназ къаршу удучІуву-
 рабча, учву ичв абирилдар вучва. ⁵² Ичв абири пайгъамбари-
 кан фуж утІуркундар? Дураги Гъякълур гъюваликан улихъмиди
 хабар гъапІу пайгъамбрарра гъийихну, гъамус гъадму Гъякълур
 учву масу тувну гъакІунчва! ⁵³ Аллагъдин малайикари учвуз туву
 Къанундиз мютІюгъ гъахъундарчва.

Стефан йикІуб

⁵⁴ Му гафарихъ хъпехъурайи жугъдарин гъякимдраги хъюлу ур-
 гури, силбари жакъракъар апІурайи. ⁵⁵ Гирами Рюгънахъди ацІ-
 наий Стефан завузди лигуру, ва дугъаз Аллагъдин гъайбатна Ду-
 гъян арччулну хилихъ дийигънайи Иса рякъюру. ⁵⁶ Дугъу кІуру:



— Магъя, узуз атIарццнайи айршарна Аллагъдин арччул тереф-наль Инсаниятдин Бай рякъюразуз.

⁵⁷ Гъякимдари чИигъар апIури, чин ибариъ тIубар урччуу. Хъасин дугъ’ин алархуу. ⁵⁸ Дураги, Стефан шагырин гырагъ-дихъна духну, дугъ’ин гъван уълюбхюз хъюгъру. КучIлин шагы-дари Саул кIуру сар жигъилихъ чин палтар уърхюз гъитнийи. ⁵⁹ Дураги Стефандиин гъван уълюбхнайиган, Стефанди ккарагу-ри гъапи:

— Я Агъя Иса! Йиз рюгъ къабул апIин!

⁶⁰ Хъасин къамкъариина ис духьну, зарбди чИигъ апIуру:

— Я Агъя! Дурагин гъаму гунгъилан хил алдабгъ!

Гъамци дупнуу, дугъан нефес улдубтIуру.

Саул хъугънайидарихъ хъерхуб

8 ¹Стефан йикIбин Саул рази гъахънийи. Гъадму йигъян Еру-салимдиль айи хъугънайидарихъ зурбади хъергбар ккергъни-йи ва дураг, вакилар ктарди, вари Ягъудия ва Самария уълкйир вуйиси гъарагънийи.

² Стефандиз вафалу вуйидари, дугъ’ин ишлар дапIину, думу накъвдик кивнийи.

³ Хъа Саули, хъугънайидар терг апIуз ккунди, гъардин хуларий учIви, жилар, хпар дисури, дустагъдиль итуйи.

Филип Самарияйиъ

⁴ Чин иишвариан утIурккну, гъар иишвариъ гъадаргъу хъугъ-найидари Ужувлан хабар рабгъуйи. ⁵ Гъаци, Филип Самария кIу-ру шагыриз гъюру ва Месигъдикан аygъювалар улупуру. ⁶ Дугъан гафар деерхъну, дугъу гъапIу айламатар дяркъну, халкъди сабхил-ди Филипди гъапиб аннамиш апIуз хъюгъру. ⁷ Гъаз гъапиш, ду-гъу гизафдариан чИигъар апIурайи жинар адаъну ва аyxюЧIвеъ паралич кайидар, ликудар сагъ гъапIину. ⁸ Ва гъадму шагыриз зур-ба шадвал абхънийи.

⁹ Самарияйиъ улихъдира сюгъюрчывалар апIру ва мид’инди вары мюгътал апIру сар Симон кIуру кас айи. Дугъу учв зурба касси улупуйи. ¹⁰ Дугъахъ хъпехъу варидари кIури шуйи:

— Му касдиъ «Зурба Къувват» кIуру аллагъдин къудрат а. ¹¹ Ду-гъу хайлар вахтна инсанар чан сюгъриинди гъайран апIрган,



дугъахъ хъугъри шуйи. ¹² Хъа халкъар Аллагъдин Паччагълугъ-дикан ва Месигъ Исайикан аьгьювалар улупурайи Филипдихъ хъпехъуз хъюгъиган, жилар ва хпар штуан шулу. ¹³ Гъадму Симонра хъугънийи ва, штуан духыну, гъарган Филипдихъди шули гъахъну. Дугъу улупурайи аьламатар ва аьжайиб лишнар рякъюри, думу учвра гъайран шуйи.

Петрина Югъан Самарияйи

¹⁴ Самарияйин агъалиири Аллагъдин Гаф къабул гъапIну, кIури гъеебхъу Ерусалимдъ аий вакилари, дурарихъна Петрна Югъан гъаъру. ¹⁵ Дураг, дина дуфну, тазади хъугънайдари Гирами Рюгъ къабул апIри пну, ккарагуру. ¹⁶ Фицики дураг Агъа Исайин ччвурнахъди штуан духынашра, Гирами Рюгъ дурарикан сари-ра къабул дапIнадайи.

¹⁷ Гъадмуган Петрина Югъанди дурариин хилар иливуру ва Гирами Рюгъ къабул апIуру. ¹⁸ Вакилари хилар иливиган, дураги Гирами Рюгъ къабул гъапIуб дябкъну, Симонди вакилариз пул теклиф апIури, ¹⁹ кIури:

— Узу шлиин хил иливишра, дугъу Гирами Рюгъ къабул апIруси, уузра гъациб гъюкум чавайчва.

²⁰ Петри дугъаз кIуру:

— Яв пул кIулик кубкIрияв, гъаз гъапиш уву Аллагъдин ба-гъиши пулихъ гъадабгъуз ният гъапIунва. ²¹ Ич ляхнарин иштиракчи хъуз лайикъ дарва, фицики яв юкIв Аллагъдин улихъ дугъри дар. ²² Гъаддиз яв чIуру ният гардандъ бис, дидлан хил алдабгъ-бан бадали Аллагъдиз ккараг, белки, Дугъу увлан хил алдабгъур. ²³ Гъаз гъапиш рякъюразузки, яв жан күтIкъли бахилвалихъди абиIна ва уву гъякъсузвали йисир дапIнаву.

²⁴ Гъадмуган Симонди жаваб туvu:

— Учву гъапибикан фукIара уз’ин улулубкъбан бадали, Агъа-ийиз ккарагай.

²⁵ Петрна Югъан, Исайикан шагъидвал дапIну ва Агъайнин гаф аьгьювалиинди улупну, Ерусалимдиз хътакуру. Гъюру рякъю-ди дураги Самария уылкейин гъуларикан гизафдариъ Исайикан Ужувлан хабар рабгъуру.



**Филипди
хасижви хъугъувалихъна хуб**

²⁶ Агъайн малайикди Филипдиз кIуру:

— Гъязур духыну, кыблайихъинди, Ерусалимдиан Газа кIурушваз ичИ чюлиантана гъябгъорайи рякъюхъна гъарах.

²⁷⁻²⁸ Филип, гъязур духыну, гъягъору. Дугъаз рякъю Эфиопия-йин, Кандакия ччвур али паччагъ дишагълийн девлет убхру, бегларикан вуйи эфиоп хасижви алахъуру. Думу Ерусалимдиз икрам апIуз душну хътакурайир вуйи. Дугъу, фургъниъ деъну, Ишая пайгъамбрин китаб урхурайи. ²⁹ Гъадмуган Гирами Рюгъну Филипдиз кIуру:

— Фургънихъна душну, гъаддихъди гъуз.

³⁰ Дирихъна гъушиган, Филипди, дугъу Ишая пайгъамбрин китаб урхури деебхъну, гъерхру:

— Урхурайибдин гъаври ахърана?

³¹ — Узу фици гъаври ахъзахъя? Узу шликIа гъаври тIаърайин-хъя? — жаваб тувру дугъу ва Филипдиз фургъниз чан гъвалахъна теклиф апIуру.

³² Дугъу Гирами китабариан гъамцдар гафар урхурайи:

— Думу убккуз гъабхурайи марччи вуйи
ва ултIубкъурайи марччилихънин улихъ
сессуз агълижиси
Дугъу Чан ушв абщундайи.

³³ Думу инсан вуди гъисаб апIурдайи.

Думу гъякъ вуйи диван апIбахъан
мягърум апIури гъахъну.

Фуж Дугъан заманайиндарин ниятарин гъаври ахъди?

Фицики дюн'яийин Дугъан уьмур къатI гъапIну.

³⁴ Хасижву Филипдихъан гъерхру:

— Узу увкан пуб ккун апIураза: мушваъ пайгъамбри шликан кIура — чакан, даршиш жаарикан?

³⁵ Гъадмуган Филипди, мушваъ Исайикан кIура, дупну, Гирами китабдин гъадму иишвлан ккебгъну, Ужувлан хабар ктибтуз хьюгъру.

³⁶ Рякъ давам апIури, дурагъ штухъна гъюру ва хасижву Филипдихъан гъерхру:



— Магъя шидра: узуз штуан хъуз фти машат апIидихъя? [37]*

³⁸ Дугъу фургъун дебккуз буйругъ тувру, кьюрида штуу учIвру ва Филиппи думу штуан апIуру.

³⁹ Хъя штуан удучIвган, Агъайин Рюгъну Филип гъадагъуру, хасижуваз думу сарун гъяркъондайи ва дугъу шадди рякъ давам апIуру. ⁴⁰ Филип, кIуруш, Аштод шагърий адиг шулу. Дугъу, шагъриан шагъриз гъягъюри, Къайсарияйиз гъайизкъан, Ужувлан хабар рабгъури гъахъын.

Саул хъугъувалихъна хуб

9 ¹Му арайиль Саул, Агъайин ученикариз гучIар ккаъри, дурагийхуз ккунди хъергнайи. Думу жугъдарин маллайирин ахюрихъна гъягъюру. ²Дугъхъан Саули Дамаскдий айи жугъдарин мистариз вуйи кагъаз бисуру. Диidi душваъ, жилар вушра, хпар вушра, Исаин терефкраг алахъиган, дураг дидисну, йитIну, Ерусалимдиз хуз ихтияр тувуи. ³Думу Дамаскдиз багахъ шулагъиган, сабпну завариан аквну ккаъру. ⁴Думу жил'ина алдакуру ва чаз кIурайи сес ебхъуру:

— Саул, Саул! Уву Узухъ гъаз хъергнава?

⁵ Дугъу: «Агъя, Уву фуж вува?» — пну гъерхиган, Агъайи жаваб тувру:

— Узу уву хъергнайи Иса вуза. ⁶ Гъудужвну, шагъриз гъарах ва уву душваъ, фу дапIну ккундуш, пишивуз.

⁷ Дугъахъ хъайи адмийирин мюгъталвалиан чIал гъибиснийи, фицики дурагиз, сес ебхъурашра, фужкIа рякъорадайи. ⁸ Жилилан за гъахъи Саулиз, улар арциган, фукIара рябкъюри гъабхъундар. Думу дугъахъ хъайдари, хилхъан дидисну, Дамаскдиз хъади гъюру. ⁹ Думу шубуд йигъан дярякъри, дирипIри ва дурхъри гъахънийи.

¹⁰ Дамаскдий Ананай кIуру Исаин ученик айи. Агъайи дугъаз аյжайиб рякъбинди гъапнийи:

— Я Ананай!

Дугъу:

*^{8:37} Грекарин саспи БикIбарий кIуру: «Хъя Филиппи гъапи: „Эгер уву яв варии юкIв хъипну хъугъраш, штуан хъуз шулвухъан“. Хъя дугъу гъапи: „Узу хъугъурза – Иса Месигъ Аллагъдин Бай ву“».



— Гъай Агъа! — пну, жаваб тувру.

¹¹Агъайи дугъаз кIуру:

— Гъудужвну, «Диш кюче» кIуру кючейиз гъарах ва Ягъудайин хулаь Тарсдиан вуйи Саул кIуру кас гъерх, думу гъамусяльт ккарагура.

¹²Дугъаз аյжайиб рякъбиинди, дугъан улар сагъ апIуз дуфну, дугъ'ин хил иливури Ананай кIуру кас рякъюру.

¹³Ананайи жаваб тувру:

— Я Агъа! Гъадму касди Ерусалимдиль Яв халкъдиз гъапIу чIуру ляхнарикан гизаф деебхъназуз. ¹⁴Гъаминара думу, жугъдарин ахъюн маллиири гъаъну, Увухъ хъугънайидар вари дисуз дуфнайир ву.

¹⁵Хъа Агъайи дугъаз кIуру:

— Гъарах, фицики паччгъарин, жугъдарин ва жара халкъарин арайиъ Йиз ччвур адлу апIуз думу кас Узу кадагъунза.

¹⁶Узу дугъаз, Йиз ччвурнахъди фукъан азаб дизигну ккундуш, улупидиза.

¹⁷Ананайи, душну, гъадму хулаь Саулиин хил иливну, дугъаз кIуру:

— Саул чве, мина гъюру рякъюъ увуз гъяркъю Агъа Исаий узу, яв улар сагъ апIбан ва Гирами Рюгъну ацIбан бадали, гъаъназу.

¹⁸Гъамци гъапибси, дугъан уларилан ханцI алдабхъиганси шулу ва дугъаз рябкъюз хъюбгъру, хъасин думу штуан шулу. ¹⁹Хъа дугъу уыл ипIуру ва дугъахъна къувват гъюру.

Саули Дамаскдиль аъгъювалар улупуб

²⁰Дугъан Дамаскдиль ученикарихъди садшвнуд йигъ шулу, хъасин дугъу Иса Аллагъдин бай вуйиваликан, жугъдарин мистариз гъягъюри, аъгъювалар улупури гъаъну. ²¹Дугъан гафар гъеерхъкъандар вари мюгъталь шуйи ва кIуйи:

— Му кас Ерусалимдиль Исаиз ккарагурайидар вари терг апIурайи гъадму Саул дайнинхъя? Думу мина, дураг дидисну, жугъдарин маллиирин ахъюдалихъна гъахуз дуфнайир дайнинхъя?

²²Хъа Саулин къувват артухътIан-артухъ шулайи ва дугъу, Иса Месигъ вуйивал тасдикъ апIури, Дамаскдиль яшамиш шулайи жугъдар русвагъ апIурайи.



Саул аъжаликан ккадархъуб

²³Хайлин йигъар улдучІвхъан, жугъдари думу йикІуз йикърар апІуру. ²⁴Дурагъар йигъ-йишвди шагърин урнарихъ дугъаз ккеньи, аммаки Саулиз дурагин къастнакан аъгью шулу. ²⁵Ученики, йишвну дуфну, думу жагваъди шагърин цаллансина Чатинди эрхру.

Саул Ерусалимдиз хъуб

²⁶Саул Ерусалимдиз гъафиган, дугъаз Исаин ученикарик ктикъуз ккун шулу, амма дурагиз дугъхъан гучІури гъахъну, физики дурагъар, му Исаин ученик ву пну, дугъахъ хъугъри адай.

²⁷Гъадмуган Варнавди думу вакиларихъна хуру ва дурагиз, Саулиз Агъа фици гъяркънуш, Агъайи дугъаз фу гъапнуш, Саули Дамаскдий фици дирбашди Исаикан аъгьювалар улупнуш, ктибтуру. ²⁸Дидхъантине Саул дурагихъди гъузру ва Ерусалимдий, азадди лицури, Агъа Исаикан ачуҳъди аъгьювалар улупури шулу. ²⁹Думу грек Чалниинди улхру жугъарихъди гъюжатариш шулу, хъа дураги думу йикІуз къаст апІуру. ³⁰Гъардшариз мидкан аъгью дубхъну, думу, Къайсарияйиз духну, гъадушв'ан багъри Тарсдиз рякъю аъру.

³¹Гъамци вари Ягъудия, Галилей ва Самария уълкийр вуйиси хъугънайдар саламат ва хъугъувалиш мюгъкам шули гъахъну. Агъайихъан гучІ'вал хъади ва Гирами Рюгъну кюмек апІури, вакиларин ученикарин къадар артмиш шули гъабхъну.

*Петри
паралич кайшер сагъ апІуб*

³²Шагъриан шагъриз гъягъюри, Петр Лидда кІуру шагъриш айи хъугънайдариин улукъуру. ³³Душваш дугъаз Эней кІуру, ришвуз даршули, миржид йисан ахниш ахънайи сар кас дихъуру.

³⁴Петр дугъаз кІуру:

— Эней! Месигъ Исаи уву сагъ апІура. Яв ахниккан гъудужв!

Энейра дишла гъудужвуру. ³⁵Лиддайш ву Сарондий айидариз варидализ му рябкъюру ва дурагъар Агъайихъ хъугъру.



Петр Тавифа чIиви апIуб

³⁶ Яффайиъ Тавифа (грек чалниинди Доркас, яна «Жейран») кIуру сар хъугънайи дишагъли айи. Дугъу, ужувлар апIури, ка-сибарииз садакъийр тувуйи. ³⁷ Гъадму йигъари думу кетIерццуу йикIуру. Думу, дижикIну, зинн хулаъ гъитру. ³⁸ Хъя Лидда Яффайихъан ярхлаъ дархъбаз лигну, Петр Лиддайиъ айиваликан деебхъну, ученикари дугъахъна: «Къан дарапIди гъач», – кIури, кьюр кас гъаъру.

³⁹ Петр, гъязур духъну, дурарихъди гъюру. Петр гъафиган, думу зинн хулазди гъахуру ва ачIни хпар ишури дугъан гъаншариз гъюру. Дурари чипиз Тавифайи гъидирху ккуруттар улупуру.

⁴⁰ Петри дураг хул'ан адауру ва, къамкъариина ис духъну, ккара-гуз хъюгъру. Хъасин гъачIирихъинди илдицну, кIуру:

– Тавифа, гъудужв!

Дишагълии улар арццуу ва, Петр дяркъну, за духъну деъру.

⁴¹ Хил гъачIабккну, Петр дугъаз гъудужвуз кюмек апIуру. Хъасин вари хъугънайидариз ва ачIни хпариз дих дапIну, дурализ чиши духънайир улупуру. ⁴² Мидкан вари Яффайиз аьгъю шулу, ва гизафдар Агъайихъ хъугъру. ⁴³ Хъя Петр дидхъантана хайлин йи-гъари Яффайиъ гъидкъарин уста Симондихъ гъузний.

*Петр Корнилий кIуру
Римдин юзбашииыхъ хъуб*

10 ¹ Къайсарияиъ Корнилий кIуру сар кас яшамиш шули гъахъну. Думу Италияиин къушмарин юзбаши вуйи. ² Думу, чан вари хизанси, Аллагъдихъан гучIури шлур ва Аллагъдиз вафалу жви вуйи. Дугъу жумартвалиинди касибарииз садакъа ту-вуйи ва гъаммишан Аллагъдиз ккарагүйи. ³ Айжайиб рябкъбинди йигъну, сяйт шубуб шулайи арайиъ, дугъаз Аллагъдин малайик чан улихъна дуфну ачуҳъди рякъюру. Малайикдира дугъаз: «Корнилий!» – пну, дих апIуру. ⁴ Дугъу, гучIра дубхъну, малайикдихъинди дилигну: «Фу кIурава, Агъя?» – пну, гъерхру. Малайикди дугъаз жаваб тувру:

– Яв ккарагбар ва яв садакъийр Аллагъди кIваин гъюрхну. ⁵ Гъа-мус, Яффайиз гъаъну, Петр кIурайи Симондиз дих апIуз гъит.

⁶ Думу гъюлихъ хал хъайи гъидкъарин уста Симондихъ дергна.



⁷ Малайик гъудучІвиган, Корнилийи чан кьюр гъаравшиз ва Аллагъдин рякъюь айи сар эскриз дих апIуру ⁸ва, дурагиз гъабшибдикан кидибтну, дураг Яффайиз гъаъру.

⁹ Хъайигъан лисун шули, дураг шагыриз багахъ шулайи вахтна, Петр ккарагуз гъваин улучIвуру. ¹⁰ Дугъаз гаш шулу ва дугъу уъл ипIуз къатIъ апIуру. Хураг гъязур апIури имиди, думу аъжайиб гъялназ гъюру. ¹¹ Дугъаз, аършар атIарццну, юкъиб ПипПари-хъанна шли-вуш дубиснайиси ахю суфрасиб саб шейъ жилиина ис шули рябкъюру. ¹² Дид'ин гъар жюрейин жилилан гъягъру гъяйванатар, битIар-чурчлар ва завун ничхрап алди рякъюрайи.

¹³ Петрихъна сес шулу:

— Гъудужкну, дурккну итIин, Петр! — кIуру.

¹⁴ Петри:

— Дициб дарапIарза, Агъа, гъаз гъапиш саб вахтнара чIуру ва марцц дару мутму гъипIур дарза, — жаваб тувру.

¹⁵ Дугъаз думу сесну къюбпи ражари кIуру:

— Аллагъди марцц гъапIуб марцц даруб вуди гъисаб мапIан.

¹⁶ Гъамци шубуб ражари текрар шулу, хъасин дишла вари хъана завариз зигуру.

¹⁷ Петри, гъябкъюбдин мянайикан фагъум апIури имиди, Корнилийи гъау адмийир, Симондин хулар гъерхри, дугъан урнарихъна дуфну дийигъуру. ¹⁸ Дураги зарбди гъерхру:

— Петр кIуру Симон гъаму хуларий дергнайн?

¹⁹ Петри гъябкъюбдикан фагъум апIури имиди, Рюгъну дугъаз кIуру:

— Узухъ хъебехъ, узу шубур касди агура. ²⁰ Гъудужв, улдучIв ва, саб фикирра кадарди, дурагихъди гъарах, фицики дураг Узу гъаъназа.

²¹ Петри, улдучIвну, гъадму касариз кIуру:

— Учву агурайир узу вуза. Учву гъаз дуфнайдар вучва?

²² Дураги жаваб тувру:

— Учу юзбashi Корнилийи, вари жугъдари гъормат апIурайи гъякълу ва Аллагъдихъан гучIру касди, гъаунчу. Марцци малайикди дугъаз, увуз чан хулаз дих апIуз ва яв гафарихъ хъпехъуз, амур дапIна.

²³ Хулаz теклиf дапIну, Петри дураг хялижв апIуру. Хъайигъан рякъ'ин духъну, Петр дурагихъди гъягъюру, ва Яффайиан сакъюдар гъардшарра дугъахъди хъахъру.



²⁴ Хъайигъан думу Къайсарияйиз хъуркъру. Корнилий, чан ма-
йиларна багахълу дустар уч дапІну, дурагиз ккилигурайи.

²⁵ Петр хулаъ учІврган, улихъна удучІву Корнилийи, дугъан
ликарикк дахъну, икрам апІуру.

²⁶ – Гъудужв! Узу анжагъ увусир инсан вуза – кІури, Петри
думу за апІуру.

²⁷ Дугъахъди сюгъбат апІури, Петр хулаъ учІвиган, дугъаз
душваъ ахюочІвеъ халкъ уч духъну рякърю. ²⁸ Петри дурагиз
кІуру:

– Учвуз аygъячвузки, жугъудриз жара миллетдиндарихъди тти-
кІуб вая дурагинн улуркъуб гъадагъа вуйивал. Аммаки Аллагъди
узуз гыч сар адмикъана кифир, ясана марцци дарур вуйиб гыи-
саб дарапІуб табшурмиш гъапІунзуз. ²⁹ Гъаддиз лигну, узуз тек-
лиф гъапІумитІла, Чалкъан дарпиidi мина гъафунза. Гъаци ву-
йиган, учвхъан гъерхраза: узуз гъаз дих дапІначва?

³⁰ Гъадмуган Корнилиий кІуру:

– Юкъуд йигъ мидиз улихъна, лисхъан сяльт шубуб шули, гъа-
му вахтна, узу йиз хулаъ ккарагурайза. Сабпну йиз улихъ аку
палтар али сар кас ачмиш гъахъну ³¹ ва дугъу узуз гъамци гъапнү:
«Корнилий, яв ккарагувал аршариз деебхъна ва уву касибарииз
туvu садакъиir Аллагъди кІваин дюрхна. ³² Гъаци вуйиган, Яф-
файиз Петр кІуру Симон хъади гъюз адми гъаъ, думу гъюлихъ
яшамиш шулайи гъидкъарин уста Симондин хулаъ хялижвди
дергна». ³³ Узура дишлади увухъна гъаунза, ва гъюб ужу гъапІун-
ва. Гъамус ухъу вари Аллагъдин улихъ дийигънахъа, ва Агъайи
увуз йип гъапибихъ хъпехъуз учу гъязур вуча.

Петрин улхуб

³⁴ Гъадмуган Петр дурагиз кІуру:

– Дугъриданна аygъю гъабшиуз, Аллагъ адмийиrin машназ
дилигрур вуйиб. ³⁵ Дугъу Чахъан гучІур va гъякъ вуйир, фуну
миллетдин адмийиir вушра, къабул апІура. ³⁶ Дугъу Месигъ Иса-
йин мелзналантина Израилин халкъдиз мясяльтнан ужуб хабар-
накан гаф гъапІну. Думу варидаrin Агъа ву. ³⁷ Улихънаси Ягъу-
дияйиъ гъаши гъядисийирикан, Ягъ'яйи Галилейиъ улупу штуан
апІувалихъан ккергъу гъядисийирикан аygъячвуз. ³⁸ Гирами Рюгъ
ва къувват туvu, Аллагъди Месигъ гъапІу Назаретлу Исаийиан



аъгъячвуз. Аллагъ гъарган Исаихъди гъахъну ва Иса варишвари ужувлар апIури ва иблисдин гюокмикк ккайикъандар вари сагъ апIури, лицури гъахъну. ³⁹ Учу Дугъу Ерусалимдиз ва вари жугъдарин улкейиль гъапIкъан ляхнарин шагыдар вучча. Думу, гакIвлин хачрак къумарихъди карсну, гъакIну. ⁴⁰ Хъа дукIну шубудпи йигъан Аллагъди Думу чIиви гъапIну, ва Думу инсанарихъна ачмиш шуйи. ⁴¹ Анжагъ Думу варидализ варь, хъа Аллагъди улихъими ктагъу шагыдализ, яна Думу чIиви гъашихъан, Дугъахъди ипIури-убхъури гъаши учустIан, улупну, ачуухъ гъапIундар. ⁴² Аллагъди чIивидарин ва гъийихдарин зиин Диванбеги вуди дерккнайир гъадму Кас вуйиваликан инсанариз аъгъювалар улупуз ва дидин шагыдвал апIуз учуз амур гъапIну. ⁴³ Вари пайгъамбари, Дугъахъ хъугъу гъарсарин гунгъарилан Дугъан ччвурнахъан хил алдабгъиди кIури, Дугъкан шагыдвал апIури гъахъну.

*Жугъуд дарудари
Гирами Рюгъ къабул апIуб*

⁴⁴ Петр улхури имиди, дугъахъ хъпехъурайидарина Гирами Рюгъ гъору. ⁴⁵ Петрихъди гъафи суннат дапIнайи хъугънайидар, Аллагъди Чан Гирами Рюгъ жугъуд дарударизра тувбии мюгътал духънайи. ⁴⁶ Фицики дурализ гъаддари фици, жара чIалариинди улхури, Аллагъдин ахювалин тяриф апIураш, ебхурайи. Гъадмуган Петри кIуру:

⁴⁷ — Мурази ухъузси Гирами Рюгъ багъиш гъабхъну. Гъаддиз штухъди штуан хъуз дурализ шлихъан гъадагъа апIуз шул?

⁴⁸ Ва дугъу дураг Месигъ Исаин ччвурнахъан штуан хъуз гъитру. Хъасин дурарира Петркан чпихъди сакьюдар йигъари гъузуб тIалаб апIуру.

Петр Ерусалимдиз хътакуб

11 ¹Вари Ягъудия улкек вуйиси Исаин вакилариз ва гъардшариз, жугъуд дарударира Аллагъдин Гаф къабул гъапIну кIури, ебхуру. ²Ва Петр Ерусалимдиз гъафиган, жугъдари дугъаз тягънийир гъивнийи:

³ — Уву суннат дапIну адрударин хулариз гъягъюри ва дурарихъди улихъ деъри гъахъунва!



⁴ Гъадмуган Петри вари гъаши ляхнар хъайи-хъайиси ктитуз хъюгъру:

⁵ — Яффа шагъриъ, ккарагурайи вахтна, аյжайиб рябкъбиинди юкъуб пИлпIахъан дибиснайиси саб аыхю суфрасиб аршар-риан йиз улихъинди ибхи гъябкъюнзуз. ⁶ Узуз дид'ин жилилан гъягъру гъяйванатар, нахшрап, битIар-чурчлар ва завунничхар гъяркъзуз. ⁷ Хъасин гъамцдар гафар кIурайи сес гъеебхъунзуз: «Петр! Гъедужвну, дурккну итIин!» ⁸ Хъа узу жаваб тувза: «Затра дициб дарапIарза, Агъа, фицики гъич саб вахтнара чIуру ва марцциб дару мутму гъипIур дарза». ⁹ Сесну зав'ан къюбпи раЖари гъапизуз: «Аллагъди марцц гъапIуб марцциб даруб вуди гъисаб мапIан». ¹⁰ Гъамици шубуб раЖари гъабхънийи, ва хъана вари аршариз гъизигнийи. ¹¹ Му арайиъ дишлади узу дергнайи хула-рихъна Къайсарияйиан узухъна гъайнайи шубур кас гъафни-йи. ¹² Ва Гирами Рюгъну узуз, шаклу даршиди, гъадрарихъди гъягъюз амур гъапIинийи. Узухъди гъаму йирхърид гъардшарра гъафну. Учу Корнилийин хулаз гъафунча. ¹³ Дугъура учуз, чаз фици марцци малайик гъяркънуш ва малайикди фу гъапнуш, ктибтнийчуз: «Яффайиъ аий Петр кIуру Симон хъади гъюз ад-мийир гъаъ. ¹⁴ Дугъу увуз увува варив яв хизан уърхру гафар пи-дивуз», — кIури.

¹⁵ Узу улхуз хъюгъиган, сифте ухь'инси, дурариина Гирами Рюгъ гъафниийи. ¹⁶ Ва йиз кIваина думуган Агъайи гъапи гафар гъафниийиз: «Ягъ'яйи инсанар штуан гъапIину, хъа учву Агъайи Гирами Рюгънахъди цИийи апIидиччу». ¹⁷ Гъаци вуйиган, эгер Аллагъди, Агъа вуйи Месигъ Исаийихъ хъугъу ухъузси, жугъуд дарударизра Гирами Рюгъ багъиш гъапIинуш, Аллагъдиз машат апIуз узу фуж вухъя?

¹⁸ Му гафар гъеерхъиган, дурари гъерхбар дерккру.

— Рябкъюрайиганси, Аллагъди жугъуд дарударизра цИийи умур бадали чпин тахсрар гардандисъ дисуз ихтияр тувну, — кIури, дурари Аллагъдин ад апIуру.

Антиохияйин хъугънайидар

¹⁹ Хъа Стефандин вахтари, зулмар дапIину, утIуркку хъугънайидар, жугъдариztIан дарди Ужувлан хабар рабгъури, Финикия, Кипр ва Антиохияихънакъан хъуркънийи. ²⁰ Хъа Киприан ва



Киринейиан вуйи хъугънайидарикан сакьюдари, Антиохияйиз дуфну, жугъуд дарударихъдира сюгъбатар апIури, Агъа Исаикан Ужувлан хабар улупури гъахьнийи. ²¹Дурарихъди Агъайн къудрат хъайи ва гъаддиз гизафдар, хъугъну, Агъайихъинди илтIикIинийи.

²² Мидкан аваза Ерусалимдин хъугънайидарихъна рубкыру ва дураги Антиохияйиз Варнав гъаъру. ²³ Аллагъди му адмийириз уж'вал дапIну дябкъну, дина гъафи Варнав шад шулу, ва Аллагъдиз КIваантIан вафалу хъувалий дугъу дураг ижми гъапIинийи. ²⁴ Фицики думу Гирами Рюгъну ва хъугъвали ацIинай кас вуйи. Натижайиъ лап гизаф халкъ Агъайн терефкрап шулу.

²⁵ Хъасин Варнав Тарсдиз Саул агуз гъягъору ²⁶ ва, дагну, Антиохияйиз къяляхъ хъади гъору. Душваш дураг сад йисан гъузнийи ва, хъугънайидар уч шлушваз Варнавна Саул гъори, дурагиз альгювалар улупури шуйи. Гъаддихъанмина гъадму Антиохияйиъ Исаин ученикариз сифте вуди «христианаар», Яна «Месигъдин терефкрап» пуз хъюгъну.

²⁷ Гъадму вахтна Ерусалимдиан Антиохияйиз пайгъамбрар гъору. ²⁸ Дурарикан, Гирами Рюгъну гъевесламиш дапIинай сар Агав КIуури, вари дюон'яйи зурба гаш'вал абхъди КIури, хабар дебккнийи, ва гъаци Клавдийи паччагъвал апIурайиган гъабхънора вуйи. ²⁹ Думуган Исаин ученикари, гъарури чаан удукурубкъян, Ягъудия уылкейиъ айи чин гъардшариз кюмек апIуз къатIъ гъапIинийи. ³⁰ Дураги, кюмек уч дапIну, Варнавдихъди ва Саулихъди хъугънайидарин ахюдарихъна хътапIинийи.

Гъирод хъугънайидарихъ хъергуб

12 ¹ Гъадму вахтари паччагъ Гъирод хъугънайидарикан сакьюдарихъ хъергуз хъюгъру. ² Дугъу буйругъ тувну, Югъандин чве Якъуб ханжлихъди йивну йикIуру. ³ Хъа му ляхин жугъдариз хушди дябкъну, Петра дисуру. Му Лавшарин машкварган гъабшиб вуйи. ⁴ Петр дидисну, дустагъдиль итру ва ю-юкъурди эскрар айи юкъуб дестейиз думу, нубатар апIури, гъаравликк уърхюз буйругъ тувру, фицики дугъу Пасхайн машкврахъан Петр халкъдин улихъна диван апIбан бадали адагъуз ният дапIинай. ⁵ Петр дустагъдиль ул алдадабгъри уърхюрайи, хъа хъугънайидар дугъхъанди Аллагъдиз ккарагурайи.



Петр азад хъуб

⁶ Гыирадди думу халкъдихъна адауз ккайи йигъ хайиз йишвну, Петр, кьюр эскрин арайиль зунжрахъди дитІнайир, даахна-йи. Хъа дустагъ хурнарихъ хъайи гъаравлари убхюрайи. ⁷ Сабпну дустагъдиз Агъайн малайик гъюру ва душвайиш аквну абцI-ру. Петрик хил кучну, «Ухди гъудужв!» – пну, малайикди думу хъиргру. Ва дугъан хилариин али зунжрар алдахъуру. ⁸ Хъа малайикди Петриз кIуру:

– Юкъв’ан идибI ва ликариин алахъ.

Петри гъаци гъапIиган, малайикди кIуру:

– Чуха хъипну, узухъди гъач.

⁹ Малайикди апIурайи му ляхнар, гъякъкъатдиз дарди, аъжа-ийб рябкъбииндиги шулайидарси гъигъри, Петр дугъан къяляхъди удучIвтуру.

¹⁰ Сабпи ва кьюбпи жергейин гъаравларихъан гъудучIвну, ду-рар шагъриз гъягъру урнарихъна гъюру. Хъа чиб-чиплан ар-ццу урнариан дураги удучIвтуру. Саб кючейиан удучIвиган, малайик сабпну дургру ва Петр сарди гъузру. ¹¹ Чан фикрихъна гъафи Петри кIуру:

– Гъамус дугъриданра, Агъайи, Чан малайик гъаъну, узу Гъи-роддин хилккан ва жугъдари уз’ина хуз ккайи варি бала-къазий-риккан уърхюб гъябкъюнзуз.

¹² Му аъгвалат аннамиш дапIну, Петр Маркра кIуру Югъандин дада Мар’ямдин хуларихъна гъюру. Душваш хайлар халкъ уч духь-ну, ккарагурайи. ¹³ Петр урнарик кучиган, Рода кIуру гъараваш риши удучIвтуру ва дугъу, думу фуж вуш, гъерхру. ¹⁴ Хъа Петрин сес аъгъю дубхъну, шадвалиан урнар арцуз гъархну, думу хулаш архъру, ва, урнарихъ Петр дийигъна пну, хабар тувру. ¹⁵ Дугъаз: «Уву яв фикирнахъ хъана?» – кIуру, амма шуру чан гафар гъякъ вуйиб хъана тасдикъ апIуру. Дураги шураз: «Думу Петрин рюгъ вушул», – кIуру. ¹⁶ Петри урнар урччувуб давам апIури шулу ва, урнар арцуну, чпиз Петр гъяркъиган, варি мюгътал шулу.

¹⁷ Хили ишара дапIну, дурагиз ккебехъ дупну, Петри, учв Агъа-ий дустагъдиан фици аданьуш, ктибуру, хъа кIуру: «Мидкан Якъубдиз ва миди вуйи гъардшариз кидибтай». Хъасин дилин думу жара йишваз гъягъюру.



¹⁸ Йигъ улубкъуради, эскрарин арайиъ, Петр нашдикІан кІури, ахю гъалмагъал абхъру. ¹⁹ Гыродди Петр агури гъахъну, амма дугъаз думу гъидихъундар, ва дугъу, эскрарихъан силис гъадабгъну, дураг дариз зигуз буйругъ тувру. Хъасин Гырод Ягъудия улкейиан Къайсарияйиз гъягъюру ва саб къадар вахтна гъадушваъ гъузур.

Гыроддин аъжал

²⁰ Гыроддиз Тирин ва Сайдайн агъалирикан гизаф хъял кайи. Дураги Гыроддин дахъру хулан гъуллугъчи Власт чин терефназди илтІикІну, дугъан кюмекниинди вары паччагъихъна дуфну, дугъкан мясляйт гъитуб ккун апІуру, гъаз гъапиш дурагин уылке Гыроддин вилаетдикан итІру сурсатариинди асилду вуйи.

²¹ Гюрюшмиш шуз улупнайи йигъян Гырод, паччагъвалин палтар алди, тахтниин деъру ва халкъидихъди улхуз хьюгъру. ²² Халкъди дугъаз: «Му инсандин ваъ, хъа Аллагъдин сес ву!» – кІури, Чигъар апІури гъахъну. ²³ Хъа Гыродди му гафар лайикъ вуйидарси къабул апІуру, амма Аллагъдин ад гъапІундар. Мидиз лигну Аллагъдин малайикди дугъаз йивуру, йикІуру ва думу мялхъвяри хътигІуру.

²⁴ Аллагъдин Гаф рабгъури, хъугънайдарин къадар артухъ шулави. ²⁵ Варнавна Саул, Ерусалимдигъ чипиз туву табшуругъ тамам дапІну, чпиҳъди Марк кІуру Югъан хъади, Антиохияйиз хътакуру.

Варнавдинна Саулин гъуллугъ ккебгъувал

13 ¹Антиохияйин хъугънайдаригъ гъамцдар пайгъамбрар ва мялимар гъяйи: Варнав, КІаруч кІуру Симеон, Кириней-ийиан вуйи Луций, юкъур паччагъидикан сар Гыроддихъди сатІиди тербияламиш гъапІу Манаил ва Саул. ²Дураги Агъайиз гъуллугъ апІури, ушвар дидиснайи вахтна, Гирами Рюгъну кІуру:

— Узуз Варнавна Саул жара апІнай, гъаз гъапиш дураги Узу чипиз пуз ккайиб тамам апІиди.

³ Дураги ушвар дидисну, ккарагну, Варнавдинна Саулиин хилар иливну, деетуру.



Варнавна Саул Киприин хъуб

⁴Гирами Рюгъну гъаъну, дураг Селевкияйиз гъору, хъа душв'-ан Киприина сирнав апIуру. ⁵Саламиндиз дуфну, дураги жугъдарин мистариъ Аллагъдин Гаф рабгъуру. Дураихъди кюмек апIури, Югъаннара хъайи.

⁶Вари Кипр вуйибси душну, тму кIулихъ хъайи Пафосдиз гъуркугъан, дурагиз Варисус (Елима) кIуру сар жугъуд сюгъюрчи – кучIлин пайгъамбар, гъахъру. ⁷Думу Кипр вилаятдин ахюр вуйи фагъумлу кас Сергей Павелин гъуллугъчи вуйи. Сергей Павели, Варнавна Саул хъади гъюз гъитну, дурагикан Аллагъдин Гаф ктибтуб ккун апIуру. ⁸Хъа Елимайи (ччурнан мяна «сюгъюрчи» вуй) гъар жюрейин манигъвалар апIури, Сергей Павел хъугъувалихъан ярхла апIуз чарийр зиггийи. ⁹Гъадмуган учвра Павел вуйи Саули, Гирами Рюгънахъди ацIну, дугъахъинди ижимиidi дилигну, ¹⁰кIуру:

– Агъ хаинвалина писвали абцIнайи иблисдин бай, дугъривалин душман! Уву Агъайнин диш рякъяр цАркувал фила ккутIдива? ¹¹Узухъ хъебехъ! Гъамус Агъайи магъа ув'ин хил иливна, курдухъну, саб ваҳт хъайиз, ригъ рябкъидарвуз.

Сабпну дугъан улариин дерин мучIушин улубчIвуру ва думу, учв хъади гъярур агури, минди-тинди илтIикIури, лицуру. ¹²Му гъядиса дябкъну, Агъайнин аygъуваларииин альамат духъну, Сергей Павел хъугъуру.

Писидияйин Антиохияйиз

¹³Павел ва дугъахъди хъайдар, Пафосдиан сирнав гъапIдар, Памфилияйиль айи Пергия шагъриз гъору, хъа Югъан дураги хъан жара духъну, Ерусалимдиз хътакуру. ¹⁴Пергияйиантана дураги чин рякъ давам апIури, Писидияйин Антиохияйиз гъору. Султ йигъан дураг, жугъдарин мистаз дуфну, душваъ деъру. ¹⁵Мусайин къанун ва пайгъамбариин китабар урхбалан къяляхъ, мистан ахюдари дураги хъана гъамци пуз гъаъру:

– Гъардшар, эгер ичв халкъдиз тувру насигъят аш, йипай.

¹⁶Гъадмуган гъудужкну, хил за дапIну, Павели кIуру:

– Израилин халкъ ва Аллагъдихъан гучIрудар, хъебехъай!

¹⁷Израилин халкъдин Аллагъди ихъ абийр ктагъну ва Дугъу



ихъ халкъ, дураг гьеле Египетдий гъурабийирди имиди, заан гъапІну ва Чан къудратлу хил'инди гъадму ругарилан алдашну.¹⁸ Ва ягъчІвур йисандин арайиъ ичИ чюлиъ дурагин тІулар аых апІури гъахъну.¹⁹ Хъасин Ханаан вилаятдиъ ургуб халкъ тІанкъ дапІну, Дугъу израиллуйириз гъадрарин жил ирс вуди тувну.²⁰ Му ляхнар вари 450 йисандин арайиъ гъашидар ву. Хъасин Дугъу дурагиз Шамуил пайгъамбрина гъайизкъан, халкъдин ахъюдарди судийр тувнийи.²¹ Хъасин дураги пачагъ ккун гъапІнийи, ва Аллагъди Вениаминдин тухмиан пачагъди Кишдин бай Саул тувнийи. Дугъу ягъчІвур йисан пачагъвал гъапІнийи.²² Саул ултІуккну, Аллагъди Давуд пачагъди дерккну. Дугъкан дугъу гъамци шагъидвал гъапІну: «Ессейин бай Давуд Йиз кІваз хуш гъахънийиз. Узу амур гъапІкъандар вари дугъу тамам апІиди».²³ Ари Давудрин наслари-кан, Чав гаф тувиганси, халкъ Уърхур – Иса, Израилиз бахш гъапІну.

²⁴ Иса гъайиз улихъна Ягъ'яйи Израилин халкъдиз, чпин тахс-пар гардандий дидисну, штуан апІбан аygъювалар улупнийи.

²⁵ Аършириан табшурмиш дапІнайиб тамам апІури, Ягъ'яйи гъапнийи: «Узу фуж вуди гъисаб апІурачва? Узу Месигъ дарза, Думу йиз къяляхъди гъиди. Узу Дугъан шаламарин гъахмийр гъядарчузкъан лайикъур дарза».

²⁶ Эй йиз гъардшар, Ибрагимдин наслин веледар ва Аллагъ-дихъан гучІрудар! Му, ухъу уърхбан бадали, дапІнайи гаф вуйи.

²⁷ Ерусалимдин агъалиири ва дурагин ахъюдари, Иса уърховал Тувур вушул пну, къабул гъапІундайи ва Думу жазайикк ккит-нийи. Гъамци дураги пайгъамбари гъар султ йигъян кІурайи гафар тамам гъапІнийи.²⁸ Дурагиз Иса йикІбан бадали тахсир гъибихъундаршра, Пилатдикан Думу йикІуб тІалаб гъапІнийи.

²⁹ Вари Гирами китабариъ Исаикан дибикІнайиси дурагин тамам гъабшиган, Дугъан беден, дарикан кадабгъну, накъв-дий ивнийи.³⁰ Аммаки Аллагъди Думу Чиви гъапІнийи.³¹ Хай-лин йигъари Чахъди Галилейиан Ерусалимдиз гъафидариз Думу ачмиш шули гъахънийи. Хъа гъамус дураг халкъдин улихъ Ду-гъан шагъидар ву.

³² Аллагъди ихъ абириз тувнайи гаф ухъуз, дурагин бая-риз, Иса чиви апІбииндиги тамам апІбакан Ужувлан хабар учвуз



деебтурача. ³³ Мидкан Гирами китабарин кьюбпи шиърий дикIна:

«Уву Йиз Бай вува,
гъамус Узу Яв Адаш гъахъунза».

³⁴ Иса гъачIихъан, дутIину, ругдиз илтIитIикIбан бадали, Аллагьди Думу чIиви гъапIну, ва мидкан гъамци дупна:

«Узу Давудриз гаф туву
гирами ва шаксуз ужувлар
учвуз тувдиза».

³⁵ Фицики Мяълийирин китабдин жара йишваъ Аллагьди дупна:

«Уву Яв Гирамир
ругдиз илтIикIуз
гъидритара».

³⁶ Чан вахтна Давуд Аллагьдин гъуллугънаъ духьну, кечмиш гъахъну, думу чан абиирин накъваригъ кивну ва ругдиз илтIикI-ну. ³⁷ Хъа Аллагьди гъачIихъан чIиви гъапIу гъадму Кас ругдиз илтIикIундар. ³⁸ Ва гъаддиз, гъардшар, учвуз аygъю йибхъайки, ичв гунгъарилан хил алдабгъувал Исайилантина дебкначвуз. ³⁹ Мусайн къанундииинди учву гъякълу апIуз даршлуган, варибидий гъарсар хъугъайир Исайилантина гъякълу апIиди. ⁴⁰ Гъаддиз, пайгъамбрари дупнайи исихъайи гафар учв'ин улууркъбан бадали, ихтият иххъай:

⁴¹ «Хъебехъайчва, шаклу шулайидар,
мюгътал йихъай ва дург йихъай,
фицики Узу ичв йигъари
учву хътругърусиб ляхин апIидиза.
Учуу дидихъ, шликIа
гъаври аишра, хъугъидарчва».

⁴² Варнавна Павел мист'ан удучIурайиган, дураги хъа султ ийгъянна гъамдикан ктибутуб ккун апIуру. ⁴³ Алдагъиган, жугъдарин ва жара миллетдин хъугъайидарикан гизафдар Павелинна Варнавдин къяляхъди гъягъору. Мураги халкъдихъди сюгъбатар гъахури, дураги Аллагьдин гъякъ рякъюъ гъузуб ижми апIуру.

⁴⁴ Гъюру султ ийгъян шагърин, сакыодар ктарди, вари агъалийр Аллагьдин гафнахъ хъпехъуз уч гъахъний. ⁴⁵ Гизаф халкъ гъяб-къиган, жугъдар хъюлу ацIину, Павели кIурайи гафариз къаршу



удучІвуз ва дугъаз люкынар апІуз хъюгъру. ⁴⁶ Гъадмуган Павелина Варнавди дурализ дирашди кІуру:

— ЖарадаризтІан сифте учвуз Аллагъдин Гаф улупну ккунди-и. Хъа думу къабул дарапІбииинди гъаргандин уымрихъан ичвучву мягърум апІураш, учу гъамус жугъуд дарударихъинди илдицидича. ⁴⁷ Агъайи гъамци табшурмиш гъапІунчуз:

«Уву вари дюн’я уьбхбан бадали,

Узу Увкан жара миллетариз чирагъ гъапІунза».

⁴⁸ Му гафар гъеерхыиган, жугъуд дарудар шад гъаши ва дурали Агъайин гафнан тяриф апІуз хъюгъю; ва гъаргандин уымриз ка-дагънайидар хъугънийи. ⁴⁹ Гъамци вари вилаятдиз Агъайин Гаф рабгъурайи.

⁵⁰ Хъа жугъдарин маллиири дурариин диндиҳъ хъайи гъюрматлу дишагълийир ва шагърин кІулий айи адмийир алауру. Дурагар Павелихъна Варнавдихъ хъергру ва дурагар шагъриан утІурккуру. ⁵¹ Павелна Варнав, чпин ликарик кайи бишируг гъадму адмийириина кутІубччвуну, Иконияйиз гъягъюру.

⁵² Вари ученикар гъаммишан шадвали ва Гирами Рюгъну ацІ-ну шулу.

Павелна Варнав Иконияйиз

14 ¹ Иконияйиз Павелна Варнав, айдат вуйиси, жугъдарин мистаз гъюру ва дурагар душваъ ижмивалиинди аygъювалар улупуру. Жугъдари кан ва жара миллетарикан гизафдар Иса-йихъ хъугънийи. ² Хъа хътругъу жугъдари, Варнавдизна Павелиз къаршу вуди, жугъуд дарударик хъял капІру.

³ Вушра, Варнавна Павел, душваъ къаназ гъузну, Агъайикан дирашди аygъювалар улупури гъахъну. Агъайи дурагарин хила-рилантина Чан ужувлан шагъидвал вуди хайлин айламатар ва аյжайиб лишнар улупури гъахъну. ⁴ Шагърин агъалайир къюб дес-тейиз пай гъахънийи: садар жугъдари хъанди, тмундар Исаин вакиларихъанди. ⁵ Жугъуд дарударинна жугъдарин ахъюдари Павелна Варнав, гъван уълюбхну, урччвуз къаст гъапІиган, ⁶ ваки-лар, мидкан хабар дубхъну, Ликаонияйин шагътар вуйи Лиистра, Дервия ва дурагарин айтрафарихъинди гъушнийи.

⁷ Дурагар душвариъра Ужувлан хабар рабгъури гъахъну.



Паралич духънайир сагъ апIуб

⁸Листрайиъ, ликарик паралич кади, бабкан гъахъихъанмина сабанна дилицу кас айи. ⁹Му кас Павелин гафариҳъ хъпехъура-йи. Павел дугъаҳынди гъилигнийи. Дугъаъ сагъ хъуз хъугъвал айивал Павелиз гъябъкънийи ¹⁰ва зарбди гъапнийи:

— Ликриина гъудужв!

Думу гъедергну лицуз хъюгъру. ¹¹Гъадмуган, Павели гъапIуб гъябъкъиган, адмийири ликаон чалниинди чИгъ апIуру:

— Ухъухъна инсанарин суратнаъди аллагъар дуфна.

¹²Дурапи Варнавдиз Зевс, хъа Павелиз Гермес кIурайи, фи-цики дурарикан гизафси улхур Павел вуйи.

¹³Шагърин гъирағъдихъ Зевсдиз икрам апIру мист хъайи. Му мистан гъуллугъчийи, кюкийиrin кунцIарна йицар хъади, шагърин урнарихъна йицар хъальну гъору. Дугъазра халкъдихъди, Павелиз-на Варнавдиз икрам апIбан лишан вуди, йицар дурккну гъурбан апIуз ккунди айи. ¹⁴Мидкан гъебхъу Варнавна Павел, хъюл'ан чипин палтар дяЧяргъну, чИгъар апIури, халкъдихъна жаргъуру:

¹⁵— Эй инсанар, учву гъапIрачва? Учу аллагъар дарча! Учу учвус-дар инсанар вуча! Учу учвухъна, учву идоларихъан маш гъибиц-ну, завар-жилар, гъюлер ва дурариъ айикъандар вари яратмиш гъапIу чИви Аллагъдихъинди илтIикIбан бадали, учвухъна Исаи-кан Ужувлан хабар хъади дуфнайдар вуча. ¹⁶⁻¹⁷Улихъди Аллагъди, ужувлар апIури, Чакан учвуз гъаммишан кIваин апIури гъахънуш-ра, Дугъу гъарсаб халкъдиз чан рякъ дибисну гъягъюз ихтияр туври гъахъну. Дугъу, учвуз ужуб бегъер тувуз, мархъар гъаъри гъахъну. Дугъу учвуз ипIуз ужуб тувра ва ичв юкIвар шадвали ацIра.

¹⁸Вари гъамцдар гафар гъапнушра, Павелихъанна Варнавдихъан йицар гъурбан апIбахъан халкъ саб гужа-гуждитIан дерккуз удукуундайи.

¹⁹Вакилари Ужувлан хабар рабгъурайиган, Антиохияйианна Иконияйиан жугъдар дуфну, халкъ дурализ гъамци кIури къар-шу адауру:

— Вакилари учвуз фукIара гъякълуб кIурадар, хъа вари дура-рин кучIлар ву.

Муравириа, гъван ульюбхну, Павел йивну дитру ва, думу гъа-кIуншул пну, хъчIюхюри, шагърин гъирағъдихъ духну дитру.



²⁰ Ученикар дугълан илтПишган, Павел гъудужвуру ва шагъриз гъягъюру. Хъайигъян думу, Варнавра хъади, Дервияйиз гъягъюру.

²¹ Гъаму шагърий дурари, аыгъювалар улупури, чпиз хайлин ученикар гъазанмиш апIуру. Хъасин дураг ЛиСтрайиз, Иконияйиз ва Антиохияйиз хътакуру. ²² Душвариь дураг чпин ученикарин юкIвар хъугъвалий ижми хъпан бадали, дураг гъевеслу апIуий. Дураги гъамци кIуйи:

— Ухъуз Аллагъдин Паччагълугъдиь учIвайиз гизаф аззабар алахъиди.

²³ Хъасин хъугънайидарин гъарсаб жямяйтдиь аыхюр ктагъбалан къяляхъ, Павелина Варнавди, ккарагну ва ушвар дидисну, чпни хъугънайи Аллагъдина дураг аманат апIуру.

²⁴ Писидияйиантина душну, дураг Памфилияйиз гъюру ²⁵ ва Пергдиль аыгъювалар улупуру. Хъасин дураг Атталияйиз ктучIувру. ²⁶ Хъа дилин дураг Аллагъдин амриинди чпни гъапIу ляхнар апIуз гъау Антиохияйиз сирнав апIуру.

²⁷ Дина дуфну, вари хъугънайидар уч дапIну, дураги Аллагъди чпни гъапIу вари ляхнарикан ва Агъайи жугъуд дарудариизра хъугъвалихъна раккар арцбакан ктибтуру. ²⁸ Хъа дураг душваь чпин ученикарихъди къаназ гъузнийи.

Ерусалимдиз уч хъуб

15 ¹ СабЦИб вахналан Антиохияйиз Ягъудияйиан гъапIру-дар-вуш гъафи адмийири гъардшариз кIуйи: «Эгер учву Мусайин айдатниинди суннат дарапIиш, урхюз хъибдарччу-хъан». ² Павелна Варнав дурагиҳди рази гъахъундар, ва мидин кIуллан дурагин арайиь ярхи гъюжат ахъбуру. Гъадмуган Павелна Варнав ва сакъюдар жарадар му месэла бадали Ерусалимдиз вакилариҳна ва хъугънайидарин ахюдариҳна гъаъру.

³ Гъамци хъугънайидари дураг рякъюь айнийи. Финикияйи-анна Самарияйиантина гъягъюрайиган, дураги, фици жугъуд дарудар хъугъвалихъна гъафнуш, ктитури гъахъну, ва мид'ин гъардшар шад шуйи. ⁴ Ерусалимдиз хъуркъиган, дураг хъугънайидарин ахюдари шадвалиинди къабул апIуру. Павелина Варнавди Аллагъди чпинди гъапIдарикан варибикан ктибтуру.

⁵ Фарисийирин тереф дубиснайи сакъюдар хъугънайидари гъуджвну кIуру:



— Жугъуд дарударин суннат апIуб лазим ву ва дурагиз Муса-йин Къанун убхюз табшурмиш дапIину ккунду.

⁶ Вакиларна хъугънайидарин аъхюдар му месэла гъял апIбан бадали уч шулу. ⁷ Гизаф улхбалан къяляхъ Петр гъудужвну кIуру:

— Гъардшар! Учвуз айгъячвузки, Аллагъди сифте кIул'ан ухъкан узу ктагъну ва жугъуд дарудариз йиз мелзналантина Ужувлан ха-бар ебхъруси ва хъугъвалихъна гъюруси гъапIину. ⁸ Инсанарин юкIвар айгъю Аллагъди, дурагиз ухъузси Гирами Рюгь багъиш дапIину, дураг къабул апIувал улупну. ⁹ Дугъу, хъугъувалииндиги ду-рагиз юкIвар марцц дапIину, ихъна дурагиз арайиъ саб фаркъвал-ла гъибтундар. ¹⁰ Гъаци вуйиган, Исаин ученикариин я ухъхъан, я ихъ абириихъан гъабхуз дарши гъагъ иливури, гъаз учву Аллагъ ахтармиш апIурачва? ¹¹ Хъа Агъа Исаин ужувилииндиги гъадрарси ухъура уърхрувалихъ хъугъурхъя.

¹² Уч духънайидар вари ккебехъуру. Варнавдина Павели чпи-лантина Аллагъди жугъуд дарударин арайиъ улупу айламатари-канна айжайиб лишнарикан ктитуру ва ккебехънайидар хъе-бехъури гъузру. ¹³ Дурагиз улхуб ккудубкIиган, Якъуб улхуз хъюгъру:

— Гъардшар, узухъ хъебехъай!

¹⁴ Сифтейиан жугъуд дарудар чан халкъ вуди къабул дапIину, Аллагъди дурагиз фици уж'вал гъапIинуш, Симонди ухъуз ктиб-тунхъуз.

¹⁵ Гъамдихъди пайгъамбрарин гафарра, дидикIнайиси, дюзди гъюра:

¹⁶⁻¹⁸ «Агъайи, гъаму арайиз

Хурайири кIура:

„Хъасин Узу хътакидиза,
ва ккадабхънайи Давудгъярин хал,
дидин харабийир за дапIину, цИийи алаъну,
жугъуд дарударра кади,

Йиз ччурнахъ хъугърайидарси вари инсаният
Агъайихъна гъюз

гъялак хъпан бадали,
тазатIан арайиз хибдиза“.
Дюн'я ккебгъхъанмина
му айгъюб вуйи».



¹⁹ Гъаддиз узу Аллагъыхынди илдицу жугъуд дарударииин ухуу читинвалар илирчуб лазим вуди гысаб апIураза. ²⁰ Ухуу дурариз, идолариз гъурбан дапIнайи хураг мипIанай, къяпавалар мапIанай, бугъмиш дубхыну гъабчIибдин йикк мипIанай ва ифи мубхъанай кIури, кагъаз дибикIну ккунду. ²¹ Фицики дегъзаманайин насларихъанмина гъарсаб шагърий Мусайин къанундикан улупрудар ва гъар султ йигъан мистарий Къанун урхури шлу адмийир а.

Вакиларин кагъаз

²² Хъасин вакиларина аъхюдари, вари хъугънайидарихъди мясляйт дапIну, чpin арайиан саршвнур гъардаш кадагъну, дурар Павелихъдина Варнавдихъди Антиохияйиз гъауб къатIъ апIуру. Дурари гъардшарин арайиъ гъюромат айи Сила ва Варсава кIуру Ягъуда ктагъуру, ²³ ва дурарихъди гъамциб кагъаз хътапIуру:

— Вакиларина хъугънайидарин аъхюдари, ичв гъардшари Антиохияйиъ, Сирияйиъ ва Киликияйиъ айи жугъуд дару гъардшариз саламар гъаъра. ²⁴ Ич арайиан гъушу бязидари, ич терефнаан чпиз гъич саб табшурмиш апIувалра адарди, учвухына дуфну, чpin гафариинди ичв арайиъ гъалабулугъ ипбакан хабарар дөрхъначу.

²⁵ Учу варидаrin разивалиинди сакьюр кас кадагъну, ич юкIв али Варнавдихъдина Павелихъди учвухына гъауз къатIъ гъапIунча. ²⁶ Му касари ихъ Агъа Месигъ Исайин ччвурнахъ чpin уьмур гъяйиф гъапIундар. ²⁷ Гъацира учвухына Ягъудана Сила гъаърача, дурари учвуз учу гъибикIуб гафарииндири пиidi. ²⁸ Фицики Гиррами Рюгъназ ва учуз учву вартIан метлеблу саб ляхнихъантIан хътауз ккунди адарчуз: ²⁹ идолариз гъурбан дапIнайи хураг мипIанай, ифи мубхъанай, къяпавалар мапIанай, бугъмиш дапIну гъабчIибдин йикк мипIанай. Гъамрар вари тамам апIури гъашиш, ужу хъибдичвуз. Сарун сагъ-саламатди гъузай.

Гъанайидар Антиохияйиз

³⁰ Гъамци гъау вакилари, Антиохияйиз дуфну, хъугънайидар уч дапIну, дурарихъна кагъаз тувру. ³¹ Дурари му кагъаз урхуру ва кюмекнан хабриин шад шулу. ³² Ягъудана Сила, чпи пайгъамбарра вуди хъпаз дилигну, хъугъувалиин ижми хъуз дурариз кюмек



апIури, дуарин улихъ къаназ гъулхний. ³³ Душваь сацIиб гъузхъан, Ягъудайизна Силайиз ягъурлувал ккун дапIну, дуар гъарьдарихъна къяляхъ гъягъюз гъитру. [³⁴]*

³⁵ Хъа Павелна Варнав Антиохияйиъ гъузру. Гизаф жарадарихъ-ди дуары, душваь аygъовалар улупури, Агъайин гафнан Ужувлан хабар рабгъуру.

Павелна Варнав жара хъуб

³⁶ СацIиб вахтналан Павели Варнавдиз кIуру:

— Гъач хъана ухъу, Агъайин Гаф гъарабгъу гъарсаб шагъриъ аи ихъ гъардшариин улуркъну, дуар фици яшамиш шулаш, лигухъя.

³⁷ Варнавдиз Марк кIуру Югъанра чахъди гъадагъуз ккун шулу.

³⁸ Амма Павели, Памфилияйиъ чпихъан хътаку ва аыхиризкъан чпин ляхниъ иштирак дарши Марк кIуру Югъан хъади дурушиш ужу шул, пну, фикир апIуру.

³⁹ Гъамци дуарин арайиъ гъюжат абхъру ва гъаци Павелна Варнав чиб-чпихъан жара шулу. Варнавди, Маркра гъадагъну, Киприз сирнав апIуру. ⁴⁰ Павели, кIуруш, Сила ктагъуру. Гъардшари думу, Агъайина аманат дапIну, рякъюъ тIаъру. ⁴¹ Думу, гъардшарин хъугъувал мюгъкам апIури, Сирияйиъ ва Киликияйиъ лицури гъахъну.

Павеликна Силайик Тимофеий ктикауб

16 ¹Дилин Павел Дервияйиз, хъасин Листрайиз гъюру. Душваь Тимофеий кIуру сар ученик аи. Дугъан дада хъугънайи жу-гъуд дишагъли вуйи, хъа адаш грек вуйи. ² Листрайиъ ва Иконияйиъ аи гъардшар дугъкан ужуди улхури шуйи. ³ Павелиз Тимофеий чахъди рякъюъ учIвну ккунди аи. Гъаддиз дугъу Тимофеийин суннат гъапIиний. Мид'инди Павелиз душваь аи жугъда-риз хуш шлуб апIуз ккунди аи, фицики дуариз варидализ Тимофеийин адаш грек вуйиб аygъяи. ⁴ Ва дуары, шагъариан шагъарииз гъягъюри, хъугъвалиина гъафидариз Ерусалимдиз

* ^{15:34} Грекарин саспи БикIбариъ дибикIна: «Хъа Силайи гъадушваь гъузуз къаст апIуру».



вакилари ва хъугънайидарин аҳходари адагъу къаарар, дуарар та-
мам апIрганси, ктитури гъахъну. ⁵ Гъамци хъугънайидар хъу-
гъувалий мюгъкам шули ва дуарин къадар йигълан-йигъаз ар-
тухъ шули гъахъну.

Павелиз Македонияйиз дих апIуб

⁶ Павел ва дугъахъди хъайидар Фригияна Галатия уълкайириан-
тина гъягъюру, амма Гирами Рюгъну дуарихъди Асия уълкейиъ
аъгъювалар улупуз гъитундар. ⁷ Мисия уълкейин сяргъятарихъна
дуфну, дуариз Вифания юрдназ гъягъюз ккун шулу, амма Ги-
рами Рюгъну дуариз манигъвал апIуру. ⁸ Гъамци, Мисияйиъ уд-
ручIвди, дуарар Троада шагъриз гъюру.

⁹ Ишвну Павелиз Македония уълкейин касди, чан улихъ ди-
йигъну аյжайиб саягъниинди:

— Македонияйиз дуфну, учуз кюмек апIин, — кIури, миннат
апIуроди рябкьюру.

¹⁰ Му гъябкьюбси, учу дишлади Македонияйиз гъягъюз къатIъ
гъапIунча, фицики Аллагъди дуариз Ужувлан хабар гъайибхай
кIура, пну, фикир гъапIунча. ¹¹ Троадайиан гимийиъди рякъюъ
учIвну, дилин сифте Самофракия островдинна, хъайигъян
Неапол шагъриз гъафунча.

Филипияйиз гъюб

¹² Дилинра учу Римдиан гъафидар яшамиш шулайи Македо-
нияйин сабпи пайнан Филипия шагъриз гъафича, ва душваъ
садшвнуд йигъ гъабхънийич. ¹³ Султ йигъан шагъриан нирихъна
удучIвнийча. Душвахъ, аъдат вуйиси, гъудгнар апIру хал хъайи.
Гъадина уч дужънайи дишагълиирихъди дэньну, сюгъбатар апIу-
райча. ¹⁴ Душваъ Фиатир шагъриан вуйи багъа уьру парчайин ал-
вер апIру Лидия кIуру сар дишагълира айи. Думу гъякъ вуйи Ал-
лагъдихъ хъугънайир вуйи. Павелихъ хъпехъурайи вахтна, Агъайи
дугъан юкIв ачмиш апIуру, ва думу Павелин гафарихъ хъугъни-
йи. ¹⁵ Думу ва дугъан вари хуландар штуан гъахъихъан, дугъу уч-
кан тIалаб апIуру:

— Эгер учву узу дугъриданра Агъайихъ хъугънайир вуди гъисаб
апIураш, йиз хулаъ яшамиш йихъай.

Учура рази гъашича.



Павелна Сила дисуб

¹⁶ Саб ражари учу гъудгнар апIру хулац гъягьюрайиган, фал китуз шлу жин кайи ва фал китбиинди эйсийириз зурба хайир хурайи лукI риш алахъунчуз. ¹⁷ Павелинна ич къяляхъди гъюри, дугъу, гъамци кIури, Чигъар апIури гъахъну:

— Му касар ВаритIанзаану Аллагъдин гъуллугъчийр ву! Дура-ри ухъуз уърхивалихъна рякъ улупура!

¹⁸ Гъамци думу шуру гизаф йигъари кIури гъахъну. Павелихъан аых апIуз дархъиди, шурахъинди илдицну, дугъак кайи фалин жиндиз кIуру:

— Месигъ Исаин ччувронахъан увуз амур апIураза: дугъ'ан удубчIв!

Думу жинра дишлади шур'ан удубчIвуру.

¹⁹ Хъа дугъан эйсийириз чипин хайир хътабтIурайиб дябкъну, ду-рари, Павелна Сила дидисну, гужниинди базар али майдандии-на гъякимарихъна гъахуру. ²⁰ Дурахъина гъахидари кIуру:

— Му касар жугъдар ву ва дураги ихъ шагърий гъалабулугъ ип-ра. ²¹ Дураги ухъу, римлуйири, къабул вая тамам апIуз лайикь дару аздатар рагъура.

²² Халкъра Павелизна Силайиз къаршу шулу. Хъа гъякимари дураг, палтар илдитну, маргълихъди урччвуз буйругъ тувру. ²³ Ду-раг, гизаф дурччвну, дустагъдиль итру, хъа дустагъчийиз дураг ижмишнаан гъаравлиkk уърхюз буйругъ тувру. ²⁴ Мициб буйругъ гъадабгъу дустагъчийира дураг дустагъдиль айи вартIан айтI дустагъдиль уржру ва дурагин ликар урхъар айи ацIу къулиз ивну рукъарихъди йитIуру.

Павелна Сила азад апIуб

²⁵ ГъацIишвар багахъ шулади, Павелина Силайи, ккарагури, Аллагъдин адназ мяълийир апIурайи. Дустагъдиль айи дидис-нейидар дурагихъ хъпехъурайи. ²⁶ Гъаму арайиъ сабпну жилар гъаци зарбди гъутIурччвнийики, саки дустагъдин шибритIарра ришвруси. Гъадму сяйт вари раккнарра арццу ва вари дидиснейидариин али рукъарра алдахъуру. ²⁷ НивкIан хъиргу дус-тагъдин гъаравулиз, вари раккнар арццнади дябкъну, ханжал ѿчIюбгъну учв йикIуз ккун шулу, фицики дугъу, дидиснейидар



гъергну пну, хиял гъапІнийи. ²⁸Хъя Павели: «Уву увуз хатІа ма-
пІан, учу вари гъамшваъ имича», — пну, зарбди чІигъ апІур.

²⁹Гъаравли, акв апІруб хуз гъитну, Павелна Сила аий иишваз-
ди архъру ва, гучІбаан гукІни духыну, думу дуарин улихъ жил’-
ин дахъру. ³⁰Хъасин гъаравулчийи, дураг чатна адаьну, кІуро:

— Эй йиз худайир, узу урхбан бадали гъапІну ккунду?

³¹Дураги дугъаз жаваб туви:

— Агъа вуйи Месигъ Исайихъ хъугъ, Аллагъди уву ва яв хулан-
дар урхиди.

³²Хъасин дураги гъаравулчийиз ва дугъан хулаъ айдариз ва-
ридариз Агъайин Гафнакан аygьювалар улупуру. ³³Гъаравулчи-
йи, дураг чан хулаз гъахи иишван, дурагин зийнар жикІуро,
хъасин дишлади думу ва дугъан хуландар штуан шулу. ³⁴Чан ху-
лаз гъахи Павелизна Силайиз дугъу хураг гъивнийи, хъя дугъу ва
дугъан хуландари Аллагъдихъ хъугъбиин шадвал апІуро шулу.

³⁵ГвачІин улубкыиган, шагърин гъакимари:

— Дустагъ дапІнайидар деетай, — пну, дустагъдиз чпин чар-
хачийр гъаъру.

³⁶Дустагъдин гъаравулчийи мидкан Павелиз кІуро:

— Гъакимари, узухъна учву деетри пну, адмийир гъаъна. Гъаци
вуйиган, гъамус архайнвалиинди удучІвну гъараҳай.

³⁷Амма Павели дурагиз кІуро:

— Учу суд дараІди, Римдин ватандашар вуйибдизра дилигди,
вари халкъдин улихъ дурччвну, дустагъдиль итнийи. Хъя гъамус
жиниди деетурайин? Ваъ. Гъит чпи гъюри, чпи учу адаъри.

³⁸Чархачайири му гафар, гъакимарикна гъапиган, Павелна Сила
Римдин ватандашар вуйиб гъеебхыиган, гъакимариз гучІ шулу.

³⁹Гъаддиз дураги, дуфну, Павелинна Силайин улихъ чпилан хил
алдабгъувал ккун апІуро ва, дустагъдиан адаьну, дурагикан шагъ-
риан удучІвну гъягъюб тІалаб апІуро. ⁴⁰Дураг, дустагъдиан удучІв-
дар, Лидияйин хулаз гъюри. Душваъ гъардшарихъди дяркъну, ду-
рагин юкІвар аышкълу дапІну, шагъриан рякъюъ учІвру.

Павелна Сила Фессалоникайъ

17 ¹Амфипол ва Аполлония кІуро шагъраиантана душну,
Павелна Сила жугъдарин мист аий Фессалоникайиз гъю-
ру. ²Павел, дина дуфну, чан аьдатниинди шубуд султ йигъян



жугъдарихъди БикІбарикан улхуру. ³Дугъу, Месигъ сифте дукІ-ну, хъасин чIиви духьну ккунийи кIури, мидкан гъаврикк ккаль-ри ва му усбат апIури гъахьну. Дугъу кIуру:

— Гъадму Месигъ узу учвуз улупурайи Иса ву.

⁴Дурарикан сакьюдар Аллагъ кIавъ урхру грекар ва хайлин адлу дишагълийир хъугънийи ва Павелинна Силайнин терефназ гъафнийи.

⁵Хъа хъугъну адру жугъдари, хъюл'ан базариин али алчагъ ад-мийир уч дапIну, гъварч шулу ва вари шагърик гъал кипру. Халкъдин улихъна адаъбан бадали, дураги, Ясондин хулаз дуф-ну, Павелна Сила агуру. ⁶Дураг душваш дидрихъди, Ясонна жа-ра гъардшар шагърин гъякимарихъна гъахуру. Халкъди гъамцдар Чигъяр апIурайи:

— Вари дюн'яйиъ гъалабулугъ ипнайи гъаму касар гъамус гъа-минара дуфна, — ⁷хъа Ясонди дураг чан хулаъ къабул гъапIну. — Дураг, Римдин паччагътIан хъана жара сар Иса паччагъ а кIури, Римдин паччагъдин гъюкмиз къаршу удуЧIвтура.

⁸Мициб хабарну халкъдик ва шагърин гъякимарик гъала-булугъ кипру. ⁹Дураги Ясон ва имбу хъугънайидар, чпи азад апIбан бадали, пул тувуз мажбур апIуру, ва хъасин дураг деетуру.

Верияйиъ цIии читинвалар хъуб

¹⁰Гъардшари гъадму йишван дишла Павелна Сила Верия кIу-ру шагъриз гъаъру. Дина гъафиби, дураг жугъдарин мистаз гъя-гъюру. ¹¹Мушван адмийир ФессалоникайндартIан фикирлудар вуйи: дураги Агъайн Гаф лап аышкъниинди къабул гъапIнийи. Павелина Силайи кIурайиб гъякъ вуш аыгъю апIбан бадали, гъар йигъян БикІбар ахтармиш апIури гъахьнийи. ¹²Натижайиъ жугъ-дарикин гизафдар, хъа гъацира хайлин грекар ва адлу дишагъли-йирна жилар хъугъувалинина гъафнийи.

¹³Фессалоникайин жугъдар, Павели Верияйиъра Аллагъдин Гаф рабгъурайиваликан аыгъю дубхъну, гъадина дуфну, халкъ-дик гъалабулугъ кипуз ва дугъ'ин алауз хъюгъру. ¹⁴Гъадмуган гъардшари тяди Павел гъюлин гъирағъдихъна гъаъру, хъа Си-ланы Тимофеей гъадушваш гъузру. ¹⁵Павелихъди гъушдари думу



Афинайизкъан гъаъру. Дилин хътакурайидарихъ Силайизна Тимофейиз «Шлубкъан ухди узухъна гъачай», – кIури, Павели дибикIнайи кагъаз хьайи.

Павел Афинайиз хъуб

¹⁶ Силайизна Тимофейиз ккилигурайи Павелин рюгъ убгури гъабхъну, гъаз гъапиш дугъаз шагъур идолари абцIну гъябкъний. ¹⁷ Мидкан дугъу мистаъ жугъдарихъдина Аллагъ кIваъ айи грекарихъди ва гъар йигъан базар – майдандиин алахъурайидарихъди сюгъбатар апIури гъахъну. ¹⁸ Сакьюодар эпикурчийр ва стоикар вуйи философар дугъахъди гьюжатнаъ учIвру. Дурарикан сакьюодари: «Му лягълягъиз фу пуз ккунди айкIан?», тмундари: «Думу, рякъру гъялариан, яд аллагъарикан улупурайир вуйкIан?» – кIури шуйи. Дурари мици гъаддиз кIурайи, гъаз гъапиш Павели Исайикан ва Думу чIиви хъуваликан Ужувлан хабар рабгъурайи. ¹⁹ Дурари Павел Ареопаг тепеийин уч шлу мажлисназ духну, дугъхъан гъерху:

– Уву рагъурайи гъадму аygъювалар фу вуш, учуз аygъю апIуз хай даршулин? ²⁰ Фицики ич ибарихъна саб аյжайиб хабар гъюра; гъаддиз учуз, му фу вуш, аygъю дубхъну ккунди ачуз.

²¹ Афинайин агъалиирин ва душваш яшамиш шулайи гъураб-ирин пише чпин вахт, сюгъбатар апIури вая гъар жюрейин цИийишнар гъял апIури, адапIувал вуйи.

Павелин Ареопаг мажлисдин улихъ улхуб

²² Павели, Ареопаг мажлисдин улихъ дийигъну, гъапнийи:

– Афинайин агъалииир! Рябкъюразузки, учву гизаф идолар къабул апIурачва, ²³ фицики узу шагъриантинагъягъюрайиган ва ичв гирами йишвариз лигурайиган, «Мялум дару аллагъдиз» кIури дибикIнайи гъурбан апIру йишвра гъябкъюнзуз. Магъя учву, Учв фуж вушра аygъдарди, икрам апIурайи Аллагъ, узу учвуз ачмиш апIурайи Гъадму Аллагъ ву.

²⁴ Дюн'я ва дидиль айкIандар вари яратмиш гъапIу Гъадму Аллагъ заваринна жиларин Агъа хъпаз лигну, Думу инсанарин хила-риинди гъапIу дараматарий яшамиш шуладар. ²⁵ Дугъаз инсанарин хиларииинди апIурайи кюмек ккундар, гъаз гъапиш Дугъаз гъич



фтинкІа игътияж адар. Дугъу чав инсанариз гъарсаб тувра: уьмурра, нефесра ва гъаци вари миди вуйи ужувларра.²⁶ Аллагъди сифте сар кас, хъа дугълантина дюн'яйин вари инсаният арайиз гъабхну. Дураг яшамиш шлу вахтар ва иишвар улупну.²⁷ Аллагъдин метлеб халкъари Учв агуб вуйи. Мумкин ву, дураг Дугъахъна рукъузра, дураги Думу агузра. Думу ухъкан гъарурин багахъ хъа.²⁸ Фицики ухъу Гъадгъунди яшамиш шули, лицури ва нефес хътабгъури ахъа. Ичв шаираикан сасдари гъаписи: «Ухъу Дугъан веледар вухъа».

²⁹ Гъаци вуйиган, ухъу Аллагъдин веледар вуди, Аллагъ гъизилиз, арсраз вая гъвандиз, инсандин устадвалиинди ва хиялниинди яратмиш дапІнайи суратназ ухшар ву пну, фикир дапІну ккундар.³⁰ Аллагъди ихъ альдруваларин вахт ихъ тахсир вуди гъисаб апІурадар, хъа гъамус Дугъу варишвариъ вари адмийириз чин тахсрар гардандир дисуб амур апІур.³¹ Фицики Дугъу вари дюн'яйин гъякъди суд апІру йигъ улупна. Чав улупнайи Инсанди гъадму суд апІиди. Аллагъди, Думу, гъачИихъан, чиши дапІну, варидализ шагъидвал тувну.

³² ГъачИихъан чиши хъубкан деебхъну, дурарикан бязидар: «Мидкан хъа ражари ктибтара» пну, кялхъюз хъюгъуру.³³ Гъаци вуйиган, Павел дурарихъан гъудучІвну гъягъюру.³⁴ Хъа сакьюдари, дугъахъ хъуѓыну, дугъан тереф бисуру. Дурагин арайиль Дионисий кІуру Ареопаг мажлисдин иштиракчи, Дамар кІуру дишагъли ва хъана жарадарра айи.

Павел Коринфдиз хъуб

18 ¹Дидхъан Павел, Афинайиан удучІвну, Коринфдиз гъюру.² Душваъ дугъаз Понт юрднаан вуйи Акила кІуру сар жугъуд дихъуру. Думу чан шив Прискилайихъди Италияйиан удучІвну дуфнайир вуйи, фицики Римдин паччагъ Клавдийи вари жугъдариз Римдиан удучІвну гъягъюз буйругъ дебккнайи. Павел дурариин улуркъуз гъафнийи.³ Дураги чадраг дирхурайиб, яна Павели чав улихъди апІури гъаши кеспи апІурайиб, альгю гъабшиган, дурарихъди гъузну, лихуз хъюгъуру.⁴ Гъар султ йигъан дугъу мистарь, жугъдарна грекар хъугъувалиина хури, альгювалар улупури гъахъну.

⁵ Силана Тимофеј Македонияйиан гъафиган, Павели чан вари вахт жугъдариз Иса Месигъ вуйивал улупбаз харж апІури



гъахъну. ⁶Дураги, мид'ин рази даршули, дугъаз люкънар апIури гъахъну, хъа дугъу чан ликарик кайи бишируг гъадму адмийириина кутIубччвну, гъапи:

— Учву ичв уымрин тахсиркрап хьидичва. Ичв кIул'ина гъю-рубдин узу жаваб тувидарза. Гъамус узу жугъуд дарударихъна гъягъюраза.

⁷Хъа думу удучIвну, мистан гъвалахъ хъайи, Аллагъ кIавъ уър-хюрайи Юст кIуру касдин хулаз гъюру. ⁸Мистан аххюр вуйи Криспдира, чан вари хизандихъди, Агъайиина хъугъувал гъабх-нийи. Гъацира Павелихъ хъпехъу коринфлуюрикан гизафдари, хъугъувалина дуфну, чпи штуан апIуз гъитру.

⁹Сад йишван Агъайи аъжайиб рябкъбъя Павелиз гъапну:

— ГучI мапIан! Адмийирихъди улхбар давам апIин ва меккебе-хъян. ¹⁰Фицики Узу увухъди хъаза ва гъич сарихъанра увуз писвал апIуз хъибдар, гъаз гъапиши му шагърий Йиз адмийир гизаф айиз.

¹¹Павел душваъ, агъалиириз Аллагъдин Гаф улупури, йисна гъацIаъ гъузру.

¹²Гъадму вахтна Ахая уълкейин гъякимдар Галлион вуйи. Ма-гъа жугъдар сатIиди Павелиин алархъуру ва думу суддиз хуру. Дураги гъамци кIуйи:

¹³— Гъаму касди адмийириз, Къанундин къайдийирихъди дар-ди, Аллагъдиз икрам апIуз улупура.

¹⁴Павели ушв абщайизра, Галлионди жугъдари кIуру:

— Эгер саб чIуру ляхин вая хатIа дубхънайиш, узуз учвухъ, жугъдарихъ, хъпехъуз себеб шуйзуз. ¹⁵Хъа ляхин ялгъуз гъапи га-фариъна, ччувураиъна, ичв къанунариъ аш, му месэла учву гъял апIинай. Узуз му ляхнин диванбеги хъуз ккундарзуз.

¹⁶Гъамци дупну, дугъу дураг диванханайиан утIурккуру. ¹⁷Ва-ридари, мистан аххюну малла Сосфен дидисну, думу диванхана-йин улихъ урччвуз хъюгъру, хъа мидкан Галлиондиз гъич вижна-ра ктайи.

Павел Антиохияйиз хътакуб

¹⁸Коринфдиз хъана хайлин йигъари гъузу Павели, гъардшар душваъ гъитну, Акилана Прискилла хъади Сирияйиз сирнав апIу-ру. Кенхерея портнаъ Павели, чав Аллагъдиз Гаф тувиганси, чан кIул алдапIуру. ¹⁹Дураг Эфесдиз гъафиган, Павели Прискилана



Акила душваь гытну, учв жугъдарихъди сюгъбатар апІбан бадали, мистаз гьюру. ²⁰Дурари дугъкан чпиҳыди шлубкъан къаназ гъузуб таалаб апІуру, хъа Павел рази гъахъундайи. ²¹УдучІвну гъягъруган, «Эгер Аллагъди амур гъапІиш, узу учвухъна хъадакну гъидиза», – пну, Павел Эфесдиан, баркаллагъ дупну, гъягъюру.

²²Къайсарияйи гимийиан эдеъну, думу Ерусалимдиз рякъюь учІвру ва, дина гъафири, душван хъугънайидар тебрик апІуру, хъасин Антиохияйиз гъягъюру. ²³Душваь сацІб вахтна гъузбалан къяляхъ, дугъу чан рякъ давам апІуру ва, Галатияйиъна Фригияйиъ шагъриан шагъриз гъягъюри, душвариъ вари ученикарин хъугъувал мюгъкам апІури гъахъну.

Аполлос

²⁴Душваь Аполлос кІуру Александрия шагъриан вуйи БикІбарин гъаври айи ва ушвниъ ужуб Чал айи жугъуджви айи. Думу сабан Эфесдиз гъафнийи. ²⁵Думу Агъайин рякъярин гъякънаан гъаврикк ккайи кас вуйи. Анжагъ Ягъ'яйи штуан апІбакантІан деебхънадашра, дугъу Исаин гъякънаан аышкълуди ва дюзди аыгъювалар улупури шуйи. ²⁶Мидкан дугъу мистаъ дирбашди улхуз хъюгъру. Хъа Прискилайина Акилайи, дугъан гафар гъеерхъиган, думу чпин хулаз духну, Аллагъдин рякъюн гъякънаан хъанара дишди гъаврикк ккальру. ²⁷Хъа дугъаз Ахаяйиз гъягъюз ккун гъабшиган, гъардшари, дугъаз ягъур ибшри дупну, душван ученикариз, думу къабул апІри, пну, кагъазра бикІуру. Аполлос дина гъафиган, Аллагъдин ужувшналан хъугъдариз дугъу аыхю кюмекар апІуру. ²⁸Иса Месигъ вуйивал БикІбариинди улупури, дугъу вари халкъдин улихъ жугъдар дюз дарувал ужуди улупуйи.

Павел Эфесдиъ хъуб

19 ¹Аполлос Коринфдиъ айи вахтна Павел, жюрбежюор йишвариантина душну, Эфесдиз ктахъуру. Душваь дугъаз сакъюдар ученикар алахъуру. ²Дугъу дураги хъерхру:

– Хъугъувалина гъафиган, учву Гирами Рюгъ къабул гъапіунчва?

Дурари дугъаз:

– Учуз Гирами Рюгънакан гъич гъеебхънукуан дарчуз, – пну, жаваб тувру.



³ Павели дурализ:

— Учву шлин штуан апIувал къабул гъапIунчва? — пну, гъерхру.

Дурали:

— Ягъ'яйин штуан апIувал, — пну, жаваб тувру.

⁴ Павели кIуру:

— Ягъ'яйин штуан апIувал тахсрар гардандиль дисбан бадали апIурайиб вуйи. Дугъу инсанариз чан къяляхъди Гъюз Ккайирхъ, яна Исаийхъ, хъугъуз дих апIури гъахьну.

⁵ Ягъ'яйин ученикариз мидкан гъеебхъиган, дураг Агъа Исаийн ччвурнахъян штуан шулу. ⁶Хъа Павели дурариин хилар иливиган, дурариина Гирами Рюгъ гъафнийи ва дураг, жа-жара Чалариинди улхури, пайгъамбарвалин гафар пуз хъюгъру. ⁷Дураг вари иицIикъор касдихънакъан вуйи.

⁸ Павели, мистаз гъягъюри, шубуб вазлин арайиль, жугъдарихъди сюгъбатар гъахури, Аллагъдин Паччагълугъ айивал тасдикъ апIури, хъуркъувалиинди аygъювалар улупуйи. ⁹Хъа дурарикан сакъодар хъугъбаккан кIул ккадабгъури, халкъдин улихъ Агъайин рякъярикан чIуруди улхури гъахьну. Гъаддиз Павел дурарихъан гъудучIвну гъюру ва, чахъди ученикар гъадагъну, Тиран кIуру касдин мектебдиль гъар йигъян сюгъбатар гъахуру. ¹⁰Гъамци кьюд йис гъябгъюру ва вари жугъдаризна Асияйиль яшамиш шулайи грекариз Агъа Исаийн Ужувлан хабарнакан гъеебхънийи.

Ахюну малла Скевайн ургур бай

¹¹ Аллагъди Павелин хилариинди гизаф айламатар улупури гъахьну, ¹² гъаддиз дугъан хил қубкIу ягълухъар, ккурттарра кмиди, аyzарлуйир сагъ апIбан бадали, ишлетмиш апIуий ва дураг сагъра шуйи. Дурариан гъацира жинарра удучIвуйи.

¹³ Шагъриан шагъриз гъягъюри, жинар утIурккурайи бязи жугъдариин сюгъюрчийра кмиди, жинар кайдариз гъамци кIури, Исаийн ччвур бисуз чалишмиш шули гъахьну:

— Увуз Чан гаф Павели улупурайи Исаийн ччвурниинди амур апIураза: удубчIв гъаму касдиан.

¹⁴ Мураг жугъдарин ахюну малла Скевайн ургур бай вуйи.

¹⁵ Хъа сабан жинди дурализ:

— Иса аygъюр вузуз, Павелра аygъязуз, хъа учву фужар ву-чва? — кIуру.



¹⁶ Ва гъадмуган жин кайи гъадму кас дураин алархьуру ва дугъу дураг урччуру. Дураин али палтар гъячIяргъний, ва дураг гъадму хул'ан гъяцIалди ва зийнар духьну утIурччвний.

¹⁷ Хъа мидкан Эфесдиль яшамиш шулайи вари жугъдаризна грекариз аygъю шулу, ва дурагик гучI кабхьру, ва Агъа Исаин ччвурназ хъанара артух гьюрмат апIуз хъюгъру. ¹⁸ Хъувгувалиина гъафидарикан гизафдари, Павелихъна дуфну, чпи гъапIу гунагъ ляхнар ачухъ апIуйи ва гардандиль дисуйи. ¹⁹ Хъа сюгъорч-йир-фалччирикан гизафдари, чпин китабар уч дапIну, варида-рин улихъ ургуру. Гъургдарин къимат гъисаб гъапIиган, 50 агъзур арсран манатдихъна удубчIвний.

²⁰ Гъамци Агъайин Гаф яркъуди рабгъуи ва къувватналь уб-ЧIвуйи.

Павелин ниятар

²¹ Вари гъаму гъядисийр гъашихъан, Павели Македонияйиан ва Ахаяйиантина Ерусалимдиз гъягъюз къатIъ гъапIнийи. Дугъу: «Душваь сабцIиб вахтназ гъузну, хъасин узу Римра дябкъну ккунду», – гъапнний. ²² Чан кюмекччирикан къюр кас – Тимофеина Эраст – Македонияйиз гъаъну, думу саб къадар вахтназ Асияйиъ гъузний.

Эфесдин устийирин гъалабулугъ

²³ Гъадму вахтна Агъайин Гафназ гизафдар къаршу гъудужвни-и. ²⁴ Эфесдиль Димитрий кIуру сар арсран уста яшамиш шулайи. Дугъу арсракан Артемида-аллагъдин бицIи хулар дапIну масу тувуйи. Му кеспи кайи устийири ахъю пулар гъазанмиш апIури шуйи. ²⁵ Димитрий дурагна жара кеспийр кайи устийир уч дапI-ну, дурагиз кIуру:

– Эй дустар, учвуз аygъачвузки, ихъ кеспийи ухъуз ужуб хайир хура. ²⁶ Мидихъди сабси учвуз рябкъюрачвузки ва ебхурачвузки, гъадму Павел кIурури, инсандин хилариинди гъапIдар аллагъар дар, кIури, неинки Эфесдиль, хъа вари Асияйиъ айи адмийир рякъ'ан адаура ва инсанар гъаддихъ хъугъуз гъитра. ²⁷ Хъа миди ухъ'ина бала хура, неинки ихъ пише зат имдарди ккадабхъбинди, хъа гъацира зурба вуйи Артемида-идолин дараматдин саб жу-рейинна мяна гъубзицар. Вари Асияйи ва вари дюн'яйи икрам апIурайи Артемидайин адлувал дубгди.



²⁸ Му гафар гъеерхъиган, хъолу ацІну, дурари: «Эфесдин Артемида зурба ву!» – кІури, Чигъар апІуз хъюгъру. ²⁹ Шагъриъра бегъем гъалабулугъ абхъру. Павелин юлдшар Гай ва Аристарх кІуру кьюр Македонияйин агъалийира хъади, тамашийр улупрушвахъна вари гъажаргънийи. ³⁰ Павелиз, душваз дуфну, уч духънайи халкъдин улихъна удучІвуз ккун гъабхънийи, хъа ученикари гъитундайи. ³¹ Дугъан дустар вуйи му вилаятдин сакьюдар гъакимдари, дина дурушуб тАлаб апІури, дугъахъна адмийир гъаънийи.

³² Му арайиъ уч духънайдари, саб къайда адарди, гъарури саб кІури, Чигъар апІуйи. Дурарикан гизафдарииз, чпи гъаз уч духънаш, аygъдайи. ³³ Сакьюдари вари тахсрар сар Александр кІуру касдин алаънийи, ва жугъдари думу улихъна удучІвуз гъитнийи. Хилин ишара дапІну, дугъаз халкъ аygъвалатнан гъаврикк ккауз ккун гъабши. ³⁴ Хъа думу жугъуд вуйивал аygъю гъабшиган, вари-дари сабхилди Чигъар гъапІнийи: «Эфесдин Артемида зурба ву!» ва му гафар текрар апІури дурарин кьюб сяльткъан гъабхънийи. ³⁵ Шагърин къайдайир дерккрури, халкъ сикин дапІну, кІуру:

– Эфесдин агъалийир! Эфес зурба вуйи Артемидайн дарамат ва зав’ан абхъу гирами гъван урхюрайи шагъур вуйивал шлиз аygъдар? ³⁶ Му ляхин шаксуз вуйиган, учву архаин духъну ккун, апІру ляхин фагъумсузди апІуз хай даршул. ³⁷ Хъа учву мина дараматдин фукІа жин дарапІдар ва ихъ Артемида-аллагъдиз чІу-ру гафар дарпидар духначва. ³⁸ Эгер Димитрийинна дугъахъ хъа-йи устийирин дураихъна аьрз аш, мидиз ухъухъ диванханийирна диванбектир ахъуз: гъит дурари сар-сариина гъадина аьрз апІри. ³⁹ Эгер дураихъан жара гъерхруб аш, думу аьдати саягъниинди мажлиси гъял апІиди. ⁴⁰ Даршиш гъи гъабшибдин кІуллан гъа-лабулугъ гъитІбккну, ухъу тахсиркрап апІбан хатІавал а. Мициб гъалабулугъ ипбан бадали саб багънара адархъуз.

⁴¹ Гъамци дупну, дугъу халкъ алдагъуз гъитру.

**Павел
Македонияйиъ ва Грецияйиъ хъуб**

20 ¹ Гъалмагълар яваш гъашиган, Павел, ученикариз дих дапІ-ну, дурализ кюмекнан гафар ва баркаллагъ дупну, Македонияиз рякъю учІвру. ² Македонияйин ругарилан гъягъргуран, дугъу хъугънайдариз хайлин кюмекнан гафар гъапнийи. Хъасин



дumu Грецияйиз гъюру. ³Душваь дumu шубуб вазли гъузру. Думу душв'ан Сирияйиз сирнав апIуз гъязур шулайи арайиъ, жугъдариz дumu йикIуз ккун шулу. Гъаддиз Сирияйиз Македонияиантina гъягъюз дугъу къатIъ апIуру. ⁴Дугъахъди Верияйиан вуйи Пирин бай Сосипатр, Фессалоникииан вуйи Аристархна Секунд, Дервияйиан вуйи Гай, Тимофеj вa Асияйиан вуйи Тихикна Трофим хъади шулу. ⁵Дурап, улихъди душну, учуз Троадайиъ ккилигурى гъузру. ⁶Хъа учu Пасхайн Лавшарин машквран йигъарихъди Троадайиъ сатIи гъахънийча. Душваьра саб гъяфтайиъ имича.

Павели Евтих чIиви апIуб

⁷Элгъет йигъан, ученикар уъл ипIуз уч гъашиган, Павели дураихъди сюгъбатар гъахуji. Хъайигъан гимиийиъди рякьюз учIувуз ният ади, дumu дураихъди гъацIишваризкъан сюгъбат давам апIури гъузру. ⁸Учу деънайи зиин хулаъ гизаф чирагъар кархънайи. ⁹Павели аьгъовалар улупури имиди, улдаригъ деънайи Евтих кIуру живан дерин нивкIуз гъягъюру. Ва, нивкIуль айир, шубупи мертебайиансина ахъру. Хъа дumu за гъапIиган, лигуруш, дукIнайи. ¹⁰Павели, исина кудучIвну, дугъаз дилигну, хабахъна гъадагъуру ва кIуру: «Пашман махъанай, дугъ'ин жан илмиди», – кIуру. ¹¹Хъа дumu, зиина удучIвну, уъл гъудубтIну, дипIну, лап къаназ, гвачIиндизкъан учухъди сюгъбатнаш шулу. Хъасин дumu удучIвну гъягъюру. ¹²Гъадму вахтна жигъил бай хулаz чIивиди хуру, ва мид'ин вари гизаф рази гъахънийи.

Троадайиан Милитдиз гъюб

¹³Учу улихъди гимиийиъди, Павел диdiъ итузра ккади, Ass шагъриз сирнав гъапIунча. Дугъаз Assдиз яягъди гъягъюз ккundi, дугъу гъациб буйругъ тувнийчуз. ¹⁴Думу учуз Assдиз алахъиган, думура гимиийиъ итну, Митилена шагъриз гъафунча. ¹⁵Хъайигъан, дилин сирнав апIури, Хиос островдихъан ярхла дарди гими дебккча. Хъайигъан Сомос островдинра улуркъну, сад йигълан Милит шагъриз гъафича.

¹⁶Асияийиъ энгел дархъбан бадали, Павели Эфесдиз дурушуз къаст апIуру, гъаз гъапиш дumu Ерусалимдиз, эгер удукурууш, ХъуцIударин машквар улубкъайиз хъуркъуз гъялакди вуйи.



***Милитдиъ хъугънайидарин аъхюдари兹
баркаллагъ нуб***

¹⁷ Милитдиан дугъу, Эфесдин хъугънайидарин аъхюдар гъюри пну, дина адми гъаъру. ¹⁸ Хъа гъафиган, дурагиз күру:

— Узу Асияйиз гъафи йигъхъанмина вари вахтна учвухъди хъайивал аъгъячвуз. ¹⁹ Жугъдари уз'ина гъахи писвалариз дилигди, узу, дамагъар ктарди ва уларилан нивгъ рубзури, Агъайиз гъуллугъ апIури гъахъунза. ²⁰ Узу вари халкъдин улихъ ва ичв хуларий уж'вал хру варибикан учвуз аъгъювалар улупури гъахъунза. ²¹ Жугъдариизна грекариз узу Аллагъдин улихъ тахсрар гардандиз дисувалин ва ихъ Агъа Исаихъ хъугъвалин жавабдарвалиинди шагъидвал гъапIунза. ²² Хъа гъамус, Гирами Рюгънан амриз мютIюгъ шули, узу Ерусалимдиз душну ккунду. Хъа душваъ йиз кIул'ина фу гъюрушра, аъгъдарзуз. ²³ Ялгъуз саб аъгъязуз, Ерусалимдиз узуз аъзабарна дустгъар ккилигур, Гирами Рюгъну дидкан узуз гъар шагъриъ хабар тувра. ²⁴ Хъа узу бадали йиз уймур гъяйиф дарзуз, йиз метлеб узу Агъа Исаихъан къабул гъапIу гъуллугъ тамам апIуб ва жавабдарвалиинди инсанарин улихъ Аллагъдихъан вуйи багъиш'валикан Ужувлан хабарнан шагъидвал апIуб вуйиз. ²⁵ Ва хъана аъгъязуз, узу ичв арайиъ Аършарин Пачагълугъдикан аъгъювалар улупури, сарун рякъидарчвуз. ²⁶ Гъацира учвуз гъи кIураза, учвкан фуж пуч гъашиш, дидин тахсиркар узу хъидарза, ²⁷ фицики узу, учвхъан гъич фукIара гъитIитIибкIди, Аллагъдин ниятирикан аъгъювалар улупури гъахъунза.

²⁸ Ичв ва вари хъугънайидарин гъанаъ йихъай. Исаи Чан ифдиинди гъазаниш дапIину, Аллагъдихъ хъугънайидарин ва учв'ина Гирами Рюгъну аманат гъапIидарин гъайгъу зигай. ²⁹ Узуз аъгъязуз, узу учвхъан гъушиган, яман жанаврар дуфну, дураги сюрийиз инсаф апIидар.

³⁰ Ичв арайиъра гъацдар адмийир хъидики, дураги, ученикар чпиҳъинди илтIикIуз, нягъякъвалихъинди улхиidi. ³¹ Гъаддиз ихтиятди гъузай. Узу шубуд йисан йишвди-йигъди, уларилан нивгъ рубзури, ккарагури, учвуз мидкан аъгъювалар улупури гъахъунза. Му вари кIваин гъибтай. ³² Гъамус, гъардшар, учву Аллагъдиина ва Дугъан хайирнан Гафниина аманат апIуразачву. Дугъхъан учву хъугъувалиин мюгъкам апIуз ва Чан ужувлакк ккайдарихъди



учвузра ирс тувуз удукуруу. ³³Узу учвухъди хъайиган, саринна я арс, я гъизил, я багъя палат ккун гъапIундарза. ³⁴Учвуз ужууди аыгъячвуз, йиз ва узухъди хъайдарин игътияжар гъуркIуз гъаму йиз хилар кюмек гъахънийиз. ³⁵Уз’ан удукуруси учвуз улупунза, узуси зегъмет зигури, саилариз кюмек апIури, учвура духъну ккунду. Агъя Исаин гафар кIваин апIинай, фицики Дугъу Чав дупна: «ГъадабгъубтIан тувуб хушбахтаварвал ву».

³⁶ Гъамци дупну, думу, къамкъариина ис духъну, варидарихъди ккарагуру. ³⁷ Варидари, ишури, дугълан хабар алдагъури, макар апIуйи, ³⁸фицики дурап гизаф пащман духънайи, иллагъки дугъян: «Сарун узу учвуз рякъидарчвуз», кIуру гафариин. Хъасин дурапи думу гимийихъна рякъю тIаънийий.

Ерусалимдиз рякъю

21 ¹Дурарихъян жара духъну, учу гимийиъди дишди Кос, хъайигъян Родос кIуру островариина, хъя дилин Патара шагъриз гъафнийча. ²Финикийиз гъябгъру гими дабгну, дидиъ эъну, рякъю учIвча. ³Киприн кафари терефнахъантине душну, учу Сирийиз гъафича ва Тир шагъриз дергча, фицики душваъ гими-иан гъагъар адагъну ккундийи. ⁴Душваъ учуз ученикар гъидихъчуз ва дурарихъди саб гъяфта адапIча. Гирами Рюгънан амриинди дурапи Павелиз, Ерусалимдиз мягъян, кIури гъахъну. ⁵Ич душваъ шлу вахт ккудубкIиган, учу дилин удучIвну, ич рякъ давам гъапIча. Ученикари, чpin хпарна веледар хъади, учу шагъриантине рякъю тIаънийий, хъя гъюлин гъирагъдихъна гъафиган, учу къамкъариина ис духъну, ккарагнийча.

⁶Дурарикан гъарурихъди, баркаллагъ дупну, учу гимийиз за гъашича, хъя дурап чpin хулариз хътаку.

⁷Учу, рякъ давам апIури, Тириан Птолемаида шагъриз гъафича ва душваъ гъардшар тебрик дапIну гъафи йигъ гъаддарихъди адапIча. ⁸Хъайигъян рякъю учIвну, учу Къайсарияйиз гъафича ва Ерусалимди кадагънайи ургур гъардшикан сар вуйи Ужувлан хабар рабгъру Филиппдин хулаъ дергча. ⁹Дугъаз швуваъ душну адру, пайгъамбарвалин гафар кайи юкъур риш айи. ¹⁰Учу душваъ сакъюдар йигъар адахъян, дина Ягъудияйиан Агав кIуру пайгъамбар гъафнийи. ¹¹Учуухъна дуфну, дугъу, Павелин чIул гъадабгъну, дидихъди чан ликарна хилар йитIну, гъапнийи:



— Гирами Рюгъну гъамци дупна: «Ерусалимдин жугъдари му чуулин эйси магъя гъамци йитИди ва аллагъузарин хиллиз тувди».

¹² Му гафар гъеерхъиган, учу ва душваь аий адмийир вари Павелиз, Ерусалимдиз мягъян кури, ккарагуз хъюгъча. ¹³ Гъадмуган Павели жаваб тувру:

— Учву гъапІрачва? Гъаз, ишури, йиз юкІв дар апІурачва? Узу, йитІуб гъубзри, хъа гъацира Агъя Исаин ччуврнахъ Ерусалимдиз йикІузра гъязур вуза.

¹⁴ Думу, учу курайибихъинди илтІикІуз дархъиган, «Гъит Агъайин амур ибшри», — пну, гъитча.

Павел Ерусалимдиз гъюб

¹⁵ Гъадму йигъарихъан гъязур духыну Ерусалимдиз гъушча.

¹⁶ Къайсарияйиан сакъюдар ученикарра учухъди гъафнийи. Дурари учу ухдихъанмина ученик вуйи кипржви Мнасондихъна хъади гъафнийи. Учу гъадгъаъ дергча. ¹⁷ Ерусалимдиз гъафиган, гъардшари учу хушниинди къабул гъапІнийи. ¹⁸ Хъайигъан Павел учухъди Якъубдин хулаз гъафнийи. Душваь вари хъугънайдарин аъхюдар уч духынайи. ¹⁹ Павели, дурагиз салам тувну, жугъуд да-рударин арайиъ Аллагъди чан хилариинди гъапІу вари ляхнарикан хъайи-хъайиси ктибтуру. ²⁰ Мидкан гъеебхъиган, дураги Аллагъдин ад апІуру ва Павелиз куру:

— Гъардаш, увуз хъугъувалиина дуфнайи швнуд-сад агъзур жу-гъуд гъяркъюнвуз, амма дураги вари Къанун уъбхбан ижми терефкради ими. ²¹ Уву жугъуд дарударин арайиъ аий вари жугъ-дари, дураги ихъ аъдатар дюрюхри, веледарин суннат дараපІри, Мусайин къанунар кули дурухри пну, аъгъювалар тувра, кури, дурагиз увкан деебхъна. ²² Гъаци вуйиган ухъу гъапІхъа. Дурагиз, икибаштІан, уву гъюбкан ебхъиди. ²³ Гъаддиз учу куруб апІин: ич арайиъ Аллагъдиз ху дапІнайи юкъур кас а. ²⁴ Дурагихъди душну, марцц хъпан аъдат тамам апІин. Дурагихъан чин куладар ултІукъуз шлуганси, дураги гъапІу харжарин пул уву тув. Гъад-муган варидализ увкан курайиб гъякъ дарувал ва увтура къанундиз мютІюгъ шулайивал аъгъю хъиди.

²⁵ Хъугъувалиина гъафи жугъуд дарударикан гъулхиш, дурагиз учу, идолариз гъурбан гъапІу йикк, бугъмишди гъабкІибин



йикк дирипІри, ифи дурубхъри ва къяппавал дарапІри пну, кагъаз хътапІунча.

²⁶ Гъамци хъайигъан Павели, гъаму касар чахъди хъади душну, марцц хъпан аьдат тамам апІуру. Хъасин, марцц хъпан йигъар фила ккудуркІуруш ва дурарикан гъарурихъанди гъурбнар фила апІуруш, аьгью апІбан бадали, Аллагъдин хулаз гъюру.

Павел дисуб

²⁷ Аьдатниинди дерккнайи ургуд йигъ улдубчІвиган, Асияйиан вуйи жугъариз думу Аллагъдин хулаз ади рякъюру. Дураги халкъдик гъалабулугъ кипру ва, гъамци чИгъар апІури, думу дисуру:

²⁸ – Израилин агъалайир! Кюмекназ гъачай! Му жви инсанар къанундиз, ихъ халкъдиз ва ихъ Аллагъдин хулаз къаршу вуди дих апІурайи кас ву. Мидихъна мугъу, Аллагъдин хулаз грекарра хъади дуфну, ихъ гирами йишв чиркин гъапІну.

²⁹ Дурагиз, улихъ йигъари шагърий дугъахъ Эфесдиан вуйи Трофим хъади гъяркъган, Павели думура Аллагъдин хулаз хъади дуфнайиси гъибгънайи.

³⁰ Шагърий гъалабулугъ абхъру, варишварихъанди адмийир, жаргъури дуфну, уч хъуз хъюгъру. Дураги Павел, дидисну, гужназ Аллагъдин хул'ан адагъуру ва дишла раккнар гъяркъру. ³¹ Дурагиз Павел йикІуз ккун гъабхъиган, къушмарин ахюрихъна, вари Ерусалимдик гъал кабхъна пну, хабар гъябгъюру. ³² Дугъу, эскрарна юзбашайир гъадагъну, гъадина гъяракат апІуру. Ахюорна эскрар гъяркъиган, дураги Павел урччуввал дебккру. ³³ Гъадмуган ахюори, дуфну, думу дидисну, къориз думу зунжрари йитІуз буйругъ тувру ва гъерхру:

– Му фуж ву? Мугъу фу гъапІну?

³⁴ Халкъдин арайиан сари саб, тмунури саб кІури, чИгъар апІурайи. Дурагин гъугънагъян гъаври ахъуз даршиган, ахюори Павел эскрарин йишваз гъахуз гъитру. ³⁵ Павел умбарихъна гъахиган, эскрари гъадлантина думу хилариинди гъахуру, гъаз гъапиш халкъдин гъварчну думу парчийр апІуб мумкин вуйи. ³⁶ Дураги, дугъахъ хъергну:

– Думу йивну йикІай! – кІури, чИгъар апІурайи.

³⁷ Эскрари чав гъадрарин йишваъ аърайиган, Павели къушмарин ахюрихъан гъерхру:



— Увхъан гъерхуз хай шулин?

Дугъу жаваб тувру:

— Увуз грек чал альгъявлзки! ³⁸ Дици вуш, багарихъди гъалабулугъ гъитИбккну, ичли чюлиз юкъуд агъзур гъачгъар адау Египетжви уву вуна?

³⁹ Хъа Павели жаваб тувру:

— Узу Киликийиан вуйи жугъуд вуза, альгъю Тарс шагърин ватандаш вуза. Увкан миннат вуйиз, узухъ халкъдихъди улхуз гъит.

⁴⁰ Гъадмуган дугъу ихтияр тувру. Павелира, умбриина за духьну, халкъдиз хилин ишара апIуру. Хъа вари яваш гъашиган, думу жугъуд чалниинди улхуз хъюгъру.

Павелин улхуб

22 ¹«Гъардшарна абийир, гъамус узу тахсиркар дарувалихъ хъебехъай». ² Павел чпиҳъди жугъуд чалниинди улхуради деебхъну, дурап хъанара яваш шулу. Гъадмуган дугъу кIуру:

³ — Узу Киликийиъ айи Тарсдиль бабкан гъахъи жугъуд вуза, хъа узу мушваъ, гъаму шагъриъ тербияламиш гъашир вуза. Йиз мялим Гамалиили узу ихъ абийирин къанунар дишли урхуреси тербияламиш гъапIну. Учву гъи фици вуш, узура гъаци кIваантIан Аллагъдин гъуллугъниин алди гъахънийза. ⁴ Агъайин рякъюъди гъягъюрайидар йихури, жилар ва дишагълийир дисури, дустагъ апIури гъахънийза. ⁵ Мидкан аххону маллиирихъан ва кавхъириин мажлисдихъан шагъидвал апIуз шулу. Дамаскдиль айи жугъуд дустариз вуйи кагъаз узухъна гъаддари тувунзухъна. Узура, душван хъугънайидар, рукъари йитIну, Ерусалимдиз духну, жаза гъадабтIуз, гъадина гъушунза. ⁶ Хъа рякъюъ, Дамаскдиз багахъ шулайиган, лисун шулайи арайиъ саб дупну завариан узу зурба вуйи аквну ккаунзу. ⁷ Узу жил'ина алдакза, ва узуз гъамци кIурайи дих гъеебхъуз: «Эй Саул! Саул! Уву Узухъ гъаз хъергнава?» ⁸ Узу гъерхза: «Уву фуж вува, Агъя?» Дугъу узуз жаваб туву: «Узу уву хъергнайи Назаретдиан вуйи Иса вуза». ⁹ Узухъди хъайидариз акв гъябкънийи, хъа узухъди улхурайи дих дурапи аннамиш гъапIундай. ¹⁰ Гъадмуган узу гъапунза: «Узу гъапIну ккунду, Агъя?» Агъайи узуз гъапунзуз: «Гъедужвну, Дамаскдиз гъараахъ, хъа душваъ, уву фу дапIну ккундуш, пидивуз». ¹¹ Узуз фукIа дярябкъди гъабшизуз, фицики зурба аквну кур



гъапІнийзу. Гъаддиз узухъди хъайидари, йиз хил дибисну, Да-маскдиз гъахнийзу.

¹² Ва магъа, Аллагъ кІваин али ва къанунариз мютІюгълу, ча-кан вари жугъдар ужуди улхру Ананай кІуру касди, ¹³ узухъна дуфну, гъапизуз: «Саул гъардаш! Рябқюри йихъ!» Гъамци гъа-пибси, узуз думу гъяркъуз. ¹⁴ Хъа дугъу узуз гъапизузки: «Ихъ абиирин Аллагъди Чан ният увуз аygъю хъпан бадали, Гъякълур рякъбан бадали ва Дугъан мелзналан дих ебхъбан бадали уву ка-дагъна. ¹⁵ Уву вари инсанарин улихъ увуз гъябқюбдинна гъееб-хъубдин шагыид хъидива. ¹⁶ Гъаци вуйиган, уву фтиз ккилигура-ва? Гъудужвну, штуан йихъ, Агъа Исайихъ хъугъувалиинди яв гунгъарихъан марцц йихъ».

¹⁷ Узу Ерусалимдиз хътакиган, Аллагъдин хулаъ ккарагурайи вахтна, узуз аյжайибди саб гъябкъуз. ¹⁸ Узуз гъамци кІурайи Иса гъяркъуз: «Тяди Ерусалимдиан гъараҳ, фицики дурари Йиз гъякънаан вуйи яв шагыидвал къабул апІидар». ¹⁹ Узу Дугъаз гъа-пиза: «Я Агъа, дурализ, узу фици Увухъ хъугърайи адмийир дус-тагъ апІури, урччури гъахънуш, аygъя. ²⁰ Яв шагыид Стефандин ифи удубзруганра, думу ляхниин рази духъну, дугъаз йивурайи-дарин палтар урхюри, гъаравлий гъахъунза». ²¹ Гъадмуган Агъа-йи узуз гъапи: «Гъараҳ, Узу уву ярхлариз, жугъуд дарударихъна гъаъразаву».

Павел – Римдин ватандаш

²² Гъамусдиз дураг Павелихъ хъпехъури айи, хъа му гафар гъе-ерхъиган, чИгъар апІуз хъюгъру:

– Думу йивну йикІай! Думу дюн'яйин яшамиш хъуз ла-йикъ дар!

²³ Дураги, чИгъар апІури, чпин палтар хътитури, завуз би-шируг гатІабхъуи. Гъамци дураги чпин хъял улупуйи. ²⁴ Къуш-марин аyxюри Павел, эскрарин йишваз духну, дугъкан дицдар чИгъар гъаз апІураш, аygъю апІбан бадали, гъирмажи урччувуз буйругъ тувру. ²⁵ Хъа Павел урччван бадали йитІурайиган, дугъу гъадушвахъ хъайи юзбашийхъан гъерхру:

– Суд дараапІди, Римдин ватандаш урччувуз ихтияр анчвуз?

²⁶ Му гафар гъеерхъиган, юзбашийи, къушмарин аyxюрихъна душну, кІуру: «Уву гъапІрава? Му кас Римдин ватандаш ву!»



²⁷ Къушмарин ахюори, Павелихъна дуфну, гъерхру:

— Йипа, уву дугъридан Римдин ватандаш вуна?

— Ав, — пну, жаваб туву Павели.

²⁸ Къушмарин ахюори гъадмуган:

— Узу гъаму ватандаш'вал ахюо пуларихъ гъадабгъунза, — гъапи.

Хъа Павели кІуруки:

— Хъа узу гъадму ватандаш вуди бабкан гъахъунза.

²⁹ Павелихъан силис гъадабгъуз ккайдар дугъхъан дишлади гъудучІву. Чав Римдин ватандаш зунжкәри йитІувал аыгъю гъабшиган, къушмарин ахюоризра гучI гъабхънийи.

Павел ахюо суддин улихъ

³⁰ Хъайигъан къушмарин ахюори, жугъдари Павелик фу тах-сир кипраш, якынди аыгъю апІбан бадали, ахюону маллайириз-на вари ахюо суддиз уч хъуз буйругъ тувру. Павелилан зунжкәр алдагъну, думу дурарин улихъ дерккру.

Павелна жугъдарин ахюодар

23 ¹ Ахюо суддис айи диванбекириз дилигну, Павели кІуру:

— Йиз гъардшар! Гъийин йигъ'инакъан узу Аллагъдин улихъ намусниинди яшамиш гъахъунза.

² Му гафар гъеерхыиган, маллайирин ахюор Ананайи, гъваларихъ хъайдариз, Павелин мучІимчІихъан тувай пну, буйругъ тувру. ³ Хъа Павели дугъаз кІуру:

— Увузра Аллагъди йивидивуз, дабснайи цал! Мушв'ин Къа-нундииинди йиз диван апІуз дөңнайир вува, хъа уву, Къанун чІоб-гъюри, узуз йивуз алаурава.

⁴ Дугъан гъваларихъ хъайдари Павелиз гъапи:

— Ахюону маллайиз гъацдар гафар кІурава?

⁵ Павели:

— Гъардшар! Узуз думу ахюону малла вуйиваликан аыгъдай-зуз. Фицики дибикIна: «Яв халкъдин гюокумдриз пис гафар мапIан».

⁶ Павелиз душваъ уч духьнайидарикан садар саддукийир, тмун-дар фарисийир вуйиб аыгъю гъабшиган, дугъу зарбди кІуру:

— Гъардшар! Узу фарисейин бай фарисей вуза! Хъа суддиз узу, гъачIидар чIиви хъпак йиз умуд ка кІури, духназу.



⁷Дугъу гъамци гъапиган, фарисийиринна саддукайирин арайиъ гъюжат абхъру ва дураг кьюб йишваз пай шулу. ⁸Фицики саддукайири я гъачIир чIиви хувал, я малайикар, я рюгъяр айидар дар, хъа фарисийири гъадраг вари айидар ву, кIури шуйи. ⁹Варидари чIигъар апIуз хъюгънийи, хъа фарисийиринан сакьюодар альимари, гъамци кIури, гъюжат апIуз хъюгъру: «Учуз му касдик саб чIуру фикирра бихъурадарчуз. Белки рюгъ, ясана малайик дугъахъди гъулхнушул?»

¹⁰Гъюжатар артухъ шулайиган, дураги Павел парчийир дарапI-ри пну, къушмарин ахюори, эскрариз, душну, думу дурагигъян гъядягъну, эскрарин йишваз гъахуз буйругъ тувру.

¹¹Хъайишван Агъайи, Павелин улихъна ачмиш духъну, кIуру:

— ГучI мапIан, Павел, фицики уву Узкан Ерусалимдиъ фици шагъидвал гъапIнуш, Римдиъра гъаци шагъидвал апIидива.

Павелиз жугъдарин къаршуval

¹²Иигъ улубкъуради, жугъдари чпин арайиъ Павел дарчIикъан гагъди, дирипIри ва дурубхъри гъузуз ху апIуру. ¹³Ху гъапIдарин къадар ягъчIвур кастIан артухъ вуйи. ¹⁴Дураги, ахюону маллии-рин ва кавхайирин багахъна душну, гъамци кIуру:

— Учу, Павел йивну йикIайиз, дирипIри ва дурубхъри гъузар-ча пну, ху дапIнача. ¹⁵Гъаци вуйиган, учву ва ахю судди, думу ичв улихъна хруси, къушмарин ахюорикан, Павелин месэла хъа-на айибIан гъякълуди ахтармиш апIуз ккундучуз кIури, тIалаб апIинай. Хъа учу думу мина гъюру рякъют йикIуз ккеъдича.

¹⁶Гъаму къастнакан Павелин худлиз ебхъуру. Дугъу, эскрарин йишваз дуфну, дидкан Павелиз хабар апIуру. ¹⁷Гъадмуган Паве-ли, юзбашийирин сариз, чахъна дих дапIну, кIуру:

— Гъаму живан къушмарин ахюорихъна гъайих, мугъаз ахю-рикна кIуру саб хабар альгъя.

¹⁸Дугъура, живан къушмарин ахюорихъна духну, кIуру:

— Дустагъдиль айи Павели, узуз чахъна дих дапIну, гъаму живан увухъна гъахуз тIалаб гъапIну, гъаз гъапиш мугъаз увуз фу-вш пуз ккунди а.

¹⁹Къушмарин ахюори, живандин хил дебисну, гъирагъдиз гъа-даьну, гъерхру:

— Увуз фу пуз ккунди авуз?



²⁰ Дугъу жаваб туву:

— Жугъдари, дугъан месэла хъана айибтІан гъякълуди ахтармиш апIуз ккундучуз кIури, увкан закур Павел аыхю суддиз хувал ккун апIуз йикърар дапIна. ²¹Дураихъ межъебехъян, гъаз гъапиш дугъаз ягъчIур касдилан зина адмийир ккеына. Дураи, думу дарчIикъан гагъди, дирипIуз ва дурубхъуз ху дапIна. Дураг гъамус, гъаци апIуз, яв разивализ ккилигурा.

²² Күшмарин аыхюрира:

— Уву узуз ктибтубдикан саризкъан макIан — пну, живан деетуру.

Павел Къайсарияйиз гъауб

²³Хъасин дугъу, чан кьюр юзбашийиз дих дапIну, кIуру:

— Къайсарияйиз гъягъюз кьюдварж эскер, ургцIур гъяйвнарин эскрар, кьюдварж ярхи жидийр хъайи эскрар хябъядин сяльт урчIувбдиз гъязур апIинай. ²⁴Гъацира, Павел гъакимдар Феликс-дихъна гъахбан бадали, гъяйвнарра гъязур апIинай.

²⁵Хъа дугъу гъамцдар гафар кайи кагъаз гъибикIнийи:

²⁶— Яв ахювал гъакимдар Феликс! Узу, Клавдий Лисийи, увуз саламар хътаураза. ²⁷Гъаму кас жугъдари дидисну йикIуз цИбтІан имдайи, хъа узу, думу Римдин ватандаш вуйиб аygю дубхъну, думу гъюрхюнза. ²⁸Думу тахсиркар апIбан себеб аygю апIуз ккунди, узу думу суддиз гъахунза. ²⁹Лигуруш, дугъак кирчрайи вари тахсрар дуарин чин хусуси къанунарихъди аялакъалудар вуйи, хъа думу йикIуз вая дустагъ апIуз лайикъ вуйи саб тахсирра дугъак ктар. ³⁰Хъа му касдиз къаршу вуди чIуру къастар дапIна-йиваликан узуз гъапиган, узу думу дишлади увухъна хътаунза ва думу тахсир апIурайидариз чин дугъак кирчрайи багънийир яв улихъ ачухъ апIуз буйругъра тувунза. Сагъ ишриву!

³¹Эскрарира, дугъан буйругъ тамам дапIну, Павел гъадму йи-гъан хябъядиз Антипатридайиз гъахуру. ³²Хъайигъан гъяйвнарин эскрар, Павелра хъади, Къайсарияйиз рякъю учIвру, хъа миди вуйи эскрар чин йишваз хътакуру. ³³Къайсарияйиз гъафиси, Павелихъ хъайи гъаравлари кагъаз гъокумдрихъна гъабхуру ва Павел дугъан хилиз тувру. ³⁴Хъа Феликсди, кагъаз дурхну, Павел фуну юрднаан вуш, гъерхру. Думу Киликияйиан вуйиб аygю гъабшиган, ³⁵Феликсди Павелиз кIуру:



— Узу увухъ, уву тахсиркар апIурайидар гъафиган, хъпехъидиза.

Ва Павел Гырорддин дараматдиз гъаравликкди уърхюз буйргъ тувлру.

Феликсди

Павелин месэла ахтармиши апIуб

24 ¹Хъуд йигълан, сакьюдар кавхийр ва Тертулл кIуру айрзачи хъади, аххюну малла Ананай гъюру ва гъюкумдрин улихъ Павелиз къаршу вуди дугъян тахсрар ктухур. ²Чаз дих гъапIиган, Тертулли, Павел тахсиrlамиш апIури, гъамци кIуру:

³— Аххю вуйи Феликс, гизаф вахтнан мясляльт ва халкъдин ужуб дуланажагъ айвалиинди учу увуз буржлу вучу ва му учу разивалиинди къабул апIурача. ⁴Хъа уву артухъ инжик дараapIбан бадали, увуз хас вуйи сабурлувалиинди ич жикти вуйи айрзайхъ хъпехъуб ккун апIурача. ⁵Фицики учу му кас мясляльт Чюбгъ-рур, вари дюн'яйиъ жугъдарин арайиъ гъалабулугъар гъитIир-ккурайир ва назаретлу кучIин диндин кIул вуйивал ачухъ гъапIунча. ⁶МитIланра гъайри, дугъяз Аллагъдин хал чиркин апIуз ккун гъабхъну, хъа учу думу гъидисунча. [7]*

⁸Дугъхъан силис гъадабгъну, учу дугъак кирчрайи тахсрар увхъан айгъю апIуз хъибдивухъан.

⁹Вари жугъдари, мураг вари гъякъяр ву кIури, Тертуллин га-фар тасдикъ апIуру.

Павелин улхуб

¹⁰Гъякимдари, ишара дапIину, чаз улхуз ихтияр тувиган, Павели кIуру:

— Уву гизаф йисари гъаму халкъдин гъякимвал апIурайивал айгъяди, узу шадвалиинди узук кирчрайи тахсрар дюз дарувал улупидиза. ¹¹Увхъан ахтармиш апIуз шулвухъанки, узу Ерусламдиз икрам апIуз гъафи вахтнахъанмина йицIикьюд йигътIан артухъ гъабхъундар. ¹²Гъаму вахтнан айтI узу Аллагъдин хулаъ шлихъдикъ я гъюжатар апIури, я мистарь, я шагърин жара йишваъ

* 24:7 Грекарин саспи БикIбарий дидикIина: «Хъа думу учуз ич закондииинди жа-зайль итуз ккун гъабхъунчуз, амма къушмарин аххюор Лисийди думу учхъан гъидисну. Дугъу думу тахсиrlамиш апIурайидариз увухъна гъягъюз буйргъ дебккний».



халкъдик гъал кипри гъяркъю кас адар.¹³ Ва гъамусра дураги-хъан чпи узук кирчрайи тахсрар тасдикъ апIуз шули адар.¹⁴ Хъа узу гардандизъ бисуразаки, дураги кучтал дин вуди гъисаб апIу-райи БикIубдин бинайин алди йиз абириин Аллагъдиз гъуллугъ апIураза. Узу Къанундизъ улупнайи гъарсабдихъ ва Пайгъамбра-рин китабарий дидикIнайидариихъ хъугъраза.¹⁵ Ва, дуаринси, йизра Аллагъди гъам гъякълу, гъамсана гъякъсуз касар, гъачIи-хъан, чIиви апIбак умуд кайиз.¹⁶ Гъаддиз Аллагъдин ва инсанарин улихъ йиз намус марцци хъпан бадали, узхъан шлукъан чар-йир зигураза.

¹⁷ Гизаф йисар улдучIвхъан, узу, йиз халкъдин арайиъ сада-къя ва гъурбанар апIуз Ерусалимдиз хъадакну гъафунза. ¹⁸ Дупну ккундуки, узу марцци апIру аьдатра тамам апIури, дурагиз Ал-лагъдин хулаъ гъяркъюнзу. Узу халкъдик гъалабулугъ кипри гъа-хъундарза. ¹⁹ Мушваъ, эгер узуз къаршуди кIуруб аш, Асияйиан вуйи жугъдарра яв улихъна дуфну ккундийи. ²⁰ Ясана гъамсяялт мушваъ айидари, узу Ерусалимдиз аьхю суддин улихъ деркки-ган, узук фицдар тахсрар кирчнуш, гъит йипри. ²¹ Дуарихъан пуз шлуб ялгъуз гъамутIан дар: дуарин къялаъ дийигъну, узу: «Узу гъачIидар чIиви хъпахъ хъугъра кIури, гъи учву йиз диван апIурачва», – пну, Чигъ гъапIунза.

Павел дустагъдив хъуб

²² Гъадмуган Агъайн рякъ ужуди аьгъю Феликсди, диван апIувал дебккну, гъамци гъапи:

– Узу яв ляхниз къушмарин аьхюр Лисий гъафи вахтна ли-гида.

²³ Дугъу юзбашийиз Павелиин ул алди гъитуб ва саризра ду-гъахъна гъюз ва дугъан ярап-дустариз дугъан гъайгъушнаъ хъуз гъадагъа дараапIуб буйругъ тувру. ²⁴ Сакьюдар йигъарилан Феликс, чан жугъуд шив Друзиллара хъади дуфну, Павел хуз гъитну, Месигъ Исаин хъугъваликан вуйи дугъан улхбарихъ хъпехъуру. ²⁵ Хъа Павел гъякъваликан, сабурлуваликан ва аьхирзамандихъан шлу дивандикан улхуз хъюгъиган, Феликсдиз гучI шулу ва кIуру: «Гъелелиг гъарах. Хъа вахт гъабшиган, дих апIидизавуз». ²⁶ Паве-ли чав деетузди пул тувур, кIури, Феликсдин миж кайи. Гъад-диз дугъу кми-кмиди Павелиз чахъна дих апIури ва дугъахъди



сюгъбатар гъахури гъахыну. ²⁷ Къюд йис улдучІвхъан, Феликсдин йишв'ин Порций Фест дерккнийи. Жугъдар рази ктаури, Феликсди Павел дустагъдиль итнийи.

Павел Фестдин улихъ хъуб

25 ¹Фест гъякимдар духыну шубуд йигълан, думу Къайсария-йиан Ерусалимдиз гъягъюру. ²Аххону маллиири ва жугъдарин садпи агълари дугъан улихъ Павелин тахсрар ктухуру. ³Дураги, гъамци гъапІиш, ужу хъибди, кІури, Павел Ерусалимдиз гъауб Фестдикан тІалаб апІуру, фицики дураги думу рякъюъ йикІуз ккунди айи. ⁴Фестди дураги, Павел Къайсария-йиль мюгъкамди уърхюра ва багарихъди учв дина гъягъюрза, кІури, жаваб тувру.

— Гъит ичв ахъударикан сакьюдар узухъди гъюри, — гъапи дугъу, — ва думу касдик тахсир каш, гъадушвай тахсиркар апІри.

— Фест дурагиҳди ургуд-йицІуд йигълан гъузру. Къайсарияйиз хътакиган, Фестди, диванбегийин йишв'ин деъну, Павел дина хуз буйругъ тувру. ⁷Хъа думу гъахиган, Ерусалимдиан гъафи жугъдари, Павел къялаъ тІальну, дугъак гизаф ахъю тахсрар кирчру, амма дурагиҳан мураг усбат апІуз гъахъундар. ⁸Павели: «Узу жугъдарин къанундиз, Аллагъдин хулаз, я Римдин паччагъдиз къаршу ляхин гъапІундарза», — кІури, учв дурагиҳан уърхюри гъахыну.

— Хъа Фест жугъдар рази апІуз чалишмиш шули гъахыну ва гъаддиз Павелиз гъамциб суал тувру:

— Увуз, Ерусалимдиз душну, гъадушвай, увук кирчрайи тахсариз лиғнү, узу яв диван дапІну ккундуунуз?

¹⁰ Павели жаваб тувру:

— Узу гъамусяльт йиз диван дапІну ккуни Римдин паччагъдин дивандин улихъ дийигъназа. Узу жугъдариз саб чуру ляхинра гъапІундарза, му увуз лап ужуди аygъявуз. ¹¹Эгер узу гъякъ дарш ва йикІаз лайикъ вуйи ляхин гъапІнуш, узу дидккан кІул кка-дабгъури адарза. Хъа гъаму касари, йиз тахсир адарди, узук тахсрар кирчраш, узу шлихъанкІа дурагин хилиз тувуз хъибдар. Узу йиз диван Римдин паччагъди апІуб ккун апІураза.

¹² Мажлисдихъди мясяляйт дапІну, Фестди жаваб туву:

— Уву яв диван Римдин паччагъди апІуб ккун гъапІунва, гъаддиз Римдин паччагъдихъна гъягъидива.



Фестдинна Агриппайн сюгъбат

¹³ Сакьюдар йигъарилан паччагъ Агриппа, Вереникара хъади, Фест тебрик апІбан бадали, Къайсарияйиз гъюру. ¹⁴ Дурари душваъ адау сакьюдар йигъарин арайиъ Фестди паччагъдиз Павелин месэлайикан, гъамци кІури, ктибтуру:

— Мушваъ Феликсди дустагъ дапІну гъитнайи сар кас а. ¹⁵ Узу Ерусалимдій айиган, дугъак тахсрар кирчри, жугъдарин ахюну маллирина кавхьири дугъан диван апІуб тІалаб гъапІни-и. ¹⁶ Хъа узу, тахсир илипурайириз, тахсрар кирчрайидарихъди машна-машди дяркъну, учв урхюз мумкинвал тутрувди, думу аյжализ тууб римлуйирин айдат дар, гъапунза. ¹⁷ Гъаддиз, гъадму жугъдар мина гъафиган, узу ляхин къаназ илдидипди, хъайи-гъан диванбегийин йишв'ин деъну, гъадму кас дина хуз буйругъ тувунза. ¹⁸ Думу тахсиrlамиш апІурайдар гъудужвну гъулхиган, дурарихъан узу ккилигурайи гъич саб тахсирра пуз гъабхъундар. ¹⁹ Дурари дугъахъди чпин диндикан ва гъапІур-вуш сар дукІана-и Исаикан гюжатар апІури гъахъну. Павели, думу чИивир ву, кІурира тасдикъ апІурайи. ²⁰ Му ляхнис фици лигуруш аygъдарди, узу Павелихъан, Ерусалимдиз душну, гъадушваъ яв диван дапІну ккундунуз, пну, гъерхунза.

²¹ Хъа Павели чан месэла Римдин паччагъ Августди гъял апІуб тІалаб апІбаз лигну, узуз думу Римдин паччагъдихъна гъауз мумкинвал хъайиз, Къайсарияйиъ гъаравликк гъитуз буйругъ тувунза.

²² Агриппайи Фестдиз: «Уузра гъадму касдихъ хъпехъуз ккунди азуз», — гъапиган, Фестди: «Закур уву дугъахъ хъпехъидива», — пну, жаваб тувру.

Павел Агриппайн улихъ хъуб

²³ Хъайигъан, Агриппана Вереника гизаф дамахлуди дуфну, къушмарин ахюдарихъдина шагърин адлу агъалиирихъди диванхайиъ учІиган, Фестди Павел хуз буйругъ тувру. ²⁴ Хъасин Фестди кІуру:

— Агриппа паччагъ ва вари мушваъ айи агълар! Учвуз Ерусалимдій ва гъамушваъ чакан вари жугъдарин жямяльтди айрзар апІурайи гъаму кас рякъюрачвуз. Дурари, му кас яшамиш духьну ккундар, кІури, чИигъар апІури гъахъну. ²⁵ Хъа узу, думу йивну



йикIуз лайикълу вуйи гыч саб тахсир ктар, кIури, гысаб апIураза. Хъа дугъу чан диван Римдин паччагъди апIуб тIалаб гъа-Пиган, узу думу дугъахъна гъауб къатIъ гъапIунза.²⁶ Хъа узу Римдин паччагъдиз якынди фу бикIурушра аьгъдруган, гъаддиз думу ичв варидаrin улихъна, иллагъки, паччагъ Агриппа, яв улихъна хуб буйругъ туувунза. Учву дугъан ляхин ахтармиш апI-балан къяляхъ, узу Римдин паччагъдиз му ляхникан фу бикIу-руш ачухъ шул.²⁷ Фицики дустагъ дапIнайи касдин тахсир фтий аш, улулупди, гъауб фагъумсуз ляхинси гыбгъразуз.

Павелин улхуб

26 ¹Гъадмуган Агриппайи Павелиз кIуру:
— Гъамус увхъан улхуз шулувхъан.

Павелира, чан хил за дапIну, чан тахсир адруваликан пуз хъюгъру:

² — Агриппа паччагъ! Жугъдари узук кирчрайи вари тахсари-хъан яв улихъ жвув урхюб аьхю баht вуди гысаб апIураза.³ Фи-цики уву жугъдарин вари аьдатарихъди ва гюжат али месэлий-рихъди таниш вува. Гъаддиз увкан узухъ сабурниинди хъпехъуб тIалаб апIурза.

⁴ Вари жугъдариz, фици узу жигъил вахтнахъанмина йиз халкъ-дин арайиъ, хъасин Ерусалимдис яшамиш шули гъахънуш, аьгъя.⁵ Дурализ узу ухдихъанмина аьгъя ва, чпиз ккун гъабхъиш, ду-рарихъан узу фарисей вуди хъуваликан ва ихъ диндиз тялукъ вуйи ижми саягънан уьмур хъапIри хъуваликан шагъидвал апIуз шулу.⁶ Гъамус узу, Аллагъди ихъ абириз туvu гафнак умуд кив-баз лигнu,⁷ йигъ-йишвди Аллагъдиз гъуллугъ апIури, ич йицIи-кьюб тухми думу гаф тамам хъпак умуд кивбаз лигнu, суддин улихъ дийигъназа. Магъа гъаму умудназ лигнu, Агриппа паччагъ, жугъдари узу тахсиркар апIура.⁸ Уву, Аллагъдихъан гъачIидар Чиви апIуз хъуб мумкин дарубси гысаб апIурана?⁹ Сифтейи-ан узура, Назаретдиан вуйи Исаин гаfnаз къаршу вуйи гизаф ляхнар апIуб лазим ву, кIури, гысаб апIуйза.¹⁰ Узу гъадрар вари Ерусалимдис апIуриза. Мидкан аьхюну маллайрихъан гъокум гъадбгъну, аьхочIвеъ Исаихъ хъугърайидар дустагъдиль ирчун-за. Хъа Исаин ученикар йивну йихру вахтна, узу мид'ин рази шуйза.¹¹ Узу дурагъ вари мистариъ, дурарихъди чпин хъугъувал



батIул апIуз гъитуз чалишмиш шули, жаза туври гъахънийза. Дурарихъна йиз даккнишин гъадмуъян гъатиб вуйики, узу дурарихъ хъергүз жара шагъаризра кмиди гъягъойза.

¹² Гъациб къаст ади узу сабан, аххуну маллайирин гъюкум ва табшургъар хъади, Дамаскдиз гъушнийза. ¹³ Лисун шулайи вахтна, узу рякъюь айиган, ригъдунтIан гужли аквну, завариан гъюри, узуна узухъ хъайдар кканьийи. ¹⁴ Учу вари жил'ина алдакчу, ва узуз узухъди жугъуд Чалниинди улхурайи гъамциб дих гъебхъуз: «Эй Саул, Саул! Уву Узухъ гъаз хъергнава? Аллагъдиз къаршу гъудужвну, жувуз писвал апIурава». ¹⁵ Хъа узу: «Уву фуж вува, Агъа?» – пну, гъерхза. Ва Агъайи узуз жаваб туву: «Узу уву хъергнайи Иса вуза. ¹⁶ Ликриина гъудужв. Гъеле увуз гъябкъюб гъубзри, хъа Узу увуз улупуз ккимбуздинра шагъид шлу, Йиз гъуллугъчиди дерккүз увухъна ачухъ дұхназа. ¹⁷ Узу уву яв халкъдихъан уърхидиза ва жугъуд дарударихъна гъядизаву. Хъа дурарихъанра увуз зарап тувуз хъибдар. ¹⁸ Уву дурарин улар арцнуну, дурар мучIушнахъна аквнахъна, иблисдин гъюкмиккан Аллагъдихъна хидива. Дурарихъан гъамци чипин гунгъарилан хил алдабгъувал ва Узухъ хъуғъбиинді Аллагъдин терефназ гъафидарин арайиъ чипиз йишв гъазанмиш апIуз хъибди».

¹⁹ Гъаци вуйиган, паччагъ Агриппа, узхъан аршарин амрихъ хъпебехъди гъузуз гъабхъундарзухъан. ²⁰ Хъа Дамаскдиз, гъацира Ерусалимдиз вары вары уылкейиъ, хъасин жугъуд дарударин арайиъра, дурари, чипин тахсрар гардандиз дидисну, Аллагъдихъинди илдицбан бадали ва чипин ляхнариинді му тасдикъ апIбан бадали, аygъювалар улупуз хъюгъюнза. ²¹ Гъамдин кIуллан жугъдари, узу Аллагъдин худаъ айи вахтна, дидисну йикIуз ккун гъабхъну. ²² Хъа Аллагъди узуз, гъийин йигъазкъан кюмек апIура. Дугъан кюмекниинді узу гъи, бицIидариз ва аххудариз шагъидвал апIури, пайгъамбрари ва Мусайи гъаци хъибди гъапибдилан гъайри, фукIара жара артухъуб гъапундарза.

²³ Месигъ йикIиди ва гъийихдари кан сарпирди, гъачIихъан, Чиви хъиди, ва Дугъу гъам жугъдари, гъамсана жара халкъариз акв хибди.



*Агриппа хъугъувалишина хуз
Павелин чалишиши'вал*

²⁴ Павел учв уърхюз улхури имиди, Фестди зарб сесниинди:

— Павел, уву деллур вува! Аъхю зигъимлували уву айкъвиан адаънаву! — кIуру.

²⁵ — Узу деллур дарза, гизаф гъюрматлу Фест, — жаваб туву Павели. — Узу кIурайиб тъякълуб ва фагъумлуб вуйиз. ²⁶ Паччагъ Агриппайиз мидкан айгъя ва узу дугъахъди ачухъди кIураза. Узу фикир апIуразаки, дугъу йиз вари гафариз фикир тутрувди гъид-рибтур, фицики мурап вари гизафдариц рякъюри гъашидар ву.

²⁷ Паччагъ Агриппа! Уву пайгъамбраихъ хъугъурна? Уву хъугъ-райиб айгъязуз.

²⁸ Гъадмуган Агриппайи Павелиз кIуру:

— Уву, узу гъамци рягъятди Исаийхъ хъугъуруп хъуз шул кIури, фикир апIурана?

²⁹ — Рягъятди вуш вая читинди вуш, му метлеблу дар, — жаваб туву Павели. — Неинки уву, хъа гъи узухъ хъпехъурайидар вари узусдар хъузди, амма зунжар алдарди, Аллагъдиз ккарагураза.

³⁰ Гъадмуган паччагъ, гъакимдар Фест, Вереника ва дура-рихъди деънайидар вари гъудужвуру. ³¹ Диванханайиан удучIв-ну, чпи-чиҳхъди гъамци улхуру:

— Му касди йикIбаз вая дустастъ апIбаз лайикълу вуйи саб чIу-ру ляхинра дапIнадар.

³² Агриппайи Фестдиз гъапи:

— Му кас, эгер дугъу Римдин паччагъдин улихъ жаваб тувуз ккун дапIнадайиш, азад апIузра шуйи.

Римдиз рякъюз

27 ¹Учу гимиийиди Италияиз сирнав апIбанди гъашиган, Павелна сакьюдар жара дидиснайидар Римдин паччагъдин къушмариан вуйи Юлий кIуру юзбашийихъна тувнийи. ²Учу Ад-рамития шагърий, Асияйин гъирагъарихъна гъябгъюрайи гими-ийиэ эъну, рякъю учIвча. Учухъди Фессалоникииан вуйи маке-донжви Аристархра хъайи. ³Хъайигъян учу Сайдайиъ гимиийиан эдеъча, ва Юлийи, Павелиз чан дустарихъна гъягъюз ихтияр тувну, ужуб ляхин гъапIну. Дустарра дугъан гъайгъушнаш шулу.



⁴Сайдайиан удучІвну, Киприхъан къиблайихъинди сирнав гъапІ-ча, гъаз гъапиш учу микІлаз къаршуди гъягъюри гъахнийча.

⁵Киликийинна Памфилияйин гъирагъарихъантина сирнав дапІ-ну, Ликия уълкейин Мира кІуру шагъриз гъафича. ⁶Душваь юз-башийи, Италияйиз гъябгъорайи Александрияиан вуйи гими дабгну, учу дидиль иту.

⁷Учу гъюлилан явашиди садшвнуд йигъан гъягъюри гъашича. МикІ ич гъаншаризди хъивнади хъпаз лигну, учу гуж-балайиинди Книд шагъриз хъуркъча. Ва, улихъ гъягъюрайи терефназди гими хъапІуз даршиди, Салмона кІакІахъан ярхла даршули, Крит островдихъан къибла терефназди гъушча. ⁸Гуж-балайиинди учу Ласея шагърихъан ярхла дарди, Гимийир дийигъру „ХатІасуз“ кІурушвахъна гъафича.

Түрфән

⁹Гизаф вахт зяя гъабхънийи, ва сарун гими хъапІуб хатІалу дубхънайи, фицики думугандиз жугъдарин ушварин йигъар ул-дучІвнийи. ¹⁰Павели дурализ гъапнийи: «Узухъ хъебехъай! Узуз рябкъюразузки, ихъ сирнав бедбаҳтвалихъна гъюрайиб. Гими-йиль айи гъагъра, гимира пуч хыди, хъа ухъура йихуб мумкин ву». ¹¹Хъа юзбashi, Павелихъ хъебехъди, гими хъапІурихъна дидин эйсийихъ хъпехъну. ¹²Гимийир дийигъру „ХатІасуз“ кІурушв къюрд адапІуз хай даруб вуди хъпаз лигну, гизафдари, душваь дедребккди гимийир дийигъру Финик кІурушваз рукъуз ча-лишмиш хъпан ва душваь къюрд адапІбан бадали, сирнав апІуз къаст гъапІнийи. Финик Критдин али къибла-ригъалабхъру ва кафари-ригъалабхъру микІариз къаршу иишв вуйи.

¹³Къиблайихъанди пучІу микІ хъивиган, му чпиз ккуниси гъабхъну кІури, фикир дапІну, гимичири, гими дебккру гъагъи гъармах за дапІну, Критдин гъирагъдихъантина сирнав апІуру.

¹⁴Хъа саб биці арайилан островдилан «кафари-ригъгуудбчІв-ру» кІуру къувватлу микІ утІубччвур. ¹⁵Гимийихъан микІлаз къаршу гъябгъюз шуладайи. Гъаддиз учу гагъ му, гагъ тму тереф-наз гатІахъури гъахъну. ¹⁶Учу Клавда кІуру саб биці остров-дин гъвалхъан гатІахъчу ва саб гуж-балайиинди гимийихъ хъа-йи лютке кибтІну мюгъкам гъапІча. ¹⁷Думу гимийиина за дапІ-ну, гимийин кІанкканмина тІилар ккадагъну, кибтІну, мюгъкам



гъапІча. Сирт кІуру гъумран гъирагъдин багахь исчIли йишв'ин гими алабсур кІури, гучІури, ахюну елкан ис гъапІнийи. Хъана гими микІлу гъабхуз хъюбгънийи. ¹⁸Хъайигъан микІ гужалди хъивган, гимийиан гъагъар гатІахъуз хъюгъю. ¹⁹Хъа шубудпи йигъан дурари гъюлиз гимийин алатаrrа кмиди гатІахъу. ²⁰Гизаф йигъари я ригъ, я хядар дярякъри гъахънийи. Хъа зурба тІур-фан ккудукубкІрайиган, учу ккадархъур кІуру умуд марцциди ктабтІнийич.

²¹Сарикъан фукІа дирипІри хайлин йигъар вуйи. Гъадмуган Павели гъудужвну гъапи:

– Эй инсанар, учву узухъ хъебехъну ккундийи ва Критдиан удучІвну ккундайи. Гъаци гъапІнийиш, му балиир ва заараар хъидайи. ²²Хъа узу учвуз ичв юкІвар ижми апІуз дих апІураза, гъаз гъапиш учвкан сар касра йикІидар, анжагъ гими пуч хъибди. ²³Фицики сан узуз, узу Чанур вуйи ва узу Чаз гъуллугъ апІурайи Аллагъдин малайикди гъамци гъапунзуз: ²⁴«ГучІ мапІан, Павел. Уву Римдин паччагъдин улихъ дийигъну ккунду ва, гъаддиз, Аллагъди увухъди гимийиъ аидар вари сагъ-саламатди урхюз гаф тувра». ²⁵Гъаци вуйиган, гучІ мапІанай, дустар, фицики узу Аллагъдихъ ва узуз гъапидар вари кІулиз удучІвбахъ хъугъра-за. ²⁶Ухъу саб островдиона гатІахъиди.

²⁷ИицІюкъудпи йишв улубкыиган, микІлу учу Адриатик гю-лилан гъахурайчу. ГъацІишвар шулайи вахтна гимичириз бага-рихъ жил хъайивал гъугъубжвнийи. ²⁸Гъолин деринвал гъеебци-ган, думу ягъчІтур метриихънакъан вуди гъабхънийи. СабцІиб вахтналан хъана гъеебциган, деринвал гъамус сумчІур метриихъ-накъан дубхънайи. ²⁹Гими гъарзариин алабсуз гучІури, гимичири гимийин къяляхъ йишвлан юкъуб гъагъи гъармах ккирч-ну, хъа йигъ ухди улубкъри пну, ккарагуз хъюгънийи. ³⁰Ги-мичири, гимийиан гъергуз ккунди, гъагъи гъармахар гимийин улихъ йишвлан ирчру аымлар апІури, гъюл'ина лютке илипуру.

³¹Хъа Павели юзбашийизна эскрариз гъапи:

– Эгер дурап гимийиъ гъудрузиш, учву ккадархъидарчву.

³²Гъаци гъапиган, эскрари люткейин тІилар къатІар апІуру ва думу гъюлиъ абхъру.



Гими пуч хъуб

³³ Йигъ хайиз улихъна Павели, гъамци кІури, варидаихъди уъл ипІуз гъитру:

— Ихъ ккадархъбаз кклигур гъи йицІиюкъудпи йигъ вуйихъ, хъа учву вари гъаму йигъари фукІа дипІнадарчва. ³⁴ Гъаддиз учв-кан фукІа-мукІа ипІуб ккун апІураза, му ичв уъмур уъбхаз кю-мек хъибди. Учву, кІуллан саб чАркъан алдадабхъди, сагъ-саламатди гъузичва.

³⁵ Гъамци дупну, дугъу уъл гъадабгъну, варидарин улихъ Ал-лагъдиз чухсагъул дупну, кудубтІну, ипІуз хъюгъру. ³⁶ Варидаик юкІв кубчІвну, дурагира уъл ипІуз хъюгъру. ³⁷ Гимийи вари 276 кас айи. ³⁸ Варидаи тухъ хайиз дипІну, учу, тахил гъюлиъ ахъри, гими артухъ вуйи гъагънахъан азад апІуз хъюгъча.

³⁹ ГвачІин улубкыиган, гимичириз гъум хъайи гъирагъ ряб-кьюру. Му жил фунуб вуш аygъю гъабхъундаршра, дурагиз ги-ми душвахъ, эгер шулуш, дебккуз ккун шулу. ⁴⁰ Гъармахарихъ хъайи Тилар хъудутІну ва рулар дудурчну, улхъан елкар дура-ри мікІ хъайи терефназди гъатІабццну, гими гъирагъдихъна хъапІру. ⁴¹ Хъа гими ичІ адру йишваш гъумриин алабсубси, ди-дин хъюхъ гъумраш абрсу ва рибшвузкъан даршули гъубзу, хъа къяляхъ йишв лепийирин къувватниинди уъбгъоз хъюгъру. ⁴² Эск-рариз сифте, дидиснайдарикан сарихъанкъан гъергүз дархъбан бадали, дураги вари йивну йихуз ккун шулу. ⁴³ Хъа юзбашийи, Павелин уъмур уъбхъбан бадали, дурагиз ихтияр тувундар. Дугъу сирнав апІуз шлудариз, сифте гимийиан гъюлиъ урсну, гъирагъ-дихъна ктучІвуз буйругъ тувру. ⁴⁴ Хъа имбудариз дугъу тахтири-инди вая фукІа-мукІа уълюбхрудииинди гъирагъдихъна ктучІвуз гъитру. Гъамциб саягъниинди вари сагъ-саламатди гъирагъдихъ-на ктучІвний.

Мальтаиш

28 ¹ Гъирагъдихъна кудучІвну, хатІасуз аygъвалат арайиз гъа-фиган, учуз му остров Мальта вуйиб аygъю гъабшичуз.

² Душван агъалайири учу къадарсуз ужуди къабул гъапІнийчу. Мархъ дубгъну, гъавайир мичІал хъпаз лигну, дураги, ахю цІа алапІну, учуз цІихъна дих гъапІнийи. ³ Павели саб хаб цІирцІар



гъварч дапIну, дураг цИин алахъуз хьюгъиган, цИхъан гьебгра-
йи битI дугъан хилккан ккичIибхуру. ⁴ Дугъан хиликк ккебхнайи
битI дябкъну, душван агъалиири чпин арайи гъамци гъапнийи:

— Гъаму кас, саб шакра адарди, адми гъачIир ву, фицики ду-
му гюолиь талаф гъахъундаршра, Аллагъдин судди думу чИвиди
гъитрадар.

⁵ Хъа Павели битI, чан хил дутIубччвну, цИгъ гъипу ва дугъаз
фукIа зиян гъабхъундайи. ⁶ Дураг, Павелин хил абгъюр вая ду-
му дишла дукIну алдакур кIури, ккилигурайи. Дураг Павелиз
къаназ ккилигури гъузру, хъа дугъаз фукIара дархъиди рябкью-
ру. Гъадмуган дураги, чпин фикир дигиш дапIну, думу аллагъ ву
пуз хьюгъру.

⁷ Душвхъан ярхла дарди островдин гъюкумдар Публийин мул-
кар хъайи. Дугъу учуз чан хулаз теклиф апIуру ва шубуд йигъян
учу ужуди хялижв апIуру. ⁸ Публийин адаш фунин гъагъи узур
кади ахниь ахънади шулу. Павел дугъ'ина улукъуз гъагъюру ва,
ккарагну, дугъ'ин чан хилар иливну, думу сагъ апIуру. ⁹ Мид-
хъан, островдин яшамиш шулайи жара аязарлуйирра гъюру ва
Павели дурагга сагъ апIуру. ¹⁰ Мальтайин агъалиири учуз гизаф
гъюрматар гъапIинийчуз. Учу рякъюъ учIивуз гъязур гъашиган, ду-
раги учуз лазим вуйи гъарсабдихъди тямин гъапIчу.

Мальтайиан Римдиз рякъ

¹¹ Шубуб вазлилан учу гъаму островдини кьюрд адапIурайи
«Диоскурап» кIуру Александрияйин гимийиъди гюолиз удучIувун-
ча. Дидин хьюхъниин Диоскурап кIуру кьюдюхрар вуйи идолар
алийи. ¹² Сиракуза шагъриз гъафиган, душваъ шубуд йигъ адапI-
ча. ¹³ Дилин рякъюъ учIивну, Ригия шагъриз гъафича. Йигъ ал-
дабхъган, кыблла микI хъивну кьюдпи йигъаз учу Путеола шагъ-
риз гъафунча. ¹⁴ Душваъ гъардшар гъагча. Дурагин тIалабниинди
дурагиих ургуд йигъян гъузну, хъасин Римдиз гъушча.

¹⁵ Душваъ айи гъардшар, учу гъюрайиваликан деебхъну, ич
улихъна, хялар дахъру шубуд хулар али Аппийин майдандиина
удучIиву. Дураг гъяркъган, Павел гизаф шад гъахъи, ва дугъу Ал-
лагъдиз чухсагъул гъапи. ¹⁶ Римдиз гъаравулди сар эскерра хъит-
ну, Павелиз азадди яшамиш хъуз ихтияр тувнийи.



**Павели Римдің
ағысвалар улупуб**

¹⁷ Шубуд йигълан Павели жугъдарин арайиъ вартІан гьюрмат-лу вуйи адмийир сабишв'ина уч гъапІнийи. Дураг вари уч гъа-шиган, дугъу дурагиз гъапи:

— Гъардшар! Узу ихъ халкъдиз вая ихъ абирин айдатариз къаршу вуди фукІа гъапІундаршра, узу Ерусалимдің римлу-йирин хилиз дустагъ дапІнайирси тувна. ¹⁸ Римлуйири узхъан силис гъадабгънийи ва, узук йикІбаз лайикылу вуйи саб тахсир-ра ктруган, дурагиз узу азад апІуз ккун гъабхънийи. ¹⁹ Жугъдари мидиз манигъват гъапІнийи ва гъадмуган узу Римдин паччагъ-дихъна гъайих пуз мажбур гъахънийза. Хъа узу, ийз халкъ мидин тахсиркар ву, кІурадарза. ²⁰ Гъаддиз узуз, учву дяркъну, сюгъбат апІуз дих гъапІунза. Узу, ялгъуз Израилин гележегдихъ хъугъна-ивализ лигнү, зунжарарыл ТІаъна.

²¹ Дураги Павелиз кІуру:

— Учу яв гъякънаан Ягъудияйиан сабкъан кагъаз гъадабгъун-дарча ва душв'ан гъафи гъардшарира увкан саб чІуру хабарра ту-вундарчуз. ²² Хъа учуз, увкан уву фици фикир апІураш гъеебхъ-нийиш, ккундийчуз, фицики яв ағысваларикан варишвари-чІуруди улхурайибикан хабар вучуз.

²³ Дураги мидин гъякънаан уч шлу йигъ тяйин апІуру, ва гъад-му йигъан Павел дергнайишваз хъанара артухъ жугъдар сатІи шулу. Дугъура, гвачІинтІан хъяяхъдиз Аллагъдин Паччагълугъди-кан ктитури ва шагъидвал апІури, Мусайн къанундинна Пай-гъамбрарин китабарин бинайин алди Исайикан гъапидар вари гъякъ вуйивал субут апІуий. ²⁴ Дугъу саб пай уч духънайидар чан гафариинді умудлу апІуий, хъа гъатмундар хъугъдайи. ²⁵ Чиб-чин арайиъ сабвалихъна дарфиди, дураг алдагъуз гъазур духънайи арайиъ Павели дурагиз кІуру:

— Гирами Рюгъну ичв абириз Ишая пайгъамбриланмина гъапи му гафар гъякъ вуйиштІан:

²⁶ «Душну гъадму халкъдиз иип:

Учву хъпехъури ва учвуз ебхури гъашишра,
фтинкІа гъаври ахъидарчву,
лигури, рябкъюри гъашишра,



фукIа рябкъидарчвуз.

²⁷ Гъаз гъапиш му халкъдин айкъюл
хъунти дубхъна,
дуарин ибар кар духъна
ва улар кур духъна.

Му вари, чпин улариз дярябкъри,
ибариз деребхъри,
юкIв гъаври адрабхъри, кIури
ва, чпи сагъ апIбан бадали,
Узухъна дарифри кIури,
гъаци дапIнайиб ву».

²⁸ Эй жугъдар! Учвуз айгъю йибхъайки, Аллагъдин уърхювал жу-
гъуд дарудариз гъапIнайиб ву, ва дурап Дугъахъ хъпехъиди! [29]*

³⁰ Павел, саб хал дибисну, чахъна гъафикъандар вари къабул
апIури, къюд йисан яшамиш шулу. ³¹ Думу Аллагъдин Паччагъ-
лугъдикан айгъювалар улупури ва дирбаши Агъа вуйи Месигъ
Исайин Ужувлан хабар рабгъури гъахъну.

* 28:29 Грекарин саспи БикIбариъ дибикIна: «Павели гъамци гъапихъан, жугъ-
дар, чиб-чпин арайиъ яман гъюжатар апIури, гъушний».



ВАРИ ХЪУГЪРУДАРИЗ ЯКЬУБДИН КАГЪАЗ

Чин диндин айдатар уъмриз кечирмиши *апIурча*, *кIури хъюгъну*, ахю читинвалари^в ахъу *хъугънайидариз Гирами Рюгъну Агъайн* чве вуди гъисаб *апIурайи Якъубдихъди* гъаму кагъаз *бикIуз гъитру*. *Исайихъ сифте хъугъдарин хасиятнаэ* алахъру саспи суаларин *Якъуб хъайи-хъайиси дийигъура*. *Дурагикан сакъодар*, чиз айи девлетниин элеңну, касибарин улихъ чи заанди дисуйи. *Сакъодари*, футна гъабхури, жарадарилан улхури, гизаф пис ляхнар гъапIиний, хъюхъ хъазабгну лицүйи, жарадариз къаршу *чIуру ниятар кIваь дисуйи*. *Гирами Рюгъну хъугъвал ляхнииндитIан улутуз шлуб дар ва*, гъаддиз, инсанра гъаци уърхиди *кIурайи*. Дугъу дурагирин улихъ гъамциб суал дивра: «*Йиз гъардшар, фу тIяям ахъа, эгер шли, хъугъраза, кIураш, хъа ужувлан ляхнар апIараш?*» (2:14). *Мушваб Гирами Рюгъну хъугърударикан Месигъди улутнайи рякъюбди гъягъюз юкIв хъитру* касариз *кIура*. *КIваантIан Аллагъдихъ хъугънайири*, саб шакадарди, Гъадгъаз ккуниб *апIуру*.

Хъугъвал ва айкыюл

1 ¹Аллагъдин ва Агъа Иса Месигъдин лукI Якъубдихъан вари дюн'я вуйибси дарагънайи Израилин йицПикьюб тухмин Аллагъдин адмийириз – саламар!

²Йиз гъардшар, учв'ин гъар жюре читинвалар алахъргулан, учву лап бахтлу касарси гъисаб апIинай, ³фицики, ичв хъугъувал



читинвалариантина удубчIвруган, сабурлувал арайиз гыюруб аygъячвуз.⁴ Ва гъамциб сабурлували чан ляхин кIулиз адабгъну ккунду, гъамдииинди учву гъуркIдар ва тамамдар шулачва, учвуь камивал хъибдар.

⁵ Эгер учвкан шлиз аькьюл гъубкIрадарш, дугъу, гъайиф ктарди багъиш апIру ва камивалар дарагру Аллагъидикан тIалаб апIри ва Аллагъди дугъаз тувди. ⁶ Хъа учву хъугъвал ади тIалаб дапIну ккунду, саб шак адарди, фицики, шаклу шлур, миkIру гъипнайи ва ибикурайи гъюлин лепейиз ухшар ву. ⁷ Мицир касди, Агъайихъан фукIа-муkIа шулиз кIури, фикир дараpIри. ⁸ Шаклу вуири кьюбдикан фикир апIури шулу, думу чан ляхнарий измир шулдар.

Гъякъ девлетнакан

⁹ Касибвалий аий гъардаш Аллагъдин улихъ учв заан вуйивалиин фурслуди ккунду. ¹⁰ Хъа девлетлур чан мютIюгъвалиин фурслуди ккунду, гъаз гъапиш, думу, чIурдин кюкюси, жвартI хъиди. ¹¹ Ригъ гъудубчIвтура ва убцрушин абхъру. Убцрушинаан укI чубхуру, дидин кюкю алдабхъура ва дидин уччуувал йибкIуру. Гъамдиз ухшарди девлетлуйирра, чпин вари ляхнарра хъади, терг хъиди.

¹² Читинвалариь ахъур хушбахтавар ву. Читинвалариан Аллагъ ккунди удучIуриз, Аллагъдихъан, Чав Гаф тувнайиси, гъаргандин умрин таж рубкъиди. ¹³ Читинвалариь ахъру сарира «Му читинвалар Аллагъди гъаъниайдар ву» дупну ккундар, фицики Аллагъдин писваларихъди вуйиб гыч фукIара адар ва саризра читинвалар гъаъдар. ¹⁴ Хъа гъарсар кас чан тямягъяри зигура, хъа ккаъра ва дючIюркъну гъитра. ¹⁵ Тямягъну, дишагълийиси, гунагъ кибшру ва апIуру, хъа гунгъи, ликриин гъабшиган, аյжал хуру.

¹⁶ Йиз масан гъардшар, учву учвуз кучIлар апIрубси мапIанай. ¹⁷ Гъарсаб ужувлаз апIурайи ляхин ва гъубкIну вуйи хъуркъвал заълан, Аллагъдихъан, айршарин акв арайиз гъабхи Адашдихъан вуйиб ву. Аллагъ гъаммишан сабсир ву ва гъюлюхур дар. ¹⁸ Ду-гъу Чан гъякъ вуйи Гафналантина, Чав халкъ гъапIубдик варидик варитIан заан вуйидар хъпан бадали, ухъкан Чаз веледар ктаьну.

Хъпехъуз ва кIул ккивуз аygъю йибхъай.



¹⁹ Йиз масан гъардшар, гъамшишан гафар апIоузIан – кIуруб-дихъ хълехъуз гъяракатнаш юхъай ва хъял кубчIувуз гъялак ма-хъанай, ²⁰ даршиш, инсандик хъял кайивали Аллагъдиз ккуни дугъривал хурдар. ²¹ Гъаци вуйиган, учву апIурайи ляхнариз пис-валарихъанна гъякъсуваларихъан ярхла юхъай ва ичв кIваь ур-зурайи Аллагъдин аygъювалар мютIюгълуди къабул апIинай, фицики гъаму аygъювалари ичв рюгъяр урхиди. ²² Аллагъдин гаф тамам апIинай, хъя эгер учву думу деебхъунтIан гъибтдарш, учву учвуз кучIлар апIурачва. ²³ Эгер шли, Аллагъдин аygъюваларии кIурайидар дарапIри, деерхъунтIан гъитрадарш, думу гюзгдиан чан маш рябкъюрайириз ухшар ву. ²⁴ Думу чаз дилигну гъуду-Чвиди ва гъадму гагъди, учв фицир вуш, кIваьлан гъархди. ²⁵ Хъя, азадвал хру варитIан заан вуйи Аллагъдин закон кIваантIан аygъю апIур ве кIваьлан гъадрапIри гъадихъди чан ляхнар кIу-лиз адагъур, чан ляхнариз бахтлу хъиди. ²⁶ Эгер шли учв дугъри вуза кIури фикир апIураш, хъя чан мелзнат эйсивал апIуз аygъ-дарш, дугъу чав чаз кучIлар апIура ве дугъян дугъривал файдасуз ву. ²⁷ Аллагъдизна Айршин Адашдиз ккуни чиркин дару марцци дугъривал – касибвализ айи ачIини хпаризна йитимариз кюмек апIувал ва жвув гъаму дюн'яйин чиркинвалариккан урхювал ву.

Ичв багахъ хъайидар ккун апIинай

2 ¹ Йиз гъардшар, ихъ адлу вуйи Агъя Иса Месигъдихъ хъугъри, адмийир ккунидариизна даккнидарииз жара мапIанай. ² Мисал-наз, учву уч духънайишваз багъя палат али ва гъизилин тIублан хъайи адми гъюру, гъацира – юирси палат али касибра. ³ Учву багъя палат алириз, артухъ гъюрмат апIури, гъамци кIурачва: «Уву гъаму ужударсдар иишварикан гъамунубдииин дэй». Хъя ка-сибдиз кIурачва: «Гъатушвахъинди гъудучIв», ясана, «Йиз лика-рихъинди дэй». ⁴ Учву гъапIрачва? Учву сарин улихъ сар заан апIурачва ве ичв дюз дару хияларихъди, фунур артухъур вуш, гъял апIурачва. ⁵ Хъебехъай, йиз масан вуйи гъардшар! Аллагъди гъаму дюн'яйин улихъ касиб вуйидар кадагънадаринхъя, чин хъугъувализ мюгъкам ва, Учву ккунидарииз гаф тувнайиси, Чан Паччагълугъдин ирс рубкърудар хъпан бадали? ⁶ Хъя учву каси-бар гъясбикк апIурадарчва! Девлетлуйир даринхъя учвлан гъи-дикъ алдабхъурайидар. Учву судариз хъчиюхъурайидар гъадраг



даринхъя? ⁷ Гъадрап даринхъя, учву Чазди кадагънайи Месигъдин ччвур беябур апIурайидар?! ⁸ Эгер учву дугъриданра, Гирами китабариъ улупнайи: «Багахъ хъайир жувуз жувуси ккун апIин» кIуру паччагъвалин закондиль айиси апIураш, учву дюзди апIурачва. ⁹ Хъя эгер учву сартIан сар артухъди дисураш, гунагъарыъ ахърачва, ва учвуз, закон гъючIюбгъдариизи, жаза гъадабтIиди. ¹⁰ Гъаз гъапиш, шли, Къанундиль улупнайиб вары тамам апIури, хъя душв'ан саб фукIа-мукIа тамам дараpIди гъибиши, дицир кас вары Къанун чIюбгъбая тахсиркар ву. ¹¹ Фицики «къяппавал мапIан» гъапи Аллагъди «миликIан» гъапундаринхъя? Ва гъаддиз, эгер уву къяппавал апIурадарш, хъя йивну йикIураш, Къанун чIюбгъюрава. ¹² Азадвал тувру Къанундииинди суд апIураий адмийинсдар гафар ва ляхнар апIин. ¹³ Фицики Аллагъдин судди жааризи уж'вал дараpIуриин язухъ апIидар. Уж'вал суд-Тан зина ву!

Хъугъувал ва ужувлан ляхнар

¹⁴ Йиз гъардшар, фу тIяям ахъя, эгер шли, хъугъраза, кIураш, хъя ужувлан ляхнар апIдарш? Мициб хъугъували думу урхидар, гъаци дарин? ¹⁵ Эгер чвуччвуз, ясана чуччуз алабхъуз палат, ясана ипIуз уъл адарш, ¹⁶ хъя учвкан сари: «Гъарах мясляйтниинди. Яшамиш йихъ манишнаъ ва тухъд!» – дупну, фукIа-мукIа дугъаз адрубикан тутрувиш, мушваъ фу шул? ¹⁷ Ари гъамци, эгер хъугъувал лайикъ вуйи ляхнариинди улупдарш, хъугъувал дубкIаный гъисаб ву.

¹⁸ Сари пуз мумкин ву: «Увуз хъугъувал авуз, хъя узуз – ляхнар! Ляхнар дарди яв хъугъувал гъан, улуп узуз! Хъя узу увуз йиз ляхнарий рябкьюрайи йиз хъугъувал улупидизавуз».

¹⁹ Уву Аллагъ сар вуйивалихъ хъугърана? Ужуюи апIурава! Гъеле жинаарха хъугъра ва гукIунди йихура.

²⁰ Эй ичИ инсан! Увуз ляхнариинди дару хъугъувал файдасуз вуйивал айгю дубхъну ккундийвуз? ²¹ Хъя ихъ абириин аба Ибрагым, чан бай Исакъ, гъурбан апIрушв'ина гъахиган, чан ляхнариинди гъякъ гъапIундайнхъя? ²² Рябкьюрайвуз, дугъан хъугъувал ляхнариинди шуйи ва ляхнарин кюмекниинди дугъан хъугъувал гъубкIуб гъабхъну. ²³ Ва гъамци, Гирами бикIбариъ дикикIнайиб тамам гъабхъну: «Ибрагым Аллагъдихъ хъугънийи



ва, чан хъугъувализ дилигну, думу гъякъ гъапІнийи» ва гъаддиз, дугъаз Аллагъдин дуст гъапнура вуйи.²⁴ Рябкъюрайчвуз, Аллагъдин улихъ адми, неинки саб хъугъвалиинди, хъа чан ляхнариинди гъякъ апІура.²⁵ Гъаци гъабхъну кач'вал кайи Раавдихъдира. Дугъу, чпин шагъур ахтармиш апІури гъафидар, къабул дапІну, жара рякъди гъаиган, думу чан ляхнализ дилигну, гъякъ гъапІундайнхъя?!²⁶ Ари гъамци, рюгъ адру беден фици дубкІну шулуш, хъугъувалра, ляхнар даруган, дубкІна.

Мелз ва гафар

3¹ Йиз гъардшар, вари мялимар хъуз мюхъюгъянай. Ихъ, мялимарин, суд ижмиди апІруб аygъячвузки,² фицики ухъуваридари гагъ-гагъ лайикъусуз тЦулар апІурахъя. Чан мелзниинди чурууб даркІур гъуркІу кас ву ва дугъаз чан бедендин эйсивал апІузра къувват а.³ Эгер гъайвнин сппаригъ ухъу фури гъипиш, думу ухъуз мютІюгъ шулу, дидин вари жандин эйвал апІурхъя.⁴ Гъадмукъан аыхю гимийирра магъа гъаци, пис микІари гъирчнайидар, саб бицІи рулиинди хъапІури чаз ккунишвахъинди хъапІра.⁵ Гъамци ихъ мелзра, учв ихъ бедендин бицІи пайтІан даршра, дидхъан зурба ляхнар апІуз шулу. Цюмгъял кабхъиш, гъадму бицІи цІи зурба яркур убгуру!⁶ Мелз – цІа ву. Ихъ жандин имбу паярик гъилигган, дидиъ варитІан гизаф писвал а. Диди вари жан чиркин апІура; дидик жегъеннемдин цІикан цІа кабхъра ва ихъ уьмур убгура.⁷ Адмийи гъубкъу жюрейин гъайванатар, жакъвар, улчвурхури гъягърудар ва гъюлерин гъайванатар вердиш дапІна ва апІурира а.⁸ Хъа гъич сарихъанра мелз вердиш апІуз шулдар. Му дебккуз даршлу, агъуюи абцІнайи завал ву.⁹ Гъамдинди ухъу ихъ Адаш Агъайн тярифар апІури шулхъя ва гъамдинди Аллагъдиз ухшар ади халкъ дапІнайи адмийириз агърарра апІури шулхъя.¹⁰ Саб ушвниан удучІвуру ужувлан гафарра, агърарра. Йиз гъардшар, дици дубхъну ккундар.¹¹ Саб булагъдиан марцци штарра, кылзи штарра удучІвури хъуз мумкин вуйинхъя?¹² Йиз гъардшар, шулин ари, инжирин гъаригъ хифар гъиршри, ясана тЦумтІарин ширариин инжириар илиршури? Гъаци кылзи булагъдиан марцци шид удубчІувб мумкин дар!



Гъякъ вуйи айкъюл ва кучIал

¹³ Ичв арайиъ фужкIа дугъридан фагъумлу ва варибдин гъаврий аи кас адарин? Эгер дицир аш, дугъу чан фагъумлувал гъякъ уымриинди улупну ккунду, фагъумлуйириси кIул ис дапI-ну ккунду. ¹⁴ Хъа эгер ичв юкIвариъ пис бахилвал аш, ва иблисвалиинди жувуз хайир абгураш, фурслу махъанай ва гъякънакан кучIал макадапIанай. ¹⁵ Мициб фагъум заълан гъюруб дар, думу му дюн'яйинуб ву; рюгъниинди вуйиб дар, иблисдихъан гъюрайиб ву. ¹⁶ Наан бахилвал ва жувутIан даккнивал аш, гъадушваъ къайдасувал ва гъарсаб пис ляхин а. ¹⁷ Заълан гъюрайи фагъумлувал, сифте нубатнаъ, марцциб ву, гъацира мясляйт хурайиб ву, айкъюллуб ву, аylакъайихъна хруб ву, рягъимлувалихъди ва ужувлан ляхнарихъди абцIана, диди адмийир ккунидализна даккнидализ жара апIдар ва машназ лигдар. ¹⁸ Ислягъвал бадали мясляльтниинди лихрудари гъякъвалин бегъер ккадабцIиди.

Аллагъдиз бахш иихъай

4 ¹ ГъапIрудар ву ичв гъярхъбарна гъюжатар? Ичв жанарий урхурайи тямягърилан гъюрайидар даринхъя? ² Учвуз фу-вшу ккундучувуз, хъа думу шуладарчвуз, гъаддиз чиб-чпигъ гъярхъну иихурачва. Учву гужназ хъюгърачва, хъа фукIара шуладарчвухъан, ва гъаддиз, гъюжатар апIурачва ва гъярхърачва. Учвуз ккуниб шуладарчвуз, гъаз гъапиш Аллагъдикан ккун апIурадарчва. ³ Учву ккун апIурашра, ккун апIурайиб тамам шуладаричв, гъаз гъапиш учву ужудар ниятариз ккун апIурадарчва, хъа — ичв тямягъяр гъуркIбаҳъди. ⁴ Дюз дарудар, учвуз айгъдарди айчвуз, гъаму файдасуз дюн'яйихъди хъувал — Аллагъдихъди апIурайи дяви вуйиваликан? Шлиз гъаму файда ктру дюн'яйихъди дуст духъну ккундуш, думу Аллагъдиз душманди удучIвура. ⁵ Гирами бикIбариъ гъавайиди гъамци дикибIана кIурончва?

«Ухъуль учIвнайи Рюгъназ
ухъу анжагъ ЧазтIан духъну ккундар».

⁶ Хъа Дугъу ухъуз мутIан артухъ уж'вал улупну. Магъа гъаддиз, Гирами бикIбариъ дупна:

«Аллагъ фурсачайириз къаршуди удучIвуру,
хъа къисматниин рази вуйидар ккун апIуру».



⁷ Гъаддиз, Аллагъдиз мютІюгъ йихъай! Иблиздиз къаршу уду-Чвай — думу учвхъан гъебгди. ⁸ Аллагъдихъна багахъ йихъай — Аллагъра учвухъна багахъ хъиди. Хилар жикІай, гунагъкрап, юкІвар марцц апІинай, кью-кьюб юкІв айи адмийир! ⁹ Дердер апІинай, гъарай ипай, ишай! Ичв айлхъбар ишбарииз илтІбкІри-йичв, шадвал — пашманвализ. ¹⁰ Агъайн улихъ учву исди дисай, ва Дугъу учву за апІиди.

¹¹ Сар-сариз чIуру гафар мапІанай, гъардшар. Шли чан гъард-шиз чIуру гафар апІуруш ва тахсир кипруш, дугъу Къанундиз къаршуди кIура ва Къанун тахсир апІура. Хъа уву гъамци Къа-нундик тахсир кипраш, уву Къанундиз улупнайиб тамам апІур дарва, хъа — судьявал апІурава. ¹² Аммаки, Къанун Тувур ва судьявал АпІур сартІан адар, урхюз Шлур, ясана терг АпІур. Хъа уву гъацир фуж вува, яв багахъ хъайириин суд апІуз?

¹³ Гъамус учву узухъ хъебехъай, гъамци кIурудар: «Гъи-закур саб фунуб-вш шагъриз сад йисазди, ариш-вериш апІури, гизаф пул гъазанмиш апІуз гъягъидихъя». ¹⁴ Учвуз, гъеле закур учвкан фу шулушра, аыгъдарчвуз! Ичв уымур фу вухъа? Учву, сацИиб ач-миш духьну, дургру дифарси вучва. ¹⁵ Учву, мидин ерина, гъар-ган гъамци дупну ккунду: «Эгер Агъайиз ккун дубхъну, ухъу сагъди гъузиш, гъамци-гъамци апІидихъя». ¹⁶ Хъа учву, учв'ин элеъначва ва ултІурчвру гафар апІурачва. Гъарсаб гъамциб фурс чIуруб ву. ¹⁷ Ва гъаддиз, учвуз дюзвал фу-вш аыгъядишра, гъащи дараІур гунгъин тахсиркар ву.

Жувуз жсувутІан даккни девлетлуйириз жаза хъибди

5 ¹Хъа гъамус хъебехъай, учву, девлетлуйириз! Ишай ва гъарай ипай учв'ин улукъуз ккайи бедбахталариин. ² Ичв девлет гъутІну, ичв палат сурари гъипІну. ³ Ичв гъизилизна арсраз ганд-риж гъивну! Гъадму гандрижи учвуз къаршуди шагъидвал апІиди ва ичв беден, цIиси, ипІиди. Учву ичв аыхиримжи йигъариз учвуз девлет уч дапІачава! ⁴ Ичв хутІларыз бегъер уч апІрудариз къи-мат тутрувди, учвуз гъибунчва, дураги Аллагъдиз гъарийр апІу-ра, ва хутІлий айдарин агърар Саваоф Агъайн ибарихъна ду-рукъна. (Саваоф — Аллагъдин ччуурарикан саб, аыршарин күш-марин аыхюр кIуру гаф ву). ⁵ Учву жилиин девлетниин ульорхну яшамиш гъахъунчва, кефер апІури гъахъунчва, урккру йигъаз ичв



жанар гваназ гыорхюнчва. ⁶Учву тахсир ктрудар тахсиркрап апIуй-чва ва йивну йихуйчва, хъа дураг учвуз гъаршу гъудужвдайи.

Сабур апIинай ва ккарагай

⁷Гъаци вуйиган, сабур апIинай, гъардшар, Агъа къяляхъ гырю гыргъи хъайизкъан! Лигай, нежбер фукъан сабурлуди ккилигури шулуш, дубзнай жили багъа бегъер хайиз фици думу чвлин ва хъадукран мархъариз ккилигури шулуш. ⁸Учвура сабурлувалиинди ккилигури гъузай, юкIвар мюгъкам апIинай, гъаз гъапиш, Агъа гырю йигъар сарун багахъ хъа. ⁹Гъардшар, Аллагъди учвуз жаза гъададабтIуз, чиб-чпилан мулханай. Лигай, Судъя гъамуст-Панра урчIарихъ дийигъна! ¹⁰Гъардшар, сабур апIабъ ва мюгъкамвалий Аллагъдин ччвурнахъан гъапи пайгъамбарихъан мисал гъадабгъай. ¹¹Учвуз аygъячвуз, ахиризкъан мюгъкамди гъуздарииз учу баҳтаврапр кIурача. Учвуз Аюбдин ижмиваликан гъебхъунчвуз ва, Агъайи дугъаз чан уьмрий фициб ахир тувнуш, аygъячвуз, гъаз гъапиш Агъа рягъимлур ву ва язухъ Зигрур ву. ¹²Сифтена-сифте, йиз гъардшар, я заварииинди, я жиларииинди ху мап-Панай, я жараси гъич саб жюрейииинди ху мап-Панай. Гъит ичв анжагъ «ав» кIурушваь «ав» ибшри, «ваь» кIурушваь «ваь» ибши, учвуз жаза дархъбан бадали.

¹³Учвакан фуж балайикк ккахъиш, гъит ккарагри, фуж шадвали ацIаш, гъит Аллагъдиз мяълийир апIри. ¹⁴Учвакан фуж иццу-раш, хъугърударин жямаятдин ахюориз дих апIри ва, Агъайнин ччвурнахъ ччим кадатну, гъит, гъадгъан зинн ккарагри. ¹⁵ГъубкI-ну хъугъявал айи ккарагували иццурайир сагъ апIиди ва Агъайи думу ликриин апIиди. Хъа эгер дугъу гунагъ дапIаш, хил алдаб-гъиди. ¹⁶Гъаддиз чиб-чпин улихъ жувукан ктахъу гунгъар кIул'ин дисай ва, Агъайи учву сагъ апIабън бадали, чиб-чпихъанди ккарагай. Гъякъ уьмур хъапIрайириин ккарагбаь гизаф къувват а! ¹⁷Ил'яс ухъусир адми вуйи. Думу лап ижмишнаан мархъ дурубгъ-бан бадали ккарагнийи, ва шубуд йисанна гъацIаь гъубгъундайи. ¹⁸Думу хъана ккарагнийи, ва а yrшириан мархъ гъубгънийи, жили бегъер гъабхнийи. ¹⁹Йиз гъардшар, эгер учвакан фуж, гъякъ рякълан улдугну, шли-вш хъана алаьнуш, ²⁰аygъю йибхъай, гунагъ-кар кучIлин рякъхъан хътаури думу аյжалихъан урхюра ва гизаф гунгъар апIуваликкан азад апIура.



ВАРИ ХЪУГЪРУДАРИЗ ПЕТРИН САБПИ КАГЪАЗ

Гирами Рюгъну Петрин хиларинди бикIуз гъиту гъаму сабни кағъаз, БицII Азияий Исаихъ сабпидарди хъугъдар, чин хъугъувалиан кялхъюваларилан, рихшанд апIуваларилан ва сабра дарди ктукъури балайикк ккитуваларилан гъагъи гъялнаң ахъдариz кIури дубикIнайиb ву. Дурап саб суалну архаинди гъитрадайи: чни айи иишвавъ арайиз дуфнайи гъяларихъди авлакъайиb шулуш, дариссан гъюкумдрагиz къаршу гъедергуруш. Петри дурагиz, чин хъугъувалилантина аззабариz ахъдичва, кIура, гъаз гъапши Исаихъ хъугънайидар имбодаригъян жа-жаради азгъю шулу, дурагин уьмур цИийивалиz дигиши дубхъна. Кағъизиb, гъамцдар дююшариz ахъу Исаихъ хъугърудари гъапIну ккундущи улупури, гъаму кIулин суаларилан гъайри, мянфя-аитлу насиgъяттарра a. Вари хъугърудари фикир тувру варитIан аыхю умуд, Гирами Рюгънан насиgъятарин мюгъкам бина ву. Исаин вакили кағъаз урхрудариz гъамци кIура: «Хъа гъамци, Месигъдин аззабариz ишитирак учвура шулайивалишин шад ии-хъай, Дугъан ад ачмиши гъабхъи вахтнара шадвали ацIдичва ва гъарай индичва» (4:13).

Чиши умуд

1¹⁻² Иса Месигъдин вакил Петрихъан гъурабийирди жара жила-риин Понтдиль, Галатдиль, Каппадокияйиъ, Азияий ва Вифа-нияйиъ дарагънайи, Аллагъди Чан рябкьювалиинди кадагънайи



хъугънайдариз, учву, Рюгъну гирами дапІнайдар, Иса Месигъ-дихъ хъпехъбан ва Дугъан ифдинди марцц хъпан бадали, учвуз гъуркІну вуйи уж'вал ва мясляйт ибшричвуз!

³ Ихъ Агъа Иса Месигъдин Адаш ужувленинди ишричав. Дугъу, Иса Месигъ чИви апІбинди Чан зурба вуйи уж'вал улупну, ухъу затылан бабкан гъахну ва цИийи уымрихъ хъаъну. ⁴ Гъамдинди ухъук, я аъжалихъан, я камиваларихъан, я вахтнахъан чИур апІуз даршлу, ЧИви миж кивунхъук. Ихъ миж кайи «девлет» ухъуз аршариъ убхюра. ⁵ Учвуз, ичв хъугъувализ дилигну, Аллагъдин къудратнакк ккайдар, гъиямат йигъаъна аххиримжи вахтари ачмиш шлу урхювал рубкъидичвуз. ⁶ Гъаци вуйиган, гъеле сацІб вахтари гъаржюре читинвалариль учІврушнар кЧикъуб алабхъурушра, гъамдин шад йихъай. ⁷ Аъгъю йибхъайки, гъизилра цИинди таза алапІурайиб. ЦИхъан гъеле думу зат имдарди деебцІ-ну гъядапІузра шулу, хъа ичв хъугъувал гъизилтІан лап артухъ багъя ву, ва думу, гъякъди вуйиб вуш, ясана – дарш, Иса Месигъ къяляхъ гъафи вахтна гъиямат йигъан жуван тяриф, ад ва заанвал жуввахъна рубкъбан бадали, ахтармиш дапІну ккундарин?! ⁸ Думу (Иса) ккундучвуз, гъеле учвуз гъяркъондаршра, учву Дугъаъ хъугърачва, гъеле гъаму ражари Думу ичв уларикк ккадаршра. Учву улупуз даршлу аъжайиб шадвали ацІну урхурачва, ⁹ гъаз гъапиш ичв хъугъувалин метлеб кІулиз удубчІурайичв – ичв урхювал.

¹⁰ Гъаму урхюваликан чпин вахтари гъеле пайгъамбраи чпи-хъан удукърубкъан ужуйи ахтармиш'валар гъахури гъахнний, ва улихъими Аллагъдин гъянивалиан учвуз тувнайи багъишдикан гъапний. ¹¹ Дурари, Месигъдин Рюгъну фуну вахтнакан кЧураш, фицдар гъялариль Месигъдин аъзабар шулуш, ва гъадму аъзабарин къяляхъ шлу Дугъан аднакан аъгъю апІуз ккунди, ахтармиш'валар гъухний. ¹² Пайгъамбарииз чпи чпин – ваъ, хъа – ичв гъай-гъушин бадали гъилихуваликан ачмиш гъабхъний. Дурари аър-шариан гъаънайи Гирами Рюгъну дебкку Ужувлан хабарнакан хабар дебккний – гъаму ражари рабгъурайи Ужувлан хабар. Гъа-му сир аъгъю апІуз ккунди, гъеле аършарин малайикарра кмиди тямиягъну йихура. ¹³ Гъит, гъаддиз ичв фагъум фагъмихъ хъади ибшри, ва ляхнар апІуз гъаммишан гъязурди гъузай. Вари ичв умуд Аллагъдин гъянивалиин илипай, хъа гъиямат йигъан Иса Месигъ гъафиган, учвуз ичв умуд кайиб вари багъиш апІиди.



Гирами уъмрихъна дих

¹⁴ Хъпехъру бишИдарси, учву Аллагъдихъна гъяйиз аий ичв тя-
мягъяр фицдар вуйиш, гъадрарихъди ичв уъмур хъапIуз мигъита-
най. ¹⁵ Хъа гъатци, учвуз дих ДапIнайир фици Гирамир вуш,
учвура гъаци гирамидар йихъай ва ичв хасиятра гирами вуйиб
ибшри. ¹⁶ Гъаддиз БикIбариъ дупна:

«Гирамидар йихъай, гъаз гъапиш Узу Гирамир вуз».

¹⁷ Эгер учву сабдизра дилигди, вари адмийирин суд АпIуриз
Адаш кIураш, му дюн'яйиль имиди Дугъхъан гучI'вал кади яша-
миш йихъай. ¹⁸ Альгю йибхъайки, ичв абирихъан дурубкънайи
гъаму файдасуз уъмриккан учву, гъизилна арсси чIур дубхъну
гъябгърубдихъ къимат тувну гъадагъну азадвалий тIаънадар,
¹⁹ хъа гъич саб жюрейин зиян, я скаш ктру ччилан ифдихъси, вар-
ритIан багъя вуйи Месигъдин ифдихъ гъадагъну, азадвалий тIаъ-
найдар вучва. ²⁰ Иса, дюн'я арайиз хайиз, учву бадали Кадагъ-
найир вуйи, ва гъаму аъхиримжи йигъари Думу жилиина гъафну.
²¹ Учву Думу гъачИдаригъян чIиви гъапIу ва Дугъаз ад туву Ал-
лагъдихъ, Гъадгъулантине хъугъначва. Гъаци вуйиган, ичв хъугъ-
вал ва миж Аллагъдиль авучв.

²² Учвуз ичв хъугънайи гъардшар, жуву гъякъвалихъ хъебехъну
марцц гъахъиган, кью-кью маш гъидривру масанвалиинди, мар-
цци юкIварииинди ва жандин вари къувватниинди ккун гъахъун-
чвуз! ²³ Учвуз цИийи уъмур тувру тум алаур йибкIру тум даричв,
аъхир, хъа – дираликIру тум. Думу тум чIиви ва гъаммишандиз
вуйи Аллагъдин Гаф ву. ²⁴ Гъаддиз Гирами китабарий дупна:

«Инсаният укIси ву,
дуарин успагъивал – хутIлин кюкюси.
УкI ебщцуру – кюкюра алдабхъуру.

²⁵ Агъайн гаф
аъсрариан-аъсрализ гъубзра».

Агъайн гъадму Гаф, учвуз гъурубкъу Ужувлан хабар ву!

ЧIиви гъван ва гирами халкъ

2 ¹ Гъаци вуйиган, гъарсаб чIуруб, гъарсаб кучIал, кью-кью
маш гъивнайивал, маш ккадарди хъувал, гъар жюрейин футни-
иир гатIахъай. ² Тазади бабкан духъну имбу бишИдарси, рюгънан



тІяльму никқдихъ, гъаддин кюмекниинди ахю хъуз ва урхувал гъазанмиш апIуз, тямігъ хывай. ³ ИкибаштIан, Агъа фици ужур вуш, учвуз аygъю гъабхуунчвуз. ⁴ Гъадгъахъна гъачай – Чи-ви Гъандихъна, адмийири тина гъадапIубдихъна, хъа Аллагъди ктабгъубдихъна, Дугъан уларихъ багъа вуйибдихъна. ⁵ Учвура, Чи-ви гъванарикан хал диврайиси, ичв учвкан рюгъвалин хал тикмиш апIинай. Гъадмуган, гирами вуйи гъуллугъчийр хъпан къяляхъ, Месигъдиланмина Аллагъдиз къабул вуйи, Рюгъниинди вуйи гъурбнар апIидичва. ⁶ Гъаз гъапиш, Гирами китабарий гъа-ци кIура:

«Магъа, Узу Сион дагъдинн
мурччван гъван дивдиза – кадабгънайиб, багъа вуйиб.
Дугъахъ хъугъру гъич саркъан биябур хъидар».

⁷ Гъаци вуйиган, учвуз, хъугърудариз, Думу зурба хазна ву, хъа хътругърудариз –

«Устайи тина гъапIу гъван
мурччвануб гъабхыну»,

⁸ ва

«Му Гъван хъарсру гъван ву.
Му Гъандихъ хъарсу адмийир
алдакуру».

Магъа, дураг хъарсну, гъаз гъапиш Ужувлан хабарнахъ хъугъ-радар. Дурагиҳъди гъаци шулайиб ву.

⁹ Хъа учву, кадабгънайи жинс, Паччагъдин гъуллугъчийр, ги-рами халкъ, Аллагъдин хусусият, мучIушнаан Чан айжайиб акв-наъ хъуз учвуз Шли дих дапIинаш, Гъадгъан зурба ляхнарикан ха-бар дебккбан бадали, гъядягънайдар вучва.

¹⁰ «Саб вахтна,
халкъ ву дупну – халкъ дарудар,
хъа гъамус – Аллагъдин халкъ.
Улихъди – уж’вал дархьидар,
хъа гъамус
думу учвуз гъабхуунчвуз».

¹¹ Йиз багъа вуйидар, гъаму дюн’яйин улукъуз дуфну, къяляхъ гъягъюри рякъ’ин алидарси, кIаваҳди дяви гъабхурайи жандин тямігъярихъан ярхлади гъузуб учвкан ккун апIураза. ¹² Гъит, ичв хасият Аллагъдихъ хътругърударин арайиъ марцциб ибши. Ва



гъадмуган, гъаму ражари учвуз, пис касар ву, кIури люкънар апIурайидари, учву апIурайи ужувлан ляхнар рякъюри, Аллагъ тъафи гъиямат йигъан, Дугъан ад апIиди.

Гъюкумдарииз мютIюгъ иихъай

¹³ Агъа бадали мютIюгъ иихъай адмийири дерккнайи вари гъюкмариз, ¹⁴ гъюкум гъабхурайидари, гъаз гъапиш дурари тIафларизна тIарашибийиз жазийр гъадатIуру ва ужувлар апIрудариз пешкешар тувру. ¹⁵ Даршуз Аллагъдин ният гъациб ву: ужувлар апIрудари, абдларин чIуруди улхру ушварихъ, ужудар ляхнар апIбарииндигъитIибшвнү ккунду. ¹⁶ Хъа учву, азад адмийир вуйивализ дилигну, ахмакъ ляхнар ккеркуз ичв азадвал ишлетмиш мапIанай – учву Аллагъдин лукIар вучва, аххир. ¹⁷ Варидариз гъюрмат апIинай, гъардшар ккун апIинай, Аллагъдихъан гучI апIинай, паччагъ гъисабназ гъадагъай. ¹⁸ ЛукIар, ичв агъириз хай гъюру жюреийинди гучI'вал кади, неинки гъянириз ва гъодлириз, хъа учIвру хасият хъайириз вушра, мютIюгъ иихъай. ¹⁹ Тя-риф хъиби, чан аззабар аыгъ апIурурин, гъаз гъапиш дицир Аллагъдин ниятнан гъаврий айир ву; думу лайикъ дарди бедбахтвала-рикк ккахъна. ²⁰ Хъа эгер, тахсир дапIну, учву урччураш, ичв фициб ад шул? Хъа учву уж'вал апIури, аззабар сабурлуди аыгъ апIуруш, Аллагъдин улихъ ичв аваза за хъиби. ²¹ Учвуз, учву гъамци хъуз, дих дапIначвуз, аххир, гъаз гъапиш Месигъ учвхъанди аззабарикк ккахъну ва Дугъу дураг аыгъ гъапIну. Дугъу учвуз, Чан шилнаъди гъюз, мисал гъибтну.

²² Дугъу «гунагъ гъапIундар ва Дугъан ушвниин кучIал илибшундар».

²³ Учв биябур апIруган, Дугъу Чавра адмийир биябур апIуз хъюгъюндар. Учв аззабарикк ккахънайиган, Дугъу гучIар ккаундар, хъа Дугъу Учв гъякъ вуйи Суд'яйин хилиз тувний. ²⁴ Дугъу Чав, ухъу гунгъариз дийихнайидарси хъуз ва гъякъвал бадали яшамиш хъуз, Чан хусуси бедендиъди ихъ гунгъар хачриина гъухну. Учву Дугъан зийнариинди сагъ гъахъунчва. ²⁵ Учву саб фила-вуш, марччарси, улдугнайчва, хъа гъамус учву ичв Марчч-лихънихъна – гъайгъу Зигрурихъна къяляхъ хътақунчва.



Жиларин ва хпарин гъякънаан

3 ¹Учвура, хпар, ичв жилариз гъаци мютIюгъ йихъай. Дурарикан шли Аллагъдин Гаф къабул апIурадарш, чpin хпарилантина, ²ичв марцци ва Аллагъихъан гучIру уьмур уларикк ккади рябкьюрайбдинди, саб гаф адарди, дурарра хъугъвалихъна гъиди. ³Гъит ичв успагъивал, гъар жюре айжайиб кIюлгънар апIбинди, гъизиларихъди балгбиинди, ясана уччуудар палтариинди чатлануб дарибши, ⁴хъа – айтIануб: чIур даршулу успагъивал улупру хъпехъувалиинди ва гюжатариз ададапIру рюгъниинди кIваан вуйиб ибши – гъамциб ву Аллагъдин улихъ багъавал. ⁵Фила-вуш садар вахтари, Аллагъдин хъугъывал али дишагълиири, чпи гъамцдариинди балгуйи, аххир! Дураг чpin жиларихъ хъпехъуйи. ⁶Мисалназ, Сара, варибди Ибрагъимдихъ хъпехъуйи ва дугъаз чан агъа кIуйи. Учвура Сарайин шубар вучва – эгер учву ужувлар апIуруш ва гучIури хъуваликк кIул ккивруш.

⁷ Ари гъамци, сатIлан вуйи уьмрий жиларра чpin хпарихъна лайкъ вуйибси духъну ккунду. Дурарин гъюрмат любхну ккунду, гъаз гъапиш, гъеле дураг цIибди зяифдар вушра, жиларихъди сабси ужувлан багъишдин ирсчийр ву. Гъаддиз, учву ккарагру-ган, гъич сарихъанра машат апIуз хъибдарчвуз.

Гъякъ ляхин апIузди алабхъру азабнакан

⁸ Аххирки, гъит ичв сабсдар фикрап ва гъиссар ишри, ичв гъардшарихъна вуйи саб масанвал ибши, язухъ зигуб ва фурс ктрувал ибши. ⁹ Писвализ – писвалиинди, биябурвализ – бия-бурвалиинди жаваб мутуванай, хъа жараси, уж’вал апIбинди жаваб тувай, гъаз гъапиш, учвуз гъаддиз дих дапIна ва учвуэра, ирс вуди, уж’вал дебккуз гаф тувна.

¹⁰ «Шлиз баҳтаварвалиинди яшамиш духъну

ва ужудар ийгъар дяркъну ккундуш,
гъит, мелз чурубдихъан уьбхи,
хъа ушв – кIучIлихъан.

¹¹ Гъит, писвалихъан ярхла ишри,

гъит, уж’вал апIри;

гъит, мясляльт абгри,

гъит, ислягъивал арайиз хури,



- ¹² фицики Агъайин улар гъякълудариин ал ва ибар дуарин ккарагбарихъ хъивна. Хъа писвалар апIурайидарихъинди лигруган, Агъайин машнак хъял кубчIвру».
- ¹³Хъа шлихъан учвуз зарал тувуз шидихъа, эгер уж’вал апIузIан ичв тямягъ хътарш? ¹⁴Гъеле учву, ичв гъякъвализ дилигну, балий-рикк ккахънашра, бахтаврар вучва! Дуариз гучIурайидихъан гучI мапIанай ва гучI’вализ мугъузанай! ¹⁵Хъа Агъа Месигъдин гъюмат ичв юкIвариъ гирамиди уьбхяй. Учвуль яшамиш шулайи умуд фтиин биналамиш дубхъна, кIури, гъерхуриз, ккунириз жаваб тувуз шлубси гъязурди гъузай; ¹⁶анжагъ аькъюлтудина гъюматлуди-Іан жаваб мутуванай. Учву яшамиш шулайи ичв гъяни уьмур къабул дарди, люкънар апIру адмийириз, Месигъдихъ хъуѓиган, чипин гъапIу гафарихъан нач шлуси, ичв намус марцциди уьбхяй. ¹⁷Чу-руб дапIну, аьзабнакк ккуркъайиз, эгер Аллагъдин ният вуш, ужуб дапIну аьзабнакк ккахъуб хъа ужайи даринхъа! ¹⁸Гъаци Месигъра, ухъу гъапIу гунгъарихъанди, сабан ва гъаргандиз, Гъякълур гъякъсу-зарихъанди, учву Аллагъдихъна хпан бадали, ккахъундаринхъа! Дугъан беден аյжализ тувну гъабкIну, хъа Рюгъ уьмрихъна къя-ляхъ хътакну. ¹⁹⁻²⁰Иса гъадму Рюгънаъди, мучIушнаа аий рюгъяриз Ужувлан хабарнакан ктибури, гъушну. Думу рюгъяр, дюн’я, шид илипну, ккапIуз ккунди, Нюгъди гими апIайиз Аллагъ сабурлуди ккилигурайи вахтна, Аллагъдихъ хъпебехъу адмийирин рюгъяр ву. Нюгъдихъди штуин али гимдиъди сакьюдартIан гъюрхондайи – анжагъ миржир кас. ²¹Думу шид, цИийи хъуз, штуан хъувалин лишан ву. Думу лишан гъира кмиди учву уьхюрайиб ву. Штуан хъувал – му ичв жандилан чиркшин алдапIувал дар, хъа ичв марцци кIвахъан Аллагъдиз тувнайи гаф ву, Иса Месигъ чиви хъуб’инди учву уьрхюрайи. ²²Завариина за духъну, Думу гъамус Аллагъдин ар-ччул хилихъинди хъа. Дугъаз вари малайикар, гъюкмар ва къудратар мютIюгъ гъахъну.

Уьмриз дигиши’валар

4 ¹Гъаци вуйиган, беден аьзабарикк ккабхъбинди Месигъди фици аьзиятар гъизигнуш, учвура гъацдар фикрар гъисабназ гъадагъай. (Гъаз гъапиш, беден аьзабарикк ккабхърури гунгъар



апIуб гъибтру). ²Гъацдар фикрар гъисабназ гъадагънайиган, гъоз имбу уьмур — инсандин ккуниси ваъ, хъа Аллагъдин ниятнакди хъапIуз шулу. ³Дарди хъуз, Аллагъ кIул'ин алдрударси, мяна аду уьмур тямягъярильна пиянвалари, къяппаваларильна намусузвалириль ипну, гъар жюре аллагъаризна идолариз икрам апIури, учву бегъем вахт гъавайиди гъапIунчва. ⁴Хъа гъамус дурагиз учву, чпихъди чпи аий аygъвалий имдруган, ажайибди гъугъубжвура ва ушвнихъна гъафиб вари кIурачвуз. ⁵Аммаки дураг багарихъди чИвидаринна гъийихдарин суд апIуз Гъюрурин улихъ чпи гъапибинна гъапIубдин жаваб тууз мажбур хъиди. ⁶Магъа гъаддиз, гъеле чпи адмийирди имиди бедендинди жаза дурагиз гъадбIундаршра — хъа думу жазайиккан дурагихъан ккудучIувуз хъибдар — хъа чпин рюгънииндицъан Аллагъдин уьмрихъна гъубан бадали, Ужувлан хабар гъийихдариизра дебкний.

⁷Варибдин ахир багахъ шула. Гъаддиз ачухъ фикир аидар иихъай, фагъум апIинай, хъа гъадмуган ккарагуз хъибичвухъан. ⁸Сифтена-сифте вари кIваантIан чиб-чили ккун апIинай, гъаз гъапиш масанвали гизаф гунгъар ккеркру. ⁹Мурмрап дараIиди, хълар къабул апIури иихъай. ¹⁰Учкан гъарсариз жаариз дарубсиб хъуркъвал дурубкъначвуз, гъаци вуйиган Аллагъди учвуз багъиш дапIинай гъаму гъарсаб жюре хъуркъувалар, чиб-чпин гъайгъушнаш шлуси, мянфяльтуди ишлетмиш апIинай. ¹¹Эгер шлиз гафар апIувалин хъуркъувалар аш, гъит, дугъу Аллагъдин хабарнакан гаф рабгъри; шлиз гъуллугъ апIбаъ хъуркъувалар аш, гъит, Аллагъди туврай къувватнаш учв мюгъкам ишри. Гъит, варидари Иса Месигъдилантина Аллагъдин ад бадали жафа зигри! Гъадгъяз ибши аьсариан-аьсарииз ад ва къудрат, амин!

Хъугърударин сабурлуваликан

¹²Йиз багъаллуйир, учвухъди фу-вш саб ажайиб шула, кIури, учв'ин алахъурайи гъагъи азабариин-аэзиятириин мюгъталь маҳъанай. ¹³Хъа гъатцидарихъинди, учву Месигъдин азабариль иштирак шулачва ва, гъаддиз, шад иихъай, хъа гъиямат ийгъан, Иса Чан аднаъди гъафиган, шадвали ацIичва ва гъарай ипдичва. ¹⁴Эгер учву Месигъдин ччвурналантина биябур апIураш, учву бахтаврар вучва, му гъадму кIуру гаф вуки, Аллагъдин Рюгъ Чан вари аднаъди учвуль архаин духъна. ¹⁵Эгер учкан сар фуж



аъзабнась аш, гъит, думу аъзаб йивну йикІбалан, ясана гъитІбкІ-
балан, ясана законсузваларилан, ясана футна апІувалиланти-
на вуйиб дарибшри. ¹⁶ Учву Месигъдихъ хъугънайивалилантина
аъзиятариь ахънаш, гъит, дицири нач дарапІри, хъа, гъит: «му
Исайихъ хъугърур ву», – кІуруган, Аллагъди учвуз гъациб уж’вал
дебккнайивализ дилигну, гъацири Дугъан ад апІри!

¹⁷ Гъаз гъапиш Суд апІру йигъ багахъ хъа. Хъа думу Аллагъдин
хуландарилан ккебгъди. Хъа думу ухълан ккебгърайиган, Ал-
лагъдин Хабар къабул дарапІрайидарин аъхир фициб шуйкІан?!

¹⁸ «Эгер гъякъ вуйирихъан
саб нуфтдитІан жвув уърхюз шулдарш,
хъа фу шул
кацІнайидарикан ва гунагъкраган?»

¹⁹ Гъаддиз Аллагъдин ниятниинди аъзабнакк ккайдар, гъит,
гъуркІну чпи вариб халкъ ГъапІурин ихтиярнаь учІври – Думу
гъарган аъгътлур ву – ва чпин фикрап ужуудар ляхнариина жалб
апІри.

Аллагъдин лиж

5 ¹ Гъаци вуйиган, гъамус узу ичв аъхюдарихъна илтІикІураза.
Даршуз узура йиз марччарин – хъугърударин аъхюор вуза.
Мидлан гъайри, Месигъдикан кчІикъу аъзабарин шагъид вуза ва,
магъя, гъамус – хъа дюн’яйиз гъиямат йигъ хъади гъюрайи Ду-
гъян ад рубкърударикан сар духъназа. ² Ичв ихтиярнаь тувнайи
Аллагъдин лиж уъбхаяй, дидин гъайгъушнаь учву буржлу вуйи-
валиан мишанай, хъа Аллагъ ихъ гъайгъушнаь айиганси, учвура
ичв аъшкъниинди гъайгъушнаь йихъай; учвуз му дюн’яйикан ха-
йир ктабгъуз ккунди ваъ, хъа ичв гъякъ тямягъ хъайивалиинди
гъайгъушнаь йихъай; ³ гъякимари Аллагъди чпин хилий иvnайи
адмийирин зinin агъавал апІурайиганси ваъ, хъа вари лижаз ми-
сал вуди гъуллугънаь шлуганси гъайгъушнаь йихъай; ⁴ ва, Аъхю-
ну Марччлихъан гъафиган, гъич зат дучрубхру адлувалин кунцІ
рубкъидичвуз.

⁵ Учвура, жигъилар, аъхюдарихъ хъпехъури апІинай; чиб-чпин
гъайгъушнаь духъну, разивалиъ кІул ипай, гъаз гъапиш,

«Аллагъ фурсачайириз къаршу удучІвтуру,
хъа разивал улупрудариз



Думу рягым апIурү вү».

⁶ Гъаддиз, Аллагъдин къудратлу хилин улихь разивалиинди ик-рам апIинай, Дугъу учвура Чан вахтна заъди. ⁷ Ичв вари гъай-гъушнар Гъадгъуин иличай – Думу ичв гъайгъушнаа!

⁸ Ичв фагъмихъ гъузай, мааханай! Учвуз къаршу вуйир, иб-лис, гашу удубтIнайи асланси, учвкан хътIюкъюз ужур агури либцура.

⁹ Учву ичв мюгъкам хъугъвалиинди, дюн'яйиъ вари ичв гъард-шари учвуси гъамцдар аззабар аыгъ апIурайиб аыгъяди, дидиз къаршу удучIвну ккунду. ¹⁰ Аммаки учвуз аыгъ апIуз сацIибтIан имдар! Иса Месигъдиль сатIиди духьну дих дапIну, гъарсаб ужувлан булагъ айи Аллагъди Чан гъаммишандин Ад учвухъди пай апIиди, учву дюз алаиди, ижми апIиди, къувватлу апIиди, иишв'ин мюгъкам апIиди. ¹¹ Дугъян къувват аысрариан-аысрариз ившри, амин!

Аъхиримжи насиgъят

¹² Узу гъаму бицIи кагъаз Силван гъардшин кюмекниинди гъибикIунза. Узуз дугъян хъугъувал ужуйи аыгъязуз. Узу му ка-гъаз учвуз, мушваъ улупнайиб Аллагъдин ужувлан гъякъ багъиш ву, кIури, учву рази ктаъбан бадали, гъибикIунзачвуз. Ижмиш-наан гъамдихъан хъичIихай.

¹³ Учвуси Аллагъди кадагънайи Вавилондиан вуйи чуччура учвуз саламар хътаура, ва гъацира – йиз бай Маркдира. Чиб-чпиз чве-валин масанвалин мак апIииндиги салам туври апIинай. Вари Месигъдиндариз, учвуз, мясляают ившри!



ВАРИ ХЪУГЪРУДАРИЗ ПЕТРИН КЬЮБПИ КАГЪАЗ

Кьюбпи кагъазра Гирами Рюгъну Петриинди БицIи Азияйи¹ Исайихъ хъугърудариз дубикIнайиб ву. Душваң кучIлин вакилар ачмиш дужьнайи, ва дурагин фурслу улхбар-рахбари хъугърудар гъаму дюняйин тямягъярихъна зигурайи, дураг буш апIурайи. Дураги Исайихъ хъугърудариз тувнайи азадвал чин чIуру ниятарииз ишлемшии апIурайи. Дураги гъаци Исайин чвур биябур апIурайи ва Аллагъидикан кучIлях ктаурайи. Чахъ хъугърудар Чахъди гъахуз Isa кьюбпи ражарира гъиди кIури, Аллагъиди тувнайи гаф дураги ибак апIурадайи. Гирами Рюгъназ БицIи Азияйи² Аллагъидихъ хъугърайидар кучIлин вакила-рихъан урхюз ва дурагин каламариз альхир дивуз ккунди аий. Дуггъу хъугърудариз шаклу дархъуз дих апIура, гъаз гъапиш кIвахънивалари хъугъевал ебицIуз гъитру. Гъамусдихъантина, Аллагъидиз ккуни уымур хъапIри, дураги чин умуд Месигъидик кади гъибтри.

Аллагъиди ухъуз лазим вуйиб вари түвна

1 ¹ЛукIвал апIурайи Isa Месигъдин вакил Петрихъан – Аллагъиди гъякъ апIбиинди ва Урхрурин – Isa Месигъдин кюмекниинди ухъуз гъабхыбсеб багъа хъугъувал гъабхьидариз – саламар.

² Учвуз Аллагъиди ва ихъ Агъа Isa альгъю апIувалилантина гизаф ужувлар ва мясляльтар ишричвуз!



³Исайин Аллагъвалин къувватну ихь уымриз гъарсаб лазим ву-
йиб ва лап кІваантІан Аллагъдин гъюрмат убхрувал тувнахъуз.
Му Чан хусуси адниинди ва Чав ужувлан ляхнар апІбиинди Учв
ухъуз аыгъю хъувалилантина гъурубкъунхъуз. ⁴Гъаму Касдилан-
мина ухъуз, гаф тувнайиси, варитІан багъя ва варитІан зурба
ужувлар дурукъинахъуз. Дураг ухъуз, гъаму дюн'яйин тямъяри-
ланмина гъюру айжалнахъян гъадарин кюмекниинди учву ярхла
духъну, Аллагъдин хасиятнак ктийбан бадали, багъиш дапІна-
йидар вухъуз.

⁵⁻⁷ Гъаму себеб буди, ичв хъугъувал – ужудар ляхнариинди,
ужудар ляхнар – аыгъювалариинди, аыгъювалар – аыгъ апІби-
инди, аыгъ апІуб – ижмишниинди, ижмишин – ужуб гъюр-
матниинди, ужуб гъюрмат – чве瓦алин дуствалиинди, дуствал –
масанвалиинди мюгъкам апІбан бадали, ичв вари къувват
жалб апІнай. ⁸Эгер учву гъамцдар хасиятар аш ва учву ду-
рар зарб апІоруш, ихь Агъя Иса Месигъдикан вуйи ичв аыгъю-
валар дураги мянфяльтсузды ва бегъерсузди гъйтдар. ⁹Хъа гъац-
дар хасиятар кадрур улихъиш дярябкърайир ва кур ву, чан
мугагъназ кайи гунгъарихъян марцц духънайивал кІваълан гъапІ-
найир ву. ¹⁰Магъа гъамдиз, гъардшар, хъана аыхю къувватниин-
ди учвуз дих дапІнайивал ва учву кадагънайивал тасдикъ апІнай.
Гъамци апІури гъашиш, гъич саркъан алдакидарчва! ¹¹Гъад-
муган учвуз ихь Агъя ва Уърхур Иса Месигъдин гъаммишандиз
вуйи Паччагъулугъдиль учІвуз ихтияр жумартлуди багъиш дапІну
хъибди, аыхир. ¹²Магъа гъаддиз йиз ният вуйиз учвуз гъамди-
кан гъаммишан кІваин алапІуз, гъеле учвуз гъаму варибдикан
аыгъяшра ва учвуз дурубкънайи гъаму гъякъвалиин учву мюгъкам
духънашра.

Месигъдин аднан шагыдар

¹³Сабан узу йиз гъаму бедендин халиъ яшамиш шули имбу-
къан гагъди, ичв фагъмиз мидкан кІваин алапІури, думу гъарган
уюгъ апІуз узу йиз буржи буди гъисаб апІураза. ¹⁴Узуз аыгъязуз,
аыхир, гъаму йиз хал узхъян хътибтру вахт багахъ шула – му узуз
ихь Агъя Иса Месигъди ачмиш гъапІунзуз. ¹⁵Узу гъушхъантина-
ра ккуни вахтна учвхъян, гъамдикан кІваин алапІуз шлуганси,
узу йиз хил'ан удубкъруб вари апІидиза.



¹⁶Учу учвуз, ихь Агъа Иса Месигъ къудрат хъади къяляхъ гъиди, гъапиган, учу шлин-вш аймалдар махъвар текрар гъапIундайча. Ваъ, Дугъан зурбавал учуз ич улариинди гъябкъюнчуз! ¹⁷Ду-гъахъна «Му Йиз масан Бай вуйиз, Гъадгъаъ Йиз шадвал айиз» кIуру зурбавалин Аднан дих гъабхъиган, Дугъу Аллагъ Адаш-дихъан гъюмат ва ад къабул гъапIну. ¹⁸Ва гъаму дих завариан гъафний – учуз, Дугъахъди гирами дагъдин алиган, ич ибари-инди гъеебхъунчуз. ¹⁹Миди ухъуз пайгъамбри гъапи гафар дюз вуйивал хъана артухъди улупура. Учву дурарин гафарихъна, Йигъ аку дубхъну ичв юкIвари гвачIиндин Хяд гъудубчIвкъан гагъ-ди мучIушнакк убгурайи чирагъдихънаси янашмиш шулаш, ужуб апIурачва. ²⁰Хъа сифтена-сифте кIваин гъибтну ккундуки, Ги-рами бикIбарин гъич сабкъан гъюз имбуудикан гаф адмийи ач-миш апIуз хъюгъну ккундар, ²¹фицики адмийин ниятниинди гъич саб вахтнара пайгъамбраихъан вуйи гъюз имбуудикан га-фар гъахъидар дар. Ваъ, адмийири Аллагъдихъан гъоруб кIуйи ва дурар гъаддихъна Гирами Рюгъну хуйи.

КучIлин миалимар

2 ¹Мидлан савайи, халкъдин арайиъ кучIлин пайгъамбрар ачиши гъахъиганси, ичв арайиъра кучIлин миалимар ачиши хъидивучв. Дурарихъан аյжалихъна гъахру чпин кучIлин каламар арайиз адагъуз хъиди. Дурари чпи азадвал бадали кадагънайи Гьюкумдар (Агъа) тина апIиди. Дурар, Агъа къабул дарапIби-инди, багарихъди чпи тIанкъ апIувалихъна гъиди. ² Гизафда-ри дурари апIрусдар ягъсуз ва намуссуз тIулар апIуз дубгъиди ва гъацдариинди гъякъ рякъ биябур апIуз иишв тувди. ³Дурар ацIру касар дар. Дурар чпин иблис ва аймалдар каламарииинди учвлантина гизаф девлетлу хъиди. Аммаки, дурариз ухдитIан жаза гъадабтIну гъязурди а, диди къан апIидар, ва дурарин айжал даабхнадар!

⁴ Аллагъди гъеле малайикаркъан гъайиф гъапIундар; дурари гу-нагъ гъапIиган, жегъеннемдиль дурар уржнийи ва гъаммишандин мучIушнан зунжарихъди суддин Йигъ гъайиз дитIнийи. ⁵Дугъу лап кюгъне дюн'яра гъайиф гъапIундар; гъякъ'валикан хабар дебккри гъахъи Нюгъдилан ва дугъахъди хъайи ургур касдилан гъайри, гъюмат адрударин дюн'я штухъди ккапIнийи. ⁶Содом



ва Гомора шагърарра, гъюз ккимбу гъюрматсузариз мисал вуди, ккидирчну, рюкъдиз илтІикІну.⁷ Хъа Дугъу дугъривалиинди яшамиш шулайи, ягъсуз уьмур хъапІрайи законсузариккан айсси дуҳънайи Лут, гъюрхну.⁸ Гъаму гъялал касдиз, гъамгъан дугъри гъянаز гъадрати апІурайи тІулар ерхъуб ва рякъюб гъар ийгъян чакан кчІикъурайи зивзиварси гъугъужвуйи.⁹ Намус ва гъир'ят айи касар Агъайиз читинвалариккан урхюз айгъя, хъа гъякъсузар – суд апІру Йигъаз жаза адабтІуз урхюз айгъя.¹⁰ Дурарикан гизафна-гизафси, Агъайин гюкум гъясбикк ккадарди, чпин жанариз ккунибси апІру чиркин тямъгъариҳъди гъягърударин язухъ ву!

Гъясбикк ккадру тІулар апІрудар ва эдеб адрудар, чпи аэршарин къудратар биябур апІурайивалихъан гукІнидикъан адар.¹¹ Агъайин улихъ тахсрар кирчри, дурагилан улхурайи малайика-рикъана, гъеле дураг адмийиртІан фукъан гизаф къувватлудар ва удукърудар вушра, дураг биябур апІурадар.¹² Дураг сабдизтІан хай дару – дисуз ва иихуз пну бабкан шлу, чпин нефстІан айгъдру фагъумсуз гъайванатарсдар ву. Дураги варибидиз чпин фагъ-михъан аннамиш апІуз даршлу агърар апІуру. Гъадму гъайванатарси дурагга иихиди.¹³ Дурагин чпи гъапІу чIурувалариз – чIу-рувал'инди тувди. Дурагиз йигъандин аквнахъди кефер хъауз меэлди ву. Дураг чпи ву кфиравл ва ужузвал. Дураги, учвуз кучІлин чулар ургъбииинди учвухъди саб суфрайихъ деъну, къу-къар апІура.¹⁴ Дишагъли гъяркъюбси, дурагин улар къяппавали ацІра, ва гъациб гунагънахъан гъудучІвуз ккундар. Дураги, чпин дисру рукъарий итуз, зяиф гъян айидар хъчІюхюри шулу. Дурагин юкІвар иблисвалихъди дидиржна. Дурагин къисмат – пуч хъувал ву.¹⁵ Дураг диш рякълан улдучІвну ва ургну. Дураг гу-нагъкар ляхнар апІузди тувру пешкешнаъ ул абхъну гъушу Боросдин бай Валаамдин рякъюъди гъушну.¹⁶ Думу Валаам, писвалиар апІурайиган, чал айгъдру дажди, инсандин чалназ дуфну, гъидиснийи, ва гъадму пайгъамбрин фагъумсувал дебккний.

¹⁷ Дураг дерщнайи булагъар ву. Дураг, гужал микІари гырч-найи кIару кьюкъ-дифар ву! Дурагиз гъаммишандин жегъен-немдин мучIушин ккилибгура.¹⁸ Дураги чпин кыил ктру гафари-инди, ичИи улхбариинди, гъуркІну удукурку жандиз ккуни тя-миягъарин кюмекниинди, кучІлариъди яшамиш шулайидарихъан



ярхла хъуз хъюгънайидар, чпихъна хъчиюхору ва чпин бацаригъ Чюркьюру. ¹⁹Дурари, чпи пуч шулайи лукI'валий ахънайидари, дуариз азадвал тувуз гаф туври шулу. Фуж фтиз мютЮгъ шулаш, думу гъаддин лукI шула. ²⁰Эгер ихъ Агъя ва Уърхур – Иса Месигъ аыгъю хъувалиинди гъаму дюн'яйин чиркинваларихъан гъудучІвнайидар хъана гъадму чиркинваларий ахъиш, дуар хъана гъадрин лукI'валий ахъра. Сифте чпин чиркинваларий айиб-Іан, гъамус хъадахъну ахъуб – хъя яман ляхин ву. ²¹Дуариз, гъякъ Рякъкан аыгъю дубхъну, чпин хилий иvnайи гирами табшуругъарихъан гъудучІвайиз, дидкан зат аыгъю гъабхъундайиш ужу хъибдий! ²²Дуарихъди гъабхъиби гъаму мисалнаш дупнайиб дюз вуйиб улупура:

«Ху хъана чан ибичубдихъна хътабкуру»

ва

«Сил жибкI – думу хъана батІриан идибгъиди».

Иса къяляхъ гъиди

3 ¹Йиз ккунидар, узу бикIурайи кагъаз кьюбипи вуйиз. Гъад-му кагъзарий узуз учву марцци фикрарихъна хуз ккунди ауз. ²Гъаци гъабхъиган, саб фила-вш гирами пайгъамбрар гъапи гафар ва ичв вакилари учвухъна дурубкънайи Агъайнин ва Уърхурин табшуругъ кІваинди уърхидичва.

³Сифтена-сифте учвуз аыгъю дубхъну ккундуки, аыхиримжи йигъари чпин хусуси тямиярихъди гъягъру рихшанд апIувалар арайиз гъиди. ⁴Дурари, къялхъри, пиidi: «Набши Дугъян, гаф тувнайиси, гъюрайивал? Магъя ич айиrrа кивну архаин гъахъну, хъя вариб дюн'я халкъ гъапIхъанмина чан гъаци ими». ⁵Дуариз саб фила-вш Аллагъдин Гафниинди жилар ва аършар штукан ва штуинди халкъ гъапIубдикан кІваълан гъархна. ⁶Гъадму шта-риинди ккапIну дюн'я терг гъапIнийи. ⁷Хъя гъамусдин аършар-на жилар, Аллагъдин гъадму Гафниинди цIа йивну ккидирчуз ва Месигъдихъ хътругъдар йихуз, суддин Йигъ хъайиз уърхюра.

⁸Йиз ккунидар, магъя фу учву кІваълан гъархну ккундарш: Агъайиз сад йигъ – агъзур йисси ву ва агъзур йис – сад йигъси.

⁹Агъайи Чав гъапиб тамам апIуз, гъеле сакъодари къан апIура кІурашра, къан апIидар. Гъатци, Думу ухъуз гъилигиган гизаф са-бур айир ву, Дугъяз ухъкан фужкIа дукIину ккундар, хъя вари, чпи



гъапибдин ва гъапIубдин швумал духьну, Чахъна илтIикIну ккунду. ¹⁰Хъа Агъайн Йигъ, тIафалси, хабарсузди гъиби. Гъадму йигъан а yrшар-завар рахру гъугъумарин дихарихъди дургди; заварин табильтар даргъиди ва ургиди; дюн'яра, чан ляхнар улихъ гъльну, тахсирназ хиби. ¹¹Ва эгер вари гъамци ккадахъу-руш, хъа учву фицдар духьну ккунду, фициб гирамиб ва Аллагъ-диз бахш дапIнайиб вуди ккунду ичв уьмур?! ¹²ЦIа алабхънайи а yrшар ккадахъруган ва заварий айи ригъар-хядар цIиль ерцIру-ган, аygъ дарапIди ва тямягъниинди Аллагъ гъору Йигъаз, учву, гъацдар, фици ккилигуз ккачва?! ¹³Ухъу, Дугъу гаф тувиганси, дугъривалтIан адру цIийи а yrшариз ва цIийи дюн'яиз ккили-турахъя.

¹⁴ Магъа гъаддиз, йиз ккунидар, учву Аллагъдихъди мясяльт-ная хъпан бадали, гъамци шлувализ ккилигбииинди марщидар ва гаф ктрудар хъуз чара зигай. ¹⁵Хъанара, Аллагъдин гъадму-къан зурба сабур – учву урхюз мумкинвал туврайивал – ичв хайирназ вуди гъисаб арIинай. Мидкан Аллагъди чаз тувнайи фагъумлувалиинди вари чан кагъзарий ихъ масан гъардаш Паве-лира гъапнийи. ¹⁶Дугъу мидкан чан вари кагъзарий гъибикIин-ий. Дурагири гъаврий ахъуз читин шей'арра а. Дицдар иишвар айкъюлсуз ва мюгъкам дару адмийири, Гирами бикIбарин имбу-ну иишварси, чипин айжалназ, айтIлан арIуру. ¹⁷Хъа, йиз ккуни-дар, учвуз мидкан мугагъназра хабар айиган, намус адру адми-йирин кучIлари учву чпихъинди хъчIючIюхюз ва ичв ижми бин ккидидипуз, ихтиятди гъузай. ¹⁸АийбIан артухъ ихъ Агъа, Урх-рур – Иса Месигъ, ва Дугъан уж'вал аygъю арIури, гъаддиз ахю иххай. Дугъан ад ившри гъамусси, гъаммишандин Йигъ гъафи-ганра. Амин!



ЮГЬАНДИН САБПИ КАГЪАЗ

Гирами Рюгъну Югъандинди му кагъаз шлин вая фужарин-вуши чивурнахъ дубикIнадар. Гъаддиз, му кагъаз гъадму вахтназ хбугъу варидализ кайиб ву. Сабпи варж иис ккуудубкIури, Месигъдикан Ужувлан хабар ва варитIан цИии хбугъувал кубкъу иишвариъ жара жюреин каламарра яркъуди рагъуз хъюгънайи. Гъеле хбугърударин арайибра каламар, гъич саб бин адариша, къабул anIурайи. Мисалназ, сакьюдар кучIин мялимари, Аллагъдин Бай вүйи Иса Месигъ гъаму дюн'яйин адмисир дар, кIурайи. Гъаддиз Исаин вакил Югъанди, гъякъди Исаихъ хбугънайдари хбугъувалин бин ва метлеб фицдар лишинаринди аыгъю anIуруш, хъайи-хъайиси кIурайи: Аллагъдикан Адми духьну, Чан уымур ухъхъанди гъурбан danIну, Дугъу Чан масанвал ухъуз улупнуну. Хбугърудари гъадму масанвал къабул гъанIну, ва думу жарадаризра багыши anIура. Гирами Рюгъну, масанвал къабул danIну, Аллагъдихъна илтIикIдарин гъяни ляхнарикан кIваин anIура: «Шли, Аллагъдиз ккууниси яшамиши шулаза, кIураш, думу Исаси яшамиши духьну ккуунду» (2:6).

Иса Месигъ – уымрин гаф

1 ¹Дюн'я ккебгъхъянмина Айирикан, учуз Гъеебхъурикан, ич уларииндиги учуз Гъяркъюрикан, учу лигури Гъахъирикан, учу хилариинди кучри Гъахъирикан, яна уымрин Гафнакан – Исаикан учу ктибтурача. ²Му вари – учуз гъябкъюнчуз, мидин



шагыидар – учу вучу. Му – учуз гъяркью уьмрин Гаф, Адаш Аллагыдих хьайи. Дугъу Думу учуз улупну ва учу учвуз мидкан хабар дебккрача. ³Учуз гъябкьюбикан ва гьеебхьубикан, гъамус учвура учук ктикъбан бадали, учвуз хабар дебккрача. Хъа учу Адаш Аллагыдик ва Дугъан Бай Иса Месигъдик кидикънайдар вучу. ⁴Учу му, учуз гъубкIу шадвал хъпан бадали, бикIурача.

Аквнаъди гъягъюб

⁵ Магъа учуз Аллагыдикан гъамциб хабар гьеебхъунчуз: «Аллагы – акв ву. Дугъаъ гъич саб жюрейин мучIушин адар». ⁶Эгер ухъу, Дугъак ктикъунхъа кIураш, хъа мучIувалиъди гъяраш, ухъу кучIлар апIурахъа ва гъякъвалиъди яшамиш шуладархъа. ⁷Эгер, Аллагы аквнаъдай айиси, ухъура аквнаъди яшамиш шулаш, ихъ арайиъ аylакъийра хъиди, ва ихъ гъарсаб гунагънахъан Дугъан Балин – Исаин ифди марцц апIура.

⁸ Эгер ухъу, гунагъ ктарчук кIураш, ухъу ухъуз кучIлар апIурахъа ва ухъуль гъякъвал адар. ⁹ Эгер ухъу ачухъди ихъ гунгъар кIул’-ин дисуруш, Дугъу, Гъякълури, хъугъвал Алири, ихъ гунгъарилан хил алдабгъиди ва ихъ гъарсаб гъякъсузвалихъан ухъу марцц апIиди. ¹⁰Хъа эгер ухъу, гунгъар гъапIундархъа кIураш, ухъу Аллагы кучIлях вуйирси дерккрахъа ва Дугъан Гаф къабул апIурадархъа.

Аллагыдин цIийи табшуругъ – масанвал

2 ¹Ииз веледар, узу му, учву гунагъ дарапIбан бадали, бикIураза. Хъа эгер щли аygъдарди гунагъ гъапIишра, Адашдин улихъ ухъхъан гаф Йиврур хъа. Думу – Иса Месигъ, дугъри Кас ву. ² Ари Гъадму гъурбан духъну, ихъ гунгъариккан, неинки ихъ, хъа гъацира вари дюн’яйин гунгъариккан ккадауз Гъитур ву.

³ Дугъан табшуругъар тамам апIури гъашиш, ухъуз Аллагы дугъридан аygъю гъахъунхъуз дупну, архаин хъуз шулухъхъан. ⁴ Шли: «Узуз Думу аygъязуз» кIураш, хъа Дугъан табшуругъар тамам апIдарш, дугъу кучIлар апIура ва дугъаъ гъякъвал адар. ⁵ Хъа фуж Аллагыдин аygъюваларихъ хъпехъураш, думу дугъриданра Аллагыдин масанвали ацIина. Магъа гъамци ухъу Аллагыдикди кидикънайивал аygъю апIуз шулу. ⁶ Шли Аллагыдиз ккуниси яшамиш шулаза кIураш, думу Исаси духъну ккунду.



⁷ Йиз масан вуйи дустар, узу учвуз таза табшуругънакан бикIу-
радарза, хъя – учвуз сифте бинайиан тувнайибикан. Му кюгъне
табшуругъ учвуз ухдихъанмина деебхънайи гаф ву. ⁸ Хъя жара те-
рефнаан, узу учвуз бикIурайиб, цийи табшуругъ ву, гъаз гъа-
пиш, му гъякъвал Иса Месигъдин ва ичв уымри улупура, миди
мучIушназ къяляхъ йивура, ва гъякъвалин аквну гъамустIанра
нурар рагъура.

⁹ Шли, чав аквнааь аза кIури, гъардаш ккуун дапIнадарш, думу
мегъель мучIушнааь ами. ¹⁰ Шлиз чан гъардаш ккундуш, думу
аквнааь а, ва дугъяаь фукIара учв алдакруб хибдар. ¹¹ Гъардаш
даккнир мучIушнааь а. Думу мучIушнааь яшамиш шула ва ду-
гъаз, учв наанди гъягъюраш, аыгъдар, фицики мучIушну думу
кур дапIна.

¹² Узу учвуз, йиз ккууни веледар,
ичв гунгъарилан
Иса Месигъдилантиниа
хил алдабгъину, кIури,
бикIураза.

¹³ Узу учвуз, айир-бабар,
дюн'я-бина хъайиз Айир
аыгъю гъахъунчвуз, кIури,
бикIураза.
Узу учвуз, жигъилар,
Писубдин
гъалиб гъахъунчва, кIури,
бикIураза.

¹⁴ Узу учвуз, бицIидар,
Адаш аыгъю гъахъунчвуз, кIури,
гъибицIинийза.

Узу учвуз, айир-бабар,
дюн'я-бина хъайиз Айир
аыгъю гъахъунчвуз, кIури,
гъибицIинийза.

Узу учвуз, жигъилар,
къувватлу вучва,
Аллагъдин Гаф учвувъ яшамиш шула
ва Писубдин



гъалиб гъахъунчва, кІури,
гъибиkІнийза.

¹⁵ Му дюн'я ва дидиъ айиб ккун мапIанай. Эгер шлиз дюн'-
яйинуб ккундуш, дугъан кІваъ Адашдихъна вуйи масанвал адар.

¹⁶ Гъаз гъапиш му дюн'яйиль аии варибихъ ихъ гунаgъкар жандин
тямягъ хъа. Ихъ уларин тямягъ хъайиb ва гъаму уьмриъ адмийи-
ри фурса ва дамах апIурайиb вари — гъич фукIара Адашдихъан
вуйиb дар. Хъа му вари — дюн'яйихъан ву. ¹⁷ Му дюн'я ва инсан-
дин тямягъ зибгруб — вари гъюдубЧвну гъябгруб ву, хъа Ал-
лагъдин ниятар тамам апIуризтIан гъаргандин уьмур хъибдар.

Аъхиримжи вахтарин аллагъдин душмнаар

¹⁸ Баяр-шубар, аъхиримжи вахтар улукъура! Учвуз гъеебхъи-
ганси, Месигъдиз Къаршур гъиди, дупна. Лигуруш, дурап, ихъ
Месигъдиз къаршу касар, гизаф духъна. Магъа гъаддиз ухъуз,
аъхиримжи сяаtт улубкънайиb рябкъюрахъуз. ¹⁹ Месигъдиз къар-
шу вуйи гъадму касар ихъ арайиан удучIвдар вуйи, хъа дугъри-
дан дурап ухъукди кидикънайиdar дайи. Эгер дурап дугъриданра
ухъукди кидикънайиdar вуйиш, дурап ихъ арайиль гъуздийи. Ам-
маки дурап вари гъергну, гъамди дурапин ухъук кидикъну адру-
вал улупура.

²⁰ Учвуз Гирамири Чав, туvu багъиш ачвуз ва варидализ, аygъю-
валар фу вуш, аygъю гъабхъунчвуз.

²¹ Узу учвуз, гъякъвал аygъдарчвуз, кІури, бикIурадарза, хъа ду-
му учвуз аygъюган ва диди кучIал арайиз дархиган, бикIураза.

²² Фуж ахъа сарун, Иса — Месигъ дар, кІурутIан кучIлях? Гъа-
цир кас Месигъдиз къаршу ву. Дицири я Адаш, я Бай къабул
апIурадар. ²³ Шли Бай къабул апIурадарш, дугъу Адашра къа-
бул апIурадар. Шлиз Бай аygъяш, дугъаз Адашра аygъя.

²⁴ Сифте бинайиан гъеебхъубдихъди гъузай. Эгер учву, учвуз
сифте бинайилан гъеебхъубдихъди гъузиш, Балихъди ва Адаш-
дихъди хъидичва. ²⁵ Ухъуз Бали туvu гаf — магъа гъаму ву: гъар-
гандин Уьмур!

²⁶ Узу му учвуз, учву алдатмиш апIрударикан бикIураза.

²⁷ Хъа учвуз кайиb: Месигъдихъан учвуз дурубкънайи багъиш
учвухъди гъубзди, ва, гъаддиз, учву, шлин-вуш дарсариз кки-
лигурайиdar дарчва. Гирамирихъан учвухъна гъафи Рюгъну учвуз



гъякъвалин дарсар кивра, ва гъич саб вахтнара Дугъу учвуз ку-Чал апIидар. Гъаци вуйиган, Гъадгъу улупурайибси апIинай, ва Аллагъдиъди гъузай.

Аллагъдин бицIидар

²⁸ Гъаци вуйиган, Месигъди кIуруб гъаци апIинайки, йиз веледар, Думу хъадакну гъафиган, Дугъан улихъ учвхъан, я гучI'вал, я нач'вал адарди, дугъужвуз шлуганси!

²⁹ Эгер учвуз Думу дугъри вуйиб аygъяш, учвуз гъацира аygъя-чвузки: дугъривалиинди яшамиш шулайидар Аллагъдин веледар вуйибра.

3 ¹Ихъ Адашди ухъуз Чан – Аллагъдин веледар пуб'инди фу-къан зурба вуйи масанвал улупнуш, учву фикир апIинай. Ухъу гъаци хъузра вухъа! Му дюн'яйиндари ухъу къабул апIурадар, гъаз гъапиш дураги Думу къабул гъапIундар. ²Йиз ккуни-дар, гъаму ражари ухъу Аллагъдин веледар вухъа, хъа гъюру вах-тари ухъкан фужар шулуш, сабан мялум дар. Саб аygъяхъуз, Иса Месигъ хъана жилариина гъафиган, ухъу Гъадгъаз ухшар хъиди-хъа, фицики Думу Учв фицир вуш, гъацирди рякъидихъуз! ³ Ва шли чан миж Гъадгъак кивраш, дугъу, марцци Месигъдиз ухшар вуди, чан уьмурра марцци апIура.

⁴ Шли гунагъ апIураш, дугъу законсузвал апIура, фицики гунагъ – законсузвал ву. ⁵ Учвуз аygъюганси, Месигъ инсанарин гунгъар Чайна гъадагъуз Гъафир ву. Дугъак гунагъ ктар. ⁶ Дугъахъди яшамиш шлу гъич сарира гунагъ апIидар. Хъа гу-нагъ апIуб давам апIурайириз Думу я гъяркъюндар, я аygъю гъахъундар.

⁷ Багъалу вуйи веледар, лигайки, учву гъякъ рякъхъан хътаь-рударин кучIларихъ мехъебехъанай. Гъякъ'вали тIалаб апIурайи-си апIур Месигъси гъякъ кас ву. ⁸ Гунгъар апIур иблисдинур ву, фицики иблисдира, чан сифте бинайианмина гунгъар апIу-йи. Аллагъдин Бай жилариина магъа гъамциб метлеб ади гъа-фир ву: иблисдин тIулар терг апIуз. ⁹ Аллагъдин веледар гъахъи-дарикан гъич сарира гунгъар давам апIидар, гъаз гъапиш дицир касдий Аллагъдин тум а. Гъаддиз дицирихъан гунагъ тIулар апIу-ри гъузуз шулдар, гъаз гъапиш думура Аллагъдин веледарикан



сар духьна. ¹⁰Фуж – Аллагъдин, хъа фуж иблиздин велед вуш, магъа гъамци альгъю апIуз шулвухъан: гъякъвалиинди дараpIурев чан гъардаш даккнир Аллагъдихъан дар.

Сари-сар ккуун апIинай

¹¹Магъа учвуз сифте бинайиан деебхънайи гаф: сар-сарихъна ма-санди йихъай. ¹²Ухъу иблиздин тереf дубисну, чан чве йивну гъа-кIи Каиндиз ухшар духьну ккундар. Дугъу думу гъаз гъакIину? Гъаз гъапиш дугъан ляхнар писдар вуйи, хъа чан чвуччвун – ужудар.

¹³Чвийир, мюгътал махъанай, эгер учву му дюн'яйиз ккундарш. ¹⁴Ухъуз альгъяхъуз ухъу альжалнахъан гъаргандин умрихъна дуф-нейиб, фицики ухъуз ихъ гъардашар ккундухъуз. Хъа шлиз ккун-дарш, думу, чан дукIинайир, дукIину гъузди. ¹⁵Гъарсар, чан гъардаш даккнир, адми йивну гъачIир гъисаб ву, хъа учвуз альгъячвуз, адми йивну гъакIириз гъаргандин умур даршлуб.

¹⁶Масанвал фу вуш, ухъуз, магъа, наянан альгъяш: Месигъди ухъхъанди Чан умур тувну. Ухъура гъаци ихъ гъардашихъанди ихъ умрапр тувну ккунду.

¹⁷Эгер шли, девлет ади, хъа чан гъардаш альгузди яшамиш шулайиб рябкьюри, кюмек апIарш, дицирий Аллагъдин масан-вал фици шул? ¹⁸Йиз веледар, ихъ ккунивал садар гафарииинди-на улхбариинди дубхъну ккундар, хъа – ляхниинди, ва якын ву-йиб дубхъну ккунду.

¹⁹⁻²⁰Ухъу гъякъвалин рякъюй айиб гъамци альгъю шулу: гъеле ихъ намус сикинди даршра, ухъхъан Аллагъдин улихъ архайнди хъуз шулухъхъан, фицики Аллагъ ихъ намустлан артухъ ву ва Дугъаз варя альгъя. ²¹Йиз ккунидар, эгер ихъ намус сикинди вуш, ухъхъан гучI адарди Аллагъдиз багахъ хъуз шулухъхъан. ²²Гъаддиз Аллагъ-ди, Чаз ккарагну Чакан фу тНалаб гъапIиш, гъадму тамам апIур-хъуз, фицики Дугъан табшуругъарихъди гъярахъа, ва Дугъаз кку-ни ляхнар апIурахъа. ²³Магъа ухъуз Аллагъди фициб табшуругъ дебккнаш: ухъу Дугъан Бай – Иса Месигъдихъ хъугъну ккунду, ва Исаи ухъуз табшурмиш гъапIиганси, ухъу сари-сар ккуун дапI-ну ккунду. ²⁴Шли Аллагъдин табшуругъар тамам апIураш, гъадму кас Аллагъдиз яшамиш шула ва гъадму касдиз Аллагъ яшамиш шула. Наянан альгъяхъа ухъуз, ухъуль Аллагъ яшамиш шулайиб? – Дугъу ухъуз багъиш гъапIу Рюгъналанмина альгъяхъуз.



Гъякъвалин ва кучIлин рюгъ

4 ¹Из ккунидар, фунуб рюгънахъ вушра, яна адмийихъ мехъебехъанай. Хъа дурап Аллагъдихъан вуйин – дарин, гъарган ахтармиш апIури йихъай, фицики дюн'яйиз бегъем кучIлин пайгъамбрар ачмиш духъна.

² Магъа фици Аллагъдихъан вуйи Рюгъ аygъю апIуз шулуш: Иса Месигъ Аллагъдихъан жилиина инсандин суратнаъди гъафну, кIуру гъарсар рюгъ Аллагъдихъан вуйир ву. ³Хъа Иса къабул дарапIру рюгъ – думу Аллагъдихъан вуйир дар. Мицдари Месигъдиз Къаршур рази ктаура. Къаршур гъиди, кIури, учвуз деебхъайчвуз ва магъа думу сарун му дюн'яйиль а.

⁴ Из веледар, учву Аллагъдиндар вучва, кучIлин пайгъамбариин гъалиб духъначва, гъаз гъапиш, учвувь аии Аллагъ му дюн'яйин эйсивал апIурайиртIан къудратлу ву. ⁵Ари гъадрар – му дюн'яйиндар ву. Гъаддиз дурари кIурайибра гъаму дюн'-яйикан ву ва дюн'яйиндар гъадраихъ хъпехъурира ву. ⁶Хъа ухъу Аллагъдиндар вухъя ва шлиз Аллагъ аygъяш, думу ухъухъ хъпехъуру. Хъа фуж Аллагъдинур дарш, ухъухъ хъпехъидар. Магъа гъамци ухъхъан гъякъвал хру Рюгъ кучIлин рюгънахъан жара апIуз шулу.

Аллагъдин масанвал

⁷ Багъалу вуйи дустар, гъачай чиб-чпи ккуун апIухъя, гъаз гъапиш масанвал Аллагъдихъан гъюрайиб ву. Масанвал аии гъарсар касди гъаци апIуру, гъаз гъапиш думу Аллагъдин веледарикан сар гъахъну ва Аллагъ дугъаз аygъя.

⁸ Шлиз ккунивал адарш, дугъаз Аллагъ аygъдар, фицики Аллагъ Учв масанвал ву. ⁹ Магъа фици Аллагъди Чан масанвал ухъухъна улупнуш: Дугъу Чан айина-адру сар Бай, Гъадгъулантина ухъуз гъаргандин уьмур хъпан бадали, гъаму дюн'яйиз гъаъну.

¹⁰ Дугъри вуйи ккунивал, ухъу Аллагъ ккуун гъапIну кIури, гъаддиз адар, хъа Аллагъди Чав ухъу ккуун гъапIну ва Чан Бай ухъу гъапIу гунгъарихъанди гъурбан хъуз гъаъну – магъа гъякъ вуйи ккунивал.

¹¹ Из ккунидар, Аллагъдиз ухъу масанди вуйиган, ухъура чиб-чпи ккуун дапIну ккунду. ¹² Гъич саризра Аллагъ зат гъаркъюр



дар, хъа эгер ухъуз сар-сар ккундуш, Аллагъ яхъуз яшамиш шула, ва Дугъан масанвал ухъуз гъубкIну артмиш хъибди.

¹³ Ухъхъан, ухъуз Думу ухъуз яшамиш шулайиб ухъухъди пай гъапIу Гъадгъан Рюгъанинд аягъю апIуз шулу. ¹⁴ Му вари учуз гъябкъюнчуз ва Адашди Чан Бай дюн'я уьбхуз гъаувалин шагъидар гъахъунча. ¹⁵ Эгер фуж Иса Аллагъдин Бай вуйивалихъ хъугъраш, гъадму касдиль Аллагъ яшамиш шула, ва учвра Аллагъдин гъузра. ¹⁶ Учуз Аллагъдин ухъухъна вуйи му масанвал аягъю гъабхъунчуз, ва думу къабул гъапIунча.

Аллагъ – масанвал ву. Масанвали ацIайир Аллагъдин гъузра, ва Аллагъра гъадму касдиль яшамиш шула.

¹⁷ Ухъуз бегъем гъабхъи масанвалинди, ухъхъан гъияматдин ийгъ хъугъвал алди къабул апIуз шулу, гъаз гъапиш гъаму дюн'-яйиц ухъуз, Месигъди фици гъапIунуш, гъаци апIурахъя. ¹⁸ Масанвал гъич саб жюрейинра гучI айиб дар. ГъубкIу масанвали гучI утIубккуру. ГучI жазайихъди аылакъа айиб ву, ва гучIуриз бегъем гъубкIу масанвал адар.

¹⁹ Аллагъди ухъуз сифте ккун дапIнайиган, ухъура Думу ккун апIурахъя. ²⁰ «Узуз Аллагъ ккундузуз» кIуруриз чан гъардаш да-ккунди вуш, думу кучIлях ву, гъаз гъапиш, улариз рякъюрайи чан гъардаш даккнирихъан, улариз дяркърайи Аллагъ ккун апIуз даршул!

²¹ Месигъди учуз гъамциб насигъят тувунчуз: Аллагъ ккунири чан гъардашра ккун дапIну ккунду.

Вариддин аыхюр – Аллагъдин Бай ву

5 ¹Иса – Аллагъдин Месигъ вуйивалихъ хъугънайидарикан Аллагъдин веледар ктучIура. Адаш ккунириз, Гъадгъулантина гъахъирра ккунду. ²Ухъуз Аллагъдин веледар ккунивал магъа гъамци аягъю апIуз шулу: Аллагъ ккун дапIну, Гъадгъан табшуругъар тамам апIуриз Дугъан веледарра ккун шулу. ³Аллагъдинхъна вуйи ихъ масанвал Дугъан табшуругъар тамам апIбиниди улупурайиб вуйишIан. Хъа Дугъан табшуругъар тамам апIуб думукъан читин ляхин дар. ⁴Гъаз гъапиш, Аллагъдинхъан вуйи гъарсар му дюн'яйин гъалиб хъиди. Хъа дюн'яйин гъалиб гъабхъи къувват ихъ хъугъувал ву. ⁵Дюн'яйин зиин гъалиб фуж шулу? Иса Аллагъдин Бай вуйивалихъ хъугъур.



⁶Ари Гъаму ву штииндина ифдинди гъафи Иса Месигь. Думу, штииндиси, жарасира, ифдиндира гъафну. Мидин шагьид Рюгь ву, фицики Рюгь – гъякъ ву. ⁷Гъаз гъапиш, дидин шубур шагьид а: ⁸Рюгь, шид ва ифи – гъамрари варидари саб кIура. ⁹Ухъу адмийириин шагьидвал къабул апIури шулхъа, хъа Аллагъдин шагьидвал хъана зиина ву, гъаз гъапиш му шагьидвал Аллагъди Чан Балкан кIурайи шагьидвал ву. ¹⁰Аллагъдин Балихъ хъугърайири му шагьидвал чан кIваь дебисна. Хъа Аллагъдихъ хътругърайири Аллагъ кучIляхиз илтIикIура, гъаз гъапиш, Чан Балкан вуйи Аллагъдин шагьидвалихъ дураг хъугърадар. ¹¹Магъа думу шагьидвал: Аллагъди ухъуз гъаргандин уьмур тувну, ва думу уьмур – Дугъян Балий а. ¹²Шлиз Бай аш, дугъаз гъадму уьмурра а. Хъа шлиз Аллагъдин Бай адарш, дугъаз гъадму уьмурра адар.

Ухъуз гъаргандин уьмур багъшиш дапIна

¹³Гъаму варибикан узу учвуз, Аллагъдин Балихъ хъугънайдар, учву вари, гъаргандин уьмрин эйсийир вуйибикан аygъю хъпан бадали, бикIуразачвуз. ¹⁴Аллагъдикан, гучI ктарди, Талаб апIуз шулухъхъан: эгер ухъу, Гъадгъан ниятнахъди гъюруб, фувшра, Дугъкан Талаб гъапIиш, Дугъаз ебхъуру. ¹⁵Эгер ухъуз, ухъу фу ккун гъапIишра, Дугъаз ебхъруб аygъяш, ухъуз гъацира, ухъу ккун гъапIуб вари туврубра, аygъяхъуз.

¹⁶Эгер шлиз чан гъардши йикIувалихъна дару гунагь апIури гъяркъиши, гъадгъухъанди думу ккарагри, ва дугъаз уьмур тувди. Узу аյжалихъна дархру гунгъарий ахъурикан кIураза. Айжалихъна гъахру гунагъра а, ва узу учвуз гъацдар гунгъарихъанди ккарагай кIурадарза. ¹⁷Гъарсаб ЧIуру ляхин – гунагь ву, хъа айжалихъна дархру гунагъра а.

¹⁸Ухъуз аygъяхъуз, Аллагъдин велед гъахыр гунгъарихъан ярхла шула. Думу Аллагъдин Бали уьрхюра ва иблисдихъан дугъак кучуз шулдар. ¹⁹Гъеле вари дюн'я иблисдин гъюкмикк ккашра, ухъу Аллагъдиндар вуйиб аygъяхъуз. ²⁰Ухъуз, Аллагъдин Бай гъафиваликан ва гъякъ Аллагъ аygъю хъуз ухъу гъаврикк ккауваликанра аygъяхъуз. Ухъу гъякъ Вуйирий айибра аygъяхъуз, фицики ухъу Дугъян Бай – Иса Месигъдиль ахъя. Думу – гъякъ вуйи Аллагъ ву. Думу – гъаргандин уьмурра ву. ²¹Йиз веледар, идоларихъан ярхла йихъай.



ЮГЬАНДИН КҮӨБПИ ҚАГЪАЗ

Гирами Рюгыну Югъандинди му жикъи кьюбпи қагъазра ччур дибисну дибикIнадар. Мушваъра хъугърудариз қаламарихъан ихтият иихъай кIури, дих апIура. Саби қагъзиз гъял апIура-йистар месэлиирикан кьюбипидибра гъацдар месэлиир гъял апIура. Гъаддиз мушваъ гизафна-гизафси хъугънайидариз варитIан Ахюор Фуж вуш, яни Месидикан, Аллагъдин Бай гъахьи Адми-йикан кIура.

1 ¹Яшлу ахюорихъан – Аллагъди кадагънайи агъа-ханумдиз – хъугърударин жамяльтдиз ва дугъан бицIидариз. Узу учву вари гъякъвалийди ккун гъапIунзачву. Гъацира, гъякъвалин гъаврий ахъу вариди учву ккун гъапIину, ²фицики ухъуль гъякъвал яшамиш шула. Му гъякъвал ухъухъди гъаммишандиз хъайиб ву. ³Учвуз Аллагъ Адашдихъан ва Дугъан Бай Иса Месигъдихъан гъякъвалийди ва масанвалийди уж’вал, рягъимлувал ва мясяляйт ибшричвуз.

Масанваликан насиғъят

⁴ Яв саб къадар бицIидар, ихъ Адашди табшурмиш дапIнайи-ганси, гъякъвалин рякъюйди гъягъюри гъяркъган, гизаф шад гъахъунза.

⁵ Хъа магъа гъамус узу, багъалу вуйи агъа-ханум, саб ккун апIураза (му насиғъят цийиб даршра, сифте бинайианмина



ухъуз тувнайиб ву): гъач, сари-сар масанди дисурхъя! ⁶ Масанвал магъа гъаму ву: ухъу Аллагъдин табшуругъарихъди яшамиш духьну ккунду. Му табшуругъ учвуз сифте бинайиан деебхънайиб ву, ва гъаддихъди яшамишра духьну ккунду.

Месигъдиз аыгътлуди гъузай

⁷ Ихъ арайиан дюн'яйиз гизаф кучІляхъяр душна. Дурари Иса Месигъ, инсан духьну, жилиина гъювал къабул апІурадар. Дицир адми кучІляхъ ва Месигъдиз къаршур ву. ⁸ Лигай гъа, учву фу бадали гъилихнуш, гъадму ичв дубгруси дарибши гъа, хъа ичв пешкеш гъубкІну учвухъна рубкърганси апІинай.

⁹ Месигъдин аыгъювалар чIоргътуриз ва дураг тамам дарапI-туриз Аллагъ аыгъдар. Хъа Месигъдин аыгъювалар тамам апIруриз Адашра, Байра аыгъя. ¹⁰ Гъамцдар аыгъювалар хъади дяргътур гъич зат къабул мапIанай, я ичв хуаз гъюз мигъитанай, я дугъаз салам мутуванай. ¹¹ Гъацир къабул апIур дугъан чIуру ляхнарик ктикаура.

¹² Узуз хъана гизафубикан учвуз бикIуб лазим вуйи, хъа узу кагъзиинди чернилиинди бикIуб ужу вуди гъисаб апIурадарза. Мидин ерина, учвухъди машна-машди улхбан бадали ва ихъ шадвал гъубкIуб хъпан бадали, багарихъди учву рякъюр пну, умуд кайиз. ¹³ Аллагъди кадагънайи яв чуччун веледари саламар хътаура.



ЮГЬАНДИН ШУБУБПИ КАГЪАЗ

Вакил Югъанди жикъи шубубпи кагъзи чан дуст Гайшкан Ужувлан хабар рабгъури сиягъятназ удуч Івнайидариз кюмек апIуб ккун апIурайи. Югъанди гъаму чан тIалабнаъ, кIваантIан Иса-ийхъ хбугънайир, тмуну хбугърурихъ тевиган, жсув заанди дидис-ну даккнивал улупура. Хбугърудар чин вари ляхнариъ, иллагъки Isa Mesigъдикан Ужувлан хабар рабгъбаб, чиб-чииз кюмек данI-ну ккунду, кIуру фикир му Гирами Рюгънан кагъзи кIулинуб ву.

1 ¹Яшлу ахюорихъан – узуз гъякъвалиъди ккун гъахъи, йиз ба-гъа вуйи дуст Гайдиз.

² Йиз масан дуст, увуз варибидъ хъуркъувалар ва мюгъкам сагъвал хъпан бадали ккарагураза, хъа уву Рюгъниинди сагъ вуйивал узуз аыгъязуз. ³ Гъамина гъафи гъардшари увкан, гъякъвализ яв аыгътлу вуйиваликан ва яв дугъри уымрикан ктибитиган, узу гизаф шад гъахъунза. ⁴ Узуз йиз веледар гъякъ рякъюъди гъя-райиваликан ебхъубтIан артухъ жара шад хабар адарзуз.

Пешкеш ва тягъна

⁵ Йиз масан дуст, уву гъардшарихъ зигурайи зегъметну, гъеле дурагин арайиъ мушв’ан дарудар ашра, яв дугъриваликан кIура.

⁶ Гъардшари яв масанваликан хъугънайидарин жямаятдин улихъ ктибитнийи. Уву ужуб ляхин апIидийва, эгер дурагиҳди чин рякъ давам апIуз Аллагъдиз лайикъ вуйи рякъ’ин алаънийиш.



⁷Дураг Месигъдин ччвур бадали рякъюь учІвна, ва хътругъру-
дарихъан фукIара къабул гъапIундар. ⁸Гъаци вуйиган, гъацдар
касариз, гъякъвалин гъуллугънаь хъпан бадали, ухъу хил гъа-
Чабккну ккунду.

⁹Узу хъугърударин жамяльтдиз кагъаз гъибикIунза, хъа дура-
рин ахюр хъуз ккуни Диотрефди, учу кIурайиб къабул апIура-
дар. ¹⁰Гъаддиз, эгер узу гъафиш, дугъу гъапIраш, ктибтидиза.
Дугъу къутIкъли гафариинди учук тахсрар кирчра, аммаки мид-
канра дугъаз гъубкIрадар. Дугъу ихъ гъардшар хяларди къабул
апIурадар ва апIуз ккунидарихъди гъитрадар, дураг хъугърударин
жамяльтгъдианра кмиди утIурккура!

¹¹Багъа вуйи дуст, писвалихъна магъачIаккан, хъа – ужувлехъ-
на. Ужувлан ляхнар апIрур Аллагъдинур ву. Шли чIурувал апIу-
раш, думу зат Аллагъ альгъо гъахъир дар.

¹²Деметрикан варидари, гъякъ рякъ'ин аливаликанра, ужуйи
кIура. Гъацдар гафар дугъкан учура кIурача, хъа ич шагыдвал,
увуз альгъюганси, гъякъ вуйич.

¹³Хъана гизафубдикан узхъан увуз ктибтуз шуйзухъан, хъа
къалмииндина чернилиинди дици апIуз ккундарзуз. ¹⁴Багарихъ-
ди уву машна-машди рякъюр кIури умуд кайиз, ва гъадмуган
гафар апIидихъя. ¹⁵Саламат ишриву. Вари дустари увуз саламар
хътаура. Увура, ччвурар дидисну, вари дустариз саламар йип.



ВАРИ ХЪУГЪРУДАРИЗ ЯГЬУДАЙИН КАГЪАЗ

Гирами Рюгъну му кағъаз Ягъудайихъди фила ва шлин чвур-нахъ дибикІнайиб вуш аьгъдарира, дидиб улупнайи мяна ухъуз агъяхъуз. Исайихъ хъугънайидарикан сакьюодари чин гъайгъу зигури ва Аллагъдин рягымлуваликан улхури, чин хъапІрайи гъулайсуз ва аькъюлесуз уьмур ккебкуз чарийр зигурайи. Ари гъацдариҳъди Ягъудайи, юкІв хъипну, Аллагъдихъ хъугънайидариз дикъатлу иихъай кIура. Дурарихъан, чин уткан дапІнайи улхбар-рахбариинди сакьюодар чин терефназди хъчІюхюзра гъахъниий. Гъаддиз Гирами Рюгъну алдакувалихъан чи уърхюз ва марци шадлугънаң Чан гирами нурагихъ чи дерккуз удукъру Аллагъдин чин вари умудар илирчуз ва Гъадгъаз аьгътлуди гъузуз дих апIура.

КучIлар деетрудариз жаза ккилибгура

1 ¹Иса Месигъдин гъуллугънаń айи Якъубдин гъардаш Ягъудайи Адаш Аллагъдиз масан вуйи ва Иса Месигъди уърхюрайидих дапІнайидариз саламар хътаура.

² Уж'вал, мясляйт ва масанвал гъубкIину ибшричвуз!

³ Йиз ккунидар, гъеле узуз ихъ сатIлан вуйи уърхюваликан бикIуз гизаф ккунди ашра, саб раЖари ва гъаргандиз Аллагъдин гирами халкъдиз тувнайи хъугъвалиан женг гъабхуз аышкъ капIру кағъаз учвуз бикIуб лазим вуди гъисаб апIураза. ⁴Суддин йигъяз ухдихъанмина кадагънайи адмийир ичв ариириъ жиниди



учІвра. Гъадму аллагъузари ихь Аллагъдин уж'вал чпин чиркин-валариз дюз гъюрубси илбицура ва гъамци дураги Иса Месигъ-дихъан, сар ихь Гьюкумдарихъан ва Агъайихъан маш гъибицура.

⁵ Узуз кІваин апІуз ккундузуз, учвуз гъацира вари агъяшра: Агъай Чан халкъ саб вахтна, Египетдин жиларилан алдаңу, гъюрхний, хъасин дурагикан хътругърудар пуч гъапІнийи. ⁶ Узуз гъацира малайикариканра кІваин апІуз ккундузуз: дурагихъан чпиз туву гьюкум убхюз гъабхъундайи ва чпи яшамиш шула-йишвар гатІахънийи. Агъай дураг, суд апІру зурба Йигъ гъя-йиз, гъаммишандин зунжарихъди мучІушнаъ уърхюра. ⁷ Гъаму малайикарси, Содомна Гомора, дурагин гъирагъарихъ хъайи жара шагъарси, гизаф къяппийрра ва ягъузарра гъаргандин цІль ургу жазайиз, гъи ухъуз дарс хъпан бадали, тувдар вуйи.

⁸ Чпин нивкІариин элеңну, чпин жанар чиркин апІурайидар-ра гъацдар адмийириз ухшар ву. Дураги Агъайнин гьюкум тина апІура ва а yrшарин къудратариз люкънар апІура. ⁹ Гъеле ахю-ну малайик Жабраиликъана, иблисдихъди Мусайин бедендикан гьюжатар апІурайи вахтна, дидиз люкънар гъапІундайи. Дугъу дидиз, анжагъ гъамцитІан гъапундайи: «Гъит Агъайи увуз жаза гъадабтІри!» ¹⁰ Хъа гъаму касари чпи гъавриъ адрубдиз люкънар апІура. Дурагиз саб агъя — чпин табиаът. Вари гъамди дураг, фагъумсуз гъяйванатарси, пуч апІура. ¹¹ Дердна хажалат ибшири чпиз! Дураг Каиндин рякъюъди гъушну. Девлет ккунди дураг, Баламси, улдугнийи. Корей кІули ади къаршу гъедергдар фи-ци пуч гъапІнийиш, дурагра гъаци йихиди. ¹² Ичв масанвалин шадлугъарииъ му касар ккеънайи сулариз барабар ву. Дураг гъич саб гучІ адарди, суфрайихъ, чпин гъайгъушнаътІан адарди, десь-ру. Мураг микІари гъирчнайи мархъ ктру дифарси ву. Чвну, бе-гъер дархури, ерццру, хъа къабарианзина кчІюгъру, кьюб ража-ри пуч шлу гъаарси ву. ¹³ Гъюлин вягъьши лепийрси, дураг, чпин ягъуз ляхнар, чиркин кафси, зина алдаърудар ву. Дураг аысрариан-аысрариз пис мучІушназ гъязур дапІнайи, улдугну за-вариъ ургънайи хядар ву.

¹⁴ Адамдихъанмина ургурпи насылди гъаши Енухди гъамрари-кан гъапнийиштІан гъамцдар пайгъамбарвалин гафар:

«Магъа, Агъа гъафну.

Дугъахъди агъзрар-агъзраинди



гирамидарра хъа.

¹⁵ Дугъу варидаrin суд апIиди,
вари аллагъсузари
гъапIу аллагъсуз ляхнар
ашкар апIиди,
ва, Исаиз къаршуди гъапи
нягъякъ гафариз дилигну,
аллагъсуз тунагъкарин
суд апIиди».

¹⁶ Думу адмийириин ушв рабхбакан сикин дар. Дураг чпин
къисматнакк айсси духъна. Дураг чпин тямгъярин хилий айжуз
духъна. Дураг, чпин авазийир апIури, гъючIвру ва чпиз хайир-
нахъди, сар шлин-вшра тярифар апIури, хьюгъру.

¹⁷ Хъа учву, йиз ккунидар, ихь Агъа Иса Месигъдин вакилари
улихъимиidi гъапи гафар кIваин апIинай. ¹⁸ Дураги учвуз гъапнийи:
«Аххиримжи вахтари кялхърудар,
намуссуз тямгъяр ади, ккуниб апIури,
арайиз удучIвиди».

¹⁹ Гъамрари адмийир жара апIиди. Гъамрар жандин хилий
айжуз духънайидар ву. Мурагиз Рюгъ адар. ²⁰ Хъа учву, йиз кку-
нидар, ичв гирами хъугъувал артмиш апIинай, Гирами Рюгънай-
ди ккарагай. ²¹ Ихь Агъа Иса Месигъди Чан ужувланинд ухъуз
тввр гъаргандин уьмриз ккилигурни, Аллагъдин масанвалий
гъузай.

²² Шаклу духънайидариз ужувлар апIинай; ²³ саспидар, цигъян
гъючIюгъюри, урххай; хъа тмундарииз ичв рягъимлу юкIвар улу-
пай, аммаки, дурагин тIулари чиркин гъапIу палтарра кмиди
даккун апIури, ихтиятди гъузай.

²⁴ Учву алдакуз Гъидритуриз, Чан улихъ учву марцциди ва
лап шадди дерккүз Шлуриз — ²⁵ сар Аллагъдиз, ихь Агъа Иса
Месигъдиланмина ухъу Гъюрхюриз, гъит, ад, зурбавал, къудрат
ва гъокум, дюн'я ккебгъайизра, гъамусра, ва гъамусдихъантина
гъаммишандиз ибшри! Амин.



РИМ АГЬЛАРИХЪНА ВУЙИ КАГЪАЗ

Павел жугъуд айлим вушра, чаз Месигъ ачмииш гъашиган, дугъкан Гъадгъан терефкар шулу. Павелиантини Гирами Рюгъну, Иса бадали, гизаф кагъзар гвидикIну. Думу кагъзариъ Исаийхъ хъугъвалин мяна-метлебнакан ктибтура ва Исаин сифте терефкрапиз алахъру суалариз жавабар тувра. Римдиз Исаин терефкрапиз гъибикIу му кагъзин мяна Аллагъдиз къаршу удучIву ва Дугъан табшуур угъбар ярхла гъапIу адмийирикан ву. Аллагъдихъан, дураги гъапIу ва апIурайи гунгъариз лигүйши, дураг ухдитIан терг апIуз шуйи, хъа Дугъу дици гъапIундар. Дураг гъич фтиизкIа лайшкь даршара, дурагиз Аллагъди гизаф ба-гъа ба-гъиш тувра: гъадрагиз гъадабатIну ккуни жаза Месигъди Чан кIул'ина гъадабгънайиган, аршарин ихъ Адаш, дураг вари Чаз веледарди къабул апIуз гъарган гъязур ву. Шли му ба-гъиш хъугъвалишинди къабул гъапIииш, гъацирин неинки гунгъарилан хил алдабгъуру, хъа Аллагъди думу гъуркIну къабул апIуру ва думу Аллагъдихъди гъаргандин уымрин эйси шулу. Мициб гъялну Исаин терефкрапиз, чин вари уымриъ, ахю тясир апIуру. Кагъзиъ, Павелинси, Месигъдин тереф дубиснайи айлмарин фагъум-фикир фициб дубхыну ккундуш, гъаддиз гизаф фикир тувра. Кагъзин ахириси, насижъятар туври, Исаин терефкрапиз фици яшамиш хъуб лайшкь вуш, бикIура. Аллагъдиз адмийир масанди ву, фицики дурагихъанра чин багахълуийр ккун дарапIди гъузуз шулдар.



Саламар пуб

1 ¹⁻²Иса Месигъдин лукI вуйи, Аллагъди вакил хъуз кадагънайи ва Чан пайгъамбраилантина Гирами китабарий Чав гаф тувнайиганси, Аллагъдин Ужувлан хабар гъабхуз дих дапIнайи Павелихъан саламар. ³Му Хабарнаь, Чан жил'ин гъабхъи умриз дилигну, Давудрин тухмий бабкан гъахъи Аллагъдин Балкан кIура, ⁴хъя Гирами Рюгъналантина Думу, гъачIихъан, чиви духъну, Аллагъдин Бай вуди къудратниинди улупна. Му ихъ Агъя, Иса Месигъ ву. ⁵Гъадгъулантина узуз, Аллагъ альдру халкъар хъугъувалихъна ва хъпехъувалихъна хпан бадали, вакилвалин багъиш гъурубкуунзуз. Му ляхнар Дугъян ад бадали вуйидар ву. ⁶Учвурал гъацдар халкъари кан вучва: Аллагъди учвуз Иса Месигъдин терефкрап хъуз дих дапIна. ⁷Узу му, учвуз, вари Римдий яшамиш шулайидар, Аллагъдиз ккунидар ва Аллагъдин гирами халкъ хъуз дих дапIнайидар, бикIуразачвуз.

Уж'вал ва мясляйт ибшричвуз Аллагъдихъан, ихъ Адашдихъан ва Агъя Иса Месигъдихъан.

Чухсагъулин ккарагуб. Римдиз гъюз тямягъ хъайивал

⁸ Сифте нубатнаь, учвхъан варидарихъанди, Иса Месигъдилантина узу йиз Аллагъдиз баркаллагъ кIураза, фицики, вари дюн'я вуйибси, адмийириз ичв хъугъуваликан ебхъура. ⁹ Вари йиз юкIв хъипну, Аллагъдин гъуллугънай аза. Дугъян Балкан варидализ Ужувлан хабар дебккри, гъарган узу учву кIваин алаура-зачву. Магъя дидин шагъид Аллагъ. ¹⁰ Гъарган узу йиз ккарагбари, Аллагъдин амриинди, узу учвухъна гъюз хъибдайкIан, кIури, Талаб апIури шулза. ¹¹ Фицики, учвуз къувват гъабхи рюгънан багъиш учвухъди пай апIуз, йиз учвухъна гъюз гизаф тямягъ хъайиз, ¹² жараси кIури гъабшиш, ихъ хъугъувалилантина чиб-чпихъан къувват бисидихъя — учву узхъан ва узу учвхъан. ¹³ Гъардшар, учвуз альдриз ккундузуз, жара халкъаризси, учвузра узкан артухъси мянфяльт ктабгъуз шлуси, гизаф ражари узу учвухъна гъюз гъязур гъахъунза, хъя гъамусдизкъан, манигъвалар алахъури, гъюз гъабхъундарзухъан.

¹⁴ Вари халкъариз: гъам грекариз, улихъ хъайи, ва имбудариз, къяляхъ хъайи, гъам аяндрариз ва сабдиканра хабар адрудариз —



вардиз узу буржлу вуза. ¹⁵ Магъя гъаддиз узу учвуз, Римдъя яшамиш шулайидариз, Агъайнин Ужувлан хабар дебккуз гъя-зур вуза.

Ужувлан хабарнан къувват

¹⁶ Узуз Агъайнин Ужувлан хабар рабгъуз нач дарзуз, гъаз гъа-пиш дидиът гъарсар хъугъру кас уърхюз шлу Аллагъдин гъюкум а – сифте жугъдар, ва хъасин имбу халкъар. ¹⁷ Му Ужувлан хабар-ну, Аллагъди хъугъувалилантина, сифте бинайиан ккудубкайиз-къан, адмийирикан фици дугъри касар ктауруш, улупура. Гира-ми китабариъ дибикIна: «Дугъри касдиз хъугъвали уймур тувди».

Вари адмийир гунағыкрап ву

¹⁸ Гъякъвал чпин нягъякъвалихъди ккапIрайи адмийири апIру вари чIурубдиз ва гъякъсузвализ айршариан Аллагъдин хъял гъю-ру. ¹⁹ Адмийирихъан удукъру Аллагъдикан вуйи айгъювалар, ду-париш айгъю гъахъну, гъаз гъапиш, Аллагъди Чав Чакан айгъю хъуз гъитну. ²⁰ Дюн'я арайиз гъабихъанмина дярябкъру гъамми-шандин къувват ва Аллагъдин заанвал ачуҳъди айгъю шула, фи-цики гъаму вари Аллагъди халкъ гъапIубдинди рябкъюра. Гъад-диз, гъацдар адмийирилан хил алдабгъуб хъибдар. ²¹ Дурагиз Ал-лагъ айгъяишра, дураги хай шлуси Дугъаз гъюрмат гъапIундай. Мидин ерина, дураг чпин файдасуз фикрар-фагъмарий ахъну, ва дурагин ахмакъ юкIвар кIару гъахъну. ²² Чпи фагъумлу ксар вучу кIурашра, дураг ахмакъар гъахъну. ²³ Дураги айжалсуз Аллагъдин ад, айжал хъайи адмийириин, жакъварин, гъайванатарин, улчву-хури гъягъру гъяшаратарин идоларихъ гъюдохну.

²⁴ Гъаддиз Аллагъди дураг, чпин абдал тямаярий, бедендиз ккуни кфиравларий айру, чпин жанар, чиб-чишихъди чиркин апIуз гъитру. ²⁵ Дураги Аллагъдикан вуйи гъякъвал кучIарихъ гъю-дюхний; хилари гъапIу шей'ариз икрам апIуйи, гъаддариин гъул-лугънаш шуи, хъя халкъ ГъапIурин, гъаммишандиз ужувилиинди Айириин – вай. Амин.

²⁶ Гъамцдар апIрган, Аллагъди дураг чпин айибинан тямая-гъярий гъитний. Дишагълиири жиларихъди духъну ккунивал, табиаитдиз къаршуди, дишагълиирихъди сатIи хъувалихъ гъю-дюхний. ²⁷ Гъаци жиларра, табиаитдииинди дишагълиирихъди



сатИи дуխну ккунивал гыбитну, табиаңтдиз къаршуди, чиб-чпихъди сатИи хувалин тымягъяриъ ахъна. Дурари чпин жанар, жара жилариҳъди сатИи шули, айибнан тЦулар апIури, гъацдар айиб ляхнар апIбиинди, лайикълу вуйи жазайикк ккирчра.

²⁸Дурализ Аллагъ аыгъю апIуз даккниган, Дугъу дурарихъди чпин дюз дару фагъмин лайикъсуз тЦулар апIуз гытнийи. ²⁹Гъамцдар адмийир писвалари, тымягъяри, чIурувалари, къаст айивали, иивну йикIуваларихъна ва гъярхъуваларихъна зигрували, кучIлари ва жарадарикан гъарган варитIан харжиди фикир апIували – гъар жюрейин гунгъари ацIна. Му адмийири футнийир апIуру, ³⁰сар-сарилан улхури шулу ва дурализ Аллагъ даккунди ву. Дурагар сарслидар ву, фурсари ацIна, жарадарин улихъ гъарган чпин адар апIури шулу, писвал апIуз рякъяр агру фикрари ацIна, чпин абийир-бабариз мютIюгъ шулдар. ³¹Дурагар ахмакъар ву, гъич саб вахтнара чпи туву гаф тамам апIдар ва гъич саризра я гьюрмат, я уж’вал апIдар. ³²Дурагар, Аллагъдин гъякъвалиинди гъамци тахсиркар вуйириз аյжал гъадабтIуб лазим ву, кIури, хабар ашра, неинки чпи гъаци апIура, хъа гъаци апIрударин тереф-ра бисура.

Аллагъдин суд

2 ¹Эгер уву гъамцдар касарик тахсир кипраш, увлан хил алдаб-гъуб адар; эгер уву сар шлик-вуш тахсир кипраш, уву яв увук тахсир киправа. Жарар тахсиркар апIурайири, увурда тахсиркри апIруб апIурава. ²Ухъуз аygъяхъуз, аыхир, гъамцдар апIрударик Аллагъди, Чан гъякъ’вализ дилигнун, тахсир кипди. ³Гъаци вуйиган, уву, гъамцдар тЦулар апIур тахсиркар апIурайир, гъеле гъацдар увурда апIурайир, Аллагъдин суддиккан ккутIурчвидиза кIури, фикир апIурана? ⁴Ясаны уву Дугъян зурба вуйи гьюрмат, сабур ва аьгъ апIувал гъаци ул’ан идипнана, дарш, ва увуз вуйи Дугъян гьюрмат, уву яв тЦуларин швумал хъуз вуйибин гъав-рий адарна? ⁵Уву инкар ва утIукънайир вува, яв гунгъар кIул’ин гъадагъурадарва ва, гъамдииинди, Аллагъди Чан хъял улупру йигъяз Аллагъдин хъял ув’ина артухъ апIурава; хъа халкъдиз Дугъян гъякъ вуйи суд рябкъиди. ⁶Аллагъди гъардиз чав гъапIуб-диз тувди. ⁷Гъаммишан ужувлар апIури, аднахъ, гьюрматнахъ ва аյжалсузвалихъ хъергнайидариз Дугъу гъаргандин умур пешкеш



апИди. ⁸Хъа учтIан аыгъдруиз, гъякъ вуйи рякъюъди гъягъюз даккнириз ва диш дару рякъ кадабгънайириз Аллагъди Чан хъял ва гъизгъинвал улупиди. ⁹Дугъу абдал тIулар апIбаь тахсиркар вуйи гъарсар касдиз, сифте жугъдариz, хъа имбудариz дердер ва аyzиятар гъаъди. ¹⁰Хъа уж'вал апIру гъарсар касдиз, сифте жугъдариz, хъа имбудариz Дугъу ад, гъюрмат ва мясялаyt гъапIди.

¹¹Аллагъди варидаrin гъякъди суд апIуру; майил апIдар.

¹²Эгер Къанундикан деребхъдари гунаgъ апIураш, дурап Къанун адарди йихиди. Хъа Къанун ади гунаgъ апIрударин суд Къанундинди апIди. ¹³Агъайн улихъ Къанундикан гъеебхъдар гъякълу хъидар, хъа Къанундиз мютIюгъ гъахъидар Агъай гъякъ апIди. ¹⁴(Ва гъаддиз, Къанун адру миллиетари чиb-чпииинди, гъеле дурапин Къанун адаршра, чпин кIваан Къанундиз айиси апIураш, дурапр чпи ву чпиз закон. ¹⁵Къанундиз айиси дюзвал фу вуш ва дюз дарувал фу вуш, дурапин кIваъ дибикIна. Дишди апIруган, дурапиз чпин кIваан аыгъю шула, ва дишди дарапIруганра, чпин кIваз аыгъю шула. Дурапиз дишди дарапIувал чпин ягъ-намусну улупура ва гъадди дурап тахсиркрап апIура. Дишди апIувалра дурапиз чпин ягъ-намусну улупура ва гъадди дурапин тахсир адрувал улупура). ¹⁶Гъаму вари, Аллагъди Иса Месигъдилантina узу рабгъурайи Ужувлан хабарнаь кIурайиси, инсанарин вари жини ляхнарин суд апIруган, хъибди.

Аллагъдиндар вучка кIурайидар ва Къанун

¹⁷Эгер уву жувв жугъуд вуди гъисаб апIураш, Къанундихъ йир-фар хъирчраш, Аллагъдинди уву дамагълу вуш, ¹⁸увуз Дугъан ниятар аыгъяш, Къанундиан дубгъури варитIан ужуб ва чарасуз лазим вуйиb, аыгъю апIураш, ¹⁹ва уву, кур вуйидар диш рякъюъди хъади гъягъюраза, кIураш, мучIушнаь аийдариz акв вуза, кIураш, ²⁰Къанундиз гъякъ ва аыгъювалар увуз ади, фикир адрудариz ва фукIа аыгъдрудариz мялим вуза, кIураш, ²¹гъаз уву дурап жарадариz улупурава, хъа уву увхъан дудрубгъди? Уву, мигъитIиб-Къанай кIури, дарсар туврайир, уву гъаз гъитIибкIурава? ²²Уву, сарира къяппавал дапIну ккундар кIурайири, гъаз къяппа тIулар апIурава? Уву, идолар гъясбикк ккадариz кIурайир, мистар тIараш гъаз апIурава? ²³Уву, Къанун азуз кIури фурсар апIурайир, Къанун чIюбгъюри, Аллагъ гъаз ужуз апIурава? ²⁴Гъаддиз,



увлантина Агъайин ччур аллагьсузари нянайикк ккипна, кІури, дубикІна Гирами китабарий.

²⁵ Эгер уву Къанун тамам апІуруш, суннат апІувал мянаи абцІна, хъа эгер уву Къанун Чюбгъюраш, суннат апІувалин гъарсаб мяна дубгра. ²⁶ Эгер суннат дапІну адрури Къанундій айиб вари тамам апІураш, думу суннат гъапІурси гъисаб апІуз хай даршулин? ²⁷ Яв суннат дапІнайивализ ва увуз дидикІну тувнайи къайдийиз дилигди, суннат дапІну адарди, Къанун тамам апІури диван апІидияв, гъаз гъапиш, уву Къанун тамам апІури гъахъундарва.

²⁸ Зиълан лишинариз дилигну, гъякъ жугъуд шлуб дар. Му, бедендин аьдати суннат гъапІну кІури, гъякъ вуйи суннат дару гъисаб ву. ²⁹ Гъякъ вуйи жугъуд чан кІваантІан Аллагъ ккун апІурайир ву. Му, дерккнайи аьдатариинди ваъ, хъа кІваантІан, рюгъналан вуйи гъякъ суннатдик гъисаб ву. Ва гъамцир касдин апІурайи тяриф адмиирихъан дар, хъа Аллагъдихъан ву.

Vari адмийип тахсиркrap ву

3 ¹ Гъаци вуйиган, жугъдар фтин артухъ ву, суннат апІбан мяна фу ву? ² Дурагин артухъвал гизаф ахъюб ву, думура гизафубидъ, саб гъапиб, Аллагъди Чан гаф гъадрализ тувний. ³ Дурагин сакъодар Аллагъдиз вафалу дарш, дурагин вафалу дарували Аллагъдин вафалувал Чур апІуз шулин? ⁴ ИкибаштІан, даршул! Юкъуб альтраф вари кучлари ацІнашра, Аллагъ аьгътлуди гъузди, Гирами бикІбариъ дубикІнайиси:

«Уву Яв улхбариъ гъякъди гъуздива
ва Уву Яв суд апІруган,
гъалиб хъидива».

⁵ Эгер ихъ дюз дарувалари Аллагъдин гъякъвал ачухъди артухъ апІураш, Аллагъди ухъкан хъял апІруган, Думу дюз дар, пуз хай шулин? (Узу гъамци йиз адмивалин фагъмиинди кІураза.) ⁶ ИкибаштІан, даршул! Аллагъди ухъкан хъял апІдайиш, Дугъхъан вари дюн'яйин суд апІузра хъибдайи.

⁷ Увхъан пузра шулвухъан: «Хъа эгер йиз дугъри дарували Аллагъдин дугъривал артухъ апІураш ва гъаци Дугъан ад артухъ шулаш, гунагъкринси йиз суд гъаз апІура?» ⁸ Му, гъамци пуб гъисаб ву: «Ужувлар хъпан бадали, ухъу пис ляхнар дапІну ккунду».



Ари, гъамцдар аыгьювалар улупура, кІури, гизафдари учуз тягъ-
нийирра йивури шулу. Мици кІуру адмийир жазайиз лайикъ ву.
⁹ Мидиз фу пухъя? Имбу миллетартІан ухъу, жугъдар, фтин ар-
тухъ ву? Гыч сабдинра! Гъаддиз узу зиихъ дупназа: жугъдарра ва
имбударра сабси гунагъвалин гъюкмиъ а, ¹⁰ Гирами китабарып
кІурайиси:

«Дюз вуйир гыч фужкІа адар, фужкІа!

¹¹ Гыч фужкІа гъаврий ахърадар.

Гыч сарира Аллагъ агурадар.

¹² Гъакъвалихъан вари ярхла гъахъну;

гыч фужкІа сабдизра хай вуйир дар.

Гыч сарира уж'вал апІдар – гыч сарира, сар касдикъан!»

¹³ «Дурагин ушвар арцнайи накъвариз ухшар ву.

Мелз дураги кучІал рабгъузтІан ишлетмиш апІдар».

«БитІран агъу ву дурагин кІвантариин алиб».

¹⁴ «Люкънарина агъуди ацІна дурагин ушвар».

¹⁵ «Дурагиз йивну йикіувал гыч фукІа дарубси ву.

¹⁶ Наанди гъушишра, дураг чипихъди гъабхруб пуч апІувална
гъам-дерд ву,

¹⁷ ва дурагиз, ислягъвалин рякъярикан аыгъдар».

¹⁸ «Дурагиз Аллагъдихъан гучІ ктар».

¹⁹ Ухъуз аыгъяхъуз, гыч сарира, учв гъакъ вузга, дарпбан бадали,
ва вари дюн'яйи Аллагъдин улихъ жаваб тувбан бадали, гъаму
Къанундиз дупнайиб вари Къанундиз мютІюгъ вуйдарииз дуп-
найиб ву. ²⁰ Саб Къанундиз айиб тамам апІури гыч сарихъанра
Аллагъдин улихъ гъакъ хъуз хъибдар, гъаз гъапиш, Къанундиан
удубчІурайиб вари инсан гунагъкар вуйиб улупурайиб ву.

Аллагъ ву адмийир гъакъ апІурайиp

²¹ Аллагъди, Чан улихъ адмийир фици гъакъ апІуруш, улупна-
хъуз. Му мици, Къанундира ва пайгъамбрарира гъаддикан кІу-
рашра, Къанундилан асиллу дарди шула. ²² Аллагъди адмийир
Чан улихъ гъакъ апІура Иса Месигъдихъ хъугъбинди. Му хъугъ-
рударииз варидализ кайиб ву, гъаз гъапиш дурагин арайиз гыч
саб фаркъвалра адар, ²³ фицики, вари гунагъкар ву, ва гъаддиз
дураг Аллагъдин адлуувалин багахъна деетнадар. ²⁴ Хъа Аллагъ-
дин рягымлувалилантина адмийириин гунгъар Чайна гъадагъу



Иса Месигъдилантина вари халкъар, гыч саб кымат тутрувди, Аллагъдин улихъ гъякъ гъахыну.²⁵ Аллагъди Думу гъурбан гъапІну. Дугъан ифди Дугъахъ хъугърударин гунгъар марщ гъапІну. Адмийирин ухди гъапІу гунгъарилан хил алдабгъну, Аллагъди Чан гъякъвал улупну.²⁶ Дугъу адмийирин гунгъар айгъ дапІну, Учв гъаму сяайдира гъякъ вуйивал, ва Учв гъаммишандиз гъякъди гъузувал ва дидихъди сабси Месигъдихъ хъугъру гъарсар кас гъякъ апІувал улупну.

²⁷ Гъамус ухъу фтиинди фурсар апІухъа? Сабдииндира! Гъаз? Ляхнар тІалаб апІурайи Къанундин бинайиин алди? Вав! Хъа хъугъвал тІалаб апІурайи Къанундин бинайиин алди.²⁸ Фицики, учу кIурача, адми сарун, Къанундин тІалабариз учв мютЮгъ шулашра-шуладаршра, чан хъугъувализ дилигну, гъякъ гъапІну.²⁹ Аллагъ, анжагъ, жугъдариztан дарин? Гъацира имбудариизра Вуйир даринхъа? Ав, Думу гъацира имбу халкъаринра ву.³⁰ Аллагъ сар вуйивализ дилигну, Дугъу вари хъугърудар сабси гъякъ апІура – суннат гъапІдарра дарапІдарра.³¹ Ухъуз хъугъвал а кIури гъамус Къанун тина апІухъахъа? Икибашттан, вав! Ухъу ихъ хъугъували-инди Къанун мюгъкам апІурахъа.

Ибрагъимдикан

4 ¹Ихъ абиирин аба Ибрагъимдикан фу пухъа?² Эгер Аллагъ-ди Ибрагъим чав апІурайи ужуудар ляхнариз дилигну гъякъ гъапІнуш, дугъхъан инсанарин улихъ фурс апІуз шуйи, хъа Аллагъдин улихъ – вав.³ Гирами китабариъ дуннаки:

«Ибрагъим Аллагъдихъ хъугънийи, ва, чан хъугъувализ дилигну, Аллагъди думу гъякъ гъапІну».

⁴Лихурайидариз пул пешкеш вуди туврадар, думу ляхни гъа- занмиш гъапІуб ву.⁵ Хъа эгер адми чан ляхнарихъ хътругъди, гъеле чIуру касра гъякъ апІру Аллагъдихъ хъугъруш, чан хъугъувализ дилигну, Аллагъди думу гъякъ апІиди.⁶ Гъаци Давудрира гъапну: адмийин ляхнариз дилигди, хъа хъугъувализ дилигну, Аллагъди гъякъ апІурайи кас баҳтавар ву.

⁷ «Баҳтаврар ву законсуз ляхнарилан хил алдабгъну, гунгъар ккерку касар.

⁸ Баҳтавар ву Агъайи гунгъар гъисабназ гъададагъу кас».

⁹ Му баҳтаварвал суннат дапІнайидаризттан дарин, дарш? Хъа дапІнадрудариз? Ухъу гъурхунхъаки: «Ибрагъимдин хъугъувализ



дилигну, Аллагъди думу гъякъ гъапІну». ¹⁰Фила думу гъякъ гъапІну? Дугъан суннат апІайиз, даршиш апІбалан къяляхъ? ИкибаштІан, апІайиз! ¹¹Ибрагымдин суннат, суннат апІайиз улихъна айи чан хъугъувализ дилигну, Аллагъдин улихъ гъякъ хувалин лишан вуди хъасин гъапІну. Ва гъаддиз Ибрагым, гъеле суннат дапІну адарди, хъугънайдаринра кмиди аба гъахъну. Дурарра, чпин хъугъувализ дилигну, Аллагъди гъякъ гъапІну. ¹²Ибрагым гъацира суннат дапІнайдаринра аба ву. Дурари неинки суннат, хъа гъацира, ихъ аба Ибрагымдиси, чан суннат апІайиз улихъна айи хъугъувалра къабул дапІна.

Хъугъувализ дилигну, Аллагъди туврайи гаф

¹³Ибрагымдиз ва дугъан наслариз вари дюн'я ирсди тувди, к'ури, Аллагъди туву гаф дугъаз Къанундиланмина тувуб дайи, хъа чан хъугъувализ дилигну, гъякъ хувалинди гъурубкъу гаф вуйи. ¹⁴Адмийириз, Къанундиз мютІюгъ хъузди, Аллагъдин гаф рубкъуиши, хъугъувализна Ибрагымдиз туву гаfnаз айиб гъич саб къиматра хъибдайи. ¹⁵Фицики тамам дараpІру Къанунди Аллагъдик хъял капІру, хъа Къанун адрушваь думу ч'юбгъюзра шулдар.

¹⁶Гъаци вуйиган, адмийириз Аллагъдин гаф чпин хъугъувализ дилигну рубкъура. Му Дугъан рягымлувалин багъиш ву. Гъаддиз думу неинки Къанундинди яшамиш шулайидариз, хъа гъацира хъугъувалинди яшамиш шулайи Ибрагымдин вари наслариз кайиб ву. Хъа Ибрагым ихъ варидаrin аба ву. ¹⁷Гирами китабарии аки: «Узу увкан гизаф миллетарин аба гъапІунза». Му Аллагъдин улихъ гъякъ ву. Ибрагым гъийихдариз уымур тувру, хъуз ккайиб вари хъуз гъитру Аллагъдихъ хъугъний.

¹⁸Ибрагымдиз гъич саб чара имдайи, хъа думу, Аллагъдихъ хъугъну, миж кади гъузнийи. Гъаддиз Аллагъдин гъаму гафариинди: «Яв наслар лап гизаф хъиди», – дугъкан вари халкъарин аба гъахънийи. ¹⁹Варж йис яшнан чан беденник хай кимдруб аыгъяшра, хъа Сара бицІидар шлур дайишра, Ибрагымдин хъугъувал зяиф гъабхъундар. ²⁰Думу Аллагъдин гафниин шаклу гъахъундайи, хътругъри гъузундайи. Хъа думу, Аллагъдин тяриф апІури, ижими хъугъну гъузнийи. ²¹Думу Аллагъ Чав туву гаф тамам апІуз Удукъур вуйибдихъ хъугънайи. ²²Гъаддиз Аллагъди



Ибрагым гъякъ гъапІнийи. ²³Гирами китабариь сар дугъкан: «Гъаддиз Ибрагым гъякъ гъапІнийи», — кIури дуннадар, ²⁴хъа ухъу бадали дупна. Ихъ Агъа Иса Месигъ Чиви ГъапIурихъ хъугъ-руш, ухъура гъякъ апIиди. ²⁵Думу ихъ гунгъарихъанди гъакIну ва, Аллагъдин улихъ ухъу гъякъ апIбан бадали, Думу Чиви гъахъну.

Аллагъдин улихъ гъякъвал

5 ¹Ихъ Агъа Иса Месигъдихъ хъугъну, ухъу гъякъ духънайиган, Аллагъдихъди Иса Месигъдилантина ихъ айлакъийир деркун-хъа. ²Ихъ хъугъувалинди ухъу ахънайи рягъимлуval Гъадгъулан-тина улупнахъуз, ва, Аллагъдин аднакан ухъуз рубкъруб айгъяди, гъамус лап шад вухъа. ³Мидланра гъайри, айзаб-дерднаръа ухъу шад вухъа, фицики айзаб-дердериь ухъу сабурлу шулайиб айгъя-хъуз. ⁴Сабурлувалиь хасият мюгъкам апIура, хъа мюгъкам гъаб-хъи хасиятналан умуд арайиз гъюра. ⁵Умудну ухъуз кучIлар апIидар, фицики Аллагъдин масанвал, Аллагъдихъбан багъишиди дуфнайи Гирами Рюгъналанмина ихъ юкIвариь убзна. ⁶Ухъу зя-ифди айиган, Месигъ ухъхъанди гъакIну. Ухъу Аллагъ гъясбикк ккадарди яшамиш шули гъахъунхъа, гъаци вушра Месигъ улуп-найи вахтна ухъхъанди гъакIну. ⁷Дугъри касдихъанди йикIуз шлиз ккун шул? Саризра. Мумкин ву, ужур касдихъанди йикIуз сар фуж-вуш дихъубра. ⁸Хъа Месигъ, гъеле ухъу гунагъкрап вуш-ра, ухъхъанди гъакIну, ва гъамдинди Аллагъди, ухъухъна вуйи Чан масанвал фукъан айхюб вуш, улупну.

⁹Гъамус, Месигъдин айжаллантина Аллагъдин улихъ ухъу гъякъ духънайиган, мидлан артухъ, Гъадгъу Аллагъдин хъялна-хъан уъридихъу. ¹⁰Фицики, гъеле ухъу Аллагъдин душмнарди имиди, Дугъу ухъу Чан Балин айжалниинди албагнуш, хъа гъа-мус албагну айиган, хъана ужуйи Чан Балин уъмриланмина Ду-гъу ухъу уъриди. ¹¹Ухъу неинки дюрхну хъиди, хъа гъира, Гъад-гъуланмина Аллагъдихъди албагнайидар, Аллагъди ихъ Агъа Иса Месигъдиланмина лап шад апIурахъу.

Адам ва Месигъ

¹²Гъаци вуйиган, дюн'яйиз гунагъ сар адмийиланмина — Адамдиланмина фици гъафнуш, хъа гъадму гунгъихъди — айжал, гъаци айжалра вари инсанариз гъурубкъу пай гъабхъну, фицики



дураги варида гунагъ апIуи. ¹³ Гунагъ, дюн'яйиз Къанун гъя-
йиз айиб ву, хъа Къанун адрушваъ, гунагъ гъич саризра тахсир
вуди гъугъубжурадар. ¹⁴ Хъа айжал, Адамдин вахтариланмина тап
Мусайин вахтаризкъан тахтниин дебънади гъабхъну. Думу гъеле
Адамдиси гунагъ дарапIдариинра агъавал апIури гъабхъну.

Адам хъасин гъюз Ккайириз ухшарди гъахъну. ¹⁵ Хъа Аллагъ-
дин ужувлан багъиш Адамдин гунгъиз барабар дар. Эгер гизаф-
дар сар касдин гунгъилан гъийихнуш, мидлан артухъ Аллагъдин
уж'вал ва сар Адмийин, Месигъ Исаин ужувлан багъиш гизаф-
дариз абцIну рубкъиди. ¹⁶ Му багъиш гунагъ гъапIу сарин суд
дар. Фицики судди тахсир кипру, хъа му ужувлан багъишну ги-
заф гунгъарин къяляхъ адмийир Аллагъдин улихъ гъякъ гъапIну.
¹⁷ Эгер анжагъ сар адмийин гунгъиланмина айжали агъавал апIуз
хъюбгънуш, мидлан артухъ, абцIну Аллагъдин уж'вал ва гъякъва-
лин багъиш къабул гъапIдари гъадму сар Касдилан, Иса Месигъ-
диланмина умрий паччагъвал апIиди.

¹⁸ Гъаци вуйиган, сарин гунгъилантина вари адмийирик тахсир
кипнуш, гъаму жюрейиинди, Сарин гъякъвалилан Аллагъдин
улихъ вари адмийириз гъякъвал рубкъиди ва дурагиз умур
хъибди. ¹⁹ Гъаци вуйиган, сарин мютIюгъ дарували гизафдар гу-
нагъкрап гъапIубси, Сарин мютIюгъвали гизафдар гъякъ апIиди.
²⁰ Къанун гунгъар артухъ хъуз гъафну, хъа гунагъ артухъ шлуб-
къан, Аллагъдин уж'вал хъана артухъ шуйи, ²¹ ва гунагъ апIували
фици чахъди айжал хури, агъавал апIуз хъюбгънуш, гъаци Аллагъ-
дин уж'валира ихъ Агъа Иса Месигъдиланмина, ухъуз гъаргандин
умур тувбан бадали, гъякълуди агъавал апIуз хъюбгъди.

Месигъдихъ хъугърударин умур

6 ¹ Гъаци вуйиган, фу пухъа? Аллагъдин уж'вал артухъ хъуз гун-
гъар апIури гъузхъахъа? ² ИкибашIан, вав! Ухъу гунгъарий
гъапIу ихъ умур дебкунхъа, фици ухъу хъана гунгъар апIухъа-
хъа? ³ Учвуз айгъдарди айинхъа, ухъу штуан шлуган, ухъкан Мес-
игъ Исаин саб пай хъубкан, ва гъацира Дугъан айжал пай апI-
бакан? ⁴ Гъаци вуйиган, штуан шлуган, ухъу Дугъахъди сатIиди
гъакIунхъа ва, Аллагъдин адлу къурдатниинди Месигъ Чиви гъа-
хъиганси, ухъура Чиви апIбан бадали ва цИии умриинди яша-
миш хъпан бадали, Гъадгъахъди кивну гъахъунхъа.



⁵ Ухъу Гъадмуси дукІнайиган ва гъаддинди Дугъак кидикъ-найиган, Гъадмуси Чивира хъидихъя. ⁶ Ихъ гунагъкар хасиятну ухъ'ин гъюкум дарапІбан бадали ва сарун ухъу гунгъарин лу-кІар дархъбан бадали, ихъ йирси уьмур Исайихъди сатІиди хач-рак кабсуб аygъахъуз. ⁷ Фицики гъакІи кас гунгъар апІбаккан азад шула.

⁸ Ухъу Месигъдихъди гъакІнуш, Гъадгъахъди яшамиш шлуб-дихъра хъугъурхъя. ⁹ Фицики гъачІидаригъян чиви гъахъи Ме-сигъ сарун диликІруб аygъахъуз. Дугъан зinin сарун аյжалин гъюкум илмидар. ¹⁰ Думу, сабан ва гъаргандиз гунгъарин дюн'я дипну, гъакІну. Хъа гъамус Думу Аллагъдиз яшамиш шула. ¹¹ Гъа-ци учвура, гунгъар апІбаз дукІнайдарси, Иса Месигъдиъди Ал-лагъ бадали яшамиш шулайидарси ихътай.

¹² Гъаддиз гунгъари ичв айжал хъайи бедендин ахювал апІуз мигъитанай ва дидин тямъгъариз мютІюгъ маҳъанай. ¹³ Ичв жандин гъич саб пайра гунгъарин гъюкмиз мутуванай, дурарикан гъякъсуз ляхнарин гъуллугънан яракъар дариши. Дидин ерина, дукІну чиви гъашидарси, Аллагъдин гъуллугъналь ихътай. Ичв жандин паярра гъякъувалин яракъди Аллагъдин гъуллугъналь дерккай. ¹⁴ Гунгъари учв'ин агъавал дапІну ккундар, фицики учву Къанундикк яшамиш шуладарчва, хъа Аллагъдин ужувлакк.

Гъякъувалин лукІар

¹⁵ Гъа, фу дапІну ккунду ухъу? Ухъу, Къанундикк ккадарди, хъа Аллагъдин ужувлакк ккайдари гунагъ шлу ляхнар дапІну ккундин? ИкибаштІан, вай! ¹⁶ Учвуз аygъдарди анчвузхъя, учву шлин ихтиярналь мютІюгъ хъуз лукІарси учІвраш, гъадгъан лу-кІар шулачва, гъаци — айжалихъна хру гунагъвалин лукІар, яса-на гъякъвалихъна хру Аллагъдихъ хъпехъувалин лукІар шулачва, ¹⁷ хъа учву улихъди гунагъвалин лукІар вушра, Аллагъдин кюмек-ниинди ичв марцци кІваан учвуз улупурайи аygъоваларихъ хъпехъури гъахъунчва! ¹⁸ Ва учву гунгъариккан ккадаънийи, гъамус гъякъувалин лукІар гъахъунчва. ¹⁹ Узу, адмийир гъавриъ ахъруси, мисалариинди Кураза, даршиш мидин гъавриъ ахъуб учвуз ги-заф читин ву. Фици учву мидиз улихъна ичв жандин паяр чир-кинвализ, законсузвалар апІуз тувуйиш, гъаци гъамус дураг гъякъ-увалин гъуллугъналь гирами ляхнар апІуз тувай.



²⁰ Фицики учву гунгъарин лукIар вуйиган, гъякувалин гьюк-миш адайчва. ²¹ Учву ичв йирси ляхнар апIруган, фукIа хайир ай-чвуз? Дицдар ляхнари аյжалихъна хуруган, гъамус дураихъан начди ачвуз. ²² Хъа гунгъариккан азад духьнайиган ва Аллагъдин лукIар духьнайиган, гъамус, марцци яшайишдин хайир ачвуз, хъа диди гъаргандин уьмрихъна хуру. ²³ Фицики гунгъин кымат айжал ву. Аллагъдин багъиш – ихъ Агъа, Месигъ Исайихъди вуйи гъаргандин уьмур ву.

Къанундин лукIваликкан ккудуучIвуб

7 ¹ Учвуз айгъдарди айинчвуз, гъардшар (учвуз, Къанундин гъав-ри ахънайидариз кIураза), Къанунди инсан Чивиди имиди дугъ’ин агъавал апIурайиб? ² Мисалназ, жилирихъ хьайи шив, сабан думу Чивидимиликъан гагъди, Къанундииндичан жили-рик китIна, хъа эгер дугъан жилир гъачIиш, Къанунди думу нюокгъин гьюкмиккан азад апIура. ³ Гъаддиз, чан жилир Чиви-димиди думу жаариз шувуз гъушиш, дугъу къяппавал апIура. Хъа эгер дугъан жилир гъачIиш, думу нюокгъин гьюкмиккан азад шула, ва гъаддиз дугъу, жаариз шивди гъушну кIури, къяппавал апIурадар.

⁴ Гъаму жюрейииндичан, ииз гъардшар, Месигъдин Бедендиланти-на учвура гъачIидаригъян Чиви гъахъири интиярнаш ахъбан ба-дали ва, Аллагъдиз бегъер хпан бадали, Къанунди кIуруб апIба-ккан азад вучва. ⁵ Фицики ухъу бедендин ккуниб апIури яшамиш шулайхъа. Къанундиланмина шулайи ихъ гунагъкарвалин тямя-гъяри ихъ жанарийн агъавал апIуий. Диidi ухъу айжализ хурай-хъу. ⁶ Гъадму Къанундин бацарий айхъа. Ухъу, Къанундиз дукIну, дидккан азад гъапIунхъу. Сарун дидикIнайи йирси айдатарин хиликкди варь, хъа Рюгънан хиликкди цийи духьну, Аллагъдиз гъуллугъ апIуз шулу.

Гунагъкарвалихъоди дяви

⁷ Мушваш фу шула? Къанун – му гунагъ вуйинхъа? Варь, дици дар. Мидихъди сабси, Къанун адайиш, узуз, гунагъ фу вуш, айгъю хыбдайзуз. Эгер Къанунди, «жааринуб ккун мапIан», кIурадайиш, узуз, лайикъ даруб ккун мабхъан, фу кIуру гаф ву-йишра, айгъю хыбдайзуз. ⁸ Гунгъи, гъаму табшуругъ багъна вуди,



узук лайикъ дару тымягъар каунзук. Къанун адайиш, гунагъра шулдайи. ⁹Узу Къанун аygъдарди яшамиш шулайза, хъа Къанундин табшуругъар узуз аygъю гъахыиган, гунагъра арайиз удубчIвну, ¹⁰ва узура гъакIну. Гъаци узуз уьмур дубхну ккуни табшуругъну, узуз аյжал гъабхну. ¹¹Фицики гунгъи, гъаму табшуругъ багъна вуди, узу алдатмиш дапIну, гъакIунзу.

¹²Гъаци вуйиган, Къанун гирами ву, дидин табшуругъарра гирамидар, гъякъ вуйидар ва ужудар ву. ¹³Му ужубди узуз айжал гъабхну. Гъаци вуйин? ИкибаштIан, варь! Гунгъи, узуз айжал хъпан бадали, ужуб мутму ишлетмиш гъапIну. Гъамци апIури, гунгъи чан ляхин гъапIну. Табшуругъну гунагъ гизаф пис шейъ вуйиб улупура.

АйтI аий дявдикан

¹⁴Ухъуз Къанун рюгънануб вуйиб аygъяхъуз, хъа узу, беден ади, гунгъиз лукIди тувнади гъахъунзу. ¹⁵Узу гъапIраш, узуз аygъдарзуз, яна узуз ккуниб апIурадарза, хъа узуз даккниб апIураза. ¹⁶Эгер узу узуз даккниб апIураш, Къанун ужуб вуйивал къабул апIураза. ¹⁷Дугъриди гъапиш, мици апIурайир узу дарза, хъа узуль яшамиш шулайи гунагъ ву. ¹⁸Узуль, йиз гунагъкар бедендиъ, уж'вал яшамиш шули адрувал аygъязуз. Ужудар ляхнар апIуз ккунди шулзуз, хъа дицдар ляхнар апIурадарза. ¹⁹Фицики узу узуз ккуни уж'вал апIурадарза, дидин ерина узуз даккни чIуру ляхнар апIураза. ²⁰Узуз даккни ляхнар узу апIрган, дугъридан гъилигиш, дурар апIурайир узу дарза, хъа узуль яшамиш шулии гунагъ ву.

²¹Гъаци вуйиган, гъамциб ляхин ачуҳъ гъабхъунзуз: гъарган, узуз уж'вал апIуз ккун гъабхъиган, хил'ан удубчIвруб писвал вуйиз. ²²Йиз айтIан пай Аллагъдин Къанундин шад ву

²³Йиз жандиъ жара къайда рябкьюразуз. Му къайдайи йиз фагъмин къайдайихъди дяви гъабхура. Йиз жандиъ аий гунагъ къайдайи узу чан йисирвализ дисура. ²⁴Гъей касиб узу! Шли узу, узуз айжал хру, гъамциб беденихъан уърхи迪? ²⁵Ихъ Агъа Иса Месигъдилантина ухъу уърхру Аллагъдиз баркаллагъ! Гъаддиз, узу сар вуди, йиз фагъум Аллагъдин Къанундин гъуллугъналь а, хъа йиз беден гунагънан гъуллугъналь а.



Рюгъну абцІнайи уымур

8 ¹Сарун Месигъдихъди яшамиш шулайдарик тахсир кипдар.
²Гъаз гъапиш Месигъ Исайилантина уымрихъна хурайи рюгънан законди узу гунгъарихъна ва аյжалихъна хурайи закондиккан азад гъапІну. ³Ихъ гунагъкар бедендинди Къанун зяиф гъабхъну. Гъаддиз Аллагъди Чан Бай гунагъкар адмийириз ухшар ади, гунгъарихъанди гъурбан хъуз жилариина гъальну. Гъаци Дугъу адмийирин бедендиъ айи гунгъар тахсирназ гъахну. ⁴Жуван гунагъкар бедендин гьюокмиъ – варь, хъа рюгънан гьюокмиъ яшамиш шули, ухъу Къанундин гъякълу табшуругъар тамам апІбан бадали, Аллагъди гъамци гъапІну.

⁵Фицики чан гунагъкар бедендин гьюокмиъ яшамиш шулайдари бедендин тямягъарикан фикир апІура, хъа рюгънан гьюокмиъ яшамиш шулайдари Рюгънан ляхнарикан фикир апІура. ⁶Бедендин тямягъарикан вуйи фикрари айжалихъна хуру, хъа Рюгънан ляхнарикан вуйи фикрари уымур ва архайнвал хуру. ⁷Гъаз мици ву? Гъаз гъапиш бедендин тямягъарикан вуйи фикрар Аллагъдиз душмнар ву. Дураг Аллагъдин Къанундиз табигъ шулдар, я табигъ хъузра шулдар. ⁸Бедендин гьюокмиъ яшамиш шулайдарихъан Аллагъдиз ккуниб апІуз шулдар.

⁹Эгер дугъридан учвъу Аллагъдин Рюгъ яшамиш шулаш, учву бедендин гьюокмиъ яшамиш шуладарчва, хъа Рюгъназ мютІюгъ шулачва. Шлиъ Месигъдин Рюгъ адарш, думу Месигъдинур дар. ¹⁰Тмуну терефнаан, эгер учвъу Месигъ аш, гъеле ичв беден гунгъари дубкІнашра, Рюгъну, Аллагъдин улихъ гъякъ дапІну, учвуз уымур тувра. ¹¹ЙикІбан къяляхъ Иса Чиви ГъапІурин Рюгъ учвъу яшамиш шулаш, Месигъ Чиви ГъапІури, учвъу яшамиш шулайи Рюгъналанмина ичв жанаriz уымур багъиш апІура.

¹²Гъаддиз, гъардшар, ухъу ихъ гунагъкар бедендиз ккуниб дапІну, дидиз мютІюгъ духыну ккундар. ¹³Эгер учву ичв бедендин гьюокмиъ яшамиш шулуш, йихидичву. Хъа эгер учву рюгъниинди ичв гунагъкар бедендин тямягъар гъачИиш, уымур гъазанмиш апІидичва. ¹⁴Фицики Аллагъдин Рюгънан гьюокмиъ айдар Аллагъдин гъякъ веледар ву. ¹⁵Ухъу къабул дапІнайи Рюгъну ухъу лукІарииз илтІикІурадар ва ухъуз щийи гучI ккапІрадар, му Рюгъну ухъу Аллагъдин веледариз илтІикІура. Ва Дугъу «Авва», яна



«Адаш» кIури, гъарай апIуз гъитра.¹⁶ Ихъ рюгънахъди сабси Рюгъну Чав ухъу Аллагъдин веледар вуйиб тасдикъ апIура.¹⁷ Ухъу Аллагъдин веледар вуйиган, Месигъдихъди ухъузра ад хъпан бадали, Дугъян аззабар ухъу къабул апIурайиган, Месигъдизси, Аллагъдин ирс ухъузра рубкъиди.

Адлу хъидихъя

¹⁸ Ухъуз гъюз имбу уьмрий хъуз ккайи адлувалихъан ихъ гъа-
мусдин аззабар фукIара дар. ¹⁹ Фицики Аллагъдин веледар фу-
жар вуш, ачмиш апIру вахт хъайиз, Аллагъди халкъ дапIнайиб
вари, аыгъ апIуз даршули, ккилибгурा.

²⁰⁻²¹ Аллагъди халкъ дапIнайиб вари му мянасуз дюн'яйи чин
ниятнинди адар, хъа — халкъ ГъапIури ниятнинди. Хъа Ал-
лагъди халкъ дапIнайи варибин, чпи пуч шлу лукI'валиккан
азад хъиди ва Аллагъдин веледариз гъурубкъу азадвална адлувал
чпизра кайиб хъиди, кIури, миж ади гъабхъну.

²² Ухъуз аыгъяхъуз, Аллагъди халкъ дапIнайиб вари, бицIир
апIури аззиятнакк ккайи дишагълиси, гъийин йигъазкъан азз-
барий ади гъабхъну. ²³ Неинки вари халкъ дапIнайиб, хъа гъа-
цира Рюгъну апIну цИйи уьмур ккебгъу ухъура вари ккили-
гурайхъя. Дидлан гъайри, Аллагъди ухъу Чан веледарди гъа-
дагъур, кIури, ва ихъ жанар азад апIур, кIури, айтIанзина
аззабнаш ккилигуре айхъя. ²⁴ Ихъ умудну ухъу гъюрхну. Ихъ
умуд ухъуз гъурубкъиш, думу умудди гъубзрадар. Адмийир, миж
кайиб тамам гъабхъихъан, фтиккIа миж кади гъуздар. ²⁵ Ухъу
ухъуз адрубдик миж кади гъузрахъя ва сабурлуди дидиз ккили-
гурехъя.

²⁶ Диidiхъна, ухъуз, зяиф касариз, ихъ зяифвализ дилигну,
Рюгъну кюмек апIурахъуз. Ухъуз хай вуйибси ккарагуз аыгъ-
дархъуз, аммаки ухъхъанди Аллагъдиз мидкан гафариинди пуз
даршу гъигъариинди Рюгъ Чав ккарагура. ²⁷ Хъа Аллагъдиз,
ихъ юкIвар Шлиз арццнаш аыгъяди, Рюгъну Чаз фтикан кка-
рагураш аыгъя, фицики, Рюгъ, Аллагъдиз Чандарихъанди Чаз,
Аллагъдиз ккуниси ккарагуру. ²⁸ Ухъуз, Аллагъ ккунидарииз, Чаз
ккуниси Дугъу дих гъапIдарииз, вариб ужувлаз ачухъ шлуб аыгъя-
хъуз. ²⁹ Фицики, дюн'я арайиз хайиз Дугъяз аыгъюди айидар,
Гъадгъу улихъимиidi Чан Бай вари чвийир-чиригъян сарпирди



хъпан бадали, Чан Бализ ухшар хъуз ктагъну. ³⁰ Чав ктагъдариц Дугъу дихра гъапIну, хъа дих гъапIдар Чан улихъ гъякъ гъапIну, хъа гъякъ гъапIдар адлу гъапIну.

Аллагъдин масанвал Иса Месигъдиб а

³¹ Фу кIухъа? Аллагъ ухъхъанди вуш, ухъуз къаршу шлихъан хъуз шул? ³² Ухъу вари бадали, Чан Бай, гъайиф дараpIди, азаб-накк Ккитури, Чан Балихъди сатIиди ухъуз вари имбубра ту-видаринхъа? ³³ Шилхъан Аллагъди кадагънайи халкъдик тахсир кипуз хъибди? Аллагъди Чав дурагъ гъякъ апIура. ³⁴ Шли дурагъ тахсирлу апIиди? Месигъ Иса гъакIну, хъа Чиви гъахъну, хъа гъамус Аллагъдин арчкулну хилихъинди деъна ва ухъхъанди кка-рагура. ³⁵ Ухъхъан Месигъдин масанвал тадабгъуз фтихъан шул? Дердерихъан? читинваларихъан? хъергуваларихъан? гаш'валари-хъан? гъяцIиваларихъан? хатIирихъан? ханжларихъан? ³⁶ Гира-ми китабарий дикикIна:

«Уву бадали учу гъар йигъан йивну йихура,
урккуз гъязур дапIнайидарси,
учу марччарик гъисаб апIура».

³⁷ Гъаци вушра, ухъу ккун гъапIу Аллагъдин кюмекниинди гъаму варибди зурба гъалибвал гъадабгъидихъа. ³⁸ Фицики узуз дугъридан айгъязуз: я уымрихъан, я айжалихъан, я малайикиари-хъан, я заан рюгъярихъан, я гъамусдин, я гъюз имбу замана-йихъан, я къудратарихъан, ³⁹ я зин али, я кIанакк ккайи гъа-тарихъанра, я вари дюн'я гъадабгъиш, жара жюрейин гъич сабдихъанра ухъхъан ихъ Агъа, Месигъ Исаильянмина улупу Ал-лагъдин масанвал тадабгъуз хъибдар.

Аллагъ ва жугъдар

¶ ¹ Месигъдин гъякъниинди гъякъ кIураза. Узу кучIлар апIу-радарза, Гирами Рюгъну абIнайи йиз намус узуз шагьидибши: ² йиз кIавъ зурба дерд ва кудудубкIру иццушин айиз. ³ Йиз гъардшар, йиз миллет уърхбан бадали, Узу Месигъдихъан гъудучIувзра гъязур вуза. ⁴ Йиз миллет Израил халкъ ву. Дурагиз Аллагъди Чан веледар кIура. Аллагъдин ад, Аллагъдихъди гъийи-тIу йикъярар, Мусайин Къанун, Аллагъдиз гъуллугъ апIувал ва Аллагъдин Гаф гъаму халкъдиз тувнийи. ⁵ Гъамрар ву ихъ зурба



абиирин наслар. Гъамрар ву варибин зин Аллагъ вуйи, айсра-риан айсраиз ужувлакк ккайи Месигъдин жилин хизан. Амин!

⁶Хъа му, Аллагъди Чав тувнайи гаф тамам гъапIундар, кIуру гаф дар. Дарди хъуз, Израиликан гъахъидар гъякъ вуйи израил халкъ ву, хъа вари ваъ. ⁷Гъеле дураг Ибрагъимдин наслар вушра, сабан, мици хувалиинди, дураг вари Ибрагъимдин гъякъ наслар дар. Фицики, Аллагъди гъапиганси, «Яв гъякъ наслар Исакъ-дикантIан хъидар». ⁸Му гъаци кIуру гаф вуки: Ибрагъимдилан бабкан гъахъи вари наслар Аллагъдин гъякъ веледар дар, хъа анжагъ Ибрагъимдиз туву Аллагъдин гафналантина гъахъи веледар гъякъ веледар ву. ⁹Туву гафна магъа фу кIураш: «Улупнайи вахтна Узу гъидиз ва Сарайиз бай хъиди».

¹⁰Хъа му сабан вариб дар. Гъацира Ревекайиз баяр аий ва дурагин сар адашра вуйи – ихь аба, Исакъ. ¹¹⁻¹²Ва кьюрид баяр бабкан хъайиз, дураги фукIа-мукIа ужууб, я харжиб апIайиз улихъна, Аллагъди Ревекайиз гъапну: «Аъхюну бай бицIирнурин гъуллугънаш хъиди». Аллагъди мици дураг бабкан хъайиз улихъна гъапнийи, гъаз гъапиш, Аллагъди кадагънайи бай, Чав ният дапIнайиганси кадагънайир хъпан бадали, хъа бали чав гъапIуб-дииинди кадагъну дархъбан бадали. ¹³Гирами китабариъ дупна-йиси: «Узуз Якъуб ккуун гъахъунзуз, хъа Исаф – даккун».

¹⁴Гъамус фу пухъа? Аллагъ дюз дарур шлуб дарки, гъаци да-рин? ИкибаштIан, шлуб дар! ¹⁵Фицики, Дугъу Мусайиз гъапну:
«Узу Узуз ккунириз уж’вал дебккдиза
ва Узу Узуз ккунирин язухъ зигидиза».

¹⁶Гъаддиз, адмийирикан шлиз, чан тIалабариз вая гъапIу лях-нариз дилигди, уж’вал апIуруш, Аллагъди Чав гъял апIуру. ¹⁷Ги-рами китабариъ дупнайиси, Аллагъди Египетдин паччагъдиз гъапну:

«Увлантина варидализ Йиз къувват улупбан
ва Йиз ччвур вари дюн’я вуйибси рабгъбан бадали,
увкан паччагъ ктаур Узу вуз».

¹⁸Магъа гъамци Аллагъди, Чаз ккуниси, сариз уж’вал апIуру, сарик хъял капIру.

¹⁹Мумкин ву, учву узуз гъамци пубра: «Эгер Аллагъди ихь лях-нариин ахювал апIураш, гъаз Дугъу ухъу тахсиркрап апIура? Аллагъдин ниятариз фуж къаршу удучи видихъа?» ²⁰Уву фуж



вувахъа, инсан, Аллагъдихъди гьюжатар апIуз? Мутмуйи учв гъапIурихъан гъерхдар, аыхир, узу гъамциб уву гъаз гъапIунва, кIури? ²¹ БатIур гъабар апIурурин хилий адаринхъа? Дугъу чаз ккун гъабшиш, гъадму гъурдсиб батIрикан багъайин гъаб, ясана ужуз гажин апIуру.

²² Аллагъдиз Чан хъял улупуз ва Чан къувват улупуз ккун гъабхыну, аммаки хъял капIру, тIанкъ апIуз гъязур вуйи ляхнар Дугъу сабурлуди аыгъ гъапIину. ²³ Дугъу мици Чан ккудуубкIру ад, рягымлувализ лайикъ вуйи ва адлуval къабул апIуз гъязур дапIнай касариз улупуз гъапIундайкIан, яраб? ²⁴ Гъадму касар ухъу вухъа. Дугъу ухъу неинки жутъдариgъян, хъа миди вуйи хал-къаригъян, дих дапIину, гъядягъыну. ²⁵ Гирами китабарикан Оси-йин китабдиль дупна:

«Йиз халкъ дарудариз
Узу Йиз халкъ пииза,
ва Узуз даккнириз
Йиз ккунир пииза».

²⁶ «Аллагъди: „Уччу Йиз халкъ дарчва“
гъапи гъадму иишв’ин
дуариз Чиви Аллагъдин веледар пиidi».

²⁷ Ишайиира Израилин халкъдихъанди гъарай апIура:

«Гъеле Израилин веледарин къадар
гъюлин кIанаь аий гъумкъан вушра,
дуарикан щиб къадартIан урхидар,
²⁸ фицики Аллагъди Чан ахиримжи суд
адмийирин зиин
ухди апIиди».

²⁹ Ва Ишайий улихъимиidi гъапиганси:

«Эгер Вариудукъру Агъайи ухъуз наслар гъитундайиш,
ухъуз шлубра
Содом ва Гомор шагъариз гъабхыиб хъибдий».

³⁰ Гъамус фу кIуру? Гъякъвал дарабграйи жара миллетариз чин хъугъувалилантинагъякъвал гъабхыну. ³¹ Хъа Къанун тамам апIури гъякъвал абурайи Израилин халкъдиз гъякъвал гъабхундар. ³² Гъаз? Гъаз гъапиш дуариз гъякъвал ляхнаилантинагъа-гуз ккун гъабхыну, хъа хъугъувалилантинагъа вая. Дуарар ликарикк ккабхъру гъвандихъ хъарсну, ³³ Гирами китабарий дунайиси:



«Лиг гъа,
Узу Сион дагъдиин
ликарикк ккабхъру Гъван дивдиза,
Гъван, гунагъкрап хъарсру Гъван,
аммаки фуж Гъадгъахъ хъугыиш,
думу швумал хъидар».

Жугъдарихъан уърхювал абгуз шулу

10 ¹Гъардшар, узуз йиз кІваантІан жугъдар дюрхну ккундузуз, ва Аллагъдиз гъадраихъан ккарагураза. ²Фицики узу ша-гъидвал апІураза, чпи Аллагъдихъ юкІв хъипну янашмиш шулаш-ра, дурализ дюз рякъ аыгъдар. ³Гъаз гъапиш дурализ Аллагъди багъиш апІру гъякъвал аыгъдайи, хъа чпин хусуси гъякъвал ара-йиз адабгъуз чарийр зигури, Аллагъдин гъякъвализ мютІюгъ гъа-хъундар. ⁴Месигъди, гъарсар хъугъу кас Аллагъдин улихъ гъякъ апІбан бадали, Къанундиз ахир дебккну.

⁵ Мусайи Къанундин гъякъваликан бикІура:
«Къанундин табшуругъар тамам апІур
яшамиш хъиди».

⁶ Гирами китабарий хъугъувализ дилигну туврайи гъякъували гъамци кІура:

«Учву учвхъан мегъерханай: „Фуж аршариз гъягъиди?“
душв’ан Месигъ хъади гъюз?

⁷ ва мегъерханай: Месигъ гъийихдарин паччагълугъдиан хъа-ди гъюз,

„Фуж кІан адрушваз гъягъиди?“»

⁸ Фу дупна Гирами китабарий? «Аллагъдин Гаф увухъди хъа, яв багахъ хъа, думу яв ушвниин ал ва яв кІавь а», ва думу Гаф ухъу ад-мийириз улупурайи хъугъувал ву. ⁹ Эгер уву яв ушвниинди: «Иса Агъа ву», – кІури, Аллагъди Думу гъачІидариғъян чИви гъапІуб-дихъ, юкІв хъипну, хъугъиш, уърхидиву. ¹⁰ Гъарсар, юкІв хъипну, хъугъур, Аллагъдин улихъ гъякъ хъиди; ушвниинди чан хъугъуваликан ктибтрур уърхиди. ¹¹ Фицики, Гирами китабари кІура:

«Дугъахъ хъугъур беябур апІуз хъибдар».

¹² Жугъдарна жара миллетар саб ву, фицики Агъара варидализ Сар ву, ва Чаз дих апІур варидализ Дугъу уж’вал тувру. ¹³ «Гъар-сар, Агъайиз дих апІур, уърхиди».



¹⁴Хъя дурари чпи Хътругъруиз фици дих апIиди? Фици чпиз Дерерхърурихъ хъугъди? Хъя дурариз, Дугъкан сарикъан дар-пиган, фици ебхьиди? ¹⁵Хъя фици Дугъкан ктибтиди, ктибтур гъадраиш? Гираши китабарий дибикIнайиси:

«Фукъан гюргеч дарин Ужувлан хабар рабгърударин ликар!»

¹⁶Аммаки вари жугъдари му Ужувлан хабар ибак апIури гъа-хъундар. Ишайи гъапну:

«Агъя, фуж хъугъну учу улупу аygьюваларихъ?»

¹⁷Гъаци вуйиган, Ужувлан хабар гъеебхъиган, хъугъвал гъору. Хъя Ужувлан хабар, Месигъдикан ктибруган, гъору.

¹⁸Амма узу кIураза: «Дурализ Ужувлан хабар гъеебхъундарин?» ИкибаштIан, гъеебхъну!

«Вари дюн'я вуйибси дурарин дихар гъарагънийи
ва дурарин гафар
дюн'яйин тлихъан кIулихъна гъурукънийи».

¹⁹Хъана кIураза: «Израилин халкъ мидин гъаврий ахъундай-
кIан?» Сифте Мусайин китабдис кIура:

«Узу учвую гъизгъинвал ачмиш апIиза,
халкъ ву дупну гъисаб апIуз даршлу халкъдииинди.
Узу увук хъял капIиза,
шулайибин гъаврий адру халкъдииинди».

²⁰Хъасин Ишайиин китабдис кIубанди кIура:

«Узу дарагди гъахъидариз Узу гъидихъну.
Узу гъедрерхри гъахъидариз
Узу ачмиш гъахъунза»,

²¹хъя Израилин халкъдикан душваъ кIура:

«МютЮгъ даршлу ва хъпебехъру халкъдиз
вари йигъди Узу, хилар гъачIаккну,
дих апIури гъахъунза».

Аллагъдиз Чан халкъ кIваълан гъархнадар

11 ¹Хъя магъа узу гъерхраза: «Аллагъди Чан халкъ Чахъан гъа-
даъндарин?» ИкибаштIан, вав! Узора Ибрагимдин наисил,
Вениаминдин тухмиан вуйи израилжви вуза. ² Аллагъди Чаз
улихъими аygю Чан халкъ Чахъан гъадаъндар! Гираши кита-
барий Ил'ясдикан фу дупнаш, аygъдарди анчвуз? Ил'ясди Ал-
лагъдиз израил халкъдилан аyrз апIуру:



³ «Я Агъа, дурари Яв пайгъамбраг
гъийихнийи ва,
Увуз гъурбнар хру Яв йишвар ккидирчнийи;
анжагъ узу сар сагъди имиза,
аммаки, дурализ узура йивну йикIуз ккунди а».

⁴ Аллагъди дугъаз фициб жаваб тувнийи?
«Узу Узуз

Ваалдин улихъ кIул ис дарапIу ургуд агъзур кас
гъюрхюнза».

⁵ Гъаму вахтарира Аллагъди Чан ужувиинди кадагънайи саб
бицIи гъварч адмийир а. ⁶ Аллагъдин ужувиинди дубхънайиб,
инсандин ляхнариз дилигнү, дубхънадар. Гъаци дайиш, уж'вал
уж'валси гъубзидаи.

⁷ Гъамус фу шула? Израилин халкъдиз чпи абгурайиб гъиби-
хъундар. Анжагъ кадагънайидаризтIан гъибихъундар, имбударин
инсанвал гъудубгнү. ⁸ Гирами китабариь дунайиси:

«Аллагъди дурап дерин нивкIуль аньний».

«Дурализ дярябкъбан бадали,
Аллагъди дурарин улар хъяркънийи,
дурализ деребхъбан бадали,
ибариь итишвнийи,
ва гъамци гъийин йигъазкъан ими».

⁹ Давудри гъапнийи:

«Гъит, дурализ,
чин шадлугъяр
чпиз ккиву рукъарна чулар ишри.

Гъит, дурап хъахъну алдакри ва жазайикк ккахъри.

¹⁰ Гъит, дурализ дярябкъбан бадали,
дурарин уларихъ мучIушин гъабхъри.
Гъит, дурарин юкъвар гъаргандиз
къяни ишри».

¹¹ Узу кIураза: «Жугъдар, хъахъну, гъудужвуз даршлуси, алдакнин-
хъя?» ИкибаштIан, ваъ! Гъадарин алдакувалиланмина имбу хал-
къариз, жугъдар баҳил хъпан бадали, уърхювал гъабхъну. ¹² Дурарин
алдакували вари дюн'яиз уж'вал хуруган ва дурализ кам гъахын-
ган, имбу миллетариз зурба ужувлар шлуган, хъя эгер вари жугъдар
Аллагъдихъна хътакиш, имбу дюн'яиз фукъан зурба ужувлар шул!



¹³ Гъамус узу, жара миллетар, учвухъна илтИкIураза. Узу Аллагъагъаду миллетеарихъна гъанайи вакил вуза. Узу йиз гъуллугъ заан вуди гъисаб апIураза. ¹⁴ Йиз халкъ бахил дапIну, сакъюдаркъана уърхидиза кIури, миж кайиз. ¹⁵ Аллагъагъаду жугъдари-хъан гъидицган, дюн'яйин жара халкъариз мясяльт гъабхнуш, хъа Аллагъаду жугъдар къабул гъапIган, фу шул? Дийихнайидар чиви апIдаринхъа?

¹⁶ Эгер яв уълин сабпи парча Аллагъадиз бахш гъапIиш, имбу вари уълерра гирами хъидияв. Эгер гъарин чивар гирамидар вуш, дидин кюлерра гирами ву.

¹⁷ Гъяни гъарин кюлер кудуршвнади, дурариин чIурудар фици улурхънуш, гъадму жюрейииндигучу, жара миллетар, чIуру чIвумчварси гъамус гъяни гъарин чиварин къувватнак кеъначва.

¹⁸ Гъаци вуйиган, кюлерин зиин фурс мапIан, гъаз гъапиш, чивариз уъмур туврайир уву дарва, хъа чивари увуз уъмур тувра.

¹⁹ Уву пидива: «гъатму кюлер узу улурхъбан бадали ктуршвнү».

²⁰ Думу гъякъ вуяв. Дураг чин хътругърувалиан ктуршвнү. Хъа уву дурагин иишв'ин хъугъувалиан алва. Гъаддиз фурс мапIан, хъа гучI кади гъуз. ²¹ Аллагъаду багъри кюлер гъайиф гъапIун-дарш, увура гъайиф апIидар.

²² Гъаци вуйиган, увуз Аллагъадин уж'валра, хъялра рябкьюра-вуз. Дугъан хъял Чахъан гъудучIвдарихъна шулу. Хъа увухъна вуйи уж'вал, эгер уву Дугъан ужувлакк гъузруш, рябкьюравуз. Гъудру-зиш, гъаркан увура кадабIиди. ²³ Хъа эгер жугъдар чин хътругъ-рувалий утIукъну гъудрузиши, дураг хъана гъарик кюрхъди, дар-шуз, Аллагъагъаду кюлер тазабаштIан кюрхъюз къудратлу ву. ²⁴ Хъа эгер уву чIуру гъаркан кадабIинайи циркил, багъри дарди, гъяни гъарик кубхънуш, хъа кюлериз чин багъри гъар'ин улурхъуз фукъан рягъят шул!

²⁵ Гъардшар, узуз учву му сирнан гъаврий адарди гъитуз, учву ичв аygъювалиин гизаф умуд кивну гъудрузбан бадали, ккундар-зуз. Израилин саб пай агълар, чин утIукъну гъузувалий арсну, жара миллетар вари тамамди Аллагъадихъна илтИкIайизкъан, гъузди. ²⁶ Хъасин, Израилин вари халкъ уърхиди. Гирами кита-барий дикикIинайиси:

«Сион дагъидлан Уърхур гъиди.

Дугъу Якъубдин тухмиан вари чIуруб идипиди,



²⁷ ва Узу дуарилан гунгъар алдагъган,
дуарихъди йикърар йитИдиза».

²⁸ Ужувлан хабар къабул дараپИиинди жугъдарикан Аллагъдин душмнар шула. Жара миллетар ичв хайирназ ву. Мидиз дилигди, жугъдар Аллагъдин кадагънайи халкъди гъузди, Аллагъдиз дураг ккунду, фицики Дугъу дуарин абириз гаф тувнийи.

²⁹ Фицики Аллагъди Чав дих дапИнайи халкъ ва Чав тувнайи гаф уърхиди. ³⁰ Саб фила-вуш учву Аллагъ гъясбикк апИдайчва. Хъа гъамус, Дугъахъ жугъдар хъпебехъган, Дугъу учвуз уж'вал улупура. ³¹ Аллагъди учвуз Чан уж'вал улупуз, хъасин думу дуариина алабхъбан бадали гъаму ражари жугъдар Дугъахъ хъпехъурадар.

³² Аллагъди вари халкъариз, хъасин чиплан хил алдабгъбан бадали, хъпебехъри гъузуз шлу вахтар улупнийи.

³³ Фукъан дарин Аллагъдин фагъмин ва зигъмин деринвал ва булвал! Фукъан дарин Дугъан ниятар ктитуз даршлувал! Фукъан дарин Дугъан рякъарин гъаврий ахъуз даршлувал!

³⁴ «Агъайин фагъум шли аygю апИди,
Дугъаз насигъятар шли тувди?»

³⁵ «Шли фу тувну Аллагъдиз,
Дугъу думу къяляхъ апIуз буржлу вуйиб?»

³⁶ Вари Аллагъди халкъ гъапИну, аххир, ва гъадму вари яшайиш анжагъ Гъадгъуланмина ва Гъадгъаз шула. Аъсариан аъсариз ад Гъадгъаз ву. Амин!

Ичв уымрап Аллагъдиз баши апИнай

12 ¹ Гъаддиз учвуз ккарагураза, гъардшар, Аллагъдин уж'вал бадали ичв жанар, Гъадгъаз хуш шлу марцци, чИви гъурбнаси, дерккай. Му Аллагъдиз фагъумлу вуйи гъуллугъ хъибди. ² Гъит, му дюн'яйин гъюкмари учв'ин агъавал дараپИри. Аллагъдин ужуб, рази ктаъру ва гъубкIу ният фу вуш, аygю хъпан бадали, ичв фагъум цИийи алапIури, дигиши йихъай.

³ Аллагъди узуз вакилвал багъиши дапИнайиган, узу учвуз вари-дарииз кIураза: учву ичв вуйидартIан артухъ заанди мидисанай, учвуз гъарсариз Аллагъди туву хъугъувализ дилигну, фурс ктарди гъузай. ⁴ Ихъ беден гизаф паярикан вушра, вари паяри саб ляхин апIурадар. ⁵ Гъаци ухъура вари Месигъдихъди саб беден вуди, дидин паяр вухъя. ⁶ Аллагъди Чан ужувлантина гъарсариз чан



хусуси багъиш гъурубкунхъуз. Шлиз пайгъамбарвалин багъиш аш, гъит дугъу думу, чан хъугъувализ дилигну, ишлетмиш апIри.⁷ Шлиз жарадарин гъуллугънаш шлу багъиш аш, гъит учв гъадму гъуллугъназ бахш ишри. Шлиз мялимвалин багъиш аш, гъит учв мялимвализ бахш ишри.⁸ Шлиз ккарцуз шлу багъиш аш, гъит дугъу жарадар ккарцри. Шлиз жумартвалинди пай апIуз шлу багъиш аш, гъит дугъу гъаци, кIвакк ккадарди, пай апIри. Шлиз жарадарин зин ахювал апIуз шлу багъиш аш, гъит ахювал апIри вари юкIв хыпну ва намуслуди. Шлиз уж'вал апIуз шлу багъиш аш, гъит думу шадвалинди апIри.

⁹ Гъит, ичв масанвал кIваантIан вуйиб ишри. Писвал ккун ма-
пIанай, ужувлархъ хъачIарккай. ¹⁰ Чвийрси чиб-чпи ккун апIинай.
¹¹ ТIагъру дарди, юкIв хъади лихури, рюгъ гьевеслуди Агъайн
гъуллугънаш йихъай. ¹² Умудвалиш шадди, бедбаhtваларий сабур-
луди, ккарагбариш мюгъкамди гъузай. ¹³ Аллагъдин адмиириз
читинваларий кюмек апIинай. Хялар къабул апIури гъузай.

¹⁴ Учвухъ хъергнайдариш ужувлар ккун апIинай. Ужувлар ккун
апIинай, люкънар – ваъ. ¹⁵ Шадлударихъди шад йихъай. Ишура-
йидарихъди ишай. ¹⁶ Чиб-чпихъди албагну яшамиш йихъай. Фурс
мукубчIанай. Аъжузарихъди дуствал апIуз нач мапIанай. Жуву-
кан заанди фикир мапIанай.

¹⁷ Писвализ писвалинди жаваб мутуванай. Варидариз уж'вал
апIури гъузай. ¹⁸ Учвхълан шлубкъан варидашихъди мясляйтни-
нди яшамиш йихъай. ¹⁹ Аъзиз дусттар, хъял алдабгъбаҳъ махъа-
най, хъял алдабгъуб Аллагъдин ихтиярнаш гъибтай. Фицики Ги-
рами китабарий дибикIна:

«Хъял алдабгъувал Йиз ляхин ву.
Узу жаза тувдиза» – кIура Агъайи.

²⁰ Гъамдин ерина,
«эгер яв душмандиз гашди аш,
уъл тув дугъаз.
Эгер думу дахаргну аш,
шид тув.
Эгер уву гъамци апIури гъашиш,
думу нач'валиан йикIиди».

²¹ Писвал ув'ин гъалиб хъуз мигъитан, думу уж'вали ккапI.



Месигъдин терефкрап гьюокмихъ хъябяхъну ккунду

13 ¹Гъарсар заан гьюокмиз мютЮгъ духьну ккунду, фицики Аллагъдихъан дару гьюокум адар; гъаму ражари айи гьюокумра Аллагъди дебккнайиб ву. ²Гъаддиз, фуж гьюокмиз къаршуди гъудужвураш, гъадму Аллагъди дебккнайибдиз къаршу гъедергурайи гъисаб ву. Гъаци апIрудари чпиона тахсир хура. ³Уж'вал апIрудариз гьюокумдрихъан гучI адар, хъа – писвал апIрудариз. Эгер гьюокумдрихъан увуз гучI апIуз ккундарш, уж'вал апIури гъуз ва дуарин терефнаан яв тяриф ебхьидивуз. ⁴Гьюокумдар увуз уж'вал хъпан бадали лихурайи Аллагъдин лукI ву. Хъа эгер уву писвал апIуруш, гучI апIин, фицики увуз жаза гъадабтIуб гъадгъан гьюокмиъ гъавайиди айиб адар. Писвал апIруриз жаза адабтIури, Аллагъдин хъял алдабгъури, дугъу Аллагъдиз гъуллугъ апIура. ⁵Гъаци вуйиган, дугъаз мютЮгъ духьну ккунду, неинки хъпебехъиш, жаза адабтIур кIури, хъа – жувван намус бадалира.

⁶ Гъаци вуйивализ дилигну, учву налогарра тувай; гьюокумдари, Аллагъдин гъуллугъчири, чпин вари вахт гьюокум гъабх-бииинди гъапIра. ⁷Гъардиз лайикъ вуйиб тувай: шлиз – налогар, шлиз – харжар, шлиз – гучI, шлиз – гьюормат.

⁸ Саризра буржлуди мугъузанай; гъит, учвук анжагъ саб бурж-Тан дарибшри, думура – чиб-чпихъна улупру масанвалин бурж, фицики, шли чан багахъ хъайир ккун гъапIиш, гъадгъу Къанун тамам апIура. ⁹Табшуругъариз лигай: «къяппавал мапIан», «милликIан», «мигъитIибкIан», «жаараринуб ккун мапIан», ва жара табшуругъарияр улупурайиб саб ву: «Багахъ хъайир, жувваз жувви, ккун апIин». ¹⁰ Масанвали багахъ хъайириз писвал хурдар. Гъаддиз масанвал Къанун тамам гъапIу гъисаб ву.

¹¹ Гъаму вахт фициб вуш, аygъяди, гъаци апIури гъузай. Сарун учву нивкI'ан хъиргру вахт дуфна, фицики ухьу урхру вахт, ихъ сифте хъугъу йигъак гъилигган, гъамус багахъ дубхъна. ¹² Йишв ккудубкIура. Йигъ сарун багахъ хъа. Мици вуйиган, вари мучIу ляхнарихъан ярхла хъидихъа, ва аквназ лайикъ вуйибдихъди яракъламиш хъидихъа. ¹³ Гъачай, йигъандин аквназ бара-бар вуйиси, намуслуди яшамиш шулхъа. Пиянискаваларикк ва сатIи къяппаваларикк кIул ккивдархъа. Айиб апIруб ва гъясузуб



апИидархъа, гьюжатар апИидархъа ва сар-сариин баҳил хьидархъа. ¹⁴ Ихъ Агъа Иса Месигъди учву уърхичву, ичв бедендин гъайгъушин тямягъяриз миилтИбкIанай.

Жарадар тахсир мапIанай

14 ¹Цибди хъугъувал айир ичв арайиз къабул апIанай. Дүгъанна ичв фикрап сабсдар дар кIури, дугъахъди гьюжатар мапIанай. ²Сариз фунуб вушра хураг ипIуз ихтияр хъугъували туру, хъа тмунури, хъугъувал цИб айири, бистнин мейвийиртIан итIурдар. ³Вари ипIур, мейвийиртIан диритIурихиинди фурс кади милиган. Ва мейвийиртIан диритIуриира вари ипIурайир тахсирнакк ккальну ккундар, фицики Аллагъди думу къабул апIура. ⁴Уву фуж вува, жаарин лукIрак тахсир кипуз?! Аңжагъ чан эйсийин улихътIан лукI гъякъ, ясана нягъякъ шлуб дар. Агъайнин лукI гъякъ хьиди, фицики Агъайиз думу гъякъ апIуз гъюкум а.

⁵Сари, саб йигътIан, тму йигъ важиблу ву кIура, хъа жарари, вари йигъар сабстар ву кIура. Гъарсари, гъит, чав фици гъисаб апIураш, гъаци апIри. ⁶Сари йигъарикан сад йигъ, имбу йигъартIан багъа ву кIураш, дугъу гъаци Агъайнин гъюрматназ апIура, ва фунуб-вш саб хураг ипIуриира Агъа бадали гъаци апIура, гъаз гъапиш, Аллагъдиз чухсагъул кIура. Ва фунуб-вш саб хураг диритIуриира Агъайнин гъюрматназ гъаци апIура, гъаци дугъура Агъайиз чухсагъул кIура. ⁷Гъаз гъапиш ухъкан саркъан чав-чаинди яшамиш шуладар, ва чав-чаинди йикIурадар. ⁸Гъаци вуйиган, эгер ухъу яшамиш шулаш, Агъа бадали яшамиш шулахъа, эгер йихураш, гъацира Агъа бадали йихурахъу, ва аъхир, яшамиш шулайидар вушра, дийихнайдар вушра, Агъайниндар вухъа.

⁹ Гъамдин бадали Месигъ гъакIну ва Чиви гъахъну – Дугъкан чивидаринра, гъачIидаринра Агъа гъахъну.

¹⁰ Хъа уву гъаз яв гъардаш тахсир апIурава? Яв гъардаштIан, уву фит'инди артухъ вуза, кIурава? Ухъу вари Аллагъдин суддин улихъ дугъужвидихъа.

¹¹ Гирами китабариъ дибикIна:

«Гъарсари Йиз улихъ кIул ис апIиди,
ва гъарсари, Узу Аллагъ ву, пиди.



Узу яшамиш шулайивал фици гъякъ вуш,
гъаму вари тамам шлубра гъякъ ву — кIура Агъайи».

¹² Ва гъаддиз ухъкан гъарсари Аллагъдин улихъ, чав гъапIу ляхнариз дилигнуну, жаваб тувди.

Жарадарихъди гунагъ апIрубси мапIанай

¹³ Чиб-чпик тахсрар кирчувал дипурхъа, жувуван гъардшиз гъалатIарий ва гунгъариъ ахъуз ухъу багъна тутрувиш, ужу хъиди.

¹⁴ Узуз альгъязуз, ва дугъридан саб шак адарди Иса Месигъдин гъюкмиинди кIураза: марцциб даруб фукIара адар. Анжагъ марцциб дар кIуруриз думу марцциб дар. ¹⁵ Хъа эгер уву ипIруб яв гъардшиз къабул шуладарш, яв ляхнариз масанвал адар. Яв хураг бадали гъардаш пуч мапIан, Месигъ гъадгъухъандира гъакIину. ¹⁶ Уву ужуб вуди гъисаб апIурайиб имбудари, писуб ву, пуз багъна мутуван. ¹⁷ Фицики Аллагъдин Паччагълугъ ипIруб, я уххъруб дар, думу Гирами Рюгъну багъиш апIурайи дугъривал, ислягъвал ва шадвал ву. ¹⁸ Месигъдиз гъамци гъуллугъ апIурайири Аллагъдиз ккуниб апIура, ва адмийиризра къабул шула.

¹⁹ Гъачай, мясяльт шлу ва чиб-чпиз кюмек шлу гъарсабдихъна илтIикIурхъа. ²⁰ Аллагъдин ляхнар ипIубдин кIуллан чIур мапIан. Гъарсаб хураг ипIуз шул. Хъа яв гъардаш гунагънахъна хру хураг ипIуб дюз дар. ²¹ Ийкк дирипIуб ва чяхир дурухуб ва фукIа гъациб дарапIуб ужу ву, эгер дурари яв гъардаш гунгъарихъна гъахуруш.

²² Уву хъугънайи яв ляхнар жувувахъди гъит; гъит, дурарикан анжагъ АллагъдизтIан альгъяди дарибши. Чав гъякъ вуйиз кIуруб апIурайиган, учв тахсиркарди гъидригъру кас бахтавар ву.

²³ Хъа шли, фукIа-мукIа ипIуз ужуб вая писуб кIури, шаклуди, ипIури гъашиш, дицир Аллагъди тахсиркар апIиди. Хъа хъугъвал адарди апIурайиб вари гунагъ ву.

Ижми хъугъувал айидар

15 ¹ Ухъу, ижми рюгъ айидари, зяиф рюгъ айидарин гъалатIар сабурлуди альгъ дапIину ккунду, хъа жувуваз ккуниб дапIину ккундар. ² Ухъкан гъарсари багахъ хъайириз, дугъан рюгъ мюгъкам шлуб, дугъаз хайир кайиб дапIину ккунду. ³ Гъеле Месигъдира Чан хайирназ фукIа гъапIундар. Хъа Гирами китабариъ дупна:



«Уву беябур апIрударин люкънар Уз'ин алахънийи».

⁴ Гирами китабариъ дикилайт вары, диди туврайи сабур-
лувалин ва ккарцрувалин кюмекниинди ихъ умуд ктадабтIбан
бадали, ухъуз насыгъят вуди, дикилайт ву. ⁵⁻⁶ Гъйт сабурлувал
ва ккарцрувал туврайи Аллагъди, Иса Месигъ мисал вуди Гъад-
гъахъди гъяри, ухъуз сатIиди, саб гъарайниинди Аллагъдин, ихъ
Агъа Иса Месигъдин Адашдин тяриф апIруси, ичв мясяльтнаъ
яшайиш туври. ⁷ Гъаци вуйиган, Месигъди учву фици къабул
гъапIнуш, учвуря, Аллагъдин ад бадали, гъаци сари-сар къабул
апIинай. ⁸ Месигъ суннат гъапIдарин гъуллугънаъ Аллагъдин
гъякъвал дурагиз улупуз, Аллагъди дурагин абириин абирииз
тувнайи гаф гъякъ вуйивал улупуз ади гъахъну. ⁹ Гъадмуган жара
халкъарира Аллагъди чипиз гъапIу ужувлантана Дугъян ад апIи-
ди. Гирами китабариъ дупнайиси:

«Гъаци вуйиган, узу Уву
Аллагъ айгъдру халкъарин арайиль
адлу апIидизаву
ва Яв ччвурназ
тярифнан мяълийир апIидиза».

¹⁰ Ва хъана:

«Аллагъдин халкъдихъди сабси
Шадвалин гъарай ипай, Аллагъ айгъдру халкъар!»

¹¹ Гъамцира дупна:

«Агъа адлу апIинай, Аллагъ айгъдру вары халкъар!
Гъйт вары миллетари
мяълийириинди
Дугъян тярифар апIри!»

¹² Ишайириа къура:

«Ессей тухмиан таза кюл ачмиш хъибди.
Дугъу миллетариин гъюкум гъабхиidi,
ва Аллагъ айгъдру халкъари Гъадгъак чипин
миж кивди».

¹³ Гъйт, умуд тувру Аллагъди учву ичв хъугъувалилантана, Ги-
рами Рюгънан къувватниинди ичв умуд артухъ хъпан бадали,
шадвали ва мясяльтну ацIричву.



Павелин кагъзикан ва ляхнарикан

¹⁴ Йиз гъардшар, учву ужувлу ацІнайиб, учвуз гизафубидкан аягъю гъабхъиб ва сар-сариз учвхъан насиғъятар тувуз шлуб якъинди аягъязуз. ¹⁵ Хъа Аллагъди узуз багъиш тувнайиган, узу учвуз лап кІубанвал кади, сакьюдар ляхнарикан учвуз кІваин алауз ккунди гъибикІунзачвуз. ¹⁶ Йиз вакилвалин бурж вуди, Аллагъди жара миллетариз, Иса Месигъдин гаф ва Ужувлан хабар рабгъру багъиш тувназуз. Гъамци дураг Дугъяз, Гираами Рюгъни-инди марцц духьну, Аллагъдиз ккуниси гъурбан хъиди.

¹⁷ Иса Месигъдихъ хъади, узура йиз Аллагъ бадали апІурайи ляхнариин фурслу вуза. ¹⁸⁻¹⁹ Узлантина Аллагъ аягъдру халкъар гаф-нииндина ляхниинди Аллагъдиз мютІюгъ апІбан бадали, аյжа-йиб лишнарииндина айламатариинди ва Аллагъдин Рюгънан къудратниинди Месигъди гъапІубдикантІан пидарза. Магъа гъам-ци, Ерусалим ва дидин гъирагъарихъан тап Иллирик улкейихъ-накъян Месигъдикан Ужувлан хабар деебтунза. ²⁰ Узу Месигъдин ччвур аягъдру иишвариъ, жарари шибритI ккиву иишв'ин хал дидривди, Ужувлан хабар рабгъуз чалишмиш гъахъунза. ²¹ Гира-ми китабариъ дупна:

«Дугъкан дуннадрудариз
Думу рякъиди,
хъа деебхънадрудар гъавриъ ахъди».

Павелиз Римдиз гъягъоз ккунди а

²² Узу учвухъна гъюз гизаф ражари гъязур гъахъунза, хъа гъам-цидар алахъиган гъюз гъабхъундарзухъан.

²³ УхдитІан узуз учвухъна гъюз ккунди айзуз. Хъа гъамус узу му вари юрдариль дилихну ккудубкІунза. ²⁴ Испанияйиз гъягъ-рур, учв'ин улукъидиза. Улукъиган, учвухъди, юкІв хъади, цИбиди сюгъбатар апІбалан къяляхъ, учву узу дина гъаърувалик миж кайиз. ²⁵ Гъамус узу Ерусалимдиз душваш аий Аллагъдин адмийи-рин гъуллугънаш хъуз гъягъораза. ²⁶ Фицики Македония ва Ахая улкiiриин хъугърудари Ерусалимдиз касибди аий Аллагъдин адмийириз, пул уч дапІну, кюмек апІуз къаст гъапІний. ²⁷ Ду-рари дици апІуб ужу гъапІну, хъа Ерусалимдиз айидариз дураг буржлу вуйи. Жугъдариҳъди сабси дурагизра рюгънан ужувлар



гъахъну. Дурари жугъдари из бедендин ужувларикан пай гъапІну ккунду. ²⁸ Узу гъаму месэла гъял гъапІиган ва чиз хътапІу варипул дуарихъна гъурубкыиган, Испанияийиз рякъюъ учІвдиза ва рякъюъ учв'инра улуркыидиза. ²⁹ Узуз альгъязуз, узу учвухъна гъа-фиган, Месигъди тууву ужувлар гъуркІну хидизачвуз.

³⁰ Учвкан, ихъ Агъя Иса Месигъ бадали, Гирами Рюгънан ма-санвал бадали, миннат апІураза, гъардшар, узу бадали Аллагъдиз узухъди учвура юкІв абцІну ккарагай. ³¹ Ягъудия юрдана хътргъ-рударин хиларигъ узу гъядряхъбан бадали, Ерусалимдиз Аллагъдин адмийири уз'ин илипнай ляхин къабул апІбан бадали, ³² эгер Ал-лагъдин ният гъабшиш, учвухъна шадвалинди гъюбан бадали ва учвухъди рягъятвал гъадабгъбан бадали, ккарагай. ³³ Гъит, ислягъ-валин булагъ – Аллагъ учвухъди варидахъди ишри. Амин.

Таниши вуйидариз саламар

16 ¹ Узуз учвуз Фибия кІуру ихъ чи альгъяди ккундузуз. Думу Кенхрийиль айи хъугърударин жямаятдин гъулугъчи ву. ² Ккун апІураза учвкан, Агъайнин гъюматназ дилигну, думу Ал-лагъдин адмийириз лайикъ вуйиси къабул апІнай, дугъаз гъуд-рубкІру варибдиз кюмек апІнай, фицики дугъу чав, гъеле узуз-ра кмиди, гизафдариз кюмекар гъапІну.

³ Узухъди сатИди Иса Месигъдин гъулугъналь гъахъи ва шулайи Прискилайиз ва Акилайиз узхъан саламар йипай. ⁴ Дурари узу бадали чин жанар гъайиф гъапІундайи. Неинки сар узу, хъа гъацира жара миллетарин хъугъру жямаятарира дуариз чухсагъул кІура.

⁵ Дурарин хулац уч шлу хъугърударизра саламар йипай.

Узуз масанди вуйи, Азияйиль сарпирди Месигъдихъ хъугъу Эпенетдиз саламар йипай.

⁶ Учву бадали гизаф гъилиху Мар'ямдизра саламар йипай. ⁷ Йиз багахълуйир вуйи, узухъди дустагъдиз гъахъи ва марцци вакиларин арайиль ад айи Андроникдизна Юнийиз – саламар. Дурар узутІан ухди Месигъдихъ хъугъну. ⁸ Агъайихъ хъугънайи йиз ккуни дуст Амплиатдиз – саламар. ⁹ Саламар йипай Месигъдиз гъулугъналь иштирак гъаши ихъ гъардаш Урбандиз ва йиз ккуни дуст Стахисдиз. ¹⁰ Месигъдихъ хъугъвалий ижмивал улупу Апелесдиз – саламар. Ариставулин хуландариз варидализ саламар йипай. ¹¹ Йиз багахълу Иродиандиз – саламар. Агъайнин терефкар



вуйи Наркиссайин хуландариз варидализ саламар йипай. ¹² Агъайн ад бадали юкІв хъипну лихурайи чийр Трифенайизна Трифосайиз – саламар. Агъа бадали гизаф жафа гъизигу йиз ккуни чи Персидайиз саламар йипай. ¹³ Саламар йипай Агъа бадали ка-дагънайи чве Руфдиз ва узузра дада гъахы дугъан дадайиз.

¹⁴ Анискритдиз, Гермасдиз ва дураихъди хъайи гъардшариз – саламар. ¹⁵ Саламар йипай Филологдиз, Юлияйиз, Нерейдизна дугъан чуччуз, Олимпасдиз ва дураихъди хъайи вари Аллагъдин адмийириз. ¹⁶ Гирами мак дапІну, чиб-чпиз салам туври гъзай. Месигъдин вари жямаятари учвуз саламар хътаура.

¹⁷ Учвкан миннат апІураза, гъардшар, учвуз улупу аygъювалариз къаршу удучІвури, гъюжатар апІрударихъян ва машат апІрударихъян ярхлади гъузай. ¹⁸ Гъаци апІру касар ихъ Агъа Месигъдин гъуллугъналь айидар дар, хъа чпин тямягъяр гъуркІбаҳъ хъайидар ву. Дураги чпин уччуу улхбарииндина тярифариинди бицІи юкІвар айи касар алдатмиш апІура. ¹⁹ Ичв мютІюгъваликан варидализ деебхъна. Узу учв'ин гизаф шад вуз. Учвуз ужуబ аygъяди ва гъарсаб чурувалихъян учву ярхлади ккундузуз. ²⁰ Мясяляйт туврайи Аллагъди багарихъди иблис дармадагъин апІиди ва думу ичв ликариккиндигатІабхъиди. Гъит, учвуз Агъа Исаин уж'вал ибшри. ²¹ Узухъди лихурайи Тимофеи учвуз саламар хътаура, хъа дугъахъди – Луцийи, Ясонди ва Сосипатри, йиз багахълуири.

²² Узура, Павелин гъаму кагъаз бикІурайи Тертииира, вари Агъайихъ хъугърайидариз саламар хътаураза.

²³ Чан хулаь узу ва вари хъугънайи жямаят къабул дапІнайи Гай кІуру касдира учвуз саламар хътаура. Гъацира шагърин пул хлий айи Ераст кІурури ва ихъ гъардаш Квартди саламар хътаура. [²⁴]*

²⁵ Узу учвуз дебкку Ужувлан хабарналь ичв хъугъувал мюгъкам апІру Аллагъдин ад ибшри! Гизаф аysрапиъ дюбхнайи ²⁶ сир, гъамус гъамшишандин Аллагъдин амриинди пайгъамбрарин китабариланмина, халкъар Дугъахъ хъугъбан ва хъпехъбан бадали, дурагиз ачмиш гъапІну. ²⁷ Аysрапиан аysрапиз Иса Месигъдилантина Айкъюл хурайи сар вуйи Аллагъдин ад ибшри! Амин.

* ^{16:24} Саспи грекарин БикІбариъ гъамци дибикІна: «Гъит, учвуз варидализ ихъ Агъа Иса Месигъдин ужувлар ишри. Амин».



КОРИНФДИЙ АЙИ ХЪУГЪРУДАРИЗ 1-ПИ КАГЪАЗ

*Му кагъазра Эфес шагърий Павелиинди Гирами Рюгънулан арайиз гъафиб ву. Павел, Ужувлан хабар рабгъури чан кьюбти сиягъятназ гъушган, грекарин Коринф шагърий Исаийхъ хъугърударин жямяйт арайиз гъюру. Исаийн вакил му шагъриан удучІвну гъушхъан, хъугърударин улихъ читин меселайир дугбужсуру. Гъадму меселайирин гъякынаан кагъаз дубрикIди гъибтуб гъич зат дюзюб дайи. Кагъзиб Исаийхъ хъугърудари, хътругърудари *апIурайистар лайикъсуз тIулар*, гъич фицикIа *данIну* ккундар кIура. Коринфдий гизафдарииз Павел Исаийн вакил вуди къабул *апIуз* ккунди адайи, гъаддиз месэла хъана читин гъялназ абхънайи. Агъайн хябахъдин уыл *ипIбан* мянайин дураг гъубкI-ну гъаврий ахънадайи *ва альюдарикан* фунуриз артухъди гъюрмат *данIну* ккундуш, гъаддин *кIуллан* гъюжатарииз айи. Исаийхъ хъугънайи сакъодар, *кIучIлин аллагъариз* гъурбан *данIнай* ийикк *ипIуруши-ипIдарш*, гъаддинра гъаврий адайи. Дураг, чин арайиз айи гъюжатар айдати судариш гъял *апIуз* шерик шуйи. Хъугърудар кьюб иишваз пай дархъбан бадали, Гирами Рюгъ, Павелин кагъзиинди гъадму меселайиз, хъугъувалин биналу суалариз лигуру *ва*, Иса мисалди улупури, Коринфдин хъугърударин альюваларий алахъру читинвалар гъял *апIуз* кюмек шулу. Месигъдин масанвал хъугърударин ара мюгъкам *апIру* алат дубхъну ккундин*



Саламар

1 ¹Иса Месигъдин вакил хъуз Аллагъди дих дапІнайи Павелихъан ва Сосфен гъардшихъан ²Коринфдій Аллагъдихъ варихъугърудариз, Иса Месигъдихъди саб вуйи гирами духьнайдариз, Дугъаз күури гирами халкъ хъуз дих дапІнайдариз, ихъ Агъа ва дуарин Агъа вуйи Иса Месигъдиз ккарагурайидариз саламар.

³Аллагъдихъан, Аyrшарин ихъ Адашдихъан ва Агъа Иса Месигъдихъан уж'вал ва мясяляйт ибшричвуз!

Павели Агъайн тяриф апІура

⁴Учвхъан узу йиз Аллагъдиз гъаммишан чухсагъул күураза, гъяз гъапиш Гъадгъу учвуз Иса Месигъдиланмина ужувлан багъишар тувначвуз. ⁵Гъадгъулантина учву варибдихъди – гаф-Чалнан ва аыгьюваларин вари хазнайихъди ацІунччу, ⁶фицики Месигъдикан вуйи ич шагыдвал учвуз мюгъкам гъабхыну. ⁷Сарун, ихъ Агъа Иса Месигъ гъайиз кклигиури гъузбарь, рюгънан багъишиары учвуз гъудрукІруб фукІа адарчвуз. ⁸Учву ахиризкъан, ихъ Агъа Иса Месигъдин Йигъан учву сабкъан тахсир ктарди хъпан бадали, Гъадгъу мюгъкам апІидичвуз. ⁹Чан Бай вуйи ихъ Агъа Иса Месигъдихъди саб хъуз ухъуз дих дапІнайи Аллагъхъувъвал Алир ву.

Хъугърударин жара хъувалар

¹⁰Ихъ Агъа Иса Месигъдин ччвурнахъан, гъардшар, учвуз миннат апІураза, чиб-чиҳихъди вари рази духьну гъузай. Гъит учву чиб-чиҳихъан жара даришли, фагъмар ва фикрары саб ишричву!

¹¹Йиз гъардшар, ичв гьюжатарикан Хлоийин хуландарикан деебхъназуз. ¹²Узу мушваь фтикан улхура? ГъацПари күурачва: «Узу Павелин тереф дубиснайир вуз», тмундари – «Узу – Аполлосдин», шубурвидари – «Узу – Кифдин», юкъурвидари – «Хъа узу – Месигъдин». ¹³Месигъ пай духьнайн дарш?! Вая учвхъанди хачрак карсур Павел гъахънийин?! Ясана учву Павелин ччвурнахъ штуан гъахъунчвахъя?! Вая! ¹⁴Кристна Гай ктарди, узу йиз хилариинди учвкан фужкІа штуан дарапІбаз Аллагъдиз чухсагъул күураза. ¹⁵Гъаддиз учвхъан сарихъанра, йиз ччвурнахъан



штуан гъахунча, пуз хыбдарчвухъан! ¹⁶ Ав, йиз хилариинди штуан дапІну цийи алаъдар Стефанна дугъан хуландар вуйиз, хъа сарун узу фужарсана цийи алаънуш, кІваин илмидариз ¹⁷ Месигъди узу, учву штуан апІуз кІури ваъ, хъа Ужувлан хабар дебккуз гъальнайир вуза. Думу Хабар узу аымалдар гафарииинди дебккну ккундар, вуйиш, Месигъдин, ккадауз кІури, хачрак гъабхъи аյжалнан метлеб дубгдий.

Аллагъдин заанвал, аяндарвал ва къувват – Месигъ ву

¹⁸ Пуч хъуз ккайдари, Месигъдин, ккадауз кІури, хачрак гъабхъи айжаликан гаф ахмакъвал ву кІура, хъа ухъуз, Аллагъди урхрудариз, думу Аллагъдин къувват ву. ¹⁹ Гирами китабарий дикІнаки:

«Узу, аяндар вучу кІурайидарин аяндарвал
фукІа дарувал апІидиза ва
фикирлуийр вучу кІурайидарин фикирлувал
тина гъадапІидиза».

²⁰ Наши аяндар? Наши Къанундин айлим? Наши гъаму айсрарин дирбаш гьюжаткар? Аллагъди гъаму дюн'яйин вари аяндарвал, дугъридан ахмакъвал ву, кІури, улупнадарин дарш? ²¹ Аллагъдин зурба фагъми дебкканси, гъаму дюн'яйин фагъмихъан Аллагъ айгъю апІуз дархыган, Хабарну дебкрайи «ахмакъвалихъ» хъугъдар урхюз Аллагъдиз ккун гъабхъну. ²² Жугъдари айламатар ккун апІура, Аллагъдикан айгърудари фагъум абгурा, ²³ хъа учу, хачрак карсу Месигъдикан хабар рабгъурача. Жугъдарииз му хъарсну алдакру гъван ву, хъа имбу халкъаиз – фагъумсувал ву. ²⁴ Хъа, Аллагъди дих дапІнайидариз, жугъдариизра, грекариизра, Месигъ – Аллагъдин фагъум ва къувват ву! ²⁵ Фицики, Аллагъдин «ахмакъвал» инсандин фагъумтІан зина ву ва Аллагъдин «зияифвал» инсандин къувваттІан къудратлу ву!

²⁶ Гъардшар, Аллагъди учвуз дих апІайиз учву фицдар вуйиш, учвуз лигай. Эгер адмийи гъисаб апІурайиси гъадабгъиш, учвкан гизафдар фагъумлуийр, къувватлуийр, бина маштүр касар вуинхъя? ²⁷ Хъа Аллагъди, фагъумлуийз нач хъузди, гъаму дюн'яйи ахмакъди гъисаб апІруб ктабгъну, ва къувватлуб начан шлуси, гъаму дюн'яйи зияифди гъисаб апІруб ктабгъну. ²⁸ Дугъу, гъаму дюн'яйи зина вуди гъисаб дапІнайиб батІил апІбан бадали,



саб кымат адруб, асккан дапІнайиб ва ул'ан идиңнайиб ктабгъ-
ну. ²⁹ Гъаддиз сарун сарихъанра Дугъан улихъ чан тяриф апІуз
хыибдар.

³⁰ Гъадгъан кюмекниинди учву Иса Месигъдик кидикъначва.
Гъадму Иса ухъуз Аллагъдин фагъум, ихъ гъякъвал, ихъ гира-
мивал ва ккадаувал вухъуз! ³¹ Гъаци вуйиган, Гирами китабариъ
кIурайиси:

«Тяриф апІуз ккунири Агъайн тяриф апІри!»

Хачрак карсы Месигъдикан

2 ¹Узу учвухъна, гъардшар, Аллагъдин сирнакан ктибтуз гъа-
фиган, узу йиз уччвудар гафар, ясана йиз фагъумлуval улупуз
гъафир дайза. ²Учвухъди хъайиган, узуз аьгъюр сар Иса Месигъ
вуйзуз, Думура — хачрак карсур. Дугълан гъайри, сарун фукIа
аьгъю дарапІуз гъял гъапIунза. ³Узу учвухъна, гучI кади, гукIун-
ди ва аьжузди гъафнийза. ⁴Узу туврайи хабарнаъ ва йиз улх-
бариъ инсандин фагъмин эсер апIру гафар адайиз, хъа диidiy
Рюгънан къувват ачмиш хъувал рябкьюи. ⁵Мици узу, ичв хъу-
гъувал, адмийин фикринуб варь, хъа Аллагъдин къувватнануб
хъпан бадали, улхури гъахъунза.

Аллагъдин фагъум

⁶Фагъикан учу гъуркIу адмийириз ктибурача. Учу, гъаму
дюн'яйин фагъум, ясана му дюн'яйин гюкумдари туврайи ух-
ди-къанди фукIа дарубдиз илтIикIру фагъум, туврадарча. ⁷Варь,
учу Аллагъди гъамусдиз жиниди уьбхюрайи сирнан фагъикан
кIурача. Думу фагъум, ухъу адлу апІуз кIури, дюн'я халкъ апIа-
йиз айи Аллагъдин ният вуйи. ⁸Думу фагъум гъаму дюн'яйин
гюкум хилиъ айдарихъан аьгъю апІуз гъабхъундар, гъабхъни-
иши, дурари хачрак аднан Агъа карсидайи. ⁹Аммаки Гирами ки-
табариъ дупнайиси гъабхъну:

«Аллагъди Чав ккунидариz гъязур дапІнайиб
я инсандин улариз гъябкьюндар,
я ибариz гъебхъундар,
я фагъимиз гъафундар».

¹⁰Хъа Аллагъди думу ухъуз Чан Рюгънан кюмекниинди ачмиш
гъапIунхъуз, фицики Рюгъназ вариб аьгъя. Рюгъназ Аллагъдин



вари фагъмин деринарра айгъя. ¹¹ Шлихъан чай яшамиш шулайи чан хусуси рюгъналан гъайри чан кІван ниятар айгъю апІуз шулу? Гъаци, Аллагъдин ниятарра Чан Рюгъналан гъайри гыч са-ризра айгъдар. ¹² Ухъуз му дюн'яйин рюгъ дурубкънадархъуз, хъа Аллагъди ухъуз багъиш дапІнайи варибдин гъаврий ахъуз, Чахъан Рюгъ дурукънахъуз. ¹³ Мидкан учу, инсандин фагъмиинди ваъ, хъа Рюгъну улупу гафариинди кІурача. Рюгъниинди вуйи гъякъярин гъаврий, учуз Рюгъну улупну, тІаърача. ¹⁴ Аллагъдин Рюгънахъан гъюрайиб рюгъ айгъдру адмийихъан къабул апІуз шулдар. Дугъу думу ахмакъ'валси гъисаб апІуру, ва дидин гъаврий ахъуз шулдар, фицики му ляхнар рюгъ кІава ади апІрудар ву. ¹⁵ Рюгъ кІава айи касдиз варибдиз кымат тувуз айгъя, хъа ад-руиз – рюгъ айириз кымат тувуз айгъдар, ¹⁶ гъяз гъалиш:

«Агъа Аллагъдиз насигъят тувуз Дугъан гъаврий айир фуж ву?»

Хъа ухъуз Месигъдин фагъум ахъуз.

Адмийирихъ хътIерцуб гунагъ ву

3 ¹ Гъардшар, узхъан учвухъди рюгъ айи адмийирихъдиси улхуз гъабхъундарзухъан, хъа му дюн'яйин адмийирихъдиси ва Месигъдихъ хъугъну имбу бицIи нинирихъдиси гъулхунза. ² Узу учвуз «никк» туври гъахъунза, хъа ахъудариз вуйи «хураг» туври гъахъундарзачвуз, тувнийишра, учвхъан гъял апІуз хъибдайчвухъан ва гъамусра шулайиси адар. ³ Учву сабан му дюн'яйин адмийирди имичва. Ичв арайиб бахилвална гъярхъувалар имбу-къан гагъди, учву му дюн'яйин адмийирди гъуздичва ва ичв ха-сияттра айдати адмийиринсиб вуйичв. ⁴ «Узу Павелин терефкар вуза», ясана: «Узу Аполлосдинур вуза» кІуруган, му дюн'яйин адмийирстар дарнучвахъа?

⁵ Я кас, Аполлос фуж ву? Хъа – Павел? Гъадрарилантина учву Месигъдихъ хъугъу гъуллугъчийртIан дар дуар. Ва учуз гъар-сариз Агъайи саб ляхин улупунчуз. ⁶ Узу кивунза, Аполлосди хъубзну, ахъю гъапIур Аллагъ ву! ⁷ Гъаддиз, фужкIара гъисабнаъ адар: я кивур, я хъубзур, хъа анжагъ – арайиз адабгъу Аллагъ! ⁸ Кивуринна хъубзурин айиб саб метлеб ву, ва гъардиз чан пай ляхнинуб рубкъиди. ⁹ Учу Аллагъдин гъуллугъналь айидар вуча, хъа учву – Дугъан хутIил, Дугъан диврайи дарамат вучва.



¹⁰ Узу, Аллагъди узуз тувнайи ужувланинди, фагъумлу устайиси, шибрит^I ккивур вуза, хъя жараги душв'ин хулар дивра. Аммаки гъарсар, чав фици дивраш, дикъатниинди лигри. ¹¹ Сарихъанра, ккивнайбидилан гъайри, жара шибрит^I ккивуз шлуб дар, ари гъадму шибрит^I — Иса Месигъ ву. ¹² Гъаму шибрит^Iин адмийи-хъан гъизиликан, арсракан, багъя гъвандикан, гак^Iвликан, гъе-ебщу ук^Iкан вая нахъвракан хулар дивуз шулу. ¹³ Хъя шли фици дивнуш, улупру Йигъан вари цииинди ахтармиш ап^Iди ва гъарсарин ляхниз ци кымат тувди. ¹⁴ Шлиндар цИхъан ургуз дархъиш, гъадгъяз чан пешкеш хъиби, ¹⁵ хъя гъургиш — зарал. Аммаки думу учв, цИгъян гужназ гъядягъю касси, дюрхну хъиди.

¹⁶ Сат^Iлан учву — Аллагъдин хал вуйиб ва учву Аллагъдин Рюгъ яшамиш шулайиб аygъданчвуз дарш? ¹⁷ Аллагъдин хал дабгъур Аллагъди даргъиди. Гъаз гъапиш, Аллагъдин хал гира-миш ари гъадму Хал — учву вучва.

¹⁸ Учву учвуз куч^Iлар ап^Iруси дарибши. Эгер учвакан шлиз учв, гъаму дюн'яйи гъисаб ап^Iурайиси, фагъумлу касси гъугъу-жвурас, дицир, учв дугъридан фагъумлу хъузди, «ахмакъ» духь-ну ккунду. ¹⁹ Фицики, гъаму дюн'яйин фагъумлевал Аллагъдин улихъ ахмакъвал ву. Дибик^Iна:

«Дугъу фагъумлуйир
чпин кью-кьюб маш гъайивалихъди дисура».

²⁰ Ва хъана:

«Фагъумлуйин фикрап — гъавайдар вуйиб
Агъайиз аygъя».

²¹ Гъаддиз адмийиинди тярифар мап^Iанай. Вариб — ичвуб ву: ²² Павелра, Аполлосра, Кифра, гъаму дюн'яра, уьмурра вая айжал-ра, гъамустинубра вая гъюз ккимбубра — вари ичвдар ву, ²³ хъя учву Месигъдиндар вучва, Месигъ — Аллагъдин.

Месигъдин вакилар

4 ¹ Гъаци вуйиган, Аллагъдин сир уч'ина ихтибарлу дап^Iнайи Месигъдин гъуллугъчийрси учу гъисаб ап^Iнай. ² Гъамциб хъугъвал илипнайидар аygътлу духыну ккунду. ³ Учву вая сар жа-раги узкан фици кIураш, саб жюрейинна вижна ктарзуз. Узхъан узканкъан фук^Iла гъациб пуз шулдарзухъан. ⁴ Йиз намус марцциди



вуйиз, вушра, му, узук тахсир ктар, кIуру гаф дар. Йиз судья – Агъа вуйиз.⁵ Гъаддиз, Агъа хъадакну гъюру ваҳт шайизра, улихь-миди тахсрар агури мюхьюгъяни. Дугъу вари жиниб ачухъ апIиди, инсанарин юкIвари гыйтибIнайиб арайиз адабгъиди ва гъадмуган Дугъу гъардин тяриф апIиди.

⁶Узу мици, гъардшар, узканна Аполлосдикан учвуз уж'вал бадали кIураза. Учу мисал духъну, учхъан, артухъуб жувукан ктадабгъиди, дибиқIнайиб дубгъай, имбуунтуртIан артухъ за апIури, сар шлиинди-вш фурс мапIанай.

⁷ИмбудартIан артухъ за шли апIураву? Аллагъидихъан даруб фу авуз? Увуз вари пешкеш дапIнайиган, увуз тутрувганси яв тяри-фар гъаз апIурава?

⁸Сарун учуз вари ачуз, девлетлу вуча, учу хътарди паччгъар

гъахъунча кIури, фикир апIурайчва! Ай аман, узуз ккундайин-хъа учву ахювал апIури, учура учвухъди ахювал апIурахъи-дийча!⁹Хъа йиз фикриан, Аллагъиди учу, Месигъдин вакилар, аյжал тувуз жаза гъадабIнайи адмийири, варидаrin къяляхъ дерккна. Вари дюн'яйиз, малайикариз ва адмийириз учкан та-машачиир духъна. ¹⁰Месигъ бадали абдлар духъначу, хъа Месигъдихъ хъугърударин арайиб учву – фагъумлуйир! Учу – зяиф, хъа учву – къувватлу! Учу – адлу апIура, хъа учу – беябур!

¹¹Гъийин йигъазкъан учу гашлу ва мукърам вуча, гъяргъартIан алдарди лицурача, учу урччвuri шулу, ич хал-иишв адариch,

¹²учу ич хилариинди, унтIаз амкI идиупури, учуз уълин къацI гъазанмиш апIурача. Уч'ин агъ уълюбхору, хъа учу уж'вал ибш-

ричвуз кIурача, хъергру – агъ апIурача. ¹³Учкан варитIан пи-

субтIан кIури шулдар, хъа учу гъянивалиинди жаваб туври шул-ча. Гъийин йигъазкъан, му дюн'яйиз чIюрхярди, гъарсаб хъар-хъвасси, имичу.

¹⁴Му узу учвуз нач хъуз кIури бикIурайиб дариз, ваъ, хъа, йиз

ккуни веледарси, учву гъаврий ауз ккундузуз. ¹⁵Учвуз агъзрар-къан Месигъдин рякъюъди гъягъру мялимар ашра, хъа адшар са-

кьюдартIан адарчвуз. Иса Месигъдикан вуйи Ужувлан хабарнахъ учву хъугъган, узкан рюгъниинди вуйи ичв адаш гъахъну. ¹⁶Учв-

кан миннат вуйиз: узхъан мисал гъадабгъай! ¹⁷Гъаддиз багъя ва

гъапиб кIулиз адабгъру, Агъайихъ ихъ сатIлан вуйи хъугъувалий

айи йиз бай Тимофеей гъаразачвухъна. Узу хъугърударин арайиб



варишвариъ улупурайиси, узу йиз умриъ фици Месигъ Исаин рякъди гъягъюри шулуш, дугъу къваин апИдичвуз.

¹⁸ Сарун узу учвухъна гъидар къури, ичв арайиъ сакъюдари хъюхъ гъазабгну. ¹⁹ Хъа узу, эгер Агъайин амур гъабшиш, гъидиза, ва гъадмуган думу къул'ан удучІвнайидарин гафарин ваъ, хъа дурагин къувватнан къимат фициб вуш, алью хъибдизуз. ²⁰ Гъаз гъапиш Аллагъдин Паччагълугъ, гафнаъ ваъ, хъа къувватнаъ ачмиш шулайиб ву. ²¹ Учву кадабгъай: маргъ хъади гъюза, даршишсана — масанвална умунвал?

Хъугърударин арайиъ улдугнайивал

5 ¹Узуз ичв арайиъ Аллагъ аыгърударин арайиъкан даршлу къяппавал абхънайиваликан хабар деебхъназуз: ичвдари кан сар чан адашдин хпирихъди хъа къура. ²Хъа учвук фурсарра кучІвначвук! Мици хъайиз, гъамлу духъну, ичв арайиан гъациб гъапІур утІуккуб лайикъ дайнхъя? ³Узу бедендинди учву хътиштаршра, йиз рюгъниинди хъаза, ва, гъадму касдикан гъапІруш, гъамустІанра гъял гъапІунза: ⁴ихъ Агъа Исаин ччвур бадали учву уч гъахъиган, хъа узу учву хъди йиз рюгъниинди хъидиза ва ухъухъди ихъ Агъа Исаин къувват хъибди, ⁵учву думу адми иблисдин хилиз тувну ккунду, ва дугъан беден, Гъаргандин Агъа къяляхъ гъюру Йигъян дугъан рюгъкъан дюрхну хъузди, ийбіКри.

⁶ Учвуз фурс апІуб рубкъудар. Учвуз, дунин тикийи вари хъамир утуз гъитруб, аыгъдарди анчвуз?

⁷ Гъаци вуйиган, учву таза, дун ктру хъамир хъпан бадали, зат имдарди йирси дунихъан марцц йихъай. Учву гъаци духъну ккунду, фицики ихъ Пасха машквран ччил, Месигъ, сарун гъурбан гъапІну. ⁸ Гъаци вуйиган, гъачай, Пасха машквар, йирси дунин чIурувалииндина писвалиинди ваъ, хъа дун ктру марцци ва гъякъ уыл'инди тебрик апИдихъя.

⁹ Узу учвкан йиз гъубшу кагъзиль, улдугнайидарихъди гъич саб аылакъа дарибши къури, тIалаб гъапІнийза, ¹⁰аммаки узу, гъаму дюн'яйин адмийирикан — къяппирикан, тямягъкарикан, тIафларикан, идолариз икрам апIрударикан, гъапундайза. Дици вүйиш, учву му дюн'я дипбакк ккуркъдий! ¹¹Хъа узу, учв къяппа, тямягъкар, идолариз икрам апIур, футнакар, пияниска, кучІлях вуди, гъардаш вуза къури, лицурайирикан, къураза. Мицирихъди



саб суфрайихъ ипIузкъан мипIанай. ¹²⁻¹³ Хътругърударин суд апIуб йиз ляхин дариз – дурагин суд Аллагъди апIиди! Учву хъугърударин суд дапIну ккунду, фицики дикикIна: «Яв арайиан писур адаъ».

Хъугърударин арайиъ айи гъярхъбарикан

6 ¹Хъана, учвхъан, ичв гюжатар, Аллагъдин гирами халкъди гъял апIуз гыдритди, хътругъру адмийирин судди гъял апIри кIури, гъитуз фици шулчвухъан? ²Аллагъдин гирами халкъди дюн'яйин суд апIруб аьгъданчвуз дарш? Учв'ин вари дюн'яйин суд апIувал алабхърган, гъаму бицIи гъярхъбар гъял апIуз шуладанчвухъан дарш? ³Малайикаринна кмиди ухъу суд апIурахъа гъя. Дуланажагъдин аьдати ляхнаринкъан ухъхъан суд апIуз шулладарин? ⁴Гъамциб дююшназ ичв арайиан важибу дару касар ичв судийриди ктагъурачва. ⁵Нач дубхъну ккунду! Ичв арайиъ хъугърударин месэлайир гъял апIуз шлу саркъан аькьюоллу адми адарин? ⁶Хъа учву гъардши гъардшилан суддиз аьрза туврачва, ва хътругърудари ичв суд апIура! ⁷Учву беябур хъуз, чиб-чиплан суддиз аьрза тувувал чIяян ву! Гъаци апIайиз, жувв гъякъ вушра, асккан духьну гъузуб ужу даршулин? Жувувануб тувну гъузуб ужу даршулин? ⁸Хъа учву ичв гъардшар асккан апIурачва ва дурапинуб бисурачва.

⁹Учвуз чIур гъахъи касариз Аллагъдин Паччагълугъ ирсди дубрукъруваликан аьгъдарди анчвуз дарш? Лигай гъа, учву ичв учвуз кучIлар апIрубси дарибши! Къяппайириз, идолариз икрам апIрудариз, дугъри дару жиларизна хпариз, жилир жилирихъди гъярудариз, ¹⁰тIафлариз, тямаякъариз, пиянискийириз, футна дабгърудариз, кучIляхъариз Аллагъдин Паччагълугъ ирсди рубкьидар. ¹¹Учвкан саб къадар ари гъацдар вуйчва, аммаки ихь Аллагъдин Рюгъну ва Агъа Иса Месигъди ухъуз гъапIубди учву марцц, гирами ва гъякъ гъапIунчву.

Гъим ичв жанар Агъайин гүуллугънаң ишири

¹² Учву кIурачва: «Узуз вари апIуз ихтияр азуз!» Аммаки вариб хайирназ дар! «Узуз вари апIуз ихтияр азуз», хъа гъич сабдира йиз зиин агъавал апIуз гъитну ккундар! ¹³Учву гъацира, «ипIруб – фуниз, фун – ипIрубдиз», кIурачва! Ав, дюз кIурачва, хъа мур,



тмура Аллагъди терг апIрубра дюз ву. Аммаки беден къяппавализ вуйиб дар, хъа – Агъайиз. Агъара – бедендиз. ¹⁴ Аллагъди Агъа Чан къувватниинди чиви гъапIну ва ухъура чиви апIиди. ¹⁵ Учвуз, ичв жанар Месигъдин жандин паяр вуйиб, аygъданчвуз? Гъаци вуйиган, узхъан Месигъдин пай гъадабгъну, къяппавализ фици тууз шулу? Аллагъди уърхри! ¹⁶ Учвуз, къяппайк ктикъур, гъадгъахъди саб беден шлубикан аygъданчвуз дарш? Фицики дикиИна:

«къюрикан саб беден хъибди».

¹⁷ Хъа фуж Агъайик ктикъиш, думу Гъадгъахъди рюгъниинди сатIи шула. ¹⁸ Къяппавалихъан гъергай! Адмийи, къяппавал ктарди, фу гунарг гъапIишра, думу гунгъин дугъан бедендихъди фу-къара дар, хъа къяппавал апIурайири, чан бедендиз къаршуди гунарг апIура! ¹⁹ Учвуз ичв беден Аллагъдихъан учвуъна дуфнайи Гирами Рюг яшамиш шулайи хал вуйибикан хабар адарди анчвуз дарш? Сарун учву ичвдар дарчва, ²⁰ гъаз гъапиш учву зурба къиматнахъ гъадагънайидар вучва. Гъаддиз, ичв жанариинди Аллагъ за апIинай!

Жилириканна хпирикан

7 ¹Учву узуз, жилириз хпирик зат кудручди гъузиш, ужу шул кIури, гъибиkIунчва. ²Хъа му дюн'яйиъ къяппавал абхънайиган, гъит гъарсар жилир чан хпириин ва гъарсар хпир чан жилириин ахникк ишри. ³Жилири чан хпирихъди жилирвалин буржи тамам апIри, хпирира гъаци апIри.

⁴Чан жандин аыхюр хпир дар, хъа – жилир, гъаци жилирра чан бедендин аыхюр дар, хъа – чан хпир. ⁵Чиб-чпихъди сатIи хъувал гъибтри мапIанай. Йикърар йитIну, сацIиб вахтназ, думу вахт Аллагъдиз ккарагуз баҳш апIузди жара гъахъну пну, баладар. Хъасин хъана сатIи йихъай, даршиш иблисди, учвхъан аыгъ апIуз даршиш, гъирагъдихъинди хъчIюхидичву. ⁶Яна узу му буйругъ вуди дупнайиб дариз, хъа ичв ихтиярнаъ гъубзра. ⁷Узуз вари адмийир узуси духъну ккундийзуз, хпир хътарди, аммаки гъарсариз Аллагъдихъан чан багъиш а: сариз саб, тмунуриз тмунуб.

⁸Хъа ачIини хпаризна жилариз кIураза: дурализ ялгъузди, гъаму узуси яшамиш шули гъузиш, ужу шул. ⁹Хъа аыгъ апIуз



даршлудари, тямгъну гъадагъайиз, гъит, чпиз хизанар ккергъри, гъамци ужу хъибди.

¹⁰Хъя шив ва жилир хъайдариз узу варь, хъя Чав, Агъайи буй-ругь тувра: хпири чан жилир гъитну ккундар, ¹¹хъя эгер гатIахъруси алабхъиш, сарун нюкгъин эйси дариши, шулуш, хъана чан жилирихъди албагри. Ва жилирра хпирихъан жара даришири.

¹²Хъя имбудариз, сарун Агъайи варь, хъя узу кIураза: эгер сар фунур-вуш гъардин хпир хъугъур дарш ва думу дугъахъди яшамиш хъуз рази вуш, гъит жара даришири. ¹³Хътругъру жилир хъайи дишагълийизра кайиб гъадму ву: эгер думу дугъахъди яшамиш хъуз рази вуш, чан жилирихъан гъудудучIври. ¹⁴Гъаз гъапиш, хътругъру жилир чан хъугъру хпирилантина, ва хътругъру хпир чан хъугъру жилирилантина гирами шулу. Жараси вуйиш, ичв веледарра марцци дару гъисаб хъидийи, хъя мици, дурарра гирами ву.

¹⁵Эгер хътругъру жилириз вая хпириз жара духыну ккундуш, гъит ишири. Му гъялариъ гъардаш, вая чи асиллуди гъузидар. Аллагъди ухъуз мясяльтнаъди яшамиш хъуз дих дапIнахъуз. ¹⁶Увуз, хпир, яв жилир увлантина дюрюхрувал фици аygъявуз? Увузра, жилир, яв хпир увлантина дюрюхрувал фици аygъявуз?

¹⁷Гъит гъарсар Агъайи улупнайиси яшамиш ишири, ва чаз Аллагъди дих дапIнайиси гъузри. Му къайдийир варишвариъ айи хъугърудариз кIурудар вуйиз. ¹⁸Чаз дих апIайиз суннат дапIнайириз думу жиниди убхюри гъибтуз гучI адар. Хъя суннат дапIну адарди дих дапIнайириз, сарун суннат дарапIишра, гучI адар. ¹⁹Суннат дапIнайивал, ясана адрувал — муарииъ гъич саб мяна адар, хъя мяна — Аллагъдин табшуругъар тамам апIуб ву. ²⁰Чаз дих апIруган, фуж фици вуйиш, гъит чан гъаци гъузри. ²¹Эгер увуз лукIди имиди Аллагъди дих дапIнаш, увуз дидкан гъии дардиси дарибшри. Эгер увуз азад хъуз шлу мумкинвал аш, ужу шлуси апIин. ²²Фицики Агъайи дих дапIнайи лукI Агъайиз азад вуйир ву. Гъаци, азад вуди дих дапIнайирра, Месигъдин лукI шула. ²³Учву, зурба къимат тувну, гъадагънайидар вучва, гъаддиз, адмийирин лукIар махъанай! ²⁴Гъардшар, Аллагъди дих апIруган, гъар кас фици аийш, Дугъан улихъ гъаци гъузай!



Павели нюкъгин гъякънаан вуйи сувалариз жаваб тувра

²⁵ Шувуз дурушдариш ва швушв дархидариш Агъайи дуарин гъякънаан саб буйругъра тувнадарзуз, аммаки Гъадгъухъан, узуз уж'вал дурубънайивалиш дилигнү, йиз гафнахъ хъугъуз шулу. Узу гъамци пиизиша: ²⁶ Узу, гъийин гъяларис, адмийиз чпин айибси – шувуз дурушдар, дурушди ва швушв дархидар дархиди гъузиш ужу шул күури, гысаб апIураза. ²⁷ Эгер уву нюкъгъиль аш, жара маҳъан. Хъа эгер уву швушв хъайир дарш, маҳан. ²⁸ Хъа эгер гъашишра, думу гунагъвал дар. Эгер риш шувуз гъушиш, гунагъ хъибдар. Аммаки чпин сатIлан вуйи уымриш дуариз ги-заф читинвалар ккилигурас, хъа узуз учву гъаддарикикан урхюз ккундийзуз.

²⁹ Жараси күури гъабшиш, гъардшар: вахтар цИбтIан гъузрадар, ва швушвар хъайидар, гъит швушвар хътрударси ишри, ³⁰ хъа дердлудар – дерд ктрударси, шадлудар – шад дарударси, гъадагърудар – фукIа хътрударси. ³¹ Гъит гъаму дюн'яйиш яшамиш шулайидар, дидкан тIаям ктадагърударси, ишри. Гъаз гъапиш, ухъуз рябкъюрайи гъаму дюн'я багарихъди жвартI хъибди.

³² Узуз учву сабдиканра вижна ктарди ккундузуз. Хипр хътур, учв Агъа Аллагъэдиз ккуун ишри күури, Аллагъдин ляхнариш ичIигну а. ³³ Хъа хипр хъайир, хиприз ккуун ишри күури, му дюн'яйин ляхнар апIбахъ хъа. ³⁴ Дицир кас кьюбишваз пай духъна. Жилир хъту хипри вая шувуз душну адру шуру Агъайнин ляхнарикан фикрап апIуру. Думу чан бедендиинди ва рюгъниинди Дугъаз бахш хъуз шерик шулу, хъа швувахъ хъайир, жилириз учв ккуун ишри күури, му дюн'яйин ляхнар апIбахъ хъа. ³⁵ Му вари узу учвуз уж'вал бадали күурайиб вуйиз, хъа учву фтихъан-вш гъадатIуз күури вая. Узуз ккундайиб: учву варитIан ужуйи, гыич сабдира учвуз машат дарапIди, Аллагъдин гъуллугънаш хъуб вуйиз.

³⁶ Эгер учвкан шлиз, сумчир дарапIди чан лишан кипнайириин йисар гъяра күури гъии даруси аш, ва гъамус сумчир дапIину ккуниси фикир апIураш, гъит дугъу чан дюз гъюрубси апIри. Дугъхъан швушв хуз шулу, думу гунагъ дар. ³⁷ Эгер адмийи швушв дархуз ижмиди гъял дапIнаш, эгер швушв хувал думукъан чарасуз ляхинси фикир апIурадаш ва эгер учв чан хилиш дииснү гъузуз шлур вуш, дугъу чаз хъирснайи риш марцциди гъитуз



кІваъ дибиснаш, ужуйи апІура. ³⁸ Гъаци вуйиган, хъирснайи риш швушвди хуруи ужуйи апІура, хъа дархрури хъана ужуйи апІура.

³⁹ Хипир чан вари уымрий жилирик китІнайир ву, хъа жилир гъачІиган, думу азад шула ва дугъхъан чаз ккунириз шувуз гъягъюз шулу, анжагъ – хъугъуриз. ⁴⁰ Хъа эгер, фуж, узуъра Аллагъдин Рюгъ азуз, кІури, шувуз дурушди гъузиш, думу бахтлуди хъиди.

Идолариз гъурбан гъапІу хурагнакан

8 ¹ Гъамус ичв суалназ Аллагъузарин идолариз гъурбан дапІнайи йикк’кан пициза. ИкибаштІан, «ухъуз варидализ аыгъувалар айибдикан» хабар ахъуз, аммаки аыгъувалари фурс капІру, хъа масанвали мюгъкамвал хуру. ² Эгер шли аыгъувалар азуз кІураш, дугъаз дугъридан чаз аыгъю дубхъну ккундайиб аыгъю дубхънадар. ³ Хъа Аллагъдиз Учв ккунидар аыгъя.

⁴ Гъаци вуйиган, аллагъузарин идолариз гъурбан гъапІу хурагнакан пицихъя. Ухъуз варидализ, дюн’яий икрам апІурайи идолар фукІа даруб ва Сарилан гъайри гъич саб жюрейинра аллагъ адруб, аыгъяхъуз. ⁵ Эгер гъацдар «аллагъар» ву кІурайидар завариин, ясана жилариин алийишра (хъа дюн’яий «аллагъар» ва «агъийр» кІурудар, дугъридан гизаф а), ⁶ аммаки ухъуз айир сар АллагътІан дархъуз – Адаш Аллагъ. Ари Гъадгъу дюн’яий вариф ккебгъну, ва, Гъадгъаз кІури, ухъу яшамишра шулахъа. Агъара сартІан дар – Иса Месигъ. Ари Гъадгъунди дюн’яий вариф арайиз удубчІвну, ва Гъадгъулантине ухъуз уъмурра гъабхъунхъуз.

⁷ Хъа мидкан варидализ хабар адар. Саспидал идоларихъна гъаци вердиш дуҳънаки, гъира кими迪 дурари, гъациб хураг ипІруган, идолариз икрам вуди дубхнайиб ву кІура ва чпин зяиф намусну дурап чиркинди улупура. ⁸ Хурагнахъан ухъу Аллагъдихъна багахъ апІуз хъибдар. Ухъу дирипІди гъузну пну, кам шулаийиб адарихъ, ипІуру пну, фукІа гъязанмишра апІурадархъя. ⁹ Амма лигайки, ичв азадвал зяифдариликриккан ккибиргъру гъван дарибши. ¹⁰ Фицики зяифуриз идоларин хулаъ уву, аыгъувалар айир, ипІури гъяркъиши, дугъура идолиз гъурбан дапІнайи хураг ипІди. ¹¹ Магъа гъаддиз, яв аыгъувалари зяиф гъардаш – дугъхъандира Месигъди жан тувну аыхир – пуч апІди. ¹² Гъамци гъардшариз къаршуди гунағъ апІури ва дуарин зяиф намусназ



зиян туври, учву Месигъдиз къаршуди гунагъ апIурачва. ¹³ Гъаддиз, узу ипIурайи хурагналантина йиз гъардаш алдакураш, думу гунгихъна дархбан бадали, йикк дирипIди гъузарза.

Павелра имбуну вакиларсир ву

¶ ¹Узу азад адми дарин дарш? Узу Месигъдин вакил дарин дарш? Ихъ Агъа Иса узуз гъяркъюндарин дарш? Учву Агъайихъди саб хъувал — йиз гъуллугънан ляхин дарин дарш? ²Жарадариз узу вакил гъисаб даршра, учвуз узу — Месигъдин вакил вуза! Месигъдихъди учву саб хъували узу вакилвалин гъуллугънанъ айиб тасдикъ апIура.

³Узук тахсир кипрудариз йиз жаваб магъа гъамциб хъибди. ⁴ИпIрубна ухрубдиз учуз ихтияр адарин дарш? ⁵Хъугъру дишагъли учуз швшувди хуз ихтияр адарин дарш? Ва думу хпир, Месигъдин имбуну вакилариси, Агъайн чвийриси вая Кифайиси, жувуахъди гъярушваз гъадагъуз шулдарин дарш? ⁶Ясана учуз ипIуз уыл гъазанмиш апIуб ууззна ВарнавдизтIан адабгънадарин?

⁷Фунур эскри чан гъуллугънан харжар чан жибиан ккеркру? Фунури, тIумтIин багъ ибтну, тIумтIар диритIди гъитру? Фунур габни чан лижан хюнийриккан никк дурубхъур? ⁸Му вари узу адмийин улариантIан дилигди кIурайинхъя? Къанундин китабдиъра гъаддикан кIурадаринхъя? ⁹Фицики, ухъуз Мусайлланмина тувнайи Къанундира кIура:

«Гад апIурайи йицран ушв мяхъябъян»

Аллагъ йицарин гъайгъушнаш а кIури, хиял вуничвхъя? ¹⁰ИкибаштIан, Дугъу мици ухъуз кIура! Ухъуз дибикIна:

«ХутIил хътабкуру хутIил хътабкуру, ва гад апIури гад апIуру, чпизра чпи апIурайи ляхникан пай бадали».

¹¹Учу ичв арайиъ рюгънан тум дубзну, дидлан ккадабцIру мутмуйинди вуйи бегъерназ кклигураш, учуз гизафуб ккун апIурайн? ¹²Жарадариз учвхъан кюмек рубкъуз ихтияр айиган, учуз хъя айху ихтияр ачуз!

Аммаки, учу сабанкъан учуз айи гъадму ихтияр ишлетмиш гъапIундарча, хъя, Месигъдикан Ужувлан хабар рабгъуз машат дарипши кIури, учу вариб айгъ апIурача. ¹³Учвуз, Аллагъдин хулкан ипIурайибин вагъурбнар апIрушвахъ гъуллугънанъ айдариш гъурбан гъапIубдикан



саб пайназ ихтияр айибдин, хабар адарин дарш? ¹⁴ Гъаци Агъайира, Ужувлан хабар рабгъуриз ипIруб гъаддилан дубхъну ккунду кIури, амур гъапIну.

¹⁵ Гъаму узуз аий ихтиярар гъич сабкъан узу ишлетмиш гъапIундарза. Я гъамус, гъациб кюмек ккун апIури, бикIурайиб дариз. Йиз тяриф дубгайиз, узу йикIуз гъязур вуза. ¹⁶ Узу Ужувлан хабар рабгъура кIури, гъаз узу йиз тяриф апIуза? Думу йиз буржи вуйиз. Эгер узу думу тамам дарапIди гъибиши, йиз язухъв! ¹⁷ Узу Ужувлан хабар йиз хушниинди рабгъураза. Йиз хушниинди дайиш, узу думу ляхин, йиз буржи вуди хъпаз дилигну, тамам апIидийза. Хъя узу думу йиз хушниинди рабгъурайиган, пешкешра хъибдизуз. ¹⁸ Йиз пешкеш фтилан арайиз гъюра? Хъя гъамдилан: Ужувлан хабар узу кымат дарди рабгъураза ва узуз улупнай ихтиярар ишлетмиш апIурадарза.

¹⁹ Гъеле узу азад адми вушра, узу йиз хушниинди, Аллагъдихъна шлубкъан гизаф адмийир хпан бадали, варидализ лукIвал апIури гъахъунза. ²⁰ Жугъдарихъди узу, дураг Агъайин терефназ хузди, жугъудси гъахъунза. Къанун тамам апIурайи адмийирихъди, гъеле узу Къанундин хиликк ккайир даршра, дураг Агъайин терефназ хузди, узура Къанун тамам апIурайиры гъахъунза. ²¹ Къанун адру адмийирихъди, гъеле узу Аллагъдин Къанундикк кан азад даршра, гъаз гъапиш Месигъдин Къанундикк кказа, дураг Агъайин терефназ хузди, узура Къанун адрурси гъахъунза. ²² Зяифдари узу, дурага хузди, зяифурси гъахъунза. Варилиз узу, ахирки гъаддариликан сакьюдаркъан уърхбан бадали, варибди гъахъунза. ²³ Му вари узу, Ужувлан хабар бадали ва гъаддин ужувлакан узура кубкIузди, апIураза.

²⁴ Жаргъбан талитнаъ гизафдар иштирак шулу, хъя гъалиб сартлан даршлуб учвуз аygъячвуз. Гъаддиз пешкеш рубкъруси жаргъай. ²⁵ Иштракчири, вари чпин тямиягъяр дирчну, чIур дубхъну гъябгъру кунцI бадали, гъар йигъян гъязурлугъар гъахуру, хъя ухъу — чIур даршлу кунцI бадали гъязур духъну ккундарин! ²⁶ Гъаддиз, саб метлеб адарди жаргъурайир дарза ва гъавайиз гъурдар йивурайир дарза! ²⁷ Варь, жарадариз Ужувлан хабарнакан ктибтруган, жув тина дарапIузди, узура йиз беден вердиш апIураза, думу узуз мютIюгъ апIураза.



Жугъдарси маҳънай

10 ¹Гъардшар, ихъ вари абийир дифран хиликкди хъубкан ва, гъюл жара дубхъну, вари гъадушв'антина удучІвбакан, учвуз аygъюди ккундузуз. ²Дурар вари Мусайнин чвурнахъ дифраъ ва гъюлиъ гъахъну. ³Дурари вариди рюгънан саб хураг ипIури ⁴ва рюгънан саб убхъруб убхъури гъахъну. Дурари чпиҳъди шлу рюгънан гъарз'ан убхъури гъахъну, хъа думу гъарз – Месигъ вуйи. ⁵Дурар гъаци гъахънушра, Аллагъдин улихъ дурари уж'вал гъазнмиш гъапIундар ва къураматдъи пуч гъахънийи.

Му вари ухъуз, гъадрариси ухъура писвал ккун дарапIбаз, улупурайиб ву. ⁷Гъадрарикан гъацIарси, учвура идолариз икрам апIрудар маҳънай. Фицики Гирами китабариъ дикикIна:

«Халкъди, дэйну, ипIуз ва убгъуз хъюгъру,

хъасин идолин гъюматназ ялхъвнар апIуру».

⁸ Гъадрарикан гъацIарси ухъура, къяппийр хъидархъа. Дурари къяппа тIулар апIури ккебгънийи, ва сад йигъян къанна шубуд агъзур гъийихнийи. ⁹ Ухъура, гъадрарикан гъацIариси, Месигъ ахтармиш апIури хъюгъидархъа. Хъасин дурар, битIари къацIар дапIину, гъийихнийи. ¹⁰ Учвура, гъадрарикан гъацIарси, бурбрар апIури маҳънай, гъаддилан дурар пуч апIру малайикди тIанкъ гъапIинийи.

¹¹ Гъамрар вари, гъюз ккимбуబ улупури, гъадмуган дураихъди гъахънийи, хъа му ухъуз, дарс вуди, дикикIна. ¹² Гъаци вуйиган гъит, гъар шли учв ижимили ликриин дийигъназа кIури, фикир апIураш, алдакуз гъидритри! ¹³ Гъамусдиз учв'ин алахъу читинвалар адмийириин улукъру аьдати читинвалартIан дар. Аллагъ Чав туву гаф тамам апIур ву. Дугъу учв'ин аьгъ апIуз даршлу читинвалар алахъуз гъитдар. Читинвалар алахъргулан, Дугъу учвуз дурариан удучІвуз шлу рякъра улупидичвуз. Гъаци дурариан учвхъан кIул адабгъуз хибдичвухъан.

¹⁴ Магъа гъаддиз, йиз ккунидар, идолариз икрам апIахъан гъергай! ¹⁵ Узу, учву фикирлу адмийир ву дупну, улхураза. Учву фикир апIинай. ¹⁶ Аллагъдиз чухсагъул дупну, убхърайи бар-каллагънан Захру ухъу Месигъдин ифдик ктикурадарин? ГъудубтIину, пай дапIинайи уъли ухъу Месигъдин беденник ктикурадарин? ¹⁷ Уъл саб ву, ухъура, фукъан гизаф вушра, саб беден



вухъа, гъаз гъапиш, ипIурайи гъадму саб уыл'инди ухъу вари сатIи шулахъа.

¹⁸ Израил халкъдиз лигай, гъурбан апIрушвахъна гъурбан гъапIу мутму дубхну ипIрудар, гъурбан гъапIушвахъди саб шуладарин? ¹⁹ ИкибаштIан, узу, идолиъ вая дидиз гъурбан дапIанайбдись фу-вуш саб мяна а, кIурадарза. ²⁰ Ваъ, аммаки Аллагъсузари чпин гъурбнар, Аллагъдиз ваъ, хъа шейтIнар-жинариз хура. Узуз учву жинарихъди саб духыну ккундарзуз. ²¹ Учвхъан Агъайин Зах'анра ва жинарин зах'анра сабси убхъуз хъибдарчвухъан! Учвхъан Агъайин Суфрайихъра ва жинарин суфрайихъра сабси деуз хъибдарчвухъан! ²² Агъайик хъял капIуз шулухъхан кIури, ухъу фикир апIурайин? Ухъу ДумутIан къувватглуйир вуин дарш?

Жевуан азадвал Аллагъдин адназ ишлетмиш апIинай

²³ Учву: «Вари апIуз ихтияр ачуз!» кIурачва, аммаки вари, хайирназ дар. «Вариб апIуз ихтияр а!» Аммаки варибди мюгъкамвал хурдар. ²⁴ Гъит варидари, жувуз ваъ, имбудариз уж'вал апIри.

²⁵ Базарий масу тувруб вари, юкIв архаинди, ахтармиш дарапIди, ипIинай, ²⁶ фицики, «жил ва дид'ин алиб вари Агъайинуб ву».

²⁷ Эгер хътругъру адмийи учвуз теклиф гъапIиш, гъивуб вари юкIв архаинди, ахтармиш дарапIди, ипIинай. ²⁸ Хъа эгер учвуз гъадмуган: «му гъурбан дапIинайи йикк ву» гъапиш, гъапир бадали ва намус бадали, мипIанай — ²⁹ узу мушваъ, ичв ваъ, хъа жара касдин намус бадали, кIураза. Жарарин намусну йиз азадвалик тягъна гъаз кипди? ³⁰ Аллагъдиз чухсагъул дупну, узу думу хураг баркаллагъниинди ипIураш, узук тягъна гъаз кипди?

³¹ Гъаддиз, учву ипIурашра, убхъурашра, фу апIури гъашишра, вари — Аллагъдин ад бадали апIинай. ³² Я жугъдар, я грекар, я Аллагъдихъ хъугънайидар гунгъихъна дархрубси уымур хъапIри апIинай. ³³ Узуси, варибдиз варилиз ужу шлуси апIинай. Узу, узуз ваъ, хъа, жарадар гизаф дюрхну хъпан бадали, гъаддриз уж'вал абгурайир вуза.



Гъюкум хилиъ ивнайир

11 ¹Узу Месигъдихъан дубгъурайиганси, учвура узхъан дубгъай.
²Узу гъапиб вари ичв кІваин илмивалин ва узу учвуз туву альгъювалариъ дупнайиси апIурайивалин тяриф апIураза.

³Учвуз альгъяди ккундузуз: гъар жилирин кІул – Месигъ ву, дишагълийин кІул – чан жилир, хъа Месигъдин – Аллагъ. ⁴Жилижвижу кІул’ин алди ккарагураш, ваяки пайгъамбарвалин гафар кІураш, чан кІул альгъибнакк ккаъра. ⁵Дишагълийира кІул’ин алдарди ккарагураш, ваяки пайгъамбарвалин гафар кІураш, чан кІул альгъибнакк ккаъра. Мици вуйиш, дишагълий чан кІул алдапIнайи гъисаб шуйи. ⁶Эгер хпириз кІул’ин алабхъуз ккундарш, зат имдарди кушарра алдаъри, хъа дишагълийиз кІул алдапIуб альгъибнан ляхин вуш, кІул’ин алабхъри. ⁷Жилири кІул илибкну ккундар, фицики думу Аллагъдин ухшар ва ад ву, хъа хпир – чан жилирин ад. ⁸Жилир хпиркан гъахъир дар, хъа жилирикан – хпир. ⁹Жилир хпир бадали халкъ дапIнайир дар, хъа хпир жилир бадали халкъ дапIнайир ву. ¹⁰Гъаддиз дишагълийи, чан кІул’ин чан жилирин гъюкум аливалин малайикариз лишандикъан, кІул’ин алабхъну ккунду.

¹¹Аммаки Агъайихъди саб духьнайивалиъ, дишагъли жилирикан ва жилир дишагълийикан асиллу ву. ¹²Жилирикан хпир гъахъибси, дишагълийикан жилижвира бабкан шула, аммаки вари Аллагъди халкъ дапIна. ¹³Учву гъисаб апIнай, дишагълийиз кІул’ин алдарди Аллагъдиз ккарагуб лайикъ вуйин? ¹⁴Ва чав табиаътдира ухъуз, жилижвижу ярхи кушар гъитуб альгъиб ву, кІурадарин? ¹⁵Дидихъди сабси, дишагълийиз ярхи кушар – заанвал ву. Дураг дугъаз, чан кІул’ин лакач алабхъуз, тувнайидар дарин? ¹⁶Яни, мидкан узухъди гъюжат ккебгъуз ккунириз дишлади кІураза: мидлан гъайри жара альдат я учухъ, я жара иишвариъ аий Аллагъдихъ хъугърударин арайиъ адар.

Агъайн хябяхъ

¹⁷Гъамцдар насигъятар туври, узуз пуз ккунди азуз: ичв тяриф апIидарза, гъаз гъапиш ичв уч хували хру хайиртIан зарал ги-заф ву. ¹⁸Гъаз? Саб гъапиб, узуз гъеебхъунзуз: учву Аллагъдин улихъ уч шлуган, ичв арайиъ гъюжатар гъитIирккуз хъюгърачва.



Сакьюдар дицдар хабарихъ хъугъурза. ¹⁹ Ичв арайиъ гъар жюре фикрар-хиялар, фуж дюз вуш аыгъю апIбан бадали, духьну ккунду. ²⁰ Хъя учвуси, Агъайин гъюматназ суфрайихъна са-сарди уч шулаш, дидиз уч хъувал кIурдар. ²¹ Учву, чиб-чпихъ дийийгъди, ипIуз хъюгърачва, ва аыхириъ гъацIар гашди гъузра, хъя гъацIари пиян хъайизкъан убхъура. ²² Дици апIайиз ичв хуларис ипIинай ва убхъай, даршиш Аллагъдихъ хъугърударин уч хъувал беябур мапIанай, ва, дугъриданра, фукIа ипIуз адрудар асккан мапIанай. Гъамус узу, учву гъамци апIузди, ичв тяриф дапIину ккундин? ИкибаштIан, вая!

²³ Фицики узу учвуз улупуб, Чахъан, Агъайихъян гъудубгъуб вуйиз: Агъя Исайи, Учв масу туви иишван, суфрайилан уъл гъадабгънийи, ²⁴ ва Аллагъдиз чухсагъул дупну, гъудубтIину, гъапннийи: «Му Йиз беден вуйиз учвхъанди туврайи. Узу кIавин алаури гъамци апIинай». ²⁵ Ари гъамци, хъябяжъдин хураг ипIабхъан, Исайи хъанара, зах дебисну, кIуро:

— Му зах учвхъанди удубзурайи Йиз ифдинди йитIурайи цIиий ийкъар вуйиз. Йиз гъюматназ убхърган, гъар ражари гъамци апIинай. ²⁶ Гъаз гъапиш, гъар ражари учву гъаму уъл ипIурайиган ва гъаму зах'ан убхърган, учву Агъайин айжаликан шагъидвал апIурачва. Думу къяляхъ гъайизкъан гъаци апIинай.

²⁷ Гъаци вуйиган, хай гъюруси уъл дирипIури ва Агъайин зах'ан дурубхърури Агъайин ифдиз ва бедендиз къаршуди гунағъ апIура. ²⁸ Адмийиз, уъл ипIайиз ва зах'ан убхъайиз, чав гъапI-раш, айгъяди ккунду, ²⁹ гъаз гъапиш, Агъайи фида гъапIу бедендин мяна айгъдарди ипIуринна убхърурин ипIувална убхъувал чак тахсир кипувал ву. ³⁰ Магъа гъаддиз ичв арайиъ гъаци гизаф иццрудар ва айкузар айичв; гъийихдарра цIиб даричв. ³¹ Хъя эгер ухъу гъапIраш айгъю апIуйиш, тахсир кипбахъан ярхла хъидийхъя. ³² Агъайи ихъ суд апIура, жазара гъадабтIура. Дугъу дици, дюн'яйин суд апIрган, ихъ суд дарапIбаз, апIура.

³³ Гъаци вуйиган, гъардшар, учву ипIуз уч шлуган, гъялак ма-хъанай, чиб-чпихъ дийигъури апIинай. ³⁴ Гашди гъюрури, ичв уч хъувалилантине учву тахсирнакк ккадрахъбан бадали, хулаъ дипI-ну гъюри.

Узу учвухъна гъафиган, жара ляхнэрра дюз алаидиза.



Гирами Рюгънан багъишар

12 ¹Рюгънан багъишарикан улхури гъашиш, гъардшар, учву дидин дишди гъаврий ади ккундузуз. ²Ичв аллагъсуз вахтари, жинари учву фици ил алдру идоларихъна тужназ хъчюхойиш, кІваин илмиячв. ³Гъаддиз гъаврий йихъай: Аллагъдин Рюгъну хъау адмийи Исаиз люкънар дараپIур, я гъич сарира, эгер Гирами Рюгъну хъадраиш: «Иса – Агъа ву», пидар.

⁴Гъар жюре багъишар а, хъа дурап вари гъадму сар Рюгъну туврайидар ву. ⁵Гъар жюре гъуллугъ апIувалар а, хъа ухъу варди гъадму сар Агъайиз гъуллугъ апIурахъа. ⁶Гъар жюре ляхнар а, хъа вари ляхнар ухъу варидиль артмиш апIурайир гъадму сар Аллагъ ву.

⁷Гъарсар адмийи Гирами Рюгъ, вардиз кайи уж'вал бадали, ачмиш шула. ⁸Сар адмийиз Рюгъну фагъумлевал айи гаф тувра; тмунуриз гъадму Рюгъну аыгъювалар айи гаф тувра; ⁹шлиз-вш гъадму Рюгъну хъугъвал тувра; шлиз-вш гъадму Рюгъну уъзрар сагъ апIувал тувра. ¹⁰Сарсануриз – аыламатар улупру къувват; гъатмунуриз – пайгъамбарвалин гаф; шубурпириз – рюгъяр жара апIуз шлувал; гъатмунуриз – гъар жюре чIалар, гъаккмунуриз – гъадму чIаларииинди гъапибин гъаврий ауз шлувал.

¹¹Мурап вари – гъадму сар Рюгъну ляхнар ву. Гъаму багъишар Дугъу гъардиз Чаз ккуниси тувру.

Месигъдин беден

¹² Беден, гъар жюре паярикан арайиз дуфнашра, саб ву. Бедендин паяр, гизаф вушра, саб беден ву. Гъаци Месигъдин беденра ву. ¹³Ухъу вари саб беденси хъпан бадали, жугъдар ва грекар, лукълар ва азад вуйидар – сар Рюгъну цИийи алаънайдар вухъя. Ухъуз варидализ гъадму сар Рюгъ ухъуз тувнахъуз.

¹⁴Фицики беденра саб пайнакан дубхънадар, хъа гизафдари-кан. ¹⁵Эгер ликри: «Узу хил дарза, узу му бедендинуб дарза» гъапиш, диди гъаци гъапну кIури, думу бедендин саб пай дарди гъубзрайин? ¹⁶Ваяки, ибу: «Узу ул дарза, му бедендинуб дарза» гъапиш, диди гъаци гъапну кIури, думу бедендин саб пай дарди гъубзрайин? ¹⁷Эгер вари беден саб улкан ибарат вуйиш, дидиз фици ебхъидий? Хъа эгер вари беден иб вуйиш, диди ниар



фици аыгъю апIидийи? ¹⁸Аммаки Аллагъди бедендиъ гъарсаб пайназ, Чаз ккуниси, чпин йишвар улупнү. ¹⁹Вари саб пай ву-йиш, беден наынан хъибдийи? ²⁰Магъа гъаддиз, паяр гизаф ву, хъа дурап варибикан дубхънайи беден саб ву.

²¹Улхъанра хилиз: «Узуз уву лазим дарзуз» пуз шулдар. Ваяки, кIули ликариз: «Йиз учвукк ккабхънайиб адариз» пидар. ²²Бедендиъ лазимсузди гъисаб апIру паяр, лигуруш, варитIан лазим ву-йидар ву. ²³Хъа ихъ фикриан лазим даруси гъисаб апIурайи паярин ухъу хъа гизаф гъайгъу зигурахъя. ²⁴Гъяркъган, айиб шлу паяр ухъу, ижими迪 ккеркну, уърхорахъя, хъа гъатмундариц дициб гъайгъу лазим дар. Аммаки Аллагъди Чав, беден гъамциб жю-реийинди дебккну ва ихъра гъаци апIуз кIулий тIапIна: «ужуб ад хътру» бедендин паярин артухъси гъайгъу дизигну ккунду. ²⁵Бе-ден пай дархъуз, ухъу ухъ’инди чиб-чпин гъайгъушнаш духъну ккунду. ²⁶Эгер саб пайназ аьзият каш, вари паяризра аьзият кади шулу. Эгер саб пайназ гъюрмат апIураш, дидихъди вари паярира шадвал хъапIри шулу.

²⁷Гъаци вуйиган учву вари сабси – Месигъдин беден вучва. Учву гъарсар Дугъан бедендиъ пай вучва. ²⁸Хъугърударин арайиъ Аллагъди саспидар Месигъдин вакиларди, саспидар пайгъамб-арди, саспидар мялимарди дерккну. Дугъу гъацIариз айламатар улупуз шлу къувват, гъацIариз – сагъ апIру, гъацIариз – касиба-риз кюмекар апIру, гъацIариз – гъякимвал апIру, гъацIариз жа-ра Чаларииинди улхру багъишар тувну. ²⁹Вари Месигъдин ваки-лар шулин? Вари пайгъамбрар шулин? Вари мялимар шулин? Вари айламатар улупрудар шулин? ³⁰Вари уъзрар сагъ апIрудар шулин? Вари жара Чаларииинди улхрудар шулин? Ясана думу Чаларин гъавриъ аьру гъуллугъ вардиз тувнайин? ³¹Учвуз хъа заан багъишар шлуси хъачIарккай!

Гъамус узу учвуз вари тIан ужуб рякъ улупидизачвуз.

Масанвал

13 ¹Эгер узуз вари адмийирин ва малайикарин чIалар аьгъя-ди, хъа масанвал адарш – узу гаргврин бябрягъяр ва дал-дабуйин дабдаба вуза. ²Узуз пайгъабарвалин багъиш ади, дюн-’-яйин вари сир аьгъяди, узуз вари аьгъювалар тувнади, узуз дагъ-ларра кмиди чпин алишвлан улдуЧIвуз гъитру хъугъувал ади, хъа



масанвал адарди вуш, узу фукІа дару ичИичІай вуз. ³Узуль масанвал адарди касибарииз узуз айи вари девлет пай гъапІишра, гъадриихъанди убгуз йиз жан тувишра — мурарихъан сабдихъанра узуз кюмек апІуз хъибдар.

⁴Масанвали сабур хуру, гъянивал хуру, баҳилвал хурдар, жуван тяриф апІдар, фурс кипдар, ⁵Чуруди хътІурччувуз гъитдар, чан хайирназ фукІа апІдар, хъял хурдар, писвал кІваъ гъибтдар.

⁶Масанвал кучІилин ваъ, хъа гъякъвалиин шад шулу. ⁷Диди варибидилан хил алдабгъуру, варибидихъ хъугъру, умуд зат ктабтІруб дар, вариб альгъ апІуру.

⁸Масанвал гъич зат хъатІабццну хъибдар. Пайгъамбарвал дугъубжвиди, чалар ккебехъиди, альгъювалар лазимди гъузидар. ⁹Физики ихъ альгъювалар гъуркІнайидар дар, ихъ пайгъамбарвалин гафарра гъуркІнайидар дар, ¹⁰ва тамамвал гъафиган, вари гъудрубкІувал жвартІ хъибди. ¹¹Узу бицІир вуйиган, бицІириси кІуйза, бицІириси фикир апІуйза, ляхнарикан бицІириси хиял апІуйза. Алью гъахъунза — бицІивал вари гъудубчІвну. ¹²Гъаму раЖари ухъуз, къалу гюздиан рябкьюрайиси, ачуҳиди рябкьюрадархъуз, хъа гъадмуган машна-машди рябкьюори хъибидихъуз. Сабан сацІибтІлан альгъдарзуз, хъа думуган, Аллагъдиз узу фици альгъяш, гъаци тамамди альгъю хъибдизуз.

¹³Хъа сабан магъа гъаму шубуб а: хъугъвал, умуд ва масанвал, дурарикан заануб масанвал ву.

Рюгънан багъишар хъугърударин хайирназ ишелетмииш апІинаи

14 ¹Масанвалихъ хъачІарккай. Рюгънан багъишарин гъай-
гъушнаш йихъай, гизафна гизафси — пайгъамбарвалин
багъишнан.

²Таниш дару чалниинди гафар апІурайир адмийирихъиди ваъ,
хъа Аллагъдихъиди улхура. Физики дугъан фужкІа гъавриз ахъ-
дар, амма Рюгънинди дугъу сирарикан кІура. ³Хъа пайгъамбар-
валин гафар кІурайири адмийириз насигъят вуди, юкІв капІ-
ри ва ккарцури кІура. ⁴Таниш дару чалариинди улхурайир, чаз
насигъят вуди улхура, хъа пайгъамбарвалин гафар кІурайири,
хъугънайидариз насигъят вуди кІура. ⁵Узуз учвкан гъарсар чла-
лариинди улхури ккундийзуз, аммаки пайгъамбарвал апІуб ужу



ву. Пайгъамбарвал апIурайир, чIалариинди улхуртIан зина ву. Аммаки чIалариинди улхури, хъугънайдариз насигъят вуди, гъядму чIаларин гъаврий ауйиш, думу зина вуйи.

⁶ Гъардшар, узу учвухъна дуфну, таниш дару чIалариинди, фукIа ачмиш дарапIди, аыгьювалар тутрувди, пайгъамбарвалин га-фар дарпиdi, насигъят тутрувди улхуйиш, узкан учвуз фу хайир хъибдий? ⁷ Ил алдру мукъмарин алатар гъадагъай, мисалназ, швутIрам вая къумуз. Эгер сесер жара апIуз шулдарш, дуарин мукъмар фици аыгъю апIидичва? ⁸ Эгер зурнайи гъаврий адрахъ-ру дих деебтиш, дявдиз фуж гъедергидий? ⁹ Гъаци учвура шу-лачва. Эгер гъаврий адрахъру гафар кIураш, учву кIурайибин адмийир фици гъаврий хъиди? Учву гъавайи гафар деетурачва. ¹⁰ Дюн'яйиъ фукъян гизаф чIалар а, амма чIалар аыгъюдари ду-рарин мяна бисура. ¹¹ Эгер узуз кIурубдин узу гъаврий ахъдарш, кIурайириз узу жара уълкейин адми ву, ва думура узуз жара уъл-кейин адми шула. ¹² Гъаци учвура шулачва. Учвуз Рюгънан ба-гъишар ккунди анчвуз? Ккуниган, хъугънайдарин хайирназ бегъемди ккун апIинай.

¹³ Гъаддиз, аыгъдру чIал апIури, дидин гъаврий ауз шлу ба-гъишра туври кIури, ккарагри. ¹⁴ Аыгъдру чIалниинди узу ккараг-руган, йиз рюгъ ккарагура, хъа йиз фикир иштирак шуладар. ¹⁵ ГъапIза? Узу рюгъниинди ккарагидиза, йиз фикрииндира кка-рагидиза. Рюгъниинди Аллагъдиз мяълийир апIидиза, йиз фик-рииндира мяълийир апIидиза. ¹⁶ Эгер уву рюгъниинди Аллагъдиз баркаллагь кIураш, гъаври адру адмийи фици «амин» пиidi? Ду-гъяз уву фу кIураш аыгъдар! ¹⁷ Увхъан Аллагъдиз ужуйи баркал-лагь пуз шулвухъан, хъа тинди хъайир диди мюгъкам апIидар.

¹⁸ Учвуз варидализIан чIалариинди улхуз узуз ужуйи аыгъязуз, гъаддиз Аллагъдиз чухсагъул вуйиз, ¹⁹ амма хъугънайдарин ара-йиъ, жарадариз насигъят вуди, йиз фикриинди гъаврий ахъру хъуб гаф кIарза, агъзраинди аыгъдру чIалнан гафар кIайиз!

²⁰ Гъардшар, фикир адi, бицIидарси маxъанай. Писвализ тах-сир ктру бицIидарси йихъай, хъа фикриинди – гъуркIу адмийир! ²¹ Къанундиль дибикIна:

«Жара чIалариинди ва жара мелзарииинди
Узу гъаму халкъдиз пииза, я гъадмуганкъан
дурап Узухъ хъпехъидар, – кIура Агъай».»



²² Гъаши вуйиган, жара чАлар хъугърудариз вуйи лишан дар, хъа хътругърудариз. Пайгъамбарвалин гафар – хътругърудариз дар, хъа – хъугърудариз. ²³ Хъугънайидар вари уч духьну, чАлариинди улхуради, дурарихъна аygъдрудар ваяки хътругърудар гъафиш, дурари учвук жинар кучIвна даркIурин? ²⁴ Хъа варида-ри пайгъамбарвалин гафар кIуради, душвазди хътругърур, ясана жарап учIвиш, улхурайи гъарсарикан дугъаз учв гунагъкар ва тахсиркар вуйиб рябъиди. ²⁵ Дугъан кIван жини ниятар ачухъ хъиди, ва гъадмуган, къамкъарихъди ис алахъну, Аллагъдиз дугъу икрам апIиди ва пиidi: «Дугъриданна, Аллагъ учухъди хъа!»

Хъугърудар мюгъкам апIури иихъай

²⁶ Фу вухъа, гъардшар? Учву уч шлуган, гъарсарин фу-вш kIу-руб шуличв: Аллагъдиз мяъли, насиgъятнан гаф, Аллагъди ач-миш гъапIуб, чАлариинди улхуб, ясана думу чАларин гъав-рий ауб – гъит варилиз му вари мюгъкамвализ ибшри. ²⁷ Эгер чАлариинди улхрудар аш, гъит къюри йипри, заан кIул – шу-бури, нубатнахъди, хъа сар касди дурари кIурайиб кидибтри. ²⁸ Хъа чАларин мяна ктибтуз шлур адарш, чАлариинди улхур хъугънайидарин арайиъ ккебехъну гъузри – чазна Аллагъдизtан дарипри.

²⁹ Пайгъамбариканра къюри вая шубури йипри, хъа имбуда-ри гъапибдикан фикир апIри. ³⁰ Эгер дуfnайидарикан сариз Ал-лагъдихъян фукIа ачмиш гъабхыш, улхурайир ккебехъну, му-нури йипри. ³¹ Учвхъан вардарихъан, вардариз насиgъят тувбан ва вардариk юкIв капIбан бадали, нубатнахъди пайгъамбарвал апIуз шулучвхъян. ³² Пайгъамбари чпин рюгънан эйсивал дапIну ккун-ду, ³³ гъаз гъапиш, Аллагъ – къайда хътру Аллагъ дар, хъа мяся-льтнан Аллагъ ву.

Аллагъдин гирами халкъ уч шлу варишвариъси, ³⁴ душвариъ дишагълийир ккебехъну ккунду. Дурализ гафар апIуз ихтияр туврадар. Къанунди тIалаб апIурайиси, дурарин пише мютЮгъ-ди гъузуб ву. ³⁵ Эгер дурализ фукIа аygъю апIуз ккунди аш, гъит дурари хулаъ чпин жиларихъан гъерхри, финики дишагълийиз уч духънайишваь улхуб айиб ву.

³⁶ Аллагъдин гаф сифте учвхъан удубчIувб, ясана учвухънатIан дурубъкъну адруб ву кIури, гъисаб апIуранчва? ³⁷ Учв пайгъамбарди



вая рюгънан адмиди гыисаб апIурайири узу бикIурайиб, Чав Агъайнин дебккнайиб вуди, къабул апIри. ³⁸Хъа къабул дарапI-
пур, учвura къабул мапIанай.

³⁹Гъаци вуйиган, гъардшар, пайгъамбарвалихъ хъачIаккай, Чап-
ларииинди улхузра машат мапIанай. ⁴⁰Аммаки вари лайикълуди
ва къайдалуди дубхъну ккунду.

Иса Месигъ чIиви хъуб

15 ¹Гъардшар, узу учвуз дебкку, учву къабул гъапIу ва мюгъ-
кам хъуз гъиту Ужувлан хабар ичв кIиваина хуз ккундузуз.
² Гъадму Хабарну уърхидичву, эгер узу учвуз гъапибдихъан иж-
имиidi хъЧихиш, даршиш – учву гъавайиди хъугърачва.

³ ВаритIан важиблуб, узухъна тувуб, тувунзачвухъна: Гирами
китабариъ улихъимиidi дупнайиси, Месигъ ихъ гунгъарихъанди
гъакIну. ⁴Гирами китабариъ улихъимиidi дупнайиси, Думу, накъв-
дик кивну, шубудпи йигъан чIиви гъахъну. ⁵Думу, Петриз ач-
миш гъахъну, хъа – йицикьюориз, ⁶хъасин хъудварждилан зиина
гъардшариз сабси ачмиш гъахъну. Дурарикан сакъодар гъийих-
ну, гизафдар гъамусра Чивиди ими. ⁷Хъасин Якъубдиз ачмиш
гъахъну, хъасинси – Месигъдин вари вакилариз. ⁸Дурарикан ва-
ритIан къяляхъна узуз, лайикъ даруриз, ачмиш гъахъунзуз.

⁹Фицики узу вакиларик варитIан циби迪 вуйир вуза, узу ва-
килвалин ччвурназ лайикъкъан дарза, гъаз гъапиш Аллагъидъ
хъугъру гирами халкъдихъ хъергри гъахъунза. ¹⁰Амма, Аллагъдин
ужувлиинди, узу йиз вуйир вуза, ва Дугъан узухъна вуйи уж'вал
давди гъюдубчIундар: узу вариditIан гизаф ляхин гъапIунза,
¹¹Узу вая жаари – учу гъациб Хабар дебккну, учву хъугъунчва.

ГъачIидар чIиви апIуб

¹² Йипай гъеле, эгер Месигъ, хабар дебккрайиси, Чиви гъахъ-
нуш, учвкан сакъодари, гъийихдар Чиви шлуб дар, фици кIура?

¹³ Эгер гъийихдар Чиви шлуб дарш, Месигъра Чиви хыдайи.

¹⁴ Хъа эгер Месигъ Чиви гъахъундайиш, учу дебккрайи Хабар,
дидихъди ичв хъугъвалра, дав хыбдайи. ¹⁵Дидланра гъайри уч-
кан, эгер гъийихдар Чиви шлуб дар кIурубдиз лигуруш, Аллагъ-
диз къаршу кIучIлин шагъидар шула, фицики учу, Чиви дархъи



Месигъ Аллагъди чИви гъапIну, кIурача. ¹⁶ Эгер гъийихдар чИви шлуб дарш, Месигъра чИви гъахъундар. ¹⁷ Месигъ чИви гъахъундарш, ичв хъугъувалра дав ву, ичв гунгъарра учвук ками. ¹⁸ Дици вуш, Месигъдихъ хъугъну гъийихдар, гъаммишандиз гъачIну. ¹⁹ Эгер Месигъдиин али ихъ умуд гъаму умризтIан ка-йиб дарш, имбу вари адмийирик варитIан пис гъялнаъ ухъу ахъа.

²⁰ Месигъ, дугъриданра, чИви гъахъну! Думу гъачIидаригъян сарпирди чИви гъахъну! ²¹ Сар адмийилан гъаму дюн'яйиъ айжал абхъганси, чИви хъувалра сар Адмийиланмина гъафну. ²² Адам-дилантина вари фици йихуруш, Месигъдилантина вари гъаци чИви хъиди. ²³ Амма гъарсар чан къайдайинди: сифте, сабпи бегъер, Месигъ, хъасин, Думу къяляхъ гъафиган, Месигъдиндар вари, ухъу, чИви хъиди. ²⁴ Дугъу, гъарсаб гъакимвал, гъарсаб гъюкум ва къувват терг дапIну, Адаш Аллагъдихъна Паччагъ-лугъвал тувди, хъа гъадмуган ахир гъиби! ²⁵ Дугъу паччагъвал, Аллагъди вари душмнар Дугъан ликарикк духну дахъайизкъан, апIиди. ²⁶ Терг апIуз ккайи ахиримжи душман айжал ву. ²⁷ Фи-цики, Аллагъди «Гъадгъан ликарикк вари ккирчну». «Вари ккирчну» кIуруган, Ккирчурнур ктар. ²⁸ Дугъу Гъадгъан хилиъ вари ивган, вари ва варибидъ Аллагъ хъпан бадали, Учв, Байра, Чан хилиз вари Тувурин хиликкна гъягъиди.

²⁹ Эгер думу дици дайиш, адмийир, гъийихдарихъандира шту-ан гъаз шула? Эгер гъийихдар чИви апIуз шулдарш, гъаз дура-рихъанди штуан хъидихъа? ³⁰ Гъар сяльтнак ухъура гъаз хатIий-рикк ккахъхъа? ³¹ Узу гъар йигъан айжаликк ккахъраза. Узу ихъ Агъа Иса Месигъдин улихъ учв'инди фици фурс апIураш, гъа-циб къувватнаъди му кIурайибра кучIал дариз, гъардшар. ³² Эгер адмийин улариан лигураш, узу фу бадали Эфесдий айи вягъ-ширихъди дяви гъабхидий? Узуз дидкан фу файда ка хъа? Гъийихдар чИви шлуб дайиш:

«Гъачай ипIухъа, убхъухъа,
гъапIнура закур йикIурайидар дарин хъа».

³³ Учву учвуз кIучIлар апIруси дарибши гъа: «Чиуру шадлугъа-рий гъяни хасиятар чIур апIуру».

³⁴ Учвуз лайикъ вуйиси, фикриз гъачай, гунгъар апIуб гъитай, фицики ичв арайиъ гъамусра Аллагъ айгърудар имийичв – ми-ци учвуз нач хъуз кIураза.



Ихъ беден фициб хъибди?

³⁵ Сари гьерхуб мумкин ву: «Дийихнайидар фици чИви хъиди хъя? Думуган дуарин беден фициб хъибди?» ³⁶ Фикирсузар! Уву гъубзу тум ктубчIвбан бадали, сифте думу пуч дубхъну ккунду! ³⁷ Уву тум убзруган, вари укI-мукIди убзурадарваки, хъя дидгъян – удраг, дяхнин удраг, ясана жараб гъациб. ³⁸ Хъя Аллагъди Чаз ккуниси думу тумраз – гъардиз хас вуйи жан тувра. ³⁹ Вари жанар сабстар дар, мисалназ адмийирин жараб, гъайванатарин жараб, жакъварин жараб, балугъарин жараб ву. ⁴⁰ Мидлан гъайри, жанар а аэршариндар ва жилиндар. Аэршарин жанаriz чпиз хас вуйи успагъивал а, хъя жилиндариз – чпин. ⁴¹ Ригъдиз чан акувал а, вазлиз – чан, хядариз – жараб. Чпин нубатнаъ хядара, крачIрувализ дилигну, чиб-чишихан жара шула.

⁴² ЧИви шлуганра, гъаци хъибди. Ухъухъ хъайи беден тумси убтIруб ву, хъя ЧИви шлуган, ухъухъ хъибшру беден убтIруб хъибдар. ⁴³ Накъвдик кивру беден асккануб шулу, хъя ЧИви шлуб – успагъиб! Кивра зяифуб – ЧИви шула къудратлуди, ⁴⁴ кивра рапбъкуру мутмусиб – ЧИви шула рюгънанубси.

Рябкъру беден айиган, рюгънан беденра айиб ву. ⁴⁵ Гирами китабариъ, сарпи адмийиз, Адамдиз, ЧИви рапбъкуру беден гъабхъну, хъя Исайиз, аххиримжи Адамдиз, уымрин булагъ Вуйириз, рюгънан беден гъабхъну, дупна. ⁴⁶ Сифте гъюруб, рюгънануб ваъ, хъя рапбъюри шлуб гъафну, ва хъасин – рюгънануб. ⁴⁷ Сарпи адми жилин рюкъдикан гъахъну, хъя къюрпи Адми – аэршариан гъафи Адми. ⁴⁸ Сарпи жилин адми фицир гъахънуш, жилин адмийирра гъацдар гъахъну, хъя аэршариан гъафи Адми фицир вуш, аэршариз гъягърударра гъацдар хъиди. ⁴⁹ Ухъу гъаму раЖари фици жилин адмийиз ухшар вуш, гъаци аэршарин Адмийиз ухшар хъидихъя.

⁵⁰ Учвуз кIураза, гъардшар, ифина йикк Аллагъдин Паччагъ-лугъдин ирсчийр шлуб дар, ва убтIруб дурубтIрубдин ирсчи хъибдар. ⁵¹⁻⁵² Хъебехъай, узу учвуз гъамус сир ачмиш апIидиза: зурнайин аххиримжи дих утIубччу сяльт ухъу вари йихидар, хъя хабарсузди, улар уылЧюкъну арццайиз, вари дигиш хъиди. Зурнайин дихнахъди дийихнайидар дурутIру жанар хъади чИви хъиди, хъя ухъу дигиш хъиди. ⁵³ Вари убтIруб дурубтIрубдиз



илтІбкІди, йибкІруб – дилибкІрубдиз. ⁵⁴ Вари убтІруб дурбутІрубдиз ва йибкІруб дилибкІрубдиз илтІбкІган, гъаму гафар тамам хьиди:

«Аъжал гъалибвали хътІюбкью!»

⁵⁵ «Эй аъжал, набшдияв гъалибал?

Эй аъжал, набшдияв, галам?»

⁵⁶ Аъжалин галам – гунагъ ву, гунгын къувват – Къанун. ⁵⁷ Аллагъдиз чухсагъул! Дугъу ихъ Агъа Иса Месигъдиланмина ухъуз гъалибал туврахъуз.

⁵⁸ Гъаддиз, йиз ккуни гъардшар, ижмиди гъузай. Минди-тинди хъахърудар махъанай. Агъа бадали вуйи ляхниз фукІара гъайиф мапІанай ва аygъю йибхъай: Агъайиз вуйи ичв ляхин давди гъю-дубчІвидар.

Жара хъугърудариз кюмекар

16 ¹Гъамус Ерусалимдій айи Аллагъдин гирами халкъдиз кю-мек вуди пул уч апІбакан. Узу Галатдій айи хъугърудариз апІн гъапиб учвура апІнай. ² Гъит учвкан гъарсари, гъяфтайн садпи йигъан, шлихъан фукъан удукурууш, ичв гъюру хайирназ дилигну, узу гъафиган уч апІури, давди вахт гъадрапІбан бадали, кюмекназ пул гъязур апІнай. ³Хъа узу гъафиган, учву уч гъапІу кюмек Ерусалимдиз гъабхбан бадали, учву ктагъу адмийир, насиғъятнан кагъзарра тувну, гъаъдиза. ⁴ Эгер уузора дина гъя-гъюб алабхъурууш, дурарра узухъди гъиди.

⁵Хъа узу учвухъна Македонияйи хъпан къяляхъ гъидиза. Гъю-рур гъадлин мина гъидиза. ⁶Учвухъди саб вахтназ гъузуз ният айиз, мумкин ву учвухъ узу къюрдра адапІуз, хъасин, эгер узу дилинтина гъягъруси гъабшиш, рякъ'ин апІуз ууз кюмек апІ-дичва. ⁷Узу гъаму ражари учв'ин улукъидарза, улукънийишра, ду-му сацІиб вахтназІан хъибдайи. Эгер Аллагъди гъитиш, учвухъ гизаф вахт адапІуз юкІв хъайиз. ⁸Эфесдій узу ХъуцІударин машквар хъайизкъан гъуздиза, ⁹Фицики мушваш, хъуркъували-инди гъуллугъынта хъуз шлуси, йиз улихъ яркъуди урчІар арцна. Душмнарра цІиб дар.

¹⁰ Эгер Тимофей гъафиш, лигай, дугъаз учвухъ хатІасузди ибшри, фицики дугъура, узуси, Агъайин ляхин күли гъабхура.

¹¹ Думу гъяспикк ккадарди гъич фужкІара даришри. Хъасин



думу, узухъна къляхъ гъюз шлуси, мясляйтниинди рякъюь аай. Узу дугъазна гъардшариз ккилигураза.

¹² Аполлос гъардшикан. Узу дугъкан, гъардшарра хъади, учвухъ-на гъюб тӀалаб гъапIнийза, амма гъаму ражари дугъан гъюз тя-мягъ хътар. Думу, мумкинвал гъабхыиган, гъиди.

¹³ Мугъаятди гъузай! Хъугъвалий ижмиди гъузай, кIубанди ва кувватлуди йихъай! ¹⁴ Ичв апIурайиб вари, масанвал ади, апIинай!

¹⁵ Сабсанубдикан учвкан тӀалаб апIуз ккунди азуз, гъардшар: Стефанусдин хуландар аьгъячвуз, Ахаяийь дураги сарпидарди Месигъ къабул гъапIну ва, Аллагъдин гирами халкъдин гъай-гъушнаь хъуз, чпин уьмрар бахш апIура – ¹⁶ гъацдар адмийи-рин, гъуллугънаь айи вардарин ва дурагиз кюмек апIрударин гъайгъушнаь йихъай. ¹⁷ Узу Стефанусна, Фортунатна, Ахаик ми-на гъюб’ин гизаф рази гъахъунза. Дураг дуфнайиган, учву йиз гъвалахъ хъайиси шулазуз. ¹⁸ Дураги узукра ва учвукра юкIв капIра. Гъацдар адмийириин гъюрмат уьбхяй.

¹⁹ Азияийь хъугърудари учвуз саламар хътаура. Агъайихъ хъугъ-найивалий гъардашна чи вуйи Акилайина Прискилайи ва дурагин хулаь уч шулайи хъугъру варида мани саламар хътаура-чвуз. ²⁰ Мушваь вари гъардшари саламар хътаура. Чиб-чпиз ги-рами макниинди салам туври апIинай.

²¹ Гъамус узу, Павели, йиз хили бикIураза: ²² Шлиз Агъа ккун-дарш, гъит бала гъядябхъричаз. Эй, Агъа, гъач!

²³ Агъа Исаин уж’вал учвухъди гъит ибшри! ²⁴ Йиз масанвал – вари учвуз, Иса Месигъдиндариз. Амин.



КОРИНФДИЙ АЙИ ХҮҮГҮРУДАРИЗ 2-ПИ КАГЬАЗ

Коринфдий хүүгүрдарииз вуйи Павелин сабни кагъзи вар и месэлдир гыуркIну гъял гъапIундайи. Думу кагъзин хүүгүрдарииз вуйи тясир мянфяаьтлуб вуди гъабхыну, аммахи гъял дапIну ккуни жара суаларра арайиз удучIвнийи ва дурагга гъял дапIну ккундийи, гъаддиз кьюбти кагъаз чарасуз лазим вуйи. Кагъзиан рябкьюрайиси, Павел Исаин вакил вуйивалихына гъацIари сабан чин тереф ачухъди улупнадайи. Коринфдий, Исаин вакилар вучу кIури, уччуу улхбар-рахбар апIури лицурдай иблисари хүүгүрдариикан сакьюдар чин терефназдира кимиidi хъчиюхнийи. Му кагъзи, сабан алахьу кучIин вакила-рихъди мягъянай, хъа дураги Исаикан ва хүүгүуваликан кIу-руб дикъатнаан ахтармииш апIинай, хъасин дураг фужсар вуш, аягъю хыибди, кIурайи Павели му Коринфдин хүүгүрдарин ги-заф гъайифар зигурайивал рябкьюра. Гъатму терефнаан, сабни кагъзиз улупнайи насигъятар хүүгънайдари фикриз гъадагъ-ган, Павел разира духовнайи. Коринф агълариз чан уымрикан ктибтури, Павели Аллагъдин рягымлувал кIваин хура, фици-ки, ляхнар фукъан гъагъидар ва писдар вушра, Агъайи дураг ужувлариз илтIикIуру.



Павели, Агъайиз баркаллагъ кIури, Дугъан ад за апIура

1 ¹Аллагъдин амриинди Иса Месигъдин вакил духьнайи Павелихъан ва Тимофеи гъардшихъан – Коринфдий Аллагъдихъ хъугърудариз ва Ахаяйин варишвариъ яшамиш шулайи Аллагъдин гирами халкъдиз.

² Аллагъдихъан, ихъ Адашдихъан ва Агъя Иса Месигъдихъан мяслияйт ва уж'вал ибшричвуз!

³ Рягымувалин Адаш, ухъу ккаарцурайи Аллагъ, ихъ Агъя Иса Месигъдин Адаш ва Аллагъ, гъит ужувлан аднаш ишри. ⁴Ихъ гъарсаб читинвалиъ Дугъу ухъу ккарцура. Дердерир ахънайи жара адмийир ухъура гъаци ккарцбан бадали, Аллагъди ккарцурахъу. ⁵Гъаз гъапиш, Месигъ бадали ухъ'ин алахъурайи азбар фукъан ахъюдар вуш, Месигъдиланмина вуйи ккарцуvalra гъадму къадар артухъ шулахъуз. ⁶Уъмриъ уч'ин алахъурайи читинвалар, учву ккарцбан ва уърхбан бадали альгъ апIурайидар вуйич. Учуз дурубънайи ккарцуval, учвura ккарцбан бадали, туврайиб вучуз. Диidi, учу альгъ апIурайидарстар учв'инра алахъру азбар учвura кIубанди альгъ апIбан бадали, кюмек апIидичвуз. ⁷Учвук ижми миж кайич, ва альгъячуз: ич азбарин пай гъадабгъурайиси, учву ич ккарцувалинра пай гъадабгъурачва.

⁸ Узуз, гъаршар, Азияйиъ айиган уч'ин улукъу читинваларикан учвузра альгъю дубхъну ккундузуз. Дурап гъадмукиан альгъ апIуз даршлукъандар вуйики, сарун учу Чивиди гъузур кIури, миж кимдайич. ⁹Учу сарун Чивиди гъитур кIури хиял дайич, ажжал гъадабтIайчуз, аммаки мици, учу учук варь, хъа гъачIидар Чиви апIру Аллагъдик миж кади гъузбан бадали, гъабхъиб вуйи. ¹⁰ Гъадгъу ажжалин хатIайиккан ккадаунчу, ва гъамусдихъантинара ккадаиди! Ич Гъадгъак миж кайич, учу уърхи迪 кIури. ¹¹Учву, ккарагури, учуз кюмек апIурачва. Гизафдар ккарагн, Аллагъди багъишар учуз гъапIган, гизафдари учхъанди чухсагъул пиidi.

¹² Учу, гъаму дюн'яйиндаихъди, иллагъки учвухъди ич альакъиir, намуслуди ва дугъриди дерккри гъахъунча, – ич марцци намуснора гъаци кIура, – учу гъамдинди тириф апIурач. Му учуз Аллагъдихъан дурубънайиб ву. ¹³⁻¹⁴Учу гъибикIубдик, дурхну, гъавриъ адрахъуб, гъич фукIара гъабхъундариич. Ич гъубкIину гъавриъ ахъну, – хъа саб къадар учву гъамустIанра ич гъавриъ



ачва, — Агъа Иса Месигъ хъадакну гъюру Йигъан, учу учв'инди тяриф апIурайиси, учвура уч'инди апIур кIури, йиз миж кайиз.

¹⁵ Гъаци шлуб аygъяди, учвуз кьюбан уж'вал хъузди, сифте учвухъна гъюз ккунди азуз. ¹⁶ Македонияйиз гъягъюрайир учв'ин улукъуз ккайза, хъасин — къяляхъ гъюрурра, ва гъадмуган узуз Ягъудияйиз гъягъюз кюмек апIидийчва. ¹⁷ Учву, узу мици фикир дарапIди дапIна, кIури, хиял апIурайчва? Ясана, фагъумсузди, узу гъадму саб гагъди «авра» «ваъра» кIурайиси?

¹⁸ Аллагъдин улихъ тасдикъ апIураза: узу учвуз кIурайиб саб гагъди «авра» «ваъра» кIури кIурадарза. ¹⁹ Учвуз узу, Сильванди ва Тимофеи хабар дебкку Аллагъдин Бали, Иса Месигъди саб

гагъди «авра» «ваъра» кIурадар, Дугъаъ айиб гъарган «ав» ву! ²⁰ Аллагъди тувнайи вари гаф Иса Месигъдиъ тамам гъабхъну! Гъаддиз Аллагъдин ад бадали Гъадгъахъди сатIи духънайидари «Амин» кIурacha. ²¹ Учвура учтура Месигъдиъ саб духънайивал ижми АпIурайир Аллагъ ву. Гъадгъан гъуллугънаъ хъуз Аллагъди ухъкан чим кадатна ²² ва Чан лишан уч'ин йивна. Ихъ юкIвариъ Дугъу, гъюз имбубдин тасдикъвал вуди, Гирами Рюгъ аъна.

²³ Узу гъамусдиз Коринфдиз, ичв язухъ апIури, гъафундайза, Аллагъ шагъид ву. ²⁴ Учуз, ичв хъугъувалиин агъавал апIуз ккунди адарчуз, варь, учу апIурайиб вари, ичв шадвализ вуйич, гъаз гъапиш учву хъугъувалиъ мюгъкамди дийигъначва.

Павелин насиғъятар

2 ¹ Гъаддиз, учву пашман апIуз кIури, сарун учвухъна дарфуз, къаст гъапIунза. ² Эгер узу учву пашман гъапIиш, узлан пашман гъахъири узу шад дарапIди, сарун шли апIиди? ³ Узу гъатмунуб кагъаз, учвухъна гъафиган узу рази ктауз ккайдарилантини пашман дархъуз, гъибикIнийза. Йиз шадвал — ихъ вардин шадвал вуйивалик саб шак кадариз. ⁴ Учвуз думу кагъаз нивгъар рузури, юкIв гъагъиди, кIваъ дерд ади гъибикIнийза. Йиз метлеб учву пашман апIуб дайиз, хъа узуз учву фукъан масанди вуш, учвуз аygъю хъпан бадали, гъибикIнийза.

⁵ Узу пашман гъапIури, неинки узу, хъа, сацIиб вушра (му йиз заанвал дариз), учву вари пашман гъапIину. ⁶ Сарун дугъаз гизафдариҳъан гъурубкъу жаза чIяльн ву. ⁷ Хъа гъамус, хил алдабгъну, думу ккарцай, дердну ккағъуз мигъитанай. ⁸ Миннат вуйиз,



дугъаз ичв масанвал улупай. ⁹ Гъацира узу думу учвуз, варибидъи учву хъпехъури шулуш, ахтармиш апIури, гъбикиIуб вуйиз. ¹⁰ Учву хил алдабгъурилан узурал алдабгъидиза. Хъа узу хил алдабгъурилан, эгер думу касдиз хил алдабгъуз ужуб фукIа аш, Месигъдин улихъ учву бадали алдабгъуб вуйиз, ¹¹ иблисди ухъу алдатмиш апIуз гъидритузди, хъа дидин ниятар ухъуз ужуйи аygъяхъуз.

¹² Узу Троадайиз Месигъдикан Ужувлан хабар рабгъури гъафиган, Агъайи душваъ ляхин апIуз раккнар арцунзуз. ¹³ Аммаки узхъан архаинди гъузуз гъабхъундарзухъан, фицики душваъ хъугъвалий йиз гъардаш вуйи Тит адарди гъахъну. Магъа гъаддиз Троадайи хъугърудариз баркаллагъ дупну, Македонияиз гъушунза.

¹⁴ Учу, Месигъдий саб духънайдар, хъуркъувалиинди гъаммисан улихъ гъахурайи ва варишвариъ учлантина ширин ниар адаурайи аygъювалар Дугъкан рагъурайи Аллагъдиз чухсагъул.

¹⁵ Гъаз гъапиш, уърювалин ва аյжалин рякъюъди гъярайидарин арайиъ, Месигъди Аллагъдиз ургурайи гъадму ширин ниар, ари учу вуча. ¹⁶ ГъацIариз учу – айжал хурайи, хъа гъацIариз – ЧИвивал хурайи ширин ниар вуча. Гъаци ляхин шлихъан апIуз шул?! ¹⁷ Учу, гизафдарси, хайир бадали, Аллагъдин Гафнак камк кипрадарча. Месигъдихъди саб гъахъихъанмина, учу, Аллагъди гъаънайдари, Аллагъдин улихъ марцци кIваан, ктибурача.

Цийи Йикъарнан гъуллугъчийр

3 ¹Учу ич тяриф апIури, хъана таниш хъухъахъа? Имбударизси учзура, учвухъна гъюз ясана учвхъан гъягъюз учу лайикъу адмийир ву, кIуру кагъзар гъадагъуб, рубкъурайинхъа? ² Учву вучва ич кагъаз – ич кIваъ дебикIнайи, вардиз аygъю ва варди урхурайи кагъаз. ³ Учву, чернилиинди ваъ, хъа Аллагъдиз вуйи ич гъуллугъниинди, Чиви Аллагъдин Рюгъниинди, гъванарикра ваъ, хъа инсанарин юкIварик дебикIнайи Месигъдин кагъаз вуйиб, варидариз рябкъюра.

⁴ Месигъдилантине Аллагъдин улихъ вари якъин гъаци вуйибдик саб шак кадарич. ⁵ Му мици, ич гъунарниинди гъабхъиб ва учу гъаци кIурайиб дарич. Ич гъунар вари Аллагъдихъан вуйич.

⁶ Дугъу учкан, Цийи Йикъарнан гъуллугънаъ хъуз, гъуллугъчийр



кта́ньу. Думу Йикъарар — дидикІнайи гъярфар дар, вაъ, хъа Рюгъ-нахъан ву. Фицики гъярфну йикIуру, хъа Рюгъну уьмур хуру.

⁷ Гъвандиъ гъярфариинди адабІнайи Къанундиз апIури гъа-хъи гъуллугъ кIваин апIинай. Думу гъациб адниинди дебккна-йиб вуйики, Израилариҳъан Мусайин нур туврайи машназ, гъе-ле нур къаназ гъубзундаршра, лигузкъан гъабхъундайи. Аъхириъ аъжал гъабхи му гъуллугънаъ хувал гъамкъан адлу ляхин вуйиш, ⁸ хъа Рюгъну гъуллугъ апIрувал фукъан адлу шул? ⁹ Эгер инсан тахсиркар апIру гъуллугъ гъациб адлу вуйиш, хъа инсандин тахсир ктипурайи гъуллугъ фукъан адлуб шул! ¹⁰ Думугандин ад-лувал швнубсаб раЖари артухъ вуйи адлувалихъ тевиган, гъамус думукъан адлуди гъибгърикъан дар. ¹¹ Эгер вахтназ вуйи ад гъаци аъхюб вуш, хъа фукъан аъхюб шул гъаргакдиз вуйи ад!

¹² Гъаци вуйиган, ухъуз ухъук кIубанвал капIру умуд ахъуз ¹³ ва ухъу, Израилариз кIубшвурайи адлувал дярябкъбан бадали, Мусайиси маш элебкну, лицурадархъа. ¹⁴ Хъа дуарин фагъум-ра элебкнайи. Гъамусра, Йирси Йикъарар урхрган, гъадму чарч кIул'ин илипурами, гъаз гъапиш думу чарч МесигъихъантIан алдабгъуз шлуб дар. ¹⁵ Гъийин йигъазкъан, Мусайилантина дебкк-найи Къанун урхрган, жугъдарин юкIвар элеркну ими. ¹⁶ Хъа адми Агъайихъна илтIикIруган, дугълан думу чарч алдабхъуру. ¹⁷ Агъа — Рюгъ ву, хъа Агъайнин Рюгъ наан аш, гъадушваъ азад-валра а! ¹⁸ Ухъуз варидализ ачуҳъ машнаан гюздианси Агъайнин адлувалин нур рябкъюрахъуз ва Гъадгъаз ухшар дигишра шула-хъа. Дугълан ад ухъуль артухъ-артухъ шула, фицики думу Агъай-хъан гъюрайиб ву, хъа Думу — Рюгъ ву!

Рюгънан хазна

4 ¹Му гъуллугъ учуз Аллагъди Чан ужувленинди тувнайиб ву ва юкIв дар гъабхъундариch. ²Учу нач шлу, намус ктру ляхнар тина апIурача. Учу сабанра аымалдар тIулар ва Аллагъдин гаф дацIабкну апIадарча. Учу гъякънакан хабар дебккрача, ва гъит гъарсар касди, чан намусназ дилигну, Аллагъдин улихъ учуз кымат туври. ³Эгер учу туврайи Хабар шлихъна рубкъурадарш, думу аъжалихъна гъягъюрайихъна рубкъурадар. ⁴Гъаму дюн'-айин аллагъ-иблисди хътругърударин фагъум, Чай Аллагъ ач-миш апIурайи Месигъдин адлуваликан вуйи Ужувлан хабарнан



акв дярябкъюз, кур апIура. ⁵Учу ичуб ктибури адарча, хъа Иса Месигъ Агъайн Хабар ктибуруча, ва Месигъ бадали ичв гъуллугъналь айидар вучу. ⁶Гъаз гъапиш «МучIушнаан, гъит, акв удубчIври», – гъапи Аллагъди, Иса Месигъдин машниин рябкъюрай Аллагъдин аднакан аygъовалар туври, ич юкIвар аку апIура.

⁷Учу гъамциб хазна рүгдин гъабариъси, уьбхюрача. Му ккуду-дубкIру къувват, ич ваъ, хъа Аллагъдин вуйиб улупурacha. ⁸Вари терефарихъанди учу чIюркъюра, амма дюргънадарча. Учу миж кимдру гъялналь ача, амма умуд кадабтIнадарич. ⁹Учухъ хъергри шулу, амма ул'ан идитнадарчу. Бегъем дурччвначу, амма йивну дукIнадар. ¹⁰Исайин уьмур учу арайиз гъюбан бадали, Дугъан аյжал гъаммишан ич бедендиъ айич. ¹¹Учу чIивидимиidi Иса-йилантина гъарган айжализ туврачу. Исайин уьмур ич айжал хъайи жанариз гъюбан бадали айжалин улихъ дийигънача. ¹²Уьм-ри учву чан ляхин тамам апIбан бадали, айжали учу чан ляхин апIура.

¹³Учу хъугъвалин рюгъ айиган, «Узу хъугъунза ва кIурира аза» дибикIнайиси, учу хъугърача ва гъаддиз кIурира ача. ¹⁴Учуз айгъячуз: Агъа Иса Месигъ чIиви ГъапIури, Исади учура чIиви апIиди ва учвухъди сабси учура Чан улихъ дерккди. ¹⁵Му вари, артухътIан артухъ инсанар ужувлакк ккаърайи уж'вали Аллагъдин адлувализ хъана артухъ чухсагъул пубан бадали, учвуз вуйи уж'вал ву.

¹⁶Гъаддиз учу ккагънадарчу. Гъеле учу ликрилан алдахъншра, хъа айтIан йигълан-йигъяз таза шулача. ¹⁷Фицики ич пчIу ва вахтнастIан дару айзабари учуз артухъ ва гъаммишандиз вуйи ад-лувал хура. ¹⁸Учу рябкърубдиз лигурадарча, хъа – дярябкърубдиз, гъаз гъапиш улариз рябкъруб вахтнастIан дар, хъа дярябкъ-райиб – гъаммишандиз.

Хъугъвалин табшуругъарихъди яшамиши иихъай

5 ¹Учуз, жилин уьмрин паж терг гъапIиган, айршариъ гъарган-дин хал – адмийирин хилари ваъ, хъа Аллагъди арайиз хру хал ккилибгурайиб айгъячуз. ²Сабан, ухъу гъамушв'ин илмиди, ухъу айршарин гъадму палтарfila алахъуйкIан кIури, гъагъи угътар алдахъури, ккилигурайдар вухъя! ³Думу палтар алахъган, ухъу гъяцIалди гъузидархъя. ⁴Хъа сабан ухъу, ихъ гъаму жилин пажакк



ккимиidi, гъагъи угътар алдахъури гъуздихъя. Ухъуз читинди вухъуз, гъаз гъапиш ухъуз гъяцалди гъузуз ккундархъуз, айжал хъайб вари уъмри хътюобкъбан бадали, палтар алахъуз ккундухъуз.⁵ Гъаци апIбан бадали Аллагъди ухъу халкъ дапIна. Дугъу Чан гаф тамам апIрувалин лишан вуди ухъуз Чан Рюгъ тувнахъуз.

⁶ Гъаддиз, гъеле сабан ухъу жувуван хулаьси бедендиъди Агъайихъан ярхлади ашра, архаин вухъа, ⁷фицики ухъу улариз рябкъюри варь, хъа хъугъну яшамиш шулахъа. ⁸Гъаци вуйивал аygъяди, архаин вучи ва, жувуван беден дипну, Агъайихъна гъягъюз ккундийчуз. ⁹ Гъаддиз ич метлеб, учу бедендиъ ашра – адаршра, Агъайиз ккуниб апIуб вуйич. ¹⁰ Фицики Месигъдин Суддиз гъюб ухъуз варидализ алабхъиди ва бедендиъ имиди ухъу гъапIу гъяни ва пис ляхнализ дилигнун, гъаруиз рубкъруб тувди.

¹¹ Гъаддиз лигну, Агъайихъан гучIурачуз ва думу гучI жарада-ризра улупурача. Учу фужар вуш Аллагъдиз ужайи аygъя. Ичв намусназра учу фужар вуш, гъаци ужайи аygъя, кIури, хиял вуйиз. ¹² Учу ичв улихъ ич тяриф апIури хъана таниш шуладарча, хъа учвхъан, айтПанубикан дарди, зиъланубикан тяриф апIрударин улихъ, саб гучI адарди, учкан тяриф апIуз шулучвхъан. ¹³ Шли учу фикрихъан душна, кIураш, Аллагъ бадали гъаци духъ-нача. Хъа эгер учу ужайи фикир апIураш, мици учву бадали апIурача. ¹⁴ Месигъдин масанвали гъяракатнак китнайдар вучи, варидарихъанди Месигъ гъакIнуш, гунгъар дарапIуз вари дийих-найивалин саб шак адарич. ¹⁵ Думу варидарихъанди, гъамус яшамиш шулайидар чпи бадали варь, хъа чпихъанди жан Тувур ва чиви Гъахъир бадали яшамиш хъуз, гъакIну.

¹⁶ Гъаци вуйиган, сарун учу адмийин фагъмиинди саризра ли-гури имдарча. Мугагъназ Месигъдиз гъаци лигуйча, сарун – варь. ¹⁷ Гъаддиз, Месигъдик кидикънайир, цИийиди бабкан духънайир ву. Йирсивал имдар, цИийиб дуфна! ¹⁸ Хъа му вари Месигъдиланмина учу Чахъди албагу Аллагъдихъан ву, ва имбударра Чахъди албагбан гъуллугъ Дугъу учуз тувна. ¹⁹ Яни Аллагъди, Месигъдиланмина Чайнди вари дюн'я чпи гъапIу гунгъариз дилигди, албагну. Ари гъаму албагбакан Хабар дебкк дупна-чуз. ²⁰ Гъаддиз лигну учу Месигъди кадагъну гъайнайдар вучи, фицики учлантина Аллагъ адмийирихъди улхура. Гъаддиз Месигъдин ччвурнахъан миннат апIурача: Аллагъдихъди албагай!



²¹ Гунагъ ктру Месигъ Аллагъди ихъ гунгъарихъанди гъурбан гъапІну. Аллагъди гъаци, Чан улихъ ухъу, Месигъдихъди саб духъну, гъякъ хъуз кІури, гъапІну.

Уърхюз шлувалин вахт дуфна

6 ¹ Аллагъдин гъуллугъчири, учу, учкан ккун апІурача: учвуз багъиш дапІнайи Аллагъдин уж'вал, гъавайиб дарибшри.

² Дугъу гъамци кІура, аххир:

«Ужуб вахтна Узуз яв дих гъебхъунзуз,
ва уърхру йигъан Узу увуз кюмек гъапІунза».

Лигай, гъаму вахт ужуб вахт ву, гъийин йигъ уърхру йигъ ву!

³ Учу, ич гъуллугъналь тягъналь шлуси, шлиз-вш лик хъипрадарча. ⁴ Учу Аллагъдин гъуллугъчири вуйивал варибдиъ улупурача: зурба сабурналь, бедбахталиъ, фукІа гъубкІну адрувалиъ, читинвалиъ, ⁵учу урчврган, дустгъарий итруган вая гъалабулутъарий уч'ин жарадар алаърган, гъагъи ляхнариъ, иишвну нивкI адрувалиъ, гаш'валиъ, ⁶марццивалиъ, аыгъювалариъ, гъодливалиъ, уж'вал апІбай, Гирами Рюгънан хиликк хувалиъ ва кІваантІан вуйи ккунивалиъ, ⁷гъякъ гафналь, Аллагъдин къувватналь, гъякъвалин яракъ гагул ва арчул хилиъ, ⁸ич адналь ва беябурвалиль ккунивалинси даккнивалинра тягънийириъ. Учкан кучІляхъяр ка-даъна, хъа дугъри вуча. ⁹Учу саризра аыгърударси гъисаб апІура, хъа варидализ учу аыгъя. Учу дийихна, кІури, гъисаб апІура, хъа Чивиди ача. Учуз жазийир гъадатІури шулу, хъа йивну дийихнадар. ¹⁰Учу дердерикк ккитри шулу, хва гъарган шадди вуча. Касибди вуча, хъа гизафдар девлетлу апІурача. ФукІа адарчуз, хъа вари хилиъ айич.

¹¹ Коринф ағылар, учу учвуз варибикан ачухъди гъапунча. Учу ичв улихъ юкІвар арццуунча. ¹² Учуз учву гъаци ккундучузки, хъа учву учу ккун апІурадарчва. ¹³ Узу учвуз йиз гъахи веледаризси кІураза: учву учуз ичв юкІварра арццай!

¹⁴ Хътругърударихъди саб юрккгъиль кІул мииванай. Гъякъуль-вална нягъякъвал сатІи шулин? Аквна мучІушин сатІи шулин?

¹⁵ Месигъдин Велиарихъди (иблисдин ччвур) аylакъа хъуз мум-кин вуйин? Ясана хъугъурна хътругъур саб шулин? ¹⁶ Аллагъ-дин хална идолар саб вуйин? Ухъу – Чиви Аллагъдин хал вухъа, финики Аллагъди ухъкан гъамци гъапну:



«Узу дурагигъ яшамиш хьидиза,
Узу дурагин арайиъ лицидиза,
Узу дурагин Аллагъ хьидиза,
хъа дурагикан Узуз халкъ хьиди».

¹⁷ «Гъаддиз дурагигъян гъюдучIвай
ва жара йихъай, – кIура Агъайи, –
чиркинубдик мукучанай,
хъа Узу учву къабул апIидизачву».

¹⁸ «Узкан ичв Адаш хьиди,
ва учвкан Йиз баярна шубар хьиди», –
кIура вари Чан хилий айи Агъайи.

Павелин шадвал

7 ¹Гъаци вуйиган, йиз ккунидар, гъачай, ухъуз ужувлар хъуз
гъамциб гаф тувнайиган, ихъ беденна рюгъ чиркин апIру ва-
рибдихъан марцц дапIну, Аллагъдин улихъ ахю гукIивал ади,
гирамиди яшамиш хъуз улихъ гъягъидихъа.

²Учуз ичв юкIвар арщай! Учу саризра гиран ктапIундарча,
саризра зарар тувундарча, сариканкъан ич хайирназ мянфяльт
ктабгъундарча. ³Узу му учвуз тягъна вуди кIурайиб дариз, въз,
учву ич юкIвариъ ачва, учу учвухъди яшамиш хъузра, йикIузра
гъязур вуча кIури, улихъна гъапунзаччузы. ⁴Йиз учвук гизаф
миж кайиз ва учв'ин дамахлу вуза! Учву узук гъаци юкIв капIри
шулчваки, йиз вари бедбаhtвалариз дилигди, узу бегъем шадва-
ли ацIразу.

⁵ Гъеле учу Македонияиз гъафнушра, душваъ архаинвал гъаб-
хъундарчуз. Вари терефарихъанди балайир алахъунчуин: Чатан
уч'ина гьюжмар апIуйи, хъа айтI жандив гукIиниш ин абхъуйи.
⁶ Пашманвалий ахъдар ккарцру Аллагъди, учухъна Тит гъальну,
ккаарцунчу. ⁷Думу учухъна гъафну кIури въз, хъа учву думу фи-
ци къабул гъапIнуш, гъаддикан вуйи ихтилатнин гизаф рази
гъахъунча. Дугъу, учвуз узу фукъан дяркъну ккунди аш, узуз
гъабшибдин учву фукъан дердер гъизигнуш ва фициб гъяракат-
ниинди учву узхъан хъюгънуш, ктибтунчуз – миди узуз зурба
шадвал тувунзуз.

⁸ Йиз кагъзи учвуз гиран ктапIнушра, думу бикIбииин шву-
мал дарза. ИкибаштIан, сифте швумал гъахънийза, фицики йиз



кагъзи учвуз цІиб вахтназ вушра гиран ктапІуб, гъябкънийиз,⁹ хъа гъамус шад вуза. Учвуз учву тахсиркрап вуйиб айгъю дубхъна кІури вая, хъа ичв пашманвали учву швумал гъапІган, шад гъахъунзу. Ичв пашманвал Аллагъдихъан вуйи, гъаддиз учкан харжиб фукІа гъабхъундарчвуз!¹⁰ Аллагъдихъан вуйи пашманвали швумал хъуб арайиз хуру, гъаддихъди – уърхувалра, гъайифар зигбакк ккуркъдар. Хъа му дюн'яйин пашманвали айжал хуру.¹¹ Аллагъдихъан вуйи пашманвали учвуль фу арайиз гъабхнуш лигай: аышкъ кади лихуб, гъякъвалихъна гъюб, тахсиркриина алжагъуб, гучІ'вал кади хъуб, рякъюз юкІв хъади хъуб, кІван сикинсузвал, тахсиркриин суд апІуз гъязурди хъуб. Учвук му ляхниъ сарун тахсир кимдроб гъубкІну улупунчва.¹² Узу учвуз, беябур апІур дерккну ясана беябур гъахъирихъан хъюгъну гъузутІан кІури дибикІнадарза, хъа, Аллагъдин улихъ учву учухъ фукъан хъпехъури гъузну ккундуш, учву гъаврий ахъбан бадали, гъиби-кІуб вуйиз.¹³ Ахъирий миди учу шад апІур.

Учу шад, неинки учвуль гъахъи дигиш'валари, хъа гъацира Титдин шадвали шад гъапІунчу, фицики учву вариди дугъан кІваълан гъагъ алдабгъунчва.¹⁴ Узу дугъан улихъ ичв тяриф гъапІунза, ва йиз учв'ин или хъугъ'вал пуч гъапІундарчва. Учу учвуз кІурайибра вари диш ву, ва учу Титдиз учвкан гъапІу тярифар вари дишдар гъахъну.¹⁵ Дугъаз учву, чахъ фици хъпехъниийиш ва фициб гукІнивалиинди ва жандиъ зириз ади думу учву къабул гъапІнийиш, кІваин апІрукъан, гизафтІан гизаф ккун шула.¹⁶ Уз-хъан учвухъ йирфар хъирчуз шлубдииш шад вуза.

Аллагъдин терефкрапин ачухъ хил

8¹ Гъардшар, Македонияйиль айи хъугърудариз Аллагъди фициб уж'вал улупнуш, учвуз ктибтуз ккундучуз.² Дураг гъагъи гъялнаъ ади гъахъну, дураги учІвру касибвал, дарвал гъябкъну, амма дурагин шадвалина жумартвали вари читинвалар ккағыну.³ Магъа узу шагыйд: чпин хушниинди дураги удубкъру кюмек, гъелле чпихъан шлубтІан артухъра кади, гъапІнийи.⁴ Дураги, Ерусалимдиз айи Аллагъдин гирами халкъдиз кюмек апІуз ихтияр тувуб учкан ижмиди ккун гъапІнийи.⁵ Дураги гъамкъан кюмек апІур, кІури, хиял дайич. Фицики дураг вари, сифтена сифте Агъайин хилиз бахш гъахънийи, хъасин, Аллагъдин амриинди – ич.



⁶ Гъаддиз учу Титдикан, гъардшариз кюмек апIури, чав ккебгъу гъадму ужуб ляхин учвухъра кIулиз адабгъуб, тIалаб гъапIийча.

⁷ Учвуз вари артухъра кади айивализ дилигну: хъугъувал, учвуб гаф-Чал, аыгьювалар, ляхнихъ юкIв хъайивал, учвуз учу ккунивал — гъаму ужуб ляхниъ учву заан хасият улупну ккундийчуз.

⁸ Му буйругъ вуди кIурадарзачвуз, хъа имбудари юкIв хъипну улупру гъяракатнакан кIури гъабшиш, гъадму ляхнилантину узуз ичв дугъри ккунивал ахтармиш апIуз ккундузуз. ⁹ Ихъ Агъа Иса Месигъдин уж'вал аыгъячвуз. Думу, Учв девлетлу вуйи, хъа Чан касибвалиланзина учву девлетлу хъуз кIури, касиб гъахъну.

¹⁰ Гъаддиз дилигну, ичв хайирнас саб насыгъят тувуз ккундузуз. Гъубшу йисан сарпидарди вуди учву ужуб ляхин ккебгъунчва, ва сифте гъадму фикирнас гъабхидарра учву вучва. ¹¹ Учву думу ляхин сифте ккебгънамиди фициб аышкъниинди ккебгънуш, гъациб аышкъниинди ккудубкIузра ккудубкIай. Учвхъан шлу къадарниинди тувай! ¹² Эгер учвуз аышкъ аш, адрубдиз варь, хъа ичв айибдиз дилигну, тувну ккундузуз.

¹³ Мушваъ улхуб вари гъагъар учв'ин иличну жарадарин гъял ужу апIбакан дар, хъа вари сабси хъуваликан. ¹⁴ Гъаму ражари, учвуз артухъ вуйиб адрудариз тувну, гъудрубкIрайиб гъубкIуз шулучвхъан, хъасин, учвуз адарди дурализ артухъ айиган, дурари учвуз адруб тувдичвуз. Гъамциб жюрейииинди вари сабси хъиди,

¹⁵ Гираим китабарий дунайиси:

«Гизаф уч гъапIуриз артухъ адайи,
ва цИб гъабхъириз гъудрубкIруб адайи».

¹⁶ Учу ичв гъайгъушнаа фициб жюрейииинди аш, гъаци хъуб Титдин кIавъра иву Аллагъдиз чухсагъул. ¹⁷ Тит, учу тIалаб гъапI-нушра, чан хушниинди, учв улихъ гъучIвну, учвухъна гъюрайир ву. ¹⁸ Дугъахъди Ужувлан хабарнан ужур гъуллугъчиси варишвариъ айи хъугърудариз аыгъю сарсаны гъардаш гъаърача. ¹⁹ Мидланра гъайри думу кас варишвариъ айи хъугърудари, учу ич хушниинди Агъайн ад бадали апIурайи гъадму ужуб ляхниъ кюмекчиidi ктагъур ву. ²⁰ Учу, хъугънайдари, гъамкъан уч дапIнайи аыхю пулар дюз дарди харж апIурачва, кIури, гъич сарихърана учуз тягънаа иивуз даршлуси, ихтиятди ача. ²¹ Учу, неинки Аллагъдин, хъа гъацира адмийириин улихъра, гъич саб тахсир ктарди ляхин апIурачва.



²² Учу учвухъна гизаф ляхнарий гизаф раЖари күбенвал улупу сарсан а ич гъардаш гъаърача. Гъамус дугъак хъа гизаф юкІв ка, гъаз гъапиш дугъан учв'ин лап ижми хъугъвал ал. ²³ Титдикан күри гъабшиш, учвуз вуйи кюмекнан вари ляхнарий ва рякъярий думу йиз юлдаш вуйиз, хъа имбу кьюр гъардшикан күри гъабшиш, дураг хъугърударин жямаятари гъаънайидар ва Месигъдин ад за апIурайидар ву. ²⁴ Гъаддиз, хъугърударин жямаятарииз учу учв'ин дав дамахлу даруб рябъбан бадали, учвуз дураг багъа вуйиб дурагиз улупай.

Месигъдихъ хъугърайи гъардшариз кюмек апIури гъузай

¶ ¹ Дугъри гъапиш, учу, Ерусалимдь аий Аллагъдин гирами касариз вуйи кюмекнакан учвуз бикIубра рубкурдар. ² Дурагиз кюмек апIуз ичв ижими юкІв хъайиваликан аыгъязуз. Македонияйин хъугърударин улихъ ичв тярифарра гъапIунза. Узу дурагиз учву Ахаяйиъ кюмек апIуз гъеле гъубшу йис'амнина гъязурди айиваликан гъапунза ва ичв юкІв хъайивали дурагира гъяракат кипнийи. ³ Узу учвухъна гъардшар гъаъраза, амма узу ичв тярифар дапIну, арайиъ ляхин адарди дарибшригъя. Узу учвуз, вари гъязур дапIнади ибшри, улихъимиidi гъапунзачвуз, ⁴ нагагь Македонияйин агълар узухъди гъафиш, дурагиз учву гъязурди адарди дярябкъригъя. Дарди гъабшиш, учу ичв гъамкъян тярифар дапIну, дурагин улихъ, гъеле учвкан улхурикъян адарза, хъа ич машар уьру даришри. ⁵ Гъаддиз узу, гъардшар, учву гаф тувнайиси, багъиш уч дапIну, гъязурди гъибтбан бадали, учвухъна улихъимиidi душну ккунивалин, гъаврий аунза. Гъадмуган, му ляхин, учву алаъну апIурайивал ваъ, хъа ичв хушниинди апIурайивал, рябъкиди.

⁶ Ківаиндигъибтай: къискъисди убзрури, гъаци ккадабцIидира ву, булди убзрури булди ккадабцIиди. ⁷ Гъит гъар касди, гъайиф-сузди ва гужа-гуж дарди, чан кIваъ айибкъян туври, гъаз гъапиш Аллагъдиз шадди тувур ккунду. ⁸ Аллагъдихъян вари учвуз лазим вуйиб гъаммишан артухъра кади хъпан бадали ва вари гъяни ляхнариза гъубкIину шлуси, фу вушра тувуз шулу, ⁹ дикIнадарин:

«Дугъу чан девлет юкъуб тереф касибарииз пай гъапIнийи, дугъан гъякъвал гъаргандиз гъубзруб ву».



¹⁰ Убзуриз тум Тувури, ипIуз уъл Тувури учву гъубзуб зарб апIиди ва ичв гъякъвалин бегъер артухъ апIиди. ¹¹ Учву варидихъди гъаци девлетлу хьидичваки, гъайиф дарди, гъарган адми-ириз кюмекар апIуз хъибдичвухъан, ва учву, гъайиф дарди, учлан чпиз гъапIу багъишарилантина дураги Аллагъдизра чухса-гъул пиidi.

¹² Му учву апIурайи гъуллугъну Аллагъдин гирами халкъдиз неинки кюмек тувди, хъа гъацира Аллагъдихъна вуйи ккунивал артухъ-артухъ хъуз гъибтди. ¹³ Ва ичв гъаму гъуллугънан бегъер рябкъюри, учвлантина адмиийири Аллагъдин ад апIиди, гъаз гъа-пиш учву рабгъурайи Месигъдин Ужувлан хабарнакк кIул ккив-рачва ва учвуз айибдикан шадди дурагизра, имбодаризра тувра-чва. ¹⁴ Учвуз Аллагъди тувнайи къадар адру уж'валилантина ду-рар учвхъандира ккарагиди ва учвуз багахъ хъиди. ¹⁵ Аллагъдиз, Чан ктибтуз даршлу багъишназ дилигну, чухсагъул!

*Павели, чан гъуллугъ
мягъниирихъан уъбхюра*

10 ¹Узу, Павел, учву кIурганси, ичв багахъ гъарган «начур», учвхъан ярхла айиган, «кIубнир», Месигъси гъюдалди ва фурс ктарди учвухъна илтIикIураза. ²Учвуз миннат апIураза: учвухъна гъафиган, дюн'яйин ляхнализ дилигну, учу ич гъуллугъ ккебгъна кIурайидарихъна узу кIваан ижми шлуси, мапIанай. ³Ухъу гъаму дюн'яйин яшамиш шулашра, гъаму дюн'яйин яракъ-ниинди дяви апIурадархъа. ⁴Учу аьдати яракънахъди въя, хъа мю-тIюгъ даршлу гъалийир ккидирчру Аллагъдин яракънахъди дяви гъабхурча ⁵ва Аллагъдин фагъмиз къаршу дяви гъабхурдар ккидир-чурача. Учу гъарсаб фикир, Месигъдихъ хъпехъруси, йисирвализ гъадабгъурача. ⁶Учу Месигъдихъ хъпебехърайидариз, ичв хъпехъ-рувал заан дережайиз гъафиган, жаза гъадабIуз гъязур вуча.

⁷Учву шей'арин зиъланди лигурачва! Месигъдинур вуза кIури, саб шак адарди фикир апIурайириз гъит аьгью ибши, думуси учура Месигъдин адмиийир вуча. ⁸Агъайи учуз, учву чIур апIуз въя, хъа артмиш апIуз тувнайи гъюкмис узу хъа гизаф фурс апIуйишка, узуз нач апIуб рубкъдайи. ⁹Узуз йиз кагъзарииндиги учвуз гучIар ккауз ккунди а, кIуру, фикир даришши. ¹⁰Сада-ри, кагъзарий узу ижмир ва къувватлур ву, хъа учвухъ хайиган



зяифур, йиз гафар фукІа дарудар ву, кІури ашул. ¹¹ Гъит гъаци кІурудариз аыгъю ибшри, ярхларь учу ич кагъзары фицдар вуш, багахъна гъафиган, ляхнариъра гъацдар вуча.

¹² Учхъан, чиб-чпин тярифар апІру адмийириз ухшар хъуз ясан гъаддариҳихъ тевуз, хъиддарчухъан. Дурари гъаци, чипи чиб-чпихъ теври, ахмакъвал апІура. ¹³ Хъа алдарди ич тяриф апІидарча, аммаки Аллагъди учуз дерккнайи терефариъ учу ич тяриф апІидарча, му терефар учвухънакъан рукъура. ¹⁴ Фицики учуз улупнайи терефарилан улдучІвурадарча, аыхир, гъаци хъиддийи, эгер учу учвухъна гъафундайиш. Хъа учу учвухъна Месигъдикан вуйи Ужувлан хабар хъади гъафунч! ¹⁵ Учу къадар адрубкъан ич тярифар апІурадарча, гъаз гъапиш учу гъапІу ляхин – думу ичуб ву, хъа жарадарин хъуркъувал дар. Ичв хъугъувал артухъ шул кІури, умуд кайич, ва дидихъди сабси ичв арайиль апІру ич ляхинра артухъ хъибди. ¹⁶ Хъа гъадмуган учхъан дилинтина гъягъюз ва душваъра Ужувлан хабар рабгъуз хъибдичухъан. Чипиз улупнайи йишвариъ гъапІу ляхнарин, жарадариси, ич тярифар апІидарча.

¹⁷ «Шлиз тярифар дапІну ккундуш, гъит дугъу
Агъайн тярифар апІри!»

¹⁸ Чан тяриф чав апІурайирин гаф Агъайи къабул апІидар.
Агъайн тяриф апІурайирин – апІиди.

КучЛин вакилариз къаршу Павел

11 ¹Учву сацЛиб йиз «ахмакъвал» аыгъ апІур кІури, умуд кайиз. ²СацЛибсана аыгъ апІиначва. ³Узу учвхъан Аллагъ хъюгъруси хъюгъраза. Узу учвук, сар Жилириз – Месигъдиз, Дугъян улихъ тахсир ктру швшиси дугъужвбан бадали, лишан кипунзачвук. ⁴Аммаки, Ева, иблис битІру алдатмиш гъапІси, ичв фикирра Месигъдиз дугъриди ва марцциди бахш шлувалихъан гъадапІур кІури, гучІуразуз. ⁵Сари, учвухъна дуфну, учу дарпи жара Исайикан ктибтруган, ясана учу тутруву жара рюгъ вая учву къабул дарараІу жара хабар къабул апІруган – му вари учву рягъяди къабул апІуручва. ⁶Узу, йиз фикриан, гъадму «варитІан заан вакилар вучча» кІурайидарин къляхъ хътарза. ⁷Мумкин ву, узу гаф-Чалнан уста дарди хъузра, хъа узуз аыгъювалар азуз ва учудураг учвуз рябкъюри-рябкъюри варибидиъ улупунч.



⁷Узу, учву заъбан бадали, жувв асккан дисури, гунагь гъапIну-шул гъа, гъаз гъапиш Аллагъдин Ужувлан хабар учвуз къимат дарди ктибтунза? ⁸Учвуз гъуллугънаъ хъузди, жара йишвариъ хъугърударихъан пул гъибисну кIури, узу дурар Таращра гъапI-ну, пуз шулу. ⁹Узу учвухъна дуфнайиган, гъеле узуз вари гъубкI-ну адайишра, гъич саринра кIул'ин алахъундарза. Вари лазим вуйиб узуз Македонияйин гъардшари тувунзуз. Узу гъамусди-хъантинара учв'ин алахъидарза. ¹⁰Му йиз дамах – узу узув яша-миш шулайи Месигъдин гъякъвалиинди гаф тувраза – гъич са-рихъанра вари Ахая вуйибси гъилицишра, батIул апIуз хъибдар! ¹¹Гъаз? Учву даккниган? Узуз учву фукъан масанди вуш, Аллагъ-диз ужийи аygъя!

¹²Гъамусдихъантинара узу ляхин гъаци давам апIидизаки, узу апIурайиси Аллагъдин ляхин чипра апIурача, кIури, къуру тяри-фар апIуз ккунидарихъан дици апIуз даршлуси.

¹³Думу адмийир, кIучIлин вакилар, марцци хил хътру гъул-лугъчир Месигъдин вакилар вуча кIурайи кIучIляхъяр ву. ¹⁴Му айламат вуйин хъа? Иблисра учв аквнан малайикси улупури гъабхъну! ¹⁵Гъаци вуйиган дидин гъуллугъчири чпи гъякълу гъуллугъчирси улупуз чалишмиш хъувалиин мюгътал хъуз хай даршул. Дурарин аххирра чпин ляхнализ гъилигуб хъибди.

Павелиз алахъурайи читинвалар

¹⁶Хъана текрар апIураза: узу ахмакъси мидисанай, хъа эгер дисураш, узухъди, ахмакъриси, сацIибсана тярифар апIуз гъитай.

¹⁷Гъаму ражари узуз пуз ккуниб, Агъайиси дарди кIурза. Узу ах-макъурси йиз тяриф апIида. ¹⁸Гъаму дюн'яйиъ гизафдари чпин тярифар апIура, гъаддиз гъитай узухъдира йиз тяриф апIуз.

¹⁹Учву, гъаци фикирлуйир вуйидари, ахмакъар ичв арайиъ хуш-ниинди гъитрачва! ²⁰Учву, учву лукIар апIрудар ва учв'инди яша-миш шлудар, учвхъан тадабгърудар, ичв зиин фурсар апIрудар,

ичв машнагъян йиврудар ичв багахъ гъитрачва. ²¹Йиз нач'вали-ан кIураза, учвуз гъаци апIуз гъабхъундарчухъан.

Дурари фтин вушра чпин тяриф апIураш, узхъанра йиз тяриф апIуз шулзухъан ва му, йиз «ахмакъвалси» гъисаб апIуз шулуч-хъан. ²²Дурар жугъдар вуйин? Узура вуза. Израилин баяр? – узура, Ибригъимдин наслар? – узура! ²³Дурар Месигъдин гъуллугънаъ



айин? Мици гъерхуб ахмакъвал вушра, узу хъа гизаф Месигъдин гъуллугънаъ айир вуз! Узу артухъ гъилихунза, узу гагъ-гагънак дустгъарыт итуизу, гагъ-гагънак урччвуйзу, аյжаликкан швнуб-сабан ккутIурччури гъахъунза.²⁴ Жугъдарихъан хъуб ражари сум-Чурна урчIувб гъирмаж гъитIунза,²⁵ шубуб ражари римлуйири маргъарихъди гъурччуунзу, саб ражари гъванарин жварра ульюб-хюнзүн, шубуб ражари саб нуфт ккахърайи гимийириккан ккутIурччуунзу ва ярхи йигъди гъюлерин къялаъ ади гъахъунза.²⁶ Узу гъаммишан рякъяриъ аза, гъаммишан ниарин, гъачгъарин, жуван миллетарин ва аллагъусазарин хатIайикк ккахъразу; шагъарин, Чуарин, гъюлин, кучIин гъардшарин хатIийирикк кказа.²⁷ Узу, нивкI адарди, гашди, убхъруб адарди, хураг адарди, ахълу аргъури, палат алдарди, жандихъан хътахъайиз лихури гъахъунза.²⁸ Гъаму варибидлан артухъ, варишвариъ айи хъугърударин гъайгъу хяртIахъ хъайиз.²⁹ Гъарсар зяифуриин язухъ зигури шулза, гъарсар гунгъиъ ахъру адмийин язухъшну кIаз аьзият шулиз.

³⁰ Узуз йиз тяриф апIоруси гъабшиш, узу фтиъ зяифди вуш, гъаддин тяриф апIидиза.³¹ Агъа Исаин Аллагъ ва Адашдиз – гъит Дугъан ад гъаммишандиз ившри! – узу кучIал дарапIрайивал аygъя.³² Арет паччагъди, Дамаскдин ахъюрди дерккнайири, узу дисбан бадали, шагъур улиkk убхюри гъахъну, аммаки узу жагваъди шагърилан илбицнайи цалиъ айи урхъ'ансина ирхний-зу, ва дугъан хилккан ккутIурччвнийза.

Павелиин улубкъуб

12¹ Узу йиз тяриф апIуз, гъеле дидкан айи хайир адаршра, буржлу духъназу. Агъайи улупубдихъинди, ачухъ гъапIубдихъинди илтIикIидиза.² Узуз сар хъугъру кас аygъязуз, йицию-къуд йис мидиз улихъна, чан бедендиъди вуш, ясана беден хътарди вуш, аygъдарзуз, Аллагъдиз ужуйи аygъя, думу, дидисну, шубубпи зав'ина гъурхну.³⁻⁴ Думу адми, чан бедендиъди вуш, ясана беден хътарди вуш, аygъдарзуз, Аллагъдиз ужуйи аygъя, женнетдиз гъахбакан ва душваъ дугъаз пуз даршлударстар гафар ерхъбакан аygъязуз. Думу гафар ктитуз ихтияр айидар дар.⁵ Гъацир адмийинди тяриф апIуз шулзухъан, хъа жуван тяриф, жуван зяиф терефарилан гъайри апIидарза.⁶ Гъеле узуз тяриф апIуз ккун гъабхънийишра, думу фагъумлу ляхин шуйи, гъаз гъапиш



узу гъякътІан пидараза. Хъа узу, узу дяркъну вая йиз гафар де-ерхъну, дугъу учв заанди улупура, кІури, сарира фикир дарапІ-бан бадали, дици апІидарза.

⁷ Гъациб зурба сир узухъна гъурубкъган, узуз узу заанди дя-рякъюз, йиз жандыр альзаб тувуз галам, иблисдин малайик, ив-на.

⁸ Шубуб раЖари Агъайиз узу дидхъан азад апІин гъапунза.

⁹ Хъа Дугъу гъапунзуз: «Йиз уж'вал увуз чялан ишри, фикики Йиз къувват зяифвалилан ужуйи гъюру». Гъаддиз, узуль Месигъдин къувват хъуз, шадди йиз зяифвалин тяриф апІури шул-за.

¹⁰ Гъаддиз узу зяифди вуйиган, гиран ктапІруган, гъубкІну

фукІа адруган, хъергруган, читинваларий итруган, Месигъ бада-

ли разиди гъузраза, гъаз гъапиш йиз зяифвалий къувватлу вуза.

¹¹ Узу бегъемди ахмакъ духъназа, амма узкан гъаци гъапІдар учву вучва. Йиз тярифар учву дапІну ккундийи, фикики узу гъадму «заан вакилар вучча» кІурайидартІан, гъич сабдиндира асккан дайза.

¹² Учвуз Месигъдин гъякъ вакил жара апІру лиш-

нар улупначвуз: ахюо сабур, айжайиб лишнар, альматар ва

къудратлу ляхнар.

¹³ Жара иишвариь хъугърудариз, учв'лан гъай-

ри, узхъан гъациб фу гъурубкъну?

Дициб фукІа адар, сабдилан гъайри: узу учв'ин алалахъувал.

Гъаму йиз тахсиранлан хил ал-

дабгъай!

¹⁴ Учвухъна шубубпи раЖарира гъюз ккунди азуз, амма ичв кІул'ин гъагъ хъидарза. Узуз ккуниб, учвуз айиб вая, хъа учву вузуз! Абийр-бабар веледари апІруб дар, хъа абийр-бабари – веледар.

¹⁵ Вари узуз айиб шадвалинди, гъеле жувура кмиди

учву бадали учвуз харж апІуз кказа.

Узуз учву артухъ ккуниган, узу камди гъаз ккун апІурачва?

¹⁶ Фици вушра узу ичв кІул'ина гъагъ гъахъундарза, аммаки узу саб аымлиинди учву алдатмиш гъапІну, кІурачва?

¹⁷ Белки, узу учвухъна гъау адмийирилантана учвхъан пул гъибисну шул?

¹⁸ Узу учвухъна сар гъардашра хъади Тит гъаунза.

Белки, Титди учвхъан фукІа гъибисну шул?

Учу ич гъуллугъ учвухъ сар рюгъ-

наяди ва саб метлеб ади гъапІундайинхъя?

¹⁹ Учву ухдитІан, учу ичв улихъ ич тахсрар кжикурайидар ву,

кІури, фикир дапІнашалчва. Вая! Учу, Иса Месигъдин терефк-

рари, Аллагъдин улихъ кІурачка: йиз ккунидар, учу апІурайиб

вари ичв мюгъкамвализ вуйич.

²⁰ Узу учвухъна гъафиш, учву узуз



ккуниси дярякъюр кIури, гучI кайиз ва гъадмуган учвухъди ву-
йи йиз ляхнар учвуз ккуниси варь, хъя жараси хъиди. Ичв ара-
йиль узуз гьюжатар, баҳилвал, хъял, гъярхувалар, кIучIлар, фут-
нийир, къуру дамагъар, къайдасувал рябкъюр, кIури, гучI ка-
ийиз.²¹ Узу учвухъна хъана гъафиш, Аллагъди узу асккан апIур,
кIури, гучIуразуз ва чпин намус адрувалилантина, къяппава-
лилантина, хил'ан адахънайивалилантина гунагъ дапIну, чпин
гунгъариин швумал дархъи гизафдарихъанди ишлар апIуб алаб-
хъидизуз.

Цийи гюрюшишиназ гъязур иихъай

13 ¹Учвухъна шубупи раЖари гъюраза. «Тахсир кипруган,
къюр вая шубур шагъид ади ккунду». ²Узу кьюбпи раЖари
учвухъ хъайиган, учвуз улихъимиidi гъапнийза, хъя гъамус, учв-
хъан ярхла айири, мугагъназ гунгъар гъапIдариz варидариз кIура-
за: гъаму раЖари ичв язухъ зигидарза. ³Учвуз Месигъди йиз мелз-
ниинди гафар апIури аш, адарш, аygю апIуз ккунди анчвуз?
Дугъан къувват зяиф дубхънадар, Дугъу думу ичв арайиль улу-
пур! ⁴Гъеле Месигъ зяифди айиган хачрак карснийишра, Думу
Аллагъдин къудратниинди Чивиди а! Учура Дугъахъди саб вуди
зяифдар вуча, аммаки ичв гъуллугънаъ хъпан бадали Аллагъдин
къудратниинди Гъадгъахъди яшамишра хъидича.

⁵ Учвуз хъугъувал имиш лигай; жвув ахтармиш апIури гъу-
зай. Ясана учвуз Иса Месигъ айибдикан аygъдарди айчвуз, ики-
баштIан, учву эгер вари аygъ апIури гъашиш? ⁶Хъя учкан улху-
руш, йиз умуд кайиз, учвуз рябкъюр, кIури, учу фужар духъну
ккундийиш, гъадрап вуча. ⁷Учву писвал дараpIуз Аллагъдиз кка-
рагурача. Учу фужар духъну ккундущ, гъацдар хъузди, му ляхнар
учвуз улупуз апIурайиb дарич, хъя, учу фужар духъну ккундущ,
гъацдар вуди учвуз гъяркъюндаршра, учву гъякъвалиинди ичв
ляхнар апIбан бадали, апIурайиb вуйич. ⁸Гъякъвал гъибтну, уч-
хъан фукIара апIуз шулдарчухъан, хъя апIруб вари гъякъвал ба-
дали вуйич. ⁹Эгер учву дугъриданра къувватлу шулуш, учу зяиф
хъуз шад вуча. Ва учву гъурkIдар хъузди ккарагурача. ¹⁰Гъаму
ражари узу ярхлаан, учвухъна гъафиган, учвухъди ижми дар-
хъуз бикIураза. Агъайи, пуч апIуз варь, яратмиш апIуз, гъюкум
түвназуз.



¹¹ Гъардшар, күуразачвуз: шадвал хъаптай, уымрий улихъ гъарахай, чиб-чпик юків каптай, гъит ичв арайиъ сабвал ибшри, мясляльтниинди яшамиш йихъай, ва Аллагъ, масанвалинна мясяльтнан Булагъ, учвухъди хъиди.

Баркаллагъ күуругандын саламар

¹² Чиб-чпиз салам, гирамивалин мак аптури, тувай. Мушваъ яшамиш шулайи Аллагъдин вари гирами халкъди учвуз саламар хътаура.

¹³ Агъа Иса Месигъдин уж'вал, Аллагъдин масанвал ва Гира-ми Рюгънахъди вуйи гаф-Чал, гъит, учвухъ варидаихъ хъади ибшри.



ГАЛАТДИЙ ХЪУГЬДАРИЗ КАГЬАЗ

*«Марци вакиларин ляхнар» Китабдиан рябкьюрайиси (16:6; 18:23), Ужувлан хабар рабгбури, Павел Галат шагыриз кьюб ражари гүүшнү. Исаийхъ хъугърудар думу шагыриз 50-ни йисари арайиз гъафиси рябкюра. Къураматарин къялаб айи гюлин гъирағъарихъ хъайи юкъуб тереф вари улкъирийси, Месигъдикан вуйи Ужувлан хабарнан къяляхъ, Галатдий хъугърударинра Къанундий улунтай айдатар хъаъбан месэлдир улихъ дийигънайи. Гъаму месэлдир себеб вуди, Гирами Рюгъну Павелихъди Аллагъдихъ хъугърудариз Галат шагыриз кагъаз бикIуз мажбур *апIуру*. Рябкьюрайиси, дина Исаийхъ хъугънайи жугъдарра гъафнийи. Дураги жугъдарин диндин вари айдатар тамам дапIну ккуниваликан ктибтуйи. Дураги, диндин айдатар тамам *апIараш*, уърхюз шлуб дар *кIуий*. Павелилантина Аллагъдин Рюгъ дицдар фикратиз ижмиди къаршу удучIвуру. Дуггу, адмийир, чин ляхнаринди гъякъ хъуз ккунди Къанундин ва диндин айдатар хъайи-хъайиси хъаъру *кIури*, вай, хъа дураг *Иса* Месигъдихъ хъугъну *кIури*, Аллагъдиз масанди *ву*, *кIура*. Гъаму *ву* Месигъдикан вуйи Ужувлан хабарнаъ варитIан мяналу мутму. Аллагъдин Рюгъназ Галат агълари гъарган гъамдикан *кIавинди* гъибтну ккунду: «Месигъди ухъу, азад хъуз *кIури* ккадаъну. Гъаддиз ижмиди дийигъай, хъана лукI'валин юрккгыз ичв *кIул мииванай!*» (5:1).*



Гъякъ – саб Ужувлан хабартаан дар

1 ¹Адмийири гъял дапІну ваъ, я адмийин кюмекниинди ваъ, хъа Иса Месигъдин ва Думу гъачІидаригъян за гъапІу Адаш Аллагъдин кюмекниинди вакил гъахъи Павелихъан ва ²гъамшваъ узухъди хъайи вари гъардшарихъан – Галатдій айи хъугърударин жамяаьтириз саламар.

³Уж’вал ва мясляйт учвуз, ихъ Адаш Аллагъдихъан ва Агъа Иса Месигъдихъан. ⁴Дугъу, Адаш Аллагъдин ният тамам гъапІну, писвали агъавал апІурайи гъаму дюн’яйин гьюкмиккан ухъу азад апІбан бадали ихъ гунгъарихъанди Чан жан тувну. ⁵Гъадгъан ад – аьсрариан аьсрариз ибшри. Амин.

⁶Учву гъамкъан ухди, Чан зурба вуйи ужувланинди учвуз дих ДапІнайирихъан гъидицну, саб жара ужувлан хабарнахъ хъергуз къаст дапІнайивалиин гъах духъназа. ⁷Ужувлан хабар сарун жараб айиб дар! Ичв ара бикъурайи, Месигъдикан вуйи хабар айтІлан апІуз ккуни адмийир а. ⁸Эгер шли ичв арайиъ, учвуз дебккнайи Ужувлан хабарналан гъайри, сарун жара гъациб хабар ипраш, гъациб хабар ипрайир, узу вушра, завариан мала-йикди гъаци апІурашра – гъит гъаци апІурайир, жегъеннемдин цІигъ гъяхъри! ⁹Улихънаси узу гъапнийзаки ва гъамус хъана тек-рар апІураза: гъарсар, учвуз тувнайи Ужувлан хабарналан гъайри фукІа-мукІа жараб кІуру кас жегъеннемдин цІигъ гъяхъри!

¹⁰Узуз гъапІуз ккунди а: адмийири йиз тереф бисуз гъитуз, даршиш – Аллагъди? Хъа узу, адмийириз ккуниб апІуз хъюгънайир вуйинхъа? Эгер узу адмийириз ккуниб апІурайир вуйиш, узу Месигъдин лукІ хъидайза.

Павелиз къувват Аллагъди тувну

¹¹Гъардшар, узуз учвуз аygъю дубхъну ккундузуз: узу учвуз ктибу Ужувлан хабар адмийирихъан гъафиб дар. ¹²Узуз думу адмийирихъан гъебхъуб дариз, я адмийири улупуб дариз, хъа Иса Месигъди узуз думу ачмиш гъапІунзуз.

¹³Учвуз, узу Къанун гъярф-гъярфди тамам апІру жугъуд ву-йиган, гъич саб инсаф адарди, Аллагъдихъ хъугърударихъ, терг апІури, хъергур вуди хъуваликан, гъеебхъунчвуз. ¹⁴Йиз тая-рик узукъан жугъуд дин улихъ гъабхру кас адайи, абийирин



аъдатар алдарди тамам апIуйза. ¹⁵Хъя Аллагъди Чан ужувиинди Чан гъуллугъналь хъуз узу ктагъну. Дугъан гъациб ният узу бабкан хъайиз айи. ¹⁶Дугъу Чан Бай узуз ачмиш апIуру ва Гъадгъукан Аллагъ альгъдру халкъариз Хабар дебккуз гъитру. Думуган узу гъич сар касдихънакъан, насигъят ккун апIури, гъушундарза. ¹⁷Узу Ерусалимдиз узутIан ухди вакилар гъахъидарихънакъан гъушундайза, хъя Аравияйиз гъушунза, хъасин Дамаскдиз къяляхъ хътакунза.

¹⁸Хъасин, шубуд йис гъубшиган, узу Ерусалимдиз Петр рякъюз гъафунза. Дугъахъ йицIихъуд йигъян гъузунза. ¹⁹Хъя имбу вакиларикан узуз, Агъайн гъардаш Якъубдилан гъайри, фуж-кIара гъяркъюндарзуз. ²⁰Узу учвуз бикIурайиб кучIал дариз, Аллагъ шагъид ишри!

²¹Хъасин узу Сирияйизна Киликияйиз гъушунза. ²²Ягъудияйиъ аий Месигъдихъ хъугърудариз машна-машди узу таниш дар. ²³Узкан дурализ альгъюб: «учухъ мугагъназ хъергрури улихъди чав тIанкъ апIурайи хъугъуваликан ктибтура» кIурутIан дайи. ²⁴Узу гъации гъахъну, кIури, дурали Аллагъ адлу апIуйи.

Имбу вакилари Павелра вакил вуйиб гъисаб апIура

2 ¹Хъасин, йицIиюкъуд йислан, узухъди Варнавна Тит гъадагъну, хъана Ерусалимдиз гъафунза. ²Хъя узу дина, Аллагъди амур гъапIиган, гъушур вуйза. Хъугънайдарин кIулий айидарихъди, жаради гюрюшиш гъахъиган, узу дурализ, йиз гъубшу ва гъамусдин жафа давди гъюдуудбЧIван бадали, узу жу-гъуд дарудариз ктибтурайи Хабарнан мяна-метлебнакан гъапунза. ³Дурали узухъди хъайи грекжви Титдин, аъдатниинди суннат апIин кIури, гуж илипундайи. ⁴Сакъюдар кIучIлин гъардшариз дугъахъди гъаци апIуз ккун гъабхъну. Дурали ич арайиъ, хъана лукI'валий ахъру аъдатарихъна учу къяляхъ апIуз ккунди, Месигъ Исайиланмина аий ич азадвал шпионариши абурги гъахъну. ⁵Хъя учу, Ужувлан хабарнан гъякъ мяна-метлеб учвуз уьбхбан бадали, саб гагъдизкъан, дурали зигрушвахъинди хъипундарча. ⁶Хъя хъугънайдарин кIулий айидар, фужар вуш ва фужар вуди гъахънуш, саб вузуз – Аллагъдин улихъ вари адмийир саб ву. Дурали узкан йиз Хабарналан артухъ вуйиб фукIа-таалаб гъапIундайи. ⁷Дурализ, Ужувлан хабарнакан жугъдарииз



ктибтуб Петриин илипнайиганси, жугъуд дарудариз ктибтуб уз'-ин илипнайиб, гъябъкийи. ⁸Фицики, Петри вакилвалин гъуллугъналь жугъдарин арайиъ Дерккури, узура, Аллагъ аыгъдруда-рин арайиъ гъуллугъналь дерккунзу. ⁹Узуз вакилвалин багъиш тувнайиб дурагиз аыгъю гъабхыиган, хъугърударин гъваикк кку-дукънайи мурхълар вуйи Якъубдина, Петрина, Югъанди, ууззна Варнавдиз чпин хилар гъачарккунчуз. Му дурагин чпихъди учу-ра саб ляхин апIурайивалин лишан вуйи. Учу – Аллагъ аыгъдру-дари, хъа чпи – жугъдариз Ужувлан хабарнакан ктибтуз гъя-гъюз дураг рази гъаши. ¹⁰Дураги учкан саб тIалаб гъапIиний: Ерусалимдиз хъугърударин касибар кIаин апIуб. Йизра гъадра-риз кюмек апIуз лап яманди тямягъ хъайиз.

Павели Петр дюз дарувал улупура

¹¹Хъа Петр Антиохияйиз гъафиган, узу ачухъди дугъаз къар-шуди удучIвунза. Думу дюз дайи. ¹²Якъубди дина адмийир гъаа-йиз улихъна думу, жугъуд дарударихъди деъну, ипIури вердиш вуйи. Хъа Якъубдихъан вуйидар Антиохияйиз гъафиган, Петр жугъуд дарударихъан гъудучIвнийи. Дугъу дици, аьдатариинди суннат дапIину ккунду, кIурударихъан гучI кайивалиан гъапIиний. ¹³Гъадгъуси, имбу жугъдарира кью-кьюб маш гъиву. Гъеле Варнавдира, гъаци, кьюб маш гъивнийи.

¹⁴Узуз дураг Ужувлан хабарнан гъякъ мяна-метлебнахъан гъу-дучIури гъяркъган, вари хъайишвахъ Петриз гъапунза: «Эгер, уву, жугъуд, жугъуд дарурси яшамиш шулаш, уву гъаз жугъуд да-рудариз, жугъдарси яшамиш йихъ, кIурава?»

¹⁵Ухъуз, жугъдарди бабкан гъахыдари, «жара гунагъкар хал-къаризси» ¹⁶дарди, агъяхъуз, гъич сар адмийихъанра, Къанундиз улупнайи аьдатар хъаъну кIури, гъякъ хъуз шлуб дар, хъа анжагъ Иса Месигъдихъ хъугъигантIан. Гъаддиз, ухъура Месигъ Исайихъ хъугънахъа, Месигъдихъ хъугънайивалиинди ухъу гъякъ апIруси, хъа Къанундин аьдатариинди гъякъ хъуз шулдар, фицики, Къа-нундин аьдатариинди «яшамиш шулайидарикан гъич фужкIара гъякъ хъидар».

¹⁷Эгер, Месигъдик кидикъну, гъякъ духънайиганра ухъу имбу-дарси гунагъкрап вуш, Месигъ, гунгъар апIинай, кIури, дуфна-йир вуйинхъа? ИкибаштIан ваъ! ¹⁸Эгер узу, мугагъназ гатIахъу



аьдатар, хъана хъаай кIури хъюгъиши, узу Къанун чIюбгьюра-
йи гъисаб ву.

¹⁹ Къанунди узу йивну гъакIну, ва узу, Аллагъдиз яшамиш хъузди, Къанундиз дукIнайир вуза. Месигъдихъди узора хачрак карсназу, ²⁰ сарун яшамиш шулайир узу дарза, хъа узуль яшамиш шулайир Месигъ ву. Ва, узу жилиин илмикъан гагъди, Аллагъдин Балихъ хъугъыну яшамиш шулайир вуза. Гъаци узу яшамиш хъузди Дугъу, узу ккун дапIну, Чан жан узхъанди тувну. ²¹ Дугъу узуз гъамци дапIнайиган, фици узу Аллагъдин му багъиш гатIаб-
хъуза?! Эгер Къанундихъан адми гъякъ апIуз шуйиш, Месигъ давди гъакIнуки?!

Хъугъували Аллагъдин уж'вал хуру

З ¹ Галатлуийр, ахмакъар, шли ичв фагъум гъибикъну?! Узу учвуз Хабарнакан ктибтруган, учвуз ичв улариинди хачрак карснайи Месигъ гъяркъну кIури, хиял вуйизки!

² Учвхъан сабдикан гъерхуз ккунди азуз: учвуз Гирами Рюгъ, Къанун тамам гъапIну кIури, учIвунчвуз, даршиш, Ужувлан хабарнакан деебхъыну, хъугъиган? ³ Учву гъадмукъан ахмакъар вунчвахъа, ккебгърган – Рюгънахъди ккебгъыну, хъа ккудубкIрган – адмиири чпикан ктагъдариинди ккудубкIуз?! ⁴ Ясана, учвуз гъахъи ва учву апIури гъахъи ляхнар, гъаци, ичИ сес вуйинхъя? Хъуз мумкин дар! ⁵ Аллагъди учвуз Рюгъ багъиш ва ичв арайиъ айламатнан ляхнар, учву Къанундин къайдийр хъаъра кIури, гъапIну кIурачва, даршиш, Гъадгъан хабарнакан деебхъыну, учву хъугъиган?

⁶ Мисалназ, Ибрагымдиз лигай. Думу «Аллагъдихъ хъугъру, ва Аллагъди думу, чан хъугъувализ дилигну, гъякъ апIуру». ⁷ Гъаци вуйиган, гъаврий ахъай, Ибрагымдин баяр фужар вуш – хъугърудар ву. ⁸ Гирами китабариъра, хъугъу халкъар Аллагъди гъякъ апIиди кIури, улихъимиidi дуннайи. Ибрагымдиз, «Увлантине жугъуд дару халкъариз Аллагъдин уж'вал хъибди», кIури, Ужувлан хабарнакан сифте хабар гъадмугантIан дебккнийи. ⁹ Гъаддиз Аллагъдихъ фужар хъугъруш, гъаддарииз варилиз Ибрагымдихъди сабси, чпин хъугъувализ дилигну, ужувлар хъиди.

¹⁰ Къанундихъ йирфар хъирчну, дидин аьдатар тамам апIуз ккунидар агънакк ккахъуз мумкин ву, гъаз гъапиш «Къанундин



китабдиль дибикІнайиб вари, сабкъан гъидидипди, тамам дарапІрур, ағынакк ккахъна» кіури, дибикІна. ¹¹Хъа Къанундинди Аллагъдин улихъ гыч фужкІара гъякъ даршлуб гъаму гафариан ачуҳъ шула: «Чан хъугъувализ дилигну гъякъ гъапІуртІан яшамиш хыдар». ¹²Къанундин хъугъувалихъди айиб гыч фукІара адар. Диidi дупна: «Анжагъ му къайдийир вари тамам апІуртІан яшамиш хыдар».

¹³Месигъди ухъу, Къанун тамам дарапІруган, ухъ'ин улубкъру ағынаккан ккадаңын. Дугъу Чав Къанундиль улупнайи къаза-балыйир ухъу бадали Чаина гъадағъну, гъаз гъапиш гъамци дупна: «гъарикк ккерхнайир ағынакк ккахъна». ¹⁴Ибрагымдиз тувурза дупнайи уж'вал Иса Месигъдилантинана вари халқъариз хыпан бадали ва ихъ хъугъувализ дилигну тувурза гъапи Рюгъ ухъуз руқьбан бадали, Къанундиль улупнайи къаза-балыйир Дугъу Чаина гъадағъну.

Къанун ва тувнайи гаф

¹⁵Гъардшар, ихъ гъар йигъандин уымриан мисал хибдизачвуз: эгер адмиии дюз гъюруси васиятнан кагъаз дибикІнаш, думу гъясбикк ккадрапІуз вая диик жараб капІуз хыбдар. Ари гъамшваරга гъаци ву. ¹⁶Ибрагымдиз ва дугъан наслиз Аллагъди гаф тувнайи. Фикир тувай, фици дупнаш: «наслариз» дупнадар – мици, гизафдарикан улхураш, кіуру, хъа, «яв наслиз» – мици сарикан улхруган кіурайиб ву. Ари гъадму насили – Месигъ ву. ¹⁷Узуз гъамци пуз ккундузузки: юкбуудваржна сумчІур йислан арайиз гъафи Къанундихъан Аллагъди дебккнайи йикърар арайиан адабгъуз шлуб дар ва диidi тувнайи гаф тамам дарапІди гъибтuz хыбдар. ¹⁸Эгер ирс Къанундилан асиллу вуйиш, думу тувнайи гафналан асиллу хыбдайи. Хъа Аллагъди, Чан гаф тувну, Ибрагымдиз гъаму ирс тувна.

¹⁹Дици вуйиган, Къанун гъаз ву? Думу, тахсрар артухъ хуввализ дилигну, гъадму гаф тувну гъюру «Насил» гъайизкъан адабгънайиб вуйи. Къанун малайикариланмина ва ара сатІи апІрурин кюмекниинди дебккнайиб ву. ²⁰Ара сатІи апІур, айлакъа ийтІуз ккайи кьюб тереф айигантІан шлур дар. Хъа Аллагъ сар-Тан дар, аххир.



Мусайин Къанундин ляхин

²¹ Дици вуш, Къанун, Аллагьди тувнайи гафназ къаршу вуйинхъя? ИкибаштIан, варь! Эгер адмийириз, уьмур тувуз шлу Къанун гъабхънийиш, икибаштIан, дураг гъякъ апIувал гъациб Къанундилан асиллу хъибдий. ²² Аммаки Гирами китабари дюн'яйин алиб вари, Иса Месигъдихъ хъугъувалиланмина, хъугъайириз тувнайи гаф тамам апIбан бадали, гунгъин гъюкмикк кка, кIура.

²³ Хъугъувал ачмиш хъайиз Къанундин дустагъдиль, хъугърувалин вахт гъайиз, итнайхъя. ²⁴ Гъаци вуйиган, Къанун ухъуз, ихъ хъугъувалиинди ухъу гъякъ апIбан бадали Месигъдихъна гъахру тербиячи вуйхъуз. ²⁵ Хъугъувалин вахт гъафиган, ухъу тербиячиин хилккан ккадаунхъу.

²⁶ Учву вари Месигъ Исаихъ хъугъувалилантана Аллагъдин баяр вучва. ²⁷ Фицики, Месигъдик ктикъбан бадали штуан гъахъидар, учву Месигъдин гъаравликк ккачва. ²⁸ Сарун жугъдаринна жара миллетарин фаркъувал имдар, лукIранна азад вуйирин фаркъувал имдар, жилижуванна дишагълийин фаркъувал имдар. Гъаз гъапиш учву вари, Месигъ Исаихъди саб вучва. ²⁹ Сарун учву Месигъдиндар вуш, Ибрагимдин наслар вучва ва, гаф тувнайиси, ирс рубкърудар вучва.

Павелиз Галатдин хъугърудар ккунивал

4 ¹ Учвуз сабсаны мисал хибдиза: ирс рубкъуз ккайир, васи-ятниинди вари ирснан аххюр учв вушра, бицIиди имиди, лукIрахъян сабдинра артухъ дар. ² Думу чан адашдин васиятнаъ улупнайи вахт гъайизкъян, чан хулаз лигурайидарин ва чан гъайгъу зигрударин хиликк ккади шулу.

³ Ари гъаци ухъура ахъя: ухъу бицIиди айиган, гъаму дюн'-яйин къудратарин хиликк ккайхъа. ⁴ Аммаки Аллагъди, вахт гъабхъиган, Къанундиккди яшамиш шулайи дишагълийи гъахи Чан Бай гъаъру. ⁵ Думу му дюн'яйиз, Къанундин гъюкмиккди яшамиш шулайидар азад апIбан бадали ва Аллагъди ухъкан Чаз веледар ктаъбан бадали, гъафну.

⁶ Учву Чан веледар вуйиган, Аллагъди ичв кIавъ, «Авва! Адаш!», кIури, дих апIру Чан Балин Рюгъ аъну. ⁷ Гъаддиз, сарун уву



лукІди имдарва, хъа Дугъан бай духьнава. Хъа эгер уву Дугъан бай вуш, Дугъу увкан ирс рубкъурайир ктальну.

⁸ Мугагъназ, учвуз Аллагъ аыгъдру вахтари, учву аллагъар дару кучІлин аллагъарин лукІар вуйчва. ⁹ Гъамус, учвуз Аллагъ аыгъю гъахъиган, яна дюзди гъапиш – Аллагъдиз учву аыгъю гъахъиган, гъаз учву хъана гъадму зяиф ва касиб дюн’яйин къудратирихъна хътакурачва? Гъадрарин лукІвалий учІвуз ккунди анчвуз? ¹⁰ Учву, саспи йигъар, вазар, йисан паяр ва йисар къайд апІурачва. ¹¹ Амма учвуз ужувлаз вуйи йиз ляхнар, учвухъ дав шул, кІури, гучІ казуз.

¹² Гъардшар, учвуз миннат вуйиз, узу фицир вуш, учвура гъацдар дар йихъай! Фицики узура учвусир даринхъа? Учву узуз гъич зат фукІара чуруб гъапІундарчва. ¹³ Учвуз аыгъячвуз: узу учвухъна сифте ражари гъафиган, ищцурашра, учвуз Ужувлан хабарнакан ктибтуз гъабхъунзухъан. ¹⁴ Йиз узьри учву узхъан ярхла гъапІундайи. Узу даккун дапІну, учву узхъан гъидицундайчва, хъа Аллагъдин малайкси, Месигъ Иса Учвси, узу къабул гъапІнийчва. ¹⁵ Гъамус ичв думугандин гъевес-шадвал набши? Думуган, саб шак адарди кІураза, лазим гъабхъниийиш, ичв ул узуз тувуз гъяйиф хъибдайчвуз! ¹⁶ Гъамус фу дубхъна? Учвуз гъякънакан гъапну кІури, узкан ичв душман духьнайн?

¹⁷ Пис хиялар ади ичв кІул’ин аыхювал апІуз ккуни адмийиз учву учхъан гъадатІуз, хъасин учву, чипкан каркар ктатури дерккуз ккунди а. ¹⁸ Жувуван тереф бисуз гъитбаъ фукІара чуруб адар, эгер ниятар ужудар вуш. Гъаци узу учвухъди гъузу йигъазтІан дархъиди дарибригъя. ¹⁹ Йиз ккуни веледар! Узу хъана узур-аъзиятниинди, учву тазатІан бабкан шулайиси, Месигъдиз ухшар айидар шайизкъан, цийи алаидизачву! ²⁰ Гъаму ражари, узу учвухъди хъади, жараси улхуз ккунди айзуз! Узу учв’ин мюгътал духьназа!

²¹ Учвуз Къанундиз мютІюгъ хъуз ккунди анчвуз? Дици вуйиган, узуз йипай: Къанундиль фу кІураш, гъаврий анчва? ²² Душваъ, Ибрагымдих кьюр бай хъайи, кІури, дупнаки, сар – гъараваш дишагълийикан, тмунур ²³ – Аллагъди гаф тувнайиган – азад дишагълийикан. ²⁴ Му ихтилатнаъ саб жини мяна а: кьюр дишагъли кьюб йикъар вуди гъисаб апІура. Дурарикан сар – Агар, Синай дагъдин гъийитІу йикъар ву. Ари гъадму Агар



лукI вуйи ва дугъан веледарра лукIарди бабкан шули гъахыну.

²⁵ Агар Аравияйи айи Синай дагъ гъисаб ву, ва гъацира гъадму вахтари чан веледарра хъади лукIвалий абхънайи Ерусалим. ²⁶ Хъа аэршарин Ерусалим – азадуб ву, ва гъадму – ихъ дада вуйихь!

²⁷ Гираами китабарий дибикIна:

«Шад иихъ, бицIидар даршлур ва бицIидар дархир!

Чигъар апIин ва гъарай ип, бицIир апIрган шлу
аъзиятирикан хабар адрур!

Фицики, ялгъуз дишагълийин бицIидар жилирихъ
хъайиrintIан гизаф ву!»

²⁸ Учвура, гъардшар, гаф тувну бабкан дуխнайи веледарси, Исаакъдиз ухшар вучва. ²⁹ Аммаки, аьдати жюреийинди бабкан дуխнайир Гираами Рюгъниинди бабкан гъахъирихъ хъерграйиси, гъаму вахтарира гъаци шула. ³⁰ Гираами китабарий фу кIура? – «Азад дишагълийин балихъди ирснан пай ккудробъбан бадали, лукI дишагъли, чан байра хъади, утIукк». ³¹ Гъаддиз, гъардшар, ухъу лукIран веледар дархъя, хъа – азад дишагълийиндар!

Ичв азадвал уьбхяй

5 ¹ Месигъди ухъу, азад хъуз кIури, ккадаъну. Гъаддиз ижмиди дийигъай, хъана лукI'валин юрккгъиъ ичв кIул мииванай!

² Узу, Павели, учвуз кIуразачвуз: эгер аьдатариз дилигну, суннатар апIури, Къанундиз кIурайибихъна учву къяляхъ хътакуруш, учвуз Месигъдикан вуйи гъич саб хайирра адарчвуз. ³ Узу учвуз хъана текрар апIураза: аьдат бадали шли чан суннат апIуз гътииш, гъадгъу Къанундиз улупнайи вари къайдийирна аьдатар тамам дапIну ккунду. ⁴ Эгер Къанундииинди гъякъ хъуз ичв умуд каш, гъамусдихъантина Месигъдихъди вуйиб гъич фукIара адаричв ва Аллагъдин ужувлыхъан жара гъахъунчва. ⁵ Хъа ухъу гъякъ хъуз ихъ умуд хъугъувалик кайихъ ва Рюгъну ккилигуз кюмек апIурахъуз. ⁶ Эгер Месигъ Исайихъди ухъу саб вуш, адмиин суннат дапIну а – адар, дураг сар сарихъан жара дар. Мушваъ айи метлеб – масанвалиланмина арайиз удубчIурайи хъугъевал ву.

⁷ Учву жаргъуб ужуди ккебгънийчва. Думуган учвуз шли ма-шат гъапIунчвуз ва гъякънахъ хъпебехърудар шли ктаунчвукан?

⁸ Мидхъан шли хътаунчву? Учвуз дих ГъапIури дици дарапIур!



⁹ «Вари хямир утуз сацИб дун чIяльн ву» ¹⁰ Узу, Агъайихъди сабси, учву жара фикрарий адрахърубдихъ, хъугъурза. Хъя ичв ара бикъурайидариз, чпи фужар вушра, жаза гъадабтИди. ¹¹ Гъардшар, эгер узу гъамусра суннатнакан ктибтуйиш, гъаз узухъ хъергүйихъя? Эгер узу гъамусра гъаци ктибтури имийиш, хачракан вуйи йиз аygювалари къаршуvalар арайиз хидайи. ¹² Хъя ичв арайиль гъипрайи футнакрари, неинки суннат, хъя чпин вари ккадатIузы ккадатIри!

¹³ Учвуз Аллагъди азадди яшамиш хъуз дих дапIна, гъардшар. Аммаки, лигайгъя, ичв азадвал, ичв жандиз ккуниб апIури хъарьту гунгъариз ишлетмиш апIуз мигъитанай! Хъя учву чиб-чпин гъайгъушнань, масанди йихъай. ¹⁴ Гъаз гъапиш, мушваш вари Къанун гъаму саб гафнаь а: «Яв багахъ хъайир, увуз увуси, ккун апIин». ¹⁵ Хъя эгер учву, чиб-чпи кчIувкури ва чиб-чпин йикк ипIури гъашиш, лигайгъя, учву чиб-чпи танкъ апIуз мумкин ву!

Рюгъ ва беден

¹⁶ Узу учвуз кIураза: Рюгъну кIурайиси яшамиш йихъай, ва гъадмуган, ичв жандин тямягъярий кIулихъди ахъидарчва. ¹⁷ Ихъ гунагъкар бедендиз ккуниб – Рюгъназ ккуниб дар, хъя Рюгъназ ккуниб – ихъ гунагъкар бедендиз ккуниб дар. Дураг чиб-чпиз къаршу ву. Учвхъан учвуз ккуниб гъадиз апIуз шулдарчвухъан. ¹⁸ Эгер учву Рюгъну хъаъраш, ичв зиин Къанундин гъокум гъубзрадар.

¹⁹ Гунагъкар бедендин ляхнар варидализ рякъюрайидар ву. Дурагик къяппавал, чиркинвал, хил’ан адахънайивал, ²⁰ идолариз икрам апIувал, фал китувал, душманвал, гъюжатар, жарадарин хъугъвал алдрувал, хъял, учвтIан даккнивал, гъярхувалар, къаршуvalар, ²¹ баҳилвал, пиянвал, шадлугъар-къяппавалар ва гъацдар жарадар кахъра. Узу учвуз улихънасира гъапунза ва гъамусра кIуразачвуз: гъаци апIрударикан гъич саризра Аллагъдин Па-чагъалугъдиль ирс ккубкыидар.

²² Хъя Рюгънан ляхнарик – масанвал, шадвал, мясляйт, сабур, уж’вал, хил ачухъвал, хъугъвал алди хъуб, ²³ гъянивал, жувв хилий дисувал кахъра. Гъамцдар ляхнализ закон лазим дар. ²⁴ Месигъ Исайндиндари, чпин гунагъкар бедендин вари дерккуз даршлу ва чиркин тямягъяр хачрак карсна. ²⁵ Ухъу гъамус Рюгънахъ



хъайиган, гъачай, Рюгъну кІурайиси, апІурхъа! ²⁶ Гъаддиз, фурс
кубчІвуз гъузидархъа, чиб-чпик хъял капІидархъа, чиб-чп'ин
бахил шули хъидархъа!

Чиб-чпиз кюмек апІури иихъай

6 ¹Гъардшар, эгер шли гунагъ гъапІиш, учву, рюгънахъ хъайи-
дари, тахсир гъапІур гъяниди дюз рякъюхъна духну ккунду.
Лиггъа, жувуканра гъациб тахсир ктудубчІвбан бадали, жуву'ин
ул алди гъуз! ² Гъардиз чаин алиб апІуз кюмек апІури гъузай,
гъаци учву Месигъдин закон кІулиз адабгъидичва. ³ Шлиз, чав
фукІа дарапІишра, учв заанди рякъюраш, дугъу учв алдатмиш
апІура. ⁴ Гъит, гъарсари айкьюллуди чпин ляхнарикан фикир
апІри, ва гъадмуган дугъхъан, чан хъуркъувалариз дилигну, фурс
апІуз хъибди, ва дугъу чан ляхнар жарадариндарихъ тевдар, ⁵фи-
цики, гъарди чаин алиб апІиди.

⁶ Шли Аллагъдин гафнан айгъювалар гъадагъураш, гъит, гъад-
гъу, чаз айи вари хазнайикан, чаз улупурайириза капІри.

⁷ Жуву жуву алдатмиш мапІанай: Аллагъ ахмакъ апІуз хъиб-
дарчвухъан! Адмийи, фу гъубзиш, гъадму ккадабцІиди! ⁸ Чан гу-
нагъкар беден бадали убрзури, ккадабцІруб айжал хъибди. Хъа
Рюгъ бадали убрзури, Рюгънахъан гъаргандин уъмур ккадаб-
цІиди. ⁹ Гъаци вуйиган, уж'вал апІуру кІури эргувалий кІул ип-
дархъа, ва гъадмуган, эгер хътадахъиши, ухъуз улупнайи вахтна
бегъер ккадабцІидихъа. ¹⁰ Магъа гъаддиз, вахт имиди, варидализ
уж'вал апІидихъа, иллагъки, хъугъувалий саб хизан гъашидари.

Павели чан кагъаз ккудубкІура

¹¹ Гъамус узу учвуз йиз хусуси хил'инди бикІураза — гъаму
аыхю гъярфар рякъюрачвузки? ¹² Хъа учвухъди суннатнан айдатар
хъауз гъитрудари, чпи адмийириз ккун хъузди гъаци апІура, фи-
цики дурагиз Месигъдин хачралантина чпихъ хъергри ккун-
дар. ¹³ Дураги, айдатниинди чпин суннат дапІнашра, Къанундиль
улупнайи айдатар хъаъри шулдар. Дурагиз, айдатназ дилигну,
ичв суннат апІуз ккунди а. Гъаци дурагиз чпин тяриф за апІуз
ккунду. ¹⁴ Хъа узуз, ихъ Агъа Месигъ Исаин хачрииндитІан
гъайри, жарабдинди фурс апІуз ккундарзуз. Узуз — дюн'я думу
хачрак кабсна ва дюн'яйиз — узу думу хачрак карсна. ¹⁵ Суннат



ГАЛАТ 6

дапIну ашра – адаршра, мидлан фукIара шулайиб адар. Мушваъ ккундайиб: жуву Аллагъдиз цIийи кас хувал ву. ¹⁶Мясляльт ва уж’вал ибшри гъамци апIрудариз ва Аллагъдин Израилиз!

¹⁷Гъит, гъамусдихъантина узу гъич сарира пашман дарапIри, фицики йиз бедендиин Исаин лишнар ал.

¹⁸Ихъ Агъа Иса Месигъдин уж’вал ичв рюгънахъди ибшри, гъардшар. Амин!



ЭФЕСДИЙ АЙИ ХҮҮГҮРУДАРИЗ КАГЬАЗ

Му кагъаз Эфес шагырндариз дибикIнайиб вушра, БицIи Азияин вари хъугърудариз кIури, Гирами Рюгыну Павелихъди би-кIуз гъитна. Мумкин ву кагъаз Павел Римдиз дустагъдиз айи вахтна дибикIнайиб хъузра. Му кагъз Аллагъди адмийир урхбабъ Месигъдин важиблуваликан ктибтура. Гъаму шибритIин али Исаихъ хъугънайидарин саб хизандин уымрикан ктибтура: Аллагъди дурагиз, Иса Месигъдихъ хъугърудар вари саб хилси хъуз, дих гъапIну. Дурагин хъугъувалин бин хацрак карсу, хъасин Чиви гъаши Иса Месигъ духыну ккунду. Исаихъ хъугърудар инсандин бедендихъ тевра: бедендин паярихъан, саб хътарди, тмуунубдихъан фукIа апIуз дарилуси, Исаихъ хъугънайи адмира гъаци ву – сар чан-чаз яшамиши духыну ккундар. Хъугънайидарин арайиб гъарсариз чан ишив ва ляхин а, гъаддиз сарин гъуллугъ тмуунуринубтIан артухъ вуди гъисаб датIну ккундар. Хъугънайидарихъан сатIидитIан гъаму дюн'яйиб айи писвализ къаршу дугъужсуз шлуб дар. Кагъзин аыхирихъ хъугърударин гъар ийгъандин месэлйирихъна фикир жалб апIура: мушваат жиларин ва хпарин, абиир-бабарин ва бицIидарин, гъуллугъарихъ хъайидарин ва дурагин хиликк ккайдарин авлакыйирикан ктибтура. Душваат, юкъвнаан гъякъвал идибитIну, дозвалин рукъян палатдиз учIвну, ижмиди дийигбуз дих апIура.



Месигъ – ухъуз тувнайи уж’вал ву

1 ¹ Эфесдиль аий Аллагъдин гирами халкъдиз, Месигъ Исаихъ хъугъну яшамиш шулайидариз Аллагъдин амриинди Месигъ Исаин вакил Павелин терефнаан – ² уж’вал ва мясляйт учвуз, ихъ Адаш Аллагъдихъбан ва Агъа Иса Месигъдихъбан!

³ Гъит адлу ишри ихъ Агъа Иса Месигъдин Адаш, Аллагъ. Дугъу аэршарий ухъуз, Месигъдихъди ухъу саб гъашиган, рюгънан вари ужувлар тувунхъуз: ⁴ Дугъу ухъу, Месигъдиль саб духъну, Аллагъдин улихъ гирамиди ва тахсир ктарди яшамиш хъуз дюн’я халкъ аптайиз улихъна ктагъну. Дугъу Чан масанвалиинди, ⁵ Чан хушниинди ниятниинди, Иса Месигъдилантана ухъкан Чаз веледар ктауз улихъмиди къаст дапІнади гъаҳну. ⁶ Чав ккун гъапІу Месигъдилантана ухъуз туву Дугъан ужувлан вари ад магъа гъамдиль а. ⁷ Гъадгъаҳъди саб гъаҳыиган, Дугъан ифди ухъу дюрхна ва Аллагъдин аххир адру уж’вали ихъ гунгъарилан хил алдабъна. ⁸ Думу уж’вал Дугъу ухъуз жумартди тувну. Вари фагьмиинди ва аygъювалиинди ⁹ Дугъу ухъуз Чан хушниинди Чан ниятнан сир ачуҳ гъапІну. Думу ният Месигъдилантана арайиз хуз ккайиб вуйи. ¹⁰ Дугъан му ляхнар улупнайи вахтна завариин ва жилариин халкъ дапІнайиб вари Месигъдин гъюкмиккна сатПи апІбан бадали вуйидар вуйи.

¹¹ Гъадгъаҳъди саб гъаҳыиган, Аллагъди Чан вари хушниинди ва ниятниинди улихъмиди апІурайи ниятнаъ айиси, учу ктагъну. ¹² Му мици учу, Месигъдик сифте миж кивну, адлу духънайи Аллагъдин тярифар апІуз гъабхъиб ву. ¹³ Гъаци учвура, учвуз урхувал тувру гъякъвалин гаф – Ужувлан хабар гъеебхъиган, Месигъдик ктикъунчва. Дугъаҳъ хъугъиган, Аллагъдин печать гъивунчвиин – гаф тувну гъафи Гирами Рюгъ. ¹⁴ Гъадму Гирами Рюгъ ухъуз тувнайиган, адлу духънайи Аллагъдин тярифар апІуз ухъуз ирс рубкъруб ва ухъкан Чан адмийир ктаъруб аygъяхъуз.

Павел хъугърударихъбан ккарагура

¹⁵ Магъа гъаддиз, Агъа Исаихъна аий ичв хъугъуваликан ва Аллагъдин вари гирами халкъдихъна аий ичв масанваликан узуз гъеебхъиган, ¹⁶ ииз ккарагбари учву кІваин апІури, Аллагъдиз гъаммишан учвхъанди баркаллагъ кІураза. ¹⁷ Ихъ Агъа Иса



Месигъдин Аллагъди, адлу Адашди, фагъум туврайи Рюгъ ва Чан гъаврий ахъуз шлу ачмиш'вал учвуз тувуз күури, узу сикин дарди ккарагураза.¹⁸⁻¹⁹ Узу, Аллагъди ичв юкІвариз гъякъ рябкьювал туври, күури, ккарагураза. Гъадмуган, Чав дих дапІну, учвуз тувнайи гъадму умуд фу вуш, Аллагъдин гирами халкъдиз ирсди рубкъру аднан девлет фукъан зурбади вуш, ва ухъуль, Дугъан къадарсуз къувватнан кюмекниинди хъугънайи адмийирий айи еб-цуз даршлу Дугъан къудратнан зурбавал фукъануб вуш, агъю хъибичвуз.²⁰ Гъадму къувватнан кюмекниинди Аллагъди Месигъдис, Думу чИви гъапІган, гъяракат ипнийи ва айршарий Чан арччул хилихъинди,²¹ рюгънан дюн'яйин вари ахюдартІан, гъюкумдартІан, агъиортІан, ва неинки гъаму, хъа гъюз ккимбу уымрарыра кІваина хру заан ччвурартІан зиина дитнийи.²² Аллагъди вари Месигъдин ликариккна гъабхну. Думу, вари гъурдаь Дибиснайир, вари дюн'яйиль хъугънайдарин Ахюорди дерккну.²³ Дураг сатИиди Гъадгъан беден, варишварий ва варибидис вуйи Гъадгъан тамамвал ву.

Аъжалихъан уымрихъна

2 ¹Учву ичв тахсрарна гунгъарилантине дийихнайдар вуй-чва² ва, гъаму дюн'яйиль фици апІури гъахънуш, учвура Аллагъдиз къаршуди удучІвнайдарис айи рюгънан гъавайиль айи чИуру къувватарин ахюорин хиликкди гъаци апІуйчва.³ Саб вахтназ ухъура гъацдар вуйхъа ва, бедендиз ккуниси, ихъ тямия-гъярин ва ихъ чИуру ниятарин ляхнар апІуйхъа. Варидарихъди ухъузра, ихъ хасиятназ дилигну, Аллагъдин хъял кклибугура-йи.⁴ Хъа, зурба рягъим айи Аллагъди Чан зурба масанвалиинди ккун гъапІунхъу.⁵ Гъаддиз ухъу ихъ тахсрарилантине дийихнайдар вуйишра, Месигъдихъди чИви гъапІунхъу. Гъадгъан ужувленинди дюрхнайдар вучва.⁶ Аллагъди ухъу Месигъдихъ-ди чИви гъапІну ва Иса Месигъдис саб духънайи ухъу айрширий дитну.⁷ Гъаци Дугъаз Иса Месигъдилантине гъюз ккимбу вахтари ухъуз тувру Чан ужувлан кІан-кІул адру девлет варида-риз улупуз ккун гъабхъну.⁸ Гъаддиз Аллагъди учвуз Чан уж'вал тувну, ичв хъугъувалилантине гъюрхюнччу. Ичв дюрхнайивал ичв гъунар дар, хъа – Аллагъдин багъиш ву.⁹ Учву, учву гъапІу ляхнариз дилигну, дюрхнадар. Гъаддиз, ич ляхнариз лигну,



гъюрхюнча, кIури, фурс мапIанай! ¹⁰ Аллагъди ухуз дерккнайи ужувлан ляхнар тамам апIуз, ухуу Иса Месигъдиль саб дапIну, халкъ дапIнайидар вухъа.

Месигъдиль сатIи вуйидар

¹¹ Гъаддиз кIваинди гъитай: учву бабкан аллагъсузарди гъахъунчва. Адмийирин хилари бедендин суннат апIру аьдат гъапI-дари учвуз «кададабтIдар» кIури шуйчвуз. ¹² Думу вахтари учву Месигъ хътарди гъахъунчва. Учву Аллагъдин халкъ вуйи Израиларик кахърайидар дайчва. Гирами Йикърарий Аллагъди тувнайи гаф учвуз кайиб дайи. Учву му дюн'яйиль миж ктарди, я Аллагъ адарди яшамиш шулайидар вуйчва. ¹³ Хъа гъамус учву, Месигъ Исайикди ктикъган, саб вахтна Аллагъдихъан ярхла айидар, Месигъдин учвхъанди удубзу ифдинди багахъ гъахъунчва.

¹⁴ Месигъди ухуу, жугъдар ва жара халкъар, саб мясяльтназ гъахну ва кьюбикан саб гъапIну; Чан жан гъурбан дапIну, ихъ арайиъ дийибгънайи цал, яни ухуу жара апIурайи душманвал адабгъну. ¹⁵ Дугъу аьдатарна къайдийир хъайи Къанун арайиан идипну. Дугъан метлеб – Чаш сатIи дапIну, кьюбикан цийи халкъ дапIну, мясяльт ипуб ву, ¹⁶ кьюридра саб халкъси, хачриин гъабхыи ккадаъру Чан аьжалилантина Чайнди душманвал терг дапIну, Аллагъдихъди мясяльтназ хуб ву. ¹⁷ Думу дуфну, учвуз, Аллагъдихъан ярхла айидариз, ва Дугъаз багахъ хъайдариз мясяльтнакан хабар дебккну. ¹⁸ Гъаддиз Гъадгъулантина ухуз, жугъдариз ва миди вуйи халкъариз, сар Рюгъну сатIи дапI-ну, аьршарин Адашдихъна гъюз ихтияр дубхънахъуз.

¹⁹ Гъаци вуйиган, учву сарун жарадар ва гъирағъдилан дарчва. Учву Аллагъдин гирами халкъдизстар ихтиярар айи саб пай вучва ва Дугъан хизандин адмийир вучва. ²⁰ Учву вакила-рина пайгъамбари ккивнайи шибритIин бина ккебгънайдар вучва. Гъадму шибритIин сабпи ва мурчван Гъван – Месигъ Иса Учв ву. ²¹ Дид'ин ягъал-ягъал шулайи ва Агъайиз бахш вуйи, гирами дараматдиз илтIибкIурайи мюгъкам хал дийибгъна. ²² Дидиль учвкан Чан Рюгъниинди Аллагъ яшамиш шлу ужагъ шула.



Аллагъузарин арайиъ Павелин ляхнар

3 ¹Магъа гъаддиз узу, Павел, учву, аллагъузар бадали, Месигъ Исаииланмина дустагъдиль аза.

²Учвуз, икибаштIан, Аллагъди узуз Чан уж'вал учвуз улупуз табшурмиш дапIнайиваликан деебхъначвуз. ³Дугъу узуз Чан сир ачухъ гъапIунзуз, узу дидкан учвуз жикъиди гъибикIнийза. ⁴Гъаму гъурхиган, Месигъдин сирнакан узуз фу аыгъяш, ииз аыгъюваларикан учвхъанра аыгъю апIуз шулчувхъан. ⁵Му сир аыгъю хъуб гъамусдизкъан айи инсаниятдиз тувнайиб дайи. Хъа гъамус Рюгъну Аллагъдин гирами вакиларизна пайгъамбарииз думу аыгъю гъапIну. ⁶Думу сир магъа гъаму ву: жугъдариҳъди сабси жугъуд дарударра, Ужувлан хабарнахъ хъугъыну, Аллагъдин ужувлан ирсчийр ву ва дурарихъди сабси саб бедендиk ктикура. Иса Месигъдик ктикурудариз тувнайи гафнакан гъаддариизра ка.

⁷Аллагъдин къувватну узуз тувнайи ужувланинди гъадму Ужувлан хабар рабгъру гъуллугъчи духъназукан. ⁸Узуз, Аллагъдин халкъдин арайиъ варитIан асккануриз, гъаму багъиш тувназуз: Аллагъ аыгъдрудариз ебцуз удуубукъру Месигъдин девлетнакан Ужувлан хабар дебккуб. ⁹Вари халкъ гъапIу Аллагъди сифте бинайиан жиниди уьбхюрайи гъадму ляхнин гъякънаан варидализ аыгъювалар арццу багъиш тувназуз. ¹⁰Гъадму ляхнин метлеб: гъарсаб жюреийинди арайиз удубчIвру Аллагъдин фагъум вари дюн'яйиъ айи Месигъдихъ хъугънайдарилантина айршариъ айи аыхюдарииз ва гъюкмариз гъамус ачмиш дубхъну ккунду. ¹¹Му Дугъан ихъ Агъа Иса Месигъдиинди тамам гъапIу гъаммишандин ният ву. ¹²Месигъдиль саб духъну ва Гъадгъахъ хъугъыну, ухъхъан, гучI ктарди ва саб шак адарди, Аллагъдихъна гъюз шулу. ¹³Гъаддиз, учву бадали узу аyzабарикк ккахъна кIури, ккун апIураза, юкIв макадабтIанай, дурап ичв адлувализ ву.

Месигъдин масанвал

¹⁴Гъаддин бадали узу Адашдин улихъ, къамкъарииинди ккарагури, дийигъназа. ¹⁵Гъадгъухъан завариин ва жиларииин гъарсаб тухми чивар дисура. ¹⁶Узу, Аллагъди Чан аднан булвалиан Чан Рюгъниинди ичв рюгъ къувватлу апIуз, ¹⁷хъугъувалиинди ичв кIваъ Месигъ учIвуз, ичв уымрин чивна шибиртI масанвал хъуз,



¹⁸ Аллагъдин вари гирами халкъдихъди учвура Месигъдин масанвалин яркъушнан, ярхишнан, ягълишнан ва деринвалин гъаврий ахъуз, ¹⁹ учвуз инсандин фагъмиъ удрубшру гъадму масанвал айгъю хъуз, ичв умур Аллагъдин тамамвалихъди абцIуз ккарагураза.

²⁰ Хъя, ухъуль Чан къувват гъракатналь ипну, ухъу ккуун апIруб-Тан вая ккунийкIан, кIурутIан гизаф артухъ тувуз Шлуриз, ²¹ гъит, Иса Месигъдилантине ва вари дюн'яйин хъугърудар-лантине гъаммишандиз наслариан наслариз ад ибши! Амин.

Рюгънан сабвал

4 ¹Узу, Агъайин тереф дибисна кIури дустагъдиль айири, миннат апIуразачвуз: Аллагъди учвуз дих дапIнайи гъуллугъназ лайикъ вуйиси яшамиш йихъай. ²Дамагъсузди ва гъюдалди гъу-зай, чиб-чипихъна сабурлуди ва масанди йихъай. ³Вари къувват жалб дапIну мясяльтнахъди рюгънан ичв сабвал йибтIай. ⁴Рюгъ сар ву, Месигъдин беденра саб ву ва, гъадраси, Аллагъди учвуз дих дапIнайи умудра саб ву. ⁵Сар Агъа, саб хъугъувал, ухъу вари штуан хъувалин метлебра саб ву. ⁶Айир – сар Аллагъ. Думу варидалин Адаш ву. Думу ихъ варидалин зinin Алир ву, Дугъан ляхнар ухъ'инди варидариинди ву, ва Думу ухъуль варидариль яша-миш шула.

⁷ Месигъди улупнайи къадарниинди ухъуз гъарсариз хъуркъувал гъязанмиш апIуз шлу багъиш тувнахъуз. ⁸ Гъаддиз дибикIнуре а:

«Чахъди къадарсуз йисирар хъади,
Думу гъалибвалиинди кIакIназ удучIвну,
ва Чан адмийириз багъишар тувну».

⁹ «КIакIназ удучIвну» кIуру гафну мугагъназ Думу исина, жилин кIанакк йишвариз гъювал улупура. ¹⁰ Чахъди вари дюн'я абцIбан бадали айршартIан зине за Гъашир, гъадму исина Гъушур ву. ¹¹ Ари Гъадму ву багъишар Тувур: фужариз – вакилар хъуб, фужариз – пайгъамбар, фужариз – Ужувлан хабар ктибт-рудар, фужариз – хъугърударин ахъюдар ва мялимар хъуб. ¹² Мици, Аллагъдин гирами халкъ, Месигъдин беден артмиш апIуз гъуллугъназ гъязур апIбан бадали, гъабхъну. ¹³ Му мици, ихъ хъугъувалиль ухъу вари саб хайизкъан, Аллагъдин Бай айгъю апIайизкъан, рюгънан хъуркъувалихъна гъайизкъан ва вари тамамвал Айириз – Месигъдиз ухъу ушшар шайизкъан хъибди.



¹⁴Хъя думуган ухбу сарун лепиири ккалакъурайи ва гъар жюре каламарин микІарих гытнайи, инсанар улдугуз гытри, аймалдар кучІляхярикк ккахъру бишІидарси хыдархъа. ¹⁵Эгер ккунивалиинди гъякъ'вал кІури гъабхъиш, варибдин кІул вуйи Месигъдин хасиятназ ухшарди ухбу ахю хьидихъа. ¹⁶Гъадгъан кюмекниинди вари беден саб дубхъна ва гъар жюре айлакъири кибтІна, дидин вари паяри гъарсабди чаз улупнайиб тамам апІура. Гъамци вари беден ахю ва масанвализ артмиш шула.

Йирси ва цИийи уымур

¹⁷Гъаци вуйиган узу Агъайнин ччвурнахъан кІураза, тІалаб апІураза: ичи фикрап аий аллагъусуарси яшамиш хъуб дипай. ¹⁸Дурагин фагъум рюгънан курвалиан ва юкІвар дициркънайивалиан мучІу дубхъна, дураг Аллагъди тувру уымрихъан гъадатІна. ¹⁹Дураг, инсанвалин лишан дудубгну, адрацІди, гъубкъу чиркишнай арсри, къяппавалиш ахъра.

²⁰Хъя учвуз Месигъ дици айгъю гъахъундарчвуз. ²¹Саб шак адарди, Дугъкан учвуз гъеебхъунчвуз ва, Гъадгъан терефкрап вуйивализ дилигну, учвуз гъякъ'вал улупунчвуз, фицики гъякъ'вал Исаиль а. ²²Ичв йирси табиаитдиз хас вуйи, улар йитІру кучІлин тямягъяри пуч апІурайи мугагъназдин уымур гъибтуз учвуз улупний. ²³Ичв фикир апІбан саягъ цИийи алапІай, ²⁴Аллагъдин хасият – гъякъ вуйи дюзвал ва гирамивал улупурайи цИийи табиаит «алабхъай».

²⁵Гъит гъарсари кучІал дипри ва жуван багахъ хайидариз дюзвал йипри, гъяз гъапиш ухбу вари саб бедендин паяр вухъа. ²⁶Хъял кубчІвнади гунағ мапІанай. Гъит ичв хъял ригъ алабхъайиз ккядябхъри, ²⁷ичв уымрий иблисдиз йишв мутуванай. ²⁸Шли гъитІибкІушиш, сарун мигъитІибкІан, жуван хилари гъазанмиш апІин ва адрудариз капІ.

²⁹Гъич сабкъан ахмакъ гаф мапІанай, ужуб рякьюхъ хъарьу ва хъпехърудариз хайирлу гафар йипай. ³⁰Ккадаъру Йигъ гъайиз учв'ин печать йивнайи Аллагъдин Гирами Рюгъназ гиран макадапІанай. ³¹КІван гъарсаб къутІкъливалихъан, хъял гъювалихъан, тюнтвалихъан, Чигъарихъан, люкънар-агъарихъан, гъар жюре хъял бисувалихъан азад йихъай. ³²Сар-сарихъна гъюрмат ади йихъай, учву Месигъдиз саб гъахъиган Аллагъди учвлан фици хил алдабгънуш, учвура чиб-чпилан хил алдабгъури гъузай.



Аквнахъ яшамиш шулайиси гъузай

5 ¹ Аллагъдин ккуни веледарси, Гъадгъаз ухшар йихъай. ² Ка-
балгру ицци ниар адаури, Аллагъдиз Месигъ Учв фици гъур-
бан гъахънуш ва фици ухъу ккун гъапІнуш, гъаци масанди яша-
миш йихъай.

³ Ичв арайиъ къяппаваликан, вая жара чиркинваликан, ясана
тямъгъарваликан гафаркъан даришри — мурап Аллагъдин гира-
ми халкъдиз хас дар. ⁴ Ичв ушвниъ гъич фицикІа лайикъ даруб,
ичИи улхуб вая кацІу зарафтар духыну ккундар, Аллагъдиз чухса-
гъул кІури гъабшиш, ужу шул! ⁵ Къяппавалиъ ахъру гъич сар кас,
я чиркин кас, я тямъгъкар (мицир идолариз икрам апІрурик
гъисаб ву) Аллагъдинна Месигъдин Паччагълугъдиз ирсанан эйси
хъидар.

⁶ Гъит, зиихъ дунайибдиз къаршу удучІвну, гъич сарира учву
алдатмиш дарапІри, гъаз гъапиш мютІюгъ дарудари чпиина Ал-
лагъдин хъял алапІура. ⁷ Мицдар адмийирихъди ичв фукІа урта-
хъуб даришри.

Аквнан баяр

⁸ Саб ухди учву мучІушин вуйчва, хъа гъамус, учву Агъайиъ саб
вуйиган, акв вучва. Аквнан баярси яшамиш йихъай. ⁹ Хъа акв-
нан бегъер — гъянивал, дугъривал ва гъякъвал ву. ¹⁰ Агъайиз фу
къабулди шулуш, аygъю апІури йихъай. ¹¹ МучІушнан бегъерсуз
ляхнариъ иштирак махъанай, хъа дураг дюз дарувал улупай.
¹² Дураги жиниди апІурайидарикан пуз гъеле начра шулу. ¹³ Хъа
вари жиниб аквнахъ ачухъ хъибди. ¹⁴ Вари рябкъюри апІруб акв
ву, гъадлиз гъамци кІурира а:

«Даахнайир, хъирг!
ДукІнайир, гъудужв!
Месигъди уву аквнакк ккаъди».

¹⁵ Лигайгъа, ахмакъарси яшамиш махъанай, хъа фагъумлуйирси.
¹⁶ Жкуван вахт ужуйи гъапІуз ял апІнай, гъаз гъапиш му йигъа-
рий гизаф писвал а. ¹⁷ ПчІу юкІв ади махъанай, хъа Агъа Аллагъ-
дин ният фу вуш, гъаврий ахъуз чалишмиш йихъай. ¹⁸ Ички гизаф
мубхъанай, диди ягъ-намус дубгуз гъитру, хъа Рюгънахъди ацІай.
¹⁹ Чиб-чпиихъди Мяълийириин китабдиан тярифнан ва рюгънан



мяълиириинди сюгъбатар апIинай. Ичв юкIвариь Агъайиз мяълийир апIури, Дугъан ад апIинай.²⁰ Ихъ Агъа Иса Месигъдин ччвур дибисну, Адаш Аллагъдиз гъаммишан ва варибидихъан чух-сагъул йипай.

Жилиринна хпирин аылакъйир

²¹ Месигъдиз айи лап дерин гъюрматнаан чиб-чпиз мютIюгъ иихъай.

²² Учву, хпар, Агъайизси, ичв жилариизра мютIюгъ иихъай. ²³ Гъаз гъапиш Месигъ фици Чан бедендин – вари хъугърударин – КIул ва дурар Уърхур вуш, жилирра чан хпирин кIул ву. ²⁴ Месигъдиз хъугърудар фици мютIюгъ вуш, ари хпарра чпин жила-риз гъаци мютIюгъ духъну ккунду.

²⁵⁻²⁷ Хъя учву, жилар, Месигъди Чахъ хъугърудар фици ккун гъапIнуш, ичв хпарра гъаци ккун апIинай. Дугъу, гафналантина штуъ марцц дапIну, гирами апIбан бадали, я миж, я камивал, ясана жара фукIа гъациб ктарди, швшвси, чпин вари аднаъди Чан улихъ дерккну Чаз бахш апIбан бадали, тахсир ктру хъугъ-рударин гирами Жямяльт хъпан бадали, хъугърударихъанди Чан жан тувну. ²⁸ Гъаци жиларра, чпин жанар фици ккундуш, чпин хпарра гъаци ккун апIуз буржлу ву. Шлиз чан хпир ккундуш, дугъаз учв ккунду. ²⁹ Хъя мегъел чан жан даккнир гъахъундар, адми дидин гъайгъушнаъ шулу, думу тухъ апIури шулу. Гъаци Месигъра хъугърударин гъайгъушнаъ а, ³⁰ гъаз гъапиш ухъу Ду-гъан бедендин паяр вухъа. ³¹ «Гъаддиз адми, чан адашна дада гъитну, чан хпирик карсди, ва кьюрикан саб жан хъибди». ³² Му-швавъ зурба вуйи сир а, узу кIурайиси, думу сир Месигъдинна вары хъугърударин аылакъирикан ву. ³³ Хъя учвуз кайиб, гъит гъар жилири, чаз учв ккуниси, чан хпир ккун апIри ва хпирира чан жилирин гъюрмат убъхри.

Абийир-бабар ва бицIидар

6 ¹ БицIидар, Агъайихъди гъягърудариз лайикъ вуйиси, ичв аб-иир-бабарихъ хъпехъури апIинай – му дюзвал ву.

²⁻³ «Уву бахтлу хъпан ва жилиин ярхи умур
хъапIбан бадали,
яв адаш-дадайиз гъюрмат апIин» –



му Аллагъди гаф тувнайи сабпи табшуругъ ву.

⁴Адшар, ичв бицЦидарик хъял макапIанай, хъа Агъайнин тербияйихъдина насигъятарихъди ижмиди вердиш апIинай.

Эйсийр ва лукIар

⁵ЛукIар, учву Месигъдиз мютIюгъ шлуси, вари юкIв хъипну, гъюрмат адигучI кади жилин ичв агъириз мютIюгъ йихъай. ⁶Дурагиз учву ккуун хъпан бадали, зильлан апIруси мапIанай, хъа юкIв хъипну, Аллагъдин ният тамам апIурайи Месигъдин лукIарси лихай. ⁷Адмиирихъ лихурайиси ваъ, хъа аэршарин Агъайихъ лихурайиси юкIв хъади лихай. ⁸Учвуз агъюганси, учв лукI вушра — даршра, шли ужуб ляхин гъапIиш, гъарсаб ляхназ Агъайи пешкеш тувди.

⁹Учвура, агъири, лукIарихъна гъаци йихъай. ГучIар ккауб гъибтай. Учвуз агъюганси, ичвра, дурагинра сар Агъа ву аэршарий Айир, хъа Думу гъич саринра тереф бисрур дар.

Аллагъдин рукъян палат алабхъай

¹⁰Аххирки, Агъайи саб хъувалий, Дугъан удукуувалий вакъувватнаш ижми йихъай. ¹¹Аллагъди учвуз тувнайи вари яракъ, иблисдин тулариз къаршу дугъужвуз, алабхъай. ¹²Фицики ухъу дяви ийккканна ифдикан вуйи адмиирихъди гъабхурадархъа, хъа ахходарихъдина гъокумдрагирихъди, гъаму мучIушнан дюн'я хилий дебиснайдарихъди вазаварий писвалин рюгърихъди гъабхурахъа. ¹³Ари гъаддиз, писвал алжабгъуз хъюбгъю йигъан учвхъан къаршу дийигъуз, вакул адабгъуну гъузуз, Аллагъдин вари яракъ учвухъна бисай. ¹⁴Юкъвнаан гъякъвал идибIину вадюзвалин рукъян палатдиз учIину, ижмиди дийигъай. ¹⁵Ичв ликариин алахърударра, дюн'яиз Ужувлан хабар гъабхуз, гъязурди ишри. ¹⁶Варидилан гъайри, иблисдин цла кайи чимрар ктIуршвуз, хъугъвалин гъалхан ижмиди бисай. ¹⁷Уърхрувалин рукъян бакара улубкIай вадюгъан ханжалра, яни Аллагъдин Гаф гъадабгъай. ¹⁸Гъубкуу жюреийинди ккарагай вадюгъаныди учвуз ккууни вахтна Аллагъдикан талаб апIинай. Гъаци хъуз гъязурди вадю Аллагъдин вари гирами халкъдихъан гъаммишан ккарагури гъузай.

¹⁹Узу ушв абццубси, лазим гафар тувбан бадали вадю Ужувлан хабарнан сир улихъ гучI ктарди ктибтбан бадали, узхъандира



ккарагай. ²⁰Узу гъеле гъаму зунжрариь ашра, гъаддин гъякънаан гъаънайир вуза. Узу лазим вуйибси дирбашди дидкан хабар дебккбан бадали, узхъан ккарагай.

²¹Узу гъапIраш, Агъайиз дугъривалиинди гъуллугъ апIурайи йиз ккуни гъардаш Тихикди узкан вари пиичвуз. ²²Думу гъаддиз учвухъна, ич ляхнарикан ктибтуз ва ичв юкIварик аышкъ капIуз гъаърайир вуйиз.

²³Гъит, гъардшар, мясляйт, масанвал ва хъугъвал Адаш Аллагъдихъан ва Агъа Иса Месигъдихъан ибшричвуз. ²⁴Зат ахир адарди ихь Агъа Иса Месигъ ккуни варидализ уж'вал ибшри.



ФИЛИПП ШАГЬРИЙ АЙИ ХЪУГЪРУДАРИЗ КАГЪАЗ

Филипп шагыриз Павел, жара халкъариз Ужувлан хабар рабгүз кьюбпи ражари сиягъятназ удучІвган, гъафну. Европайин жиларин Исаихъ хъугъдар сифте вуди гъадму шагырий ачмиш шулу. Ужувлан хабар рабгүра кIури, гъаддин кIуллан Римдиз дустагъ данIнайи Павелихъди гъаму шагырин хъугърудариз Гирами Рюгъну кагъаз бикIуз мажсбур гъапIну. Павел чан суддиз ккилигурайи. Дугъан, учв гъякъ данIну, азад апIур кIури, миж айи. Филипп шагырин хъугърударин пулин кюмекнинди, чахъан чишихъна гъюз шлу мумкинвализ Павели чухсагбул кIура. Исаин вакилин юкIв, дураг чтиз алахъурайи читинвалариз дилигди, Иса Месигъдикан вуйи Ужувлан хабарниинди яшамиши шулайиган, марциди шадвали абцIна. Гъаму кагъзин кьюбпи кIулин 6-11-ти цIарари адми гъяйран данIну дерккру. Душваь, асккан гъапIу Месигъдикан гъевеслуди ктибтура. Месигъдин табигъ'валикан вуйи му ктибтувал сифте Исаихъ хъугъдарин арайиъ гъеле сабни шагыидвал ву. Кагъаз, дустагъдиз дилигиди, шадвали абцIна, гъаз гъапииш Павелин Филиппдиз хъугърударихъди ужудар аялакъийир а. Фицики дураг чтин хъугъувалишин ижимиidi дийигъна, мугагъназси гъамусра дураг жара хъугърудариз кюмек апIуз гъязур ву. Мидлан савайи, Филипп агълари Месигъдилан улар алдадагъри, Дугъан масанвал, дирбаш'вал ва инсанарин гъуллугънаш хъувал кIваин алди ккунду, кIура Аллагъдин Рюгъну. Чан шадвал Дугъу гъаму тухъ



ва важибулу цIарниинди ухъухына рубкъура: «Ихъ Агъайиз саб духьну, гъаммишан шадвал хъапIай, хъана кIураза: шадвал хъапIай!» (4:4).

1 ¹Месигъ Исайин гъуллугъчийр вуйи Павелихъанна Тимофеевихъан – Филиппдиз айи Месигъ Исайихъди саб вуйи Аллагъдин хъугърудариз, гъадму хъугърударин аыхюдариз ва дурарин кюмекчиириз.

² Уж'вал ва мясяляйт учвуз, ихъ Адаш Аллагъдихъан ва Агъя Иса Месигъдихъан!

Павелин миннат

³ Гъар ражари учву кIавайн апIури, узу йиз Аллагъдиз баркаллагъ кIураза. ⁴ Гъар ражари учвхъан ккарагруган, узу шадвалиинди ккарагури шулза, ⁵гъаз гъапиш учву Ужувлан хабар рабгъбая сифте йигъариланмина гъамусдизкъан иштирак шулачва. ⁶ Учвуз гъадму ужуб ляхин Ккебгъури Месигъ Исайин Йигъазкъан гъадму ляхин гъабхи迪 ва гъадмуган ккудубкIиди.

⁷ Дугъридан, учвухъна вуйи йиз гъиссар ари гъацдар духьну ккунду! Узу дустагъдиз айиганси, адруганра – узу Ужувлан хабар, дид'ин алжагърударихъан убхюрайиган ва думу дугъри вуйиб тасдикъ апIугран, узуси учвура гъадму ужувлан гъуллугъналь гъахъунчва. ⁸ Месигъ Исайин Чан юкIвиши йиз юкIв фициб убцру масанвалиинди учвухъна вуйиш, магъя Аллагъ шагъид ву! ⁹ Узу, ичв масанвал хъана артухъ аыхю хъпан бадали ва гъякъ альгъуваларина сагъу фагъумлували учву ацIбан бадали, ккарагураза. ¹⁰ Гъаддиз учвхъан учвуз ужубсиб гъядябгъюз хъибдичвухъан; учву Месигъ хъадакну гъюрю Йигъан марцциди ва саб тахсир ктарди гъуздичва; ¹¹ учвхъан Аллагъдин ад ва тириф апIуз шлуси, Иса Месигъдин кюмекниинди гъякъ'валин бегъер хуз хъибдичвухъан.

Павели альгъ апIурайи дарвалари Аллагъдин ляхнариз кюмек апIура

¹² Учвуз альгъяди ккундузуз, гъардшар: узухъди гъахъи гъядисийр Ужувлан хабар рабгъуз кюмек гъахъну. ¹³ Римдин паччагъдин хулан гъуллугъналь айи эскрализра ва вари жарадализра узу Месигъдин кIуллан дустагъдиз итнайиваликан альгъя. ¹⁴ Узу дустагъдиз



итну кIури, Агъайихъди саб вуйи гизаф гъардшар, саб юкIв айиганси, уч гъахъну ва хъана ачухъди ва гучI ктарди Аллагъдин гафнакан ктибтури гъахъну.

¹⁵Дюз гъапиш, дурарикан сакьюдари Месигъдикан хабар чпин арайиъ баҳилвал, талит ади дебкка, хъа жарадари – ужудар ниятар ади. ¹⁶Му адмийири мици узу ккунивалиан апIура, дурапиз, узу, Ужувлан хабар уьбхюз кIури, Аллагъди дерккнайива-ликан альгъя.

¹⁷Хъа гъацдарра аки, Месигъдикан хабар чпин хайирнахъди рабгърударра. Дицдари Хабар марцци кIваан рабгъури шулдар, дурари дици, узу йитIнайи зунжрар ижми ва гъагъи апIуз ккунди айидариси апIура. ¹⁸Фу пухъахъя? Дурари чIуру вая марцци ният ади кIурашра, Месигъдикан кIура – гъаддиз узу гъацибдиз-ра рази вуза.

Узу шадвали ацIиза, ¹⁹фицики ичв ккарагбарина, Иса Месигъдин Рюгънан кюмекнуна ва гъамци хъпу узу азад апIруб, альгъязуз. ²⁰Му йиз ижми умударихъдина ккилигурайивалихъди сабси гъюра. Ва, гъаци вуйиган, узу нач шлуси апIидарза, хъа мугагъназси гъамусра гъаци кIубанди хъидиза, ва, узу чIивиди гъузишра, гъачIишра, йиз бедендиъ Месигъ за дапIну хъиди. ²¹Фицики йиз уьмур Месигъ вуйиз, альжал – узуз гъурубкъу мутму. ²²Хъа эгер узу йиз бедендиинди яшамиш шули гъузиш, узу бегъерлуди лихувал хъибди. Гъаци вуйиган, узу узуз фу ктабгъу-рушра, альгъдарзуз. ²³Йиз ниятназ дилигди, гъадму къюб рякъкан узу саб рякъ ктабгъну ккунду. Узуз, му дюн'яиан душну, Месигъдихъди шлу рякъ ктабгъуз ккундузуз, мици гъабхънийиш, икибаштIан, лап гизаф ужу вуйи. ²⁴Хъа узу му дюн'яиин гъузиш, ичв хайирназ хъибди, гъаддиз, муунуб рякъ хъа гизаф ужуб ву. ²⁵Му гъаци вуйиган, узу гъамуш'ин гъузруб альгъязуз. Узу, учву хъугъувалиъ улихъ гъягъюз ва ичв хъугъували хурайи шадвал артухъ хъуз, учвухъди гъуздиза. ²⁶Узу хъана учвухъна гъафиган, узлантина Месигъ Исаийинди хъа артухъ фурс апIуз хъибдичвухъян.

²⁷⁻²⁸Фицдар гъяларий ахъишра, Месигъдин Ужувлан хабар ктиб-туз лайикълуди гъузай! Узу учвухъна гъафиган, рябкъруси, хъа гъюз дархъиш, узуз ебхъруси саб хилди, Ужувлан хабар бадали, жафа зигури ва гъич сарихъдира учвуз гучI ккапIуз гъидритди яшамиш йихъай. Гъамциб ичв дирбаш'вал дурализ чпи тIанкъ



шлувалин лишан хьибди, хъа учву дюрхну хьиди, мурагар вари Аллагыдин ляхнар хьиди. ²⁹ Аллагыди учвуз Месигъ бадали хъугъувал ва Месигъ бадали аъзабар аъгъ апIуб тувна. ³⁰ Фицики узу, учвуз рябкьюри, ичв улихъ гъубхубсиб дяви учвура гъабхурачва. Узу думу, учвуз аъгъюганси, гъамусра гъабхураза.

Сар-сарин гъайгъушнаң иихъай

2 ¹Эгер учвуз Месигъдь ккарцуval аш, эгер Дугъан масанвал учвуз шадвал вуш, эгер ичв арайиъ Рюгъниндi гаф-Чал аш, эгер ичв арайиъ рягъимлуval ва язухъ зигувал аш, ² йиз юкIв гъубкIну шад шлуси апIинай: вари юкIв хъипну, вари сабси ккун апIинай, саб жанси саб рюгънаъди иихъай ва сабсдар фагъмар-фиқрар ишричвуъ. ³ Жувван заанвал, ясана тяриф бадали, фукIара мапIанай. Хъа жувутIан багахъ хъайир заанди дисури апIинай. ⁴ Учвкан гъарсари неинки чан, хъа гъацира имбударин хайирнаканра фикир апIри!

Мисал – Месигъ

⁵ Месигъди фици фикир апIуйиш ва гъапIри гъахънийиш, учвупра гъаци апIури гъузай.

⁶ Думу учв Аллагъ вушра, Аллагыдихъди сабси, Аллагыдихъан хъичIихну гъузундар. ⁷ Хъа, Чайна лукIвал гъадабгъну, Учв ас-ккан гъахъну. Думу адмиириз ухшар айир гъахъну. Думу зильлан адмиси духъну, ⁸ гъациб саягъниин разиди гъузну, тап чан аъжал хъайизкван, думу, аъжалра фициб аъжал – чавра хачриин, мютIюгъди гъузну имий! ⁹ Гъаци хъузди Аллагыди Думу варибдин зиина за гъапIну ва ччвурра Дугъаз варидаrintIан заан вуйиб тувну – ¹⁰ Исаин ччвурнан улихъ гъарсабди икрам апIбан бадали завариин али, жилариин али ва жиларикк ккайи варибди, ¹¹ гъарсаб мелзну, Иса Месигъ Адаш Аллагыдин адлувализ вуйи Агъа ву, кIури, ччвур бисбан бадали.

Аллагыдиз учву фицидар духъну ккундуш, гъацдар иихъай

¹² Йиз ккунидар, узу учвухъди хъайиган, учву, фициб аышкъ-нииндi узуз мютIюгъ духъну, лихуйиш, гъаци зурба аышкъ кади, гъюрмат ади ва гучI’вал хъади, узу учвухъди хътруганра, ичв ур-хювал тамамуб хъпан бадали, лихай. ¹³ Фицики иллагыки Аллагыди,



Чаз ккуниб апІбан бадали, ичв тямягъ арайиз хуру ва ляхнарихъ хъаъру. ¹⁴ Мурмрарна гьюжатар дарапІди, вари апІнай. ¹⁵ Ва гъадмуган учвук гъич саб тахсир хъибдар, марцциди гъузичва; намусна гъир'ят дудубгнайи ва улдугнайи инсанарин арайиль Аллагъдин марцци веледар хъидичва. Чиркиндарин арайиль, ийшвандин мучІушналь акв туврайи хъдарси, йихъай. ¹⁶ Гъашиб жюрейиинді уымур хурайи Гаф гъайибхай! Месигъдин Йигъан узу из рякъ давди ккадапІундайза ва давди жафийр гъизигундайза кІури, учв'инди фурс апІдида!

¹⁷ Аллагъ бадали апІурайи ляхнарий ичв хъугъувалин гъуллугъналь хъпаль из ифи удубзурушра, узу шад хъидиза, учвухъди саб-си шадвал хъапІдида. ¹⁸ Ари гъамциб жюрейиинді учвура шадвал хъапІну ккунду, ва ичв шадвал узухъдира пай апІуз шлуси гъузай!

Тимофеиканна Эпофрадитдикан хабрап

¹⁹ Агъа Исаи, багарихъди Тимофей учвухъна гъауз шул, кІури, умуд тувразуз, дугъу ичв ляхнар фици вуш, узуз аыгъю гъапІган, из юкІв архаин шул. ²⁰ Тимофейси, учвхъанди юкІв убгру жара кас адарзуз. ²¹ Вари имбудар чпин хайирнахъ хъа, Иса Месигъ бадали вуйир гъич фужкІара дар. ²² Думу фукъан мюгъкамур вуш, учвуз аыгъячвуз, думу узухъди, Ужувлан хабар бадали бай адашдихъди фици шулуш, гъаци шула. ²³ Узуз, из ляхин фицидарихъинди илтІибкІнуш, аыгъю гъабхьимитІлан думу учвухъна гъауз миж кайиз. ²⁴ Агъайи, багарихъди узхъанра учвухъна гъюз шул, кІури, умуд тувразуз.

²⁵ Узу гъацира, эгер ихъ гъардаш Эпофрадитра учвухъна къяляхъ гъаиш ужу шул, кІури, гъисаб апІураза. Думу, из гъайгъу зигбан бадали, учву узухъна гъау из гъуллугъчи ва узуси саб гъагънакк ккайи из юлдаш вуйиз. ²⁶ Дугъяз учву рякъюз гизаф ккунди а, думу иишв'ин сикинди ктисурадар, гъялак духъна, гъаз гъапиш, учв иццру гъахъну, кІури, учвухъна хабар дубшна, кІура. ²⁷ Думу гъаци хъузра гъабхъну ва даркІиди саб нуфт ими. Аммаки Аллагъди дугъан язухъ гъизигну, неинки дугъан, хъа гъацира изизра язухъ гъизигну – Аллагъдиз из дерд артухъ апІуз ккун гъабхъундар. ²⁸ Гъаци вуйиган, Эпофрадит хъа аыхю иштагъниинди учвухъна гъаъдиза. Думу учвухъна гъюб ичв аыхю шадвал хъибди, ва из дердра гъаму сабдиинді кам хъибди. ²⁹ Думу Агъайихъди



вуйи ичв гъардашси аыхю шадвалинди къабул апIинай ва гъацдар адмийириз чпи лайикъ вуйибсиб гъюрматра апIури йихъай.³⁰ Фицики Месигъдин ляхнар бадали дугъан лик айжалин дарганин алди гъабхъну, дугъу чан уьмур гъайиф гъапIундайи. Гъаци дугъу учвхъан ууз апIуз дархы кюмекар гъапIунзуз.

Месигъ варидартIан заан ву

3¹Ахирки, йиз гъардшар, учву Месигъдихъди хъайивалихъди учвуз шадвалар ккун апIураза! Узу учвуз гъаммишан сабдикан бикIурашра, эргри шулдарза. Миди учву гизаф бедбаҳтвала-риккан уърхиди.

²Суннат апIури, бедендиз зиян тувру намуссуз „хуирихъан“ ихтият йихъай! ³Гъякъ суннат дапIайидар, ухъу вухъа, гъаз гъа-пиш, ухъу Аллагъдин Рюгъну хъаъри, Дугъан гъякъ гъуллугъналь ахъя; Месигъ Исаин уьмриинди ухъу заан, яни дамахлу вухъа ва му дюн'яйинубдихъан хъичIихнадархъа. ⁴Узхъан му дюн'яйинубдии гъубзру бин азуз, кIури гъабшиш, дугъазтIан ууз дициб бин хъа ижмий азуз. ⁵Йиз суннат бабкан духъну миржидпи йигъан гъапIнийи. Узу Израилин халкъдин арайиан вуйи Вениаминдин тухмиан вуза. Узу жугъдар вуйи абиир-бабарикан духънайи мар-цици жугъуд вуза. Эгер Къанундихъди фици вува, кIури, гъерх-руш, узу Къанун гъярф-гъярфди тамам апIру фарисей вуза. ⁶Йиз хъачIаккувал Аллагъдихъ хъугърударихъ хъергуб вуйиз. Къанунди дюз кIурайиб вари тамам апIури гъахъунза, гъаддин гъякъна-ан узук гъич саб тахсирра ктарзук.

⁷Аммаки гъадмуган узу гъазанмиш дапIайи вари хъуркъу-валар Месигъ бадали гъамус узхъан гъадахъу мисал апIураза. ⁸Мидланра гъайри, йиз Агъа Месигъ Иса аygъю хъпан къяляхъ вари имбуб гъич фукIа дарубси гъисаб апIураза. Думу бадали узу варибдихъан ярхла гъахъунза, гъаму дюн'яйиъ айиб вари гатIахъ-найи чIюрхяртIан багъади дарзуз. Йиз мурад-метлеб, гъапIнора, Месигъ агуб ва ⁹узу Гъадгъахъди хъуб вуйиз. Сарун узу, Къанунди улупнайиб тамам апIидиза, кIури, жувуван жафайиинди Аллагъдин улихъ гъякъ хъуз хъибдизухъан кIури, гъаддихъ хъачIаркк-ну имдарза. Месигъдихъ хъугъигантIан Аллагъдин улихъ гъякъ хъуз шлуб дар – узу гъаддихъ хъачIарккназа. Гъациб хъугъевал



түврайирра Аллагъ ву. Узуз ккуниб сабтІан дарзуз: ¹⁰ Иса Месигъ аыгъю апІуб, яни Думу чІиви гъапІу къудрат аыгъю апІуб. Узуз гъацира, Дугъан аyzабар пай апІуз ккундузуз ва, Гъадму гъачІиб-си дукІну, ¹¹ Гъадму чІиви гъахыганси, узура чІиви хыдайкІан, кІури, миж кади гъузуз ккундузуз.

Улихъ хъайи метлеб тамам апІуз шерик иихъай

¹² Узуз, узу гъадму метлебарихъна гъафунза, пуз, ккунди адарзуз. Аммаки Иса Месигъди узу, гъадму метлебарихъна гъоз кІури, ка-дагънайир ву. ¹³ Гъардшар, йиз улихъ гъамциб къайда дебккназа: сарун гъапІу ляхнарикан фикир дарараІуб ва узуз айи вари къувват-ниинди апІуз ккимбу ляхнарихъ хъюгъюб. ¹⁴ Гъаци апІувалин мет-лебра узу пешкеш рубкъуз лайикъ хъувал вуйиз. Думу пешкеш – Иса Месигъдиланмина Аллагъди аyrшариз дих дапІнайивал вуйиз.

¹⁵ Узуз учвкан фужар хъуркънаш, гъаму узуси духыну ккундий-зуз. Хъа эгер, саб фициб-вуш месэлайн гъякънаан учву жара-си фикир апІураш, Аллагъди гъадмурा ачухъ апІидичвуз. ¹⁶ Фи-циб жюрейиинді вушра, гъачай, ухъу гъамусдиз хъуркънайи хъур-къувалар, аygъювалар гъисабназ гъадагъну, яшамиш шулахъа. ¹⁷ Гъардшар, жарадар гъярайиси, учвра йиз рякъди узухъди дуф-ну ккунду. Учу учвуз улупганси яшамиш шулайдариз фикир тувай. ¹⁸ Фицики, гизафдар, узу учвуз улихъна гъапиганси (гъа-мусра улариин нивгъар алди хъана кІураза), Месигъдин хачран душмнарси яшамиш шула. ¹⁹ Дуарарин аыхир айжал хъибди, ду-рарин аллагъ чпин фун ву; чпиз нач дубхъну ккунибиинді дура-ри фурсар апІури шулу. Дуарари дюн'яйин ляхнарикантІан фикир апІури шулдар. ²⁰ Хъа ихъ ватан аyrшариз а. Гъадму ихъ Ватан-диан гъиди ухъу Уърхру ихъ Агъа Иса Месигъ. ²¹ Дугъу, ихъ зяиф, айжал хъайи жанар дигиш дапІну, Чансиб нур түврү Бедендиэз илтІикІиди. Дугъу ихъ жанар вари дюн'я Чаз мютІюгъ апІуз гъитди.

Аллагъ ву умуднан, шадвалин ва мясляйтнан булагъ

4 ¹ Магъа гъаддиз, йиз ккуни ва дярякъди ктирсуз даршлу гъардшар, ккунидар, йиз шадвал ва гъалибалин таж, Агъа-йихъди сатІиди, ижмиди дийигъну гъузай! ² Узу Эводияйиканна Синтихияйикан ккун апІураза: Агъайин ччвур бадали албагну



яшамиш йихъай! ³Узу увканра, йиз дугъри вуйи Сизиг, ккун апIураза: миннат вуйиз, кюмек апIин гъадариз, фицики дурар кьюридра Ужувлан хабар бадали, узухъди, Клементдихъди ва имбу йиз юлдширихъди (дурарин чвурар Умрин китабдик ка), гъилихну.

⁴Агъайихъди саб духьну, гъаммишан шадвал хъапIай! Хъана кIураза: шадвал хъапIай. ⁵Гъит варидализ ичв фурс ктрувал рябъри. Агъа магъа багахъ хъа! ⁶Гъич сабдинна гъайгъушна махъанай. Аммаки фицдар гъялариъ ашра, ккарагай, ккуниб ккун апIури, илтIикIай, ясана, чухсагъул кIури, илтIикIай, гъит ичв Талабар Аллагъдиз аygъю ишри. ⁷Хъа Аллагъдихъан гъюрайи, гъаврий ахъуз даршлу, заан вуйи мясляльтну, ичв юкIвар ва фикрар Месигъ Исаийъ уърхиди.

⁸Ахирки, гъардшар, гъарган гъякъ вуйибдикан, лайикъ вуйибдикан, дюзваликан, марцибдикан, бегелмишубна гъайранубдикан, намусуваликан ва тярифариз лайикъбдикан фикир апIинай. ⁹Узхъан гъудубгъуб, узхъан гъурубкъуб, узкан гъеебхъуб, узуль гъябкъюб – вари тамам апIинай, ва гъадмуган мясляльтнан булагъ вуйи Аллагъ учвухъди хъиди.

¹⁰Учву хъана йиз гъайгъушна учIвну, узухъди илтIикIиган, узу йиз вари юкIв хъипну Агъайихъди сабси шадвали гъадагъунза. ИкибаштIан, учву гъаммишан йиз гъайгъушна ачва, хъа гъамусдизкъан учвуз ичв гъайгъу узуз улупуз мумкинвал адайчвуз.

¹¹Узу мици, учвкан фу-вш ккунди айивалиан кIурайиб дариз, фицики, узу фициб гъялна ахънашра, узуз айибдин разиди гъузуз гъудубгъунза. ¹²Узуз, касиби вушра ва ацIну ашра, яшамиш хъуз аygъязуз. Уз'ин вариб улубкъунзун ва варибдихъна гъязурра вуза: тухъвалихъна ва гаш'валихъна, девлетлуварихъна ва касибвалихъна. ¹³Узуз къувват Туврайирин кюмекнинди вари шулзухъян.

¹⁴Хъа вушра, узухъди йиз дердер учвура пай апIуб ужу гъапIунчва. ¹⁵Учвуз аygъячвуз, Филиппдин агълар, узу Македонияиан удучIвну, Ужувлан хабар рабгъуз хъюгъхъанмина, учвлан гъайри, Аллагъдихъ хъугърударин гъич саб жямляйтди кюмек гъапIундарзуз. ¹⁶Учву Фессалоникидиз кмидира швнубсабан йиз яшайишдиз кюмек хътапIури гъахъунчва. ¹⁷Мици узу, учвхъан хъана гизаф пешкешар гъадагъурза, кIури, вая, хъа учвуз ичв пулилантина



ФИЛИПП 4

хъана гизаф хайир хъпан бадали апIурайиб вуйиз.¹⁸ Хъа узуз вары гъубкIну азуз, гъамус узуз ккунибтIан гизафра кади азуз. Учву хътапIуб вари Эпофрадитди тувунзухъна, гъамус варибдихъди ацIназа. Ичв багьишар Аллагъдин хулаз гъабхи «ицци ний хъади угбрбси», «къабул шлу гъурбан, Аллагъдиз хуш вуйи гъурбанси» гъисаб апIуз шулу.¹⁹ Ва йиз Аллагъдира Чан зурба вуйи девлетнинди, Месигъ Исайилантине вари учвуз ккунди имбубдихъди артухъра кади ацIичва.²⁰ Айсариан айсарииз ихъ Адашдин, Аллагъдин ад ибшири. Амин.²¹ Месигъдианмина Аллагъдин гирами халкъдик кидикънайи варидализ саламар йипай. Узухъди хъайи вари гъардшарира учвуз саламар хътаура.²² Аллагъдин вари халкъди, иллагъки Римдин паччагъдин хуларий гъуллугъналь айидари, учвуз саламар хътаура.²³ Агъа Иса Месигъдин уж’вал, гъйт, гъарган ичв рюгънахъди ибшири!



КОЛОССДИЙ ХҮҮГЬДАРИЗ КАГЬАЗ

Римдин дустагъдиъ айи Павелихъди Рюгъну му кағъаз Колоссдий дугъаз аыгъадру хбүгърудариз бик Iуз гъитру. Колоссдий хбүгърударин арайиъ, Иса Месигъ Аллагъдин Бай дар, хъа малайикдиз ухшар адми ву, кIуру каламар удучIвуру. Дурагарин арайиъ итIру хурагариз, машквариз ва жусгъдарин законар тамам апIбаз фикир тувири шулу. Мидиз жсаваб вуди, Гирали Рюгъну, Иса Месигъ Фуж вуш ва Дугъу гъапIнуш, кIура: Думу Аллагъдин Бай ву; Думу вари хбүгърударин, яни Чан Бедендин КIул ву; Думу варибдин ккергъувал ва ккудукIувал ву; Дугъу вари инсанарин тахсир Чаина гъадабгъну; Думу хачрин гъакIну ва ихь гунгъар себеб вуди ухъуз гъадабтIру жсазайиккан Дугъу ккадаунху. Гъаму жюрейшинди Гирали Рюгъ, Аллагъихъан вуйи урхювал Къанундин ва диндин аыдатарихъ дубтIру ва гъадрар хъаьру гъарсариз къаршу удучIвур. Месигъихъ хбүгънайир ичIи улх-бар-рахбарихъ, кучIлин фикраприхъ хбүгъну ккундар. Исаихъ хбүгънайи адми Агъайиз ккуниси яшамиши хъуз Аллагъдин рягъимлували гъитра.

Месигъдиз лигурайиган, Аллагъ рякъюрухъуз

1 Аллагъдин амриинди Месигъ Исаин вакил Павелихъан ва Тимофеи гъардшихъан **2** Колосс шагърий айи Месигъихъди гъякъ гъардшар вуйи Аллагъдин гирами халкъдиз – саламар. Адаш Аллагъихъан учвуз уж’вал ва мясяляйт ибшри!



³Учу гъаммишан учвхъан Аллагъдиз ккарагурайиган, ихъ Агъа Иса Месигъдин Адашдиз баркалла кІурача. ⁴Учуз Месигъ Иса-йихъ ичв хъугъуваликан ва Аллагъдин вари гирами халкъдихъна вуйи ичв ккуниваликан деебхъначуз. ⁵Учвуз аршарий ккилиб-гурайи умудну хъугъувал ва ккунивал арайиз хуру. Улихъди учвуз дидкан гъякъвалин гаф – Ужувлан хабар гъеебхъунчвуз. ⁶Ужувлан хабар учвухъна гъафну. Учву, гъякъвали абцІнайи Аллагъдин уж’вал деебхъну, гъаврий ахъунчву. Думу йигъхъанмина Ужувлан хабар, ичв арайиъси, вари дюн’яйиъ рабгъура ва диди чан бегъер хура. ⁷Учвуз дидкан Эпафрасди гъапунчвуз. Эпафрас, ич масан гъуллугъчи, юкІв хъипну, учву бадали Месигъдин гъуллугънаъ айир ву. ⁸Дугъу учвуз Рюгъну багъиш дапІнайи ичв масанваликан ктибтунчуз.

⁹Магъа гъаддиз, учуз учвкан гъеебхъу йигъхъанмина, учвхъанди гъаммишан ккарагурача. Ккарагруган, Аллагъдин ният учвуз гъубкІну аygъю хъуб ва Гирами Рюгъну туврайи гъарсаб фагъум-лувалин учву гъаври ахъуб, ккун апІури шулча. ¹⁰Учу гъацира, учву Агъайиз лайикълуди яшамиш хъпан бадали, вари Гъадгъаз хуш вуйиси апІбан бадали, учву апІурайи гъарсаб ужувлан лях-ниъ ужуб бегъер хъпан бадали ва учвуз Аллагъдикан аygъюб ар-тухътІан артухъ ибши кІури, ккарагури шулча: ¹¹гъит, учву гъаци хъпан бадали, Чан зурбавалина къудратну учвуз сабурна ижми-вал туври ва вари терефарихъанди учву мюгъкам апІри; ¹²гъит Адашдиз, Дугъу учвузра Чан гирами халкъдихъди сабси аквнан Паччагълугъдиз йишив улупбаз, шадди чухсагъул йипри. ¹³Дугъу ухъу мучIушнан гъюкмиккан ккадаъну, Чан масан Балин Па-чагълугъдиз гъаъну. ¹⁴Гъадгъу ухъуз, гунгъарилан хил алдабгъну, азадвал тувунхъуз.

¹⁵Гъадгъу дярякърайи Аллагъ рякъюри ачмиш гъапІунхъуз. Думу Сарпир ву. Думу арайиз гъабхи варибдин Зииналир ву. ¹⁶Фицики заварий ва жиларин алиб, рябкъюрайиб ва дя-рябкърайиб: Паччгарин тахтар, агъаваликк ккайдар, гъакимар ва гъюкмар – вари Гъадгъу халкъ гъапІну, арайиз гъабхид вари Гъадгъултингина гъабхъну ва Гъадгъаз кІури айиб ву. ¹⁷Думу фу-кІа-мукІа хъайиз Айир ву. Гъадгъаъ варибдин сабвал ва къайда гъабхъну. ¹⁸Гъадму ву Бедендин кІул, яна Аллагъдихъ хъугъру-дарин Аххюр. Варибдин эвел – Гъадму ву. Варибдиз сарпирди



хъпан бадали, гъачидарикан чиши гъахы Сарпир Гъадму ву, ¹⁹ фицики Аллагъдиз, вари тамамвал Гъадгъа ади хъуб ккун гъабхъну. ²⁰ Дугъу, хачриин Чан аյжалилантина вари жилинубдихъди ва айршинубдихъди мясляяйт ийбитИну, Чалантина Аллагъдихъди айлакъайи таану.

²¹ Ичв чишу ляхнариланмина ухди гъярхърайидар ва ул’ан идитнайдар, ²² гъамус Дугъу учву, жилиин гъабхы Чан беден-дилантина, Чан айжалилантина учву Аллагъдин улихъ гирамиди, тахсир ктарди, марцциди дерккбан бадали, Аллагъдихъди албагунчву. ²³ Учву мици, хъугъувалин ижми ва мюгъкам бинайин дугъужвну ва Ужувлан хабарну учвуз бахш дапИнайи умуднахъ хъади гъузиш, хъидичва. Думу Ужувлан хабарнакан учвуз гъееб-хъунчвуз – айршин кланакк вари халкъ дапИнайиблиз дидкан хабар дебккна, ва узу, Павел, гъаддин гъайгъушнаш айир вуза.

Павелин ляхнар – хъугърударин ужувлаз

²⁴ Гъамус узу учву бадали айзабарикк ккуркъбинн шад вуза. Узу Месигъдин Беден бадали къадар адру айзабар айгъ апИурайир вуза. Дугъан думу Беден – Чахъ хъугърудар ву. ²⁵ Аллагъдин ният тамам апИбан бадали, узу думу хъугърударин гъуллугънаш гъахъунза. Узуз Аллагъдин гафнакан гъубкИну учвуз хабар дебккуз амур дапИназуз. ²⁶ Думу Гаф агъзэрар ийсариш вари насларихъян жиниди дюбхнайиб вуйи. Хъа гъамус думу Дугъан гирами халкъдиз ачмиш дапИна. ²⁷ Аллагъди думу сирнан вари хазна ва ад Аллагъ айгъдру халкъариз улупуз кIури ачмиш гъапИну. Дидин сир Месигъ ухъуль яшамиш хъувалиш а. Месигъ ихъ гъюз ккайи адлувалин умуд ву. ²⁸ Ари Гъадгъукаан учвуз, Аллагъдин улихъ Месигъдихъди гъуркИну дугъужвуз шлуси, учхъан удубкъру фагъум-лувалиинди, насигъят турви, айгъювалар улупури, хабар дебк-рача. ²⁹ Гъациб метлеб бадали узу, узуз бегъемди артмиш шулайи Месигъди тувнайи къувватниинди дяви гъабхури, жафа зигураза.

Месигъдихъди яшамиш иихъай

2 ¹Узу учвхъанди, Лаодикияйин хъугърударихъанди ва узу чпин улариз рякъюзкъан дярракъдарихъанди фициб ижми дяви гъабхураш, учвуз айгъяди ккундузуз. ² Йиз метлеб ичв юкIвариш масанвалин сатИвал ва кIубанвал тIапIуб вуйиз. Масанвалин



сатIивал ва кIубанвал аш, учвуз Аллагъдин сир, яна Месигъди-кан вуйи аыгьюваларин гъубкIу девлет хьибичвуз.³ Хъа вари аыкьюлувалин ва фагъмин девлетар Месигъдиль а.⁴ Узу учвуз му, гъич сарира уччуу гафариинди уччуу ичв рякълан алдауз гъидритуз, кIурайиб вуйиз.⁵ Бедендиинди учвухъди хътаршра, рюгъниинди учвухъди хъаза ва, Месигъдихъди ичв албагувал ва хъугъувал узуз рябкъруган, шад шулуса.

⁶ Гъаци вуйиган, эгер уччуу Месигъ Isa ичв Агъади къабул гъапIиуш, Гъадгъахъди сатIиди яшамиш йихъай.⁷ Гъадгъаъ ччивар деетай, жувван уымур Гъадгъахъди хъапIай, уччуу айи хъугъвалиш мюгъкам йихъай ва учвуз гъапIу ужувлан гъадри кади гъузай.

⁸ Лигайгъа, гъич сарира, Месигъдихъан ваъ, хъа адмийиrin аыдатарихъан ва гъаму дюн'яйин къудратарихъан гъюру ичИи ва кучIлин фикрари уччуу чүпин чулиинди дисуз мигъитанай.⁹ Гъаз гъапиш вари Аллагъдин тамамвал Гъадгъаъ рябкъюри а.¹⁰ Учвуз-ра тамамвал гъякимарин ва гъюкмарин КIул вуйи Гъадгъаъди дурубкъначвуз.¹¹ Гунагънан хасият учвлан, палатси, уылЧюб-гъю Месигъди ичв суннат Чаш гъапIиу. Думу адмийин хилари апIурайибсиб суннат дар.¹² Уччуу штуун хъувал уччуу Гъадгъахъди накъвдиль иву мисал ву. Думу чIиви гъапIу Аллагъдин къувват-нахъ хъугъували Дугъахъди уччура чIиви гъапIунчву.

Адмийири дерккнайи къайдийирихъди мягъяниай

¹³ Ухди уччуу, ичв гунгъариз ва суннат дапIиу адрувализ дилиг-ну, дийихнайидар, Аллагъдин халкъдик каҳри адайчва. Хъа гъамус Аллагъди уччуу Гъадгъахъди уымрихъна къяляхъ хътаньну. Ду-гъу ихъ вари тахсарарилан хил алдабгъуну.¹⁴ Дугъу ухъуз къаршу вуйи къайдийир кайи китаб, хачрак къумарихъди кабсну, жвартI гъапIиу.¹⁵ Гъамци Думу, гъякимарихъан гъюкум, яракъ тадабгъ-ну, варидарин улихъ беябур дапIиу, дурариин Чан хачрахъди гъалиб гъахъну.

¹⁶ Гъаци вуйиган, гъит, гъич сарира уччуу ипIубдиз ва убхъ-рубдиз тягънийир дириври ва учвхъан, машкврар, ваз цIийи алаувалар ва султ йигъар къайд апIури гъахъунчва, кIури, гъед-перхри.¹⁷ Фицики му вари гъюз ккимбуудин гъарантутIан дар, хъа улариз рябкъювал Месигъ ву!¹⁸ МютIюгълуди хъуз ккунидари,



малайикариз икрам апIрудари учвук тахсир кипруси мапIанай. Дураг чпин гъугъужувалариъ ахъна. Давди, чпин фагъмиин элеъну, фурс апIура — думу гъаму дюн'яйинуб ву! ¹⁹ Аллагъдин ниятниинди вары беден ахъю хъпан бадали, табар-дюгъберихъди думу либхуз ва сатIи апIуз гъитрайиб — КIул ву. Сарун дицдар адмийириин КIулихъди аялакъа имдар.

²⁰ Учву, Месигъдихъди дукIнайидар, му дюн'яйин къудратари-хъан азад вуйиган, дюн'яйиндариси, гъамци кIури, къайдийр гъаз урхюрачва: ²¹ «Мидик мукуркъан!», «Мунуб мипIан!», «Гъамунубдик мукучан!» ²² Гъаму вары гъадагъа дапIнайиб ишлетмиш апIруган, жвартI шлу мутмийирикан къайдийирна аьдатар арайиз дуфнадарин? ²³ Диндин аьдатариз мютIюгъваликан, жвув гъадатIуваликан, бедендиц ккуниб дарарапIуваликан кIуру гъамцдар къайдийр, зиълан гъилигган, фагъумлударси рякъюру. Амма дураги бедендин тямягъариз къаршу дийигъуз кюмек апIадар!

Ичв цIии уымур Месигъдихъди ву

3 ¹Аллагъди учву Месигъдихъди чIиви дапIнайиган, Аллагъдин арччул хилихъинди деънайи Месигъдихъинди, заваринубдихъна, ял апIинай. ²Заваринубдикан фикрап апIинай, хъа му дюн'-яйинубдикан — варь. ³Фицики учву дийихначва, хъа ичв уымур, Месигъдихъди сабси, Аллагъдиль жиниди а. ⁴Ичв уымур — Гъадму Иса ву. Думу гъафиган, учвура Дугъахъди адлуди гъидичва.

⁵ Гъаддиз, учву гъаму дюн'яихъан дебиснайи учвуъ айиб вары: къяппавал, чиркинвал, ктирсуз даршлу тямягъяр, асккан тямягъяр, къискъисвал — гатIахъай. Мицдар тIулар идолариз икрам апIувал ву. ⁶ Вары гъамцдар тIулари чпинна Аллагъдин хъял зигура. ⁷Улихъди, гъаци яшамиш шлуган, учвура гъацдар вуйчва.

⁸Хъа гъамус думу вары: хъял, гъизгъинвал, даккнивал, люкънэр, лайикъсуз гафар — гатIахъай! ⁹Чиб-чпиз кучIлар мапIанай, фицики учв'лан ичв йирсивал илдипунчча. ¹⁰Учву ГъапIуриз ухшар айи, Аллагъдин гъякъвал аygъяди, цIийитIан цIии ала-Пурайи адмивалин цIии халиъ учIвначва. ¹¹Гъаци гъахъиган, грекна жугъуд миллетдин, суннат дапIнайириинна адрурин, варваринна скифдин, лукIранна азад вуйириин арайиъ фаркъвал адад. Месигъ вариб ву, ва варибдиль айир Гъадму ву!



Аллагъдихъ хъугърударин хизан

¹² Гъаддиз, Аллагъдин кадагънайи гирами ва масан вуйидариз лайикъ вуйиси, учвура рягъимлувалин, язухъ зигувалин, юкІв айивалин, гъянивалин ва сабурлувалин палтар алахъай. ¹³ Эгер учвуз сар-сарикан гиран каш, сабурлуди аыгъ апІури гъузай ва Агъайи учвлан хил алдабгъиганси, учвура хил алдабгъури йи-хъай! ¹⁴ Хъа гъацдар палтарин зиълан масанвалиндар алахъай. Фицики масанвали варибикан тамам вуйи сатІивал апІуру.

¹⁵ Гъйт, Месигъдин мясяльтуну ичв юкІвариз рякъ улупри, фицики Аллагъди учвуз дих гъапІунчвуз ва саб Беденник, мясяльт бадали, ктикунчву. Гъаци апІузди баркаллагъ кІури йи-хъай!

¹⁶ Гъйт, учвувь Месигъдин гаф булди яшамиш ибшри. Хъа гъад-муган учвхъан вари фагъум хъяди чиб-чпиз аыгъювалар улупуз ва насиgъятар тувуз хъибдичвухъан ва, рюгъ баркаллагъну абцІну, Аллагъдиз юкІв абцІнайивалин Аллагъдиз мяълийир, тярифнан ва рюгънан мяълийир апІуз хъибдичвухъан. ¹⁷ Вари ичв улхбарра, ичв ляхнарра Гъадгъулантина, Адаш Аллагъдиз чухсагъул кІури, Агъа Иса бадали апІнай.

Жарадарихъди цИийиди яшамиш ии-хъай

¹⁸ Хпар, ичв жилариз мютІюгъ йи-хъай, му Агъайн улихъ ичв буржи ву.

¹⁹ Жилар, ичв хпар ккун апІнай ва дурализ писдар махъанай.

²⁰ БицІидар, варибидъ ичв абайир-бабарихъ хъпехъури гъузай, фицики учву гъаци апІувал Агъайиз ккунниб ву.

²¹ Адашар, ичв бицІидарик хъял капІри махъанай, даршиш ду-рар айжуз юкІвар айидар хъиди.

²² ЛукІар, ичв жилин агъирихъ варибидъ, кьюб маш гъайи-дарси имбударин улхъан ваъ, хъа марцци кІваан ва Агъайн улихъ гучІ кайивалиан хъпехъури апІнай. ²³ Учву фу апІури гъа-хъишра, вари ичв марцци кІваан, адмийиризси ваъ, хъа Агъайиз апІурайиси, апІнай. ²⁴ Фицики, Агъайи пешкешди ирс тув-руб учвуз аыгъачвуз. Учву Агъа Месигъдин гъуллугънаш ачва.

²⁵ Хъа шли чурувал апІуруш, дугъяз, гъапІу чурувализ дилигну, тувди. Аллагъдин улихъ вари саб ву.



Насигъятар

4 ¹Учвура, агыйир, лукIарихъди дугъриди ва намуслуди гъузай.
КIваинди гъистай, ичв Агъара завариин ал.

² Гъаммишан ккарагури йихъай, ккарагруган, кIубанди йихъай ва чухсагъул кIури йихъай! ³Гъацира, Аллагъди учуз Месигъдин сирнакан гаф рабгъбан урчIар арццбан бадали, учхъанди ккарагай. Гъадму сир ктибтруган, узу зунжарий аза.
⁴ Узуз дидкан агъювалар, узхъан удуబкърубкъян ужуди, ачуҳъди ва тамамди улупбан бадали, узхъанди ккарагай. ⁵Жарадарихъди фагъумлуди гъузай, гъубкъу жюрейин мумкинвал ишлетмиш апIинай. ⁶Гъит, ичв сюгъбатар гъаммишан кабалгрудар ва фагъумлудар ишри ва, гъит, гъардиз лазим вуйи жаваб бихъри.

⁷ Узкан вари хабарар Тихикди пиличвуз. Думу ихтибар али гъуллугъчи, узухъди Агъа бадали лихурайи йиз ккуни гъардаш вуйиз. ⁸Узу думу учвухъна, ич ляхнарин хабарар кидитну, ичв юкIар шад апIуз, гъаъраза. ⁹Узу дугъахъди дугъри ва ккуни вуйи гъардаш Онесимра гъаъраза – думу ичвдарикан сар ву. Дурапри учвуз, гъамшваь шулайи варибикан ктибтичвуз.

¹⁰ Учвуз узухъди дустагъдиъ айи йиз юлдаш Аристархди, Варнавайин халуйин бай Маркди саламар хътаура. Дугъкан учвухъна тIалаб дурубкъначвухъна: эгер думу учвухъна гъафиш, думу къабул апIуб ккун апIурача. ¹¹ Учвуз гъацира саламар хътаура Юстус кIуру лакIам хъайи Исаии. Аллагъдин Паччагълугъ бадали жафа зигурайи жугъдарикан гъадрартIан хътарзухъ. Дурап узуз ахю кюмек вузуз. ¹² Ичвдарикан саламар Месигъ Исаин гъуллугънаъ айи Эпафрасди хътаура. Думу гъарган учвхъанди, учву тамамвалинна дугъривалин мюгъкамвалиинди Аллагъдин ниятнахъ хъпехъури гъузри кIури, ижими迪 ккарагура. ¹³ Думу учвхъанди ва Иерапольна Лаодикия шагърарин хъугърударихъанди, гъяйиф дарди, ахю жафайинди лихбан узу шагъид вуза. ¹⁴ Учвуз ихъ ккуни духтир Лукайи ва Демасди саламар хътаура.

¹⁵ Лаодикияйиль айи гъардшариз, гъацира Нимфандиз ва дугъан хулаъ уч шлу хъугърудариз саламар йипай. ¹⁶ Му кагъаз учвухъ гъурхиган, Лаодикияйин хъугърударизра урхуз шлуганси



КОЛОСС 4

апIинай. Хъа учву Лаодикияиан вуйи кагъаз урхай. ¹⁷ Ва Архип-
диз йипай: «Лиг, увуз Агъайихъан гъабхы гъуллугъ тамам апIу-
ри гъуз!»

¹⁸ Йиз хусуси хил'инди бикIураза: Павелихъан саламар. Йиз
зунжрарикан кIваинди гъибтай. Гъит учухъди Аллагъдин уж'-
вал ибши!



ФЕССАЛОНИК ШАГЪРИЙ АЙИ ХЪУГЪРУДАРИЗ 1-ПИ КАГЪАЗ

Му кагъаз Коринф шагърий дубикIнайиб ву. Павел Фессалоникдизра Исаийкан хабар хъади гъушну. Душваьз Дугъан тереф гъбисдарра шулу. Аммаки Иса хачриин дукIну чIиви гъахыи Месигъдикан хабар вуйиб дици дар кIурудари шагърин саб къадар агълар Павелиз къаршууди гъитIиккури гъахъну ва, гъаддиз, думу Фессалоникдизра ухди гъягъюз мажбур шулу. Фессалоникдин хъугърударин уъмрикан аьгъю апIуз ккунди, Павели дина чахъди Коринфдиз Аллагъдин гъуллугънаш ади гъахыи Тимофей гъаьру. Тимофей дилин ужудар хабрап хъади къяляхъ гъюру. Аллагъдихъ хъугърудар, хъергувалариз дилигди, Исаихъ дурагар сабан ва гъаргандин хъугънайи, дурагарин хъугъувал лигимтIан-лигим шулайи. Гъаци дурагар, вари Греция вуйибси, варидарииз Месигъдиз мисал вуйи. Дурагариз чин месэл-ийрира архаинвал тувлрадайи: дурагарин арайиб Павел имдардимиidi сакъюдар гъийихнуре вуйи. Гъийихдарин багахълуйириз, гъийихдар чIиви шлуб вуйкIан-дайкIан кIури, гъич сикинвал тувлрадайи. Дурагар ккарцури, Гирами Рюгъну Павелилантина гъамци бикIура: Иса гъафиган, Думу гъяйиз гъийихдарин улихъ чIивиди имбудар гъич сабдинна артухъди хъидар. Месигъ гъафибси, дийихнайидар чIиви хъиди, гъаддихъан хъугънайдар вари гъаргандин Гъадгъахъди гъузди. Ужувлан хабарнахъ



хъугънайивали гъамустІанра ужуб бегъер хура: гъациб гележедихъ хъугъру кас гъамустІанра, гъадму вахт улубънайиси, яшамиш шула.

1¹ Павелихъан, Силвандихъан ва Тимофеийхъан – Фессалоникдій айи Адаш Аллагъдин ва Агъя Иса Месигъдин хъугърудариз.

Уж'вал учвуз ва мясляйт!

Фессалоникдій гъабхы хъугъувализ чухсагъул

² Учу ич ккарагбариъ, учву кІваин апІури, учвуз гъапПубдиз Аллагъдиз гъаммишан чухсагъул кІурача. ³ Учу ихъ Адаш Аллагъдин улихъ ичв ляхнариинди вуйи хъугъвал, юкІв абцІну зиг-ру масанвалин жафа, ихъ Агъя Иса Месигъдихъ хъугъувалиин ичв мюгъкамди дийигънайивал гъаммишан кІваинди гъитрата-ча. ⁴ Учуз аygъячуз, гъардшар, учву Аллагъдиз ккунду, Гъадгъу учву ктагъну, ⁵ гъаз гъапиш, учу учвуз гъабхи Ужувлан хабар неинки гафариинди, хъа гъацира аыхю къувват, Гирами Рюгъ хъади вуйи ва думу гъякъ вуйивал улупру лап дерин хъугъувал вуйи. Учвуз аygъячвуз, учу учвухъди хъайиган фициб саягъни-инди учу яшамиш гъахънуш. Гъаци хъувал учвуз ужувлаз вуйи, ⁶ ва учву учунна Агъайи апІруб апІури гъахънийчва. Учву Ужувлан хабар, зурба аyzаб-аyzиятназ дилигди, Гирами Рюгъну туву шадвалиинди къабул гъапІнийчва. ⁷ Гъаддиз учву Македония-йильна Ахаяйиль айи вари хъугърудариз мисал вуди гъахъунчва. ⁸ Гъамус учвлантина Агъайн гаф неинки Македонияйильна Ахая-йиль рабгъура, хъа гъацира – Аллагъдихъ учву хъугъра, кІуро хабар варишвариз дубшна. Ва сарун дидкан фукІара пуб учуз алабхъурадар. ⁹ Учу наанди гъушишра, варишвариъ, учву учу фици къабул гъапІнуш, гъаддикан ктибтури шулчуз. Дураги хъана, чиви ва гъякъ вуйи Аллагъдин гъуллугъналь хъпан ба-дали, учву фици идоларихъан Гъадму Аллагъдихъна гъафнуш, ктибтури шулчуз. ¹⁰ Дураги гъацира Аллагъди чиви гъапІу Чан Бализ – гъамус гъюз скайи Суддин хъялнаккан ккадаъру Иса-йиз, аyrшариан Думу гъайиз, учву ккилигурни гъузну ккунива-ликан ктибтури шулчуз.



Фессалоникдің Павелин ляхнар

2 ¹Учвуз ағыячвуз, айхир, гъардшар, учу учвухына гьювал дав ляхин гъабхұндайи, ²аммаки Филипдің, учвуз ағыюганси, айзабар ва ужуз апІувалар алахұнчуин. Хъа учу ихъ Аллагыдин күмекнинди, учуз писди къаршу удучІувалариз дилигди, учвуз дирбашди ва ачухъди Ужувлан хабарнакан ктибтнийча. ³Учу учвуз улупу ағыювалар ич улдугнайиваларин бинайин алидар я чуру ниятназ апІурайдар, я кучІлар айидар дар. ⁴Аллагыди, учу лайикъ вуди гъисаб дапІну, Чан Ужувлан хабар ич хилий ивнийи. Учу гъаци, адмийириз ккун ишри, кІури гъапІундарча, вая, хъа — ихъ юкІвар ахтармиш апІру сар Аллагы бадали. ⁵Учвуз ағыюганси, учу гъич саб разжукъан уччвудар гафар гъапІундарча, ва ич хайирназ гъич саб аымал гъапІундарча — мидин шагыид Аллагы ву! — ⁶ясана адмийирин ад гъазанмиш апІуз шерик гъахұндарча — я учвухъ, я жарадарихъ.

⁷Учу Месигъдин вакилар вуди хъпаз лигну, учхъан учву ишлемиш апІуз шуйчухъан. Хъа учу учв'ин гъагъ илипундарча ва ичв арайиъ бицІидар хъайи дадаси гъахұнча. ⁸ЮкІвар ачухъди, шадвалинди ичв хилариъ неинки Ужувлан хабар, хъа гъацира ич уымрарра ивнийча. Магъа гъамқъан учву учуз ккун гъахұнчуз! ⁹Ичв кІваин илмийичкви, гъардшар, уч'ин алахұу гъагъишнар ва ич аман-иман адатІру жафайир. Учу Аллагыдихъан Ужувлан хабарнакан учвуз ктибтруган, учв'кан гъич сариинра гъагъ илилипбан бадали, йишиб-йигъ лихури гъахұнча.

¹⁰Учву хъугърудар гъахыган, учу фици марщиди, гъякълуди ва тахсир ктарди учвухъди гъахынуш, учвура Аллагыдихъди шагыидар гъахұнчва. ¹¹Учвуз ағыюганси, адаш чан балихъди фици шулуш, учура учвухъди гъаруидихъди гъаци гъахұнча: ¹²ичв уымур Чан Паччагълуғыдиз ва аднахъна дих апІурайди Аллагыдиз лайикълуб хъпан бадали, учу учвуз дих апІури гъахұнча, ял апІури гъахұнча ва насыгъятар туври гъахұнча.

¹³Хъана учу Аллагыдиз зат сикин дарди баркаллагъ кІурача, гъяз гъапиш учву учкан гъеебху Аллагыдин Гаф гъаци, адмийин гафарси вая, хъа дугъридан гъякъ Аллагыдин гафси ва учвуз, хъугърудариъ, ляхин гъабхурайи къувватси къабул гъапІунчва.

¹⁴Учву, гъардшар, Месигъ Исаихъди саб духынайи Яғыудияйиъ



ай Аллагъдин хъугърудариз ухшар духъначва: учвуз ичв адми-
ирихъан бегъем учІврушин кубкъунчвуз, дурализ чпин адмийи-
рихъан – жугъдарихъан кубкъубси.¹⁵ Дурап, пайгъамбрар йивну
йихруси, Агъа Иса дукІну, ухъухъ хъергна. Дурарин ляхнар Ал-
лагъдиз къабулди дар, ва дурап вари адмийирин душмнариз ил-
тІикІура.¹⁶ Дурари ухъуз хабарнакан жугъуд дарудариз ктибтуз
гъадагъа апІура. Вари гъамцдар ляхнариинди дурари чпин гун-
гъарин гъагъ артухъ апІура. Хъа Аллагъдин хъял дурариин сабан
ва гъамшишандиз алабхъиди!

Павелиз Фессалоникдиз хъана гъягъюз ккуун шулу

¹⁷ Гъардшар, учу учвхъан сабан цИб вахтнастІан жара гъахъун-
дайча, думура – бедендиинди, хъа юкІварииинди – ваъ, гъамус
учву рякъюз гизаф тямягъ хъайич.¹⁸ Ав, фу дапІнурा учвухъна
гъюз гизаф ккуун гъабхъунчуз. Дугъриданна узу, Павели, гъаци
апІуз гизаф раЖари хъюгъюнза, хъа ШейтІни гъитри гъабхъун-
дар.¹⁹ Учву дарди, сарун фужар шул ич миж кайдар, ич шадвал
алидар, ич адлувалин заанвал хъайидар. Учв'инди учу ихъ Агъа
Исайин улихъ, Думу къяляхъ гъафиган, фурслу хъидича?!²⁰ Фи-
цики ич адлувал ва шадвал, иллагъьки, учву вучва!

З¹ Ва гъаддиз, сарун учхъан учву дарди гъузуз даршлуган, Афи-
найль учу ялгъузди гъузуз къаст гъапІунча.²⁻³ Хъа ихъ гъар-
даш Месигъдикан Ужувлан хабар рабгъру Аллагъдин гъуллугъчи
Тимофеј учвухъна гъаъдича. Дугъу учвуз читин хъибан, кюмек
апІиди, ккарцциди ва ичв хъугъувал мюгъкам апІиди. Учвузра
аыгъячвуз гъацдар аyzабар ухъ'ин алахъруб.⁴ Гъеле учу учвухъди
хъайигантІан ухъ'ин аyzабар улукърубдикан кІури гъахъунча.
Учвуз аыгъюганси, гъаци хъузра гъабхъну.⁵ Ва гъаддиз узхъан са-
рун, ккилигури, аыгъ апІуз шули амдруган, ичв хъугъуваликан
аыгъю апІуз Тимофеј гъаунза. Алдатмиш духъну, учву рякълан
улдугнийкІан кІури, ва ич жафийир дав гъахънукІан кІури, гучІу-
ри гъабхъунзуз.

⁶ Амма учвхъан къяляхъ гъафи Тимофеји ичв хъугъували-
кан ва масанваликан, учву учу ич ужудар ляхнариинди кІавин
уърхюрайиваликан ва ич учву рякъюз юкІв хъайиси, ичв учу
рякъюзра юкІв хъимбуваликан ужудар хабрап гъахну.⁷ Гъаддиз,



гъардшар, вари гъаму бедбаҳтвалариъ ва гъергувалариъ айи учу ичв хъугъували ккарцури гъахыну. ⁸Учву ижмиди Агъайихъди хъайивали учура уьмриъ шад апIуру. ⁹Ихъ Аллагъдин улихъ учву учуз туву му шадвалин гъякънаан Аллагъдиз фициб чухсагъул кIуру?! ¹⁰Аллагъди учву рякъюз мумкинвал туври кIури ва ичв хъугъувалиъ учвуз гъудрубкIрубдин кюмек ибши кIури, эргвал аygъдарди, учу йишв ва йигъ ккарагурача.

¹¹Гъит Чав Аллагъди, ихъ Адашди, ва ихъ Агъа Исаий ич рякъ учвухъна гъапIри, ¹²хъа ичв чиб-чиликъна ва жарадарихъна вуйи масанвал, ич учвухъна айи масанвалси, Агъайи гъубкIну ва артухъра кади туври. ¹³Ва гъит Гъадгъу учву, ихъ Агъа Иса Чан вари гирами халкъра хъади гъюру Йигъ гъяйизкъан, ихъ Аллагъдин ва Адашдин улихъ марциди гъузбан бадали, гирамивали ацIнай ичв юкIвар мюгъкам апIри. Амин.

Аллагъдиз ккуни уьмур

4 ¹Ахириниш'ин гъардшар, учу учвуз Аллагъдиз ккунидарси яшамиш хъуз улупганси, гъамусдихъантинара гъаци яшамиш хъуб учвкан Агъа Исаин чвтурнахъан ккун апIурача. Учву гъамустIанра гъаци яшамиш шули ачва, хъа вушра, хъана артухъ ужуюй яшамиш хъуз чалишмиш иихъай.

²Учу учвуз Агъа Исаин гъюкмииндиги фицдар насигъятар түвнийиш, гъархнадарчвуз. ³Аллагъдин ният учву Чаз бахш хъувал ва къяппавалихъан гъудучIвуб ву. ⁴Гъит гъарсари, гирами ва марцц шлуси, чан жандин эйвал апIри, ⁵хъа, Аллагъ аygъдру аллагъсуз-зарси, тямаягърин цIа кабхъну дариши. ⁶Гъацдар тямаягъриъ ахъуз ва гъардшин ихтиярииин лик иливуз гъич фикиркъан ма-Панай, гъаз гъапиш, учу улихъна гъаписи ва учвкан ижмиди ккун гъапIганси, вари гъацдар ляхнариз Агъайи жаза гъадабтIиди. ⁷Аллагъди ухъуз чиркинвалий яшамиш хъуз ваъ, хъа гирамивалий гъузуз дих апIура. ⁸Гъаци вуйиган, шли му тина апIураш, дугъу адми тина апIурадар, хъа Чан Гирами Рюгъ учвуз туврайи Аллагъ тина апIура.

⁹Гъардшарихъна вуйи масанваликан бикIуб думукъан лазим вуди гысад апIурадарча, фицики Чав, Аллагъди, учву чиб-чиликъ ккун апIуз улупунчвуз. ¹⁰Хъа учву Македонияйиъ айи вари гъардшарихъна гъаци хъузра шулачва. Гъардшар, учвуз миннат



апIураза, имбутIан артухъ чиб-чпи ккун апIинай¹¹⁻¹² ва, гизафна-гизафси, архаинди яшамиш хъуз чара абгай. Жарадари ичв гтыормат уьбхбан ва ичвра сабдиъра ул ади дархъбан бадали, гыт гъарсари чан ляхин апIри ва уьмриз уьлин къацI гъарди, учу учвуз мугагъназ гъапиганси, чан хилариинди гъазанмиш апIри.

Агъа гъюбкан

¹³ Гъардшар, учуз учву гъийихдари кан фукIа-мукиA аьгъдарди гъитуз ккундарчуз. Сабдикра миж кимдру имбу адмийириси, дурагин дердер мизиганай. ¹⁴ Эгер ухъу, Иса, дукIну, Чиви хувалихъ хъугъраш, ухъу гъацира Исаийхъ хъугъну гъакIидар Аллагъди аьршариз Гъадгъаъна хъади гъягърувалихъ хъугърахъ.

¹⁵ Учу учвуз Агъайин гафариинди кIурача: Агъа гъайиз, ухъкан Чивиди гъуздар дийихнайдарин улихъ гъучIвидар, ¹⁶ гъаз гъапиш, хабар утIубччвган, ахю малайикдин дих утIубччвган, Аллагъдин зурна гъарабхган, Агъа Учв завариан гъиди ва сифте, Месигъдихъ хъугъну, гъийихдар Чиви хъиди, ¹⁷ хъасин ухъу, Чивиди гъузнайдар, гъаддарихъди сатIиди дифариинди Агъа рякъюз гъахиди ва гъаци гъаммишандиз Агъайихъди гъуздихъ. ¹⁸ Гъаци вуйиган, гъамцдар гафариинди чиб-чпик юкIв капIри гъузай.

Агъа гъюрайивалихъна гъязурди гъузай.

5 ¹ Фуну вахтари ва фуну йигъан Думу гъоруш, гъардшар, учвуз дидкан бикIуб лазим дар. ² Учвуз лап ужуйи аьтъячвуз Агъайин Йигъ, йишвну тIафалси, кIваин алдруган, гъору. ³ Адмийири: «Варишвариъ мясляйт а ва гъич саб жюрейинра хатIа имдар!» – пуз хъюгъиган, бицIир кайи дишагъли сабпну бицIир апIуз иццрушну гъадагърубси, гъадмуган дурагина аьжал гъядябхъиди, ва дурагина гъергбиинди чиб уьрхюз хъибдар!

⁴ Хъа учву, гъардшар, мучIушнаъ адарчва, ва гъадму Йигъандин аквну, тIафлиси, мюгътал апIидарчу. ⁵ Фицики учву вари аквнан ва йигъандин веледар вучва. Ухъу мучIушнакна йишвак кахърадархъа. ⁶ Гъаддиз, имбударси, даахну гъуздархъа! Ачухъ фагъум ади ва кIубанди гъуздихъа! ⁷ Йишвну нивкIу улар удтиI-найдар ахури шулу, хъа пиянискийир ярхи йишвди убхъури шулу, аххир. ⁸ Хъа ухъу, йигъан аквнак кахърайидар, ачухъ фагъум



ади хъидихъа ва хъугъвалинна масанвалин халариъ учІвдихъа, кІул'ин ухъу уърхру пІапІах улубкІидихъа! ⁹ Гъаз гъапиш Аллагъди ухъуз Чан хъял улупнадар, хъа, ихъ Агъа Иса Месигъдиланмина вуйи ухъу уърхювал улупна. ¹⁰ Гъаддиз ухъу дийихну ашра, адаршра, ухъу гъаммишан Гъадгъахъди хъуз кІури, Думу ухъхъанди гъакІну. ¹¹ Гъаци вуйиган, чиб-чпик юкІв капІри йихъай ва чиб-чпиз хил туври апІинай – му учву апІурacha.

¹² Учвкан ккун апІурacha, гъардшар, учву Агъайихъ хъаърайидализ ва, гъарсаб улупури, кІваантІан жафа зигурайидализ артухъ гъюмат апІури йихъай. ¹³ Дурари апІурайи ляхнiz дилигнu, дурариз ахъю масанвалиинди гъюмат апІинай. Чиб-чпихъди мясляльтниинди гъузай. ¹⁴ Гъардшар, учвкан ккун апІурacha: ляхин апІуз даккнидарин кІулигъ ахъюл апІай, кагълидариъ кІубанвал тІапІай, зияфдариз гъон ккивай, варидахъди сабурлу йихъай. ¹⁵ Лигайгъа, ичв арайиъ гъич сарира ч'урувализ ч'уру жаваб тутруври. Гъаммишан, чиб-чпихъна шлуси, варидализ ужувилиинди йихъай. ¹⁶ Гъаммишан шадвализ гъузай, ¹⁷ зат сикин дарди ккарагури йихъай, ¹⁸ варибдиз чухсагъул йипай – магъя учвуз, Месигъ Исаийихъ хъугърудариз вуйи Аллагъдин ният. ¹⁹ Рюгъ мукут-Іуршванай, ²⁰ пайгъамбарвалин гафар тина магъадаанай, ²¹ хъа вари ахтармиш апІури, ужувлан тереф дебисну, гъузай, ²² жюрбекжор писваларихъан ярхла йихъай!

²³ Гъит мясляльтнан Аллагъди Чав учву гъуркІну гирами апІри. Ва гъит вари учву: рюгъра, юкІвра, жанра – ихъ Агъа Иса Месигъ гъюру гъадму Йигъаз саб зиян ктарди уърхри. ²⁴ Учвуз дих АпІурайир ахъгъту ву, ва Гъадгъу му тамамра апІиди!

²⁵ Гъардшар, учхъанра ккарагай!

²⁶ Вари гъардшариз гирамивалин мак апІбиниди салам тувай.

²⁷ Агъайнин ччурнахъан миннат апІураза, гъаму кагъаз вари гъардшариз урхай.

²⁸ Ихъ Агъа Иса Месигъдин уж'вал учвухъди ибшри!



ФЕССАЛОНИК ШАГЪРИЙ АЙИ ХЪУГЪРУДАРИЗ 2-ПИ КАГЪАЗ

Фессалоникдин хъугърудариз сабни кагъазси, гъаму къуб-
нибра Коринфдиан вуйи. Думу шагърин хъугърудар сабни кагъ-
зиз дунтайи гъаму дюн'яйин ахиримжи ийгъарикан дюзди гъав-
риз ахънадайи. Мидкан хабар Исаин вакилихъна рубкъуру. Лап
яман хъергувалар улуркъу Исайихъ хъугънайидарикан сакъюда-
ри, Месигъ къубни ражари гъаму багарихъди гъюру, кIурайи.
Гъамициб гъялназ ккилигурни, дураги я ляхин, я гъар ийгъандин
гъайгъушнар тамам апIдайи. Хъугърударикан сакъюдарин, Ал-
лагъдин гафнар дунтайиси, Месигъ къубни ражнора гъиди, кIу-
ру аьгъюваларикан дюз дару хиялар дюз алаури, Гирами Рюгъну
аучухъди ва гъавриз ахъруси, думу гъядиса хъайиз улихъ фу шу-
луш, бикIура: Исайихъ хъугънайидарихъан аьзабариккан кIул
ккадабгъуз хъибдар, дурагиҳи хъергри, дарагиц кучIлар апIури,
дурагиин хъугъувалик кялхъри ва дураги масу тувари хъиди. Хба ду-
рагиин улукъру гъаму вари аьзабариз ва читинвалариз дилигди,
Аллагъдин Рюгъну Фессалоникдин агълариз чин хъугъувализ
ижмиди дийгъуз дих апIура: «Гъит ухъу ккун гъапIу, ва Чан
ужувлиинди ухъуз зат ккудуудубкIуу ккарицуval ва ужувлан умуд
багъши гъапIу Чав, Агъа Иса Месигъди ва Аллагъди, ихъ Адаш-
ди, ичв юкIвариц ккарицуval тIанIри ва гъарсаб ужувлан ляхниз
ва гафнар мюгъкам апIри» (2:16, 17).



1 ¹Павелихъан, Силвандихъан ва Тимофеихъан – Фессалоникидь айи Адаш Аллагъдин ва Агъа Иса Месигъдин хъугърудариз.

² Уж’вал ва мясяляйт ибшричвуз Аллагъдин, ихъ Адашдихъан ва Агъа Иса Месигъдинхъан!

³ Вари учвуз гъапIубдиз учу гъаммишан Аллагъдиз баркаллагъ дупну ккунду, гъардшар. Му гъякъ ву, гъаз гъапиш ичв хъугъувал къадар адрубкъан аыхю шула ва учвкан гъарсари вари ккун апIурайи ва чиб-чпи ккун апIурайи масанвал аийбIан артухъ шула.

⁴ Гъаддиз Аллагъдин жара хъугърудариз, учву вари гъаму хъергувалариъна аъзабарий аъгъ апIури арайиз хурайи ва мюгъкам апIурайи хъугъувал улупури, ичв тярифар апIури шулча.

Аллагъдин суддикан

⁵ Варибди Аллагъдин Суддин дюзваликан шагыидвал апIура ва учвура Аллагъдин Паччагътулгъдиз лайикъ хъиди, гъадму бадали учву аъзабарра аъгъ гъапIунчва. ⁶Учв’ин аъзабар илирчу тахсирк-рариз Аллагъди бедбахталар тувди – мурга гъякъ ву. ⁷Учву гъаму раЖари аъзабарий ачва, хъа Агъа Иса аршариан цИиди Чан зурба гъунар кайи малайикарра хъади гъафи гъадму Йигъян, учухъди сатIиди учвузра рягъятвал тувди. ⁸Аллагъ къабул дарапI-дарииз ва Ихъ Агъа Исаийкан вуйи Ужувлан хабарназ мютIюгъ дархъидарииз жаза хибди. ⁹⁻¹⁰Дураприз гъадабтIру жаза гъаргандин аъжал хъибди: Иса Чан адмийириин арайиъ адлу хъпан бадали ва Чахъ хъугъдарин арайиъ за хъпан бадали гъафиган, Дугъан аднан ва къувватнан нурнахъан, Агъайн багхъан гъацдар ярхла апIиди. Исаийин адмийириин арайиъ учвура хъидичва, гъаз гъапиш учву ич шагыидвалихъ хъугъунчва.

¹¹ Гъаддиз Аллагъди Чан дих апIбаз учву лайикъ хъпан бадали ва Чан къувватниинди вари ичв ужудар ниятар ва хъугъувалин ляхнар тамам апIбан бадали, учу учвхъанди гъаммишан ккарагурира шулча. ¹² Гъадмуган, учву кюмек духъну, ихъ Агъа Исаийин ччвур адлу хъибди, хъа ихъ Аллагъдин ужувлиинди ва Агъа Иса Месигъдииинди Дугъу учву адлу апIиди.



Агъа гъяйиз гизаф писвал хъибди

2 ¹⁻²Хъа гъамус ихь Агъа Иса Месигъ къяляхъ гъубкан ва Дугъу хуьу фици сатIи апIуруш гъаддикан. Учу учвкан, гъардшар, ичв кIулар дудругуб, ва, я пайгъамбарваларихъан, я ачмиш апIуваларихъан, я кагъзарихъан, гъеле думу кагъзар учхъан вуйидар ву кIури, эгер дурарий Агъайн Йигъ сарун гъабхъну кIури дибикI-ну ади гъабшишра, улдудугувалий адрахъуб ккун апIурача. ³Гъич сарихъдира учву алдатмиш апIуз мигъитанай – гъич саб жюре-йиндириа. Гъаз гъапиш, сифте, Аллагъдиз къаршури, зурба вуйи гъедергувалар арайиз дуфну ккунду, писвал арайиз адмийинди удубчIвиди (думу адми, аъжализ кадатIнайир ву), ⁴къаршур, аллагъдинубдик вая гирами вуйидик гъилигган, учв варитIан зина вуза, кIури, гъисаб апIури хъиди, гъаци, гъеле думу Аллагъдин хулаъра кмиди деъди ва дугъу Аллагъ учв вуза пиidi.

⁵Ичв кIваин илмидарничв? Узу мидкан учвуз, учвухъ хъайиган, гъапнийза аъхир. ⁶Гъамус учвуз аъгъячвуз, гъаз думу къаршу вуйир чан ваҳт гъяйиз дерккнаш. ⁷Фицики писвалин жини къувватари чпин ляхин гъамустIанра гъабхура, хъа сабан думу къаршу вуйириз рякъ гъадабтIнайир дугъан рякъ'ан удучIвну ккунду. ⁸Хъа гъадмуган думу душман ачухъ хъиди, хъа Агъа Иса-ий Учв гъафи гъадму Йигъан, гъеле Чан ил хътабгъбан адлува-лин нурниинди думу тIанкъ апIиди. ⁹Писур гъювал ШейтIнин хиларин ляхин ву. Думу писвал гъубкъу жюрейин айламатар ва гъаврий ахъуз даршлу кучIлин лишнар улупбариинди ¹⁰ ва гъа-цира гъар жюрейин пис аймалдарваларииинди арайиз удубчIвиди. Дугъахъди аъжализ гъягърудар хъиди, гъаз гъапиш дурари гъякъвалихъна вуйи масанвал тина гъапIнийи, хъа гъаддинди дурарихъан чпи уърхюз шуий, аъхир. ¹¹⁻¹²Ва гъаддиз Аллагъди ду-пар, гъякъвалихъ хътругъди, писвал ктабгъдар, кучIарихъ хъугъ-бан бадали ва гъациб жюрейииинди жаза адабтIну гъитуз, кучIлин гъюкмиш итра.

Учву уърхбан бадали кадагънайидар ву

¹³Учвхъан, гъардшар, гъаммишан учу Аллагъдиз баркаллагъ пуб рубкъура, Агъайн ккунидар! Фицики, учву марцц апIура-ий ва ичв хъугъувал гъякъвализ илтIикIурайи Гирами Рюгънан



кюмекниинди Аллагъди, учвуз сифте уърхювал хъпан бадали, Дугъу учву ктагъну. ¹⁴ Гъаддиз Дугъу учвуз, ихъ Агъа Иса Месигъдин адлуval пай апIбан бадали, учу гъабхи Ужувлан хабарнинди дих гъапIну!

¹⁵ Гъаци мюгъкамди дийигъну гъузай, гъардшар! Учу учвуз ушвналан ва кагъзарииинди улупу аьгъюваларихъан ижмиди хъичIихну гъузай, ¹⁶ ва гъит ухъу ккуун гъапIу, ва Чан ужувллиинди ухъуз зат ккудуубукIру ккарцуval ва ужувлан умуд багъиш гъапIу Чав, Агъа Иса Месигъди, ва Аллагъди, ихъ Адашди, ¹⁷ ичв юкIвариъ ккарцуval тIапIри ва гъарсаб ужувлан ляхнiz ва гафназ мюгъкам апIри.

Учу бадали ккарагай

З ¹ Ва ахирис, учу бадали ккарагай! Гъит, Агъайн Гаф зарбdi улихъ гъарабхи ва ахъю гъюматниинди, Думу учву къабул гъапIиганси, имбударира къабул апIруси ибшри. ² Хъана ккарагай, Аллагъди учу лайикъ дару ва чIуру адмийириккан ккадарьи, кIури, фицики варидариъ хъугъувал адар, ахир! ³ Хъа Агъа Чав кIурубдин Алир ву, ва Гъадгъу учву мюгъкам апIиди ва писурихъан уърхиди. ⁴ Учу учвуз ктиту Агъайн тIалабар гъамусдиз тамам апIури гъахъиганси, гъамусдихъантina тамам апIрубдихъ ижмиди хъугърача. ⁵ Гъит ичв юкIвар Агъайи Аллагъдин масанвалихъна ва Месигъдин мюгъкамвалихъна илтIикIри!

Фарз – зегъмет зигуб

⁶ Гъардшар, ихъ Агъа Иса Месигъдин ччурнахъан тIалаб апIу-рачачвукан: чаз ккуниб апIури яшамиш шулайи гъардшихъан ва учу учвуз туvu насигъятарихъди даршулайи гъарурихъан ярхла иихъай. ⁷ Фицики учвуз аьгъячвуз, фици учхъан мисал гъадабгъну ккундуш. Гъаз гъапиш учу учвухъ ляхин дарди гъахъундарча, ⁸ учв'ин гъич саринкъан гъагъ илдрипban бадали, гъич саринра давди уълин къацI гъипIундайча; иишв-йигъ, къувватар гъайиф дарапIди, лихури гъахъунча. ⁹ Учу гъаци, учуз ихтияр адруган, гъапIуб дайи, хъа учву учхъан мисал гъадабгъбан бадали гъапIуб вуйич. ¹⁰ Гъеле учу учвухъ хъайи вахтна учу учвуз магъа гъамциб къайда гъибтунча: «ляхин апIуз даккнири ипIузра дирипIри!» ¹¹ Хъа гъамус учуз, учвухъ лихуз даккнидар а, ляхин апIуз даккунди,



уыргъну, жарадарин ляхнаригъ гъючІврайидар а, кIури, ебхурачуз. ¹² Гъадму адмийирикан учу, архайнди лихуб ва жувван хилариинди гъазанмиш гъапIу уъл ипIуб тIалаб апIурacha ва Агъа Иса Месигъдин чвурнахъан дих апIурacha.

¹³ Хъа учву, гъардшар, уж'вал апIбаь мэрганай. ¹⁴ Хъа фуж учу гъаму кагъзизь бикIурайибдихъ хъпебехъиш, думу фикирназ гъадагъай, ва дугъахъди гаф-Чал мапIанай, гъит дугъаз нач ибшри! ¹⁵ Дугъахъди, душмнихъдиси, маҳъанай, хъа, гъардшизи, гъаврий шлу гафар йипай!

¹⁶ Гъит Чав Агъайи, мясяльтнан булагъди, гъарган ва гъубкъу жюрейииндi учвуз мясяльт туври. Гъит учвухъди варидарихъди Агъа ишри!

¹⁷ Павелихъан саламар — му узу йиз хилариинди бикIураза, узу гъарсаб йиз кагъзик гъамци лишан капIри шулза. ¹⁸ Гъит ихъ Агъа Иса Месигъдин уж'вал гъарган учвухъди варидарихъди хъади ибшри.



ТИМОФЕЙИЗ 1-ПИ КАГЪАЗ

Тимофеийиз дибик^Iнайи сабпи кагъзиб, къюбибдиъси, Аллагъдин гъуллугънаң айи хъугърударин хасиятирикан ва буржийрикан к^Iура. Гъаз дибик^Iнаш ва бик^Iбан метлеб фу вуш, Гирали Рюгънулан ачухъди рябкъюра: «Аллагъдин хизандиб жевув фици дуխын ккундуш, увуз аьгъю хъпан бадали бик^Iураза. Думу хизан – хъугъру гирали халкъ ву. Думу халкъ – чIиви Аллагъдинуб ву. Думу халкъ – мюгъкам бин ва дебккрайи гъякъ’вал ву» (3:15). Му кагъаз, гъилигу гъялариан, Павел Македонияйиз дуфнайиган дибик^Iнайиб ву. Павели, Эфесдиз даргъурайи каламариз къаршууди дийигъуз, чан дуст вуйи ва чахъди Аллагъдин гъуллугънаң айи Тимофеийикан душваш гъузуб тIалаб ап^Iура. Павелиз чаз Эфесдиз гъягъюз ккун дубхънайи, хъа дугъз садар гъядисири машат гъап^Iнийи. Гъаддиз дугъу Тимофеийиз, сабдизра дилигди ва ижми хъугъвалишинди ккебгънайи ляхин ккудубк^I к^Iури, кагъаз бик^Iуру. Тимофеий Эфесдиз хъугърударихъди авлакъалу вуйи сакьюдар суалар гъял дап^Iну ккундий: гъац^Iари хъугънайидариз я швшувар духну, я швуваզ душну ккундар, к^Iурайи, жарадари ип^Iру-ухру шей’арикан ишлеммииш ап^Iуз ихтияр айидарра, адрударра а, к^Iурайи. Гирали Рюгъ Чан кагъзиб Исаийхъ хъугърударин уымрин гизаф суаларин дийигънайи. Дугъан фикрати ва насигъятари Эфесдиз хъугънайидариз Ужсувлан хабарнан гъаммишандин гъякъыватвалихъна, яни Иса Месигъдихъна, Гъадгъу инсанариз дебккнайи урхювалихъна къяляхъ хътакуз кюмек



*даны ккундийи. Ихъ Агъайиз вари адмийир дюрхну ва Чан гъя-
къвалин гъавриз ахъну ккунду. Гъаддиз Исаихъ хъугънайидари
му гъякъвал жиниди гъбитну ккундар, хъа дурап, чин хъугъбува-
ли Аллагъдин дигши апIру рягъимлуваликан ачухъди шагыидвал
апIруси, яшамиши дуխну ккунду. Кагъзиз артухъси фикир хъугъ-
рударин аыхюр кипуз саб тягъна ктру уымрин адми дуխну кку-
нивалихъна жалб апIура.*

КучIлин аygъюваларикан

1 ¹Ухъу уърхру Аллагъдин ва ихъ умуд кайи Месигъ Исаин ам-
риинди кадагънайи Иса Месигъдин вакил Павелихъан ²хъу-
гъувалий йиз гъякъ бай Тимофеиз – уж’вал, рягъим ва мясля-
ает увуз Адаш Аллагъдихъан ва Иса Месигъ ихъ Агъайихъан!

³ Македонияиз гъярайири, увкан Эфесдис гъузуз ижими
ккун гъапIнийза. Уву душваъ кучIлин аygъювалар рагъурайи са-
кьюдар касар дерккну ккундийзуз. ⁴Чин вахт дураги гъубкъу
жюрейин махъварихъди ва ккудукуIру архийир агури гъадрапI-
ри. Миди арайиз хрудар гъюжатартIан дар, хъа хъугъували ара-
йиз хурайи Аллагъдин ляхин улихъ гъабхурадар. ⁵Гъаму йиз тIа-
лабнан метлеб – марцци кIваан, гъяни намуснаан ва дугъри
хъугъувалиан удубчIвурайи масанвал вуйиз. ⁶Сакьюдар, гъаму
вари дипну, файдасуз гъюжатариль ахъна. ⁷Дурагиз Къанун кив-
ру мялимар хъуз ккунди а, аммаки дураг я чпи кIурайибдин, я
чпи гъадмукъан ижими ктибтурайибдин гъавриз ахънадар.

⁸ Къанун ухъуз агъяхъуз: думу ужуб ву, эгер дюзди ишлетмиш
апIури гъашиш. ⁹Ухъуз гъацира аygъяхъуз: Къанун дугъридари
ваъ, хъа – гъадму законар чIоргърудариз ва мютIюгъ даршлуда-
риз, аллагъсузариз ва гунагъкрапиз, фукIара гирамиб адрудариз
ва хътругърудариз, адашдин вая дадайин уымриин хил иливру-
дариз, йивну йикIрудариз, ¹⁰къяппавалий айидариз, жилир жи-
лирихъ хъайидариз, адмийир лукI’вализ масу турудариз, кучI-
ляхъяриз, кучIалди шагыидвал апIрудариз ва дюз аygъювалариз
къаршуди удучIвурдариз ву. ¹¹Му аygъювалар гъарсаб тярифназ
лайикъ вуйи Аллагъди уз’ин илипнайи Ужувлан хабарнахъди
сабси гъору.



Аллагъдин ужувлаz баркаллагъ

¹² Узуз къувват туву ихь Агъайиз, Месигъ Исайиз чухсагъул кIураза. Дугъу уз'ин ихтибар дапIину, гъуллугъ илипунзуин. ¹³ Мугагъназ Агъайиз люкънар апIуйза, хъугърударихъ хъергуйза, вягъшиシリвуйза. Аллагъди узлан хил алдабгъну, гъаз гъапиш, узу йиз аygъдрувалиан ва хътругърувалиан гъаци апIури гъахъунза. ¹⁴ Хъя, Иса Месигъдик ктикъхъян, рябкъру масанвална хъугъвал хъайи ихь Агъайин уж'вал Аллагъди уз'ин бегъем улубзну. ¹⁵ Дюз ва гъякъ ву гъаму гафар: гунагъкарап уърхбан бадали, Месигъ Иса дюн'яйиз гъафну, хъя дурарикан вартIан аыхю гунагъкар узу вуйза. ¹⁶ Аммаки Иса Месигъди гъамциб уж'вал узуз, сар-пирди, Чан сабурлуval фукъан зурба вуш дябкъну, имбударра хъугъуз ва дурагиз гъаргандин уъмур рубкъуз, улупну. ¹⁷ Гъаци вуйиган, гъит гъаргандин Паччагъдиз, айжал Хътруриз, Дярякъруриз ва Сар вуйи Аллагъдиз аьсариан аьсарииз гъюмат ва ад ибшри! Амин.

¹⁸ Тимофей, йиз бай, увкан дунпайи пайгъамбарвалин гафар кIваин алди, магъа гъамцдар насиgъятар дикIуразавуз; гъадра-рихъди гъяри гъякъвал бадали ¹⁹ жувван хъугъувал ва марцци на-мус уьбюри, уву хай кайи дяви дубхну ккундузуз. Сакьюдар на-муснахъан гъидицну, ва ахиръ дурагин хъугъувалин гими ккабхъну. ²⁰ Гъацдарин арайиль Гименейна Эскендер а; узу дураг, Аллагъ беябур дараpIди яшайиш дубгъуз, иблисин хилиъ ивунза.

Сакьюдар ляхнарикан

2 ¹ Сифтена-сифте увкан ккун апIурайиb гъаму вуйиз: вари ад-мийирихъанди ккарагай, тIалаб апIинай, гаф хъипай, Аллагъдиз чухсагъул йипай. ² Ухъу мясяльт ади ва ужувлаz архайн-ди, лайкълуди яшамиш шлуси, пачгъарихъанди ва гъюкмихъ хъайи варидарихъанди ккарагай. ³ Мици апIуб дюзди ва ухъу уърхру Аллагъдиз къабулди ву. ⁴ Фицики Дугъаз вари адмийир дюрхну ва гъякъвалихъна дуфну ккунду. ⁵ Аллагъ сар ву, ва Аллагъдинна адмийин ара сатIи АпIурайирра сар ву. Думу Кас – Месигъ Иса ву. ⁶ Дугъу вари адмийирихъанди кайи буржнан ерина Учв тувну. Думу Аллагъди, вахт гъафиган, дюн'яйиз гъау шагъидвал ву. ⁷ Гъаддиз узу, Хабар рабгъурди, Месигъдин ва-



килди ва жугъуд дару халкъариз гъякъ хъугъувалин мялимди дерккнайир вузун; кучIлар апIурадарза, гъякъ кIураза.

⁸ Гъаци вуйиган жилари, хъял ва гьюжатар гъитну, гъарсаб ии-швахъ ккарагури, марцци хилар заргури ккундузуз.

⁹ Гъаци дишагълийирира палат абурлуди ва жуваз балгруси, къайдайинди алабхьри; гъит дурари, аյжайиди кушар деркк-ри, гъизилар, жавагъирап, багъа палат алабхьури вавъ, ¹⁰хъа Аллагъдиз бахш духовнайи дишагълийириз лайикъ вуйиси гъяни ляхнаринди чпи кабалгри. ¹¹Гъит дишагълийири, артухъ гаф дарди, саб наразивал улулупди, аygювалар аygю апIри. ¹²Дишагълийиз жили-жувуван зинн ахювал апIуз ва аygювалар улупуз гъидритарза; думу ккебехъну гъузри. ¹³Фицики сифте – Адам, хъа Ева халкъ гъапIнийи. ¹⁴Алдатмиш гъапIурра Адам дайи, хъа, кIучIлихъ хъебехъну, гунағ гъапIур учв вуйи. ¹⁵Аммаки дишагълира урхиди, бицIидар апIури, эгер хъугъувал, масанвал, гирамивал ва намуслувал ади яшамиш шулуш.

Хъугърударин ахюдар

3 ¹Дишиди кIура: шлиз хъугърударин ахюор хъуз ккундуш – баркаллагъ чаз! ²Аммаки ахюор кипуз саб тягъна ктру уымрин адми духовну ккунду: саб ражаритIан швшув дархир, сабурлур, айкъюллур, намус кайир, хялар ккунир, аygювалар улупуз удукъур, ³дурубхъур, элелегрур, хъа гаф-Чалнаң гъодлир, хъюхъ дазрабгрур, пулиъ ул адрут. ⁴Дугъу чан хал-хизан ужуйи гъюле гъабхури ккунду, хъпехъру ва чан гъюмат убхру баяр-шуббар ади ккунду. ⁵Хъа чан хулан эйвал апIузкъян даршлурхъян Аллагъдин хъугърударин гъайгъу зигуз шулин? ⁶Тазади хъугъну имбударикан ахюор ктагъну ккундар: дицир адмийик фурс кубчIиди ва, иблисдинси, дугъанра суд апIиди. ⁷Хътругърудар дицир касдикан, къяляхъ тягънийир дархъуз ва иблисиди ккиву чулиъ адрахъуз, ужуйи улхури ккунду.

⁸ Гъаму дуарарин кюмекчийириза кайиб ву. Дуар гъюмат айи, кьюб маш гъядру, чяхрихъ юкIв хъадру ва пулиъ ул адру касар духовну ккунду. ⁹Дуарари, марцци намус ади, хъугъувалин сираар дидисну ккунду. ¹⁰Сифте дуаррара ахтармиш дапIину ккунду, ва, эгер дуарихъ «рижв» хътрибишиш, гъит кюмекчивалин гъул-лугънаң гъузри.



¹¹ Ахюдарин кюмекчиирин хпарра гьорматназ лайикъдар духь-
ну ккунду, футнийир дарагърудар, тямягърий адрахърудар, ва-
рибдинн хъугъвал алидар.

¹² Ахюрин кюмекчира саб ражаритІан швушв духну адур ва
chan хал-хизан ужуди кІули гъабхрур духьну ккунду. ¹³ Гъаз гъа-
пиш чан гъуллугъ ужуди тамам апІури гьорматра гъазанмиш
апІуру, ва Иса Месигъдикан вуйи чан хъугъуваликан дугъхъан,
саб гучІ адарди, ктибузра шулу.

¹⁴ Багарихъди увухъна гъюз кказа, хъа му узу увуз, ¹⁵ нагагь узу
къан апІруси гъабшиш, Аллагъдин хизандиъ жув фици духьну
ккундуш, увуз аygю хъпан бадали бикІураза. Думу хизан – Чи-
ви Аллагъдихъ хъугъту гирами халкъ ву. Думу халкъ – мюгъкам
бин ва дебккрайи гъякъвал ву. ¹⁶ Саб гаф адарди ихъ хъугъувалин
сир зурба ву:

Думу бедендиъди гъафну,
Рюгъну гъякъ гъапІну,
Думу малайкариз гъяркъну,
Дугъкан халкъариз ктибтну,
Думу дюн’яий хъугъувалинди къабул гъапІну,
Думу адлуди завариз за гъахъну.

Тимофейиз насиғъятар

4 ¹Аллагъдин Рюгъну ачуҳуди кІура, ахиримжи вахтари, хъу-
гъувал дипну, гъацІар гъудучІвиди, дураги кучІлин рюгъярин
ва жинарин каламарин тереф бисиди. ² Дицдар каламар, намус
дудубгнайи, кью-кьюбди машар гъивнайи кучІляхъриланмина
гъиди. ³Дураги швушвар хуз гъадагъа апІура. Дураг, гъякъвал
агъодарина хъугърудари баркаллагъ кІури, ипІбан бадали Ал-
лагъди халкъ дапІнайи саб жюре итІрудар митІанай, кІури,
хъюгъна. ⁴Аллагъди арайиз дубхнайиб вари ужу ву. Баркаллагъ
кІураш, вари къабул апІуз шулу. ⁵Гъаз гъапиш думу вари Ал-
лагъдин гафну ва ккарагбу гирами апІура.

⁶ Эгер уву, Тимофей, гъардшариз гъацдар кІури гъабшиш, уву
хъахънайи сагъ аygюваларин ва хъугъувалин гафари ацІрайи
Иса Месигъдин ужур гъуллугъчи хъидивука. ⁷Къаби хпариз ла-
йикъ вуйи махъварихъди вахт давди маадапІан, хъа гъарган
хъугъувалин тІалабарихъ йихъ. ⁸Бедендиз вуйи гъяракатарикан



сацIиб мянфяаыт а, хъа хъугъувалин тIалабарихъ хъуб варибдиъ мянфяаытлу ву, фицики диди, гъамусси, гъюру вахтариъра уьмур тувди.

⁹ Му гаф дюз апIуб ва къабул апIуб лайикъ ву. ¹⁰ Гъаддин бадали ухъу лихурира ахъа, гъаддихъна гъачIарккурира ахъа, гъаз гъапиш умуд Чиви Аллагъдик кайихъ, хъа Думу вари адмийир Уърхур ву, иллагъки – Чайн хъугъвал алидар.

¹¹ Адмийириз магъа гъамдихъна дих апIин ва гъамдикан аygю-валар улуп. ¹² Увухъинди, уву жигъил ву кIури, гъяспикк ккадру саягъниинди, фужкIара лигуз мигъитан. хъугънайидализ уву гъам гафариъ, уьмриъ, масанвалий, хъугъувалий ва гъам мар-ццишна чешнеди гъуз. ¹³ Узу гъайиз хъугърударин улихъ Гира-ми китабар ерхъури урх, Ужувлан хабар ктибури апIин, аygю-валар улупру малим йихъ. ¹⁴ Хъугърударин аыхюдари ув'ин хилар иливуйрайиган увуз гъапи пайгъамбарвалин гафариланмина гъабхъи багъиш увхъан ярхла мапIан.

¹⁵ Яв гъуллугъ юкIв хъади апIин, дидиз гъуркIну бахш йихъ, ва гъадмуган варидализ яв хъуркъувалар рякъиди. ¹⁶ Яв ув'ин ва уву улупурайибдинн ул алди гъуз. Гъаму аygюваларихъан ижмиди хъичIих, фицики гъамци апIури, увтура ва увухъ хъпехъурайидар-па урхидиву.

Вазифийр, яни жсууу гъапIну ккундууш

5 ¹ Яшлу адмийириз хъягъру саягъниинди макIан, яв адаши, гъаврий тIаъ. Жигъил адмийирихъди, яв гъардшарихъдиси, гафар апIури йихъ. ² Ахюо дишагълийир – дадийирси; жигъилдар чийирси дис, дурарихъди вуйи яв аylакъийир лап марццидар шлу-си гъуз.

³ Гъич саб терефнаанкъан кюмек имдру ачIини дишагълийирин гъайгъу зиг. ⁴ Эгер ачIини дишагълийиз баяр-шубар, ясана хтулар аш, дурари чин хъугъувал ляхниъ улупри, чин хизандинна абайир-бабарин гъайгъу зигури. Му Аллагъдиз кбалгру ляхин ву.

⁵ Хъа гъякъ ачIини дишагъли, яни фужкIа хътур сар Аллагъдихъ йирфар хъирчнайир ва, йигъ-йишв ккарагури, Дугъкан кюмек ккун апIурайир ву. ⁶ Хъа кефер апIурайи ачIини дишагъли Чиви-димиidi дукIнайи гъисаб ву. ⁷ Гъич саб жюрейин тягънийир дархъбан бадали, хъугърудариъ тIапI. ⁸ Жуван багахълуйириин,



сифтена-сифте жуван хизандин гъайгъу ктур, хъугъуалихъан гъудучІвнайир ву ва хътругъуртІан ужуз ву.

⁹ ЙирхыцІур йислан зиина яш дубхънайи ва саб ражаритІан швувахъ дархъи ачІни дишагълийиртІан хъугърударин гъайгъушнаш маҳъан. ¹⁰ Думу дишагълийин ужудар ляхнар аygюи ишри: бицІидар вердиш гъапІу ва хялар къабул гъапІу, хъугъру гъардшарин ликар гъижикІу, читинвал алабхъдариз кюмекнаш ва гъарсаб ужудар ляхнариз баҳш гъашир.

¹¹ Жигъил ачІни дишагълийир думу гъисабнак макаан, гъаз гъапиш чпин юкІв хъипнайивал Месигъидхъан ярхла шлурихъ дурализ швуваз гъягъюз ккун хъибди, ¹² ва, чпи сифте Аллагъдин улихъ туву гаф чюбгъюри, дурари чпин суд апІура. ¹³ Мидихъди сабси, лихуира адруган дураг гагъ-гагънак давди вахт адапІуз вердиш шула, хулариан-хулариз ккажагъуз хъюгъра, футна либхура, жарадарин ляхнаригъ гъючІвра, лазим дарубдикан улхури шулу. ¹⁴ Гъаци вуйиган, узу жигъил ачІни дишагълийирикан швуваз гъягъюб, бицІидар апІуб, чан хулахъ зегъмет зигуб ва душмнар чпикан чуруди дулухруси апІуб ккун апІураза. ¹⁵ Гъаз гъапиш гъацдарикиан сакъодар, жуван хъугъувал дипну, ибли-сихъди гъушну.

¹⁶ Эгер ачІни дишагълийириз хъугъру багахълуйир аш, хъугърудариз артухъ гъагъ дархъуз, дурагин гъайгъу багахълуйири зигри. Гъадмуган дугъридан кюмек адру ачІни дишагълийириз хъугърударихъан кюмек апІуз хъибди.

¹⁷ Ужуди ахювал апІру касариз хъугърударин артухъ гъюмат ади ккунду, иллагъки Ужувлан хабар рабгърудариз вая аygювалаар улупрудариз. ¹⁸ Гъаз гъапиш Гирами китабари кІура:

«Гад апІури, рацц'ин али йицран ушв миилибтІан» ва

«Лихур кыматназ лайикъ ву».

¹⁹ Хъугърударин ахюрилан аьрз апІуради гъабшиш, кьюр вая шубур шагъид хътарди, къабул мапІан. ²⁰ Хъа гунгъар апІур, имбударизра дарс хъузди, варидалин улихъна адагъ.

²¹ Аллагъдин, Иса Месигъдин ва кадагънайи малайикарин улихъ увкан ижмиди ккун апІураза: гъаму узу гъапидар къабул дапІину, саризра майил мапІан; сарин тереф дебисну, тмунуриз миилзиган.



²² Жарадарин гунгъарин иштиракчи маҳбан. Хъугърударин ахюдарин жергийриз гъялакди фужкIара макадагъан. Марциди гъуз.

²³ Саб шидтIан дурубхъди мугъузан, яв фунин уъзриз ва кми-кмиди шлу иццрушинариз цIибди чяхирра ишлетмиш апIури йихъ.

²⁴ ГъацIарин гунгъар, суддин Йигъ гъайиз гъамустIанра рякъюра, хъа гъацIарин – къяляхъна ачмиш хъиди. ²⁵ Гъаци ужудар ляхнаппа ву: гъацIар гъамустIанра рякъюра, хъа дярякърайидар къанди арайиз удучIвиди.

6 ¹ ЛукIвалий айидари Аллагъдин ччвур ва учу улупу аygъювалаар беябур дарапIбан бадали, гъит чпин ахюдарин гъюмат уъбхри. ² Хъа ахюдар хъугърудар вуш, дуарар чпин гъардшар ву-йивализ дилигну, фурс дарапIри. Хъа гъаци, гъит имбубтIан хъана уччвуйи чпин ахюрихъ хъпехъури ишри, гъаз гъапиш чпи гъуллугъ апIурайидариз дурарра дугъри ва ккуни гъардшар ву. Адмийириз уву гъамци улупну ва гъаддихъна дих дапIну ккунду.

КучIлин улупбар ва гъякъ девлем

³ Шли, Аллагъдиз лайикъ вуйи гъюмат хурайи ихъ Агъя Иса Месигъдин сагъ гафар ва аygъювалар тина гъадаъну, фу-вш жараб улупураш, ⁴ думу хъюхъ забгурайир, амма фукIа аygъдур ву. Дицир адми, гюжатарин ва люкънарин кчIихбарин уъзри гъадагънайир ву. Гъацдарилантина баҳилвал, гъярхувалар, агърар-люкънар, хъугъвалиан адахъувал ⁵ ва кIулий маъ адарди гъякъвал кIваълан гъубшдарин гъанихвали, зат ккудудукIру гъюжат арайиз хура. Аллагъдин ляхнар дуариз чпи ацIузтIан вуйидар дар.

⁶ Хъугъувалин тIалабар тамам апIуб ва варибдин рази хъуб зурба хъуркъувал ву. ⁷ Фицики му дюн'яйиз ухъу гъабхиб фукIара адарихъ, я фукIа къяляхъ гъабхидира дархъа. ⁸ Улна палат аш, гъаддин рази хъидихъа. ⁹ Девлетлу хъуз ккунир гизаф абдал ва хатIавалин тямиягъяриз ахъру. Дураги адмийир бедбаҳтвалин ва аյжалин деринариз хъчIюхюру. ¹⁰ Вари жюре чIуруваларин ччив – пул ккун апIувал ву. Пул ккун дубхъну, хъугъувалихъан гъудучIву адмийир гизаф баҳтсуз гъахъну.



Фу кIаълан гъархну ккундариш

¹¹ Хъя уву, Тимофей, Аллагъдин адми вува, гъаддиз гъацдари-хъан гъерг. Дюзвал, хъугъувал, хъугъувалин тIалабар тамам апIувал, масанвал, сабур, умунвал бисуз хилар гъачIаркк. ¹² Хъугъувал бадали игит йихъ, увуз дих дапIнайи гъаргандин умрихъан хъичIих. Фицики уву лайикълуди гизаф шагъидарин улихъ яв хъугъуваликан гъапнийва. ¹³ Гъамус узу увуз, Понтий Пилатдин унтIаъ кIубанди гъаму хъугъуваликан шагъидвал гъапIу Месигъ Исаин ва варибдиз умур тувру Аллагъдин улихъ дих апIуразавуз: ¹⁴ увуз гъич саб тягъна дяргъруси, узу увуз гъапиб вари ихъ Агъя Иса Месигъ гъайизкъан, тамам апIури гъуз. ¹⁵⁻¹⁶ Вахт гъаб-хъиган, Думу ухъухъна Аллагъди, хушбаҳтавар ва сар вуйи Гью-кумдри, паччгъарин Паччагъди ва агъирин Агъайи, лик кубкIуз даршлу аквнаъ айи ва адмийирикан гъич саризкъан дярякъю ва рякъюз даршлу, ажгал хътрру Сари гъайди. Гъадгъанубу ву гъюр-мат ва къудрат гъаммишандиз! Амин.

¹⁷ Гъаму дюн'яйиниин девлетлу вуйидариз йип: фурсар дарапIри ва чпин девлетарихъ йирфар хътричри – думу мюгъкам вуйиб дар. Умрикан къукъ ктабгъури яшамиш хъуз вари лазим вуйиб артухъра кади тувру Аллагъдихъ йирфар хъирчиш, хъя ужу ву. ¹⁸ Дурарикан ужувлар апIуб ккун апIин, гъит гъяни ляхнарихъди девлетлу ишри. Къискъисар даришри ва иштагъниинди имбуда-риз чпин девлетнакан капIри. ¹⁹ Гъит, гъамци чпиз хазна уч апI-ри – му гъуз ккимбу гъякъ умур гъазанмиш апIру ижми шиб-ритI хъибди.

²⁰ Тимофей, яв хилиъ иvnайиб вари уьбх. Аллагъсуввалин улх-бар-рахбарихъан ва кучIлин аygъоваларин гъожатарихъан гъу-дучIв. ²¹ Гъацдар аygъовалар ачуз, кIурайидар хъугъувалихъан гъирагъдиз душна.

Гъит уж'вал учвухъди ибшри!



ТИМОФЕЙИЗ 2-ПИ КАГЪАЗ

Гирами Рюгънуланмина Павели гъбикиIу му кагъаз, гъилигу гъялариан, ахиримжинуб ву. Му кагъаз Римдиг гъбикиIганси ву. Му кагъзибра чаз аъгътлу вуйи гъардаш Тимофеин ччур кIваин апIура. Хъергуваларикк ккахъну, дустагъдиб дебнайи Павел суддихъна ва аъжалин жазайихъна гъязур шулайи. Иллагъки гъамциб вахтна дугбу чаз кюмек гъапIу ва чан вари уымриб хъугъвал алди гъахы Аллагъидикан ктибтуз хъюгънийи. Павелиз аъжалискан гучI ктайи, думу Месигъидихъди чазра гъаргандин уымур кклибгурайивалихъ ижмишинаан хъугънайи. Аммаки Исайн вакилиз хъугърударин гъюз имбу гележегдиз кюмекар дарапIди гъитуз ккундайи, фицики чаин улуркъстар аъзабарна хъергувалар дурагиз кклигурайиб дугъаз аъгъяи. Гирами Рюгъну улихъими迪, гизафдар гъякъвалихъан хътакиди ва жевуван зин Аллагъди аъхювал апIури дурагиз ккун хъибдар, кIурайи. Гъаддиз Аллагъдин Рюгъну Исайихъ хъугънайидариз Месигъ варии гъюкмартиан зина вуйивал ва вари аъхюдарин Паччагъ вуйивал кIваин урхюб, гъацира, улукъуз ккайи хъергуваларизна гучIар ккаъбаз дилигди, аъгътлуди гъузуз дих апIура: «аъжал терг ГъапIуриинди, Ужувлан хабарниинди дюн'яйиз уымур ва аъжалсузвал Гъабхуриинди, ухъу Урхрур – Месигъ Иса гъюб'инди думу багъии рябкъюри гъабхъну» (1:10).



1 ¹Аллагъди гаф тувнайи Месигъ Исайиъди сатIи вуйи уьмур рабгъуз Аллагъдин ниятниинди гъаънайи Месигъ Исайин вакил Павелихъан ²ийз ккуни вуйи бай Тимофеиз – уж’вал, рягъимлуval ва мясляяйт Адаш Аллагъидхъан ва ихъ Агъа Месигъ Исайихъан!

Баркаллагъ пуб

³ Ииз абириси марцци намусниинди узу гъуллугъ апIурайи Аллагъдиз, гъарсаб ииз ккарагбай уву кIваин апIуран, баркаллагъ кIураза. Узу уву, ккарагури, зат сикин дарди, йигънура иишвнора уву кIваин апIураза. ⁴Узхъанди уву удурзу нивгъар кIваин илмийиз, ва уву дяркъну, юкIв шадвали абцIуз ккунди, ктисурадарзу. ⁵Сифте яв баб Лойдайнин, хъя яв дада Евникайн кIваз гъафибсиb марцци яв хъугъувал кIваин апIураза. Му мициб хъугъувал увуз айивалин саб шак адарзуз. ⁶Магъа гъамци, кIваин апIуразавуз: Аллагъди увуз тувнайи, ва узу хилар иливан, увуз кабху гъуллугънан багъиш, Чиви цIа кади, убуру гъит. ⁷Аллагъдин Рюгъну ухъуз гучI туврадар, хъя къувват, масанвал ва сагъ фикир тувру.

⁸ Гъаддиз, ихъ Агъайикан ктибтуz нач мапIан, ва Гъадму бадали дустагъдий айи узхъан нач мапIан, хъя узухъди Ужувлан хабар бадали, уз’ин улукънайи аззабарин пай гъадабгъ. Фицики Аллагъди ухъуз Чан ужувлакан ктибтуz кIури къувват тувна. ⁹Дугъу ухъу ихъ ляхнализ лигтну дюрхнадар ва Чан гирами вуйи дихниинди ухъуз дих дапIнадар, хъя, Чан гъаци апIуз ккайивалин къувватназ ва Чан зурба вуйи ужувлаз дилигну гъаци дапIна. Дугъу ухъуз, Месигъ Исайиланмина думу багъиш, вахтар ккергъайиз улихъна дапIнайи. ¹⁰Гъамус, айжал терг ГъапIуриинди, Ужувлан хабарниинди дюн’яйиз уьмур ва айжалсувзal Гъабхуриинди, ухъу Уърхур – Месигъ Иса гъюб’инди думу багъиш рябкъюри гъабхъну. ¹¹Гъадму Ужувлан хабар ктибтуz вакилди, айгьювалар улупруди ва мялимди Аллагъди узу дерккну! ¹²Магъа гъамдиз дилигну, узу гъацдар аззабар айгъ апIураза. Хъя узуз начди дарзуз! Узуз узу Шлихъ хъугънаш, айгъязуз. Дугъу уз’ин илипнайи гъадму ляхин Аыхиримжи йигъ гъайизкъан вари уьбхувалик ииз гъич саб шакра кадариз.



¹³ Хъугъувал ади ва масанвал ади узкан увуз гъеерхъу дюз аягъувалар увуз дарсар ишри. Дураг учуз Месигъ Исайиъ гъидихъдар вучуз. ¹⁴ Яв хилий ивнайи вари ужуб ухъуль яшамиш шулайи Гирами Рюгънан къувватниинди уъбх.

¹⁵ Асия уълкейиъ, Гермогенна Фигелра кади, узхъан вари гъидицнайиваликан аягъявуз.

¹⁶ Гъит Агъайи Чан рягъимувал Онисефордин вари хуландариз улупри. Дугъу гагъ-гагънак йиз кІваз архайнвал хури гъахъну ва узу йитІнайи зунжрахъан нач гъапІундар! ¹⁷ Учв Римдій айиган, дугъу узу, дихъайизкъан, гизаф агури гъахъну. ¹⁸ Гъит, Агъайи дугъаз гъадму Йигъан Чан уж'вал туври! Хъа дугъу узуз Эфесдій фукъан кюмек гъапІнуш, варидализтІан увуз ужуйи аягъявуз.

Хъугъувал али Месигъ Исайин адми

2 ¹ Гъаци, йиз бай, Аллагъдин ужувллаан къувват адабцI, думу ухъуз, Месигъ Исайиъ сатIи вуйиган, туврайиб ву. ² Увуз узкан гъебхъуб гизаф адмийирин улихъ жарадаризра гъаци улупуз удубкъру хъугъувал али касарин арайиъ кидибт. ³ Месигъ Исайин дугъри эскерси, яв пай аyzаб гъадабгъуз гъязурди гъуз. ⁴ Гъич сар эскерра хулан ляхнарихъ шулдар – дугъан вазифа, чан аыхюри гъапиб апIуб ву. ⁵ Я гъич сар талитчийиз, талитнан къайдийир гъочIоргъиши, пешкеш тувидар. ⁶ Гъаци нежберра ву: амкI ккудубзури гъилиху дугъаз чан пай мягъусул сифте ражну дурубкъну ккунду. ⁷ Узу гъапибикан фикир апIин – Агъайи варибин гъаврий ахъуз кюмек апIидивуз.

⁸ Давуддин тухмиан удучIву, дукIину чIиви гъахы Иса Месигъ кІваин апIин. Узу рабгъурайи Хабарнан мяна гъаддиль а. ⁹ Гъадму Ужувлан хабар бадали узу балайикк ккахъназа, тахсиркарси, зунжрариъ аза. Хъа Аллагъдин Хабар зунжрариъ дитIуз шлубдар! ¹⁰ Гъаддиз узу, кадагънайидар бадали, Месигъ Исайихъди сатIи вуйидариз, гъаммишандин адлувалра хъади, чпиз уърхувал рубкъбан бадали вари аыгъ апIураза.

¹¹ Гъаму гафар гъякъ ву:

эгер ухъу Дугъахъди гъийихнуш,

Гъадгъахъди яшамишра хъидихъа.

¹² Эгер аыгъ апIураш, Дугъахъди паччагъвалра апIидихъа.



Эгер ухъу Дугъхъан гъудучІвиш,
Думура ухъхъан гъудучІвиди.

- ¹³ Эгер ухъу дугъриди гъудрузиши,
Думу дугъриди гъузди, фицики
Думу Учв Чахъан гъудучІвидар!

Аллагъди кадагънайи гъуллугъчи

¹⁴ Гъаму вариб адмийириз кІваин апІбаъ яваш ва инжик ма-
хъян. Аллагъдин улихъ дурарикан гъюжаткарвал дебккуб ккун
апІин. Дураихъ хъпехърударииз, аյжалихъна хувалтІан, хайир
адар. ¹⁵ Аллагъ увкан разиди гъитруси, диш рякъди гъярайи кас-
си, гъич сабдихъанра нач даршу гъякъвалин гаф деебтури, яв
хил'ан удубкъруб вари апІин. ¹⁶ Хъя ичІи ва аллагъсуз лягъля-
гъярихъан гъудучІв. Фицики дурари адмийир Аллагъдихъан ярх-
ла апІура. Чпин хътругъруваларъ дурарин хъуркъувалар артухъ
хъиди. ¹⁷ Дурарин каламарра, кубчІвру аyzарси, даргъиди. Диц-
дарин арайиъ Филетна Гименейра ахъна. ¹⁸ Дурап гъякъ рякълан
улдугнна. Дурари, гъийихдар чИви духъна, кІура. Гъамци кІури,
дурари сакьюдарин хъугъувал чІюбгъюра. ¹⁹ Хъя Аллагъди ккив-
найи бин мюгъкамди дийибгъна, ижмиб ву. Дид'ин гъамци кІу-
ри, лишан алабсна: «Аллагъдиз Чандар аygъя». Ва хъана: «Гъар-
сари, Агъайн ччувр бисрури, гъич чIуруб дараpИри!»

²⁰ Ахю хулаъ, гъизилинна арсанси, гакІвлинна ругдин гъа-
барра а. Гъюрматлуди ишлетмиш апІру багъа гъабарра а, аydат-
нан гъяжатназ – ужуз гъабарра. ²¹ Вари чIурубдихъан марцц гъа-
хъир гъюрматлу гъаб хъиди: дицир кас гирами дапІна; Эйсийи
гъадму ишлетмиш апІди, думу гъаммишан гъарсаб ужувлан лях-
низ гъязурди гъубзди.

²² Жигъильвализ хас вуйи тямиярихъан ярхла йихъ ва, Агъа-
йихъна марцци юкІварииинди илтІикІрударихъди сабси, дюзва-
лихъна, хъугъувалихъна, масанвалихъна, мясяльтнахъна вари-
дарихъди гъачІаркк. ²³ Ахмакъ ва абдал гъюжатарихъан ярхла
йихъ, увуз аygъявуз: дицдар гъюжатар элегбариинди ккудукІуру.

²⁴ Агъайн гъуллугъчийиз гъюжатаригъ гъючІвуб лайикъ дар. Ду-
му варидализ гъюдлир ва ужур, аygъовалар улупуз аygъюр духъ-
ну ккунду. ЧIурувал кІваъ гъибтну ккундар, ²⁵ жкуваз къаршу
удучІврур гъюдалди дюз алаъ. Белки Аллагъди дурализ гъякъ'вал



аыгъю хъпан бадали чпи гъапIубдииш шумал хъуз хъана мумкинвал тувур,²⁶ дурагар хъиргди, ва, чан ниятназ мютIюгъ дапI-ну, иблисди ийисирвализ гъадагънайи гъарсар азад хъиди.

Аххиримжи йигъар

3 ¹Ва сабсана аыгъю ийбхъ, аххиримжи вахтари гъагъи йигъар улуркъиди. ²Адмийириз, чпина пултIан ккунди гъубзидар, чпин тярифар апIрудар хъиди, хъюхъ дазабгну лицрудар хъиди, ушвниин чIуру гафар алидар хъиди; абиир-бабарихъна гъюмат гъубзидар, чухсагъул кIурудар хъидар, инсанарин юкIвариъ гирамивал гъубзидар. ³Адмийир юкIв адрудар, мясляльтнахъна дяргърудар, футнакрар, сабур адрудар, инсафсузар, ужувлан душмар, ⁴масу туврудар, фикирсузди гъяракат кайдар, ацIу гафар кайдар хъиди, дурагиз АллагытIан къукъар апIуб артухъ ккун хъиди. ⁵Зиълан чпи Аллагыдихъ хъайиганси улупиди, хъа айтIан дураг Аллагыдин къувватну дигиш апIидар. Гъацдарихъан ярхлади гъуз.

⁶Дурагин арайиъ гъацдар адмийир аки, чпинна хъугъ'вал дубхну, жара хизанарий учIврудар, дураги гъавриъ адру, гунгъари кка-ЧакIнайи дишагълийир алдатмиш апIиди, хъа дишагълийири гъадрагин гъубкъу жюрейин тямягъар гъуркIри хъиди. ⁷Думу дишагълийирихъан, дурагин дарсар гъаммишан урхури шулушра, гъич фицикIа гъякъ абгуз хъибдар. ⁸Мусайиз къаршу удучIву Янесна Янбресси, гъаму адмийирра маар адрудар, кучIлин хъугъувал айидар, гъякъ'валихъди гъюжатариз гъудужврудар ву. ⁹Хъа дураг чпин метлебарихъ хъуркъидар: дураг вари (Мусайихъди гъюжатнаш гъахьидарси), ахмакъар вуйивал ачухъ хъибди!

Аххиримжи насигъятар

¹⁰⁻¹¹ Гъамус уву гъам урхбая, гъам уымрий, гъам метлебар кIулиз адагъбая, гъам хъугъувалий, гъам аыгъ апIбая, гъам масанвалий, гъам ижмивалий, уз'ин Антиохияйиъ, Иконияйиъ ва Листрайиъ алахъу хъергувалариъ ва аyzабарий узу кIуруб апIури гъахъунва. Гъаму вари хъергувалар узу аыгъ гъапIунза, ва варибиккан Агъайи узу ккадаъну! ¹² Месигъ Исайихъди гирамиди яшамиш хъуз ккуни гъарсариз гъацдар хъергувалар кклигурга. ¹³Хъа пис адмийирна алдатмиш апIрудар исина-исина кучIлин къарнаш арсди, дураги чпихъди имбударра алдатмиш апIиди.



¹⁴ Уву гъарган яв хъугъувал алибдиҳъди ва увуз улупубдиҳъди гъуз. Увуз айгъявуз му вари увуз Шли улупнуш. ¹⁵ Гъеле бицЛидимиidi увуз Гирами китабар айгъявуз, ва гъадму Китабари Месигъ Исайихъ хъугъувалилантина урхювалихъна гъахру айкюл тувунвуз. ¹⁶⁻¹⁷ Гъарсаб Гирами китаб Аллагъдин Рюгъниинди вуйиб вуйиган, думу хайирназ ву: Китабари, Аллагъдин адми ужувлан гъарсаб ляхнiz гъуркIну гъязур хъпан бадали, айгъувалар гъадагъуз, жиниди аий писвалар ачуҳъ апIуз, гъалатIар ктагъуз, дюз рякъюхъ хъауз кюмек апIура.

4 ¹Чивидаринна гъийихдарин суд апIуз гъору Месигъ Исаин ва Аллагъдин улихъ ккун апIуразавукан (узу мици, Месигъдиз Паччагъулугъ айиган ва Думу багарихъди гъюрайир вуйиган, кIураза): ²Аллагъдин гаф рагъ, рягъят вуйи ва рягъят дару вахтнара ижмиди гъуз, гъалатIар ктагъури апIин, жинивалар ашкар апIури гъуз, инсанарин рюгъ за апIин ва сабурлуди айгъувалар тув. ³Гъациб вахт гъибиди: гъякъ айгъувалар улупбахъан гъудучIвиди ва, чпиз фу деебхъну ккундущ, гъаддихъ хъпехъуз тямиягъ ади, мялимар чпилан илтIикIуз гъитди. ⁴Гъякъ'вализна дюзвализ чпин ибар гъеркну, дурап, маҳъварихъ хъпехъбан бадали, дурарихъан гъидициди.

⁵Хъа уву варибидикан марцци саягъниинди фикир апIин, гъагъивалар айгъ апIуз дубгъ, яв ляхин апIин – Ужувлан хабарнakan кидибт, яв гъуллугъ гъубкIну тамам апIури гъуз. ⁶Хъа узкан хабар гъадабгъуруш, сарун йиз умур гъурбан апIрушв'ина дубхнайиси алиб ву. Йиз гъягъру вахт ву сарун. ⁷Узу ужуйи женг гъубхунза ва узуз улупнайи вари манзил ккадапIунза, хъугъувал гъюбхунза. ⁸Гъамус узуз Агъайи, дюзвалин Судъайи, гъадму Йигъан пешкеш тувди – узу гъякъ апIиди, неинки узу, хъа Думу хъадакну гъору Йигъаз масанвалиинди кклигурайи гъарсар гъякъ апIиди.

⁹Узухъна ухди гъюз чарийир аг! ¹⁰Фицики Демас узухъди гъузундар. Думу, чан юкIв гъаму дюн'яйиз тувну, Фессалоникдиз гъушну. Креск Галатияиз гъушну, Тит – Далматияиз. ¹¹Узухъди сар ЛукатIан хътар. Увухъди Маркра хъади гъач, гъаз гъапиш, дугъу узуз йиз гъуллугъна гизаф кюмек апIури шулу. ¹²Тихик узу Эфесдиз гъаунза. ¹³Уву гъоруган, йиз валжагъра гъадабгъ – думу



Троадайиъ аий Карпдихъ гъубзниз, йиз китабарра гъадагъ, ги-
зафси гъидкындар.

¹⁴ Рукъан уста Эскендери ууз гизаф чурууб гъапПунзуз. Гъит,
Агъайи дугъаз, чан ляхнариз лигну, туври! ¹⁵ Хъа уву дугъхъан
ихтиятди гъуз, думу яманди ухъу тувру вари аыгьювалариз къар-
шу гъедергuri гъахъну.

¹⁶ Суддиль ууз йиз тереф уьбхюри улхуз сабпи ражну мумкин-
вал тувиган, кюмекназ сар касра гъафундайи, варидари узу га-
тлахъну. Гъит му дурарин тахсир гъисаб дарапПри! ¹⁷ Хъа йиз къя-
ляхъ Агъа дугъужвнайиз. Ари Гъадгъу ууз, узлантина Ужувлан
хабарнакан жугъуд дарудариз ктибтбан бадали, варидализ еб-
хъуз гъитруси къувват тувунзуз. Дугъу узу асландин кЛанччари-
гъян гъядягъну. ¹⁸ Агъайи узу гъарсаб чуруубдиккан ккадаиди ва,
Чан Айршинин Паччагъулугъдиз гъахуз кЛури, уърхиди. Гъадгъаз
ибшри ад айсариан-айсарииз! Амин.

¹⁹ Прискилайизна Акилайиз саламар йип, ва гъацира Анеси-
фордин вари хуландариз. ²⁰ Эраст Коринфдиль гъузну. Трофим,
иццру гъахъир, Милетдиль гъитунза. ²¹ Къюрд хъайиз гъюз чара
апПин! Увуз саламар хътаура Эвбули, Пудди, Линди, Клавдия-
ии ва вари гъардшари. ²² Гъит, яв рюгънахъди ишри Агъа! Гъит,
учвухъди Аллагъдин уж'вал ибшри!



ТИТДИЗ КАГЪАЗ

Гизаф айлимари кIурайиси, Гирами Рюгъну Павелихъди му кағаз, думу ишкIайиз улихъна, Римдің бикIуз гъитуб ву. Му кағаз Крит островдин Аллагъдин гъуллугънаң айи Титдиз дибикIнайиб ву. Павели му островдин Тит, чан ахиримжи сиягъятназ дуфнайиган, гъитну имбур вүйи. Думу мушв'ин Аллагъдихъ хъугънайидарин гъайгъушнаң дұхыну ккундийи. Думу дицикъан рягъят ляхин дайи. Крит ағыларин хасиятнакан ағъю Павел, дурализ ачухъди къаршу гъедергүйи. Аллагъдин вакилиз Ужувлан хабар душв'ин уходи дюз дарушвахъинди илтIибкIбакан ағъю гъабхънийи. Ужувлан хабарнакан каламар дапIнайи. Хъугърударин арайиб къайда, гъюрмат адайи. Аллагъдин халкъдин арайиб гъалабулугъар гъитIиккуз ккунди, сакьюдар кучIин хъугърудари, гъубкы жюрейин мумкинвалар ишлемшиш апIуйи. Гъамциб гъял себеб вуди Гирами Рюгъну Павелихъди Титдиз кағаз бикIуз мажсбур апIуру ва дугъаз Критдин хъугърудар саб хилди хъуз кюмек апIру буйругътар тувру. Дишихъди сабси, Титдиз каламар ашкар апIбаъ, лазим вүйибкъян ижмишин улуп кIури, насыгъяттарра тувру. Кағъзиз гизафси Аллагъдин рягым-луввалин уърхру къувватназ фикир тувра.

1 ¹Узу, Аллагъдин гъуллугънаң айи ва Иса Месигъдин вакил Павел, Аллагъди кадагънайидар хъугъувалихъна хуз, гъякъ'валин кIулий тIауз, дюзди Аллагъдиз гъюрмат фици апIуруш улупуз ва ²дуралик гъаргандин уъмрин умуд капIуз гъаънайир вуз. Дициб уж'вал варি дюн'я арайиз хайиз улихъна гъич саб вахтнара



кучIал дарапIру Аллагъди тувнайи гаф ву. ³Чав дебккнайи вахт гъафиган, Дугъу дюн'яйиз Чан Гаф гъальну. Гъадму Гафнакан вуйи Хабар рабгъувал Аллагъдин, ухъу Урхрурин, ниятниинди уз'ина ихтибар дапIна.

⁴Узухъди саб хъугъувалин йиз дугъри бай Тит, Адаш Аллагъдихъан ва ухъу Урхру Иса Месигъдихъан уж'вал ва мясяляйт ибшриувуз.

Критдин Титдин вазифийир

⁵Узу уву Критдин гъял дапIну адру вари ляхнар гъял апIбан бадали ва гъарсаб шагърий хъугърударин арайиъ аыхюдар деркк-бан бадали гъитунзаву. ⁶Узу гъапиганси, дерккру аыхюдар марциди яшамиш шулайидар духну ккунду – саб ражаритIан хипир духну адрударикан; дуарин веледар хъугърудар вуди ккунду, я гъич саб жюрейин хлиан идитнайивал ва хъпебехърувал дуарик кади ккундар. ⁷Фицики Аллагъдин гъуллугъниин али аыхюр Гъадгъан ляхнар кIули гъахурайир ву ва дицир саб гаф кайир духну ккундар. Дишиб гъуллугъниин, чав кIурубтIан аygъд-рур, я хъял гъюрур, пияниска, элегрур, я пулиъ улар айир духну ккундар. ⁸Хъя, гъатци, дицир кас хялар къабул апIрур, уж'вал апIрур, фикирлур, дюзвал ккунир, намус-гъир'ят айир, учв чан хилиъ дисуз шлур вуди ккунду. ⁹Думу улупурайи аygъюваларикк кIул ккиврур, гъякъ гафнан терефкар вуди ккунду; хъпехърудариз сагъ насигътариинди кюмек апIрур, хъя хъпебехърудар, чаз къаршу гъедергрудар ашкар апIуз аygъюр духну ккунду.

¹⁰Фицики гизафдар гъич саринра гъюкум къабул дарапIрудар шулу, лягълягъчийир ва футнакрар-кучIляхъяр, гизафна-гизафси дицдар адмийир суннат дапIнайидарин арайиъ а. ¹¹Дуарии кIулди хизанар пуч апIури хъюгъру; чин ужуз хайирнахъди, аygъю дубхъну ккуниб улулупди, фукIа дару каламарихъян хъчIихури шлуган, дуарин ушвниъ итIибшвури ккунду. ¹²Дуарин сар пай-гъамбри гъапну: «Критдин агълар – гъарган кучIлар апIрудар, вягъши гъайванатар, темплар, адрапIру фунар ву!».

¹³Му дугъридан гъякъ ву. Гъаддиз дуарин, саб гъайифвал ктарди, гъякъяр унтIаъ атIри апIин; гъит, дуар сагъ хъугъувалихъна гъюри; ¹⁴гъит, жугъдари кадагънайи махъварихъян дуар ярхла ишри ва гъякъналан улдугнайидари кIурайиб дарапIри.



¹⁵ Марццидариз вари марцциб ву, хъа кацІнайидариз ва хътругъ-рудариз марцциб фукІара адар, гъаз гъапиш, дурарин фагъумра, намус-гъир'ятра кацІнайидар ву. ¹⁶ Дурари, чпиз Аллагъ аygъячуз, кIури, гъисаб арІура, хъа чпин ляхнар-тIулариинди Думу ярхла арІура. Гъадрар ву думу намуссузар, мютЮгъ дарудар, гъич саб ляхнизира хай дарудар.

Гъякъ аygъюваларихъди хъуб

2 ¹Уву, гъякъ аygъювалари фу тIалаб арІураш, дупну ккунду. ²Яшлуйириз чпин кIул'инди фикир арІуз улуп: ужубна-хар-жиг аygъю арІури ишри, гъюматназ лайикъди ишри, фикирлуди ишри, ижми хъугърудар ишри, ккудулубкIру масанвалий ишри, мюгъкамди сабурлудар ишри. ³Гъаци улуп яшлу дишагълийи-ризра: намуслуди яшамиш шлуганси, футнийир дарагъди, убхъ-рубдиль улар адрахъруси; гъит, жигъил швушвариз ужувлар арІуз улупри. ⁴Дурарихъди чпин жилар ккун арІуз гъитри; чпин ве-ледарихъ юкІв хъипри; ⁵аykъюллуди фикир арІрудар ишри, чIат ул адрударди вердиш ишри, хулан гъайгъу кайидар ишри, уж'вал кайидар ишри, Аллагъдин Хабар аскан даршлуси, чпин жиларихъ хъпехърудар ишри. ⁶Гъаци жигъилларра ишри: дурализ чпи хилий дисуз шлуси улуп. ⁷Уву дурализ вари яв алдабгъурайи ликдин-дина ляхнариинди чешнеди гъуз. Гъит, уву улупурайи аygъювалар лап кIваантIан ва гъюматназ лайикъ ишри, ⁸ихъ душмнарихъан ухъуз фукІара чIуруб пуз даршлуганси ва дурализ чпиз нач шлу-ганси, яв гаф-чIал сагъиб ва гъич саб гъалатI ктруб ибши.

⁹ ЛукІариз улуп: вари чпин аyxюдарихъ хъпехърудар ишри; кIуруб арІрудар ишри; гафариз къаршу удудучIви, ¹⁰гъитЛибкI-рудар варь, хъа ухъу Уърхурикан — ихъ Аллагъдикан вуйи аygъю-валар хъана артухъ уткан ва такабур арІру гъубкIу ихтибар али-дар ишри.

¹¹ Фицики Аллагъдин зурба вуйи ужувлу вари инсаният уърхюз шлу аквнахъди ккапIний. ¹²Аллагъдин ужувлу ухъуз гъаму дюн'-яйиль, аллагъсуз умрихъан ва му дюн'яйин тямягърихъан ярхла духъну, жуву хилий дидисну, марцциди ва намуслуди яшамиш ихъ кIурахъуз. ¹³Диди ихъ умудар тамам шлу хушбахтавар Йигъ гъайиз ккилигүри гъузуз улупурахъуз. Думу Йигъ Чан аднаъди зурба вуйи Аллагъ ва ухъу Уърхур — Иса Месигъ гъюру Йигъ



хыибди. ¹⁴Ухъу законсузваликкан азад апIбан бадали, Чаз ду-
рукънайи халкъ марцц апIбан бадали ва думу халкъ, вари юкIв
хъипну, уж'вал апIуз улихъ гъягъбан бадали, Гъадгъу ухъхъанди
Чан жан тувнү.

¹⁵ Магъа гъамцдар аьгъювалар улуп. Яв вари гъюкум улихъ
гъапIну, дурарик юкIв капI ва тахсрар улупури гъуз! Ва гыйт,
гъич сарихъанра увухъинди хъюхъ за дапIну лигуз дарибшри!

Дугъри вуйи уымрикан

3 ¹Дурализ гъюкум гъабхрударихъ ва ахюдарихъ хъебехъну
ккунивал кIваин апIури гъуз; гъарсаб ужувлан ляхин апIуз
тъязурди ишри, ²гъич затра люкънар дарапIри, гъюжатар гъитIи-
Тиккри вари адмийирихъна ккунивалиинди ва гъюдливалиин-
ди ишри.

³ Улихъди ухъура ахмакъарди гъахъидар вухъа: кIул'ин зигру-
дар, алдатмиш дапIнайидар, хъуз мумкин вуйи вари тямягъярин
ва ять адру къукъарин лукIар вуйхъа, хъолу ацIну ва гъанихвали
ургури яшамиш шули гъахъунхъа, чиб-чпин хъял ади ва чиб-чи-
даккунди гъахъунхъа. ⁴Хъасин дюн'яйиз ухъу Уърхур — Ал-
лагъдин уж'вал ва Дугъан инсанарихъна вуйи масанвал гъафну.
⁵ Думу, ухъу апIури гъахъи ихъ «тъякъ ва дугъри» ляхнализ ди-
лигну, Гъафир дар, хъа Чан уж'валилантине гъаци гъабхъиб ву.
Дугъу ухъу гъюрхну, штухъди марцц дапIну, таза алаъну ва Гира-
ми Рюгънахъди цIийи гъапIну. ⁶Дугъу Чан Рюгъ, ухъу Уърхури-
ланмина — Иса Месигъдиланмина ухъ'ина, кIюгъялвал адарди,
улузну. ⁷Дугъан зурба вуйи ужувленинди ухъу, гъякъ дапIнайи-
дар, умуд кивнайи гъаммишандин уьмур рубкъру насларди гъуз-
дихъя. ⁸Мурап дугъри гафар ву.

Ууз уву гъаму гъякъяр дуарин юкIвариъ тIаъри ккундуузуз.
Гыйт, Аллагъдихъ хъугърудар, ужувлар апIури, ацIри. Хъа мици
хъуб варидариз успагъи ва мянфяльту ляхин ву. ⁹Аммаки ах-
макъ улхбарихъан, архирикан вуйи гъюжатарихъан, гъярхуву-
ларихъан ва Къанундин кIуллан кЧихуваларихъан ярхлади гъуз.
Мурап ичIи ва хайрсуз ляхнар ву. ¹⁰Хъа гъюжат гъипуз ккуни-
риз, сабан-кьюбан чан дюз дарувал улуп, хъасин дицирихъди са-
рун аялакъа мигъибтан. ¹¹Аьгъю йибхъ, дицир кас чIур гъахъир
ва гунагъкар ву, дугъу чав чак тахсир кипна.



ТИТДИЗ 3

¹² Узу увухъна Артем ясана Тихик гъаиган, узухъна Никополь-
диз гъоз ял апIин; узу душваш къюрд адапIуз къаст гъапIунза.

¹³ Ккун апIуразавукан, законарикан аygю Зенасдихъанна Апо-
лоссдихъан чпи гъярайи рякъ давам апIуз кюмек апIин: дурализ
фукIа-мукIа ккимиidi мигъибтан. ¹⁴ Гъит, ужудар ляхнар апIури,
ихъдаризра дарс ибшри ва гъудрубкIрушваъ кюмек апIуз дубгъ-
ри, хъа гъадмуган дуарин уьмур бегъер хруб хъибди.

¹⁵ Увуз узухъди гъамшваъ аий варидари саламар хътаура. Ухъу
ккуни вари хъугънайидариз саламар йип. Гъит, учвухъди вари-
дарихъди Аллагъдин уж'вал ибшри!



ФИЛИМОНДИЗ КАГЪАЗ

Му кагъаз Павелихъди Гирами Рюгъну Римдиз дубик¹Инайиб ву. Филимон Колосс шагъриз Исаихъ хъугърударикан сар вуйи. Филимондин Онисим к²Юру сар лук¹ Рим шагъриз гъергну гбушийи. Гъаму шагъриз гъабхъи саб гъядисайи лук¹Ран вари умур дигиши гъап¹Инайи: думу Павелихъди таниш гъахъниий. Павеликан Онисимдиз учв уврхру Исаин гъякънаан гъеебхъниий ва Дугъан терефкар гъахъниий. Гъергну к²Юри лап пис жаза гъадабт¹Базра дилигди, гъаму гъядисайшинди учв гъергну гъафи эйсийин хликкна къяляхъ душну, ккунивалин думу гъавриз ахъру. Павели Филимондиз, чан лук¹Рахъна гъюдал иихъ к²Юри, т¹Алаб ап¹Юри, бик¹Юру, фицики, Филимон чавси, думура Аллагъдихъ хъугърур гъахъниий. Гъеле Павел лук¹Гвализ ачухъди къаршу уду-ч¹Вурадарира, Гирами Рюгъну Онисимдинна Филимондин ара-ийиц¹Иии авлакъиир ирчбакан бик¹Юра: «Мумкин ву, саб вахт-наз думу увухъди дархъуб, хъасин гъаргандиз увухъди хъиди, амма лук¹Си ваз, хъа лук¹И¹ан гизаф зания вуйи ккуни гвардаши, иллагъки, узуз ккуни. Думу увузра гъам инсанси, гъамсана Агъайлантана вуйи гвардаши багъа шулу!» (15, 16).

1 ¹Иса Месигъдихъ хъугъру к²Юри дустагъ дап¹Инайи Павелихъан-на гъардаш Тимофеихъан – ухъухъди гъуллугънаа аий, ккуни вуйи Филимондиз ²ва яв хулаь уч шулайи вари хъугърудариз, ккуни чи Апфияиз ва ухъухъди гъуллугънаа аий Архипдиз.

3 Ихъ Адаш Аллагъдихъан ва Агъа Иса Месигъдихъан уж’вал ва мясяляйт ибшричвуз.



Павели саб ляхин тІалаб апIура

⁴Йиз ккарагбариъ уву кІваин апIури, увхъан Аллагъдиз гъам-мишан чухсагъул кІураза, ⁵гъаз гъапиш, узуз Агъа Исаихъна ва варии гирами халкъдихъна вуйи яв хъугъуваликан ва масанваликан ебхури шулзуз. ⁶Учухъди пай апIурайи яв хъугъували, Месигъдихъди учуз айи варии ужубдин увтура гъаври ахъбан бадали ккарагураза.

⁷Яв масанвали узу гизаф шад гъапIну ва ккаарцну, гъаз гъапиш, уву, гъардаш, Аллагъдин халкъдин юкIвар архаин гъапIунва.

⁸Ва гъаддиз, узхъан, Месигъдин вакилихъан, увуз яв буржийр тамам апIин кІури, саб нач-гучI адарди пуз шулушра, ⁹узу увухъна, тІалаб апIури илтIикIуб хъана ужу ву кІури, гъисаб апIураза, фицики узуз уву масанди вузуз. Узу, Павели, Месигъ Исаий гъайнайири ва Гъадгъулантина дустагъ дапIнайири, ¹⁰узуз гъаму дустагъдиль байси гъахъи йиз бай Онисимдихъан тІалаб апIура-завукан. ¹¹Саб фила-вш думу узуз гъич саб ляхниза хай вуйир дайи, хъа гъамус думу гъам увузра, ва гъам узузра хайирлу кас ву. ¹²Думу узу увухъна къяляхъ хътаураза, амма думу узкан ктабтIу йиз пайси вузуз! ¹³Думу гъамушваъ, дустагъдиль узу Ужувлан хабарнан кІуллан итнайишаъ, яв ерина узуз кюмек апIбан бадали, узухъди гъитуз ккундийзуз. ¹⁴Яв разивал дарди, дици апIуз ккун гъабхъундарзуз. Гъит яв ужувлан ляхин яв хушниинди вуйиб ибшири, хъа гуж апIбинди ваъ. ¹⁵Мумкин ву, саб вахтназ думу увухъди дархъуб, хъасин гъаргандиз увухъди хъиди, ¹⁶амма лукIси ваъ, хъа, лукIтан гизаф заина вуйи ккуни гъардашси, иллагъки, узуз ккуни. Думу увузра гъам инсанси, гъамсана Агъайллантина вуйи гъардашси багъа шулу!

¹⁷Гъаддиз, ухъу саб ляхин апIурайиган, увухъна гъафи узу къабул апIруси, думура къабул апIин. ¹⁸Хъа эгер, думу яв улихъ тах-сиркарвш, ясана думу увуз фу-вш буржлуди гъузнаш, думу бурж узук кайи гъисаб апIин. ¹⁹Магъа узу увуз йиз хилариинди бикIураза: «Узу, Павели, яв зарар ккебкуб кІул'ин гъадбгъураза». Гъеле узу, уву узуз буржлу вуйибикан гафкъан кІурира адарза. Уву яв ув'инди йиз улихъ буржлу вува! ²⁰Ав, гъардаш, Агъа бадали гъамус узуз увканра хайир дубхъну ккундузуз. Месигъдиланмина уву йиз гъардаш вуйивализ дилигну, йиз юкIв сикин апIин.



ФИЛИМОНДИЗ 1

²¹ Уву узухъ хъпехъур күури, миж кади, увуз бикүураза. Уву йиз талаб узу ккун апүурайибтап артухъра кади, тамам апіруб аыгъязуз. ²² Мидихъди сабси, узуз хялижувузси, саб халра гъязур апіуб ккун апүураза. Ичв ккарагбарин кюмекниинди Аллагъди узу гъаму багарихъди учвухъна гъаърубдик умуд кайиз.

²³ Увуз саламар хътаура узухъди дустагъдиль айи йиз юлдаш Эпафрасди, думура Месигъ Исайин күуллантина дустагъдиль айир ву. ²⁴ Гъацира саламар хътаура узухъди гъуллугънай айи Маркди, Аристархди, Демасди ва Лукайи. ²⁵ Агъа Иса Месигъдин уж'вал гъарган ичв рюгънахъди ибшри!



ЖУГЬДАРИЗ КАГЪАЗ

Му кагъаз, Исаихъ хъугърудар вушра, гагъ Месигъдихъинди, гагъ жусгъдарин Къанундихъинди штIикIрудариз дубикIнайиб ву. Магъа гъаддиз кагъзъ Къанундин тереф дубиснайидаринна Исаихъ хъугърударин арайиб айи фаркъваликан хъайи-хъайиси ктибтура. Кагъзъ израил халкъдин тариҳдиз Мусайин Къанундиз ва дидин важиблувализ лайчикъ кымат тувра. Дидихъди сабси, кагъзъ Кюгъне Йикъарнан вахтна арайиз гъафи гъядисириб, Аллагъди ният дапIнайиси, аыхю мяна айвал ва улихъими迪 гъязур дапIнайи хабар адмийириз улихъими迪 дебккруб кIваин апIура. Исаихъди му дюн'яиз саб таза хабарра гъафнийи. Израил халкъди Аллагъдиз гъадмукъян гъурбнар апIурушра, мегъел гъич сар адмикъян гунгъарихъан марциди марци апIуз шуладайи. Аммаки Месигъдиз «гъар ийгъан гъурбнар хуб гъазкIа дар. Дугбу, Чав-Учв гъурбан гъапIу вахтна, варидахъанди гъаргандиз саб ражари гъурбан гъапIну» (7:27). Дугбу ухуу асарариз Аллагъдин улихъ ихъ гунгъарикккан азад гъапIунхъу. Рябкюрайиси, му кагъзиинди Исаихъ хъугъдари Месигъдикан вуйи Ужувлан хабар хъугъувалишинди къабул гъапIну. Хъа хъугънайидарин Иса Месигъдик кайи миж сарихъанра ктабтIуз дархъбан бадали, чиб-чириз хил гъачIабккбан бадали ва хъугърударихъди аялакъириб гъузбан бадали, Гираими Рюгъну кагъзъ гагъ-гагънак гъадму Ужувлакан ктибтура. Дураг чин гъар ийгъандин уымриб, чинхъ хъерграйиганра, аyzабар зигуррайиганра, хъугъвалихъан гъудудучIовди, мюгъкамди дийигъну ккунду. Дурагихъан аыхиризкъян Аллагъдиз ккуниб апIури гъузу гизаф жюре игитарииинди дамах апIуз шуйи.



Аллагъ Чан Балин мелзналан улхури гъахъну

1 ¹ Гъушу вахтари гизаф ражари ва гъар жюрейиинди Аллагъ пайгъамбариланмина ихъ абирихъди улхури гъахъну. ² Хъяму ахиримжи вахтари Аллагъ адмийирихъди Чан Балин мелзналан улхури гъахъну. Дугъу Думу вари Чан хилий бисуз Улупнайир ву. Дугъу Гъадгъуланмина вари завар-жилар арайиз гъахъну. ³ Бай – Аллагъдин ад атАбгурайи Нур ву. Думу Аллагъдин аллагъвал ву. Дугъу, Бали, Чан къудратлу гафниинди дюн'я, ккадабхъуз гъидритди, дебкна. Думу, ихъ гунгъар марцц дапИну, аршарий ВаритПанзаанурин арччул хилихъинди деъна.

Иса Месигъ вари малайикартІанна зиина ву

⁴ Малайикарин ахювалтІан Иса Месигъдиз дурубкънайи ахювал фукъян зиина вуш, малайикартІан Думура гъадмукъян зиина ву.

⁵ Аллагъди фуну малайикдиз ваfila гъамци гъапну:

«Узу Йиз Бай вува.

Гъи Узу Яв Адаш гъахъунза»?

Ясана:

«Узу Дугъан Адаш хъидиза,
хъа Думу Йиз Бай хъиди»?

⁶ Чан Сарпир, дюн'яйиль аъри, Аллагъди кІура:

„Гъйт Аллагъдин вари малайикари Мугъаз икрам апІри“.

⁷ Малайикарикан дупна:

„Чан малайикарикан Дугъу микиар апІуру
ва Чан лукІарикан – цІин мелзар“.

⁸ Хъа Дугъу Чан Балкан гъамци кІура:

«Жан Аллагъ! Яв Паччагъвалин тахт
гъаммишандиз вуяв,
гъякъ'вал – Яв Паччагълугъдин
паччагъвалин маргъ вуяв.

⁹ Увуз дюзвал ккун гъабхъунвуз,

хъа нягъякъвал – даккун,
гъаддиз, жан Аллагъ, Яв Аллагъди Уву имбудартІан
заан гъапІну,
кІулкан кдатру ччимси, Учв'ин шадвал улубзну».

¹⁰ Ва, гъамци, Балканра дибикІна:



„Жан Агъа! ВаритІан улихь
Уву дюн’я арайиз хуз бин ккивунва,
гъаци айршарра Яв хиларин ляхин ву.

¹¹ Жилна айршар ккадахъиди, хъа Уву гъаммишан гъуздива.

Дурар, палтарси, йирси духыну, гъюдучивиди.

¹² Ва Уву дурар, сарун лазим дару валжагъси,
дидиржну гъадагъидива.

Хъа, палатси, дурар цІийидарихъди гъодюхида.

Аммаки Уву дигиш Шлур дарва,

ва Яв яшарин аххир айиб дар!“

¹³ Малайикарикан шлиз ва фила гъамци дупна:

„Узу Яв вари душмнар Яв ликарикк духну ккахъайизкъан,
Йиз арччул хилихъинди деъну гъуз?“

¹⁴ Малайикар уърхювал рубкъуз ккайдарин гъайгъушна ѿ хуз
гъальнайи рюгъяр даринхъа?

Иса Месигъди туварий уърхювал варитІан зина ву

2 ¹Магъа гъаддиз, дюз рякъ’ан ададахъбан бадали, ухъуз гъееб-
хъубдиз варитІан уччвуйи фикир тувну ккунду. ²Уҳди ма-
лайикариланмина тувнайи Аллагъдин Гафнаъ къувват аии ва
гъарсаб дюз дарувализ ва хъпебехъувализ гъилигу жазара гъа-
дабтІүйи. ³Хъа гъамус, зурба уърхювал къабул дарапІиш, гъадабтІ-
ру жазайиккан ухъхъан сарун фици гъергуз хъибди? Чав Агъайи
сифте му уърхювал ухъуз дебккну, му Гъадгъукаан гъеебхъдари
тасдикъ гъапІунчуз. ⁴Агъа Исаин Хабар гъякъ вуйивал Аллагъ-
ди айжайиб лишнариинди, айламатариинди, гъар жюреди ачмиш
шлу къудратниинди ва Чан ниятниинди Чаз ккунириз тувру Ги-
рами Рюгънан багъишар гъаъбиинди тасдикъ гъапІну.

*Ухъу уърхбан бадали,
Иса Месигъ адмийиз илтІикІну*

⁵ Учу кІурайи гъамус цІийиди арайиз гъюру дюн’я Аллагъ-
ди малайикарин хилиъ иврадар. ⁶Хъа сари наан-вуш тасдикъ
гъапІну:

„Адми гъапІрур ву, Уву дугъхъан гъадмукаан юкІв убгуз?

Инсандин бай гъапІрур ву,

Уву дугъан гъадмукаан гъайгъушна ѿ хуз?



⁷ Уву думу малайикартІан цІиб вахтнастІан
исинди дерккундарва.

Уву дугъаз аднан ва гьюрматнан таж тувунва.

⁸ Вари Уву дугъан ликарикк, дубхну, дипунва!“

Аллагъди инсандиз вари мютІюгъ гъапІну. Дугъаз мютІюгъ даруб Аллагъди фукІара гъибтундар. Гъелелиг инсандиз вари мютІюгъ дапІну рябкъюрадархъуз. ⁹ Ухъуз Иса сацІиб вахтназ малайикартІан исинади Дерккур гъамус адлуди ва гьюрматлуди рякъюрахъуз, гъаз гъапиш айжалликк ккахъур Гъадму ву. Фицики Аллагъди ухъуз уж’вал дебккбан бадали, гъарсарин айжалнахъанди Думу Учв айжализ гъушну.

¹⁰ Гъаци дубхънура ккундий. Аллагъдиз Чан Рюгънахъди гъягъ-
ру гизаф веледар адлу духьну ккундий. Дюн’яйиъ айиб вари Аллагъ бадали ву ва дюн’яйиъ шулайибра вари Аллагъдилантина шулайиб ву. Хъа дураг адлу апІуз Аллагъди Иса гъязур апІуру. Дугъу Дугъкан, гизаф веледар уърхбан бадали, гъацдар айзаба-
риантина духну ГъуркІур гъапІну. ¹¹ Адмийир гирами АпІуриза-
ра, гирами шулайидаризра – варидаиз сар Айршарин Адаш а.
Гъаддиз Исайиз, дураг Чан гъардшар вуйиз пуз, начди дар. ¹² Ду-
гъу кІура:

«Ииз гъардшариз Яв ччвур улупидиза
ва вари хъугърударин арайиъ Яв адназ
мяльийир апІидиза».

¹³ Дугъу кІура:

«Узу Гъадгъак миж кади хъидиза».

Ва хъана:

«Магъа Узу ва Аллагъди Узуз туву веледар».

¹⁴ Хъа веледар йиккканнын ифдиканнан духънайидар вуйиган, Ду-
гъу Чахъра гъациб беден хъивну. Дугъу дици, Чан айжалниин-
ди айжалин зинн гъюкум или иблисдихъан гъюкум бисузди,
¹⁵ вари чпин уымриъ айжалин улихъ гучІури лукІарди дугъуж-
найидар азад апІузди гъапІну. ¹⁶ Рябкъюрайиси, Дугъу кюмек
малайикализ апІурадар, хъа – Ибрагимдин наслариз. ¹⁷ Гъад-
диз Месигъ, Учв халкъарин гунгъарихъанди ккахъбан бадали, ва-
ри терефарихъанди, Чан гъардшар фицдар вуш, гъацдарсир духь-
ну ккундий. Гъацир хъуб’инди Дугъкан уж’вал ккуни ва дугъ-
риди Аллагъдин гъуллугънаъ шлу заан Гъуллугъчи ктучІвний.



¹⁸ Вари Чайн алахъу ахтармишнан аьзиятариан Думу удучІвну. Гъамус Дугъхъан ахтармишнан аьзиятнаккан гъарсариз кюмек алІуз шулу.

Иса Месигъ МусатІанра зина ву

3 ¹ Гирами гъардшар, учвузы Аллагъди дих дапІна. Гъаддиз учу хъугърайибдин ва ктибурайибдин заан Гъуллугъчи – Аллагъди гъаънайи Исаиз лигай. ² Аллагъди Чан гъуллугънья хъуб Гъадгъан ихтиярназ тувну. Дугъу думу Гъуллугъ, чан вахтна Мусайи чан хилиз тувнайи Аллагъдин халкъдин зин фици гъуллугъ гъабхуйиш, гъациб хъуркъувалиинди күлиз адабгъура. ³ Аммаки Муса пайгъамбартІан Иса, хуларизтІан хулар диврайи устайиз артухъ гъюмат алІруси, заан адлувализ артухъ лайикъ гъаънну. ⁴ Гъарсар хулариз чан уста айиб ву, хъа Аллагъ варибдин Уста ву. ⁵ Мусайи Аллагъдин вари халкъдин гъуллугъниин дугъриди ляхин алІури гъаънну, ва дугъан думу гъуллугъну саб фила-вуш хабар дебккуз ккайибдикан улупури гъабхъну. ⁶ Хъа Месигъди, дугъри Балиси, Аллагъдин вари Хул’ин ахювал гъабхура. Ари гъадму Дугъан Хал, эгер ухъу ахиризкъан ухъу тяриф алІурайибдиз күбанди ва гъаддик миж кади гъузиш, ухъу вухъа.

«Дурар Узу рягъятвал туврушваъ учІвидар»

- ⁷ Гъаддиз Гирами Рюгъну күурайиси:
«Гыи, эгер учвуз Дугъан дих ебхураш,
- ⁸ учву ичИи чюлий читинвалар алахъган,
гъалабулугъ гъитІбккруганси,
ичв юкІвар мючІоркъянай.
- ⁹ Душвариъ ичв абири
гъеле дурагиз 40 йисан арайиль Йиз ляхнар гъяркънушра,
Узу ахтармиш алІуий ва дюз вуш-дарш лигүйи.
- ¹⁰ Гъаддиз Узуз думу насликан хъял гъафунзуз ва гъапунза:
дурагин юкІвар гъаммишан улдугура,
дурагиз Йиз рякъяр аygъдар.
- ¹¹ Гъаддиз, Узук хъял кмиди, гъамци ху гъапІунза:
дураг, чпиз Узу рягъятвал туврушваъ учІвидар».
- ¹² Гъардшар, ичв саринкъан юкІв пис дарслуси, вафалуди гъуз-
руси, чиви Аллагъдихъан гъидидицруси, ихтият йихъай. ¹³ Гъар



ийгъан, гунгьи чахъинди дизригуз ва учвкан фужкIа дючIоркъ-ну гъидритуз, гъадму «гъи» гафну ухъуз сабан дих апIури имидикъан гагъди, чиб-чпик юкIв капIри гъузай.¹⁴ Эгер сифте кIулариз ухъуз айисиб ихь ижми хъугъувал ухъу аыхиризкъан гъюбхиш, Месигъдиз аий варибидикан ухъузра пай хъибдихъуз.

¹⁵ Мидкан гъамци дупна:

«Гъи, эгер учвуз Дугъан дих ебхураш,
учву гъалабулугъ гъитIибккруганси,
ичв юкIвар мючIоркъяний».

¹⁶ Дих деебхъну, гъалабулугъ гъитIибккдар фужар вуди гъахъну? Дураг Мусайи Египетдиан адау вари дайнхъя?¹⁷ ЯгъчIур йи-сандин арайиъ Аллагъдиз фужарикан хъял гъюй? Дураг гунағь апIрудар ва чпин жанар ичIи чюлиъ дийихну дахъдар дайнхъя?¹⁸ Аллагъди, рягъятвал туврушваъ учIвидарчва кIури, фужариз ху гъапIну? Чахъ хъпебехърудариз дайнин?¹⁹ Ари ухъуз, чпин хътргъ-рувализ дилигну, дураг душваъ учIвуз дархъувал рабкьюрахъуз.

Аллагъди рягъятвалин ишиш Чан халкъдиз тувди

4 ¹Сабан къан дубхънадар, ва Аллагъди тувнайи гаф – рягъятвал туврушваъ учIвуз шлувал – къувватнаъ ими, гъадму рягъятвал дурубкъди гъудрузбан бадали, гъачай гизаф дикъатлуди гъузурхъя.² Ухъузра, гъадму гъалабулугъ гъитIибккрударизси, рягъятвалин Ужувлан хабар ктибтнийи, хъа думу Хабарнакан дурагиз хайир гъабхъундар, гъаз гъапиш дураги думу хъугъувалиинди къабул гъапIундар.³ Хъа ухъу, гъадму Хабарнахъ хъугъдар, Дугъу рягъятвал туврушваъ учIврахъа. Хъа хътргърударикан Аллагъди гъапну:

«Гъаддиз Узук хъял кмиди гъамци ху гъапIунза:
дураг чпиз Узу рягъятвал туврушваъ учIвидар».

Дугъу мици, гъеле Чан ляхин дюн'я арайиз хайиз ккудубкIину айивализ дилигди, гъапнийи.⁴ Жара ишишваъ Дугъу ургудпи ийгъ-кан гъамци дупна: «Ургуд гъапи ийгъан Аллагъ, Чан вари ляхнар ккудукIину, саламат гъахънийи».⁵ Аммаки зиихъ: «Дураг чпиз Узу рягъятвал туврушваъ учIвидар» – дупнайи гафар кIваинди гъитай.

⁶ Гъамусра Дугъу рягъятвал туврушваъ альрувалин гаф къувватнаъ ими. Хъа Ужувлан хабар ухди деебхънайдарихъан, чпин хъпебехъувализ лигну, душваъ учIвуз дархъиган,⁷ Аллагъди, ичIи



чюлий гъахь гъядисийирихъан лап къанди, хъана саб йигъ улупну – «Гъи». Дидкан, зиихъ гъапиганси, Давуд паччагъдиланмина хабар дебккна:

«Гъи, эгер учвуз Дугъан дих ебхураш,
ичв юкІвар мючІюркъяний».

⁸Эгер мушваъ дурагиз Ешуайи туvu рягъятвалин йишвкан, яни Ханаандин жиликан улхури айиш, сарун Аллагъ дидин къялхъян саб жара йигъкан улхидай. ⁹Гъаддиз Аллагъдин халкъдиз рягъятвал гъамус рябкъюз ккимбуз ву. ¹⁰Аллагъди рягъятвал туврүшваъ учІвури, Аллагъди Чан ляхнарихъан фици рягъятвал гъадабгъураш, гъаци рягъятвал гъадабгъиди. ¹¹Гъаддиз гъадрарси, чипин хъпебехърувалилантина фужкІа алладакбан бадали ва гъадму рягъятвал туврушваъ учІвбан бадали, ухъ'ан удукъруб вари алПидихъа.

¹²Фицики Аллагъдин гаф яшамиш шула ва либхура. Думу гаф кьюбиб мурзарра учІру дапІнайи ханжалтІан учІруб ву. Думу гаф, ихъ инсанвалин варитІан деринариз: юкІвна рюгъ, йиккна кІураб жара шлушвариз ва кІурбарин мааризкъан гъябгъору. Гъадму Гафну фикраринна кІван хияларин суд апІуру. ¹³Халкъ дапІнайи вари дюн'яйиль Аллагъдин улихъ гытІбкІнайиб гыч фукІара адар. Дугъан улихъ вари ачуҳъди ву. Дугъан улариз вари рябкъору. Ари Гъадгъан улихъ ухъу жавабра тувдихъа.

Иса Месигъ – Аллагъдин заан Гъуллугъчи ву

¹⁴Ухъухъ зурба вуйи Аллагъдин заан Гъуллугъчи хъахъухъ – а yrшириз Гъушур. Думу – Аллагъдин Бай, Иса ву. Гъаддиз гъачай, хъугъну, учу ктибурайи гъякъ'валихъан ижмиди хъичІихну гъуздихъа. ¹⁵Ихъ заан Гъуллугъчи ихъ камиваларин гъаврий адрахърударикан дар. Думура, ухъуси, гунгъари ктарди, вари аyzаб-аyzиятари Ахъур ву. ¹⁶Гъаддиз ухъхъан, саб гучI адарди, ухъуз рягъим апІуз ва лазим вахтназ кюмек бадали ухъуз уж'вал тувуз, Ужувлан тахтнахъна гъюз шулухъхъан.

5 ¹Фицики Аллагъдин гъуллугънаъ шлу гъарсар заан гъуллугъчи адмийирин арайиан ктагъури гъахъну. Дугъу, Аллагъдин улихъ адмийирихъан дугъужкуз шлуси, дурагин гунгъарихъанди Аллагъдиз багъишар хури, мал-марччин гъурбнар апІури гъахъну.



² Гъацир гъуллугъчи чпин аygъдрувалиан улдугнайидарин гъаврий ади духьну ккундийи, гъаз гъапиш чавра чан тямягъярикк ккахънайир ву. ³ Гъамци вуйивализ дилигнү, дугъу чан ва вари халкъдин гунгъарихъанди гъурбнар дапIну ккундийи.

⁴ Мициб гъуллугънаа учIувад адмийихъан чахъан бисуз шлуб дар. Дугъаз, чан вахтна Гъарундиз дих гъапIганси, Аллагъди дих дапIну ккунду. ⁵ Ари Месигъдира, заан Гъуллугъчи хъуб’инди Чав Учв адлу гъапIундар, хъа Аллагъди Дугъаз гъамци гъапну:

«Уву Йиз Бай вува.

Гъи Узу Яв Адаш гъахъунза».

⁶ Дугъу жара йишваъра кIура:

„Уву гъаммишандиз Аллагъдин Гъуллугъчи,

Мелхиседексир Гъуллугъчи вува“.

⁷ Учв жилиин али вахтна Исаий гъарай ипну, нивгъарииндиги Учв аյжаликкан Уърхуриз ккарагнү ва Аллагъдин улихъ улупу зурба гъюрматназ дилигнү, Дугъаз думу гъеебхъну. ⁸ Гъеле Думу Дугъан Бай вуйишра, Дугъаз Чайн алахъу аyzабарилантинагъа хъпехъувалин кымат аygъю гъабхъну. ⁹ Дугъкан, ГъуркIур духьну, Чахъ хъпехърудариз варидализ гъаммишандин уърхювал тувру Булагъ гъахъну. ¹⁰ Аллагъди Дугъаз, Мелхиседекдиз ухшар аийзаан Гъуллугъчи вува, гъапну.

«Учуу Аллагъдин гъии гафарин читинди гъаври ахъурчва»

¹¹ Мидкан хъана гизаф пуз хъибдийчухъан, хъа учву гъапибин читинди гъаври ахъурчва, хъпехъдарчва. ¹² Учву хъугърудар гъахъихъанмина гъубшу вахт гъисабназ гъадабгъуруш, гъамусдиз учвакан мялимар ктучIувад ву, хъа рябкьюрайиси, Аллагъдин лап гъии гафарин гъаврий тауз учвуз мялимар лазим шула. Учвуз сабан ижми хураг варь, хъа никк ккунди ими. ¹³ Хъа никк убхърур, гъякъваликан цИлбIан аygъдру тазади бабкан духьнайи бицIир гъисаб ву. ¹⁴ Ижми хураг ахъудариз ву. Чпин тажруба аийвализ дилигнү, дурарихъан ужубна харжиб жара апIуз шулу.

6 ¹⁻² Гъаддиз гъачай, Месигъдикан вуйи аygъюваларин бинайиланзина яшназ дуфнайидариз вуйи аygъювалариина улду-Чивидихъа. Ухъу гъамус хъана айжалихъна гъахру гунгъар гардандиз дисуваликан, Аллагъдихъ хъугъну ккуниваликан, штуан



хуваликан, хилар иливбакан, гъач¹идар ч²иви хуваликан ва гъаргандин Суддикан вуйи аыгьюваларин бин хъана ккивуз хъю-гъидархъя. ³Хъа, Аллагъди гъитиш, улихъ гъягъидихъя.

⁴ Гъаз гъапиш саб раЖари Аллагъди аыгьювалар тувдар, заварин багьишдик т⁵яльм кап⁶идар, вари хъугърудариси, Гирами Рюгъ къабул гъап⁷идар, ⁵Аллагъдин гъяни гафнакан т⁸яльм гъаб-хъидар, гъоз ккимбу аысрин къувватнакан хабар айидар ⁶хъугъу-валихъан гъудуч⁹иши, дураг¹⁰ хъана гунгъар гардандиль дисбиинд¹¹ таза алауз шлуб дар, гъаз гъапиш дураги чиб-чпинди Аллагъдин Бай, Думу вари эллерин айибнакк ккитри, хачрак карсра.

⁷ Гагъ-гагънак чаина убгъурайи мархъ зибгру жили учв тартиб ал¹²руриз ужуб бегъер тувру, дугъаз думу Аллагъди дебккнайи уж¹³-вал ву, ⁸хъа варжина заз али хут¹⁴ил фук¹⁵ла дар. Дииз бала гъя-дябхъюр ва, аыхирки, думу убгиidi.

⁹ Аммаки йиз ккунидар, учу гъаци к¹⁶урашра, учву ужуб гъял-на¹⁷ на айивалик ва урхювалихъан хъич¹⁸ихнайивалик умуд кайич.

¹⁰ Аллагъ дюз дарур хъуб гъич мумкин дар. Дугъаз я учву ал¹⁹ура-йи жафайир, я Чан гирами халкъдин гъуллугъна²⁰ хъуб²¹инди улу-пу ва улупурайи Чахъна вуйи ичв ккунивал к²²ваълан гъархидар.

¹¹ Учуз ккунди айиб, учван гъарсар ичв к²³ван метлебар бадали, аыхиризкъан гъяракатна²⁴ хъуб вуйич. ¹² Учуз учву т²⁵агъру дап²⁶ину ва²⁷, хъа жувван хъугъувалиндинда аыг²⁸ ал²⁹иинди Аллагъди тув-найи ирс рубкърударси учвура духъну ккундучуз.

Аллагъди Чав туву гаф тамам дарап³⁰иди гъибтдар.

¹³ Аллагъди Ибрагымдиз гаф тувруган, Чав Чайнди ху гъап³¹-ну, фицики ху ал³²уз ужур сарун Учв³³тан зиниа вуйир адайи.

¹⁴ Дугъу гъапну:

„Гъап³⁴нурга Узу увуз уж³⁵вал улупидиза ва Узу увуз
гизафна-гизаф наслар тувдизавуз“.

¹⁵ Сабурлуди ккилигүри гъахъи Ибрагымдиз дугъриданра гаф тувнайиси гъабхънийи.

¹⁶ Адмийири чпит³⁶тан фтиинди-вуш зина ва багъа вуйириинди ху ал³⁷ури шулу. Ху ал³⁸увал, гъапиб дюз ву к³⁹ури, тасдикъ ал⁴⁰уб ву, ва диди гъарсаб гъюжат дебккру. ¹⁷ Гъаци Аллагъдира, Чан ния-тар гъюдюхрудар дариз, к⁴¹ури, Чав гаф тувуриз ачуҳъди улупуз ккунди айиган, Чан гаф ху ал⁴²иинди мюгъкам гъап⁴³ину. ¹⁸ Ва



гъаму къоб гъюдюхру мутму – гаф тувувална ху апIувал – Аллагъдин мурап кучIал кайдар дар, ухъуз, чара абури, улубкъру ихь умуднахъан хъичIихнайидариз, мюгъкамди юкIв капIувал вухъуз.¹⁹ Му умуд, ихь кIваз хатIасувзат хурайи ижми бин вухъуз. Миди ухъуз, чарчликк ккайи Гирамишван айтIинди учIувуз ихтияр туврахъуз.²⁰ Ари гъадушвазди, Мелхиседекдиз ухшар ади, гъаммишандиз заан Гъуллугъчи духьну, ихь улихъди гъафи Иса учIвну.

Аллагъдин гъуллугъчи – Мелхиседек

7¹ Гъадму Мелхиседек Салим шагърин паччагъ вуйи ва Вари-
тланзаану Аллагъдин гъуллугъчи вуйи. Дугъаз, дявийр дапI-
ну, пачгъариин гъалиб духьну гъюрайи Ибрагым алахънийи ва
Мелхиседекди дугъаз Аллагъдин ужувлакк ккахъриву, гъапнийи.
² Чахъ хъайи варибикан Ибрагымди дугъаз йицIубпи пай тув-
нийи. Сабпи дугъан „Мелхиседек“ кIуру ччвур „гъякъвалин па-
ччагъ“ кIуру гаф ву. Хъа дугъан „Салимдин паччагъ“ кIури
хъибшнайи ччвур „мясляльтнан вая архаинвалин паччагъ“ кIуру
гаф ву.³ Дугъан адашдикан я дадайикан, дугъан ата-бабийрикан,
я дугъан уьмур фици ккебгънуш ва ккудубкIнуш мялум дар, хъа
дumu Аллагъдин Бализ ухшарди гъаммишандиз Аллагъдин гъул-
лугъчиidi гъузра.

⁴ Лигай, думу фукъан зурба кас гъахънуш. Гъеле ихь абиирин
аба Ибрагымдира кмиди дугъаз дявдий чав гъибису девлетнакан
йицIубпи пай тувнийи!⁵ Къанундин бинайиин алди, Левийин
насларикин Аллагъдин гъуллугъналь гъахъидари чпин гъардшари-
ланра кмиди хайирнан йицIубпи пай, гъеле мураппа, гъатрарпа
Ибрагымдин наслар вуйишра, бисийи.⁶ Хъа Мелхиседекди, учв
Левийин тухмиан даршра, Ибрагымдихъан йицIубпи пай къа-
бул гъапIнийи. Дугъу Мелхиседекдиз пай тувайиз улихъна, Ал-
лагъди Ибрагымдиз уж’вал апIуз гаф тувнайишра, Мелхиседекди
дугъаз Аллагъдин ужувлакк ккахъриву, гъапнийи.⁷ Исина вуйи-
ри, Аллагъдин ужувлакк ккахъриву, кIуру гафар, зина вуйири-
хъан къабул апIури. Му дигиш шлу мутму дар.⁸ Хилиз гъюру ха-
йирнан йицIубпи пай, аьдат вуйиганси, аьжал хъайи адмийири
къабул апIури шулу, хъа Мелхиседек Чивиди а, кIури, шагыидвал
дапIна.⁹ Пуз шулу, чав, йицIубпи пай къабул апIурайи Левийира



кмиди Ибрагымдиантина Мелхиседекдиз йицIубпи пай тувну,
¹⁰фици гъапиш, Мелхиседекдиз Ибрагым алахъган, мегъел баб-
кан духьну адру Левий Ибрагымдиль тумси ади гъахьну.

Иса Месигъ – Мелхиседекдиз ухшар Аллагъдин Гъуллугъчи ву

¹¹ Эгер Аллагъдин метлеб, халкъдиз тувнайи Къанундин бина
вуйи Левитарин гъуллугъниинди кIулиз удубчIвуйиш, Гъарун-
диз ухшар адру, Мелхиседекдиз ухшар айи жара гъуллугъчи гъаз
лазим вуйи? ¹² Аллагъдин гъуллугъчивал гъюдохруган, дидихъди
Къанунра гъюдохюрайиб ву. ¹³ Гъаму раЖари ихъ ушвнийн или
Иса, гъурбнар ургрушва зат гъуллугъниин дархъи жара тухми-
кан ву. ¹⁴ Ихъ Агъя Ягъудайин тухмиан вуйиб аygъахъуз, хъя Му-
сайилантина тувнайи Аллагъдин Къанундиль гъадму тухмиан ву-
ий гъуллугъчирикан гъич фукIара дупнадар. ¹⁵ Мелхиседекдиз
ухшар жара Аллагъдин гъуллугъчи арайиз удучIвнайиган, гъаци
вуйиб ухъуз ачухъди рябкъюрахъуз. ¹⁶ Думу, Аллагъдин гъуллугъ-
чиidi саб кадагънайи тухмикан Къанунди дерккнайир дар, хъя
гъаргандин уьмрий айи къувватну Дерккнайир ву. ¹⁷ Дугъкан
гъамци дупна:

„Уву гъаммишандиз Аллагъдин Гъуллугъчи,
Мелхиседекдиз ухшар Гъуллугъчи вува“.

¹⁸ Мугагъназ айи къайда ккутIана, фицики сарун дидин къувват
гъудубгну ва дидкан имбу мянфяайт имдар. ¹⁹ Къанунди фукIара
гъубкIуб арайиз гъабхиб адар. ДумутIан ужуб умуд тувна. Диidi
ухъу Аллагъдихъна багахъ апIура.

²⁰ Диidi гъякънаан Аллагъдира ху дапIана. Имбу гъуллугъчиир
Аллагъдин гъуллугънаа гъич саб ху апIувал адарди гъахънийи,
²¹ хъя Месигъ Чакан гъамци Гъапири ху апIбиинди Аллагъдин
Гъуллугъчи гъахъну:

«Ху гъапIну Агъайи ва Чан ху къяляхъ апIидар:
Уву вува гъаргандиз вуйи Аллагъдин гъуллугъчи».

²² Гъадму ху апIувализ дилигну, Иса мугагъназ айидартIан лап
ужуб Йикърар кIулиз адагъуз Чайна гъидису Агъя ву. ²³ Думу-
гандин гъуллугъчиир гизаф вуйи, аյжали дурарихъ чпин гъул-
лугъ кIулиз адабгъуз гъитдайи, ²⁴ хъя Иса, гъаммишан яшамиш
Шулайир ву ва Дугъан Аллагъдин гъуллугъра гъаммишандиз ву.



²⁵ Гъаддиз Дугъ’ан, Чан кюмекниинди Аллагъдихъна гъюрудар гъуркІну уърхуз удукуруу. Думу Гъаммишанур ву ва Дугъу гъарган дурарихъанди гафра йивура.

²⁶ Ари гъамци гирами, гъич саб тахсир ктру, марцци, гунагъ-крагиккан асиллу дару ва айршартІанна заан вуйи заан Гъуллугъчи ухъуз лазимра вухъуз. ²⁷ Дугъан, жара гъуллугъчиринси, сифте чпин, хъа вари халкъдин гунгъарихъанди гъар йигъан гъурбнар хуб гъазкІа дар. Дугъу, Чав Учв, гъурбан гъапІу вахтна варидарихъанди гъаргандиз саб ражари гъурбан гъапІну. ²⁸ Гъуллугъчирди Къанунди гъудуркІу айдати адмийир деркк-ри гъахъну, хъа Къанун дебккбалан къяляхъ, ху дапІнайивализ дилигну, заан Гъуллугъчиidi Бай дерккну. Думу гъаргандиз Гъур-кIур ву.

Ухъу бадали дерккнайи Аллагъдин заан Гъуллугъчи

8 ¹ Учу учвуз кIурайибдин варитІан кIулинуб – айршарий айи Вариудукърурин тахтнан арччул терефнахъинди хъайи заан Гъуллугъчи ухъуз ахъуз. ² Думу адмийири ваъ, хъа Аллагъди дивнайи гирами йишваа ва гъякъ гирами Чадрий гъуллугъ АпІу-райир ву.

³ Гъарсар заан гъуллугъчи гъурбнар ва багъишар хуз дупну дерккрайир ву, гъаддиз ихъ заан Гъуллугъчийизра саб фу-вш гъурбан апІуз шлуб ади ккундийи. ⁴ Эгер Думу гъаму ражари гъаму дюон’яйин алийиш, Дугъкан гъуллугъчикъан дуихъну адархъидий, гъаз гъапиш Къанундин бинайиин алди гъурбнар хр гъуллугъчир ади хъидийи. ⁵ Дурари, айршариндиз ухшар айи ва гъаддин сиринтІан дару гирами йишв’ин гъуллугъ апІура. Гъаз гъапиш гирами Чадур апІайиз улихъна Мусайиз гъапнийи: «Лиг, – гъапнийи Аллагъди, – увуз дагъдииин улупубдинси, вари дюздзи апІин». ⁶ Хъа гъаму ражари Месигъдиина, жилиин гъуллугънаа гъахъидариина аманат гъапІу гъуллугътІан лап артухъ Гъуллугъ аманат дапІна, фицики мугагъназдинтІан ужудар шартІар айи Аллагъдинна адмийин арайиль гъийитІу мугагъназдинтІан ужудар гирами Йикърар Гъадгъулантинана ву.

⁷ Эгер сифтейин Гирами Йикърарик камивал ктайиш, кьюбпи ражари Йикърар йитІуб гъазкІа дайи. ⁸ Хъа Аллагъди, инсанариз тягъна йивури, кIура:



„Узу, – кIура Агъайи, – Израилин ва Ягъудайин хулахъди цийи Йикърар йитIру вахт багахъ шула.

- 9 Думу Йикърар Узу чпин абирихъди,
Узу дурарин хилхъян дибисну,
Египетдиан адаъган гъийитIу йикърарстар хьидар,
гъаз гъапиш Узухъди гъийитIу Йикърар дурари
тамам дараpIган,
- 10 Узура дурарихъян гъидицунза, – кIура Агъайи. –
Гъаддиз, Узу гъамус йитIуз ккайи Йикърар
Израилин хулахъди йитIидиза, – кIура Агъайи, –
Йиз къайдийир дурарин фагъмиъ тIаъдиза ва
дуралин юкIварик дикIидиза.
- 11 Узу хьидиза дурагиз Аллагъ, хъа дураг Йиз халкъди хьиди.
Сар-сариз аygъювалар улупуб гъубзри хьибдар,
я гъардши чан гъардши:
«Гъаммишанур аygъю апIин» кIури,
аygъювалар улупуб лазим вуди гъубзида,
гъаз гъапиш, бицIирилан гъадабгъну, ахюриинакъян,
варидариз Узу аygъяди хьиди.
- 12 Фицики Узу дуралин чIуруваларилан хил алдабгъидиза,
я дуралин гунгъар кIваин алаидарза“.
- 13 Дугъу гъаму Гирами Йикърарназ „Цийиб“ гъапну, ва гъад-
динди сабпи Йикърар йирси хувал улупура. Хъа йирси гъаб-
хъиб ва лазимди имдроб жвартI хьибди.

Сабпи Йикърарналь Аллагъдиз фици икрам апIуруши

9 ¹ Сабпи Йикърарналь Аллагъдиз фици икрам апIуруши ва жи-
лиин гирами йишив фунуб вуш, улупна. ² Гирами Чадур гъапI-
ний. Душван сабпи хулаъ акв апIру алат ва Гъаммишанурин
улихъ дивру улер али устул дивнайи – му йишиваз „Гирамишв“
кIуйи. ³ Кьюбпи хал сабпибихъян чарчнахъди гъадабIнайи ва
душваз „Лап Гирамишв“ кIуйи. ⁴ Душваъ, ицци ниар хъайи ччи-
мар ургу гъабсиб гъизилин саб алат ва варишварихъанди гъи-
зилихъди дабалгнайи Гирами Йикърарнан сундух айи. Сундхиъ,
манна ади, гъизилин гъаб, кюкю адабшвуз кьюкъяр гъапIу Гъа-
рундин маргъ ва Гирами Йикърар кайи гъвандин шибар айи.
⁵ Сундхин зиин гъаравларди дапIнайи хлинццар кайидар алийи.



Дураг адлувал улупурайидар ву. Дурагин хлинццар сундхин гъапагъ вуйибси „хил алдабгърушв“ кІурайишв’ин гъатІарцнайи. Хъа сабан ухъу дидкан вари хъайи-хъайиси пидархъя.

⁶ Гъамци ккабалгну дебкку вахтарихъанмина Аллагъдин гъул-лугъчийр гагъ-гагънак гирами Чадрин сабпи хулаъ чпин гъуллугъ тамам апІуз учІври гъахъну. ⁷Хъа къубпи хулаъ заан гъуллугъчи-йизтІан учІвуз ихтияр адарди гъабхъну, думура йисан саб ража-ри, чан ва вари халкъдин терефнаан, чпин аygъдрувализ дилиг-ну деетру гунгъарихъанди вуйи ифира хъади. ⁸Гъамци вуйиган, Гирами Рюгъну сабан гъадму гирами Чадур имидикъан гагъди „Лап Гирамишвазди“ учІврушв ачмишди даруб улупура. ⁹Гъам-дий а гъамусдин вахтназра кайи мисал: багъишиарихъанна гъурб-нарихъан Аллагъдиз икрам апІурайирин намус-гъир’ят марцц апІуз шлуб дар. ¹⁰Думу къайдийр ипІурблизна убхърубдиз ва жара жюреин жикІбан аьдатариztІан кайидар дар. Мураг, цИ-и къайда дебккайиз къувватналь гъузнайи, зильан апІурайи аьда-тартІан дар.

Цийи Йикъараринди Аллагъдин гъуллугънаъ фици шулуш

¹¹ Гъаму ражари ухъуз айи ужувларин заан Гъуллугъчи, Месигъ, инсанарин хилари дарапІу, гъадмугандиз айбитІан лап за-ан ва тамам вуйи Чадриан, яни гъаму дюн’яйин дарубдиантана удучІвну. ¹²Думу душваъ къунаринна кІарарин ифи хъади, учІв-надар; Думу, адмийириин гунгъарилан хил алдабгъувал гъазан-миш дапІну, „Лап Гирамишвъ“ саб ражари ва гъаммишандиз Чан ифи хъади учІвну. ¹³Эгер къунаринна жердарин ифи кибч-руган ва жигъил хюни дубгну, дидкан гъабхъи рюкъ кабхърган, чиркинвалари кацІайидар гъацдар аьдатариинди марцц гъахъи гъисаб апІуйиш, ¹⁴хъа Месигъдин Ифди фукъан ужуди марцц апІур?! Гъаммишандин Рюгънан кюмекниинди Дугъу Аллагъдиз Учв гъич саб тахсир ктру гъурбан вуди тувну. Ва Дугъан Ифди, ухъу чИви Аллагъдиз икрам апІурдар хъузди, аյжалихъна гъахру ляхнарихъан ихъ намус-гъир’ят марцц апІур!

¹⁵ Ари гъаддиз Месигъдилантана Цийи Йикъар, дих дапІна-йидариз тувнайи гафниинди гъаммишандиз вуйи ирс рубкъ-бан бадали, гъийитІну. Дурагиз думу ирс, гъеле сабпи Йикъар



кувватнаь имидитІан гъапІу чпин гунгъарилантина рубкьру аյжалхъанди Исайи Учв айжализ тувиган, гъурубкьуб ву.

¹⁶ Эгер адмийи фукІа дапІнаш, васият гъапІу адми гъакІиган-Іан думу васият чан кувватнаь абхъидар. ¹⁷ Васият дапІнайир Чивиди имбукъан гагъди, дугъан васият кувват хъайиб дар. Васият кувватнаь, васият гъапІур гъакІиган, учівра. ¹⁸ Гъаци сабпи Йикърара, ифи удуубзъан гагъди. кувватнаь учіври гъабхъундар.

¹⁹ Гъадмуган Мусайи халкъдиз Къанундиль айи табшуругъари-кан ктиббалан къяляхъ, штук кибиқнайи кІаараринна къуна-рин ифи, элвен хъана иссоп гъарин кюл гъадбгъну, Къанундин китабдикна вари халкъдик кибчу. ²⁰ Ва кІуру: „Гирами Йикърар худнаь ирчрайи му ифи, Аллагъди ичв улихъ, учву гъамци апІ-бан бадали, дебкрайи айат ву“. ²¹ Дугъу гъацира гирами Чад-рик ва душваль айи Аллагъдин гъуллугъназ ишлетмиш апІру вари алатарик ифи кибчнийи. ²² Къанунди вари ифдиҳъди марцц апІуб Талаб апІура ва, ифи удуубзди, хил алдабгъуб айиб дар.

²³ Аyrшинубдиз ухшар ади дапІнайи вари жилинуб гъамциб жюрейинди марцц дапІну ккундийи, хъа аyrшинуб гъам-рартІан лап ужубсиб гъурнихъдитІан марцц дапІну хай шулдар.

²⁴ Гъаддиз Месигъ, инсанарин хилариинди дапІнайи ва гъякъ ги-рами Чадрин сиrintІан дару жилин Чадриъ учІвнадар, ваъ, Думу, Аллагъдин улихъ ухъхъанди гаф кІури, гъадму аyrшарий учІвна. ²⁵ Думу аyrшарий, гъар йисан гъайванатарин ифи хъади „Лап Гирамишваль“ учІврайи Аллагъдин заан гъуллугъчиси, гагъ-гагънак Учв гъурбан апІуз кІури, учІвнадар. ²⁶ Гъамциб айатнахъди Месигъра гъушнийиш, Дугъаз дюн'я арайиз гъабхи-хъанмина швнубсаб раЖари аyzбариkk ккуркьуб алабхъидий. Хъа Думу, Учв гъурбан дапІну саб раЖари ва гъаммишандиз гун-гъихъди вуйиб ккудубкІан бадали, вахтарин аыхирихъна гъам-мишандиз кІури саб раЖари гъафну. ²⁷ Фици гъарсар касдиз, саб раЖари дукІну, Суддин улихъ дугъужвуб алабхъуруш, ²⁸ гъаци Месигъра, гизаф инсанарин гунгъарихъанди, саб раЖари гъур-бан гъахъну, ва Думу гъамус къюбпи раЖарира, сарун дюн'яйин гунағ Чайна гъадабгъуз кІури ваъ, хъа Чаз ккилигурайидар убхбан бадали гъиди.



*Иса Месигъ гъаммишандиз къувватнаъ
гъубрайи саб гъурбан ву*

10 ¹Къанун адмийириз гъюз имбу уымриъ ккилигурайи ужувларин сиринтлан дар. Ваъ, Къанун – думу ужувлар дар. Гъаддиз Къанундихъан, йис'ан-йисаз гъаммишан саб жюрейин гъурбнар хуру къури, адмийир Аллагъдин улихъ гъякъ апIуз шлуб дар. ²Эгер Къанундихъан гъаци апIуз удубкъуйиш, дурари чпин гъурбнар апIуб ккутидайинхъя? Икрам апIрудар саб ражари ва гъаргандиз марцц дапIну ахъидий, ва, чпин гунгъариз дилигну, дурализ чпик тахсир кади гъибгъдайи. ³Хъа му гъурбнар, йис'-ан-йисаз чпи апIурайи гунгъар къваин алауз къури вуйидар ву, ⁴гъяз гъапиш, жердаринна къунарин ифдихъан гунгъар ккутидайинхъя шлуб дар.

⁵ Гъаддиз гъаму дюн'яйиъ учIву Месигъди Аллагъдиз гъапну:
«Увуз ккун гъахъундайвуз я гъурбнар, я багъишар,
хъа Уву, Узуз къури, беден гъязур гъапIнийва.
⁶ Сагъди гъурту гъурбнари,
я гунгъарихъанди апIру гъурбнари Уву шад апIдар.
⁷ Гъадмуган Узу гъапунза:

„Магъа, Узкан Къанундиль дибикIнайиси,
Узу Яв ният тамам апIуз гъягъюраза, жан Аллагъ!“

⁸ Гъаци вуйиган, сифте Дугъу гъамци гъапну: «Увуз ккун гъахъундайвуз я гъурбнар, я багъишар, я сагъди гъурту гъурбнар, я гунгъарихъанди апIру гъурбнар, дурари Уву шад гъапIундар». Дугъу мици, Къанундин тIалабарииндиги вуйиб вушра, Чаз къабул дархъиди гъапиб вуйи. ⁹Хъасин Дугъу давам гъапIнийи: «Магъа, Узу Яв ният тамам апIуз гъягъюраза». Месигъди, гъурбнар апIбарин йирси къайдийир арайиан адаъну, фу-вш цийиб къувватнаъ ипру. ¹⁰Дугъу Аллагъдин ният тамам гъапIган, ухъу саб ражари ва гъаргандиз, Иса Месигъдин беден гъурбан апIбииндигирами гъахъунхъя.

¹¹ Гъарсар Аллагъдин гъуллугъчийи чан гъуллугъ, гунагъ ярхла апIуз даршлу гъадму садар гъурбнар хури, йигъ'ан-йигъаз тамам апIура. ¹²Хъа му Гъуллугъчи, гунгъарихъанди гъаммишандиз къувватнаъ гъубрайи саб гъурбан дубхну, Аллагъдин арччул тереф-нахъинди деъну. ¹³ Гъаддихъанмина Думу, Чан душмнар духну,



Чан ликарикк ккахъру вахт улубкайизкъан, ккилигурى гъузна.
¹⁴ Саб ражари гъурбан хуб'инди Дугъу гирами шулайидар Аллагъ-
 дин улихъ гъякъ гъапIну.

¹⁵ Мидкан ухъуз Гирами Рюгънурда шагыидвал апIура. Дугъу
 сифте кIура:

¹⁶ «Магъа, гъадму йигъарихъан Узу дурарихъди гъацдар
 Йикърар йитIидиза, – кIура Агъайи, –
 Йиз къайдийир дуарарин юкIвариъ тIаъдиза ва дуарарин
 фагъмик дикIидиза».

¹⁷ Хъасин Дугъу давам апIура:

„Дуарарин гунгъар ва гьюкумсуз ляхнар
 Узу гъич зат кIваин алаидарза“.

¹⁸ Гунгъарилан хил алдабгънайиган, гунгъарихъанди гъурбан
 апIуб сарун лазимди гъубзрадар.

Аллагъдиз багахъ улучIвай

¹⁹ Гъардшар, Исаин ифдин кюмекниинди гъамус ухъхъан дир-
 башди «Лап Гирамишвъ» учIувуз шулухъхъан. ²⁰ Дугъу ухъуз душ-
 ваз рякъ абццну, цийиб, уьмур хруб, чарчнаантине вуйи рякъ,
 яни Чан бедендиантине вуйи рякъ. ²¹ Ухъуз, Аллагъдин хулан
 ахювал апIурайи зурба вуйи Гъуллугъчи ахъуз.

²² Гъаци вуйиган гъачай Дугъахъна, гъубкIу хъугъувалиинди,
 ифи кибчииинди юкIвар чIуру нефсахъан марцц ва ихъ жанар
 марцци шту'ан дапIну, ачухъ юкIвар ади гъюхъа. ²³ Хъугъну, учу
 ктибурайи умуднахъан мюгъкамди хъчIихидихъа, гъаз гъапиш
 гаф Тувнайир, хъугъувал Алир ву. ²⁴ Сар-сарихъна масанди гъуз-
 руси ва ужувлан ляхнар апIруси, чиб-ччин гъайгъу зигури хъи-
 дихъа. ²⁵ Сакъюдарин, хъугърудар уч шлуган дина дяргърувал айда-
 ти ляхин дубхъна. Хъа ухъу дицдарихъан дубгъидархъа, иллагъ-
 ки, сарун Агъа гъюру вахт багахъ шулайиб фикирназ гъадабгъну,
 чиб-ччик юкIв капIри апIидихъа.

Гъякъ'вал аьгъяди, гунгъар апIуриз – жаза

²⁶ Гъаз гъапиш, ухъу, гъякъ'вал аьгъю дубхъну, хъана аьгъя-аьгъя-
 ди гунгъар апIуруш, гунгъар сарун гъич саб жюрейин гъурнари-
 хъан марцц апIуз хъибдар, ²⁷ хъа Суддиз ва Аллагъдин душмнар
 итIру гъизгъин циз гукIунди ккилигуб хъибди. ²⁸ Мусайиланмина



ухыз тувнайи Аллагъдин Къанун шли Чюбгьюйиш, кюр вая шубур шагьиддин гафариинди гъючIюбгьюриз, саб инсаф адарди, айжал гъадабтIуи. ²⁹Хъа ичв фикриинди, Аллагъдин Бай ликриккан апIруиз, Йикъар гъийитIу Гирами ифи фукъа дарбси гъисаб апIруиз ва ужувлан Рюгь беябур апIруиз фукъан аыхю жаза гъадабтIур? ³⁰Ухъуз: „Къисас алдабгъуз Узухъди гъитай, лазим жаваб Узу тувдиза!“ – гъапир Фуж вуш, айгъяхъуз. Дугъу гъамцира гъапну: „Чан халкъдин суд Агъайи апIиди“. ³¹Шиви Аллагъдин хиларигъ гъяхъюб – мутIан аыхю гучI адар!

Учуухъ хъергргуранра мюгъкамди гъузай

³² Гъушу вахтар кIваин алаай, думуган, учвуз айгьюваларикан айгъю гъабхъи вахтна, учву гъагъи айзабариан кIул адабгъунчва.

³³ Вахт-вахтарик учв'ин айлхъюз гъитри шуйи ва хъергри шуйи, хъа саспи вахтари гъамцдар айзабар айгъ гъапIдарин багахъ дийгъну гъахъунчва. ³⁴ Учву дустгъариль айидарин язухъ зигури гъахъунчва, ичв шейй-шуюй тадабгърган, учву шад шули гъахъунчва, гъаз гъапиш учвуз думутIан ужуб шейй, гъаммишандиз вуйи Шейй айиб айгъайчвуз.

³⁵ Гъаци вуйиган, ичв кIубанвал мудубганай – ужуб пешкеш хъибичвуз. ³⁶ Аммаки Аллагъдин ният тамам апIбан бадали ва Дугъу туурзга гъапиб рубкъбан бадали учвуз ккундайиб – айгъ апIуб ву. ³⁷ Сарун сацIибтIан вахт имдар, ва

«Дуфну Ккунир, къан дарапIди, гъиди.

³⁸ Йиз улихъ гъякъ вуйир чан хъугъувалиинди
яшамиш хьиди,

хъа дицир Узухъ хъугънайвалихъан гъудучIвиш,

Узу дугъкан рази хьидарза».

³⁹ Амма ухъу, къяляхъ йиврударикан ва йикIрударикан дархъа, вая, хъугъурхъа, ва урхювалра хъибихъуз!

Хъугъувалин мисалар

11 ¹Хъугъувал – ихъ миж кайибдиз саб шак адарди ккилигуб ва гъелелиг дярякърайиб дугъриди а, кIуру гаф ву. ²Ихъ аб-йир, гъациб хъугъувалиинди уьмур хъапIну, баркаллагъназ лайикъ гъахъну.



³Ухъу, хъугъувал ади, Аллагъдин амри дюн'я халкъ дапІнайиб ва вари рябкъюрайиб дярябкъюрайибикан арайиз дуфнайиб, альяжъуз.

⁴Авели, хъугъувал ади, Аллагъдиз КаиндитІан ужуб гъурбан гъабхну. Дугъу гъабхи гъурбан Аллагъди, дугъан хъугъувализ дилигну, къабул гъапІну ва гъаддинди думу гъякъра гъапІну. Дугъан хъугъувалин мисал, гъеле думу учв чивиди имдаршра, гъира кмиди ухъуз метлеб ади гъубзрахъуз.

⁵Енох, хъугъувал ади, чивидимиidi гъаму дюн'яиан гъурхни-и. Думу агури гъахънушра, гъич сабишваъкъан гъидихъундайи, гъаз гъапиш Аллагъди думу Чахъна гъурхний. Хъа гъадмугандиз, гъаму дюн'яиан учв гъадагъайиз дугъу хъугъну, Аллагъдиз ккуниси апІуйи, ва дугъ'ин Думу разира гъахъний. ⁶Хъугъувал адарди Аллагъдиз ккуниси апІуз шлуб дар, гъаз гъапиш Дугъахъна гъору гъарсар кас, Аллагъ айивалихъ ва Учв агуриз Дугъу пешкеш туврувалихъ хъугъну ккунду.

⁷Нюгъдиз улубкъуз ккайибикан, чаз думу фу-вш рябкъяйиз-ра, улихъимиidi хабар дебккнийи ва дугъу, хъугъувал ади, Аллагъдихъ хъебехъну, дюн'я ккапІру штариҳан чан хизан убхоз гими гъапІний. Ахирки дюн'я жазайикк ккипуз гъял гъапІний, хъа думу чан хъугъувализ гъилигу гъякъвал гъурбкъу ирсчи гъахъний.

⁸Хъугъувал ади, Ибрагым, Аллагъди чаз дих гъапІубси, Дугъаз мютІюгъ духъну,fila-вш ирсди жил тувдиза, кІуру гафни-ин элеъну, гъеле дугъаз учв наана гъягъюрашкъан альдарди, гъадина гъушний. ⁹Хъугъувал ади, думу, Аллагъди гаф тувну гъурбкъу жилиин, жара иишв'ан удучІвну гъафи адмиси, чаддрикк яшамиш хъуз хъюгъну. Дугъахъди чаддрикк Исакъра, Якъубра яшамиш гъахъну. Тувнайи гафниинди жил гъаддризра дурубкъуну ккундий. ¹⁰Фицики Ибрагым ижми бинайин диврайи шагъ-риз кклигурайи. Думу шагъур фициб шулуш, капІур ва апІур Учв, Аллагъ вуйи.

¹¹Хъугъувал ади, Ибрагымдикан чан шив Сарайик, гъеле думу бицІидар даршлур вуйишра ва къоридра лап къабидар вушра, бицІир киршний, фицики Ибрагымдин миж чаз гаф туву Аллагъдик кади гъабхъну. ¹²Ва гъациб жюрейиинд сар адмийи-кан, учвра беден къаби-къюзи дубхънайирикан, завув хядаркъан ва гъолихъ гъумкъан гизаф инсанар гъахъну.



¹³ Вари гъадму адмийир, хъугъну ва, чпиз гаф тувнайиб улубкъайиз, гъийихну. Дурагиз думу гаф тувнайи уълке ярхлаан гъябънийи ва рази гъахънийи. Дурагиз, чпи му дюн'яйиб гъурабийирди айиб ва вахтнастлан даруб алью гъабхънийи.

¹⁴ Чпи гъацдар вуйиб гъисаб апIурайидари, гъаддинди чпин Ватан абгурайивал улупура. ¹⁵ Эгер дураги чпи дипну гъушу ватандикан фикир апIури гъахънийиш, дурагиз дина къяляхъ хъта-кузра мумкинвал айи. ¹⁶ Хъа, дугъридан, дураг ужубтлан-ужуб ватандихъ хъчарккурайидар вуйи – аршаринубдихъ. Гъаддиз Аллагъдиз, Узу дурагин Аллагъ вуз, пуз начди дар, фиики Дургъу дурагиз шагъур гъязур дапIна.

¹⁷⁻¹⁸ Хъугъувал ади, Ибрагымди Аллагъди учв ахтармиш апIурайи вахтари чан бай гъурбанди гъахънийи. Дугъаз гаф тувнайи ва думу, гъеле Аллагъди чаз, «Исакъдилантине увуз насили хъибдивуз» дупнайишра, хъайи-хъадру сар бай гъурбан апIуз гъязур гъахънийи. ¹⁹ Ибрагымди Аллагъдихъан дукIнайирра чИви апIуз шул, кIури, хиял дапIнайи, ва, гъаци кIури гъабшиш, дугъриданра, Исакъ дукIнайдаригъян къяляхъ гъадагънура вуйи.

²⁰ Хъугъувал ади, Исакъди чпин ярхи уъмрарий Якъубдизна Исаддиз, Аллагъдин ужувлар ишричвуз, гъапнийи.

²¹ Хъугъувал ади, йикIурайи Якъубди Юсуфдин баяриз жа-жарди Аллагъдин ужувлар ишричвуз, гъапнийи, хъа чан маргълин кюмекнииндигъян къяляхъ гъаздигъундай.

²² Хъугъувал ади, чан уъмур ккудубкIурайиган, Юсуфди из-раилар Египетдиан удучIвну гъягъбакан гъапнийи ва йикIбалин къяляхъ гъаззу чан кIурбарин гъякънаан васият гъапIнийи.

²³ Хъугъувал ади, Мусайн абиир-бабари думу, бабкан гъахъиси, шубуб вазлин айтI гъитIкIну гъюрхнийи, гъаз гъапиш дурагиз думу гъадмукаан уччвурди гъяркъниики, абиир-бабариз паччагъдин буйругънахъан гучI гъабхъундай.

²⁴ Хъугъувал ади, ахю гъахъи Муса, учв фараондин шуран бай ву, кIурайивалихъан гъудучIвнийи. ²⁵ Дугъу, Аллагъдин халкъдихъди сабси, цИб вахтнастлан дару гунагъ ляхнарикан кефер ктагъайиз, аззабарикк ккахъуб ктагънийи. ²⁶ Дугъаз, чаз фициб пешкеш кклигибураш, гъябъкийи, гъаддиз Месигъ бадали учв аскан апIуб Египетдин вари девлетартлан багъади гъабхънийи. ²⁷ Хъугъувал ади, думу, фараондин хъюлхъан, гучI ктарди, Египетдиан



удучІвнийи. Дугъу, чан улихъ Дярякъур рякъюри, вари аыгъ гъапІнийи.²⁸ Хъугъувал ади, дугъу израилариз Пасхайн машквар апІнай, сифте бабкан гъахьидар йихури гьючІвнайи пуч апІрури дуарик ктручбан бадали, урчІарикан ифи кадатай, гъапнийи.

²⁹ Хъугъувал ади, халкъ, жилиланси, Уыру гъюллантина гъушнийи; хъа египтаризра гъаци апІуз ккун гъабхыиган, дуар вариккахъун гъарагънийи.

³⁰ Израиларин хъугъувалиинди Ерихон шагърилан илтІикІна-йи зурба цалар, душвлан ургуд йигъан хъади-хъади илтІикІган, гъарагъун ахънийи.

³¹ Къяппади лихурайи Рахав, хъугъувал ади, душмандин тереф ахтармиш апІурайи израилар мясляльтниинди къабул гъапІган, хътругърударихъди тІанкъ гъахъундайи.

³² Артухъ хъана фу кІуз? Узуз Гедеондикан, Варакайикан, Самсондикан, Ефтайикан, Давуддикан, Самуиликан ва пайгъамбра-рикан пуз вахт адарзуз. ³³ Дуарии, хъугъувал ади, гьюкуматар дисуйи, дугъривал ипуйи, гаф тувнайиб дуарихъна рубкъуйи, асланарин ушвар хъяркъуюи, ³⁴ гъизгъин цІа ктІубшвуйи, учІру ханжларихъан чпи уърхойи. Дуарин зяифвал къувватназ илтІикІуйи, дуар дявдиль къувватлу шуйи ва алжагънайи къушмар гъергну гъягъюз гъитуйи. ³⁵ Дишагълийирихъна, чИви духьну, чпин дийихнайи багахълуйир къяляхъ гъюйи. ГъацІарикан, чпиз улупу азадвалихъан думутІан лап ужуб уъмриз чпи чИви шлуб аыгъяди гъудучІвган, йикІру гъялнахъна хру аyzабар кЧюкъуюи. ³⁶ Гъатмундари чпин аylхъюри хъувалар ва урччуvalар, хъа гъацира зунжрар ва дустгъар аыгъ апІуйи, ³⁷ жаарииин гъвандин жвар уълюбхойи, къоб иишв'ина парчийир апІуйи, ханжларихъди йихуйи, сасдар марччаринна цІигъарин гъидкъарыъди уълки-рий ахъуз мажбур шуйи, сасдариз фукІара гъубкІну адайи, сас-дарихъ хъергүйи ва сасдариикан, рихшанд апІури, зивзивар кЧюкъуюи. ³⁸ Хъа саспидар, чпи вар и дюн'ятІан багъа вуйидар, ичІи чюллериъ, дагълариъ, хъарапиъ ва чІуру гъярапиъ уъргъну ими.

³⁹ Дуар варидарикан, чпин хъугъувализ дилигну, Аллагъ ра-зи гъахънийи. Дуариз саризра чИвидимииди чпиз гаф тувну рубкъруб гъурубкъундайи, ⁴⁰ гъаз гъапиш Аллагъди ухъузра кади, гъаддариихъди ухъура гъуркІувалихъна гъюбан бадали, фу-вш лап ужуб гъязур дапІна.



«Аллагъ учвуз Чан баяризси лигури шулу»

12 ¹Лигай, ухълан, дифаркъан, шагыидар илтИкИна! Гъаддиз гъачай, ухълан ухъуз гъергуз машат апIурайиб ва гъацира ухъуз алдакуз гъитрайи гунагъ вари илдипурхъя ва сабурлуди ухъуз кадабтИнайи манзил ккадапIурхъя. ²Зат ктIатIарцци Иса-йиз лигури гъузурхъя. Думу, ихъ хъугъувалин ккергъубра ва кку-дукIубра ву. Дугъу, гъюз ккайи шадвал бадали, беябурваликкди хачриин аьзиятар аьгъ гъапIну ва гъамус Думу, Аллагъдин тахт-нан арччул терефнахъинди дэньна.

³ Гъамциб даккнивал гунагъкрапин терефнаан аьгъ ГъапIури-кан сацIиб фикир апIинай. Миди учвуз, ичв юкIв-рюгъ усалва-лий адрабхъуз ва рюгъ дурубгуз кюмек апIидичвуз.

Аллагъ Адашдиз ухшар ву

⁴ Учвуз сабан гунгъихъди ифи ктипайиз элегуб алабхъундар-чвуз. ⁵ Учвуз Жувуван веледаризси дуннайи аышкъ капIру гъамц-дар гафар кIваълан гъархначвуз:

«Йиз бай, Аллагъди увуз жаза адабтIурайивал
ибак апIури апIин,

Думу увуз хъжагъргуран, мукущухан.

⁶ Фицики Аллагъди жаза Чан юкIв алидарииз адабтIури
шулу ва
Чан байди къабул дапIнайириз
йивури шулу».

⁷ Учву аьгъ апIурайи жазийр учву вердиш апIурайивалин саб пай ву. Аллагъ учвуз Чан баяризси лигури шулу. Адаши жаза тутрувру бай шлуб вуйин? ⁸ Эгер учвуз жаза адабтIури гъахъундарш, — хъа гъарсариз жаза адабтIури шулу, — учву бичди гъахъидар вучва, гъякъ баяр дарчва. ⁹ Ухъухъ варида-рихъ му жилиин жаза адабтIу адшар гъахъунхъухъ, ва дура-рин ухъу гъюрмат уьбхойхъа. Хъа яшамиш хъуз, фукъан ар-тухъ ухъу ихъ рюгъярин Адашдихъ хъпехърудар дуխну ккунду! ¹⁰ Ихъ адшари ухъу саб вахтназтIан вердиш гъапIундар — думу-ра ккабхъубси. Хъа Аллагъди, ухъура Чан гирамивалин ишти-ракчийр хъпан бадали, ухъуз уж'вал ибшри, кIури, вердиш апIурахъу. ¹¹ Ухъуз фициб жюре жаза вушра, шадвал хруси ваъ,



хъа иццрушназ вуйибси гъугъубжвурахъуз. Хъасин, жазайинди вердиш дапІнайири, дугъривалинна мясяльтнан бегъер ккадаб-ціури шулу.

¹² Гъаддиз амансуз хилар ва зяиф къамкъар ижми апІнай.

¹³ Дюз рякъюди, ликуриз зиян шлуси ваъ, хъа сагъ шлуси, гъараҳай.

Аллагъдихъан ярхла маҳванай

¹⁴ Вари адмийирихъди мясяльт ади яшамиш хъуз ва гирамидар хъуз ял апІнай — гирамивал адарди, гыч сарихъанра Агъя рякъюз хъидар. ¹⁵ Лигайки, гыч сарра Аллагъдин ужувлажъ мятырум даришири ва күтІкъли къаблиси зарап-зиян тувруси дарибшири, гъацдарилантина чиркин даришири. ¹⁶ Лигай, учвкан сарира къяппавал мапІнай ва, саб гъаб ипІрудихъ хизандиъ аъхю бализ айи ихтиярар масу туву Исавси, Аллагъдихъан гъадмукъан ярхлади маҳванай. ¹⁷ Учвуз аъгъячвуз, хъасин Исавдиз чан ихтиярар къяляхъ апІуз ккун гъабхънийи, аммаки думу тина гъапІнийи. Дугъхъан, чпин адашди гъял гъапІуб, гъеле уларилан рубзури гъаддикан ккун гъапІнийишра, дигишиш апІуз гъабхъундайи.

¹⁸ Учву хил кучуз даршула ва цІа алабхъну убгурайи дагъдихъна, мучувалихъна, пашманвалихъна ва тҮурфонахъна дуфнадарчва.

¹⁹ Зурнайн сеснахъна ва улхурайи дихнахъна дуфнадарчва. Думудих гъебхъдари чпикди улхуб давам дарапІуз миннат апІуйи.

²⁰ Инсанарихъан чпиз дебкку гъамциб табшуругъ аъгъ апІуз шулдайи: «Эгер гъяланат гъаму дагъдик кубкыш, думу, йивури гъланар, йибкІну ккунду». ²¹ Думу шикихъан гъадмукъан гучІ айики, гъеле Мусайира кмиди гъамци гъапнийи: «Узу гукІнишин кабхъну йикІуразу».

²² Ваъ! Учву Сион дагъдихъна, чИви Аллагъдин шагърихъна, Аършарин Ерусалимдихъна дуфначва! Учву шадвалин мяракайиз уч духънайи агъзраииинди малайикарихъна дуфначва. ²³ Учву, аършарий ччвурар дидикІнайи, сарпидар вуди бабкан гъашидарин мяракайиз дуфначва. Учву вари халкъарин суд апІру Аллагъдихъна ва гъуркІу дугъридарин рюгърихъна дуфначва. ²⁴ Учву, Исаиихъна, Щийи Йикърар Дерккурихъна, Авелин ифитІан ужузи улхурайи кибчуру Дугъян ифдихъна дуфначва.



²⁵ Лигай, учвухъна илтікіурайи Аллагы тина маптанай. Израила-рихъан гъаму жилиин гафар апіурайирихъ хъпебехъган гъадабтің жазайиккан кіул ккадабгъуз дархыиган, дидлан артухъ айшари-ан гафар Апіурайирихъан гъудучівиш, ухъхъанра кіул ккадабгъуз хъибдар. ²⁶ Думуган Дугъан дихну жилар тіурччүйи, хъа гъамус Дугъу гаф тувна: «Узу саб ражарисана жилар тіурчвидиза, не-инки жилар, хъа гъацира айршарра». ²⁷ «Саб ражарисана» кіуру му гафар: вари халкъ дапінайибидикан вари ккадабшвруб ва саб вахтнастілан даруб дубгди, хъа ккадабшвуз даршлуб гъубзди, кіурайдар ву.

²⁸ Гъащи вуйиган ухъуз ккадабшвуз даршлу Паччагълугъ руб-къурайиган, чухсагъул кіури гъуздихъа, гъюрматлудина гукіунди Аллагыдиз икрам апіури гъуздихъа, ²⁹ гъаз гъапиш ихъ Аллагы – вари хътіюбкъру ціа ву.

Альхиримжи насыгъятар

13 ¹ Учву гъардшарси чиб-чили ккун апінай. ² Рякъюъ айидар къабул апіруваликан ківаълан магъарханай. Гъащи апіру-дари, чипизра айгъдарди, малайикар хялижв апіури шулу. ³ Дуст-гъариъ айидар, гъадраихъди дустгъариъ айидар учву вуйибси, ківаин алаури апінай. Улуржурайидар, гъадраихъди айзабарий учвура айибси, ківаин алаури апінай.

⁴ Нюкягъ гъюрматлуб ва марцциб дубхыну ккун. Аллагыди, чан жилир вая хипир гъитну, гъирағъдіъ ул айир ва къяппавал апірур жазайиз тувди.

⁵ Пул ккун апіувалихъан шлубкъан азадди гъузай. Учвуз айиб-дин разиди гъузай, фицики Аллагыди гъапну:

„Узу уву сарди гъитдарза ва гатіахъдарза“.

⁶ Гъащи вуйиган ухъхъан саб шак адарди пуз шулухъхъан:

“Агъа – йиз Кюмекчи вуйиз,
ууз сабдихъанра гучі адарзуз.

Инсандихъан ууз гъапіуз шул?“

⁷ Ківаин апінай учвуз Аллагыдин гаф улупдар: дуарин уым-риз ва айжалыс лигури, гъадрарин хъугъувал учвура ади гъузай.

⁸ Иса Месигъ накъра, гъира, гъаммишанра зат дигиши шлур дар.

⁹ Ужувлан хабарназ къаршу гъар жюре каламари учву гъякъ’ва-лихъан гъадауз мигъитанай. Юківар, фициб хураг ипірууш,



гъаддин къайдийириинди мюгъкам дарапIди (дураг тамам апIрудариз дураги хайр гъабхундар), хъа Аллагъдин ужувилиинди апIуруш, ужу шул. ¹⁰ Ухъуз ихъ хусуси гъурбнар хрушв ахъуз. Душв'ан гирами Чадриъ гъуллугъ апIурайидариз хураг ипIуз ихтияр адар.

¹¹ Аллагъдин заан гъуллугъчийи „Лап Гирамишваз“ гъйванатарин ифи хура — му гъурбан гунгъарихъанди вуйи — хъа жандкар чIатанишвай ургура. ¹² Гъаци Исайира, шагърин урнарин чIатанди, Чан ифдииинди халкъ гирами апIбан бадали, азаб гъизигнийи. ¹³ Гъаддиз гъачай ухъура, Гъадму ккахъу беябурвал ухъура пай апIруси, Дугъахъна шагърин урнарин чIатинди уду-Чивидихъа. ¹⁴ Ухъуз му жилиин гъаргандин шагъур адархъуз, ухъу гъюз ккайи шагъриз ккилигурайидар вухъа.

¹⁵ Гъаммишан Аллагъдиз, Дугъан ччвур рабгъури, ушвишиан удучIурайи тярифнан гъурбнар Исайилантини хидихъа. ¹⁶ Уж'-вал апIуз ва гъудрубкIрудариз тувуз кIваълан магъарханай — мицдар гъурбнар Аллагъдиз кабалгрудар ву.

¹⁷ Учвуз айкъюл-насигъят туврайидарихъ хъпехъури, мютIюгъ йихъай. Дураг, ул иливну даърахди, ичв юкIварин гъайгъушнаш а, гъаз гъапиш дурагиз чпи Аллагъдин улихъ жаваб тувруб айгъя. Дураги чпин али гъуллугъ, гъагъи бала алиси, тямъягъ хътру саягъ тамам апIруси мапIанай, фицики дидкан учвуз айи хайр адар, хъа разивалиинди кIулиз адабгъруси, ичв терефнаан кюмек апIинай.

¹⁸ Учу бадали ккарагури йихъай. Ич намус марцци вуйивалик ич саб шак кадарич, ва варибдиъ дугъриди гъузуз ккунду-чуз. ¹⁹ Хъа гизафна-гизафси узу учвухъна ухди хъадакну гъюз ккарагай.

²⁰ Гъит, мясяльтнан Аллагъди, марччарин зурба Марччи-хъан вуйи, Чан ифдииинди гъаммишандиз вуйи Гирами Йикъ-рариин печать гъиву ихъ Агъа Иса чIиви ГъапIури, ²¹учву Чан ният тамам апIру гъарсаб ужуб ляхнихъ хъаъри. Ва, гъит, Иса Месигъдилантини Дугъу ухъу, Чаз ккуниб апIруси, гъитри. Хъа Иса Месигъдин, гъит, гъаммишандиз ад ибшри. Амин.

²² Гъардшар, узу учвуз миннат апIураза, учвук юкIв капIрайи гъаму гафар сабурлуди къабул апIинай, фицики му йиз кагъаз думукъан ярхид дар.



²³ Аыгъю йибхъай, ихъ гъардаш Тимофей азад гъапIну. Эгер думу багарихъди мина гъафиш, узу учвухъна гъадмура хъади гъидиза.

²⁴ Ичв вари ахъодариз ва Аллагъдин гирами вари халкъдиз – саламар. Италияйианра Иса Месигъдин терефкраги учвуз саламар хътаура.

²⁵ Гъит уж’вал учвухъ варидахъди гъубзри!



АЧМИШ АПІУВАЛ

Аъхиримжи йицІуд йистІан зиина чан уымур Югъанди Эфесдиң хъугърударин гүулгүгънаң хъуз баши гъапІний. Думу вахтна Рим вилаятдин паччагъ Домициан вуйи. Дугъу учв Аллагъ вузат кірәйи, варидари чав Аллагъсы гирамиди дисуб ккун апІуюи ва, саб тикикъян язухъ даралық, Исайихъ хъугърудар терг апІуюи. Исайин вакил Югъанра гъадму хъергуваларикк ккахънийи. Думу Патмос острөвдина алдаңийи. Ари гъадушв'ин дугъаз Аллагъдихъан аьдати дару хабар гъафнийи. Гъадму хабар бикІбалан къяляхъ дидиз «Ачмиш апІувал» кірур чывур түвнийи. Гъадму китабдидиң дебеккнайи хабар, сабни нубатнаң, БицІи Азияйиб Исайихъ хъугънайидариз вуйи. *Му вари «Ачмиш апІували» хъерграйи ва аьзабар зигурайи йигъари хъугърудариз ижсими迪 дийигъуз дих апІура.* Китабдидиң кучІалды Исайихъ хъугънайи мляммарихъан ихтиятди гүузну ккуниваликанра кірура. Аьзабариз айидар саб важдылу суалну архаинди гъитрадайи: сацІиб вахтнаң хъергбар алахъурайи Исайихъ хъугърударин аьхир фициб хъибдикІан? Китабди думу суалназ жасаваб тұвра: *Иса Месигъ Аллагъдиз къарашу гүудужвдарин гъубкІну гъалиб хъиди.* Гъадму ву паччғарин Паччагъ ва гъюкүмдірарин Ағба. Югъанди гъибикІу китабдин Исайихъ хъугърудариз вуйи важдылуval гъич саб вахтнара дубгруб дар. Дурагыз китаб, чипхынди душмнаризси лиргуганра ва хъерг-руганра, ккарарубди ва чин терефкарди гъубзра. Ухъу Югъанди-ланмина ктикаурайи кірулн хабар Иса Месигъ ву. Думу му дюн-яйиз хъана гъиди, му ражары Гъалибчиди. Китаб гъамциб гаф түвбшинди ккудубкІура: «Ав, Узу багарихъди гъидиза!» (22:20).



Фтикан ву гъаму китаб

1 ¹Иса Месигъдин ачмиш апIувал, Чан гъуллугъчириз багарихъди хъуз ккайиб вари улупбан бадали, Дугъаз Аллагъди тувнайиб ву. Мидкан хабар дебккбан бадали, Чан гъуллугънаъ айи Югъандихъна Исаий малайик гъаънийи.

² Югъанди чаз гъябкьюб вари: Аллагъдин Гаф ва Иса Месигъдин шагыидвал – тасдикъ апIура.

³Хушбахтавар ву Аллагъди гъаънайи гъаму пайгъамбарвалин гафар урхурайир, дурарихъ хъпехъурайир ва мушваъ дибикIнайиб тамам апIур. Гъаз гъапиш вахт хъубкъна.

Хъугънайидарин жямляйтдиҳъна вуи гафар

⁴Асия вилаятдиъ айи хъугънайидарин ургуб жямляйтди югъанди кIура: учвуз гъарган Айирихъан, Гъахьирихъан ва Гъюрурихъан, гъацира Дугъан тахтнахъ хъайи ургур рюгънахъан, ⁵Иса Месигъдихъанра – гъякъ Шагъид вуйирихъан, гъийихдариk сарпирди Чиви Гъахьирихъан ва дюн'яйин паччъарин зиин агъавал АпIурайирихъан уж'вал ва мясляйт ибшричвуз.

Ухъу Ккунириз, Чан ифдиинди ухъу ихъ гунгъарихъан азад ГъапIуриз, ⁶саб паччагълугъдиz уч гъапIу ухъкан Чан Адашдин – Аллагъдин гъуллугънаъ шлудар Ктауриз зат ккудурукIру айсрапиз ад ва къудрат ибшри. Амин!

⁷Магъа гъамус Думу дифар хъади гъиди ва гъарсариз Думу рякъиди, гъеле Дугъан мурглин т'уларигъянзина жида гъюбччвдарира кимиdi. Дугъан улихъ дюн'яйин али вари миллетари суза зигиди. Ав, дугъриданра гъаци ву! Амин.

⁸«Узу вуза, – кIура Агъа Аллагъди, – Эвелра, Аххирра гъарган Айирра, Гъахьирра, Гъюрурра ва вари хилиъ Дибис-найирра».

⁹Узу, Югъан, ичв гъардаш, Месигъ Исаийиди саб вуди, учвухъди Дугъан бедбаhtвалар, паччагълугъвал ва сабурлувал пай апIурайир, Аллагъдин Гаф ва Иса Месигъдихъан шагыидвал бадали Патмос кIуру островдиин гъахъунза.

¹⁰Элгъет йигъан узуз, Рюгъан гъюкмиъ ахънайириз, зурна-ианси чIигъ апIури, йиз къялхъян ахю дих гъеебхъунзуз. ¹¹Диди гъапи: «Вари увуз рябкьюрайиb кагъзик бикI ва Эфесдиъ,



Смирнайиъ, Пергамдиъ, Фиатирайиъ, Сардисдиъ, Филаделфия-
иъ ва Лаодикияиъ айи ургиб жямяльтариз хъадапI».

¹² Узукди гъаму гафар апIурайи дих шлинуб вуйкIан, кIури,
къяляхъ илдицуриз, гъизилин акв апIру ургуб алат гъябкъон-
зуз. ¹³ Гъадму акв апIрударин арайиъ, ярхи палат алди, муҳрилан
гъизилин чIул идибIнайи, Инсаниятдин Бализ ухшар айир-
сир кас гъяркъонзуз. ¹⁴ Дугъан кIул ва кушар лизи хъаси ва
ийфси вуйи. Дугъан улар убгурайи цIаси вуйи, ¹⁵ хъа ликар пич-
раъ крабчIури убгурайи рукъси вуйи, Дугъан дихра ягъли гъарза-
рилан урсрайи штарин гъугъси вуйи.

¹⁶ Дугъан арччул хилиъ ургуб хяд айи. Дугъан ушвиан, кью-
биб терефарихъанди мурзар али учIру ханжал удубчIвнайи. Ду-
гъан маш яманди ичIибгнайи ригъси айи.

¹⁷ Думу гъяркъиган, дукIнайиры, Дугъан ликарикк дахъунза,
хъа Дугъу, Чан арччул хил йиз гъюниин иливну, гъапи:

— ГучI мапIан! Узу вуза Сарпирра, КкудукIрурра. ¹⁸ Яшамиш
шулайир Узу вуза. Узу гъакIнийза, хъа магъа Узу хъана аьсра-
риан-аьсрапиз яшамиш шулаза. Узухъ хъазухъ аյжалин ва же-
гъеннемдин ачар. ¹⁹ Гъаци вуйиган, увуз гъябкъоб бикI: гъаму
ражари шулайиб ва хъасин хъуз ккайиб. ²⁰ Магъа, увуз Йиз ар-
ччул хилиъ гъяркъю ургуб хядран ва ургуб чирагъдин сир: ургуб
хяд — мурап ургиб жямяльтарин малайикар ву, хъа ургуб чи-
рагъ — мурап ургуб жямяльтарин ву.

Эфесдин хъугънайидариз

2 ¹ Эфесдин хъугънайидарин малайикдиз бикI:
«Магъа арччул хилиъ ургуб хяд Дииснайири ва гъизилин ур-
губ акв апIру алатаригъ Лицурайири фу кIураш:

² Яв ляхнар, яв гъагъи жафа ва яв сабурлувал Узуз аьгъязуз.
Аьгъязуз, уву нягъякъ ва чIуру адмийир аьгъ дарапIруб; Иса-
йин вакилар вуча кIурайидар уву ахтармиш гъапIунва ва дурап
кучIляхъяр вуйиб аьгъю гъабхъунвуз. ³ Уву ижмир вува, Йиз ччур
бадали уву гизаф читинвалариъ ахъунва ва зияфвалиъ кIул ипун-
дарва. ⁴ Амма, Йиз увуз къаршуди кIуру саб айиз: увуз яв сиф-
тейин масанвал кIавълан гъархнавуз. ⁵ КIавайн апIин, уву фициб
ягълишналан ахънуш, швумал йихъ, ухдийин ляхнар давам апIин.
Эгер уву, швумал духъну, гъаци дарапIиш, Узу увухъна гъидиза



ва яв акв туврайиб йишвлан илдипидиза. ⁶Хъя саб увуз авуз – Ууз даккни николитарин* ляхнар дяркъну ккундарувуз.

⁷Шлик хъпехъру ибар каш, гъйт хъугънайидарин жямаятарииз Рюгъну фу кIураш, ебхъри! Гъалиб гъахъириз Узу Аллагъдихъ женнетдий айи умрин гъаргъян йимишар итIуз гъитдиза».

Смирнайин хъугънайидариз

⁸Смирнайин хъугънайидарин малайикдиз бикI:

«Гъамци кIура Сарпири ва Ккудукирури, ГъачИри ва хъана яшамиш Шулайири: ⁹Ууз яв аyzабарикан ва касибваликан аygъязуз, хъя уву девлетлу вува! Аygъязуз уву беябур апIурайи, жугъдар вуча, кIурайидариканра, хъя дугъридан дурар иблисдин мярака ву. ¹⁰Ув'ин улукъуз ккайи аyzабарихъан гучI мапIан. Магъя багарихъди иблисди учвкан сакьюдар ахтармиш апIуз, кIури, дустагъдий ирчди, ва иицIуд йигъян учву аyzабар зигидичва. ЙикIайиз-къян вафалуди гъуз ва Узу увуз умрин паччагъвалин таж тувдиза.

¹¹Шлик хъпехъру ибар каш, гъйт хъугънайидарин жямаятарииз Рюгъну фу кIураш, ебхъри! Гъалиб гъахъириз кьюбпи аyzал айиб дар».

Пергамдин хъугънайидариз

¹²Пергамдин хъугънайидарин малайикдиз бикI:

«Гъамци кIура кьюбиб мурзарра учIру ханжал хъайири: ¹³Ууз аygъязуз, уву иблисдин тахт алишв'ин яшамиш шулайиб. Аммаки уву Йиз ччвурнахътан ижмиди хъичIихнава. Уву Узухъ хъугъувалихъан иблис яшамиш шулайи ичв шагърий Йиз дугъри вуйи шагъид Антиг гъакIи йигъянра гъудучIвундарва. ¹⁴Гъаци вушра, Ууз увуз къаршу вуйибра азуз: увувь Балам пайгъамбрин каламарихъди гърайидар а. Думу каламари чан вахтна Валак паччагъдии Израилин халкъ гунагъарихъна хуз гъитнийи. Дугъу дурар, идолариз гъурбан гъапIуб ипIуз хъаънийи; дурариз намуссузвалиинди умур гъапIуз улупнийи. ¹⁵Увуз гъацира николитарин каламарихъди гъягърударра авуз. ¹⁶Гъаддиз, шумал духъну, хъадакай! Эгер хътадакиш, Узу багарихъди гъидиза ва дурарихъди Йиз ушвнин ханжлихъди дяви гъабхидиза.

* ^{2:6} Саб кучIин терефкрап.



¹⁷ Шлик хъпехъру ибар каш, гъйт хъугънайидарин жамяльтариз Рюгъну фу кIураш, ебхъри! Гъалиб гъахъириз Узу, гирамиди убхюрайи ва сир аий манна* тувдиза, гъацира, ччвур кайи лизи гъван тувдиза. Душвак дикикIнайи ччвур, думу гъурубкъурилан гъайри, сарун гъич саризра айгъю хъибдар».

Фиатирайин хъугънайидариз

¹⁸ Фиатирайин хъугънайидарин малайикдиз бикI:

«Гъамци кIура Аллагъдин Бали, гъизгъин цласи улар айири ва крабчIурайи рукустар ликар ккайири: ¹⁹ Узуз айгъязуз яв ляхнар ва масанвал, хъугъувал, гъуллугъналь хъувал ва мюгъкамвал. Яв аыхиримжи ляхнар сифтейиндартIан гизаф вуйибра айгъязуз. ²⁰ Хъа магъя увуз къаршуди Йиз фу аш: пайгъамбар вуза, кIура-йи Изавел кIуру дишагъли айгъ апIурава. Дугъу Йиз гъуллугъналь айидар улдугуз гъитра: дураг къяппавалихъинди илтIикIура ва идолариз багъиш гъапIуб ипIуз улупура. ²¹ Узу дугъаз чан тIулар дирчуз вахт тувунза, хъа дугъаз чан намуссузвалиин швумал хъуз ккунди адар. ²² Гъаддиз Узу думу уъзрихъ гъахъуз гъитдиза, эгер чпин ляхнариин швумал духьну, хътадакиши, дугъахъди къя-ппавал апIури гъашидара зурба бедбахтвалихъ гъирчдиза. ²³ Ду-гъан бицIидарра айжалихъ гъирчдиза. Гъадмуган вари жамяль-тариз айгъю хъибди: ичв юкIвариъ ва фагъмарисъ жиниди убхю-райиб вари айгъюр Узу вуйиб, ва гъарсариз Узу, чан ляхнариз дилигну, тувдиза. ²⁴ Хъа Фиатирайиъ имбудариз, гъадму калама-рихъди дяргърудариз ва иблисдин фендигарвалар айгъю дарапI-дариz Узу кIураза: „Узу учв’ин артухъ гъагъ илипдарза“, ²⁵ эгер учву, тап Узу гъайиз, ичв айибдинди, гъадму убхюри гъузиш. ²⁶⁻²⁷ Хъа аыхиризкъан, Узу кIуруб вари тамам апIури, гъалиб гъа-хъириз, халкъарин зиин Узуз Йиз Адашдихъан гъурубкъганси, гью-кум тувдиза. Гъацири дурагин зиин рукаан чумакъихъди гъюкум гъабхиди ва, ругдин гъабар фици тикиир шулуш, гъаци дураг уъргъиди!

²⁸ Гъалиб гъахъириз Узу гвачIиндин хядра тувдиза. ²⁹ Шлик хъпехъру ибар каш, гъйт, хъугънайидарин жамяльтариз Рюгъну фу кIураш, ебхъри!»

* 2:17 Лизи хюсис Аллагъди туврайи хураг.



Сардисдин хъугънайидариз

З ¹Сардисдий айи хъугънайидарин малайикдиз бикI:
«Гъамци кIура Аллагъдин ургуб рюгъ ва ургуб хяд Хъайири:
яв ляхнар Узуз аygъязуз; гъеле уву чIивидарин жергийрий ашра,
уву дукIнайир вуйиб аygъязуз. ²Уягъ иихъ ва мюгъкам апIин уву
имбу гъамус-хъа иибкIру гъялнаа айиб. Яв ляхнар Йиз Аллагъ-
диз хуш шлударстар вуди гъяркъондарзуз. ³Гъаци вуйиган, кIва-
ин апIин, увуз фу гъурубкънуш ва фу гъебхънуш! Гъадму тамам
апIин, яв ляхнар гъит ва швумал иихъ! Хъа эгер уву уягъ дар-
хьиш, Узу тIафалси хабарсузди гъидиза. Уву, Узу увухъна фу-
ну вахтна гъюруш, аygъю хъибдарвуз. ⁴Аммаки увуз Сардисдий
чин палтар ктрацIу сакьюодар адмийир авуз, ва дураг Узухъди
лизибдильди гъягъиди, гъаз гъапиш дураг лайикълу ву. ⁵Гъа-
либ гъахъирра лизи палтар алахъну хъиди, ва Умрин китаб-
дикан Узу дугъян ччвур кIубшвидарза, Узу думу, Йиз Адашдин
ва Дугъян малайикарин улихъ къабул апIидиза. ⁶Шлик хъпехъру
ибар каш, гъит, хъугънайидарин жямяльтариз Рюгъну фу кIу-
раш, ебхъри!»

Филаделфияйин хъугънайидариз

⁷Филаделфияйин хъугънайидарин малайикдиз бикI:

«Гъамци кIура Гирамири, Гъякълури, Давудрин ачар Хъайи-
ри – Дугъу абцхъанмина, гъич сарихъанра хъябкъюз хъибдар,
Дугъу хъябкъхъанмина, гъич сарихъанра абцуз хъибдар: ⁸Узуз
яв ляхнар аygъязуз – магъя яв улихъ Узу урчIар арцунза ва гъич
сарихъанра дураг хъяркъюз хъибдар, гъаз гъапиш, гъеле яв къув-
ват цИибди вушра, уву Йиз Гаф гъюбхюнва ва Йиз ччвурнахъан
гъудучIундарва. ⁹Гъаддиз магъя, Узу увуз иблисдин мяракайиан
жугъдар вучу кIурайидар, амма дугъри дарудар, кучIляхъяр тув-
дизавуз – Узу дураг увухъна гъюроси ва яв ликарикк икрам
апIури дахърганси апIидиза. Хъа дурагиз, Узуз уву ккуниб,
аygъю хъибди. ¹⁰Узу увуз, мюгъкамди гъуз, гъапиган, уву гъаци
гъузунва, гъаддиз вари адмийир ахтармиш апIуз дюн'яйина
гъюру бедбаатваларин вахтна, Узу увира урхидизаву.

¹¹Узу багарихъди гъидиза. Гъич сарихъанра яв паччагъвалин
таж тадабгъуз даршлуси, увуз айибдихъан ижмиди хъичIихну



гъуз. ¹² Гъалиб гъахьирикан Узу Йиз Аллагъдин хулан мурхъул ктаидиза ва думу душвъз аьсрариз гъузди. Узу дугъяк Йиз Аллагъдин чвур, Йиз Аллагъдихъан завариан гъюру Йиз Аллагъдин шагърин – цИийи Ерусалимдин чвур, ва Йиз цИийи чвур бикИдида. ¹³ Шлик хъпехъру ибар каш, гъит, хъугънайидарин жамяльтариз Рюгъну фу кIураш, ебхъри!»

Лаодикийин хъугънайидариз

¹⁴ Лаодикийин хъугънайидарин малайиқдиз бик!

«Гъамци кIура Амин чвур алири, Дугъри ва Гъякъ Шагъидди, Аллагъди халкъ гъапIу варибдин Аххори: ¹⁵ Узуз яв ляхнар аьгъязуз, уву я мичIлир, я урцрур дарувалра аьгъязуз. Увуз ужу хъибди, эгер уву я мичIлир, ясана урцрур вуди гъахънийиш! ¹⁶ Хъа уву я мичIлир, я урцрур дарди, хъа анжак мани вуди хъпаз дилигну, Узу уву Йиз ушвниан тутуси идипидизаву! ¹⁷ Уву: „узу девлетлу вуза, узу девлетлу гъахъунза, узуз сарун фукIара ккимбуб имдариз“ – кIураш, увуз, уву фукъан баҳтсуз, аьжуз, касиб, кур ва гъяцIал вуш, аьгъдарвуз. ¹⁸ Узу увуз саб насигъят тувраза: уву девлетлу хъуз, Узхъан цИль марцц гъапIу гъизил ва яв гъяцIливалин нач ккебкуз алабхъру лизи палат гъадабгъ. Гъацира увуз уларикан ктатуз ва рябкъюри хъуз ччимра гъадабгъ. ¹⁹ Узу Узуз масан вуйи касариз жаза гъадабIурза ва дурарин жини ляхнар арайиз адагъурза, гъаци вуйиган, юкIв хъип, ва шумал духъну, яв фурсар дирч. ²⁰ Магъа, Узу дийигъназа урчIарихъ ва кучраза. Шлиз Йиз дих ебхъураш, гъадгъу Узуз урчIар арццди, Узу гъадму касдихъна учIвидиза ва учу, сатIиди деъну, хябахъдин уъл ипIидича.

²¹ Гъалиб гъахьириз Узу Узухъди тахтниин деуз йишив улупидиза, гъаз гъапиш, Узора гъалиб гъахъунза ва Йиз Адашдин гъвалахъ Дугъян тахтниин деунза. ²² Шлик хъпехъру ибар каш, гъит, хъугънайидарин жамяльтариз Рюгъну фу кIураш, ебхъри!»

Югъандиз аьршариз гъябкъюб

4 ¹ Гъамдин къялхъян узуз заварий урчIар арццну гъяркъюнзуз ва гъадму сифте гъебхъу зурнайнисиб дих гъебхъунзуз. Дих узухъди, гъамци кIури, улхуз хьюбгъю: «Мина удучIв, Узу увуз багарихъди хъуз ккайиб улупурзавуз».



²Узу гъадму сяльт Рюгъну ацIунзу. Фу лигурва, аршары тахт дебккна, хъа тахтниин Деънайир ал. ³Хъа Деънайирилан сердоликна яшма кIуру багъа гъванариланси нур рабгъурайи, ва тахт вуйиси заъланмина изумруддин рангарин дерккучIимири-сиб илбицнайи. ⁴Гъадму тахтнахъди, илтIикIну, къабна юкъуб тахтсана хъайи. Дураин къарна юкъур аыхюр, лизи палат алабхъну, деънайи; дураин кIулариин гъизилин тажар алийи. ⁵КIулинуб тахтнахъян къюркылын цИийир, гъарийир ва завар рах-рустар сесер гъудучIвуйи. Думу тахтнан улихъ цА алди ургу-райи акв тувру ургуб алат хъайи – мурап Аллагъдин ургур рюгъ вуйи. ⁶Тахтнан гъаншары хрусталсиб гюзгдин гъюлиз ухшар ву-йи фу-вуш айи. ГъацIна – гъацI къялаь, тахтнан юкъуб тереф вуйиси илтIикIну, улхъандира ва къялхъяндира къадар ад-рубкъан улар айи, гъайванатарстар юкъур чIивидар айи. ⁷Сарпи гъайванатсир – аслансир вуйи; къюрпир – жигыл иицсир; шу-бурпирин маш адмийинсиб вуйи, хъа юкъурпир завуь убхнайи люкъраз ухшар айир вуйи. ⁸Гъадму юкърид гъайванатарстарик гъарсардик йи-йирхъуб хлинцц кайи. Хлинццар вари терефари-хъанди: айтIандира, зильандира – уларихъди алацIнайи. Юкъ-рид гъайванатарстари, зат дийийигъди, иишвнора ва йигънурда гъарийир апIурайи:

«Гирами, гирами, гирами ву Агъа Аллагъ
вари хилиль Дибиснайир,
гъарган Айир, Гъахъир ва Гъюрур!»

⁹Гъадму юкърид гъайванатарстари тахтниин Деънайириз – гъарган яшамиш Шулайириз, чухсагъул кIури имиди, Дугъан ад апIури имиди ва заанвал улупури имиди, ¹⁰къарна юкъур аыхюри тахтниин Деънайирин улихъ, ис алахъури, гъарган яша-миш Шулайириз икрам апIуйи ва, тахтнан улихъ чпин тажар диври, гъамци кIуйи:

«Уву лайикъ вува, Агъа, ич Аллагъ,
ад, заанвал ва къувват къабул апIуз,
гъаз гъапиш, Уву вува вариб арайиз Гъабхир;
Яв амриинди вари гъабхъну
ва арайиз гъафну!»



Дибиржнайи кагъаз ва Чил

5 ¹Тахтниин Деънайириин арччул хилий узуз китаб – турбаси дибиржнайи кагъаз гъябкъонзуз. Дидин айтIандира, зильландира варишвар алацIну, дибикIнайи, ва думу ургуб печатдиинди хъябкънайи. ²Ахю дихниинди гъамци кIурайи къудратлу малайикра гъяркъуз: «Фуж лайикъ ву му китаб ачмиш апIуз ва мидлан печатар алдагъуз?»

³ Гъич сарихъанра: я завариин, я жилариин, я жиларикк ккаидарихъан – китаб ачмиш апIуз гъабхъундайи, гъеле дидихъинди лигузкъан дурарихъан удубкъундайи. ⁴Китаб ачмиш апIуз ужур, дидихъинди лигузкъан удубкъур арайиз удудучIвган, узу бегъем гъишза. ⁵Хъасин гъадму аъхударикан сари гъапизуз: «Мишан! Лиг, Ягъудайнин тухмиан Аслан гъалиб гъахыну, Давудрин машгъур вуйи наисил! ГъадгъухъантIан шулдар ургуб печать али китаб ачмиш апIуз».

⁶ Узуз тахтнахъ, гъацI къялаъ, Чил гъяркъонзуз. Думу гъурбан апIуз духнайирси айи. Дугълан гъадму юкърид гъайванатарстарна аъхудар илтIикIнайи. Гъурбан апIуз Духнайириз ургуб кIарчна, ургуб ул айи – мураг Аллагъдин ургуб рюгъ вуйи. Дугълан мураг дюн'яйина гъаърудар вуйи. ⁷Дугъу, багахъ духъну, тахтниин Деънайириин арччул хилий айи дибиржнайи китаб гъибису. ⁸Дугъу думу гъибисган, юкърид гъайванатарстарна къарна юкърид аъхудар Чилан улихъ икрам апIури дахъу. Дурарин гъарсарин хилий чонгюр ва кIулихъди ацIнайи, ицци ниар хъайи ургру чиммар ади, гъизилин гъабар айи – му чиммар Аллагъдин гирами халкъдин ккарагбар ву. ⁹Дурари цийи мяъли апIурайи:

«Уву лайикъ вува китаб бисуз
ва дидлан печатар алдагъуз,
гъаз гъапиш, Уву дуխыну гъурбан,
Яв ифдинди Уву Аллагъдиз адмийир гъадагъунва
гъарсаб тухмиан ва Чалнаан,
гъар жюре миллетарикан ва халкъарикан.

¹⁰ Уву гъапIунва дурарикан
ихъ Аллагъдиз гирами гъуллугъчийр ва паччгъар –
дурари дюн'яйинра
паччагъвал апIиди!»



¹¹ Узуз юкърид гъяйванатарстаринна гъадму ахюдарин тахтналан илтикІнайи гизаф малайикар гъяркъуз ва дурагин дихар гъеерхъуз. Дурагин къадар ктухузкъан шлуб дайи – агъзрар-агъз-рариинди вуйи. ¹² Дураги ахю дихниинди кІуйи:

«Гъурбан гъахь Чил лайикъ ву
къувват, девлете, айкъюл ва къудрат,
заанвал, ад ва уж’вал
къабул апІуз!»

¹³ Узуз гъеебхъунзуз, вари арайиз дубхнайиби – завариинра, жилариинра, жилариккра ва гъюлериъра – варишвариъ варибиди фици гъарай апІуйиш:

«Тахтниин Деънайиризна Чилаз –
уж’вал, заанвал,
ад ва къудрат
гъаммишандиз!»

¹⁴ Ва юкърид гъяйванатарстарира кІуйи:

«Амин!»*

Ахюдар жилиина ахъуйи ва икрам апІуйи.

Сабпи иирхъуб печать алдабгъбакан

6 ¹Чилу ургуб печатдикан саб фици алдабгънуш, гъябкъуз ва юкърид гъяйванатарстарикан сари фици: «Мина гъач!» кІури, завун гъугъумаринсиб чигъ гъапІнушра, гъеебхъунзуз. ²Хъа лизи гъяйван гъябкъуз. Диц’ин чимирра хъайи атлу алийи. Дугъаз таж тувнади шулу, ва думу гъалибвал гъадабгъуз, гъалиб гъахъирси, рякъ’ин шулу.

³Чилу къюбпи печать алдабгъиган, узуз, юкърид гъяйванатарстарикан къюприри, мина гъач, кІури, гъеебхъуз.

⁴Хъа цаси убгурайи уьру гъяйван удубчІвури гъябкъуз. Му гъяйвниин али атлуйиз, зурба ханжал тувну, адмийир чиб-чиpigъ гъярхъну йихбан бадали, дюн’яйиан мясяльтаал адабгъуз шлу ихтияр тувнийи.

⁵Чилу шубупи печать алдабгъиган, узуз юкърид гъяйванатарстарикан шубурпири: «Мина гъач!» кІури гъеебхъуз. Хъа хъотси кіару гъяйван гъябкъуз, дид’ин элеънайириин хилий ярчвраг айи.

* 5:14 Дугъриданна гъаци ву!



⁶Хъасин гъадму юкърид гъайванатарстарин арайиъ гъамци кIурайи дихсиб гъеебхъуз:

«Ярхи йигъан гъилихубдихъ саб сеъ дяхинтIан дяргърубси хъибди, ясана шубуб сеъ мухтIан дяргърубси хъибди! Аммаки я чимдиз, я чаяхриз зарар мутуван!»

⁷Дугъу юкъубпи печать алдабгъиган, юкърид гъайванатарстарикан юкъурпири кIурайи дих гъеебхъунзуз: «Мина гъач!»

⁸Хъа узуз, зяиф-гъатху рангнан гъайван гъябкъуз. Дид'ин элеънайириин чвур Аьжал вуйи, дидихъди вари жегъеннем гьюрайи. Мидиз дюн'яйин юкъубпи пайниин ханжлиинди, гаш'-валиинди, уъзрариинди ва юкъбиб вягъши гъайванатариинди адмийир йихуз шлу гъюкум тувнайи.

⁹Дугъу хъубпи печать алдабгъиган, узуз гъурбнар апIрушван кIанакк Аллагъдин Гафналантина ва дурари гъапIу шагъидвалилантина гъийиху адмийириин рюгъяр гъяркъуз. ¹⁰Дурари зурба гъарай идипу:

«Гирами ва Гъякъу Гъюкумдар! Уву гъаз гъамусра дюн'яйин адмийириин суд апIурадарва ва дурализ, ич удубзу ифдихъанди, жаза гъаз гъадабтIурадарва?»

¹¹Гъадмуган дурарикан гъарсариз лизи палат тувнийи ва сацIисана сабур апIуб ккун гъапIнийи, гъаз гъапиш дуарин къадар гъуркIну шайиз, чписи, Месигъ Аллагъдин гъуллугънаа айи гъардшарра йихайиз, ккилигну ккундийи.

¹²Узуз Дугъу йирхъубпи печать алдабгъури гъябкъуз. Гъадмуган лап яманди жилар гъутIурччу; ригъ – маллайн чухаси кIару, хъа вари наз ифиси гъабхъи, ¹³гужал микI хъивну гъядябхъру дурубжу инжирси, хядар, завариан адахъну, жилиина ахъу. ¹⁴Зав кагъазси илбижну дубгу; вари дагъларна островар чпин йишварихъан гъудучIву. ¹⁵Дюн'яйин паччгарра, гъакимарра, къушмарин ахъюдарра, девлетлу ва къудратлу адмийирра, лукIарра ва азадди уъмур хъапIрударра – вари дагъларий айи гъарзаригъ ва дюрхъярий гъитIикIнийи. ¹⁶Хъа дурари дагъларизна гъарзариз кIуий: «Уч'ина ахъай, тахтниин Деънайирихъан ва Чилан хъял кайивалихъан учу гъитIикIай. ¹⁷Дуарин хъял алдабгъру Йигъдуфна. Шлихъан мидккан ккадархъуз хъиди?!»



Израилиан 144000 кас

7 ¹Хъасин узуз дюн'яйин юкъбиб терефариъ дийигънайи юкъур малайик гъяркъзуз. Дурари, я жилиина, я гыол'ина, я гъара-рина хъивуз гъидритди, дюн'яйина хъивру юкъуб миқI дидиснайи. ²Узуз ригъ гъудубчIвру терефнахъян чIиви Аллагъдин печать дибиснайи сарсана малайик за шули гъяркъюнзуз. Дугъу зурба дихниинди жилизна гъюлериз бедбахтвалар хуз гъюкум тувнайи юкъбиб малайикариз гъапи:

³«Сабан я жилариз, я гъюлериз, я гъарапиз, ухъу ихъ Аллагъ-дин гъуллугънаь айидарин машар печатдииндI жара дарапIкъан гагъди, зарар мутуванай!»

⁴Ва узуз, печать йивну жара гъапIдарин къадар варжна ягъ-Чиврна юкъуд агъзур кас вуйиб, гъеебхъунзуз. Израилин баярин вари тухмиан печатдихъди жара гъапIдар гъадмукъан вуйи.

⁵Ягъудайин тухмиан печатдихъди лишанлу гъапIдар йицIикьюд агъзур кас вуйи;

Рувимдин тухмиан – йицIикьюд агъзур;

Гаддин тухмиан – йицIикьюд агъзур;

⁶Ашерайн тухмиан – йицIикьюд агъзур;

Нефталимдин тухмиан – йицIикьюд агъзур;

Манасдин тухмиан – йицIикьюд агъзур;

⁷Симеондин тухмиан – йицIикьюд агъзур;

Левийин тухмиан – йицIикьюд агъзур;

Исахардин тухмиан – йицIикьюд агъзур;

⁸Забулундин тухмиан – йицIикьюд агъзур;

Юсуфдин тухмиан – йицIикьюд агъзур;

Вениаминдин тухмиан – йицIикьюд агъзур.

⁹Хъасин узуз сарихъанкъан ктухуз даршлукъан гъар жюре хал-къарикан, миллетарикан, тухмиран ва Чаларикин вуйи адми-ириин зурба гъварч, тахтнан ва Чилилан улихъ лизи палтарикди ва пальмайин кюлер хилиль ади дийигъну, гъяркъзуз. ¹⁰Дурари ахъю дихариинди гъарай ипнайи:

«Уърховал тахтниин дельнайи ихъ Адашдин ва Чилилан хилиль а!»

¹¹Хъя тахтналан, ахъодарилан ва юкърид гъяйванатарстарилан илтIикIнайи вари малайикари, тахтнан улихъ жилиина ахъну, Ал-лагъдиз икрам гъапIу. ¹²Дурари варидари гъамци кIуйи:



«Амин!

Дугъриданна уж'вал ва ад, аькьюл, чухсагъулвал, заанвал, къувват ва къудрат гъарсариз аьсариан аьсариз ихъ Аллагъдихъ хъя. Амин».

¹³ Думу ахюдарикан сари узхъан гъерхнийи: «Гъаму лизи палат али адмийир фужар ву ва наънан гъафидар ву?»

¹⁴ «Йиз ахюор, думу увуз ужуди аьгъявш!» – жаваб тувза. Дугъу гъапизуз:

«Мураг зурба бедбахтвалариккан ккудучІвдар ву. Дураги чпин палтар, Чилан ифдиъ дурччу, лизи гъапІну, ¹⁵ гъаддиз дураг Аллагъдин тахтнан улихъ хъя ва Дугъан Хулаъ дураг иишвди-йигъди Дугъан гъуллугъналь а, хъя тахтниин Деънайири дурагин зиин Чан чадур алтІабцциди, ¹⁶ ва дурагиз гъич зат я къурагъвал, я гаш'вал аьгъю хъибдар, я ригъди дураг ургидар, я пис манишнан ялавну ккаагъидар, ¹⁷ гъаз гъапиш тахтниин алии Чилу дураг уърхиди, ва уъмур хру штун булагъарихъна гъахиди. Аллагъди дурагин уларилан гъарсаб нивънан цадал марцц апИди».

Ургубпи печать алдабгъуб

8 ¹Дугъу ургубпи печать алдабгъиган, гъацI сяльтнасиқъан аршариъ сессузвал абхъру. ²Узуз Аллагъдин улихъ ургур малайик дийигъну гъяркъузуз. Дурагихъна ургуб зурна тувну шулу.

³ Жара малайик гъору. Думу гъурбнар ургушван гъвалахъ, кум ккапІру гъизилин гъабсибра хъади, дугъужвуру. Дугъахъна, Аллагъдин вари халкъдин ккарагбариҳъди, тахтнан улихъ хайи гъизилин гъурбнар ургушв'ина хпан бадали, бегъемди ицци ниар хайи, ургу чимарра тувру. ⁴Хъя малайикдин хилиъ айи гъизилин гъабсибиан Аллагъдин улихъ, Дугъан халкъдин ккарагбариҳъди сабси, ицци ниъ хайи кум за шулу. ⁵ Малайикди кум ккапІру гъабразди, гъурбнар ургушвлан цІа гъадабгъну, кабхъуз ипру, хъя думу дюн'яйинди гатІабхъуру, хъасин душв'ин завар раҳуру, гъарай утІубччуру, кьюркълин цІийир кричуру ва жилар т'урччуру.



Ургуб зурна

⁶Хъа ургуб зурна дидиснайи ургур малайик зурнийир рахуз гъязур дұхнайи.

⁷Сарпири гъарабху – ва ифдиҳъди гъибиқынайи мирккна цІа абхуу ва жилиин дабхуу. Дюн’яйин шубубпи пай жилар гъургу, шубубпи пай гъарап ва вари чру укI гъубгу.

⁸Кьюрпи малайикди зурна гъарабху – убгурайи зурба дагъисиб гъюлериизди абхуу. Хъа гъюлерин шубубпи пай шид ифдиз ил-ТїбкІний. ⁹Гъюлеріп шубубпи пай Чївишин гъирмиш гъабхънийи ва шубубпи пай гимийир ккахънийи.

¹⁰Шубурпи малайикди зурна гъарабху – зав’ан чирагъиси убгурайи зурба хяд абхуу. Думу шубубпи пай нирариина ва штарин булагъариина абхънийи. ¹¹Думу хядраз КытІкъли Кыал кІүйи. Вари штарин шубубпи пай къалси кытІкъли гъабхънийи ва гизаф адмийир гъациб штуан гъийихнийи, гъаз гъапиш штар кытІкъли гъахънийи.

¹²Юкъурпи малайикди зурна гъиву – ригъдин ва вазлин шубубпи пай ва шубубпи пай хядар пуч гъапIу. Дуарин шу-шубубпи паяр гъидису ва, акв адарди, иишвандин шубубпи пайси, шубубпи пай ийгъандинра мучIуди гъабхъи.

¹³Узуз айршарикк Тїбхурайи люкъ гъябкъюнзуз. Диidi зурба дихниинди кІурайиб гъеебхъунзуз:

«Гъамус имбуну шубур малайикди хъаъру зурнайин дихарихъан дюн’яйин яшамиш шулайидарин язухъийкІана, язухъийкІана, язухъийкІана!»

¶ ¹Хъубпи малайикди зурна гъиву, ва узуз зав’ан жилиина хяд абхъри гъябкъуз. Диidi кІан ккадру гъайдин ачар тувнайи.

²Диidi кІан ккадру гъайдикан жюлгер ктахъу ва душв’ан, зурба пичраанси, кум утIубччуу. КІан ккадру гъайдиан утIубччуу кум-ру ригъ ва гъава ккапIу. ³Кумруан жилиина елгнагарин гъвар-

чар адахъу. Жилиин айкырабариз айи гъюкум думу елгнагаризра тувнайи. ⁴Елгнагариз, я чру укIаз, я чрушназ, я гъарапиз зарар тутруди, унтI’ин Аллагъдин печатдин лишан алдру адмийириз зарар тувуз, амур дапIнайи. ⁵Елгнагариз думу адмийир иихуз ваъ, хъа хъуб вазлин арайи сузайикк гъитуз буйругъ тувнайи.



Хъа дуарин сузайин учІврушин, аькърабари къацI гъапІиганси, писуб вуйи. ⁶Думу йигъари адмийир аьжал абгури хъиди, хъа бихъури хъибдар, дуар аьжалихъ мягърум хъиди, хъа аьжал ду-раихъан гъебгди.

⁷Думу елгнагар дявдиз гъязур духънайи эскарин гъайвнарси рякъюйи. Думу гъайвнарин кIулариин гъизилин тажарстар али-и, хъа машар адмийинстар, ⁸кушар дишагълийнси ярхидар, сппар асландин кIанчарстар вуйи. ⁹Дуаринин, гар али гъю-бариинси, рукъанстар, фукIа ктидипру палтар алии. Дуарин хлинццарин дих дявдиз ккажаргъурайи аьхочIве гъайвнарин аьрабийирин гъугъисиб вуйи. ¹⁰Дуарин галамар айи рижвар аькъ-рабаринстар вуйи; адмийириз хъуб вазлиз зарап тувру къувват ду-раин рижвариъ айи. ¹¹Дуарин паччагъ кIан ккадрушван мала-йик ву; думу паччагъидж жугъуд Чалниинди Аббадан, хъа грек Чалниинди Аполлион кIуру.

¹²Сабпи дерд гъудубчIвуру. Мегъел мидихъди кьюбсана дерд гъюри ими!

¹³Йирхъурпи малайикдира зурна гъарабху. Узуз Аллагъдин улихъ хъайи, гъизилин гъурбнар ургрушв'ин али юкъуб кIарчна-ан гъюрайи дих гьеебхъуз. ¹⁴Дихну зурна хъайи йирхъурпи ма-лайикдиз гъапи: «Зурба вуйи Ефрат нирихъ дитIнайи юкърид малайикар дудурч».

¹⁵Юкърид малайикарра дудурчуру – дуар гъязурди, гъаму ся-аьтназ, йигъаз, вазлиз ва йисаз (ккилигури), вари халкъарин шубупи пай йибхбан бадали, дерккнайдар вуйи. ¹⁶Гъайвнин къушмарин къадар къодварж миллион вуйи; му къадар узуз гье-ебхъунзуз. ¹⁷Магъа йиз рякъбариан узуз гъайвнарна дуаринин элеънайдар фици гъяркънуш: дуарин али фукIа ктрипру па-лат цаси уьруб, укIуб ва гугутси гъатхуб вуйи; кIулар асландин музмузарстар вуйи; дуарин ушвиани цIа, кум ва гугурт утIуб-ччвурайи. ¹⁸Гъаму шубуб бедбахтали дуарин ушвиани удублIу-райи цIихъан, кумрухъан ва гугуртдихъан вари адмийирин шубупи пай гъийибхнийи. ¹⁹Гъаз гъапиш гъайвнарин къувват дуарин ушвариъна рижвариъ айи, дуарин рижвар битIариз ухшар ву-йи, дуаринин кIулар алии ва гъадму кIуларихъди зарап тувуйи.

²⁰Гъадму бедбахталикарккан гъирмиш дархъиди ккудуччву адми-иир, чпин хиларин ляхнарихъан, швумал духъну, гъудучIундайи:



дураги шейтанаизна гъизиликанна, арсраканна, йифриканна, гъвандиканна, гакъвликан даңылай даңылай, я рябкъюз, я ерхъуз, я гъягъюз даршлу идолариз гъюрмат апбул дипундай. ²¹Дураг гъацира чин я йивнүй ихувалар, я фалчиваляр, я къяппавалар, я тафалвалар дирчнүй, швумал гъахундай.

Дибиржнайи китаб хъайи малайик

10 ¹Узуз дифариъди завариансина гъюрайи сарсаны къудратлу малайик гъяркъуз. Дугъан күл’ин деркучимир алийи, машну ригъдиси нур туварайи, хъа ликар цин бурузарстар вуйи. ²Дугъан хилий, саб къадар ачмиш даңылай кагъаз айи. Дугъу арчул лик гъюлерии диву, хъа гагул лик – жилариин, ³ва зурба дихниинди, аслан арабхрганси, гъарай гъапбу! Дугъу гъарай гъапИган, завар раҳустар, ургуб гъугъруми гафар апбуз хъюгъю. ⁴Ургбиб гъугъумари гафар гъапИган, узу бикбуз гъязур гъахынза. Аммаки узуз завариан гъамци күрайи дих гъеебхъуз: «Ургбиб гъугъумари гъапиб жиниди уъбх. Думу гафар мидиклан!»

⁵Узуз гъюл’инна жилиин дийигъуну гъяркъю малайикди арчул хил завариз за гъапбу, ⁶ва айсариан айсарииз гъарган яшамиш Шулайириинди, завар ва душваъ айиб, жилар ва душв’ин алиб арайиз Гъабхуриинди, сарун ваҳт имдар күри, ху гъапбу!

⁷Хъа гъадму йигъари, ургурпи малайикдин зурна гъарабхган, Аллагъдин сир, Дугъу Чан гъуллугъна гъаши пайгъамбари хабар дебккганси, вари тамам хъибди.

⁸Узуз завариан гъеебху дихну, узухынди илтікін гъапизуз: «Душну, гъюл’инна жилиин дийигънайи малайикдихъан ачмиш даңылайи китаб бис».

⁹Узу, багахъ дұхъну, малайикдихъан гъадму китаб узухына туывуб ккун гъапбу. Хъа дугъу узуз гъапи: «Ма, му илтін, фуниъ күтікъалишин абхъдияв, хъа ушв йиччвси меъли хъибдияв».

¹⁰Узу думу китаб, малайикдин хил’ан дибисну, гъипбу ва йиз ушвниъ, йиччв гъипІганси, меълишин абхъу, хъа фуниъ – ктирсуз даршлу күтікъалишин. ¹¹Хъа узуз гъапи: «Уву аыхючівесь халқарикан, милдетарикан, Чаларикан, ва паччгарикан пайгъамбарвалин гафар хъана пуз буржлу вува».



Кьюр шагьид

11 ¹Узухъна жилар ерцрубсиб маргъ тувнийи ва гъапнийи: «Душну Аллагъдин хал ва гъурбнар ургрушв ебц, хъа гъадму Хуласть икрам апIрударин къадар гъисаб апIин. ²Аммаки Хулахъди хъайи Чатан гъяят гъидип, думу меебцан, гъаз гъапиш душвашишв аллагъсузариз тувна, дурари гирами шагыр ягъчIвурна къюб вазли ликриккан апIиди. ³Узу Йиз кьюр шагьид тувдиза: дураг, Чуру ирин палат алабхъну, агъзурна кьюдваржна йирхъцид йигъян, пайгъамбарси, пайгъамбарвалин гафар кIури гъузди». ⁴Му пайгъамбар – жилин Агъайин улихъ дийигънайи оливайнин къюб гъарна, акв тувру къюб алат ву. ⁵Эгер шлизкIа дурагиз Чурууб апIуз ккун гъабшиш, дурагин ушвниан ца утIубччвиди ва душмнар ургиди. Дурагиз писвал апIуз саризра ккун хъибдар, гъапIиш, гъаци йикIиди. ⁶Дурагиз зав хъябкъюз гъюкум а; дурагихъан чпин пайгъамбарвалин гъуллугъниин или вахтна мархъ дурубгъри гъитуз шулу; дурагиз шид ифдиз илтIибкIуз шлу гъюкум тувна; дурагихъан, чпиз фициб ккундуш, гъациб бедбаҳтванихъди жил алабцIуз шулу.

⁷Дурагин шагьидвал апIру вахт ккудубкIган, кIан ккадрушв’-анзина удубчIву вягъши гъайванат гъадму кьюрид пайгъамбарихъди дявдиз удубчIвиди, гъайванат гъалиб хъибди ва дураг иихиди. ⁸Дурагин майтар ахю шагырин кючейиъ дирчну хъиди. Жара жюрейииинди думу шагыриз, дурагин Агъа хачрак карсу иишваз, Содом ва Египет кIури шулу. ⁹Дурагин майтариз, вари халкъаригъян, тухмиран, чалариан ва миллетаригъян адмийир шубуд йигъанна гъацIаъ лигури гъузди ва дураг кивуз гъитдар. ¹⁰Дюн’яйиниин или адмийир шад хъиди, мяракийр ачмиш апIиди, чиб-чпиз пешкешар апIиди, гъаз гъапиш гъадму кьюрид пайгъамбари дюн’яйин халкъар аззабнакк кkitнийи. ¹¹Шубуд йигъна гъацI улдубчIван, Аллагъдихъан уымрин рюгъ майтариъ учIвиди, ва пайгъамбар чпин ликриина гъудужвиди, хъа дурагиз лигурайидарик зурба гучI кабхъди.

¹² Пайгъамбарииз завариан чпиз: «Мина удучIвай!» – кIурайи зурба дих гьеебхънийи. Душмнариз рякъюри, дураг дифриинди завариз за шулу. ¹³Гъадму вахтна лап яманди жилар тIурччуру ва шагырин йицIубпи пай дарабгъну абхъру. Жилар гъутIурччган,



ургуд агъзур кас гъийихнийи, хъа имбудариз гучI гъабхънийи ва дурари Аършарин Аллагъдин ад за апIуз хъюгънийи.

¹⁴ Кьюбпи дерд гъудубчIвнийи. Хъа магъа шубупби дерд гъоз гъялакди а!

Ургубпи зурна

¹⁵ Ургурпи малайикди зурна хъапIу, ва заварий гъамци кIурайи зурба дихар арайиз гъафи:

«Гъаму дюн’яйин паччагълугъ ич Агъайин ва Дугъан Месигъдин Паччагълугъ гъабхъну. Дугъу гъаргандиз, аьсрариан аьсрариз паччагъвал апIиди!»

¹⁶ Аллагъдин улихъ тахтариин деънайи къарна юкъур ахъюр, жилиина ахъну, Аллагъдиз, вари хилиъ Дибиснайириз, икрам гъапIу. ¹⁷ Хъа гъамци кIури, гъарай идипу:

«Чухсагъул Увуз, Агъа Аллагъ, вари хилиъ Дибиснайир,
гъарган Айир ва Гъахъир,
гъаз гъапиш, Уву Яв зурба вуйи къувват ва паччагъвал
хилиз гъибисунва.

¹⁸ Аллагъсузар аргъарди гъадагъна, хъа гъамус Увукра
хъял кубчIвнавук:
дийихнайдарин суд апIру ва дюн’я чIур апIурайидар
пуч апIру,
ва Яв лукIарди гъахъи пайгъамбрализ,
Яв гирами халкъдиз,
Яв ччвурназ гъюрмат гъапIу бицIи касаризси,
зурба вуйидаризра
лайиклы пешкешар тувру вахт дуфна».

¹⁹ Аършарий Аллагъдин хал абщру ва Душваш Дугъан Йикъарар айи сундух рябкъюри шулу. Хъасин кьюркълин цИийир кричуру, гъарай ахъбуру, гъугъумарин гъугъ ахъбуру, жилар тIурччуру ва гужли миркк убгъуру.

Дишагъли ва аждагъа

12 ¹Хъа завариин зурба лишан арайиз гъору: ригъ алабхънайи дишагъли, дугъан ликарикк – ваз, хъа кIул’ин – йицIи-кюб хядракан вуйи таж. ²Дишагълийик бицIир ка ва азияти-риан чIигъар апIура; думу бицIир апIуз кIерцуз хъюгънайи.



³ Завариин жара лишанра арайиз гыору: зурба цаси уьру аждагъа, ургуб кIул али, йицIуб кIарч али ва кIулариин ургуб таж али. ⁴ Дидин рижвну зав'ан шубубпи пай хядар илжикуру ва жилиинди ахъру. Аждагъа, бицIир апIурайи дишагълийиз къаршуди дугъу бицIир гъапIубси, итIуз ккепIну дийибгънайи. Дугъу бай гъапIу. Думу Бали рукъан чумакъихъди вари халкъариин гьюкум гъабхиidi. Дугъан бицIир Аллагъдихъна, Дугъан тахтнахъна гъахуру. ⁶ Хъа дишагъли ичIи чюлиз гъергру. Душваь дугъаз Аллагъди иишв ккабалгнайи. Дина дугъаз агъзурна къодваржна иирхъцIур иигъян хураг гъабхиidi.

⁷ Хъа завариин Мукаил малайикдина дугъан малайикари аждагъайихъди дяви ккебгъру. Аждагъайи дяви чан малайикар хъади апIурайи, ⁸ хъа дурарихъан гъалиб хъуз гъабхъундайи ва заварии дидин иишв гъудубгнайи. ⁹ Хъасин зурба аждагъа, дегъ заманайин битI, иблис вая Сатана, вари дюн'я улдубгуз гъибртайиб, заварииан жилиина ипнийи. Дишихъди чан малайикарра идирчнийи.

¹⁰ Хъа узуз айршири гъамци кIури зурба дих гъеебхъзуз:

«Магъа хъубкъна уърхувал ва къувват,
васана ич Аллагъдин Паччагълугъ,
ва Дугъан чним Кадатнайирин гьюкум,
гъаз гъапиш ихъ чвийирин фунакар идипну,
Аллагъдин улихъ иишвди-йигъди дурарилан
футнийир апIурайиб.

¹¹ Ихъ чвийир аждагъайиин,
Чилиан ифдинди
ва чпин шагыидвалариинди гъалиб гъахъну.
Дурари аյжалин улихъ чпин уъмур гъайиф гъапIундар.

¹² Гъаци вуйиган шадвалин сес ипай,
айршар ва душван агълар!
Язухъ ву жилин ва гъюлин!
Учвухъна яман хъял ади,
чан вахт хъубкънайиб айгъяди, иблис дуфна».

¹³ Аждагъайиз учв жилиина илдипну гъябкъиган, думу бай гъапIу дишагълийихъ хъебгру. ¹⁴ Дишагълийиз чаз ичIи чюлий улупнайи иишваз, аждагъа дяргърушваз ва шубуд йисна гъацIаь хураг хрушваз Тирхуз, люкъран къюб ахъю хлинцц тувру. ¹⁵ Дишагълийин къяляхъди, думу ккахъбан бадали, аждагъайи чан ушвниан



зурба нир деебтуру. ¹⁶Хъя жили дишагълийиз кюмек апIуру: диди чан ушвар арццура ва аждагъайи чан ушвниан деебту нир убхъуру. ¹⁷Аждагъайиз дишагълийикан яман хъял гъюру ва думу гъитну, дугъян имбу бицIидарихъди, Аллагъдин табшуругъар уърхрударихъди ва Исаикан шагъидвал апIрударихъди дяви гъабхуз гъябгъюру. ¹⁸Хъя аждагъа гъюлин гъирағъдихъ дугъубжвуру.

Гъюл’ан гъяйванат

13 ¹Узуз гъюл’ан, йицIуб кIарч али, ургуб кIул али, кIарчарийн йицIуб таж али, хъя кIуларик Аллагъдиз люкънар кайи вягъши гъяйванат удубчIури гъябкъюнзуз. ²Узуз гъябкъю вягъши гъяйванат леопарддиз ухшар вуйи, хъя ушв – асландинсиб. Аждагъайи дидиз чан қувват, тахт ва зурба гъюкум тувнийи. ³Дидин кIуларикан сабнубдиз йибкIрубсиб зиян дубхъну рябкьюи, аммаки думу зиян сагъ гъабхънийи, ва вари дюн’я, мюгътал дубхъну, гъадму вягъши гъяйванатдихъди гъубшнийи. ⁴Хъя адмийири, аждагъайи чан гъюкум вягъши гъяйванатдиз тувиган, дидиз икрам гъапIу, хъасин, гъамци кIури, дурари вягъши гъяйванатдизра икрам апIуру: «Фуж шулу гъаму гъяйванатдихъ текуз, шлихъан шул мидихъди элегуз?»

⁵Дидиз, дамагъ кайи ва Аллагъдиз люкънар апIру гафар пуз, ихтияр тувнайи ва дидиз гъюкумра ягъчIуруна кыод йигъаз тувнайи. ⁶Диди Аллагъдиз люкънар апIуз чан ушв абццура – люкънар Дугъян ччвурназ, Думу яшамиш шулайишваз ва Айршарин агълариз апIуру. ⁷Дидиз Аллагъдин гирами халкъдихъдира дяви гъабхуз ва гъалиб хъуз ихтияр тувнайи. Дидиз гъацира гъарсаб тухмин, халкъдин, чалнан ва миллетдин зinin гъюкум тувнайи. ⁸Дюн’я арайиз хайиз гъурбан апIуз гъязурди аий Ччилахъ хайи уымрин китабдик ччуураг ктру жилин вари адмийири дидиз икрам апIиди.

⁹ Шлик ерхъру ибар каш, гъит ебхъри!

¹⁰ Шли йисирар дисураш, думу учв йисирди дисиди.

Шли ханжли йикIураш, думу учв ханжлихъбан йикIиди.

Гъамдииндi Аллагъдин гирами халкъдиз чпин мюгъкамвал ва хъугъувал убхюз дих апIура!



Жилиан гъяйванат

¹¹ Хъасин узуз жилиан удубчIвурайи жара вягьши гъяйванат гъябкъуз. Диd'ин, Чил'инси, кьюб кIарч алийи, амма диди аждагайиси гафар апIуй. ¹² Диdиз сабпи вягьши гъяйванатдин-сиb гъюкум тувнайи. Диdi сабпи вягьши гъяйванатдин-диb кюмек апIуйи. Диdi дюn'яйин вари адмийирихъди йибкIруб-сиb зиян сагъ дубхънайи сабпи вягьши гъяйванатдин-диb икрам апIуз гъитуйи. ¹³ Диdi зурба аylаматар улупуий: адмийирин улихъ за-вариан жилариина цIа гъюз гъитуйи. ¹⁴ Сабпи вягьши гъяйванат-дин ччвурнахъян аylаматар улупури, диdi дюn'яйин адмийир улдугуз гъитуйи. Диdi ханжал йивну зиян гъапIу ва, хъана сагъ гъабхъи сабпи вягьши гъяйванатдин гъюрматназ сурат балгуz, буйругъ гъапIу. ¹⁵ Гъадму суратну гафар апIбан ва диdi чаз ик-рам дарапIрудар йихбан бадали, вягьши гъяйванатдин суратни-ин ил алапIнийи; диdиз гъаци ил алапIуз удукурувал тувнайи. ¹⁶ Диdi варидализ: гъулугъчириз ва гъулугънахъ хътрудариз, дев-летлуйириз ва касибализ, лукIариз ва азаддариз – арччул хлик, ясана унтIак лишан капIуз гъитуйи. ¹⁷ Дициб лишан (вягьши гъяйванатдин ччвур, ясана число) кадрурихъди мутму я гъадаб-гъуз, я масу тувуз гъитри гъахъундар. ¹⁸ Мушваъ аькъюл лазим ву: фикирлу кас гъит, вягьши гъяйванатдин числойиъ аий мя-найнин гъаври ахъри. Думу число адмийиринуb ву, магъа дидин число: 666.

Сион дагъдин цIийи мяъли

14 ¹Хъа узуз гъяркъюнзуз: магъа, Сион дагъдинн Чил дийигъ-на, Дугъаҳъди – гъадму варжна ягъчIвурна юкъуд агъзур, унтIин Исайин ччвур ва Дугъан Адашдин ччвур диdикIнайдар.

²Хъа узуз завариан, ягъли гъарзарилан убсрайи нирин гъугъ-сиb ва завар раҳбан гъугъумарстар дихар гъеерхъунзуз. Узуз гъе-ерхъу дихар гъашдар, мукъмар йивурайи чонгринстар вуйи.

³Дурари тахтнан улихъ ва юкърид гъяйванаттарстаринна къарна юкъур ахюдарин улихъ цIийи мяъли апIурайи. Думу мяъли, дюn'-яйин тухмigъян гъядягънайи гъадму варжна ягъчIвурна юкъуд агъзур касдиҳъантIан гъайри, сарун гъич сарихъанра кIваъланди дубгъуз шулдайи.



⁴Дураг дишагълиирихъди чиркин дархыидар, хъа чпин марцишин гъюбхдар ву; дураг, Ччил наанди гъушиш, Гъадгъахъди гъягърудар ву. Дураг имбу инсаниятдигъян гъядягънайдар ву. Дураг Ччилаз ва Аллагъдиз бин ва ккебгъувал вуди ка-дагънайдар ву. ⁵Дурагин мелзназ кучIал аygъдайи, дураг кацIадар дар.

Шубур малайик

⁶Хъасин ууз, аршарикк, гъаргандин Ужувлан хабар хъади, жи-лариин гъарсаб миллетдиз, тухмиз, чIалназ ва халкъдиз дидкан хабар дебкри, тIирхурайи жара малайик гъяркъюнзуз. ⁷Дугъу ахю дихниинди гъарай гъапIу:

«Аллагъдихъан гучI апIинай ва Дугъан ад за апIинай!

Гъаз гъапиш Дугъу суд апIру сяйт хъубкъна!

Гъаддиз зав, жил, гъюл ва булагъар яратмиш ГъапIуриз икрам апIинай!»

⁸Сарсаны, къорпи малайикра, сарпириин къяляхъди тIирхури, гъафи ва гъарай гъапIу:

«Ккадабхъну, ккадабхъну, ккадабхъну Вавилон,
машгъур меркез,
чан къяппавалин чяхрихъди вари халкъар тухъ
гъапIу шагъур!»

⁹Сарсаны, шубурпи малайикра, къорпириин къяляхъди, зурба дихниинди чIигъар апIури, гъафи:

«Эгер шли вягъши гъайванатдиз ва дидин суратназ икрам апIураш ва хил'ин, ясана унтI'ин дидин лишан капIнаш, ¹⁰гъад-гъу Аллагъдин хъял айи зах'ан фукIа клибикидди гъязур гъапIу чяхир убгъиди. Дицирикан, цIий ва гутуртдиль, гирами малайикарин ва Ччилан улихъ, зивзивар кчIюкъиди.

¹¹Дурагикан кчIюкъорайи зивзиварин кум гъаргандиз аьс-рариан аьсрариз завариз удубчIура. Я ийгъну, я иишвну си-кинал адар вягъши гъайванатдиз, дидин суратназ, ва дидин ччвурнахъ лишан жандиин алапIнайидариз». ¹²Гъамдинди Аллагъдин гирами халкъдиз, Аллагъдин табшуругъар тамам апIурайидариз ва Исаиз аygътлу вуйидариз мюгъкам хъуз дих апIура.

¹³Мидхъан ууз завариан гъамци кIурайи дих гъеебхъуз:



«БикI: „Хушбахтаврар ву, Иса Месигъдихъ хъугъну, гъийих-дар“; „Ав, думу гъаци ву, – кIура Рюгъну, – дурари, чпин гъа-гъишнариккан ккудучIвну, рягъятвал гъадабгъура, гъаз гъапиш дурари гъапIу ляхнар гъадрарихъди гъагъиди“».

Хъугъувалин иган

¹⁴ Ва магъа узуз лизи диф гъабкъуз, хъа дифриин фуж-вуш Инсаниятдин Бализ ухшар алир деъна. Дугъан кIул’ин гъизилин таж ал, хъа хилль учIру дагъур а. ¹⁵ Хъа сарсана малайик Аършарин хул’ан дифриин деънайириз аыхю дихниинди чИгъ апIури, удучIву:

«Яв дагъур гъапI ва убг!
Гъаз гъапиш иган убгру вахт хъубкъна –
дюн’яйин мягъсул хъубкъна!»

¹⁶ Дифриин деънайири, хил хъапIну, чан дагъур жилиина гатIабхъуру, ва жилин вари иган дубгну шулу.

¹⁷ Хъасин Аършарин Хул’ан жара малайик удучIвуру, дугъахъра учIру дагъур хъайи.

¹⁸ Сарсана цин аыховал хъайи малайикди, гъурбнар ургрушв-лан гъедергну, учIру дагъур хъайи малайикдиз аыхю дихниин-ди кIуру:

«ГъапIну яв дагъур,
дюн’яйин или тIумтIарин багъдиан
тIумтIарин кабар ккудuti,
гъаз гъапиш дураг хъуркъна».

¹⁹ Малайикди чан дагъур дюн’яйинди гатIабхъуру ва тIумтIар ккудutiуру, хъасин дураг, Аллагъдин хъял айи кчIюкърушваз-ди ахъру. ²⁰ Хъа кабар шагърин гъирағъдихъ, ликариккан апIури, кчIюкъюру, ва кчIюкърушван даргарилан ифи улдубуз хъобгъру. Улдубзу ифди, дийибгънайи гъайвнин фурийиккнакъан ягъалди, юкъуб альтраф шубудварж километрин манзилназ жил алабшIуру.

Ургур малайик ургуб бедбаҳтвал хъади

15 ¹ Хъасин завариин узуз сабсана зурба ва аъжайиб лишан гъябкъюнзуз: ургур малайикдихъ ургуб аъхиримжи бедбаҳт-вал хъа. Гъамрариинди Аллагъдин хъял ккудубкIурайи. ² Узуз цИхъди дибикънайи гюзгдиз ухшар али гъюл гъабкъуз. Гъадму



гюзгдин гьюлихъ вягьши гъайванатдин, дидин суратниин ва дидин ччвурнан числойиин гъалиб гъахыдар дугъужвнайи. Ду-
пар Аллагъдин чонграр хъади дугъужвнайи.³ Дураги, Аллагъдин
гъуллугъчи Мусайин мяьли ва Чилан мяьли апIурайи:

«Зурба ва айжайиб вуяв ляхнар, Агъа Аллагъ,

вари хилий Дибиснайир!

Дугъри ва гъякъ вуяв рякъяр, халкъарин Паччагъ!

⁴ Шлиз, Агъа, Увхъан гучI хъибдар,

ва шли Яв ччвур адлу апIидар??!

Гъаз гъапиш Уву сар вува, Гирамир!

Ва Яв улихъ дахъди икрамназ!

Гъаз гъапиш Яв гъякъвал ачухъ гъабхъну!»

⁵ Хъасин узуз гъябкъюнзуз: завариъ Аллагъдин Хал ачмиш дапIну – Шагыдвалин Чадур, ⁶хъа душв'ан, ургуб бедбаhtвал хъади, ургур малайик удучIву. Дурагииин марцци крабчIру палат алии ва дураги юкъв'ан гъизилин Чулар идитIнайи. ⁷ Гъадму юкърид гъайванаттарстарикан сари ургрид малайикарихъна, айс-
рариан айсрапиз яшамиш шулайи Аллагъдин хъолу ацIнайи ур-
губ гъизилин гъаб туви. ⁸Хъа, Аллагъдин адлувалиан ва Дугъан
къудратнаан кумрахъди Айшарин Хал абцIру. Душвазди, са-
бан ургрид малайикарихъ хъайи ургуб бедбаhtвал ккудукуКъян
гагъди, гич сарихъанра учIвуз гъабхъундайи.

Аллагъдин хъял айи зах

16 ¹Хъасин узуз, Айшарин Хул'ан ахю дихниинди ургрид
малайикариз К'урайи дих гъебхъунзуз:

«Гъараҳай, ургуб гъабраъ аий Аллагъдин хъял дюн'яйина
удубзай!»

² Сарпир удучIвну, дюн'яйина чан гъаб удубзуру ва бухъ ккайи
учIвру ва мурдал зийнар хуру. Дураг вягьши гъайванатдин лишан
кайи ва дидин суратназ икрам апIру адмийириин алаънийи.

³ К'юрпир чан гъаб гъюлерииинди удубзуру, ва шид майтин
ифдиз илтIибкIуру – вари гъюлий аий Чивишин йибкIуру.

⁴ Шубурпир чан гъаб нираииинди ва булагъарииинди удубзу-
ру, ва дурагга ифдиз илтIибкIуру. ⁵Хъа штарин малайикди гъа-
пив гъебхъузуз:

«Уву гъякъ вува,



эй Айир,
 Гъахъир
 ва Гирамир,
 гъамци жаза гъадабтІбаз:
⁶ дураги гирамидарин ва пайгъамбрарин
 ифи удубзну,
 гъаддиз Уву
 дурагиз ухъуз
 ифи тувунва —
 дураг лайикъ ву!»

⁷ Хъа узуз, гъурбнар ургру йишвура фици кІуйиш гъеебхъуз:
 «Ав,
 Агъа Аллагъ,
 вари хили Дибиснайир,
 дугъри ва гъякъ ву
 Яв адабтІурайи жаза!»

⁸ Юкъурпири чан гъаб ригъдиинди улубзуру, ва ригъдиз чан цІинди адмийир ургуз гъитру къувват тувру. ⁹ Яман убцруш-наан адмийир ургуири ва гъацдар бедбаҳтвалар гъау Аллагъдин ччурназ агъарап Іуийи. Аммаки дураг, чпин тІулар гъитну, швумал гъахъундайи ва Дугъан ад гъапІундайи.

¹⁰ Хъурпири чан гъаб вягъши гъайванатдин тахтниинди удубзни-и ва дидин паччагъалугъ мучІушна ѿхънийи. Адмийири, ицц-рушнаан чпин мелзарииин къацІар алахъуйи, ¹¹ ва бедбаҳтваларна иццрушна гъаъну кІури Аършарин Аллагъдиз агъарап Іуийи. Аммаки дураги чпин тІулар дирчундайи, я гардандиз гъидисундайи.

¹² Йирхъурпири чан гъаб машгъур нир Ефратдинди удубзуру ва дидиль айи шид, ригъ гъудубчІвру терефариъ айи паччгъариз рякъ ачмиш хъуз, ебццуру. ¹³ Узуз, аждагъайин ушвниан, вягъши гъайванатдин ушвниан ва кучІлин пайгъамбрин ушвниан чру гъюбариз ухшар айи шубуб чиркин рюгъяр удучІвури гъяркъуз. ¹⁴ Мураг, аъламатар улупру жинарин рюгъяр ву: дураг, Аллагъдин, вари хилии Дибиснайириин зурба гъиямат йигъаз дявдиз гъязур иихъай кІури, дюн'яйин вари паччгъарихъна гъягъюри.

¹⁵ «Магъа, Узу тНафалси, хабарсузди гъидиза. Хушбаҳтавар ву ккилигурайир ва чан палтар уърхюрайир, дицир гъяцІалди гъя-гъидар, ва гъич саризра дугъан айибнан йишвар рякъидар!»



¹⁶ Ва дурари пачгъар жугъуд чалниинди Армагедон кIуру иишв'ина уч апIуру.

¹⁷ Хъя ургурпи малайикди чан гъаб гъавайизди удубзуру. Аьршарин Хулаъ, тахтнахъан гъамци кIурайи зурба дих гъору: «Тамам гъапIну!»

¹⁸ Хъя кьюркълин цIийир, гъарийир, гъугъумар ва жилар тIурччуvalар шулу. Гъамкъан яманди жилар тIурччуval дюн'яйин адми гъахъихъанмина гъахъундай. ¹⁹ Машгъур вуйи шагъур шубуб иишваз гъутIубкIнийи, Аллагъ гъясбикк ккадруарин шагърап ккадахънийи. Машгъур вуйи Вавилон кIуру меркез Аллагъди кIваин гъапIнийи ва дидиз Дугъу Чан пис хъял айи чяхрин зах тувнийи. ²⁰ Хъя вари островар гъудургнийи, дагълар дихъури имдай! ²¹ Завариан адмийириина иирхъцIур килакъан айи мирккар гъургънийи. Гъамциб миркклини бедбаhtвал гъапIу Аллагъдиз адмийири хъя яман агъарап апIуйи, гъаз гъапиш му бедбаhtвал гизаф ахъюб вуйи!

Вавилондин суд

17 ¹Ургуб гъаб хъайи ургур малайикдикан сар узухъна гъафнийи ва узухъди гъулхнийи:

«Лиг, фициб жазайиз ккилигураш гизаф нираин или Машгъур Къяппа. ²Дюн'яйин пачгъари дугъахъди къяппавал гъапIнийи, ва дугъан къяппавалин чаяхъди дюн'яйин адмийир тухъ гъахънийи».

³ Хъасин узу Гирами Рюгъну ацIийзу ва ичIи чюлиз гъухнийзу. Узуз душватъ, Аллагъдиз дидикIнайи люкънарихъди алабцIнайи уьру вягъши гъайванатдин деъну, дишагъли гъяркъзуз. Думу вягъши гъайванатдин ургуб кIул ва ийцIуб кIарч алии. ⁴ Дишагълийин лап уьру ва ал рангнан палат алии. Дугъан къашкъамат гъизилиинди, багъа гъванариинди дабалгнайи. Хилий дугъу чан къяппавалин чиркишнари ва айибну абцIнайи гъизилин зах дебиснайи. ⁵ Дугъан унтI'ин жини сир айи гъамциб ччвур дебикIнайи: «Вавилон – машгъур меркез, дюн'яйин айибинанна къяппаваларин дада».

⁶ Узуз думу дишагъли, Аллагъдин халкъдин ифи ва Исаикан шагыидвал апIрударин ифи дубгъну, пиян духъну, гъяркъзуз. Узуз думу гъяркъиган, гъах гъахыр, узу йиз фикрихъна гъюрадайза. ⁷ Малайикди узуз гъапи:



«Уву гъаз мюгътал гъахьива? Узу увуз дишагълийикан ва думу элеъну гъягъюрайи, ургуб кIулна йицIуб кIарч али вягъши гъяйванатдикан сир ктибтидизавуз. ⁸ Увуз гъябкью вягъши гъяйванат саб вахтна аий, хъа думу сарун имдар. Гъамус, багарихъди думу, кIан ккадрушв'ан айжал хъудубкънайиб, удубчIвиди. Дюн'я халкъ апIайиз Умрин китабдик ччуурап дидикIну адру дюн'-яйин вари адмийир, думу вягъши гъяйванат гъябкъиган, мюгътал хъиди, гъаз гъапиш саб вахтна думу аий, хъа гъудубгнийи, хъа гъамус хъана ачмиш хъибди. ⁹ Мушваъ гъавриъ ахъуз фагъум ва айкъюл лазим ву. Ургуб кIул – мурап, дишагъли деънайи ургуб тепе ву. ¹⁰ Дурап (ургуб кIул) – ургур паччагъ ву; гъамус-диз хъур гъийихну, сар ими, хъа имбур мегъел дуфнадар, ва, думу гъафиган, дугъан думукъан йигъяр хъидар. ¹¹ Фила-вш ЧIивиди аий вягъши гъяйванат, гъам сяльтна дубкIнайиб – му гъядму ургур паччгъарси миржирпи паччагъра ву, думу чан айжал-нахъна гъяра. ¹² Увуз гъяркью йицIуб кIарч, мегъел паччагъвал ккубкънадру паччгъар ву,amma дурализ вягъши гъяйванатдихъди сатIиди цIиб вахтназ паччагъвал ккубкъди. ¹³ Дурарин сабстар метлебар ву, думу паччгъари чпин къувватна гъюкум вягъши гъяйванатдихъна тувди. ¹⁴ Дурари Чилахъди дяви гъабхиidi, Чил дурариин гъалиб хъиди, гъаз гъапиш Думу агъириин Агъа ва паччгъарин Паччагъ ву. Дугъахъди сатIиди, Чав дих дапIнайдар, Чав кадагънайдар ва Дугъахъ хъугърайидар, агътлу ву-ийидар хъиди».

¹⁵ Хъа малайиқди узуз гъапи:

«Увуз рякъюрайи Къяппа деънайи нирап – мурап халкъар, ад-мийириин ахю гъварчар, миллетар ва Чалар ву». ¹⁶ Увуз гъябкью йицIуб кIарчназ ва вягъши гъяйванатдиз думу Къяппа даккун хъиди ва дугъхъан вари девлет тадабгъну, фукIа илимдарди гъя-цIал апIиди. Дурари дугъан жандак иПиди ва цIигъ убгиidi. ¹⁷ Гъамци дурарихъди апIуз гъитур Аллагъ ву. Агъайн ният гъа-циб вуйи. Аллагъди, Чан гафар тамам хъайизкъан, дидин хилиз гъюкум гъюз гъитнайи. ¹⁸ Хъа увуз гъяркью дишагъли – му вари дюн'яйин паччгъарин зиин паччагъвал гъабхурайи зурба ва маш-гъур шагъур ву.



Вавилон ккадабхъуб

18 ¹Хъасинси узуз завариан гъюрайи, хилиъ зурба гьюкум айи жара малайик гъяркъуз. Дугъан адлувалиан жил нурлу тъабхъний. ²Дугъу къудратлу дихниинди гъапи:

«Ккадабхъну, ккадабхъну машгъур меркез Вавилон!

Думу шейтІнар диргрушв ва гъар бабат чиркин

рюгъярин мугъара,

гъар бабат чиркин жакъварин мукъ,

гъар бабат чиркин ва хяви вягъши гъяйванатарин макан ву;

³ гъаз гъапиш думу къяппайи чан кач'валин яман чяхир

вари халкъарихъди убгъуз гъитний;

дугъахъди дюн'яйин вари пачгъари къяппавал гъапІний;

дугъан хазнайин къадар адрувалилантина

ариш-веришчайири чпиз девлет уч гъапІний».

⁴Хъа узуз завариан кІурайи жара дих гъеебхъуз:

«Йиз халкъ,

дугъан гунгъарин иштракчийр учву дархъбан бадали

дугъан бедбахтвалар учвук ктрукІбан бадали,

дугъхъан ярхла йихъай.

⁵ Гъаз гъапиш дугъан гунгъар завариккна ккудукуна,
ва Аллагъди дугъан алчагъ ляхнар кІваин алаура.

⁶ Гъаддиз дугъаз,

дугъу учвуз гъапІуб апІинай,

кьюб ражари артухъ дугъан ляхнариз кымат тувай;

кьюб ражари артухъ ижми чаяхир дугъан захай! убзай!

⁷ Дугъан фукъан ад ади ва дугъу фукъан кефер
апІури гъахънуш,

гъадмукъан аyzбар ва дерд тувай дугъаз!

Гъаз гъапиш дугъан кІваан гъаму гъябгъюра:

„Узу падишагъ-ханумси деъназа,

узу ачІинир дарза ва дерд узуз гъябкъюндарзуз!“

⁸ Магъа гъаддиз, сабхилди дугъ'ина бедбахтвалар гъиди:
аъжал, дерд, гаш'вал,

гъацира думу цИигъ ургиди.

Гъаз гъапиш, дугъан суд гъапІу Агъа Аллагъ

къудратлу ву».



⁹Дугъак кабхъну цана кум гъябкъиган, дугъахъди алчагъ'валирийди ва гъизилиан идиргъури яшамиш гъаши дюн'яйин пачч-гъар дугъахъ ишиди ва дердер зигиди. ¹⁰Дугъан азбариз гъирагъдихъ дийигъну лигури ва гукIнишну гъадагъну, дюн'яйин паччгъари пиidi:

«Язухъ вуда, язухъ вуда яв, эй Вавилон,
машгъур вуйи меркез, къудратлу вуйи меркез.
Саб гагъди ув'ина яв къазийр гъафида!»

¹¹⁻¹³Ариш-вериш апIрударра дугъахъ ишуйи ва гъам зигуйи, гъаз гъапиш сарун дуарин мутмийр: гъизилин, арсан, багъа гъванарин ва жемчугдин, назук ирин, къириб-жюржюрин, шелкдин ва ал рангнан парчайирин, лимондин гъаарин гъагъар; флин кIурбин гъаржюре шей'арин ва багъа гакIвликан, бронза-йикан, рукъкан ва мармардашдикан ктау гъабарин гъагъар; хуррагнак кахъру гъаарин гъеерццу галарин, гъеерццу укIарин, ищи ниар хъайи чимарин, мирра ва ладан айттарстар ягъарин; чяхарин, оливкиириин ва чимарин, учувуди гъярягъю хюйин, дяхнарин, иициарин ва марччарин, гъайвнарин, айрабийирин, лу-кIарин гъагъар сарира гъадагъури имдайи.

¹⁴«Яв кIван тямягъ хъайи йимишар сарун увуз имдар;
яв нурлувал ва девлет вари пуч гъабхъну.
Сарун гъич зат дуарар увухъ хъидар!»

¹⁵Гъамцдар мутмийириинди ариш-вериш апIрудар ва Вавилон-дин падишагъ-ханумдилантине девлетар уч гъапIдар, дугъан азбар гъяркъган, мяхъ кивну, гъирагъдихъ дийигъиди ва дуарии, ишури, жан гъадагъури, ¹⁶пиidi:

«Язухъ вуда, язухъ вуда, машгъур меркез,
назук ирин палатдиль убчIвнайиб,
лап уьру ва ал рангнан парчайирий айиб,
гъизилин, багъа гъванарин ва якъут-мержандин нур
тuvрайи шагъур!

¹⁷ Фициб девлет саб гагъди пуч гъабхъундарин!»

Хъа вари гъюлерииин гимийир хъаърудар, вари гимийирий айидар, вари гимийириин ляхин апIурайидар ва вари гъюлерииин чипиз девлетнахъ хъайидар гъирагъдихъ дийигънийи, ¹⁸ва дуарии, меркездик кабхъу цин кумрахъинди лигури, ишларин гъарай-ниинди кIуйи:



«Фу тевуз шул машгъур меркездих?»¹⁹ Хъасин дураги чин
кІуларин дерднаан рюкъ алабхъуйи, хъа, ишури, гъарай или-
пуйи:

«Язухъ вуда, язухъ вуда яв, машгъур меркез!

Гыол'ин гимийир хъарайидар

вари гъамгъан девлетналан арбаб гъахъну.

Саб гагъди душв ичи чюлиз илтИбкIну!»

²⁰ «Аммаки уву, зав, шадвал хъап!

Шадвал хъапIай, гирамидар, вакилар ва пайгъамбрар,
дугъу учв'ан удубзу ифдилантина

Аллагъди дугъаз завал гъядябхъюз гъитну!»

²¹ Хъасин къудратлу малайикди, рягънин ахалсив зурба гъван
гъадабгъну, гъюлизди гатIабхъну, кIуру:

«Гъамциб къувватниинди илдипну Вавилон,
машгъур меркез!

Думу сарун арайиз гъибдар!

²² Мукъмарин сесер сарун хъидар,
саризра ерхъидар чонгюр йиврудар,
швутIрам ва зурна йиврудар.

Я шей'ар апIрудар,
я шей'ар апIрушвар
сарун уву хъидар.

Рягъярин ахларин сесер
сарун саризра ерхъидар.

²³ Шагърий акв апIру алатдин акв
сарун саризра рябкъидар.

Швушв хурайиринна швушван сесер
сарун саризра ерхъидар.

Гъаз гъапиш, яв ариш-вериш гъабхрудар дюн'яийъ
зурба касар вуйи;

гъаз гъапиш, вари халкъар уву яв тIилисимдинди
кучIлин рякъюхъна гъахунва;

²⁴ гъаз гъапиш, пайгъамбрарин ва гирами касарин ифи,
дюн'яийин вари йивну гъийихдарин ифи
гъаму шагърий а!»



Халкъди аършариъ Аллагъдиз мяълийир апIура

19 ¹Хъасин узуз аършариъ зурба гъварч адмийирин шадвалин гъарайнан гъугъ гъебхъунзуз:

«Аллилуя!

Уърхувал, ад ва къудрат
ихъ Аллагъдихъ хъа,

² гъаз гъапиш, дугъридар ва гъякълудар ву Дугъан жазийир:
Дугъу Машгъур Къяппайн, диван гъапIну,
вари дюн'яйин чан алчагъвал артмиш гъапIиган;
Дугъу дугъаз,
Чан лукIарин ифдиз дилигну,
жаза адабтIну!»

³Хъанара адмийирин гъварчну гъарай гъапIу:
«Аллилуя!

Думу алчагърин кум аъсрариан аъсрариз завариз
удубчIвури хъиди!»

⁴Къарна юкъур аъхюр ва юкърид гъайванатарстар, Аллагъдиз икрам апIури, тахтниин Деънайирин улихъ гъамци кIури, жилина ис ахъу:

«Амин! Аллилуя!»

⁵ Ва тахтналан гъамци кIурайи дих гъабши:
«Ихъ Аллагъдин тяриф апIинай,
вари Дугъан гъуллугъчийр,
вари Аллагъдиз гъюрмат апIрудар,
цIиб вуйидар ва машгъур вуйидар!»

⁶Узуз адмийирин зурба гъварчнан гъугъ, ясана урсрайи штарин гъугъ, ясана къудратлуди завар рахурайи гъугърумарин гъугъсиб дих гъебхъунзуз:

«Аллилуя! Агъа, ихъ Аллагъ,
вари хилий Дибиснайир, паччагъди дийигъну!

⁷ Шад хъидихъ ва шадвалин гъарай ипдихъ,
Дугъан ад за апIидихъ,
гъаз гъапиш Чилан сумчир а!
Дугъан швушв гъязур духъна:

⁸ швушваз назук ирин нурлу ва марцци палат тувна!

Назук ир – му Аллагъдин гирами халкъдин гъякъ ляхнар ву».



⁹Хъасин малайикди узуз кІуру:

«БикI: „Хушбахтаврар ву Ччилахъна сумчрин гешт хъапIуз
дих дапIнайидар!“

Ва, давам апIури, малайикди гъапизуз:

„Магъя Аллагъдин гъякъ гафар!“»

¹⁰Узу, му малайикдиз икрам апIарза кІури, дугъан ликариккна
ис алахъза, хъа дугъу узуз гъапи:

«Лиг, мици мапIан! Узура, увуси ва яв гъардшарси, Исаикан
шагыидвал апIурайи лукI вуз! Аллагъдиз икрам апIин! Гъаз гъа-
пиш гъаму пайгъамбарвалин гафарин мяна Исаикан шагыидвал
апIуб ву».

Лизи гъайвниин элеънайир

¹¹Хъасинси узуз зав атIабццну гъябкъуз: магъя лизи гъайван
ва дид'ин Элеънайир. Дугъаз Дугъри ва Гъякъ Кас кІуйи, Дугъу
гъякъ'валиинди дяви ва суд апIуру. ¹²Дугъан улар убгурайи ца-
си ву, Дугъан кІул'ин гизаф тажар ал. Дурапик, Дугъаз ЧазтIан
гъайри, саризра аygъду ччвур дибикIана. ¹³Дугъ'ин ифдик кипна-
йи валжагъ алии. Дугъан ччвур: «Аллагъдин Гаф» вуйи. ¹⁴Лизи
гъайвнариинди, назук ирин лизи ва марцци палат алди, Дугъахъ-
ди аyrшариан къушум хъайи. ¹⁵Аллагъдин Гафнахъ хътругърудар
пуч апIуз Дугъан ушвниан учIру ханжал удубчIвурайи. Дугъу ду-
рар рукъан чумакъикк ккаъди: Дугъу чяхир кчIюбкърушваь Ал-
лагъдин, вари хили Дибиснайириин, яман хъялнан чаяир кчIюб-
къюра. ¹⁶Дугъан валжгъииин ва жвукъриин «паччъарин Паччагъ
ва агъириин Агъя» ччвур дибикIнайи.

¹⁷Узуз, ригъдин дийигъну, заварикк Тирхурайи вари жакъва-
риз зурба дихниинди чIигъ апIурайи малайик гъяркъуз:

«Эй, гъамина, Аллагъдихъна, хябяхъдин машгъур хураг ипIуз
уч ийхъай! ¹⁸Паччъарин, къушмарин ахюдарин, къудратлударин,
гъайвнарин ва дурариин элеънайидарин, лукIарин ва азадкраб-
рин, цIиб ва зурба вуйидарин жандкарин йикк ипIидичва».

¹⁹Хъа узуз, лизи гъайвниин Элеънайирихъдина Дугъан къуш-
марихъди дявидиз удубчIвнайи вягъши гъайванат гъябкъуз. ²⁰Вягъ-
ши гъайванатна кучIлин пайгъамбар гъидису. КучIлин пайгъамб-
ри вягъши гъайванатдин гъюрматназ аylаматар улупуйи. Дугъу
гъадму аylаматариинди вягъши гъайванатдин лишан капIнайидар



ва дидин суратназ икрам апIурайидар алдатмиш гъапIнийи. Ду-
пар кьюридра Чивиди имиди убгурайи гугуртдин дагрий ирчу.
²¹ Имбудар лизи гъайвниин Алирин ушвиан удубчIурайи ханж-
лихьди гъийихнийи, ва вари жакъвар дуарин майтарин йикка-
рихьди ацIнийи.

Агъзур йис

20 ¹Хъа гъадмуган, кIан ккадрушван ачар хъади ва хилий
аъхю зунжур ади, завариан гъюрайи малайик гъяркъуз.
²Дугъу аждагъа, дегь заманайин битI, яни иблис вая Сатана, ди-
бисну агъзур йисазди йибтIну, ³кIан ккадрушвазди ипру ва, хал-
къар алдатмиш дарапIбан бадали, агъзур йис гъябгъайизъян,
хъябъыну, зиълан печать йивуру. Хъасин думу сацIиб вахтназ де-
ебтул лазим вуйи.

⁴Хъа узуз, суд апIуз гъюкум тувнайидар деънайи тахтар ва,
Исайикан шагьидвал дапIну ва Аллагъдин Гафналантина ккахъ-
ну, кIулар алдатIу рюгъяр гъяркъуз. Мураг вягъши гъайванат-
диз, я дидин суратназ икрам дарапIдар ва унтI'ин, ясана хил'ин
дидин лишан капIуз гъидритдар ву. Дураг Чиви гъахънийи, ва
дуарии Месигъидхьди агъзур йисан паччагъывал апIиди. ⁵Хъа им-
бу дийихнайидар, агъзур йис гъябгъайиз, Чиви хъидар. Му саб-
пи Чиви хъувал ву. ⁶Хушбахтаврар ва гирамидар ву сабидарди
Чиви гъашидар! Мурагин зини къюбпи аյжализ гъюкум адар.
Дуарикан Аллагъдин ва Месигъдин гъуллугъчийр хъиди, ва ду-
арии Гъадраихьди агъзур йисан паччагъывал апIиди.

Иблисдиз жаза

⁷Агъзур йис гъубшиган, иблис дустагъдиан деебтиди, ⁸ва ди-
ди, дюн'яйин юкъуб терефназ дубшну, яни Гогдинна Магогдин
ийишвариз дубшну, халкъар алдатмиш апIури, дураг дявдиз уч
апIиди. Дуарин къадар гъюлихъ гъумкъан ву. ⁹Вари жил дубисну
дуфну, дуарии Аллагъдин гирами халкъар айишв ва Аллагъдин
ккуни шагъур къялай тIапIу. Хъа, завариан цIа дубгъну, Иблисдин
къушум вари тIанкъ гъапIу. ¹⁰Дураг алдатмиш гъапIу Иблис гу-
гурт убгурайи цин дагризи — вягъши гъайванатна кучIлин пай-
гъамбар айи ийишвазди — ипру. Дуарикан ийишвди — йигъди, айс-
ариан айсариз зивзивар кчюкъюри хъиди.



Гъийихдарин суд

¹¹Хъя узуз, зурба лизи тахт ва дид'ин Деънайир гъяркъуз. Дугъян машнахъан вари жил ва зав гъергний, дураг дихъури имдай! ¹²Узуз гъийихдар, машгъур ва цИб вуйидар тахтнан улихъ дийигъну гъяркъуз. Китабар арццу, хъасин сабсана китаб абццу. Му Уъмрин китаб вуйи. Хъасин гъийихдарин суд, китабарий дибикІнайиси, чпин ляхнариинди гъапІу. ¹³Гъюлери чпиль айи дийихнайдар тувний, аյжали ва жегъеннемди чпиль айи дийихнайдар тувний, ва гъарсар касдин, чав гъапІу ляхнариз дилигну, суд гъапІу. ¹⁴Хъасин айжална жегъеннем цІин дагризди ирчний. Ари гъаму кьюбпи айжал ву – цІа алди, убгурайи дагар. ¹⁵Уъмрин китабдик дибикІну адрудар цІин дагризди гатІахъний.

ЦИИИ Ерусалим

21 ¹Хъя узуз цИии зав ва цИии жил гъябкъуз. Гъаз гъапиш сифтейин заварна жилар гъаргандиз гъудургний ва гъюлер сарун имдай. ²Узуз Гирами Шагъур – цИии Ерусалим гъябкъуз. Думу завариан Аллагъдихъан, жилириз ккилигурайи швшущи кабалгну, ис гъабхъний. ³Узуз тахтналан кІурайи аыхю дих гъебхъуз:

«Магъа Аллагъ дуланмиш шлу йишв,
Думу адмиирихъди сатІиди яшамиш хьиди!
Дураг Гъадгъян халкъди хьиди!
Ва Аллагъ гъадраихъди хьиди, ва гъадраиз
Думу Аллагъ хьиди.

⁴ Дугъу дурагин уларилан гъарсаб нивгъ марцц апІиди.
Айжал сарун хъибдар,
сарун дердер, ишлар, иццрушнар хьидар,
гъаз гъапиш, муганайиздинуб вари гъаргандиз гъубшну».

⁵Тахтниин Деънайири гъапи:
«Лиг, Узу вари цИийиб арайиз хураза!» Хъя гъапи:
«БикІ, му гафар вари гъякъ ва дугъри ву».

⁶Дугъу гъапизуз:
«Тамам гъабхъну! Узу – Альфа ва Омега, Эвел ва Аххир вуза.
Гъах духнайириз уъмрин булагъдиккан Узу чІанади шид убхъуз гъитдиза. ⁷Гъалиб гъахъириз Узхъян гъаму вари ирсди рубкъиди.



Гъацириз Узу Аллагъ хъидиза, хъа думу Узуз бай хъиди. ⁸Хъа гучІбяхярин, масу туврударин, намуссузарин, йивну йихрударин, къяп்பийирин, фалчийирин, идолариз икрам апІрударин ва вари кучІляхярин иишв цИиндина гугутдинди убгурайи дагар ву. Му кьюбпи аյжал ву».

⁹Хъасин ккудукІру ургуб бедбаҳтвалар айи захар хъайи ургур малайикарикан сар малайик гъюро ва узухъди улхуру:

«Лиг, узу увуз швувш улупидизавуз – Чилан шив!»

¹⁰Хъа дугъу узу, Гираими Рюгъну ацІнайир, зурба ягъли дагъ-диона гъурху ва узуз завариан Аллагъдихъан ис шулайи Гира-ми Шагъур – Ерусалим улупу. ¹¹Думу Аллагъдин адну нурлу дапІнайи. Шагърин крабчІурайивал багъа гъванаринсиб, яшма-йихъна гъубушбисиб, хрусталси марцциб вуйи. ¹²Дидлан, йицІикьюр урап алди, зурба ягъли бару илтІбкІнайи. Хъа урна-рих – йицІикьюр малайик. Урнариин ччуарар дидикІнайи – му ччуарар Израилин баярин йицІикьюб тухмин ччуарар вуйи. ¹³Шубуд урнар ригъ гъудубчІвру терефнахъинди лигурайи, шу-буд – кафарийихъинди, шубуд – къиблайихъинди, шубуд – ригъ алабхъру терефнахъинди. ¹⁴Шагърин цал йицІикьюб шибритІи-ин дивнайи. Дурариин Чилан йицІикьюр марцци вакиларин ччуарар алийи.

¹⁵Узухъди гафар апІурайи малайикдихъ, шагъур, дидин урнар ва цалар ерцуз гъизилин маргъ хъайи. ¹⁶Шагъур юкъуб мурччв-нануб вуйи, дидин ягълишинна яркъушин саб вуйи. Малайикди маргълихъди шагъур гъеебцу ва ярхишин къюд агъзур километр-Іан зина удубчІву, хъа дидин яркъушинна ягълишин, дидин ярхивалин къадар айидар вуйи. ¹⁷Дугъу цал гъеебцу, дидин ягъ-ливал, малайикди ктухубси, инсанарин гъисабариинді, йирхъ-цІур метр удубчІвнийи. ¹⁸Цал яшма кІуру багъа гъвандикан дапІнайи, хъа шагъур – чаантина рябкъру шошесиб марцци гъизиликан. ¹⁹Шагърин шибритІар гъамцдар гъар жюре багъа гъванарихъди дабалгнайи: сабпи багъа гъван – яшма, кьюбиб – сапфир, шубубиб – халцедон, юкъубиб – изумруд, ²⁰хъубиб – сардоникс, йирхъубиб – сердолик, ургубиб – хризолит, ми-жибиб – берилл, урчІвубиб – топаз, йицІубиб – хризопраз, йицІисабиб – бирюза, йицІикьюбиб – аметист. ²¹ЙицІи-кьюд – йицІикьюб жемчугдикан, гъарсар урнар сабди вуйи



жемчугдикан дапІнайи. Шагърин кІулин кюче чаантина рябкъру шюшеси марцци гъизиликан вуйи.

²² Узуз шагърить Аллагъдин Хал гъябкъюндарзуз, гъаз гъапиш Учв, Агъа Аллагъ, вари хилий Дибиснайир ва Чил – гъадрар Чпи Хал вуйи. ²³ Шагъур аку апІуз я ригъдин, я вазлин акв лазим дайи, гъаз гъапиш шагъур Аллагъдин аднахъди аку дубхънайи, ва Чил – дидиз акв Тувур вуйи. ²⁴ Халкъар Дугъан аквнальди гъягъиди ва дюн’яйин паччгъари душваз чпин заанвал хибди. ²⁵ Дидин урнар вари йигъан арцнун хъиди, хъяркыну хъидар – душвавъ иишв мучІу шлуб дар. ²⁶ Душваз халкъарин заанвал ва гъюрмат хибди. ²⁷ ФукІара чиркинуб душвазди учІвидар, душвазди алчагъвал ва кучІал апІрур учІвидар. Душвавъ анжагъ Чилахъ хайи Умрин китабдиль дидикІнайидартІан учІвидар.

Умрин нир

22 ¹Хъасин малайикди узуз хрусталси нур туррайи умрин штун нир улупуз. Думу нир Аллагъдинна Чилан тахтнаккан ккудубчІвурайи ² ва кІулин кючейиансина гъябгъюрайи. Нирин къобиб гъирагъарихъди умрин гъар хъайи. Диdigъ йисан йицІикюб раЖари йимишар гъиршру, гъар вазли мейва хуру, дидин Кажар халкъар сагъ апІуз вуйидар ву. ³ Мушвавъ агъ-сузу кайира гъич фукІара хъибдар. Гъаму Шагърий хъибди Аллагъдинна Чилан тахт, ва Дугъан гъуллугъчийр Гъадгъан гъуллугъналь хъиди. ⁴ Дурализ Аллагъдин маш рябкъиди, ва Дугъан ччвур дуралин машниин хъибди. ⁵ Душвавъ сарун мучІу шлуб дар, дурализ сарун акв тувру алатдин акв, я ригъдин акв лазим хъибдар, гъаз гъапиш дурализ акв Агъа Аллагъди апІиди. Дурали паччагъвал айсариан айсарииз апІиди.

⁶ Малайикди гъапизуз:

«Му гафар дугъридар ва гъякълудар ву. Чан Рюгъ пайгъамбрализ тувру Агъа Аллагъди Чан гъуллугъналь айидариз багарихъди хъуз ккайиб улупуз Чан малайик гъальну».

Гъюрур – Иса

⁷ «Магъа, Узу багарихъди гъидиза!

Хушбахтавар ву гъаму китабдин пайгъамбарвалин гафар та-мам апІрур!»



⁸ Узуз, Югъандиз, гъаму вари гъябкъюнзуз ва гъеебхъунзуз. Узуз гъеебхъиган ва гъябкъиган, узуз гъаму вари улупу малайикдин ликариккна, дугъаз икрам апIуз кIури, ис алахъза. ⁹ Хъа малайикди гъапизуз:

«Лиг, мици мапIан! Узура гъаму увуси, яв гъардшарси, пайгъамбарси ва гъаму китабдин гафар тамам апIрударси, лукI вуза. Аллагъдин улихъ икрам апIин!»

¹⁰ Хъа дугъу гъапизуз: «Гъаму китабдин пайгъамбарвалин гафар мииликан! Гъаз гъапиш ваҳт сарун хъудубкъна. ¹¹ Гъит, ахмакъ адми чан ахмакъ'валар апIури гъузри, гъит, алчагъри чан алчагъвалар апIри, гъит, ужури ужувлар апIри, ва гирами вуйир гирамиди гъузри».

¹² «Магъа, Узу багарихъди гъидиза! Ва гъардиз, чав гъапIу ляхнариз дилигну, тувру Йиз къимат Узухъди хъазухъ. ¹³ Узу вуза Альфа ва Омега, Сарпир ва КкудубкIур, Эвел ва Аххир».

¹⁴ Хушбаҳтаврар ву чин палтар урччурайидар! Дураиз умрин гъарихъна ихтияр а, дурарихъан Шагъриъ урнарианмина учIувуз шулу. ¹⁵ Амма хуйир, фалчийр, къяппийр, йивну йихрудар, иодлариз икрам апIрудар, кучIал ккунидар ва думу арайиз хрудар вари Шагърин Чатинди гъузди.

¹⁶ «Узу, Исаи, учвуз гъаму шагъидвал тувну, жямяльтарин улихъ ктибтуз Йиз малайик гъаунза. Узу вуза Давудрин Чив ва Кюл. Узу вуза гвачIиндин аку Хяд».

¹⁷ Рюгънора ва швшувра кIура: гъач!

Хъпехъурайирира, гъит, йипри: гъач!

Дахаргнайирра, гъит, гъюри!

Шлиз ккундуш, гъит, умрин шид чIанади гъадабгъри!

¹⁸ Гъаму китабдин пайгъамбарвалин гафар ерхъурайидариз узу улихъимиidi кIураза: эгер шли гъаму гафариин фукIа-мукиа иливиш, дугъ'ин Аллагъдира гъаму китабдиъ ктитурайи бедбаҳтвlar иливиди; ¹⁹ хъа эгер шли гъаму пайгъамбарвалин китабдикан фукIа-мукиа ктабгъиши, гъаму китабдиъ ктитурайи умрин гъаркан ва Гирами Шагърикан Аллагъди дугъан пай ктабгъиди.

²⁰ Шли гъамдикан шагъидвал апIураш, Дугъу кIура:

«Ав, Узу багарихъди гъидиза!»

Ав гъаци ибшри, гъач, Агъа Иса!

²¹ Агъа Исаин уж'вал варидализ ибшри!

Читин гафар

Аллагъдин Агълиж – Иса Месигъдин ччуурарикан саб, фицики гъарсар касдин гунгъарихъанди Думу, агълижси, хачриин гъурбан гъахын.

Аллагъдин Паччагълугъ – Аллагъдин гьюкмин девир. Аллагъдин Паччагълугъдьи учІвуб – Аллагъ ччин паччагъ вуди хъуб. Жараси – женнет.

Аллагъдин хал – Ерусалимдьи адигъабхьи Гирами дарамат. Анжагъ гъадушвацІан жугъдари Аллагъдиз гъурбнар хури гъахъундар ва гъацира машкврази гъадушвацІан уч шули гъахъундар. Сифте думу Дарамат ихъ девир гъайиз 10-пи айсрий Сулейман паччагъдин деврий дивну. Хъасин, ихъ девир гъайиз 5-пи айсрий, жугъдар Вавилондиан йисирвалиан гъафиган, дарабгънайиб тазатІан дивнийи. Ихъ деврин 1-пи айсрий Гъирод паччагъди Дарамат жараси тикмиш гъапІнийи. Исаид улихъ ккимиidi дупнайиси, ихъ деврин 70-пи йисан му дарамат Римдин къушмари ккидипнийи ва дидхъанмина таза ала-Пундайи.

Аллагъсузар (Аллагъ айгърудар) – Иса жилиина гъайиз, Аллагъ садар жугъдарицІан айгъяди гъахъундар, гъаз гъапиш Аллагъди Учв дурапиз Къанундилантине айгъю гъапІну, имбууну халкъа-риз айгъяди гъахъундар, я Аллагъ айгъяди ккуунди гъахъундар, айгъяди ккуундар жугъуд халкъдик ктикури гъахын.

Аълимар – лигай: къанунчийириз.

Ахъюну малла – жугъдарин диндин кІулин гъуллугъчи. Кюгъне Йикъярин вахтари дурапи халкъди гъапІу гъурбнар къабул апІуйи ва Аллагъдиз ургуйи.



Вакилар – Аллагъди кадагънайи ва гъаънайи адмийир. Исаи гъамци, Чав ктагъу ва Чахъди лицури гъаъхи 12 ученикдиз күйи. Дураги инсанарихъна Ужувлан хабар рубкыну ккундий.

Гирами китабар – Гирами Рюгъниинди дидикІнайи вари китабар: Мусайин хъуб китаб, Пайгъамбаратин китаб, Мяълийирин китаб ва Цийи Йикъаргин китаб.

Гирами чадур, Шагъидвалин чадур – Аллагъдиз хал дивайиз Дугъаз икрам апIрушв ва гъурбнар хрушв. Думу, Аллагъди гъапибси, дапІнайиб вуйи. Му мици Кюгъне Йикъаргин вахтари гъабшиб вуйи.

Гунгъар гардандъ дисуб – Аллагъдин улихъ жувван гунгъарин гъаврий ахъуб ва цИийи, гунгъар ктру уымур ккебгъуб.

Гъурбан апIрушв – жилихъян ягъалди, гъвандикан, батIрикан ясана рукъкан дапІнайишв. Гъурбан гъапIуб гъадушв'ин дипуи ва Аллагъдиз убгүйи. Иса жилиина дуфнайи вахтна, гъурбан апIрушв Аллагъдин хулаъ айи. Душв'ин гъурбан гъапIуб убгуз Аллагъдин гъуллугъчиризтIан (маллайир) ихтияр ади гъабхъундар.

Давудрин Насил – Месигъдиз гъаци кIуйи. Думу Давуд паччагъдин насларикан духъну ккундий.

Динар (динарий) – улихъ вахтари сад йигъандин зегъметнахъ тувру кымат.

Заан диванхана (синедрион) – жугъдарин диван апIру гъюкум айи заан мажлис. Думу 70 касдикан ибарат вуйи. Иса жилиин ва жугъдар Рим вилаятдин гъюкмикк скайи вахтна, заан диванханайин кIулин къарап, анжагъ жугъдарин жилариин или Рим гъюкмин ихтияр гъабхъиган, къувватнаа убчIуйи.

Зилотар – жугъдарин диндин саб десте. Дурагиз жара миллетарихъян жугъдарин дин марцциди уьбхуз ва Римдин гъюкмиккан Израиль дявдииндига азад апIуз ккундий.

Инсаниятдин Бай – Кюгъне йикъаргин китабарий Месигъдиз гъаци кIуйи. Исаи, Чаз гъамци кIури, Учв Месигъ вуйиб улупнийи. Сакьюдар Гирами китабарыра Месигъдиз гъаци кIура.

Къанун – Муса пайгъамбиз Аллагъди туву табшурugъар айи Гирами китабарин кюгъне саб пай. Дииз Таврат, Тора вая Мусайин хъуб китаб кIури шулу.



Къанун тамам апIуб – вари жугъдарин буржи. Думу Къанундиз, адми фици яшамиш духыну ккундуш, уымрий фу гъадагъа вуш, жара гьюокуматдиндарихъди фици духыну ккундуш, мидланна гъайри, гизаф къадар аьдатарикан, хурагарикан ва жара гизафубдикан дибикIна.

Къанунчийр – инсанариз Къанундин къайдийр улупру гъуллугъчийр. Жугъдарин дуариз аыхю гьормат айи.

Лавшарин машквар – Пасха машкврихъан дишла ургуд йигъан тебрик апIру машквар. Думу вахтна анжагъ дун ктру ультIан (лавшартIан) дитIну ккундайи.

Левитар – дуар Аллагъдин гъулугъчийр (маллийр) даршра, дуарари, Аллагъдин хуласть мукъмар йивури, Аллагъдин ад за апIури, гъурбан апIурайи гъяйванатар ургуз ва жара ляхнариз кюмекчийр гъахъну. Мидланра гъайри, дуарии Къанундин дарсар туври гъахъну ва халкъдин арайиъ дуар мялимарси вуйи. Мици Левийин тухмиан вуйи адмииризтIан апIуз ихтияр ади гъабхъундар.

Маллийр – Ерусалимдиз айи Аллагъдин хулан гъуллугъчийр. Дуарин вазифа, Къанундиз улупнайиганси, гъурбнар хуб, ургуб вуйи.

Манна – Мусайин хиликкди гъумран чюллериъ Израиль халкъ уъгънайи вахтари Аллагъди дуариз зав'ан гъапIри гъабхъи хураг.

Месигъ – Гирами китабариъ улупнайиси, инсанар уърхбан бадали Аллагъдихъан Дуфнайир.

Мист – Гирами китабар урхбан ва гъацира ккарагбан бадали жугъдар уч шлу хал. Жугъдарин мистарь гъар султ йигъан уч шуйи. Мистарий Кюгъне йикърар урхуз ва дуарин мяна ктибтуз гъар жугъудиз ихтияр ади гъабхъну. Жугъдар яшамиш шлу гъар шагъриъ, гъуласть мистар ади гъахъну. Аьдат вуйиси, дуарин яшайиш гъаддилан илтIибкIайи, ва мистан аыхюрра варитIан гьорматлу кас шули гъахъну.

Мъльдийирин китаб – Гирами китабарикан саб. Дииз 150 мъли дахил шула. Дуарии Аллагъдин аднакан, аьжаликкан адмииир уърхюзди Аллагъдиз баркаллагънакан, Аллагъдин зурбаваликан, Аллагъдиз ккарагбакан кIура.

Налукар уч апIур – Къанун дюрюбхди, Римдин хазнайиз пул уч апIур жугъдар. Дуар тмуну жугъдариз лап даккни инсанар вуйи.



Пайгъамбар – Аллагъдин гафар deerхъну, дураг адмийириз ктитрудар. Пайгъамбар Иса гъайиз ади гъахъну. Аллагъдин пайгъамбар жугъуд адмийикантан шлуб дар, гъаз гъапиш Аллагъди гъадму Чан халкъдигъянтан пайгъамбар гъядягъюри гъахъундар, фицики дураги Аллагъдин Къанун хъаптуз улупури гъахъну. Пайгъамбариин китабар Кюгъне йикъарин пайназ дахил шула.

Пасха – Египетдин лук'валиккан ата-бабийир азад хувал к'ваина хру жугъдарин к'улин машквар. Пасхайн машквар гъар хъадукра апрелий Ерусалимдь къайд аптури. Пасхайн хурагназ, айдат вуйиси, агълиж дубккну ккундийи.

Саддукийир – жугъдарин диндин саб десте. Дураги Къанундизтан гъуллугъ аптури гъахъундар. Гъаддиз лигну, дураг гъачидар чииви хувалихъ хъугъри гъахъундар, фицики, чпи фикир аптурайиси, Къанундиз дидкан дибиктну адруган.

Султ йигъ – гирами ва гъяфтайн ахиримжи йигъ. Му йигъ марцци йигъ вуди гъисаб аптурайи. Къанундиз лигну, султ йигъан лихуз гъадагъа аптурайи. Жугъдарин ригъ алабхъбан къяляхъ закурин йигъ ккебгъуйи. Гъаддиз, жвуми йигъан ригъ алабхъбалан къяляхъ тап султ йигъан ригъ алабхъайизкъан лихуз ихтияр ади гъабхъундар, думу йигъ Аллагъдиз бахш даптну ккундийи.

Ужувлан хабар – Аллагъди тувнайи Гаф. Гъадму Гаф уымриз Аллагъди Иса Месигъдилантана арайиз гъабхну. Гъадгъулантана вари инсаниятдиз чпи урхюз рякъ ачмиш гъабхъну – магъя Аллагъдихъан дуфнайи Ужувлан хабар жилариин гъарсар касдиз.

Ученикар (Исайин) – Исайихъ хъугънайидар, Дугъан тереффар, Дугъан гаф агъю аптурайидар ва Дугъан рякъ дебиснайдар.

Фарисийир – жугъдарин диндин саб десте. Дураги Къанундиз улупнайиб гъярф-гъярфнаъди тамам аптури. Халкъдин арайиль дурагиин ахю гъюмат айи. Дураг, чпин аygъювализ лигну, гизаф фурс кайидар вуйи.

Хач – иливбан ишараси чиб-ччик киттнайи кьюб хамхар. Дурагикан сабунуб жилий убсуйи, хъя гъатмунуб дидик кабсуйи. Рим гъюкми тахсиркраг гъацдар хачарик карсуйи. Адмийирикан



ЧИТИН ГАФАР

аъзабар кчюкъбан бадали, дураги дураг хачрак къумар йивну карсуйи ва йиклайизкъан гъаци кирхну гъитуйи.

Хъугърударин мажлис, ясана хъугърудар – му гаф къюб мянай-инди ишлетмиш апIури шулу: 1) Саб йишвахъ уч шлу Иса Месигъдихъ хъугъру адмийир. 2) Вари дюн'я вуйибси яшамиш шулайи Исаихъ хъугъру адмийир.

Хъуцурарин машквар (Бегъер ккадабцIбан машквар) – бегъер ккадабцIбалан къяляхъ апIру машквар. Жугъдари думу машквар, Азадвалин (Пасхайн) машкврихъан хъцурпи йигъян тебрик апIури шулу.

Штуан апIуб – гунгъар гардандиъ дисбан ва гунгъарихъан марцц хъпан лишан вуди, штукк ккеркну, таза беден хъибшу мисал вуди, ккудуучIувуб. Мици, Аллагъди дупну, Исаин терефкра-ри апIури шулу, гъаз гъапиш Исаихъ хъугъур гъашигантIан женнетагъли хъуз шлуб дар. Му аьдатну инсан Аллагъдиз баҳш гъахъивал ва цийи уьмур ккебгъувал улупура.

Ччвурар

Аюб – аыгъ апIуз даршлу аyzабар аыгъ гъапIу кас. Дугъкан, «Кюгъне Йикърарин» «Аюб» китабдiй дибикIна.

Вавилон – Иса Месигъ гъайиз улихъна вахтари Вавилон вила-ят жугъуд халкъдин лап яман душман вуди гъабхъну. Щийи Йикърарналь «Вавилон» кIуру гаф саспи йишвариъ иблисдин вая шейтIин гъюкум вуди ишлетмиш апIура.

Гоморра – ДубкIнайи (Мертвое) гъюлин гъирағъдихъ хъади гъахъи хъуб шагърикан къюбдиз Гоморра ва Содом кIуйи. Гъадму шагъариъ яшамиш шули гъахъи адмиирии апIури гъахъи гун-гъариз дилигнү, Аллагъди зав’ан мархъси цана гугут дубгъну, гъадму къюбиш шагъар гъургну.

Гъарун – Муса пайгъамбрин аыхюну гъардаш. Аллагъдин гъулугъ-наш хъуз ва Аллагъдиз Израиль халкъдихъанди гъурбнар хуз, ан-жагъ Гъарундиз ва дугъан насларизIан ихтияр ади гъабхъундар.

Гъирод – хъади-хъади гъахъи юкъур паччагъдиин алди гъабхъи ччвур. 1. *Зурба Гъирод* – вари Палестина уылкейин паччагъвал апIури гъахъи жугъдарин паччагъ. Гъадгъу паччагъвал апIурайиган, Иса Месигъ бабкан гъахъну. 2. *Гъирод Антипа* – Галилей уылкейин паччагъ, Зурба Гъироддин бай. 3. *Гъирод Агри-на* – Зурба Гъироддин балин бай (хтул). Дугъу Палестинайин аыхювал апIурайи вахтна, Исаихъ хъугърударихъ думу ижми-ди хъергри гъахъну.

Давуд – Ягъудайин тухмиан гъахъи Израилин варитIан маш-гъур паччагъ. Пайгъамбари, гъякъди дюн’яйин паччагъвал апIури Месигъ Давудрин насларикан хъиди, кIури, улихъми-ди кIури гъахъну.



Ибрагым – Аллагъди гъаму пайгъамбрихъди йикъар гыйитI-нийи. Израиль халкъ гъамгъулантина ккебгъра. Ибрагим Аллагъдихъ хъпехърур, Аллагъдин хъугъ'вал алир вуйи, ва Аллагъди думу дугъри кас вуди гъисаб гъапIну.

Ильяс – Кюгъне йикъарнан вахтари гирамидарикан сар ва адлу пайгъамбар. Думу Чивидимиidi аэршариз гъурхну. Израиль гъокуматдин ахюр вуйи Ахавдина дугъан хпири кучIлин аллагъариз икрам апIурайиган, Ильясди дурализ Аллагъдин гафар гъапнийи. Гъаму дюн'яйиз гъюз Месигъ гъязур гъапIур Ильяс ву.

Исакъ – Ибрагымдинна Сарайин бай.

Мелхиседек – Салим кIуру иишван паччагъ, Аллагъдин гъуллугънаь айир. Ибрагим пайгъамбри дугъаз, дявдиъ гъалиб духъну гъюрури, чахъ хъайибдикан йицIубпи пай тувнийи. Гъаддин къяляхъ, Ибрагымдиз уж'вал апIин кIури, Мелхиседек Аллагъдиз ккарагнийи.

Муса – пайгъамбар, жугъдарин варитIан машгъур кас, дураин ахюр. Дугъу чан халкъ, жугъдар, Египетдин йисирваликкан ккадальну. Дугъу Аллагъди туви Къанун чан халкъдихъна гъурбкыну.

Нюгъ – пайгъамбар. Аллагъди, гъадмугандин дюн'я, илипну шид, ккидипайиз, Нюгъдиз гими апIин гъапну. Гъадиъди думу ва дугъан хизан Аллагъдихъ хъугъувалилантана айжалнанкан гъюрхну.


Сарай – Ибрагим пайгъамбрин хпир, Исакъдин дада.

Содом – лигай: Гоморрайиз.


Сулейман – Давудрин бай. Давудрин къяляхъ Израиль уълке-йин паччагъ. Сулейман паччагъ вуйиган, Израиль гъокумат гизаф девлетлу ва къувватлу шулу. Сулейманди Ерусалимдиз Аллагъдиз сабпи хал (дарамат) дивру.

Юнус – пайгъамбар, шубуд йигъан балугъин фуниъ ади гъашир.


Якъуб – Исакъдин бай, дугъаз Израилра кIури шулу.



**Ерусалим
Месигъ Иса жилиин
алигандин деврий**




Tуролеон дерре




Horace Knowles © The British & Foreign Bible Society 1954, 1967, 1972


Вакил Павели Ужувлан
хабар рабгъуб.
Шубубли сияльгат.



**Вакил Павели Ужувлан
хабар рабгүуб.
Къобни сиягъат.**



**Вакил Павел Ужувлан
хабар рабгъуб.
Сабни сиягъат.**



**Вакилл Навели У жувлан
хабар раббъуб.
Юкъубии сиягъат –
Рим шағыриз.**

Рим
Шубуб гостиинища
Путевона


ИТАЛИЯ


СИРИЯ
Мира
Книд
ЛИКИЯ
РОДОС
Сидон
Кайсария
Ерусалим

КИПР
КРИТ
Гими дебккру ужуб йишв

СИЦИЛИЯ
Рития
Сиракузза
МАЛЬТА

Квялан гыюл





ЕРУСАЛИМ. ЕЛИОН ДАГЪДИЛАН РЯБКҮЮРАЙИБ

(ригъгуудубч Іврүшвхбан)

Сулейманди диву Аллагъдин хал алди гъабхишиш.

Гъамус мушв'ин Умран мист ал.



ЕРУСАЛИМ ВА ЕЛИОН ДАГЪ.

Хба Ерусалимдиз багагъ гъашиган, дидиз лигури, Иса гвишу. (Лк. 19:41)



СИНАЙ ДАГЪ

*Агъа зав'ан Синай дагъдина, дидин кIакIиниа гъафи. Агъайи Мусайизра
душв'ина дих гъапIу. Аскканзина думура ккудучIу.
(Адаувал 19:20)*



КЬИЛЗИ (ДУБКІНАЙИ) ГҮЮЛ

*Дурар вари Сиддим дерейиб кдикъниий. Гъамус душвайишв Кьилзи гъюли
ккапIна. (Хъувал 14:3)*



ФАВОР ДАГЪ

Кафарира кыблара Уеву яратмииш гъаплунва; Фавор ва Ермон дагъарра Яв чиҷурниин шадвалиб а. (Мяъл. 13)



НАЗАРЕТ

*Хба ииргъубпи ваз улубъиган, Аллагъди, Галилей уълкейиб айи Назарет кIуру шағъриз, Давудрин тухмиан вуйи Юсуф кIуру касдиз хъирснайи шурагъна Жабраил малайик гъаъру. Шуран чиҷур Мар'ям вуйи.
(Лк. 1:26, 27)*



ВИФЛЕЕМ

«Увура, Вифлеем, Ягъудия юрднан шагъарарин арайиъ сабдииндира бицЛиб
дарва, фицики ув'ан удучИвиди Йиз Израилин халкъ уърхру Аъхюор».
(Матт. 2:6)



ЯРДАН

Гъадму вахтна Ягъ'яихъна Галилей уълкейшан Иса гъюру. (Матт. 3:13)



КАПЕРНАГЬУМ

Думу, Назаредиан удуч Івну, Забулун ва Нафталим к Йуру юрдарин аутрафари
айи Галилей гыюлин гырагъдихъ хъайи Кафернагъумдиг дергру. (Матт. 4:13)



ГАЛИЛЕЙИН КАНА

Къюд үйгълан Галилей уылкейин Кана шагъриб сумчир шулу. Душваң Исайин да-
дара айи. (Югъ. 2:1)



ЯГЬУДИЯЙИАН САМАРИЯЙИЗ ВУЙИ РЯКЪ

Ягъудия уылке гъибтну, Агъа хъана Галилей уылкейиз гъягъюру. Дугъан рякъ
Самария юрданаантинा вуйи. (Югв. 4:3, 4)



ГЕННИСАРЕТ ДАГАР (ГАЛИЛЕЙ ГҮЮЛ)

Сабан, Аллагъдин гаф ебхъбан бадали, халкъ Исайилан илтИшшуру, хъа Думу Уч
Генисарет гъюлихъ дийигъну...(Лк. 5:1)



ВИФАНИЯ

*Пасхайн машквар ккебгъуз йирхъуд йигъ ккимиidi, Иса, Чав чIиви гъапIу
Лазар яшамиши шулайи Вифанияийиз гъюру. (Югъ. 12:1)*



РИМДИН КОЛИЗЕЙ

*МЕСИГЬДИН ТЕРЕФКРАРИЗ АЙЗАБ-АЙЗИЯТАР ТУВНУ, ГЫРМИШ ГЪАПУ ЙИШВ.
Хъа узуз... Исаикан шагыдвал дапIину ва Аллагъдин Гафналантинा ккахъну,
кIулар алдатIайи рюгъяр гъяркъзуз. Мурап, вягъши гъяйванатдиз, я дидин су-
ратназ икрам даралIдар ва унитГин, ясана хил'ин лишан капIуз
гъидритдар ву. (Ачмииш. 20:4)*